

# Kara Naroong-anta Nerakung Kongarana'

Naasioi New Testament

This Bible is copyrighted by the Bible Society of Papua New Guinea (papuanewguinean.bible) and is produced at cost by the Digital Bible Society (dbs.org). This translation is made available to you under the terms of the Creative Commons Attribution-Noncommercial-No Derivatives license 4.0.

This Bible

PUPU'.....	4
MAATIU'.....	9
MAAKA'.....	47
LUUKE'.....	69
JOONI.....	108
KARA OKOVURI NKANUKA.....	135
ROOMA'.....	171
1 KOORIN.....	187
2 KOORIN.....	203
KALESIA.....	214
EPESES.....	220
PILIPAI.....	225
KOLOSI.....	229
1 TESALONAIKA'.....	233
2 TESALONAIKA'.....	237
1 TIMOTI.....	240
2 TIMOTI.....	245
TAITAS.....	249
PILEMONI.....	251
IIBURU.....	252
JEEMISI.....	265
1 PIITA.....	270
2 PIITA.....	275
1 JOONI.....	278
2 JOONI.....	283
3 JOONI.....	284
JUUDE'.....	285
MAKENSI'NUNG OO.....	287

# PUPU'

## Ookara Kapoo'nanka Kumponing Pupu'uu'na'koong Minkunaa

1 Tenang tutuna' masipo' Kumponing aa'ning paning ee'noko kansi' nkovuu' nang. <sup>2</sup> Aung kansi' tee, emu' otoi'na' otoaruko'; naroomparava' otoko'; tamung domaang-po'ningmeeva otoko'. Dau-eta mutaanange daka'pui otoko' tee poonaru' baka otoko, ee'noko tee Kumponing bakaang Tanuaang tee-koo pirung-koo daue aavinuko.

<sup>3</sup> Tenang Kumponing karoma aa'pui, "Araka, ta-vo'daravai," ee'noko tenang araka oro'paru'. <sup>4</sup> Ee'noko Kumponing tee araka tampa' oovura dotuarara tee araka simpe'uu' mutaanang-eta. <sup>5</sup> Ee'noko Kumponing tee araka doonaa' tampuu' ee'noko mutaanang muung tampuu'. Teketa aa'nou' muung tankinuko tane'pui ee'noko te'mung te'mung tutuna'na'mung.

<sup>6</sup> Ee'noko Kumponing napo' karoma aa'pui, "Meeroo'navaro doona otoai tankaampuresi pirung boonaru' ee'noko ntong kamo'koong." <sup>7</sup> Tee meeroo'navaro tee, Kumponing teing ntong meu' tankaampuree'naang nkovuu' boonaru' daunaru'keta. <sup>8</sup> Ee'noko Kumponing tee meeroo'navaro doona auvi'au tampuu', teketa aa'nou' muung tankinuko tane'pui ee'noko te'mung te'mung ke'munta'na'mung.

<sup>9</sup> Teketa napo' Kumponing aa'pui, "Aia, ntong paning-koo boong otoing naro' poontarako koverenoo' oro'paravai," ee'noko tee' masika' nkoaru'. <sup>10</sup> Teketa Kumponing te' koverenoo' kansi' tampuu' ee'noko tee ntong poonaru' pirung tampuu'. Ee'noko Kumponing tampa' oovura dotuaru'.

<sup>11</sup> Ee'noko Kumponing napo' karoma aa'pui, "Kansi'koo baa' ee'noko koi'nanka amutemurii' dupuai, aa'noko keenavaang, ee'noko pora'kooning, ee'noko sinampuai ookara muu' amutemurii' kantena'." Ee'noko tee' ee'na' nkoaru'. <sup>12</sup> Kansi'koo amutemurii' baa' ee'noko koi'nanka amutemuu'na' sinampumaing dupuu', keenavaang ee'noko pora'kooning, teing-koo kuunge napo' oki'nareka' sinang nkoarikoo' amutemuu'na'. Ee'noko Kumponing tampa' oovura dotuaru'. <sup>13</sup> Teketa aa'nou' muung tankinuko tane'pui ee'noko te'mung te'mung beenana'mung.

<sup>14</sup> Teketa napo' Kumponing aa'pui, "Aia, arakananka tavo'dariai meeroo'navaro-koo meu'ke teke paning-koo doong ee'noko muung simpe'aareang, ee'noko teke aing aa'ning taa'ni'antavaari otoromaatoai: doo-

nanka, kaarananka ee'noko mare'nanka. <sup>15</sup> Ee'noko teke meeroo'navaro-koo paning-koo arakavariri otoromaatoai teketa kansi'aape araka po'antavaamaatoai." Ee'noko tee' ee'na' nkoaru'. <sup>16</sup> Ee'noko Kumponing tee' araka pankeng kenaanka nkovuretu', narung aa'na' araka doonaa' araka-koo miring duaa' nkovuu'. Ee'noko nii'nung baru' araka deeaung muunga araka-koo miring kaara nkovuu'. Napo' beento'nanka nkovuru'. <sup>17</sup> Teing paning-koo meu' nkovurira sipuru' teketa kansi'aape araka po'antavaamaato'naang. <sup>18</sup> Ee'noko teketa doong ee'noko muung tanatavaamaatoai, ee'noko napo' arakananka ee'noko mutaanang tankaampaarematoai. Ee'noko Kumponing tee' ee'na' tampa' oovura dotuaru'. <sup>19</sup> Teketa aa'nou' muung tankinuko tane'pui, ee'noko te'mung te'mung kare-nana'mung.

<sup>20</sup> Ee'noko Kumponing napo' karoma aa'pui, "Ntong ee'noko pirung ookarai kapoo'nanka amutemurii' domantoo'nankai maanto'aavai. Ee'noko barenankai porora meeroo'navaro a'dei' auvi'au puraanaama maanto'aavai." <sup>21</sup> Tavi' pankenanka nkovuru' pirung-koo kuung otoromaing ee'noko ookara oki'nareka' kapoo' nanaamaing ntong-koo kuunge, ee'noko ookara bareng amutemurii'. Ee'noko Kumponing tampa' oovura dotuaru'. <sup>22</sup> Ee'noko Kumponing ookara biraankevuru' aa'puma, "Ookara kapoo'nanka pirung-kooning parerima berentarima pirung maanto'eriai, ee'noko ookara barenankai tee'ke, parerima berentariai kansi'koo." <sup>23</sup> Teketa aa'nou' muung tankinuko tane'pui ee'noko te'mung te'mung pa'noko'na'mung.

<sup>24</sup> Teketa napo' Kumponing aa'pui, "Enang kansi'koo kapoo'nanka amutemurii' domantoo'nanka tavo'dariai: ookara kau'karenaumo bau'naananka, ee'noko biikoori, ee'noko ookara kapoo' kansi'koo daue nanaamaing." Ee'noko tee' ee'na' nkoaru'.

<sup>25</sup> Kumponing kau'karenaumo pora'kooning amutemuu' nkovuru' ee'noko napo' bau'naananka amutemuu' tee' nari' nkovuru' ee'noko napo' teing kansi'koo daue kakanaamaing tee' nari' amutemuu' nkovuru'. Ee'noko Kumponing tampa' oovura dotuaru'.

<sup>26</sup> Teketa napo' Kumponing aa'pui, "Aia, naningnamuu' nantoong nii' pina' oro'nuka nkoarampai, nikaang oro'oro'noo' siempuio', ee'noko teing ookara kapoo'nanka tanatavaariai, aa'ning: tavi' pirung-koonanka, barenankai auvi'au-kooning, kau'karenaumo datauraa'nanka, ee'noko pora'koonanka, ee'noko napo' teing ookara kapoo'nanka kansi'koo daue nanaamaing." <sup>27</sup> Tee'koo Kumponing naning baka

bakaang oro'oro'nou' siompuio' nkovuu'. Tee' ee'na' nari' oro' Kumponing-pina' nkovuu', aa'nou' donkaani ee'noko manikuma nkovuretu'.<sup>28</sup> Ee'noko Kumponing biraankevurema aa'poretu', "Dee' parerema berentareai ee'noko deurukaa'ke ookara kansi' maanto'aara ookara kapoo'nanka tanatavaariai tenairu-koo. Ee'noko dee'ke tee aa'noaing ookara tavi' pirung-kooning tanataverereriai, barenanka auvi'au-kooning ee'noko ookara kapoo'nanka kansi'koo daue nanaamaing."<sup>29</sup> Ee'noko Kumponing aa'poretu', "Oovereko, ninge tee dee' arompesing ookara kapoo'nanka sinampumaing ookara-koo kansi'koo daue otorinanka; dee' deekaang taamang, ookara baa'nanka, koi'nanka, keenavaang ee'noko pora'kooning naroka'.<sup>30</sup> Ee'noko ookara kau'karenaumo-nanka kansi'kooning, napo' barennanka auvi'au-kooning ee'noko ookara kapoo'nanka kansi'koo daue nanaamaing, ee'noko ookara kapoo' domantoo'nanka, ninge teing ookara kapoo' dupumaing maa'koo avoronsing." Ee'noko tee' ee'na' nkoaru'.<sup>31</sup> Ee'noko Kumponing ookara kapoo'nanka teie nkovuru'ning tampa' masika' oro'pariko oovura dotuaru'. Teketa aa'nou' muung tankinuko tane'puu', ee'noko te'mung te'mung ~na'mung-taa-na'mung.

2 Tee' ee'na' nari' Kumponing aa'ning paning ee'noko kansi' bakevuu', ee'noko ookara kapoo'nanka mmau' nari' bakevuru'.<sup>2</sup> Ee'noko Kumponing ookara bakaang nko-nko nkovuru'nanka ~na'mung-taa-na'mung bakevura, te'mung ~ke'munta-taa-na'mung uaavou'.<sup>3</sup> Ee'noko Kumponing te'mung ~ke'munta-taa-na'mung biraankevura meeka'antavuu', ai' te'mung ee'na'mung tee, tee uaavou'na'mung bakaang nko-nko kansi' nko-koong bakevura.

#### Tampa' Kuunau' Siraka'anta Kumponing Naninka Nkovuretu'na'

<sup>4</sup> Tenang tutuna' Kumponing kansi'naanka paning nkovuu'na'koong minkunaa aung: <sup>5</sup> Tenang Ovinge Kumponing kansi' ee'noko paning nkovuu'ning kapoo' keenavaang tovang koi' dovang baa' otoaruko kansi'koo, mme' Kumponing apo' botovuaruko ee'noko naning otoaruko' mintoong nkovupeu'ning. <sup>6</sup> Nka ntonoo' tenang ee'ning tavo'arako' oki'nareka' kansi'koo dau tompatempa'anta-koo. <sup>7</sup> Ee'noko tenang ee'ning teie Ovinge Kumponing naning kansi'koong da'mong-etab nkovuu', ee'noko ke'nie deto uupuvura domaang avuu' domang-antavuma ee'noko tee naning tenang domaang-po'nung deemparu'.

<sup>8</sup> Teketa Kumponing tee naning nkovura tampoo' temu' nerievuu'nou' sipuu' teka Iideni'ka duaa' pomanoo'aapea. <sup>9</sup> Tenau tenau Kumponing koi'nanka amutemurii' tampa' oro'nanka keempuru'nau ee'noko sinang maa'koo tamparanankai. Ee'noko meeroo' tenau-koo koi' kevarira sipuretu': navari domaang isikung avu'navari; nii'navari noru' aa'ning tampara ee'noko orara avu'navari.

<sup>10</sup> Ee'noko teing ntong kareriiru te' Iideni' tavearikoo' tenau mintonau duu'paama, teketa nari deempari

siarakoo'.<sup>11</sup> Tutuna'nari teing-koo miring Piison-nari, Aavila nameng, koro-po'nameng, korovui pomanari. <sup>12</sup> Tee koro temeng-koong tampara ee'noko narung napo' koi' tampa' nuuraa' otomanoo' miring deliam. Napo' kapang tampa' oro'nanka-po'nou', miring kaneliani, ereng naakiomaing. <sup>13</sup> Keriira-nari ntong miring Kiong-nari, Kus-nameng-eta pomanari. <sup>14</sup> Beeriru-nari miring Taikirisi-nari, Asiria-nameensi'koo duaa' pomanoo'aapeita pomanari. Kareriiru-nari miring Iuperetisi-nari.

<sup>15</sup> Ee'noko teie Ovinge Kumponing tee naning nkavura te' Iideni'nau-koo sipuu' tenau mintoompuma teke tarevui otoo'naang. <sup>16</sup> Ee'noko Ovinge Kumponing botovuma aa'puu' tee naning, <sup>17</sup> "Ookara koi'koong sinananka mintoong-koo otinging-koong tamung naroketa maa'emaatoaing, teka tevari koi'navari noru'anta nka-navari teing aa'ning-koo tampara ee'noko orara dake maa'eauka' tee sinang tevari-koong, ai' te'mung da' tevari-koo sinang maa'eaina'mung da' tee dooaing."

<sup>18</sup> Teketa Ovinge Kumponing aa'puu', "Aung naning baka oto'koo tampa' deea'. Ninge bakaang pakupakunung tee-koo makosi nkoevompang."<sup>19</sup> Teketa teie Ovinge Kumponing teing kau'karenaumo-nanka ee'noko barennanka kansi'keta temu' nkovuru'ning te' Aadama-anko po'antavuru' teie namurii'na' oovurira miring tampurii'naang, ee'noko aming miring teie Aadama tampuru'ning teing kapoo' domantoo'nanka-koo tee tee biikaang miring deemparu'.<sup>20</sup> Ee'noko tenang Aadama mirinanka tampuru' teing kau' karenaumo-nanka-koong bau'naananka-koo ee'noko biikoori-koo, napo' ookara barennanka-koo tampuru', teka tee Aadama bakaang pakupakunung tee-koo makosi otoaruu'.

<sup>21</sup> Teketa teie Ovinge Kumponing tee Aadama aa'na' aasi'antavuu', ee'noko tenang aatuko paramparang-koo koo'koo nari' bita'ura te' napo' bio'ke avo'antavuu'.<sup>22</sup> Ee'noko teri' paramparang-nari' nkavuu'nari'keta Kumponing nani manikuma nkovuu' ee'noko teni te' Aadama-anko tavo'uu'.<sup>23</sup> Teketa Aadama aa'puu', "Emu' ani ee'nani mmaiko' masakani. Bakaang koo' tee ning-koong-eta koo'ketaing ee'noko bakaang bio' tee ning-koong-eta bio'ketaing. Ani donkaani-koong-eta koo'keta nkonii'nani naning-etanani, te'koo manikuma tampampang."<sup>†24</sup> Tee'koo tee' aa'nomaung naning baumararing sipurema ba'aang ninka pinka'arekoo' ee'noko narung deemparekoo'.

<sup>25</sup> Tenang tee tering ookaring donkaani ee'noko teni ba'aang simpenoi'daring otoresiteka tee maia'orea'.

#### Aadama Dua'aru'na'

3 Ookara kapoo' avutevu' biikoori Kumponing nkovuru'nanka-koo boru' bakei aa'na' toreearo'. Teie tee teni manikuma aa'puu', "Kumponing ee masika' ookara anau-koo koi'nanka-koong sinang maa'koo orokoresing?"<sup>2</sup> Ee'noko teni maku'uma

† Iiburu-nupoong biikaang kara-koo "manikuma" ee'noko "donkaani" dapi' nari' aurompari otong.

aa'puu' tee boru', "Nee'ke aa' ookara koi'nanka-kooning sinang anau-kooning maa'koo makosi. <sup>3</sup> Teka Kumponingee aa'puing, 'Koi'navari anau-koo meu'ke otoi'navari-koong deeko' dee'ke sinang maa'ereauka', aa'noko tamung kompereauka' tevari, doore'neenga."

<sup>4</sup> Nka teie boru'ke aa'puu' teni manikuma, "A, dee' bakei doorearoo'naang. <sup>5</sup> Dee'ke tee sinang teu'koong maa'ereta deeko' dee' tee noru' daate'daree'naang kapoo' tampara ee'noko kapoo' orara noru'koo, ee'noko dee' tee Kumponing-pina' nari' otoree'naang. Kumponingee tee' noru'ui dee' tee' orokoruresing."

<sup>6</sup> Ee'noko tenang tenie manikumai tee teu'koong sinang oovuko onou ee' oro' tavo'kuu', "Bakei aung sinang maa'koo tampara, oro'oro'nou' tampa' oro'ke, ee'noko maa'anko norukasi' deeng-antamupeu'." Tee ninka noru' ninka tee-koo sinang-koo nkavura maa'kuu', ee'noko nii'ning napo' tenie tee ba'ung nari' otoretu'nung avuio' maa'uu'. <sup>7</sup> Ee'noko tenang tee noru' ookaanka-koong daate'aretu', ee'noko tenang noru'aretu' tenaanka tee simpenoi'ka, ee'noko tenang koi' piiki'koong para'nou' nara'ka pate'ureta duaana nkosiiretu'.

<sup>8</sup> Teketa tenang kamunoo'nang boimpuio' tenaankai tee Ovoring Kumponing teke mintoonge nanuko taaravuretu', ee'noko koi'nanka-koo meu' baku'aretu'.

<sup>9</sup> Teka teie Ovoringee Kumponingee Aadama bokuvuma aa'puu', "Da' are' otomang?" <sup>10</sup> Ee'noko teie aa'puu', "Ningee da'koong aurong mintoonge naniko taararamira amoromira simpenoi' deemarama oome'neeng-koo baku'maring."

<sup>11</sup> Ee'noko Kumponingee aa'puu', "Da' baie simpenoi' otoing nauruing? Ai' tee koi'koong sinang orokoran-tu'navari-koong maa'ei?" <sup>12</sup> Ee'noko teie aa'puu', "Tenie anie manikumai dake ni'ninka nari' o'noree'naang ameu'nanie tee-koo koi'koong-koo sinang-koo amuio' maa'kansing."

<sup>13</sup> Teketa teie Ovoringee Kumponingee teni manikuma aa'puu', "Dake tee aming-koo tee' nkoveing?" Ee'noko tenie manikumai aa'puu', "Boru'ke tosimuio' tee' ningee maa'ansing."

<sup>14</sup> Teketa Ovoringee Kumponingee tee boru' aa'puu', "Dake tee tee' oro' kapoo' nkoveing-koo dakaang barakosi' tee dau basi ookara kau'karenaumo-nanka bau'naananka-koo ee'noko pora'koonanka-koo. Da' tee ke'dei nanimatoaing otomainaroong-koo tee nankanankara maa'ema. <sup>15</sup> Ee'noko ningee tee dee'naanka da' ee'noko ani manikuma karenaanka deeng-antarampeaing ee'noko napo' teing dee'ke deurukaa' tee'ke kare-nupoong otoromaatoaing. Teni baurukaa'koo narunge † da' bore'koo puuturuiaing ee'noko dake tee kanko'bo-koo kakieai."

<sup>16</sup> Napo' teni manikuma aa'puu' Kumponingee, "Ningee tee da' pankaing sisikeera arompaing tenang parema mantompemaatoaing. Sisikeera ninka parematoaing.

† Aung tee Kumponingee Teroita Pako'pari'nii' nantoong do-maang moo'urira tarevuriaing. Tee-koo nauvurema Kumponingee Adamararing tee doorenang tampara nauvuretu'.

Nka tee, da'ung-koo pia otoi otoaing, ee'noko bakaang pia siompemaatoai."

<sup>17</sup> Ee'noko napo' Aadama-koo aa'puu', "Dake teni da'aang bakaang kara taaravera tee koi'koong sinang orokoantu'nung maa'eing-koo, ningee tee kansi' taamang keentoma barakosi'ansing taamananka tampa' nkoarava' otoaingee, ee'noko da' pore'doma deeko' tee-koo kansi'koo taamanimatoaing ookara batei da' otoaing-koo. <sup>18</sup> Ee'noko kansi'keta koi'nanka too'murintaa'po'nanka dupuai, napo' baa'nanka orananka dupuai, ee'noko dake maa'koo pora'kooning baa'nanka maa'emaatoai. <sup>19</sup> Ee'noko iontakaanang mintoontarama taamanimatoai, bera doora kansi'koo tororaravainoo'ke basi, te' ee'nou' da' nkorantu'nou', ai' da' tee da'mong, napo' da'mong-koo doonko tororavaing."

<sup>20</sup> Ee'noko Aadamai teni ba'aang miring Ivi † tam-puu', ai' teni teni ookara nantoong amutemurii' bioko.

<sup>21</sup> Ee'noko Kumponingee Ovoringee kau'karenaumo-nanka-koong dopa'koo mononopa' nkavura Aadama ee'noko teni Ivi avuretu' kurumparee'naang.

<sup>22</sup> Teketa Kumponingee Ovoringee aa'puu', "Aung tee naning nii'pina' oro'paring aa'noing kapoo' tampara ee'noko orara noru'ui. Emu' tee koi' domang isikung avu'navari-koo due' be'koo taura'pampiauka', tevari-koong sinang maa'ura napo' domampari oto'neenga."

<sup>23</sup> Tee'pura Ovoringee Kumponingee tenau-eta Iideni'nau-eta bata'uu' tamung pora'ke mintoom-paraa'naang, tee naning kansi'ketaing kansi' nenke'uma. <sup>24</sup> Tenang Kumponingee tering bata'ureta, tee-koo tenau-koo Iideni'nau-koo dua' po-manoo'aapenameng-koo koosinunanka purinto'nanka donkong-antavuru', tee tevung taung koi' domang-anta-aape be'navung para'ai otoromaatoonaang, bainatu nta'pina' urung kompai eevaavaama.

**4** Enang tee Aadama Iivi-ninka ba'aang ninka otoresii' teni kempo'kuu'. Teketa tooto' narung donkaani paravuu' tenie, miring Keini'. ‡ Ee'noko aa'puu' tenie, "Ningee narung donkaani paravansing Ovoringee pakumuio'." <sup>2</sup> Napo' kemu'kana' tenie donkaani Keini'ke baara'ma'nung paravuu' miring Eebeloh'. † Eebelo' sipisipi'nanka tanata deemparu' ee'noko Keini' mintoong nkonara.

<sup>3</sup> Dama'ke tee Keini'ke tee-koo keenkeenanka-koo sinananka nkavurira Ovoring-koo boontunamparu'.

<sup>4</sup> Ee'noko Eebelo'ke sipisipi'nanka-koo nii'ning tutu-na'ning-kooning dato'urira menaanka dovang-nairu ninka boontunamparu'. Ee'noko Ovoring Eebelo'koo aa'na' dotuaru' ee'noko tee-koo bakaang-koo boontunang-koo. <sup>5</sup> Teka Keini'koo ee'noko tee-koo bakaang-koo boontunang-koo dotuaravaruu'. Ee'noko Keini' tee'koo aa'na' iirai oing oraka' oro'paru'.

†† Iiburunupoong biikaang kara-koo miring "Ivi" tee "Bioko" miru'ari otong. ‡ Iiburunupoong biikaang kara-koo miring "Keini'" tee "Nkavansi" pina' aurompari otong, ee'noko tee miring "Eebelo'" tee "Domang-kera" miru'ari otong. †† Iiburunupoong biikaang kara-koo miring "Keini'" tee "Nkavansi" pina' aurompari otong, ee'noko tee miring "Eebelo'" tee "Domang-kera" miru'ari otong.

<sup>6</sup> Ee'noko Ovoringe aa'puu' tee Keini', "Da' aming-koo iirarora oing oraka' oro'daramang? <sup>7</sup> Da' tampa' boon-tunantaravaing deeko' ning da'koo dotumaravaing, ape' aung? Teka tee dake kapoo' orara nkoveko deeko' tee orara aarumo maamuari otong da' kurumaa'koo. Nka dake purintarara puru'eaing tee."

<sup>8</sup> Teketa Keini'ke tee baara'ma'nung Eebelo' bokuvu-ma aa'puu', "Poai io' tokoi pora'ke korokoromareai." Ee'noko tenang pora' bereta Keini' tee-koo baara'ma'nung-koo Eebelo'koo dau kokoroarara teka tavuma dupisi'uu' tee.

<sup>9</sup> Tenang Ovoringe aa'puu' tee Keini', "Eebelo' arerai tee daara'ma'nung?" Ee'noko Keini'ke aa'puu', "Ninge noru'ampa' tee, ai' ning tee ntara'ma'nung tare-koo si'meu'nunge?"

<sup>10</sup> Ee'noko Ovoringe aa'puu', "Nka dake aming nkoveing? Tee daara'ma'nung bakaang ereng-koong aorong tee ning-koo biromparamang kansiketa. <sup>11</sup> Emu' tee da' barakosi'dama aa'damaang: Anketa kansiketa da' tenkeniaing, a' te' kansinoo' daara'ma'nung-koong ereng tuuvuo' naivunoo' daka dake dupisi'eio'. <sup>12</sup> Da' tee pore'doma kansikoo keempeko taamang tampa' nkoaravauka'nung ee'noko tokoo dakanoo' masipo' oto'deruauka', tamung kansikoo kororaramatoaing."

<sup>13</sup> Teketa Keini'ke aa'puu' tee Ovoring, "Ee baka', aung tee kiimata pankaing masikung. Dake ameio' orarunsie dupisi'muu'naang. <sup>14</sup> Dake tee ning e'mung bata'meing anketa kansiketa, ee'noko dakaang biraanke-ita baku'meing. Ee'noko tokoo nkanoo' oto'memuauka'; tamung kansikoo koromarama'noaing. Naninge tokoa oomura deeko' tamung anutua dupisi'muaing makosie."

<sup>15</sup> Teka Kumponing aa'puu' tee, "A, tee' deea'. Nii'nung naninge da' taruma dupisi'duaing deeko', tee naning tee ninge aa'na' dau basinoo' kiimata avompaing." Ee'noko Ovoringe Keini'koo taa'ni'anta sipuu' naninge tokoa oovura tavu'neeng-koo tee. <sup>16</sup> Teketa tenang Keini' Ovoring-ankoita tenkenuu', ee'noko bera Ata'nanu' tampaama-nameng-koo beu' teketa Iideni'keta duaa' pomanoo'aapenameng-koo.

### Keini' Bakanaving

<sup>17</sup> Emu' tee Keini', osi pankaing kanivui otoko, ba'aang kempo'kura bauring donkaani paravuu' miring Iinoke; ee'noko Keini'ke tee osi opura napo' Iinoke namirimpuu'. <sup>18</sup> Ee'noko Iinoke tee Irat bauma. Tee Irat tee Meusiel bauma, ee'noko Meusiel tee Metusiel bauma, ee'noko Metusiel tee Leemeki' bauma.

<sup>19</sup> Ee'noko Leemeki'ke kenaanka manikumaara nampuretu'. Nii'nani-koong miring Eda, ee'noko nani Sila'. <sup>20</sup> Ee'noko Edai Jabal paravuu', Jabal tee teing pora'ke nanaama boromaka'nanka tareariko'ning biuma. <sup>21</sup> Tee Jabal baara'ma'nung miring Jubal, ee'noko tee Jubal tee teing nantoong kovi dovang kiita kompaamaing bi-uma. <sup>22</sup> Dama'ke napo' tenie Sila'ke Tubokein paravuu'. Tubokein tee teing nantoong baraasi' dovang-koo aini aa'ning-koo kapoo' nkonuka biuma. Tee Tubokein ba'mari miring Naama.

<sup>23</sup> Nii'na'mung Leemeki'ke tenaanka ba'aankaara nauvurema aa'puretu', "Eda naanka Sila' ee, nkaang kara tampa' masika' taaramereai. Naninge narunge nemakai ning baikemuio' ninge dupisi'ansieeng maku'koo, ee'noko ba'marange mero'koo piavorora deeko' ee' nauarampaing, <sup>24</sup> Baa naning Keini' dupisi'uaing aa'na' dau basinoo' kiimata nkavuaing, ee'noko naning ning tamuauing bakei aa'na' aa'na' kiimata dau basinoo' kompuauing."

### Set Bakanaving Tampaving

<sup>25</sup> Dama'ke napo' Aadama ninka otoresi ba'aange tooto' narung donkaani napo' paravuu' miring Set, † ee'noko tenie aa'puu', "Kumponing tooto' narung napo' amuing Eebelo' pari'antanung tee Keini'ke dupisi'uu'nung." <sup>26</sup> Dama'ke napo' Set bauring ponto'aru' ee'noko Iinosi' tampuu'. Tenang ee'nanng nantoonge Kumponing Iaaue †† tampaama dootuu' tumparuru'.

**5** Aung tee Aadama bakanaving-koong mirinanka, tee naning Kumponing nkovuu'nung baka bakaang oro' siompui otoko. <sup>2</sup> Kumponing ke-naankara nkovuretu', donkaani ee'noko manikuma, ee'noko biraankevureta "naninka" tampuretu'.

<sup>3</sup> Tenang Aadama mare' narung daaku'keta beenaumo kivora [130] deempama bauring narung nkoaru' tee-pina' masika' oro'. Miring Set tampuu' tee.

<sup>4</sup> Temare'keta Set ponto'aru'namare'keta deto Aadama ~beenaumo-taa daaku' [800] mare' otou', ee'noko teing-koo mare'koo kuunge napo' nii'ning baurukaa' donkaang ee'noko maniku' nkoaruru'. <sup>5</sup> Ookara mare' nara'ka Aadama otou'ning ~karenaumo-taa daaku' bera beenaumo kivora [930] deempama bou'.

<sup>6</sup> Teketa tee Set mare' narung daaku'keta pa'noko' [105] deemparako bauring narung ponto'aru' miring Iinosi'. <sup>7</sup> Temare'keta Iinosi' ponto'aru'namare'keta deto tee Set ~beenaumo-taa daaku' bera ~kenaankataa [807] mare' otou', ee'noko teing-koo mare'koo kuunge napo' nii'ning baurukaa' nkoaruru' donkaang ee'noko maniku'. <sup>8</sup> Ookara mare' Set otou'ning nara'ka ~karenaumo-taa daaku' bera kivora-ita kenaanka [912] deempama boo'paru'.

<sup>9</sup> Tenang tee Iinosi' mare' ~karenaumo-taa kivora [90] deempama bauring narung nkoaru' miring Kenan.

<sup>10</sup> Temare'keta Kenan ponto'aru'namare'keta tee Iinosi' ~beenaumo-taa daaku' bera kivora-ita pa'noko' [815] mare' otou', ee'noko teing-koo mare'koo kuunge napo' nii'ning baurukaa' ponto'aruru', donkaang ee'noko maniku'. <sup>11</sup> Ookara mare' Iinosi' otou'ning nara'ka ~karenaumo-taa daaku' bera pa'noko' [905] deempama boo'paru'.

<sup>12</sup> Teketa tee Kenan mare' ~kenaankataa kivora [70] deemparako bauring narung Maaleli' ponto'aru'.

<sup>13</sup> Ee'noko temare'keta Maaleli' ponto'aru'namare'keta deto Kenan ~beenaumo-taa daaku' beraarenaumo

† *Iiburu-nupoong biikaang kara-koo miring "Set" tee "Avuavu" pina' aurompari otong.* †† *Tee miring Iaaue tee Iiburu'na' miring Kumponing-koong; "O'noi O'nomaung" pina' auromparaung.*

kivora [840] mare' otou', ee'noko teing-koo mare'koo kuunge napo' nii'ning baurukaa' nkoariru', donkaang ee'noko maniku'. <sup>14</sup> Ookara mare' Kenan otou'ning naro'ka ~karenaumo-taa daaku' bera kivora [910] deemparama bou'.

<sup>15</sup> Tenang tee Maaleli' ~narung-taa kivora bera pa'noko' [65] mare' deemparako baurung narung Jerete' ponto'aru'. <sup>16</sup> Temare'keta Jerete' ponto'aru'na-mare'keta deto Maaleli' ~beenaumo-taa daaku' bera beenaumo kivora [830] mare' otou', ee'noko teing-koo mare'koo kuunge napo' nii'ning baurukaa' ponto'ariru', donkaang ee'noko maniku'. <sup>17</sup> Ee'noko ookara mare' Maaleli' otou'ning naro'ka ~beenaumo-taa daaku' bera ~karenaumo-taa ee'noko pa'noko' [895] deemparama boo'paru'.

<sup>18</sup> Teketa Jerete' mare' narung daaku'keta ~narung-taa kivora bera kenaanka [162] deemparako baurung Iinoke ponto'aru'. <sup>19</sup> Temare'keta Iinoke ponto'aru'na-mare'keta deto Jerete' ~beenaumo-taa daaku' [800] mare' otou', ee'noko teing-koo mare'koo kuunge napo' nii'ning baurukaa' ponto'ariru', donkaang ee'noko maniku'. <sup>20</sup> Ee'noko Jerete' ookara mare' naro'ka ~karenaumo-taa daaku' bera ~narung-taa kivora-ita kenaanka [962] otera bou'.

<sup>21</sup> Tenang Iinoke mare' ~narung-taa kivora-eta pa'noko' [65] deemparako baurung Metusela' ponto'aru'. <sup>22</sup> Ee'noko temare'keta Metusela' ponto'aru'na-mare'keta Iinoke beenaumo daaku' [300] mare' otou', Kumponing ninka nari' tampa' navuaresi, ee'noko teing-koo mare'koo kuunge napo' nii'ning baurukaa' ponto'ariru', donkaang ee'noko maniku'. <sup>23</sup> Ookara mare' Iinoke otou'ning naro'ka beenaumo daaku' bera ~narung-taa kivora-ita pa'noko' [365]. <sup>24</sup> Iinoke tee Kumponing ninka tampa' navuareko'noo'koo Kumponing nkavuo' napo' nantoonge ooaavaruu'.

(Iiburu 11:5)

<sup>25</sup> Teketa Metusela' mare' narung daaku' bera ~beenaumo-taa kivora ee'noko ~kenaanka-taa [187] deemparako baurung Leemeki' ponto'aru'.

<sup>26</sup> Temare'keta Leemeki' ponto'aru'namare'keta ~kenaanka-taa daaku' bera ~beenaumo-taa kivora-ita kenaanka [782] mare' otou', ee'noko teing-koo mare'koo kuunge napo' nii'ning baurukaa' nkoariru', donkaang ee'noko maniku'. <sup>27</sup> Ookara mare' Metusela' otou'ning naro'ka ~karenaumo-taa daaku' bera ~narung-taa kivora-ita napo' ~karenaumo-taa [969] deemparama boo'paru'.

<sup>28</sup> Tenang napo' tee Leemeki' mare' narung daaku' bera ~beenaumo-taa kivora-ita kenaanka [182] deemparako baurung narung ponto'aru'. <sup>29</sup> Ee'noko miring Nooa' † tampuu', aa'puma, "Aung tee nii' unaa-antamuriaing teieta iri'o'keta aung kansi' mintoompampima kompampimaung-eta Kumponing barakosi'uu'nung." <sup>30</sup> Temare'keta Nooa' ponto'aru'na-mare'keta Leemeki' pa'noko' daaku' bera ~karenaumo-taa kivora-ita pa'noko' [595] mare' otou', ee'noko teing-koo mare'koo kuunge napo' nii'ning baurukaa' ponto'ariru', donkaang ee'noko maniku'. <sup>31</sup> Ookara mare' Leemeki' otou'ning naro'ka ~kenaanka-taa daaku' bera ~kenaanka-taa kivora-ita ~kenaanka-taa [777] deemparama boo'paru'.

<sup>32</sup> Ee'noko Nooa' mare' pa'noko' daaku' [500] tamung otera baurukaa' beenaumo ponto'ariru' aa'ning Siemi', Aam ee'noko Jepang.

6-50 Anketa Mme' Bere'arava'navaro. ††

## 6-50

† Iiburu-nupoong biikaang kara-koo miring "Nooa" tee "Unaa-anta" miru'ari otong. †† Tankee'noo' 6-50 mme' bere'arava'. Sikuu-na-koo nii'na' Iinkirisi'koo deeruampipeu' Kumponing nantoong biikaang orara aarumo-koo piavoarura douai kansi'keta tonta'uru'na', Nooa'daang nakange deeko' duukaa deeng-antavuri. Napo' deeruampipeu' nantoong mmou' naro'ariri Kumponing bei'bei'aako teie biikaang kara amutemurii'na' paari-antaevuriko bereravariru'na', bera nantoonge ookara kansi' maantoluru'. Teketa napo' naumuri-maung Kumponing Eebaraami' bokuvui miru'uu'na' ookara Karis-too'koo baito-nupoong biuma deemparaa'naang, maraka-anta tampeng avurira.



# MAATI'U'

## Kara Baavootunanka Ane'kooning

1:1 Jiisuu' Kansi'koo Pou'na'  
 4:17 Jiisuu'ke Nantoong Kumponing-koo Tampa' Doorevuru'na' Taare-antavurima  
 9:35 Jiisuu'ke Bakaning Barevare-nupoong Mintoong-koo Botovuru'na'  
 11:1 Jiisuu' Baa Masikung?  
 16:21 Jiisuu'ke Bakaang Aarumo Bare-antavuru'na' Boaina'mung Due'uko  
 21:1 Jiisuu'ke Nantoong Asi'noo' Nau-antavuru'na' Jerusalema'  
 26:1 Jiisuu' Sisikeera Tora'antavai Dupisi'aako Napo' Domamparu'na'

### Jiisuu' Kansi'koo Pou'na'

(1:1-4:16)

### Jiisuu' Bakakatauro-koong Mirinanka

(Luk 3:23-38)

**1** Aung ane' tee Jiisuu' Karistoo' bakanarempo'koong mirinanka oting, tee ee'nung Deevita' bakanaving-koong, tee Deevita' napo' tee Eebaraami' bakanaving-koong.  
<sup>2</sup> Eebaraami' tee Aisake' bauma.  
 Aisake' napo' tee Jeekopi' bauma.  
 Jeekopi' tee Juda bauma batatakaampi ee'noko baara'mainkaang ninka nari'.  
<sup>3</sup> Juda tee Peeresi namainta Siira beuma. Beuko teni Teemaa.  
 Peeresi tee Eesirong bauma.  
 Eesirong napo' tee Arami' bauma.  
<sup>4</sup> Arami' tee Aminadapi' bauma.  
 Aminadapi' tee Naasoni bauma.  
 Naasoni tee Salamong bauma.  
<sup>5</sup> Salamong tee Boosi bauma, bauko teni Reeap.  
 Boosi tee Oobete' bauma, teie bauko teni Rut.  
 Oobete' tee Jeese' bauma. Ee'noko  
<sup>6</sup> Jeese' tee Deevita' bauma, tee daurarong~. Napo' Deevita' tee Solomoni' bauma, bauko teni ee'nani tung Uraia ba'aang.  
<sup>7</sup> Solomoni' tee Reaboam bauma.  
 Reaboam tee Abaisia' bauma.  
 Abaisia' tee Eesa bauma.  
<sup>8</sup> Eesa tee Jeosapata bauma.  
 Jeosapata tee Jooram bauma.  
 Jooram tee Usaia bauma.  
<sup>9</sup> Usaia tee Jootam bauma.

Jootam tee Eeasi bauma.  
 Eeasi tee Esekaia bauma.  
<sup>10</sup> Esekaia tee Manase bauma.  
 Manase tee Aamon bauma.  
 Aamon tee Josaia bauma.  
<sup>11</sup> Josaia tee Jekonaia bauma, ee'noko baara'mainkaang. Tekang ninka nari' mmau' Ju'nupoong Babiloni'naameensi'aape berou' kiimata-koo. <sup>12</sup> Babiloni'aape berou'noo'keta Jekonaia tee Sialeteale bauma deemparu'.  
 Sialeteale tee Serababele bauma.  
<sup>13</sup> Serababele tee Abaiutu' bauma.  
 Abaiutu' tee Elaiakim bauma.  
 Elaiakim tee Eesoo bauma.  
<sup>14</sup> Eesoo tee Siedoko bauma.  
 Siedoko tee Eekim bauma.  
 Eekim tee Elaitu' bauma.  
<sup>15</sup> Elaitu' tee Eliesa' bauma.  
 Eliesa' tee Mataani' bauma.  
 Mataani' tee Jeekopi' bauma.  
<sup>16</sup> Jeekopi' tee Josepa' bauma.  
 Josepa' tee Meeri' ba'ung, teni Jiisuu' paravuu'nani, tee ee'nung Kumponing Pako'pari'nii' tampaamaung, Karistoo'.  
<sup>17</sup> Aing teing avantevaranoo' kivora-ita karenaumo-koo basi Eebaraami'keta Deevita'koo basinoo', ee'noko teketa napo' kivora-ita karenaumo-navarantu otorou' Babiloni'ke kiimatavariri otorou'noo' basinoo'koo.  
 Ee'noko teketa napo' kivora-ita karenaumo-navarantu depeto tee Kumponing Pako'pari'nii'koo basinoo'koo.

### Jiisuu' Meeri'ke Paravuu'na'

(Luk 2:1-7)

<sup>18</sup> Enang tee' ee' nkoarara Jiisuu' Karistoo' pon-to'aru'na'. Teni bauko Meeri' teni Josepa'koo miru'nii'nani, teka mme' nari' oorea' teni tooto'po'nani deemparu' ta'nina' Tanuaang Meekung bakaang iri'ke.

<sup>19</sup> Teketa teie Josepa'ke, teni-koo miru'nii'ke teni tooto'po'nani tasi'pura koonto'na' nko-koo noru'ari beekaang navunavu toto'koo mau'aru', teka makenge nko-koo piavou' ookara-koo sira'puko maia'o'neeng-koo teni.

<sup>20</sup> Teka tee' noru'arara otoko koosinung~ narung Oving bakaang noone-koo tee-ankoi oro'paru' ee'noko aa'puu', "Josepa', Deevita' bauring, aroreauka' Meeri' boku-koo da'aang deemparaa'naang, ai' tee tooto' teni-koo pontoaring~ tee Tanuaang Meekung-etaing. <sup>21</sup> Tenie tee tooto' donkaani paravuaing, ee'noko dake tee miring Jiisuu' † tampeaing, ai' teie tee bakaning nantoong biikaning orara aarumonanka-ita moo'uriaing." <sup>22</sup> Aing ookara kapoo'nanka nkoaru'noo' tee kapoo' Ovinge tero nakaronara~ karantavuma~ nauvuu'nung masika'paraa'naang, ee' oro':

<sup>23</sup> "Teni kuukuma~ teni tooto'po'nani deemparara narung donkaani paravuai, ee'noko teinge ee'pina' tampaavaing, 'Imanuela', miru'noo' tee 'Kumponing nii' ninka nari' otong."

(Aisaia' 7:14)

<sup>24</sup> Tenang Josepa' tantearara tee' nari' teie koosinunge Oving bakaange botovuu'na' bera Meeri' boku-vuu' ba'aang deemparaa'naang. <sup>25</sup> Teka teie tamung tanatavuu' bera tenie tee tooto' donkaani paravuu'noo'keta dama'ke nampuu'. Ee'noko tee tooto' miring Jiisuu' tampusu'.

### Norukasi'nukai Jiisuu' Beero'au'na'

**2** Teketa tee Jiisuu' ponto'ario' teke Beeteleema'ke Judia'koonoo'ke tenang tee dauramong~ Eeroti' otoko'ning nii'ning norukasi'nuka duaa' bakoaramanoo'keta Jerusalema' porou'. Porora nia'kaama aa'paako', <sup>2</sup> "Dauramong Ju'nupoong biikaang ponto'aru'nung arerai? Nii'ke bakaang beento' ta'da'puio' oampira nanampikotaa' enang moring tee-koo dootuu'marii'naang." <sup>3</sup> Teketa tenang teie dauramong Eeroti'ke tee' taaravura tee bakei oraka' mantomparu', teing Jerusalema'nupoong tee ninka nari'. <sup>4</sup> Teketa tenang teing ookara piristi'koo pankenuka ee'noko boto naunuka naro' bokuvurira nia'urima aa'puru', "Nko tee Kumponing teroita Pako'pari'nii' nantoong domampurira tarevuriainoo'koo are'ke ponto'aravaing?"

<sup>5</sup> Teinge maku'aama aa'pau', "Beeteleema'ke, Judia'koonoo'ke, ai' aung kara nakaronarai daarivuu'nung Daari Meekung-koo, aa'puma,

<sup>6</sup> 'Da' Beeteleema', Judia'koonavuntu' osi oki'navuntu' deea' teing-koo pankeng osi Judia'navaroi otoromaing-koo, ai' da'keta tee narung tanata-nko tava'kuaing nkanavitu Isireeli-nupoong sipisipi'nanka-pina' tanatavuriaing."

(Maika 5:2)

<sup>7</sup> Teketa teie Eeroti'ke teing norukasi'nuka baku'noo' bokuvuru' ee'noko teing batei tee beento' oro'pari otou'ning tampa' noru'uu'naang nia'uriko nauau'.

† Iiburu-nupoong biikaang kara-koo tee miring "Tesua" tee "Kumponing niikaang Domang-anta" miru'ari otong; tee Jiisuu' tampusu'.

<sup>8</sup> Teketa botovurima te' Beeteleema'aape aa'puru', "Berira tampa' besi'eriai tee tooto', ee'noko ooverira namu'ke ning naumeriai, merai'ning tee-koo dootuu'maravaina.'" <sup>9</sup> Teketa teinge tee dauramong taaravaara tenkenau', ee'noko tee beento' duaa' bakoaramanoo'aape tutung ooau'nung teing-koo napo' oro'parara uro'kanoo'ke nanuu' bera te' tooto' otou'noo' dau datearu'. <sup>10</sup> Tenang teinge tee beento' teka ooaara doturotue maanto'urira bakei aa'na' do'dero'de'ariru'. <sup>11</sup> Teketa tenang pava-koo kuung porora teinge tee tooto' ooau' bauko ninka Meeri' nin-ka otoreko. Ee'noko teing te' doonko miinge keemparira tee-koo dootuu'ariru'. Teketa biikaang bakurananka daate'aara kapoo' moo' pankeng-kooning bauta'au' tee aa'ninge: kooro, kapoo' betu'uko tampa' nuuraa' ee'noko duuni tampa' nuuraa' miring meea. <sup>12</sup> Ee'noko noone-koo koono-antavurio' Eeroti'anko napo' beroaro'naang teing norukasi'nuka nii'navunge biikanameensi'aape toroariru'.

### Josepa'daang Iisipi'aape Koo'ariru'na'

<sup>13</sup> Teing beroio' napo' tee koosinung Oving bakaang Josepa'ankoi oro'paru' noone-koo, teketa aa'puu', "Daa'daravai. Tee tooto' ee'noko bauko bokuereta Iisipi'aape mmaririra bera teke otoriko ninge nauranko deeko' tororariai, ai' Eeroti'ke tee besi'uu'naang tee tooto' dupisi'uu'naang." <sup>14</sup> Teketa i'amparara tee tooto' ee'noko bauko bokuvureta tenang muunga Iisipi'aape tenkenau'. <sup>15</sup> Bera teke otorou' Eeroti' boo'paru'noo'ke basi. Tee' nkoario' tee kara Oving bakaang makotuu' nakaronara~ karantavuma~ aa'puu'naare:

"Ninge bokuantu' tee nnuring Iisipi'keta."

(Osea 11:1)

### Eeroti'ke Tampuio' Toirekaa' Tavaaru'na'

<sup>16</sup> Teketa tenang Eeroti'ke noru'urainange teinge norukasi'nukai tee tosiaara divu'au'nung tee, tee bakei aa'na' iiravou' ee'noko tee botoaru' ookara toirekaa' donkaang Beeteleema'navete-kooning dupisi'koo biikaang mare' beemareu-koo basiaraiing †† teing norukasi'nukai nauau'noo'ka noru' nkavura. <sup>17</sup> Teketa tenang ee'ning tee kapoo' tee-koo Daari Meekung-koo nakaronarai Jeremaia'ke tero minkuvuu'nung masika'paru'. <sup>18</sup> Aa'puu', "Narung aurong teka Raama-nairu-koo taaravansing, aa'na' orarunsiari uiarama biromparako, teni Reesiel baurukaa'koo biromparako, dunsirunsi-antavaako~ piavoaru' baurukaa' oparirio'."

(Jeremaia 31:15; Pupu' 35:19)

### Josepa'daang Iisipi'keta Toroariru'na'

<sup>19</sup> Teketa tenang Eeroti' boo'pario', tee koosinung Oving bakaang napo' Josepa'ankoi noone-koo oro'paru' teke Iisipi'ke. <sup>20</sup> Ee'noko aa'puu', "Tanterarara

†† Tee tooto' Pako'pari'nii' tokoa otoko naro'ka tavaava'naang piavora, mare' beemareu-koo kuunge otoing-pina' noru'uma.

tee tooto' ee'noko bauko bokuereta te' Isireeli-nameensi'aape beriai, ai' teing tee tooto' dupisi'koo pi-avoroko'ning teing boo'pariru'ning." <sup>21</sup> Teketa tantear-ara tee tooto' ee'noko bauko bokuvureta Isireeli-nameensi'aape berou'. <sup>22</sup> Teka tee Akeleasi Judia'navete tarevuko bauma tee Eeroti' pari'antavura tee Josepa' avorou' te' be'koo. Ee'noko noone-koo napo' koono-antavuiu' Kumponing Kaaleli'navete-koo berou'. <sup>23</sup> Ee'noko berora narung osi miring Nasareti'namono-koo otorou'. Tee' nkoarako tee kara nakaronara karantavuma Ovoringe minkuvuu'nung masika'paru', aa'puu'nung, "Nasareti'nung tampaamaatoaing."

(Aisaia' 11:1; 53:2)

### Jooni Minkinara Daankiarako'na

(Mak 1:2-8; Luk 3:1-18; Jon 1:19-28)

**3** Tenang Jiisuu' Nasareti' otoko'ning ee'hang Jooni Minkinara sirakura' tavo'arara daankinang tumpuu' mee'bora' sirakamaa'koo Judia'navete-koonoo'ke. <sup>2</sup> Aa'puma daankiaru', "Bere'dariai panin-ung muu'koo tuntariaina', ai' tee muu' tee enang due' poing." <sup>3</sup> Aung Jooni tee teie nakaronara Aisaia'ke urikamu' minkuvuu'nung Daari Meekung-koo aa'puu'nooka, "Aurong narung naning-koong mee'bora' sirakamaa'koo bokuma aa'pumaang, 'Maamu-antaveriaing tee taung Ovoringe bakaang. Koompevuriai poainavung.'"

(Aisaia' 40:3)

<sup>4</sup> Tee Jooni Minkinara tee tamung mononopa' kaameli'koong dapo-koo nkonii' kurumparako', ee'noko dopa'nook'ke tokoarako'. <sup>†</sup> Ee'noko bakaang taamang teing aa'ning maa'uriko': ntaa'nanka ee'noko davainta pora'kooning.

<sup>5</sup> Ee'noko mmau' nantoonanka Jerusalema'keta tee-anko berou', ookara Judia'nameng-nupoong nari', bera ookara Joo'dani-nari-nupoong-koo basi. <sup>6</sup> Ee'noko bi-ikaning oraka' nkonanka sira'pariko ntong-koo minkivurima meeka'antavuriko' teie Joo'dani-nari-koo. <sup>7</sup> Ee'noko tenang ee'hang tevitu Moosesi bakaang Boto Keperuu'navitu miring Paaris-navitu ee'noko Noru' Pitunavitu miring Saadiusi-navitu nari' ntong-koo minkivurira meeka'antavurii'naang porou'. Teka Jooni Minkinarai oovurira aa'puriko',

"Dii' borukoporonuka, baie aa'duri dii' tamung minkirarira koo'dariaining Kumponing bakaang iira tavo'kuaing-eta? <sup>8</sup> Masika' bere'dariaing tee-koo sinang oro'paravaina'. <sup>9</sup> Tamung dii'ka aa'periauka', 'Eebaraa-mi' tee nii'ke niuma otong,' ai' masikung ninge naurampimang Kumponing tee Eebaraa-mi' baurukaa' aing-eta kapananka-ita nkovuripeu' dii' pari'anta-koo, domang iveka'dariko deeko'. <sup>10</sup> Teri' marekenari' teri' maamuari otong koi'koo okora'. Dii' teing koi' makosinuka. Dii'koo ookara sinang tampa nkaveriau-

<sup>†</sup> Teing nakaro-nupoong urikupoong tee' kurumpariko' Eliasi kurumparako'na', aarumo baka kirokai kontevoma. Ooveai 2 Dauraronanka 1:8.

ka'ning tee nokiraarira nta'koo dua'daariaining.

<sup>11</sup> Ninge tee tamung ntong-koo minkirampima meeka'antarampimaang domang bere'dariko, nka tee ning aa'na' apoo'mui oting iirakuta mme' pomaang, doonge-taara~. Tee ee'nara poka aa'na' tampa' taar-averiai, ai' teie tee meeka'antaruriaing dii' Tanuaang Meekung ee'noko nta' ninka. <sup>12</sup> Teie, tee simpe'nkoi' teing makosinuka bakaang muu'koo kuunga onkeonke'uriaing, ee'noko teing makosinuka deeaing tee-koo nta'koo siri'paa'koo tai-antavuriaing."

### Joonie Jiisuu' Ntong-koo Minkivura Meeka'antavuu'na'

(Mak 1:9-11; Luk 3:21-22)

<sup>13</sup> Teketa tenang tee Jiisuu' Kaaleli'nameensi'keta Joo'dani-nari-aape pou' Joonie ntong-koo minkivura meeka'antavuu'naang. <sup>14</sup> Teka Joonie orokovuma aa'puu', "Ning dake ntong-koo minkimera meeka'antakoo makosi ee'noko da' arekee'koo ning-anko poi?" <sup>15</sup> Teka Jiisuu'ke maku'uma aa'puu', "Emu' nkomeaing. Makosi nee'ke tee' nkoampema dupe-antavampeaing ookara aarumo koonto'nanka." Tenang tee' minkuvuiu' Joonie aroo'uu'. <sup>16</sup> Teketa tenang Joonie Jiisuu' ntong-koo minkivura meeka'antavuiu' doompeto daa'ario' ntong-eta tonta'arako tee-koo batei-koo paning daate'aru' ee'noko tenang teie tee Tanuaang Meekung Kumponing bakaang, kuukuu'pina' siarara Jiisuu'koo pantoko oovuu'. <sup>17</sup> Ee'noko kara auromparu' paning-eta aa'puma, "Aung tee nnuring ninge piaavamaung. Ning aung-koo aa'na' dotumaramaung."

### Sietani'ke Jiisuu' Paaravuu'na'

(Mak 1:12-13; Luk 4:1-13)

**4** Teketa teie Tanuaang Meekunge tee Jiisuu' mee'bora' sirakamaa'koo be'antavuu' Sietani'ke dau'uu'naang teka. <sup>2</sup> Teke taamanua' otou' karenau-mo kivora doong ee'noko karenau-mo kivora muung-koo. Ee'noko teing doong oparu'nook'ke tee peeravou'. <sup>3</sup> Ee'noko teie dau'baukoi' pora aa'puu' tee Jiisuu', "Da' Kumponing Bauring deeko' aing kapananka naueriko taamananka deempariaing."

<sup>4</sup> Ee'noko Jiisuu'ke maku'uma aa'puu', "A, tee Daari Meekung-koo ee' daariari otong, 'Naning taamang narunge domampari otoang, teka ookara kara Kumponing-etaning siompui domampari otomaung.'"

(Boto 8:3)

<sup>5</sup> Teketa napo' Sietani'ke Jerusalema'aape, te' Meeka-mono-koo be'antavuu' tee Jiisuu', ee'noko a'dei' pava dootuu'nava pankava-koo miiraka-koo pante'antavura aa'puu', <sup>6</sup> "Da' Kumponing bauring deeko' doonko to'di'daravaing, tampa' dua'darako masika'an-taraavaina', ai' Daari Meekung-koo ee' daariari otong, 'Teie bakaning koosinunanka botovuriaing da' paku-koo. Teinge biikaning birenge deto doontaavaing kapang-koo kau' naapurara'neeng-koo.'"

(Kena 91:11-12)

<sup>7</sup> Teka Jiisuu'ke maku'uma aa'puu' tee, "A, Daari Meekung-koo napo' ee' daariari otong,

'Dii'ke tee Ovoring diikaang Kumponing parapaara-koo siperiauka.'"

(Boto 6:16)

<sup>8</sup> Teketa napo' Sietani'ke Jiisuu' a'dei' iu'koo isikung-koo koing-antavura ookara muu'nanka kansi'koo tampa' oro'nanka oo-antavuu'. <sup>9</sup> Ee'noko Sietani'ke aa'puu', "Aing ookara ninge oko-antarampeu' da' ning-koo minge keentarara dootuu'mei dei."

<sup>10</sup> Teketa Jiisuu'ke aa'puu' tee, "Tokoi tenkeniai da' Sietani' ning-ankoita, ai' Daari Meekung-koo ee' daariari otong,

'Dii'ke Ovoring diikaang Kumponing narung dootuu'eriaing, ee'noko nii'nung siomperia' otoriai.'"

(Boto 6:13)

<sup>11</sup> Teketa tenang Sietani'ke sipura beko tee, koosin-unankai porora puring-antavau'.

### Jiisuu'ke Bakaang Nko-nko Kaaleli'ke Tutumpuu'na'

(Mak 1:14-15; Luk 4:14-15)

<sup>12</sup> Tenang batei-koo Eeroti'ke Jooni Minkinarai kimatanava-koo dai'ura sipuu'. Ee'noko Jiisuu'ke tee taaravura tee Kaaleli'nameng-aape † toroaru'. <sup>13</sup> Teka Nasareti' sipura Kapaneume'navuntu'koo otou' te' ee'noo' te' nuaru' due' Sebulon-namuu' ee'noko Napitalai-namuu' biikanameng-koonoo'. <sup>14</sup> Tee' biikanameng-koo beio' tee kara teie nakaronara temu'nunge Aisaia'ke minkuvuu'nung dupearu' Daari Meekung-koo aa'puu'noo'ka,

<sup>15</sup> "Teinge nantoonge mutaananoo' otoromainge pankaing araka ooaavaing teinge Sebulon ee'noko Napitalai beekanavaro-kooninge, te' ookamenta-koo otoromanoo' aa'noko pirung-aape danto ee'noko Joo'dani-nari-eta ee'daanto, te' ee'noo' Kaaleli', Ju'deeaing Biikanoo'.

<sup>16</sup> Teing ee'ning te' boo'ke anivumanameng-koo otoromaing arakai tane'puriaing."

(Aisaia' 9:1-2)

### Jiisuu'ke Nantoong Kumponing-koo Tampa' Doorevuru'na' Taare-antavurima

(4:17-9:34)

### Jiisuu'ke Bakaning-koo Tutuna'ning Karenaumo Bokuvuru'na'

(Mak 1:16-20; Luk 5:1-11)

<sup>17</sup> Ee'noko tenang-eta deto Jiisuu'ke daankinang tutumpuu' aa'puma, "Bere'dariai paninung muu'koo tuntariaina', ai' tee muu' tee enang due' poing."

<sup>18</sup> Ee'noko teketa Jiisuu' Kaaleli'naru'koo miiringe nanuma teie kemaintara teka oovuretu' aa'noko Saimoni' tee nii'noo'ke Piita, ee'noko tee Aanduru', baara'ma'nung, sionung dua'ureko teru'koo, ai' temainta tee tavi' baranka. <sup>19</sup> Ee'noko Jiisuu'ke aa'puretu', "Poreta ning siomereai, nantoong baranka deeng-

† Temeng Eeroti' tarevuko'nameng.

antarampeaina'." <sup>20</sup> Ee'noko namu'ke tee beekaang sionung sipureta Jiisuu' siompuretu'.

<sup>21</sup> Teketa napo' nanuma nii'namainta oovuretu' miring Jeemisi namainta Jooni, Siebedi baurinketa, bakaasi-koo beuma ninka otoroko, Siebedi ninka, biikaang sionung pate'aama. Teketa Jiisuu'ke temainta bokuvuretu'. <sup>22</sup> Ee'noko namu'ke temainta biikaang bakaasi ee'noko tee beuma sipureta Jiisuu' siompuretu'.

### Jiisuu'ke Aining Nkovuko'na' Daankinang Ee'noko

Taare-anta

(Luk 6:17-19)

<sup>23</sup> Jiisuu'ke tee ootukunairue Kaaleli'ke nanuma nau-antavuru' nantoong pava dootuu'nanka biikaning-koo. Nau-antavurima dankivuko' tee doorenang tampara Kumponing bakaang muu'koong, ee'noko taare-antavuriko' nantoong siipa amutemurii'po'nupoong.

<sup>24</sup> Ee'noko doorenang tee-koong Siiria-namenge nanu'antavau', ee'noko teketa ookara siipa amutemurii'po'nupoong tavo'aaru' tee-anko, sisikeerai tora'antavuriko'ning, ma'narie koriaariko'ning, kookoko~po'nupoong, ee'noko dootanuka, ee'noko te' po'antavaariko taare-antavuriko'. <sup>25</sup> Ee'noko nantoong karingai aa'ning-eta Jiisuu' siompai nanaako', Kaaleli'nupoong, Dekapolis-navete-nupoong, Jerusalem'a'nupoong, Judia'navete-nupoong, ee'noko ookara Joo'dani-nari-koo aveteraang-nupoong.

### Jiisuu' Mii-koo Daue Daankiaru'na'

<sup>5</sup> Tenang teinge nantoong karingai Jiisuu' siompai' oovurira tee mii-koo deto koinura ba'namparu'. Ee'noko bakaning barevare-nupoong tee-anko porou'.

### Teing Biraankenanka

(Luk 6:20-23)

<sup>2</sup> Ee'noko teie nau-anta tutumpuma aa'puu', <sup>3</sup> "Biraanke-nupoong teing nantoong biikaang tanuaang ataata'koo otoko tasi'pariaining, ai' muu' paninung tee teing okovoroaing.

<sup>4</sup> Biraanke-nupoong teing nantoong orarunsiarimaing, ai' teing teing ee'ning Ovoringe dunsirunsi'antavurinaing.

<sup>5</sup> Biraanke-nupoong teing Kumponing-koo aroo'ariri banainge otoromaing, ai' biikaang barenku okovoroaing tee ookara kansi' tare-koong.

<sup>6</sup> Biraanke-nupoong teing nantoong peeravoroma nukaa'oromaing tee-koo aarumo koonto' siong-koo, ai' teing teing poovuriaining.

<sup>7</sup> Biraanke-nupoong teing nantoong piaa-baukonuka, ai' Kumponing teing piaavuriaining.

<sup>8</sup> Biraanke-nupoong teing nantoong domang kiiroraanuka, ai' teing teing Kumponing ooaavaining.

<sup>9</sup> Biraanke-nupoong teing mooa nkonuka, ai' teing teing Kumponing baurukaa' tampuriaining.

<sup>10</sup> Biraanke-nupoong napo' teing nantoonge manki'antavaarimaatoaining aarumo koonto' siompaio', ai' tee Muu' Paninung tee teing biikaang.

<sup>11</sup> Biraanke-nupoong napo' dii' tenang nantoonge deu'daarima manki'antaraariko ee'noko daana' avutevu'ai oraka' minkuraariko ning dii'ke siomerimaung-koo. <sup>12</sup> Doturarima do'dero'de'dariai ee' noru'erima, 'Niikaang moo' pankaing otong teke paning-koo.' Ai' tee tee' nari' nantoonge teing nakaro-nupoong tee dii'pina' nari' manki'antavaariko', dii'koo uro'nupoong."

**Deva' Ee'noko Araka**  
(Mak 9:50; Luk 14:34-35)

<sup>13</sup> "Dii' teing deva'nuka ookara kansi'koo, teka tee deva' tarii'noo' paa'arapeu'nung arekee' napo' tarii'antavupeu'? Tee aa' tee tamunsi'nung deemparing. Tamung doonko dua'uma nantoonge mmemme'koo makosi. <sup>14</sup> Napo' dii' teing arakanuka ookara kansi'koo. Narung osi iu'koo dau kaniaapeu'nung tee baku'koo makosi deea'. <sup>15</sup> Nantoonge tee araka paro'aara antona'koo boong sipaavarupeu', teka sirang batanang-koo pante'aapeu' bakanoo', ee'noko teketa araka-antavuripeu' ookara nantoong pava-koo kuunge otormaing. <sup>16</sup> Tee' nari' diikaang araka araka-antaveriaing nantoong-koo uro'kanoo'ke diikaang nko-nko tampara ooaara Diuma tee paning-koong daangampaavaina'."

**Boto Dupe-anta-koonaaare**

<sup>17</sup> "Ning dii'ke tee boto Moosesi-nung ee'noko nakaro-nupoong biikaang kara kui-koo mou'nung-pina' noru'meriauka'. Ning teing kui-koo moa', teka teing dupe-anta-koo mou'nung. <sup>18</sup> Masika' naurampimang, tenang paning ee'noko kansi' opareainoo'ke basinoo'koo oki'naare nii'noo' namoora'noo' daari-koo kuarava' tee boto tee bakei tee' nari' otoaing bera ookara kapoo'nanka dupearavainoo'ke basi. <sup>19</sup> Baa tee naning aung-koo botonanka-koo oki'nareka' masikeng-koo narung toto'pura nii'ning nari' nau-antavuriaing tee tee oki'nung masikung tang-koong teka muu' paninung-koo. Ee'noko baa tee naning siompuma nau-antavuriaing tee botonanka tee ee'nung pankaing tang-koong teka muu' paninung-koo. <sup>20</sup> Ai' ninge dii' ee' naurampimang, diikaang aarumo tamparai te' kuung masipo' teing boto keperuu'navitu tamparimaing ee'noko boto naunuka biikaang puru'uauka'nung deeko' dii' muu' paninung-koo bakei tuntariauka'nung."

**Turang Tampa' Bake-anta-koonaaare**  
(Luk 12:57-59)

<sup>21</sup> "Dii'ke taaraverimaung uripo'keta aa'pui otoing, 'Naninge nii'nung dupisi'eauka', ee'noko baa tee dupisi' nkovuaing tee tuutunang~koong.' <sup>22</sup> Teka napo' ninge ee' naurampimang, baa tee naning ba'marang-koo narung iiraevuaing tee tee' nari' tuutunang-koonge. Napo' baa tee naning nii'nung ba'marang-

koong noru' otoaug tampuaing tee tee koompaara'navitu-anko be'anta-koo makosi. Teka baa tee naning nii'nung barakosi'uma aa'puaing, 'Da' kanu!' tee tee mosianung-aape nanu'koo makosi, te' nta'po'noo'. <sup>23</sup> Tee'koo dake avuavu' darimpee'naang nkorarama teke boonturomai ee'noko teke nii'nung da'marang-koong da' ninka iira otoing noru'era deeko', <sup>24</sup> io' teka boonturoma uro'kanoo'ke sipera tee dakaang avuavu', tutung bera tee ninka mooa-antareerei, ee'noko teketa tororarara tee dakaang avuavu' darimpeai.

<sup>25</sup> "Naninge karenunge da' tuutunang-koo barantuko iri'narung koompeai tee kara, mme' taung naniresitaa' simpe'nko~anko tavo'duaruko. Teie napo' pia-tooro~anko be'antaruko kiimataroma si'du'neenga.

<sup>26</sup> Masika' naurampimang, dii' kiimatanava'keta tenkeniriarupeu' mooni'koo asi'nu dua'kiria' deeko' tuutunang moo'koo."

**Nampeesi Orari-anta-koonaaare**  
(Mat 19:9; Mak 10:11-12; Luk 16:18)

<sup>27</sup> "Dii'ke taaraverimaung uripo'keta aa'pui otoing, 'Nampeesi orarieriauka'. <sup>28</sup> Teka ninge aa'dampimang, baa tee naning nani manikuma karaa'ui oovuaing teie tee nampeesi tero orarivuing teni ninka bakaang domange. <sup>29</sup> Dakaang duta tampavine-koonge dua'antaruko deeko' orara aarumo-koo tee ka'bampera taapo' dua'eai. Tampa'na' da'koo navio' paa'aravaing dakaang ootukunung mono mosianung-koo dua'du'neenga. <sup>30</sup> Ee'noko napo' dakaang birenge tampavine-aapenunge dua'antaruko deeko' orara aarumo-koo, tenaang napu'darara taapo' dua'eaing. Tampa'na' da'koo mono-koo navio' paa'aravaing dakaang ootukunung mono mosianung-koo nani'neenga.

<sup>31</sup> "Uripo'keta aa'pari otong, 'Baa tee naning ba'aang sipuma teie narung karavoto~ daarivuaing nampeesi toto'puing tasi'anta-koo.' <sup>32</sup> Teka ninge aa'dampimang, baa tee naning ba'aange tutung kaukauro nkovuaruko bata'ura deeko' teie tee teni tuu'umaang nii'narai nampuko nampeesi orarivuu'naang. Ee'noko baa tee naning teni bata'nii' nampuaing teie tee nampeesi orarivuing."

**Masika' Deto Minku-koonaaare**

<sup>33</sup> "Napo' dii'ke taaraverimaung uripo'keta aa'pui otoing, 'Diikaning masika'detonanka toto'peria' otoai, nka tampa' siomperimatoai Oving-koo nkoverira.' <sup>34</sup> Teka ninge ee' naurampimang, bakei masika' deto tamperia' otoai. Paning tang-koo makotua', ai' te' te' Kumponing bakanoo' meepo' ba'nani'doma. <sup>35</sup> Kansi' tang-koo makotua', ai' te' te' Kumponing bakanoo' kau' patu'doma. Napo' Jerusalema' tang-koo makotua', ai' te' te' Daurarong~ Pankaing bakanoo' osi. <sup>36</sup> Ee'noko napo' masika' deto dakaang bore' tampema minkueauka', ai' dake tee-koong daponavi' nii'na' du'antavearupeu' kakaara-antavema deeko' ee'noko mutaanu'antavema deeko'. <sup>37</sup> Teka 'Ee' miru'ema 'Ee' narung tampeai. 'A' miru'ema, 'A' narung tampeai.

Aing-koo taapo'ning, teing masika' deto dovang, kara teieta naning orara-ita pomaing."

### Mero' Nkonaare

(Luk 6:29-30)

<sup>38</sup> "Dii'ke taaraverimaung uripo'keta aa'pui otoing, 'Naninge dakaang duta ka'bampuko, makosi bakaang duta ka'bampaavaing maku'koo,' ee'noko 'Naninge dakaang si'da' naki'uko, makosi bakaang si'da' naki'aavai maku'koo.'

<sup>39</sup> Teka ninge aa'dampimang, naninge oraka' nkoruko tanka'ni'peauka' tee. Naninge tampavine-koo amo'koo tanko'duko napo' bere'darako asi'nameng taura'peko tanko'duai. <sup>40</sup> Ee'noko napo' nii'nunge naninge daang koosiruma mononopa'ke maku'koo eentavarako deeko', makosi tee avema napo' nii'naa' nari' aveai. <sup>41</sup> Napo' nii'nung naninge nii'noo' basinoo' naniree'naang eturuko napo' bono' divu'ei nii'noo' basinoo' nari' nanireai. <sup>42</sup> Naninge eentaruko kapoo' aveai ee'noko dakaang kapoo' kong-koo nia'duko orokoveauka'."

### Kare-nupoong Piaanaare

(Luk 6:27-28,32-36)

<sup>43</sup> "Dii'ke taaraverimaung uripo'keta aa'pui otoing, 'Da'maiko' da'koo miirinung piaavema ee'noko da'koo karenung munte'eai.' <sup>44</sup> Teka ninge ee' naurampimang, teing diikaning kare-nupoong piaaverererimaatoaing. Teing dii' barakosi'daariaining biraankevereriai. Teing dii' munte'daariaining tampa' nkovereriai. Ee'noko teing dii' oraka' nkoraarima manki'antaraariaining kungsi-koo pakuereriai. <sup>45</sup> Dii'ke tee' nkoverima Diuma tee paning-koong baurukaa' deentariaina'. Tee ee'nung tee bakaang duaa' ookeng-koo araka-antavumaung tampeng-koo ee'noko oreng-koo, ee'noko apo' tee' nari' botovukoo' aa'ning-koo koonto'nuka-koo ee'noko koonto'nuka deeaing-koo. <sup>46</sup> Ee'noko dii'ke teing nantoong dii' piaaraarimaing naing piaavererera deeko' moo' aremurii' nkoveripeu' Kumponing-eta? Tee' ee' deea' nari' teing oreng taakisi nkanuka nkoarimana'? <sup>47</sup> Ee'noko dii'ke teing da'marang naing onkeonke'eriaing deeko' aming kapoo' dau basi nii'ning nkoaamaing-koo nkoveripeu'? Bakei katua'. Mutaanang-nupoonge ee' tee' nkoaavaung? <sup>48</sup> Tee'koo tampa' nari' nkoverimatoaing tee' Diuma paning-koong tampa' nari' otomana'."

### Avuavu'koonaaare

**6** "Tanatarariaing dii'. Dootuu'koong aarumo tampara nkoverima nantoong-koo dutakanoo'ke nkoveriauka' teinge ooraarii'naang. Tee' nkoveriaing deeko' tee, teie Diumai paning-koonge moo' aruriauka'nung. <sup>2</sup> Aa'nomaatoai tenang teing ata'oinku avererema deeko' tee-koo tuuviri puumperia' otoai teinge ampirinunukai nkoaamana' pava dootuu'nanka-koo ee'noko napo' taung sionairu-koo maroita nantoonge pankaing-antavaarii'naang. Ninge masika' nau-

rampimang, teinge tee biikaang moo' ookara teka nkavaamaung. <sup>3</sup> Teka tenang dii'ke teing ata'oinku avererema baku'eri nkoveriai kapoo' tampanaange nkovuaing mare'anaange noru'uauka'; <sup>4</sup> Ee'noko teie Diumai kapoo' baku'nii' oovumaunge sirapo'ke moo'duriai dii' tee-koo."

### Kungsi-koonaaare

(Luk 11:2-4)

<sup>5</sup> "Tenang kunsirarima teing-pina' ampirinunuka-pina' nkoraria' otoai. Pava dootuu'nairu-koo ee'noko taung sionairue donkonai kungsi-koo aa'na' piavoromaing-pina' nantoonge ooraarii'naang. Ninge masika' naurampimang, teinge tee biikaang moo' ookara teka nkavaamaung. <sup>6</sup> Tenang dii' kunsirarima diikanavarkoo avo'nii'navaro-koo tuntarima karanaang da'perima kunsirarimatoai tee-koo Diuma-koo naninge oopaa'koo, ee'noko teie Diumai kapoo' baku'nii' oovumaunge sirapo'ke moo'duriai dii' tee-koo. <sup>7</sup> Ee'noko tenang kunsirarima kara putu'eria' otoai teinge mutaanang-koo-nupoonge nkoaamana' aa'paama, 'Mmau' kara-koo taaramuriaina'. <sup>8</sup> Koonto' teing-pina' nkorariauka', ai' teie Diumai tee noru'umaung teing kapoo' dii' apuka'darimaing tutung eentaveriaruko tee.

<sup>9</sup> "Kunsirarima ee' kunsirarimatoai, 'Niuma paning-koo otomaung, dakaang miring meeka'antavari otoaing. <sup>10</sup> Dakaang muu' po'antaveai. Dakaang pia nkoaravaing anke kansi'koo paning-koo nkoaramana' nari'. <sup>11</sup> E'mung-koo makosina' ameriai tee taamang doong kante amerimaung. <sup>12</sup> Tonta'antameriai niikaning orarananka nii' oraka' nkomaarimaing tonta'antavorompimana'. <sup>13</sup> Ee'noko parapaara-koo si'meriauka', teka tonta'antameriai teieta naning orara bakaang purinto'keta; ai' da' tee ookara-koo okorui tarenumpo', purinto'po'nung, ee'noko meena'doi otomaung ookara doong-koo. Tee' ee'na'."

<sup>14</sup> "Ai' dii'ke nantoong tonta'antavereriko teing dii' oraka' nkoraarimaing teie Diumai paning-koonge dii' tee' nari' tonta'antaruriainge. <sup>15</sup> Teka dii'ke tonta'antavereriaruko nantoong teing biikaning oraka' nkonanka-koo teie Diumai tee tonta'antaruriauka'nung diikaning orarananka-koo."

### Unkumonaare

<sup>16</sup> "Tenang dii' unkumorarima munte'dorining-pina' oro'daria' otoai teing ampirinunuka nkoarimana', ai' teing teing oing oraka' oro'antavarimaing maroita unkumaririning taa'ni'antavarima. Ninge masika' naurampimang, teinge tee biikaang moo' ookara teka nkavaamaung. <sup>17</sup> Teka tenang dii' unkumorarima oing duu'darimatoai bore' duunie sisi'darima nantoong-koo dii' unkumoraririning-pina' oro'dariauka'na'; <sup>18</sup> Teka tee narung-koo Diuma-koo naninge oopaa'koo deeko' sira'dariri otoriai ee'noko teie Diumai kapoo' baku'nii' oovumaunge sirapo'ke moo'duriai dii' tee-koo."

**Kapoo' Tampeng Paning-koo Oosi-koonare**

(Luk 11:34-36; 12:21-34; 16:13)

<sup>19</sup> "A' kansi'koo kapoo' tampeng kavonanka oosieria' otoai te' pumpu' dovange ee'noko takarau' aa'ninge orariaamanoo', napo' bakispunankai pesi'aama baki-aa'aamanoo'ke. <sup>20</sup> Teka paning-koo moo' tampeng oosierimaatoai te' ee'noo' pumpu' dovange ee'noko takarau'ke orariaavarupeu', napo' bakispunankai pesi'aama bakiaa'aava'noo'ke. <sup>21</sup> Ai' te' tokoo naning bakaang muuninava~ otoainoo' bakaang pankaruntoonge noru' tee te' otoaing.

<sup>22</sup> "Domang tee duta pina', tee diikaang mono bakaang puu. Tenang diikaang duta tampara deem-pani otoko diikaang mono ootukunairu arakai maanto'ui otopeu'. <sup>23</sup> Teka duta tampara deeaung deempani otoko diikaang mono mutaanange maanto'ui otopeu'. Tee'koo tee diikaang domang mutaanang-nameng-koo otoko deeko' bakei aa'na' masika' mutaanantoring-aining.

<sup>24</sup> Narunge kenaanka ovontura siompurearupeu', ai' teie tee narung munte'uma nii'nung piaavumatopeu', nii'noo' narung siompuma nii'nung siompuarupeu'. Tee'koo dii'ke Kumponing ee'noko kavokavoro ookeng deto deeng-antaveriarupeu'.

<sup>25</sup> "Tee'koo ninge naurampimang dii', noru' manki'doria' otoai aa'ning-koo taamang tovang ntong domanturiaining ee'noko mononopa'nanka. Aming-koo, nna', domaang tee taamang-koo bi'ari otoa' ee'noko mono tee baarong-koo io'arava'. <sup>26</sup> Oovereriai teing baren-nanka auvi'au-kooning. Teing teing kapoo' keeng noru'aava', kavaama oosi noru'aava', kore' noru'aava' pava-koo, teka teing teing Diumai paning-koonge bau'urimaing. Enang arekee', dii' ee teing-koo dau basinanka deea' bakaang norunoru'koo? <sup>27</sup> Ee'noko dii'koo baie noru' manki'oma doong naraanga'noo' deto be'nu'antavura te'koo domampari otopeu'? Otoa'. <sup>28</sup> Ee'noko aming-koo napo' dii' baarong tovang-koo noru' manki'dorikoo'? Oovereriai teing iioo'nanka tamung dupurimana', baarong tua'koo pore'oroaing. <sup>29</sup> Teka ninge ee' naurampimang, aa'na' tampa' nerampurimaing nantoong biikaang meenasi puru'uitaa', bane dauraronanka Solomoni'pina'. <sup>30</sup> Teka Kumponing baa'nanka tee' nerampurimaing deeko', teing aa'nomaing na'mung doong-koo domamparara dauna'mung mara'oko tai-antavaakoo', tee tee' nari' tasi'periaing dii'ke, masika'anta oki'naa oto'derurininge, ai' dii' teing deto basinoo' noru'duri duaanaruriaining.

<sup>31</sup> Tee'koo enang tee noru' manki'doria' otoaing aa'perima, 'Aming naiampii'naang?' ee'noko 'Arenaa' kurumarii'naang?' <sup>32</sup> Aing ee' oro' kapoo' mutaanang-nupoonge kariaamaing, teka dii' tee' deea', ai' dii' Diumai Paning-etaing noru'ui otong aing ookara kapoo' dii' apuka'darimaing. <sup>33</sup> Tee'koo ainkato noru'eria' Kumponing bakaang muu' deto pankaruntoonge noru'erimatoai tee ninka bakaang aarumo koompari oto' ninka nari' ee'noko teing aing kapoo' apuka'dari-

maing nari' aruriainge. <sup>34</sup> Tee'koo tane'nung doong-koo noru' manki'doriauka'. Tane' te'mung baka noru'aravaina'mung. Ai' ookara manki'nanka na'mung doong-koo makosina' bire'ari otong."

**Nantoong Birevire' Pote-koonare**

(Luk 6:37-38)

**7** "Nantoong koong-anta-koo oioi'daria' otoai Kumponing nari' koong-antaru'neenga. <sup>2</sup> Ai' dii'ke koong-antavererimaung-koo tee' nari' Kumponing dii' koong-antaruriang. Tee paaranang kompei nantoong koong-antaverimanarong Kumponing kompui da' koong-antaru'naang. <sup>3</sup> Aming-koo dake nanki' daara'ma'nung-koo duta-koo oovemaunge teka daka noru'darava' da'koo duta-koo konkinarong otoing? <sup>4</sup> Arekee' dake aa'pepeu' tee daara'ma'nung, 'Io' nanki' moo'dampai da'koo duta-koo otoing,' tenang daka oorarava' tee konking da'koo duta-koo otoing. <sup>5</sup> Da' ampirinung~, iro' tutung daka-koo moo'daravaing tee konking duta-koo ee'noko tenang daara'ma'nung-koo siraka'pei oovera moo'eai tee nanki' daara'ma'nung-koo duta-koo otoing."

<sup>6</sup> Ee'noko Jiisuu'ke mirumiru' navurima aa'puu', "Kapoo' meekung mosi'nanka averereria' otoai bere'arima oki'noo'na' tairaarima busivusiriraari'neenga. Ee'noko napo' diikaang duku' pooro'anko dua'eria' otoai. Tee' nkoveriko meto' ninka nari' mee'aama more'aa'neenga."

**Kunsimarimatoaina'**

(Luk 11:9-13)

<sup>7</sup> "Eentarariai aruriaina'. Besi'eriai daa'eriaina'. Kopikopi'eriai karanaang daate'deruriaina'. <sup>8</sup> Ai' ookara nantoonge eentavarimaingee tee nkavaamaung, ee'noko besi'aamaingee tee daa'aamaunge, ee'noko karanaang kopikopi'aamaing teingee daate'evurimaunge. <sup>9</sup> Dii'koo baie bauring taamang-koo eentavuko kapang avupeu'? <sup>10</sup> Nii'noo' tavi'koo eentavuko ee boru' avupeu' tee? Otoa'. <sup>11</sup> Tee tee dii'ke orange diurukaa' tampa' averererimaung deeko' noru'eriaing teie Diumai paning-koo otomaunge bakei tampa' masika' avuriaing teing tee-koo eentavarimaing. <sup>12</sup> Tee' nantoonge dii' tampa' nkoraarii'naang piarorimana' tee' nari' nkovererimaatoaing teing dii'ke, ai' teie aunge aarumoi tee boto Moosesi-ning ee'noko nakaro-nupoong urikupoong biikaang naroka dupeantavuri otong."

**Karanaang Kevaronta-koonare**

(Luk 13:24)

<sup>13</sup> "Muu' paninung-koo tuntoma te' ito-navarong. Teke tevaronge tuntariaing avutevu'daria', ai' tee karanaang pankaing, ee'noko taung tee beeta'nii' tee mosianung-aape bei otong, ee'noko mmou' tevaronge tumparimaung. <sup>14</sup> Teka tevarong ito-navarong kaponavunge danto tee domaang isikung-anta-aape bei otong, ee'noko mmou' nantoonge dekopi'aamaung teving."

### Koi'navari Ee'noko Bakaning Sinananka

(Luk 6:43-44; 13:25-27)

<sup>15</sup> "Tanatarariaing teing-koo nakaro-nupoong daang Kumponing-etaning tamparimaing-koo. Teing teing dii'anko sipisipi'koong dopa' kurumpariri poroaing, teka kuunoo' teing teing nkaunanka makosi-nanka tairo'nanka. <sup>16</sup> Teka tee-koo biikaang sinananka-koo dii'ke tasi'pereriaing. Ai' nantoonge ee karikau' too'murintaa'po'navari-koo kavaapeu'? Ai' kiring ee nantong-koo kavaapeu'? Otoa! <sup>17</sup> Tee' nari' ookara koi' tampenanka-koo tee sinang tampanananka bi'umaung. Ee'noko tee-koo koi' orara-koo sinang orara bi'umaung. <sup>18</sup> Tee-koo koi' tampara-koo orara sinang bi'uarupeu', ee'noko orara koi'koo sinang tampara bi'uarupeu'. <sup>19</sup> Ee'noko ookara koi'nanka sinang tampara bi'uauka'ning teing nokiaarima nta'koo dua'aariaining. <sup>20</sup> Tee'koo biikaning sinananka-koo dii'ke tasi'pereriaing teing nakaro-nupoong Kumponing-etaning deeko'.

<sup>21</sup> "Mmau'ke tee aa'maamaung, 'Ovoring, niikaang Ovoring,' nka teing ookara nari' tumpariauka'nung te muu' paninung-koo, teka teing naing deeko' tee Mma' paning-koong bakaang pia siompaavaining tumpariaing. <sup>22</sup> Napo' nantoong karingai aa'maavaingee ning te'mung, 'Ovoring, Ovoring, nii' ee dakaang miring-koo tarampeemariaru'ning~ napo' dakaang miring-koo ma'nari bata'arampiaruu'ninge taa'ni'antananka mmau' nkoampima?' <sup>23</sup> Teka ninge ee' nauarampaing teing sira'pansi, 'Temu'keta dii' nkaning pina' noru'dampiaung. Tokoi beriai ning-ankoita dii' orara aarumo nkonuka.'"

### Matauna' Ee'noko Kanu'na' Pava Kani-koo

(Luk 6:47-49)

<sup>24</sup> "Tee'koo ookara nantoong aung nkaang kara taaravaama nkoaakoo' teing teing tee-pina' naning norukasi' tee bakaang pava boia'koo dau kanivuu'nung. <sup>25</sup> Teketa aing aa'ning pou': apo' dua'aru', doua tuuvuu', ee'noko dovinge aa'na' duparara dankampuu' tee pava, teka teva pesi'arava', kapang-koo boia'koo e'manii'nava deemparako. <sup>26</sup> Teka teing ookara nantoong nkaang kara tamung taaravaama siompaavarukoo' teing teing tee-pina' naning kanu' tee bakaang pava tamung piisi'koo dau kanivuu'nung-pina', e'mang-antavua'. <sup>27</sup> Ee'noko tenang teing aing aa'ning pora apo' dua'aru', doua tuuvuu', ee'noko dovinge aa'na' duparara dankampuu' tee pava, ee'noko bakei pesi'arara tuung tanuu' tee pava."

<sup>28</sup> Ee'noko tenang Jiisuu'ke tee' minkuvura bakeario' nantoong karinga bakei aa'na' ta'nimpariru' tee-koo bakaang nau-anta-koo kara bakaang purinto' deempario', teing-pina' biikaning boto naunuka-pina' deea'.

### Naning Oramuu'po'nung

(Mak 1:40-44; Luk 5:12-14)

**8** Tenang Jiisuu' mii-eta nau-antavurira depeto siario' nantoong karingai siompau' tee. <sup>2</sup> Ee'noko

narung oramuu'po'nung pora Jiisuu'koo uro'kanoo' kinkinui eentavarama aa'puu', "Ovoring, da' piarora deeko' dake ning aung oramuu' kuimepeu'nung."

<sup>3</sup> Teketa Jiisuu'ke bireng tovororara kompuu' tee, aa'puma, "Piamoi otong. Enang kuiraring!" Ee'noko namu'ke tee tee bakaang oramuu' kuiaru'. <sup>4</sup> Teketa Jiisuu'ke aa'puu' tee, "Tarerari naning naueauka', teka namu'ke Moosesi bakaang boto siompei piristi'koo sira'antararavai, ee'noko tampa' ooruko Kumponing-koo boontunang nkoveai nantoonge tee taa'ni'anta ooaara da' teing ninka nari' oto'koo taura'nii' tasi'daavaina', tee' Moosesi bakaang botoi minkuvu' mana'."

### Piatooronuka~ Narung Daaku' Tanata

(Luk 7:1-10)

<sup>5</sup> Tenang Jiisuu' te' Kapaneume'navuntu'koo tumparara otoko narung Ju'deeau'ng piatooronuka narung daaku' tarenara tee-anko pora pakupaku-koo eentavaru' aa'puma, <sup>6</sup> "Ovoring, nkaang bautara osie bempari otong siipai sisikeera ninka doota-antavuiu'." <sup>7</sup> Teketa Jiisuu'ke aa'puu' tee, "Merai'ng taare-antavama'naang tee." <sup>8</sup> Ee'noko teie piatooronuka daaku' tarenarai maku'uma aa'puu', "Ovoring, ning tee makosi deea' da' nkanoo' pava-koo kuung po'koo; <sup>9</sup> Ninge da' pankaing tasi'damira tee' minkuamaang, ai' ning tee napo' nii'noo' basi-koo iri'koo kuung o'nong piatooronuka tare-koong-koo. Ee'noko nii'nung aa'panko dei, 'Beai,' tee bepeu'. Ee'noko nii'nung aa'panko dei, 'Poai,' tee popeu'. Ee'noko nkaang bautara aa'panko, 'Aung nkoveai,' teie nkoveu' tee. Tee'koo dake tamung karai minkueko nkaang botovotona' taarevoaing." <sup>10</sup> Tenang Jiisuu'ke tee' taaravura ta'ninuu', ee'noko teing siompaako'ning nauvurima aa'puu', "Ninge masika' naurampimang dii': Temu'keta aung amurii' baito pankaing ooampaung bane Isireelinupoong ninka nari' o'norimaunge. <sup>11</sup> Ee'noko ninge aa'dampimang, karinga nantoong duaa' pomanoo'keta ee'noko tumparamanoo' tenairu-eta poroainng nari' taaman-aavaing Eebaraami', Aisake' ee'noko Jeekopi' ninka tee muu' paninung taa'ni'poain'ung. <sup>12</sup> Teka teing muu'koo temu' miru'nii'nuka † teing a'dang dama'du dua'uriaining mutaananoo', te' ee'noo' nantoong biromparima si'da' dovang kakirinkuarimatoainoo' sisikeera-koo otoroi." <sup>13</sup> Teketa Jiisuu'ke tee piatooronuka daaku' tarenara aa'puu', "Naniai. Tee tee tee' nari' dake masika'antaveina' nkoaravaing." Ee'noko tee bakaang bautara tee tenang tee-koo batei-koo taarevou'.

### Jiisuu'ke Piita Ba'doraa Taare-antavuu'na'

(Mak 1:29-31; Luk 4:38-39)

<sup>14</sup> Tenang Jiisuu' Piita bakanava-koo pora teie Piita ba'doraa teke batanang-koo bempario' oovuu' uipaarii' ninka siipavora. <sup>15</sup> Ee'noko teie teni bakaang bireng-koo kompuo' tee uipaarii' namu'ke boimpuu', ee'noko tenie deto i'amparara bau'uru' teing. <sup>16</sup> Teketa duaa'

† Teing miru'nii'nuka teing Ju'nupoong ee'ning.



tumpario' nantoong mmou' ma'narie koriaariko'ning Jiisuu'anko tavo'aaru', ee'noko teie ma'nari kara nanaarei bata'uru', napo' siipa-nupoong taare-antavuru' ookara. <sup>17</sup> Jiisuu'ke tee' nkovuma tee kara dupe-antavuu' teie Aisaia'ke nakaronunge urikunge minkuvu'nung Daari Meekung-koo aa'puu'noo'ka, "Teie niikaning siipananka ee'noko aruaru'nanka nkamemurira dua'uaing."

(Aisaia' 53:4)

### Jiisuu' Siong-koo Makotua'na' Noru'areko'naanka

(Luk 9:57-60)

<sup>18</sup> Tenang Jiisuu'ke nantoong karingai tee koroai otoroko oovurira bakaning ninka nari' pako'arii'naang botoaru' nuaru'ka amenka'koo karinga te' otoroko.

<sup>19</sup> Teketa narunge boto naunuka-koonge tee-anko pora aa'puu', "Pankaing ee, ninge tee da' siontampaing are' tokoo da' beainoo'." <sup>20</sup> Teketa Jiisuu'ke maku'uma aa'puu' tee, "Nkaunanka biikaning kumpenanka oto'evoromaung, ee'noko barennanka auvi'au-kooning biikaning bitonanka, teka ning Tee Naning-naumpo' Paning-etaing~ tokoo bore' patu'maravainoo' oto'memua'."

<sup>21</sup> Teketa napo' teing siompaako'ning-koong narung pora aa'puu', "Ovoring, io' taura'meko mma' dako'am-painoo' basinoo' mma' ninka o'horeaing, ee'noko mma' dako'amirai'nange da' siontampai." <sup>22</sup> Teka Jiisuu'ke aa'puu' tee, "Siperiko boo'nukai bii'ka boo'nuka dako'aariaing, teka da' aa'damaang: Bera daankieaing tee Kumponing bakaang muu'." ††

### Jiisuu'ke Piong Pankaing Bake-antavuu'na'

(Mak 4:36-41; Luk 8:22-25)

<sup>23</sup> Teketa tee Jiisuu' bakaasi-nareng-koo aa'earako teing bakaning barevare-nupoong tee siompai nari' aa'eariru'. <sup>24</sup> Teketa tenkenaara nanaako namu'ke ta'nina' piong pankaing pou' teke nuaru'koo daue. Teketa tee boo'a bakaasi-nareng-koo daue ta'da'parama nanuu', teka Jiisuu' teke aatui otoko. <sup>25</sup> Teketa teinge bakaning barevare-nupoonge berora tanteaama aa'pau' Jiisuu', "Ovoring, pakumeriai, nii' enang ke'nu-ru'marii'naang!" <sup>26</sup> Teketa teie maku'urima aa'puu', "Dii' bakei diikaang baito oki'naa. Aming-koo tee' arorerimang?" Teketa deto i'amparara teie tee piong ee'noko tee eemaaru' ntong-koong aka'puio' bakei aa'na' tarorovu'. <sup>27</sup> Ee'noko teing ta'ninaara nia'kaama aa'paako', "Aung naning aremurii' aa'nung piong tovange eemaaru' dovange taaravaakoo'?"

### Jiisuu'ke Ma'nari Naninka Kenaankara-ita Bata'uru'na'

(Mak 5:1-17; Luk 8:26-37)

<sup>28</sup> Teketa teing Jiisuu'ninka Kadara'navete-koo ta-vo'ariko kenaankarai naninkai ma'narie kori-

aareko'naankai kuvi dako'doma-ita poreta Jiisuu' kune'uretu'. Bakei avo'avoro'ka. Naning teke tankin-uarupeu' tenaanka-ankoi. <sup>29</sup> Poreta aa'puretu', "Jiisuu' ee, dake Kumponing Bauringe nii' arekee' nkomerii'naang? Ai' nii' tora'anta-koo poinge niikaang batei mme' makotuaruko?" <sup>30</sup> Teketa ee'nooketa duerue'ke mmou' pooro'navontu meru'arima otoroko'. <sup>31</sup> Ee'noko teinge ma'nari orenge eentavarima Jiisuu' aa'pau', "Dake bata'merima deeko' pooro'navontu-koo kuung tung-koo taura'meriai." <sup>32</sup> Teketa Jiisuu'ke aa'pu-ru', "Beriaing." Tee tee tenang ma'nari bakoarira pooro'nanka-koo tumpariru', ee'noko tevontu ootuku-navontu pemue doonko koo'ariru' nuaru'koo bera ke'nuru'ariru' teke. <sup>33</sup> Ee'noko teing pooro' bau'ariko'ning mmariau'. Teketa osi-aape kua'parira dooreaaru' tee ookara kapoo'nanka teke nkoaru'ning napo' ma'narie koriaareko'naanka-koo nkoaru'na'koo. <sup>34</sup> Teketa ookara nantoong temono-nupoong berou' Jiisuu' kune'koo, ee'noko Jiisuu' ooaara teing aa'na' eentavariru' Jiisuu' teketa temeng-eta biikanameng-eta tenkenuu'naang.

### Jiisuu'ke Naning Doota Tamparu'antavuu'na'

(Mak 2:1-12; Luk 5:17-26)

**9** Teketa Jiisuu' bakaning ninka bakaasi-koo aa'eari-ra pako'arira bakanoo' osi masipo' tavo'ariru'.

<sup>2</sup> Teka nii'ninge nantoonge naning doota tee-anko ta-vo'au' batanang-koo bempario'. Ee'noko tenang Jiisuu'ke teing tee tavo'au'ning biikaang baito oovura aa'puu' tee naning doota, "Domang manki'doauka', ee aung, dakaning orarananka tonta'deronsing." <sup>3</sup> Tee' nkovuko ooaara nii'ninge boto naunukai bii'ka kareaa-ma aa'paako', "Aunge bakei naning Kumponing bau-vaupaa'umaang." <sup>4</sup> Teketa Jiisuu'ke biikaang noru' noru'ura aa'puru' teing, "Dii' aming-koo diikaang domang-koo kuunge tee' munkururimaang?" <sup>5</sup> Arera kara masipa'poaruko ooverira ning makosi deeaung tammeripeu' aa'ning-koo ee' minku-koo, 'Dakaning orarananka tonta'deronsing,' nii'na' ee' minku-koo, 'Daa'darara naniai.?' <sup>6</sup> Teka dii'ke iro' noru'koo makosi ning Tee Naning-naumpo' Paning-etaing tee taura' o'nong anke kansi'koo o'noi orarananka tonta'koo makosi..." Tee'pura tee naning doota aa'puu', "Daa'darara dakaang tani' nkavei naniai dakanava-koo." <sup>7</sup> Ee'noko tee naning deto donkonura bakanava-koo beu'. <sup>8</sup> Ee'noko ookara nantoong karingai ooaara tee aung karang kamaankiai datavorou'. Ee'noko teinge Kumponing daangampau' tee temurii' taura' nantoong avuru'nung-koo.

### Jiisuu'ke Maatiu' Bokuvuu'na'

(Mak 2:13-17; Luk 5:27-32)

<sup>9</sup> Ee'noko teketa Jiisuu'ke nanuma narung oovuu' miring Maatiu', taakisi nkavaako'nava-koo ba'nanuio' bakanavaro-koo. Teketa Jiisuu'ke aa'puu', "Ning siomeai." Ee'noko Maatiu'ke deto donkonura tenang-eta deto tee siompui nanuu'nung. <sup>10</sup> Teketa taamang nkovuu'nung-koo Jiisuu' ba'nanuu' bakaning

† Ee' oro'pari otong: Tee naning kapoo' baumai deing nka-koo noru'uitaa' Jiisuu' tee' minkuvuu'. †† Nantoong Jiisuu' domaang okora' tasi'paarimainge tee siompaama domaang isikung oto'evoromaung, teka kansi'koong kapoo' domange dai'aamaing teing domaang okora'keta taapo'nupoong, boo'nuka Kumponing-ankoi.

barevare-nupoong ninka ee'noko nantoong mmau' nii'ning orenanka aa'ning taakisi nkanuka porora ba'naniaara tee ninka nari' taamanau' teke Maatiu' bakanava-koo. <sup>11</sup> Ee'noko teinge Boto Keperuu'navitue tee' ooaarira teing bakaning tee siempaako'ning nia'aarima aa'pau', "Diikaang pankaing aming-koo taakisi nkanuka ninka ee'noko nantoong orenanka nari' taamanaamaang?" <sup>12</sup> Ee'noko Jiisuu'ke tee' taaravura aa'puu', "Teing nantoong tampa' otoroining naninge nankai'urii'naang piavoroa', teka teing siipavoromaing naing piavoromaang. <sup>13</sup> Berira io' tee kara daari meekung-koong-koo tampa' barerariaing aa'pumanaare, 'Ninge tee aarumo piaa unaa-anta-po'nung piamoi o'ning, tee boontunang deea'.

(Osea 6:6)

Ai' ning nantoong tampenanka-anko moa'. Ning orenanka-koo mou'nung nauaranko bere'aria'naang."

### Jiisuu' Unkumo-koo Nia'au'na'

(Mak 2:18-22; Luk 5:33-39)

<sup>14</sup> Napo' Jooni bakanning barevare-nupoonge porora Jiisuu' nia'aama aa'pau', "Da' dakaning da' ninka nanirimaing arekee'koo dootuu'koong aarumo siumpai unkumuaruaing? Ee'noko nii' Boto Keperuu'navitu ninka unkumumarikoo'." <sup>15</sup> Ee'noko Jiisuu'ke maku'urima aa'puru', "Teing nantoong baranee'navitu nampeesikoo poromaing naning nampeesinara ninka nari' otoroi arekee' napo' orarunsiaripeu' tee nampeesinara teke otoko? Batei tee otong tee naning nampeesinara teing-eta tonta'aravaina'mung, ee'noko tenang teing doong-koo unkumoariaing. <sup>16</sup> Naninge tee baarong nerakara' urikara' ninka nara'ka pate'uarupeu', ai' nerakara'ke tera' urikara' beeto'uko dere'arara oraru'kupeu'. <sup>17</sup> Napo' nantoonge nerakaru' uaininaru' urikaro'koo pare'aavarupeu'. Tee' nkoaako deeko' tee, tero' naka'arako teru' uaininaru' dakoarapeu' ee'noko tero' tenang oraru'kupeu'. Teru' nerakaru' uaininaru' nerakaro'koo deeko' pare'koo makosi, tee'koo ookeng tampa' otorepeu'."

### Teni Nerai'na' Boo' Ee'noko Napo' Manikuma Siipa-po'nani Taarevoretu'na'

(Mak 5:22-43; Luk 8:41-56)

<sup>18</sup> Tenang tee' minkuvuma teke otoko narung pava dootuu'nava tanatanuka-koong narung tavo'arara tee-koo uro'kanoo' kinkinui eentavarama aa'puu', "Nnorang bakei enang oki'naruu'kuing. Porai'nange tenikoo bireng pante'eko teni domamparavai." <sup>19</sup> Teketa Jiisuu' donkonura tee ninka nari' beretu' ee'noko teing bakanning barevare-nupoong nari'. <sup>20</sup> Teketa tenang nii'nani naning manikuma kivora-ita kemare'ka-koo tarumatearako'nani tee-koo dama'du pora bakaang mononopa'koo kainu' kompuu', ee' noru'arara, "Bane oki'noo' kompamira bakaang mononopa'koo, ning teni taaremoainani." <sup>22</sup> Teketa Jiisuu'ke bere'arara teni oovura aa'puu', "Ani ee, da' doturaravaing. Dakaang baitoi taareroinani." Ee'noko teni manikuma tenang

ee'nanng taarevou'. <sup>23</sup> Ee'noko tenang tee Jiisuu' tee naning pava dootuu'nava tanatanuka-koong bakana-va-koo koinura nantoonge patuaiarima, biromparima naampavaako oovuru' bakei karingai. <sup>24</sup> Ee'noko teie aa'puru' teing, "Oko sirariai, ani nerai'na' booa', teka tamung aatumaang." Ee'noko teinge benkempau' tee. <sup>25</sup> Teketa teing nantoong karinga dama'du etuvurira teni nerai'na' otou'navaro-koo tumparara teie bakaang bireng kompuu' deto i'ampuko teni daa'aru'. <sup>26</sup> Ee'noko tee-koong aung-koong doorenanng tee ootukunairu-koo beremparu'nung.

### Jiisuu'ke Kaputu'ka Bantang-antavureta Naning-koo Ma'naang Amako Bata'uu'na'

<sup>27</sup> Ee'noko teketa nanuko Jiisuu' kenaankai naninkai kaputu'kai bokurema siompuretu' aa'purema, "Pankaing, Deevita' bakanaving-koong, Piaamereaing nee!" <sup>28</sup> Ee'noko teketa nii'nava-koo tumparako tenaanka kaputu'ka tee-anko poretu', ee'noko Jiisuu'ke nia'urema aa'puretu' tenaanka, "Dee'ke ee ning makosi masika'antameresi otong ninge piaroresina' nkorampee'naang?" Maku'urema aa'puretu', "Ee', Oving." <sup>29</sup> Ee'noko tenang teie beekaang duta kompurema aa'puretu', "Deekaang baito-koo makosina' nkoaravaing dee'koo." <sup>30</sup> Ee'noko beekaang duta tenang bantou'. Ee'noko aa'na' orokovuretu' aa'purema, "Teko aung naninge noru'uauka', makempereaing." <sup>31</sup> Teka tenaankai tee bereta Jiisuu'koong doorenanng bereng-antavuretu' ootukunairu-koo temeensi'kooning-koo.

<sup>32</sup> Teketa napo' tenkenaako nii'nung naning ma'naange korivuko karoaruko'nung Jiisuu'anko tavo'au'. <sup>33</sup> Ee'noko tenang tee ma'naang bata'uiu' tee karoaruko'nung karou', ee'noko nantoong karingai ooaara ta'ninaara aa'pau', "Kapoo' ee' oro' ooampiaruu'nung teroita nii'koo Isireeli-nupoong-koo meu'ka." <sup>34</sup> Teka teinge boto keperuu'navitue aa'pau', "Tee aa' ma'nari biikaang pankaing bakaang iri'ke tee' bata'urimang ma'nari."

### Jiisuu'ke Bakaning Barevare-nupoong Mintoong-koo Botovuru'na'

(9:35-10:42)

### Nantoong Mintoong-nupoong Oki'ning

<sup>35</sup> Jiisuu' tee tee' nari' osinankai pankenge ee'noko oki'nareka'ke nanuu' nau-antavurima biikaning pava dootuu'nanka-koo daankiarama, aa'noma, tampara doorenanng daankivuma tee muu' paninung-koong ee'noko siipananka amutemurii' taare-antavurima. <sup>36</sup> Ee'noko tenang teie teing nantoong karinga oovurira bakaang domang aa'na' piaavou' teing ereananuka ee'noko aruaru'nuka deempariri otoroko'nung-koo, teing-pina' sipisipi' tanatanungropanuka-pina'

oro'pariko. <sup>37</sup> Teketa teing bakaning barevare-nupoong aa'puriko, "Sinang tee bakei aa'na' meura'puing, teka kavu'nupoong oki'ning. <sup>38</sup> Tee'koo kunsirariaing sinang kavu'koo Ovinge kavu'nupoong botovuriaina' tee-koo bakaang mintoong-koo."

**Aing Mirinanka Nanai'keta Kenaankara-koong Kara Okovuri Nkanuka**

(Mak 3:13-19; Luk 6:12-16)

**10** Jiisuu'ke teing nanai'keta kenaankara bakaning barevare-nupoong tee-anko bokuvurira taura' avuru' makosi-antavurima ma'nari oreng bata'koong ee'noko napo' siipananka amutemurii' taare-anta-koonge.

<sup>2</sup> Aing teing mirinanka teing nanai'keta kenaankara kara okovuri nkanuka biikaning: Tutuna'nung Saimoni', nii'noo' Piita, ee'noko teie baara'ma'nung Aanduru'; napo' Jeemisi, tee Siebedi bauring; ee'noko baara'ma'nung tee Jooni. <sup>3</sup> Napo' narung Pilipi', ee'noko narung Baatolomiu', napo' nii'nung Toomasi ee'noko Maatiu', tee ee'nung taakisi nkanuka-koong; napo' nii'nung Jeemisi, tee Alopeasi bauring; ee'noko narung Ta'deasi. <sup>4</sup> Napo' nii'nung Saimoni', Ju' bii'ka donkong-koo pia-navitu-koong; ee'noko narung Judasi Kerio'nara, tee tooka kompui Jiisuu' taura'puu'nung bakaning kare-nupoong-koo.

**Jiisuu'ke Teing Nanai'keta Kenaankara Nko-nko Nkoava'naang Botovuru'na'**

(Mak 6:7-13; Luk 9:1-5)

<sup>5</sup> Teing aing nanai'keta kenaankara Jiisuu'ke botovuru' kara aung ninka tautauvurima, "Ju'deeaing biikanoo' beriauka', napo' Sameria'kooning-koo osi-koo beriauka'. <sup>6</sup> Teka teing Isireeli-nupoong sipisipi'pina' pooariru'ning biikanairu-koo beriai. <sup>7</sup> Berira kara aung anaare daankieriai, 'Tee muu' paninung tee enang due' poing!' <sup>8</sup> Ee'noko siipa-nupoong taare-antavererieriai. Napo' boo'nuka domampereriai. Ora-muu'po'nupoong kiirora'antavererieriai. Ee'noko ma'nari bata'erieriai. Aung amurii' iri' tamung arompiring ee'noko dii'ke napo' tee' tamung pakuereriai tee ninka. <sup>9</sup> Aing aa'ning kapoo'nanka nkaveriauka': mooni'nanka kereka-koo kuunga, miku taamang-po'nung, nii'noo' mononopa' paripari', ee'noko boonamante~, napo' donsi' nkaveriauka', ai' tee tee pakuereriko dii' napo' teinge pakuraariaing. <sup>11</sup> Aremono-koo dii' beriamonono-koo pankamono-koo deeko' nii'noo' osi oki'namono-koo deeko' naning bakasi besi'eriaing teka, ee'noko tee ninka otoriai bakanova-koo bera tenkeniriainoo'ke basi. <sup>12</sup> Tenang teva-koo tuntarima moa-antaveriai tee naning. <sup>13</sup> Ee'noko teie teva'koonge nkaang kara taara-koo aroo'uaing deeko' tee moa teke teva-koo otoaing tee ninka, ee'noko aroo'uauka'nung deeko' tee napo' diikaang moa dii'koo napo' toroaravaing makosi.

<sup>14</sup> Naninge onkeonke'duriauka'nung deeko' ee'noko diikaang kara taaravuauka' teketa teva-ita, nii'noo' osieta, tenkenirima temono-koong da'mong tankaveri-

aing diikaang pe'naa'keta temono Kumponing-koo maarekusi'namono taa'ni'antaveri. <sup>15</sup> Masika' naurampimang ninge, te'mung simpe' nkona'mung kiimata temono-nupoong biikaang koonto' bakei dau basi deemparavaing teing-koo temu'nupoong oreng-koo biikaang osi Kumponing parou'uu'ning-koo, aa'noko Sodom ee'noko Komora'."

**Mankimanki' Amutemurii' Tavo'kuaing**

(Mak 13:9-13; Luk 21:12-17)

<sup>16</sup> "Aing ee, ninge tee dii' sipisipi'nanka-pina' botorampimang nkaunanka-koo meu'ke botorampipeu'na'. <sup>17</sup> Tee'koo donta'peri naniriai, ai' dii' teinge nantoonge koompaara'navitu-koo tavo'daari- aing, nii'noo' mura'daariainge dootuu'arimanairu-koo. <sup>18</sup> Dii' teing ning-koo dai'daarira donkong-antara- aing ovo'ma'nuka-koo ee'noko dauraronanka-koo uro'kanoo'. Tee' nkoaravaing dii' nkaang kara sira'koo miru'nii'nuka deentariko, teing-koo ee'noko ookara Ju'deeaing-koo. <sup>19</sup> Teka teinge tee' tuutunang~koo be'antaraariko kapoo' minkueriaining ee'noko minkueriaina' noru'erima avitoitoi noru' manki'doriauka'. Ai' tenang ee'nang nia'daariko Kumponing naururiaing kapoo' minkueriaining. <sup>20</sup> Dii' dii'ka tee kareriauka'nung, teka tee Tanuaang Meekung Diuma-itaing dii'koo kuunge karoaing.

<sup>21</sup> "Napo' aa'noainge: bataatai tooka kompui baara'ma'nung taura'puaing dupisi'aava'naang, ee'noko baumai bauring tee' nari' nkovuai. Napo' biurukaa'ke biumaraang turampaarima dupisi'aari- ainge. <sup>22</sup> Dii' teing ookara nantoonge munte'daariaining ning nkaang miring-po'nupoong deentariko, ee'noko naning purimpario' bera asirana'mung basiaravaing deeko' domamparavaing. <sup>23</sup> Tenang dii' manki'antaraariko nii'namono-koo teketa nii'noo' napo' koo'dariai. Masika' naurampimang ninge, dii'ke teing osinanka Isireeli-nupoong otoromaing nanirima operiaruko tee ning Tee Naning-naumpo' Paning-etaing moaing.

<sup>24</sup> "Tee naning barevare-nung bakaang nau-anta-koo dau basi deea'. Napo' teie botovotona' bakaang pankaing-koo dau basi deea'. <sup>25</sup> Teka tee tee naning barevare-nung bakaang nau-anta-pina' nari' nkoavaing. Napo' tee botovotona' tee' nari' tee-pina' bakaang pankaing-pina' nkoavaing. Ning tee nkanavitu-koo bore' Kopeu tammaama poore'ma- maung deemarako dii' teing nkanavitu baru' aa'noo' poore'daariaining. <sup>26</sup> Teing-koo aroreria' otoriai, ai' ookara kapoo'nanka nopa'ari otoning teing sira'paravain- aing. Ee'noko ookara kara baku'nii' nantoonge ookarai taaravaavaing. <sup>27</sup> Kapoo' ninge mu- taananoo'ke naurampimaing doonaa' nau-antaveri- aing. Kapoo' iaantampiko taaraverira deto karerima daankieriaing."

### Kumponing Narung-koo Amorompiai

(Luk 12:2-9)

<sup>28</sup> "Aroreriauka' teing-koo nkaang kara avo'aama diikaang mono dupisi'aavaining-koo teka diikaang tanuaang dupisi'aavarupeu'. Tek a Kumponing-koo aroreriai aa'nung-koo: baitoveriaruko mono ee'noko tanuaang ookeng dua'ureai mosianung-koo.

<sup>29</sup> "Noru'eri otong nantoonge keura barenning oki'nareka' baaveamaung nau mooni'nu-koo, teka bane oki'ninge, Diumai taura'puaruko kansi'koo teing-koo nau dua'aravarupeu'. <sup>30</sup> Napo' tee'ke ookara daponanka diikaang bore'koo tee deerunii'nanka otorong. <sup>31</sup> Tee'koo dii' aroreriauka', ai' dii' teing baru' deto basinoo' noru'duri otong bareng oki'nareka'koo. <sup>32</sup> Ookara teing nantoong-koo uro'kanoo'ke ning aroo'mai otoring sira'pariko ninge tee'ke tee Mma'koo uro'kanoo'ke teke paning-koo nkaning tampampaing. <sup>33</sup> Tek a baa tee naning ning penkemuaiing nantoong-koo uro'kanoo'ke ninge tee tee' penkempampaing Mma'koo uro'kanoo'ke teke paning-koo."

### Jiisuu' Dau Basina' Noru'ampiai Ee'noko Bakaning Pakuarampiai

(Luk 12:51-53; 14:26-27; Mak 9:41)

<sup>34</sup> "Ee' noru'eriauka' ning kansi'koo mou'nung turanturang bake-anta-koo. Turanturang bake-anta-koo moa', teka siivenke' nkoaraa'naang mou'nung. Aa'noaing, narionge ning masika'antamaavai ee'noko nii'narionge masika'antamaavauka'. <sup>35</sup> Ee'noko tee' nkoarama naning bauma-koo turani' deemparavai ee'noko baurang napo' bauko-koo turani' deempaara-vaing, ee'noko napo' baampuru'naang bakaampo-koo. <sup>36</sup> Naning bakaning kare-nupoong teing ee'ning bakanava-kooning. <sup>37</sup> Ee'noko baa tee naning bauraring aa'na' piaavuremaung ning divu'mui ning siong-koo makotua'. Ee'noko napo' baa tee naning baurukaa' aa'na' piaavurimaung ning divu'mui tee tee ning nkaang naning deempari oto'koo makotua'. <sup>38</sup> Ee'noko baa tee naning ning siong-koo baike aa'barata'koo~ kune'koo taura'paravarupeu'nung tee makotua' nkaang naning deempari oto'koo. <sup>39</sup> Baa tee naning bakaang domaang baka tarearamaung tee bakaang domaang tee paa'aravaing, ee'noko baa tee naning ning siomuma bakaang domaang dua'uaing tee teie napo' daa'uaing tee domaang.

<sup>40</sup> "Baa tee naning dii' onkeonke'duriaing teie tee ning onkeonke'muaing, ee'noko baa tee naning ning onkeonke'muaing teie tee Naning onkeonke'uaing ning botomuu'nung. <sup>41</sup> Ee'noko baa tee naning tee Kumponing bakaang nakaronung onkeonke'uaing tee Kumponing bakaang deemparako teie tee bakaang nakaronung-pina' nari' Kumponing moou'uaing. Ee'noko baa tee naning tee naning koonto' onkeonke'uaing koonto' deemparako, teie tee teepina' koonto'pina' nari' moo' nkavuaing. <sup>42</sup> Ee'noko ninge masika' naurampimang, baa tee naning aing oki'nareka'koo narung ntonaru' avuaing ka'matonaru'

tee ee'nung nkaang barevare-nung deemparako teie tee koonto' divu'uauka' tee bakaang moo'; nkavuaing."

### Jiisuu' Baa Masikung?

(11:1-16:20)

### Tee Jooni Minkinara Jiisuu'koo Nia'kuu'na'

(Luk 7:18-23)

**11** Teketa Jiisuu'ke teing bakaning nanai'keta ke-naanka barevare-nupoong tautavurikotaa' bakearako osinanka-koo Kaaleli'nameng-kooning-koo due'ke daankinamparama nau-antavurii'naang beu'.

<sup>2</sup> Ee'noko Jooni Minkinara kiimata-nava'koo oto'i teing kapoo'nanka Karistoo'ke nkovuko'ning taaravura teie kenaankara bakaning barevare-nupoong-koo botovuretu' tee Jiisuu'anko tee nia'urema aa'puree'naang, "Da' ee tee tavo'kuaing-koong, ai' mme' nii'nung nempampaiinge?" <sup>4</sup> Ee'noko teie aa'poretu'nung tenaanka, "Bereta nauereai tee Jooni Minkinara kapoo' dee'ke ooveresining ee'noko taar-averesining; <sup>5</sup> Aa'noining: kaputu'nuka banteaama ookai, kau' de'doonuka nanai, oramuu'po'nupoong ki-iroraa'ariri ee'noko kipaunuka taareai, boo'nuka daa'ariri, ata'oinku tampara doorenang daankianko taaravai.

(Aisaia' 29:18-19; 35:5-6; 61:1)

<sup>6</sup> Ee'noko biraankearavaing tee naning ning-koo date'pari baitoaravaing, ee'noko nkaang nko-nko akovee' mare'uauka'."

### Jiisuu'ke Tee Jooni Minkinara Minkuvuma Nauvuru'na'

(Luk 7:24-35)

<sup>7</sup> Teketa Jooni Minkinara bakanaanka kara-nkara toroareko Jiisuu'ke kara-nau tutumpuru' nantoong karinga Jooni minkuvuma, ee'noko aa'puu', "Dii'ke aremurii' naning doore taaraverira mee'bora' sirakamaa'koo ooverii'naang beriko' karika'duri? Naning tunsi-paaka onou avitoitoi eeari oto' oo-koo te' beriarupeu', ape'? <sup>8</sup> Napo' naning nepu'arama kirokaiari otomaung oo-koo beria', ape' aing? Ai' teing nantoong baarong tampenge nopa'arimaing dauraronanka biikaning-koo pava-koo oovereripeu', mee'bora' sirakamaa'koo deea'. <sup>9</sup> Tek a arekee' masika' oro' oo-koo beriko' dii', ai' narung nakaronara? Ee', tee bakei nakaronara masikung Kumponing-etaing emu' ninge naurampimang dii'. Tee tee aa'nung ookara nakaronuka-koo dau basie tee. <sup>10</sup> Ai' aung ee'nung miru'ui Daari Meekung-koo ee' minkuari otong Kumponing bauring Karistoo' temu' nauvuu'noo'ka aa'puma, 'Ee aung, ninge botoampaing nkaang kara-nka da'koo uro'ke tee taung maamu-antareruuaing uroitaa'."

(Malakai 3:1)

<sup>11</sup> Masika' naurampimang dii', Jooni tee ookara nantoong tee-koo uro'ke ponto'ariru'ning-koo tee deto

basi pankang, teka ninge ee' naurampimang, enang-eta deto baata teing ninge tare-koo aroo'ariaining, bane Kumponing bakaang muu'koo miring oki'nare-ka', teinge tee Jooni puru'ai otoroaing. <sup>12</sup> Teketa Jooni Minkinarai daankinang tutumpuu'noo'keta bera doong e'munung-koo basi-noo'koo tee paninung muu' tee iri'oi daa'aramang, ee'noko teing te' muu'koo ku-ung poromaing teing iri'oro' tee-koo pinka'arimaing. <sup>13</sup> Ai' tee tee uripo'keta nakaro-nupoonge ee'noko Moosesi-nung botoi paninung muu' tavo'aravaina' tarampeearima~ minkuau' bera Jooni bakaang batei-koo basi. <sup>14</sup> Dii'ke masika-antaveriaing deeko' tee Jooni tee ee'nung Eliasi miru'ari otong Kumponing uro'ke poo'naang tampuu'nung teinge nakaro-nupoonge minkuau'na'. <sup>15</sup> Dii' punkang-po'nupoong deeko' enang taaraveria!"

<sup>16</sup> Teketa Jiisuu'ke napo' aa'puu', "Dii' nantoong emu'navarang ninge aminge pa miru'dampipeu'? Dii' teing toire'pina' oro'nanka baaveroma ba'haniai tu-rampeemaing bii'ka aa'peema, <sup>17</sup> 'Kovi puuntero-rompiko konterorima neekarariarukoo'. Ai'non-tu'mariko dii' birontariarukoo'. Tee' nari' oorarampi-maung nee' tokomererimaing. <sup>18</sup> Jooni Minkinara porai'nange taamang tovang uaini kerempuko konterori-ma aa'periko', 'Tee ma'naang-po'nung.' <sup>19</sup> Ee'noko ning Tee Naning-naumpo' Paning-etaing mora taamanama tuaamarako napo' konterorima aa'merimaung, 'Aung ooveriai taamang ee'noko uaini nai bauko, taakisi nkanuka ee'noko nii'ning orange bii'maiko'ke!' Teka Kumponing avutevu'muresi botomuresina' sinampuko dii'ke bakaang matau tasi'periaing."

**Piaaru'nanka Bakei Teing Osi Pankeng Bere'ariaing.**  
(Luk 10:13-15)

<sup>20</sup> Teketa tenang Jiisuu'ke teing osi pankenanka taa'ni'antananka nkovuko ooau'ning daankiarama turampuru'nung bere'ariaruko oovurira. <sup>21</sup> Aa'puu', "Baka'e piaaru'nuka dii' Korasin-nupoong, tora'kiriaining. Piaaru'nuka dii' Besaida-nupoong, dii' tora'kiriaininge, ai' dii' teing kapoo'nanka iri'po'ning ta'nimpaarii'nanka dii'koo nkoaru'ning ooverima bere'dariaru'. Teinge Ju'deeaing Saidoni'nupoong ee'noko Taia'nupoonge ooaara dei namu'ke bere'aripeu' sipunge poo'arima mononopa' orarunsi-koong kurumparipeu' bere'ariru'nung-koo taa'ni'antavarima. <sup>22</sup> Teka aa'dampimang, te'mung Kumponing nantoong simpe'urima kiimatavuriaina'mung dii'ke dau basinoo' tora'periaing Taia' naankai Saidoni' tora'pureainoo'keta. <sup>23</sup> Ee'noko dii' Kapaneume'nupoong deto paning-koo basirariaining-pina' daang noru'darimaing. Dii' doonko mosianung-koo sing-antaruriaining. Teing taa'ni'antananka dii'koo nkoantu'ning Sodom-na-mono-koo nkoantu'ning dei temono tee tee' nari' otopeu' e'mung-koo basinoo'koo. <sup>24</sup> Teka ninge ee' naurampimang te'mung simpe' nkona'mung kiimata bakei aa'na' tora'periaing dii', teing-koo temu'nupoong oreng-koo dau basinoo', biikaang osi Sodom Kumponing paro'uu'ning-koo."

**Manki'po'nupoonge Uaa Kompaavaina'**

(Luk 10:21-22)

<sup>25</sup> Tenang ee'nanng Jiisuu'ke aa'puu', "Mma' ee, tampara tantamang da' Oving paning-koong ee'noko kansi'koonge, dake aa'nou'nung-koo: Dake tee doore-nang tampara baku'eu'nung-koo teing-koo matau-po'nupoong ee'noko noru'po'nupoong tamparimaing-koo ee'noko sira'peu' teing-koo tootoia-pina' otoromaing-koo. <sup>26</sup> Teing nantoong piaaveri piarou'na' tee'. Ee', Mma'."

<sup>27</sup> Ee'noko nantoong karavurima aa'puu', "Ookutu-ning kapoo'nanka tee Mma'ke pare'muu'nung, ee'noko naning otoa' ning Tee Bauring noru'mui otong, Mma'ke deeko' noru'mui otong. Ee'noko napo' naning otoa' Mma' noru'ui otong, teka ninge Bauring deeko' noru'ansi o'nong. Ee'noko nantoong teing naing ninge Bauring miru'arampaing-koo oro'antavanko noru'aavaing tee.

<sup>28</sup> "Ning-koo poriai dii' ookara iri' o'darima manki'dorimaing avutevu' matau siomperima pore'dorimaing, ee'noko ninge uaa-antarampiaing diikaang tanuaang. <sup>29</sup> Ning nkaang tare-koo kuung porira ning-koo barerariai, ai' ning tee banaing oto', ee'noko domang boonko noru'mari oto'ke. Ee'noko ning-koo tee diikaang tanuaang uaa-anta komperiaing. <sup>30</sup> Ninge tare-koo dii' aroo'dariri dei manki'doria' kuaa'doripeu' ning siomeritaa'."

**Tee Niania' Doong Uaana'mung-koong**

(Mak 2:23-28; Luk 6:1-5)

**12** Teketa due'ka nii'na'mung Doong Uaana'mung Jiisuu' uite'naue~ tankinuko bakaning barevare-nupoonge tee siompaama peeravorora nii'ning bii'da'pau'nung uite'koong sinang-koo untu'noo', ee'noko naako'paama maa'au' tamung tankinaama, Ju'nupoong biikaang aarumo-koo taura'pari otoina'. <sup>2</sup> Teka teinge Boto Keperuu'navitue~ tee' ooaarira aa'pau' tee Jiisuu', "Ooveko, dakaning barevare-nupoong mintoomparimaang boto toto'paitaa' Doong Uaana'mung-koong." <sup>3</sup> Ee'noko Jiisuu'ke maku'urima aa'puu', "Dii'ke aming-koo tee' tuumpimerimaang? Tampa' noru'eri otong tee kapoo' Deevita'ke nkovuu'nung tenang tee peeravora, tee Deevita' ee'noko teing nari' otoroko'ning ninka. <sup>4</sup> Kumponing bakanava-koo Deevita' koinura nkavura naiau' tee taamang meekung, nii'ninge nai-koo taura'parava', teka piristi'nuka naing deeko' nai-koo makosi. Ee'noko teie Deevita'ke teing nari' otoroko'ning avurio' boto toto'koo tuumpiaava'. <sup>5</sup> Napo' ee ampankeena'doring Moosesi-nung botoi tampoio' teing piristi'nuka dootuu'nava pankava-koo pareka nkoaamaung bane tee Doong Uaana'mung-koong boto otoi otoko, ee'noko tuumpi-koo otoroa' dootuu'nava pankava bakaang mintoong dau basi deemari otoko. <sup>6</sup> Teka ninge ee' naurampimang, naning dootuu'nava pankava-koo dau basi aung anke otong. <sup>7</sup> Aung anaare kara Kumponing aa'puu'nung,

'Ninge tee aarumo pias unaa-anta-po'nung piamoto o'ning, tee boontunang deea!'

(Osea 6:6)

Tenaare tasi'peri noru'ering deeko' dii'ke ning tee tumpiropa napo' tuumpimeriarupeu'.<sup>8</sup> Ai' tee ning Tee Naning-naumpo' Paning-etaing tee Ovoring Doong Uaana'mung-koo ee'hoko taura' avorompeu' nantoonge kapoo' nko-koo."

**Jiisuu'ke Doong Uaana'mung Taare-anta Nkovuu'na'**  
(Mak 3:1-6; Luk 6:6-11)

<sup>9</sup> Ee'noko teketa tenkenura biikaang pava dootuu'na-va-koo tumparara Jiisuu'ke nau-antavuriko' narung naning teke otoko bireng duuai'.<sup>10</sup> Ee'noko teinge Boto Keperuu'navitue turang-koong taung besi'aama nia'aama aa'pau' tee, "Arekee', Doong Uaana'mung ee taare-anta nko-koo taura'pari otong?"<sup>11</sup> Jiisuu'ke aa'puru' teing, "Dii'koo nii'nung sipisipi'navoro' oto'evuing ee'noko tevoru' dinkung-koo dua'arapeu' Doong Uaana'mung, ee'noko teie tevoru' te'mung kompura ee taaru'uarupeu'? Tee aa' taaru'upeu'.<sup>12</sup> Ee'noko naning ee sipisipi'koo dau basi deea? Tee aa' naning tee sipisipi'koo dau basi. Tee'koo botoi tau-ra'murimaung Doong Uaana'mung naning tampa' nko-nko."<sup>13</sup> Teketa Jiisuu'ke aa'puu' tee naning, "Bireng tovoru'daravai." Ee'noko tovoru'arara koonto' bakei tamparu'kuu' nii'naang-pina' ba'maiko'naang-pina' nari'.<sup>14</sup> Teka teing Boto Keperuu'navitu-koo-nupoong teketa siarira mumunsiariru' Jiisuu' dupisi'aavaina' minkuaama.

**Jiisuu' Tee Botovotonaa' Kumponing Miru'nii'**

<sup>15</sup> Teinge tavaava'naang mumunsiariko noru'uitaa' Jiisuu' teketa tenkenuko nantoonge karingai siompau' tee, ee'noko teie taare-antavuru' teing ookara biikaning siipananka.<sup>16</sup> Ee'noko teie orokovuru' teing tee Kumponing bauring sira'paavaroo'naang.<sup>17</sup> Tee' nkoarara tee dupe-antavuu' tee kara Kumponing teo tee nakaronung Aisaia' karantavuma' minkuvuu'nung aa'puu'noo'ka,

<sup>18</sup> "Aung tee nkaang muu' tanatanara ninge miru'antu'nung. Tee ee'nung ninge piaavamaung, ee'noko ning dotumaramaung tee-koo. Ninge tee nkaang Tanuaang tee-koo sipampaing ee'noko teie teing Ju'deaaing koonto'na' aarumo nau-antavuriaing.

<sup>19</sup> Tee tee nantoonge ninka tatari'eeauka', napo' bokuauka'. Nanning taung pankenanka-koo bokuko bakaung aorong taaravuauka'.

<sup>20</sup> Nantoonge aruaru'nuka doonko mme'uriauka'. Noru' oki'nung sirivaa'uauka', bera tee koonto'nung aarumo iri'antavui dau basi-antavuinoo'ke basi.

<sup>21</sup> Ee'noko tee-koo bakaung miring-koo ookara nantoonge noru' sipaavai."

(Aisaia' 42:1-4)

**Jiisuu' Oraka' Minkuu'na' Tee Kopeu Ba'maiko' Daang Tampaama**

(Mak 3:20-30; Luk 6:43-45; 11:14-23; 12:10)

<sup>22</sup> Teketa tee-anko naning ma'naang-po'nung kaputu' karoaung tavo'au'. Ee'noko Jiisuu'ke taare-antavui' karou', duta bantou'.<sup>23</sup> Ee'noko ookara nantoonge ta'ninaara aa'pau', "Aung pa tee Deevita' bauring, Kumponing Pako'pari'nii'."<sup>24</sup> Teka tenang teinge Boto Keperuu'navitue tee' taaravaara aa'pau', "Tee aa' Kopeu bakaung purinto'ke ma'nari bata'urimaung, tee ma'nari biikaang pankaing."

<sup>25</sup> Ee'noko Jiisuu'ke biikaang onou tasi'pura aa'puru' teing, "Ookara muu'nanka bii'ka siivenke'arimaing kare-nupoong pini daako'arimaung. Ee'noko napo' tee puata' nii'noo' osi siivenke'eemaing teie dua'arimaing.<sup>26</sup> Ee'noko napo' teie Sietani'ke bakana-muiaang bata'urira tee tee baka siivenke'arapeu' ee'noko tee'koo arekee' bakaung muu' donkonui nari' otopeu'?"<sup>27</sup> Ee'noko ooveriko dii' siontaarimaing-koo nii'ning ma'nari bata'arimaing otorong. Ee'noko ninge Kopeu ninka ma'nari bata'aramaung tamperima deeko' teing siontaarimaing baa ninka bata'aarimaung tamperikoo'? Arekee', teing napo' ning-pina' nari' Kopeu bakaung purinto'ke bata'arimaing tampereremaing ee? Tee' taararaarira teinge tuutunan-taariaing dii', ai' teing tee'ke ni'ninka nari' nkomarimaing.<sup>28</sup> Teka Kumponing bakaung Tanuaang Meekunge ma'nari bata'aramaung deeko' tee muu' Kumponing bakaung tee dii'anko taa'ni'poi poing.

<sup>29</sup> "Ai' naning naning purinto' bakanava-koo arekee' koinura ookara kapoo' bakaning nkavupeu' tee naning purinto' tutung dai'ua'? Dai'ura deeko' pari'upeu' bakanava-kooning kapoo'nanka."<sup>30</sup> Ee'noko dii'ke tasi'meriarura dii' teing ning-koo kare-nupoong, ee'noko dii' ni'ninka nari' nantoonge oosiarampiarura dii' purarenka' nkonuka Kumponing bakaung muu'keta.<sup>31</sup> Tee'koo ee' naurampimang, tee aung diikaung oraka'nko tonta'aravauka'nung, ai' ookara oraka' nkonanka ee'noko oraka' minkunanka nantoonge biikaning teing tonta'aravaining, teka naning Tanuaang Meekung Kopeu dovang tampuma oraka' minkuvumaung tonta'anta kompuauka'nung.<sup>32</sup> Ee'noko baa tee naning tee ning Tee Naning-naumpo' Paning-etaing oraka' minkumuaing tee Kumponing tonta'anta-koo makosi. Teka tee naning Tanuaang Meekung mintooparako oraka' minkuvuaing tee tee tonta'anta-koo makosi deea', enang anke aung batei-koo napo' dama'ke dama'nung batei-koo.<sup>33</sup> Sinang tampara tamperiaing deeko' tevari koi'navari tee' nari' tampavari tamperiaing. Sinang orara deemparako deeko' tee koi' tevari oravari tang-koo makosi, ai' ookara koi'nanka tee sinang-koo tasi'parampimaung. Enang arekee'koo kapoo' tampeng nkoanko Kopeu-etaing tamperiaing? <sup>34</sup> Dii' borukoporonuka doparopa-po'ning, dii' teing oreng masikeng sira'darimaing kapoo' koon-

† Jiisuu' tee'ke, Sietani' puru'uitaa' pari'umaung teing pinka'urimaing.

to'na' minku paa'erima! Ai' kapoo' tee domang-koo oting piamparako karange minkuerimaung. <sup>35</sup> Teie naning tamarai tee teieta tamarai domang-koong kore'ng-eta tamarai tavo'antavumaung ee'noko teie naning orarai tee teieta orarananka domang-koong kore'ng-eta orara tavo'antavumaung. Ee'noko naning orarai orananka kapoo'nanka tavo'antavukoo' bakaang domang-koo oreng kore'ng o'evumaing-eta. <sup>36</sup> Teka ninge ee' naurampimang, te'mung simpe' nkona'mung tee ookara karananka anutua minkuerimaing sira'deruriko maku'eriaing. <sup>37</sup> Teie ee'nunge diikaang karanankai simpe'duriaining dii' koonto'nuka nii'noo' koonto'nuka deeaing tanturaining deeko'."

**Taa'ni'anta Oo-koo Nii'ninge Piavorou'na'**  
(Mak 8:11-12; Luk 11:29-32)

<sup>38</sup> Teketa tenang teinge Boto Keperuu'navitue ee'noko napo' teing boto nau-antanukai aa'pau' tee, "Nau-anta, nii' taa'ni'anta dake nkoveko oo-koo piamorimang." <sup>39</sup> Jiisuu'ke maku'uma aa'puru', "Dii' enanavarang bakei oreng, nampeesi orarinuka-pina' diikaang Ooring siperima, tosirarima aa'merimaing, 'Taa'ni'anta paning-etaing iro' naumeriko deeko' taarampiaing.' Bakei Kumponing dii' taa'ni'anta nau-koo kasivuarura narung masikung arurii'naang, aa'noaing: Teie ning taa'ni'anta deeng-antamuaing temu' tee nakaronara Joonaa' taa'ni'anta deeng-antavuu'na'. <sup>40</sup> Ee', tee' nari' nkoaravaing tee tavi' pankaing-koo ke'de-koo kuunge Joonaa' beenang doong ee'noko muung beenang otokotaa' taa'ni'antavari daa'aru'na' napo' tee' nari' ning Tee Nanging-naumpo' Paning-etaing beenang doong ee'noko napo' muung beenang kansi'koo kuunge o'nokotaa' daa'maravaing taa'ni'antamari. <sup>41</sup> Te'mung simpe' nkona'mung teing Nineva-nupoong teinge daa'ariaining dii' ninka enanavarang ninka nari' ee'noko napo' dii' kiimata-koo makosinuka tantaariaining Joonaa' daankiarako temu' bere'ariru'ning deemparima, ee'noko ee aing, naning aa'na' pankaing Joonaa' puru'ui oting aung anke daankiarako dii' bere'dariaung. <sup>42</sup> Napo' te'mung simpe' nkona'mung teni ovarinaang † amentei'keta depeto pou'nanie nari' dii' emu'navarang ninka daa'arara dii' kiimata-koo makosinuka tanturaining, teni kansi'koo basi-aapeita pou'nani deemparama Solomoni' bakaang norukasi'koo baroromparaa'naang, ee'noko ee aing Solomoni'koo dau basi aung anke otoko oomeri barorontaria' otong."

**Ma'nari Bata'nii'nanka Toroaripeu'na'**  
(Luk 11:24-26)

<sup>43</sup> Ee'noko Jiisuu'ke kato nau-antavurima aa'puru', "Tenang ma'naang orara tamung bata'nisi naning-eta tenkenura avitoitoi nanupeu'nung ntong otoa'nairue uaavoainoo' besi'uma. <sup>44</sup> Ee'noko tokoo oovuarura aa'pupeu', 'Ning toromaravaing napo' nkanava ning mou'nava-koo.' Ee'noko tenang toroarara kiioraa'ari

† 1 Dauraronanka 10:1-10

neriario' oovupeu' Tanuaang Meekung borivuaruko bakaang domang-koo. <sup>45</sup> Teketa bera teie ~kenaankataa ma'nari napo' bokuvurira toroaripeu' baru' aa'na' oreng tee puru'ai. Ee'noko teing tumparira tee-koo otoropeu', ee'noko asi'nung ootoo' tee naning bakaang bakei aa'na' oraru'kupeu' tutung otoko'noo'keta. Tee' ee'na' nari' nkoaravaing teing-koo aing-koo nantoong-koo emu'navarang-koo oreng-koo."

**Jiisuu' Baumaraang Makosinuka Baata?**  
(Mak 3:31-35; Luk 8:19-21)

<sup>46</sup> Tenang Jiisuu'ke nantoong karinga karavuriko teni bauko ee'noko baara'mainkaang te' porora dama'due donkonai Jiisuu' kara-koo piavoroko'. <sup>47</sup> Teketa naninge narunge Jiisuu' nauvuma aa'puu', "Daara'mainkaang ee'noko dauko dama'due donkonai otorong, da' kara-koo piavoromang." <sup>48</sup> Jiisuu'ke tee naning karavuko'nung maku'uma aa'puu', "Baa teni nko', ee'noko baata teing ntara'mainkaang?" <sup>49</sup> Teketa teing bakaning barevare-nupoong toompurima aa'puu', "Aing teing ninge nko' makosinuka ee'noko napo' aing teing ntara'mainkaang. <sup>50</sup> Ai' baata teing Mma' paning-koong bakaang pia siompaamaing teing teing ee'ning ninge aa'ning makosinuka: ntara'mainkaang, mmarikaampi ee'noko nko'dovo."

**Tee Mirumiru' Sinang Tankavumaung-koong**  
(Mak 4:1-9; Luk 8:4-8)

**13** Te'mung ee'na'mung Jiisuu' teketa pava-ita siarara nuaru'koo miiring bera ba'nanuu'. <sup>2</sup> Teketa teka nantoong karingai aa'na' kuronkurompaio' bakaasi-nareng-koo aa'earara te' kuung ba'nanuu' ee'noko nantoong piisi'koo donkonai otorou'. <sup>3</sup> Teketa teie kapoo'nanka mmau' nauvuru' mirumiru'po'ning. Minkuvuma aa'puu', "Naning mintoong-koo sinang tanka-koo nanura tankavuko aa'nou': <sup>4</sup> Nii'ning sinang taung-koo dau dua'ariru', ee'noko teka barennankai porora tunturavau'. <sup>5</sup> Ee'noko nii'ning sinang kansi' aaveta'koo dau dua'ariru' kapang-koo dau otomaung-koo, ee'noko da'deng narung dupuu', te' kansi' baru' aaveta'noo' deemparako. <sup>6</sup> Ee'noko batei doonkenang bakaang-koo tee keenkeeng mara'ou' teke, baru' biira doonko nanuaung deemparara kansi' baru' makotua'noo'ke. <sup>7</sup> Ee'noko nii'ning sinang napo' too'murintaa' otoroinoo' meu' dua'ariru' ee'noko nari' dupurira too'murintaa'ke iinkenevuu' tee keenkeeng. <sup>8</sup> Teka nii'ning kansi' pankauanoo' dau dua'arira manearira aa'nou': nii'ning-koo narung daaku' bi'uu', napo' nii'ning-koo pa'noko'keta narung kivora bi'uu', napo' nii'ning-koo beenaumo kivora bi'uu'. <sup>9</sup> Pukung otorininge tee enang taaraveriaing!"

**Kuunoo' Mirumiru'koo**  
(Mak 4:10-12; Luk 8:9-10)

<sup>10</sup> Teketa bakaning barevare-nupoonge porora Jiisuu' nia'aama aa'pau', "Dake aming-koo nantoong kara mirumiru'po'nunge karema nauerimaung?" <sup>11</sup> Teie

maku'uma aa'puu', "Kumponingee dii' bakaang kara pinka'erimaing taura'duru'nung makensi'nung-koo miru'noo' noru'erii'naang tee-koo bakaang muu'koo nkoaramana', teka aing nantoong tee' deea'.<sup>12</sup> Ai' baa tee naning bakaang domang-koo kara Kumponing bakaang kompui otomaung tee ee'nung baru' aa'na' noru' nkavuaing bono' divu'ui, teka tee naning bakaang domange kompuaung tee oki'noo' naro' daunoo' noru'kui otoing tee tee pari'numpo'.

<sup>13</sup> Tee'koo aing nantoong mirumiru' narunge kara nauaramaung, ai' aing teing Kumponingee kapoo' nauvuriko tee-koo daunoo' naro' noru'kaamaing, bane aa'na' ookaama nii'noo' taarakaama. <sup>14</sup> Teing-koo masika'pari otong tee teie Aisaia'ke tero tarampeearama minkuvuu'nung Daari Meekung-koo aa'puu'noo'ka, 'Dii'ke taaraverimaatoaing, teka tasi'peria' otoaing. Napo' tee' ooveri otoma papaaraverimatoai.

<sup>15</sup> "Ai' teing aing nantoong biikaang domang poruruorou'ning~, biikaang punkange taara-koo baru' makotuaunge ee'noko biikaang duta mutuuariru'. Tee' bii'ka maroita nkoariru' aa'no'neeng-koo, dutai tasi'paama, punkange taaravaama, domange onouaara ning-koo toroariko ninge unaa-antavarami'neeng-koo.'

(Aisaia' 6:9-10)

<sup>16</sup> "Tekaa dii' diikaang duta biraankenii' teinge ookiri-maung-koo, ee'noko diikaang punkang biraankenii'ke teinge taarakirimaung-koo. <sup>17</sup> Ai' ninge masika' nau-rampimang, karingai-nakaro-nupoong ee'noko nantoong koonto'nukai-tee kapoo' ninge nkoanko dii'ke ooverimaung oo-koo piavoroko', teka ooaavaruko'. Napo' tee kapoo' ninge daankianko dii'ke taaraverimaung taara-koo piavoroko', teka taaravaavaruko' tee."

### Miru'noo' Tee-koo Minkunaa Sinang Tankavumaung-koo

(Mak 4:13-20; Luk 8:11-15)

<sup>18</sup> "Enang tee dii'ke taaraverii'naang tee miru'noo' tee-koo mirumiru'koo sinang tankavumaung-koong. <sup>19</sup> Tee sinang taung-koo dua'ariru'ning ee' miru'ari otong: Nii'ningee nantoongee tee minkunaa muu' paninung-koong daunoo' naro' taaravaama miru'noo' nkavaavaruko teie naning orarai, Sietani'ke tee kara te'nempumaung biikaang onou-eta. <sup>20</sup> Napo' tee sinang kansi' aaveta'koo dau dua'ariru'ning ee' miru'noo': Nii'ningee nantoongee teing kara taaravaama doturotu ninka kompaamaung. <sup>21</sup> Tekaa tee kara biikaang domang-koo tampa' ari'avuaruma pankaroong otoarukoo'. Ee'noko aa'nokoo': nii'ningee Kumponing-ung kara piavoroainge turampaarima manki'antavaariko namu'ke biikaang baito orariarakoo'. <sup>22</sup> Ee'noko napo' tee sinang too'murintaa'koo meu' dua'ariru'ning ee' miru'noo': Nii'ningee nantoongee kara taaravaamaung teka aung kansi'koong manki'nankakoo ee'noko kavoo nka-koo daang noru'arima booni'antavaako tee kara teke sinampuarukoo'. <sup>23</sup> Napo' tee sinang kansi' pankauang-koo dua'ariru'ning ee'

miru'noo': Nii'ningee nantoongee tee kara taaravaama tee-koong miru' nkavaamaung. Tekaa biikaang domang-koo dupuriko sinananka mmuu' bi'antavaakoo', nii'ningee daaku'na', nii'ningee pa'noko'keta narung kivorana' ee'noko nii'ningee beenaumo kivorana' teing-eta tankanii'nanka-ita."

### Tee Mirumiru' Tonto-koong

<sup>24</sup> Napo' Jiisuu'ke nii'ningee minkunaa miru-miru'po'nung nauvuru', aa'puu', "Tee muu' paninung tee-pina' naningee sinang tampa' bakanau-koo tankavuu'nung-pina' oro'. <sup>25</sup> Tekaa tenang ookara aasi-aako teie bakaang karenunge pora tee sinang oramurii' dau-eta tankavuu' sinang tampa' nanka-koo meu'. Tee' nkovura tenkenuu'. <sup>26</sup> Ee'noko tenang tee uite' dupura puaravuko tee oramurii' tonto tee'ke sira'pari oro'paru'. <sup>27</sup> Ee'noko teingee bakaningee botovotonaa'nukai porora aa'pau' tee, 'Aung ee, tee orara tonto areketa pou'nung dakanau-koo te' dake tampa-murii' sinang tankaveru'noo'?' <sup>28</sup> Ee'noko teie maku'urima aa'puu', 'Tee aa' teie naningee ning-koo karenunge tee' nkovuu'nung.' Ee'noko teingee aa'pau', 'Tekaa ee nii'ke bita'koo pia-antavemaang?' <sup>29</sup> Teie aa'puu', 'A, tee aa' otoaing. Tee tonto bita'erima tee uite' naro'ka bita'erineenga. <sup>30</sup> Siperio' nari' dupureaing bera kavu'koong batei makotuai, ee'noko tenang ninge teing kavu' nkonuka nauarama aa'pampai, "Tutung teenanka tonto orarananka bita'erima dai'erieriai tai-anta-koong, tekaa tee uite'nanka kaverira nkanoo' pava-koo oosiererieriai.'"

### Tee Mirumiru' Masitara'naanka-koong Iisi

(Mak 4:30-32; Luk 13:18-21)

<sup>31</sup> Napo' teie nii'ningee mirumiru' nauvuru', aa'puu', "Tee muu' paninung tee teu-pina' masitara'koong sinanu oki'nu naningee nkavura bakanau-koo keempuu'nung. <sup>32</sup> Bane temurii' mukusiri' ookara-ita, nka tee tenang dupura panka'parama taamang mintoong-kooning divu'ura koi' pankavari deempamaung, ee'noko barennanka poroma biikaang bitonanka kani-aamaunge kaumpe'nanka-koo."

<sup>33</sup> Napo' tee' nari' nii'ningee mirumiru' nau-antavuru', aa'puu', "Tee muu' paninung tee teu-pina' parauanu naako'nii'nu iisi-po'nu-pina' naningee manikumai nkavura paraua diisi beerentu'koo maanto'ura naro'ka bere'uko bera teue ookara pangapangavopeu'."

<sup>34</sup> Aing ookara kapoo'nanka Jiisuu'ke nantoong karinga-koo minkuvuu'ning teing mirumiru'po'ning, ee'noko kapoo' nii'ningee mirumiru' otoaruko nau-antavuru'nung otoa'. <sup>35</sup> Tee'koo tee kara narunge nakaronunge minkuvuu'nung masika'paru' Daari Meekung-koo aa'puu'noo'ka,

"Ningee nkaang karang daate'maravaing miru-miru'nanka-koo. Ee'noko napo' ninge sira'antavampaing teing kapoo' makensi'ningee otomaing kansi'pupu'aru'nooketa."

(Kena 78:2)



**Tee Mirumiru' Tonto-koong Jiisuu'ke Siraka'an-tavuu'noo'**

<sup>36</sup> Teketa teing nantoong karinga sipurira Jiisuu' pava-koo koinuu'. Ee'noko teka bakaning barevare-nupoonge porora aa'pau', "Tee kara mirumiru'po'nung tonto-po'nau-koong nii'koo siraka'antaveai." <sup>37</sup> Ee'noko maku'urima aa'puru' teie, "Tee naning sinang tampara tankavumaung tee ning ee'nung, Tee Naning-naumpo' Paning-etaing." <sup>38</sup> Ee'noko tee mintoong tee aung kansi' ookutunung, ee'noko tee sinang tampara tee teing nantoong paninung muu'koo-nupoong makosi. Ee'noko tee tonto tee teing nantoong tee naning orara bakaning. <sup>39</sup> Ee'noko tee karenung teing tankavuru'nung tee Sietani'. Ee'noko tee sinang kavu' tee batei asirang makosi, ee'noko teing sinang kavu'nupoong teing ee'ning koosinunanka. <sup>40</sup> Tee' tontonanka bita'ama nta'koo betu'arimana' tee tee' nantoong oreng nkoariaing asirana'mung. <sup>41</sup> Ee'noko ninge Naning-naumpo' Paning-etaing nkaning koosinunanka botoaranko teinge tee nkaang muu' tontoaama bita'ariaing, ookara kapoo'nanka orara aarumo tavo'antavumaing ee'noko ookara nantoong orara aarumo nkoaamaing. <sup>42</sup> Ee'noko teinge teing teing urung-koo dua'aariaining, te' ee'noo' nantoong biromparima si'da' dovang kakirinkuarimatoainoo' sisikeera-koo otoroi. <sup>43</sup> Teketa tenang teing koonto'nuka duaa'pina' arakavariai teke tee-koo muu' Biuma bakaang-koo. Punkang otorininge tee enang taaraveriaing!"

**Tee Mirumiru' Muuninava~koong Ee'noko Tee Duku'**

<sup>44</sup> "Napo' tee muu' paning-koong tee tee-pina' muuninava kansi'koo baku'nii'. Tenang naninge daa'ura napo' tampa' baku'uu' ee'noko bera doturotu ninka ookara kapoo'nanka tee oto'evuko'ning baavevuu' ee'noko mooni' nkavura teing-koo tee tenau kansi' moo'uu'. <sup>45</sup> Napo' tee muu' paninung tee tee-pina' oro' naning baave-nko duku' tampara moo'koo besiu'k'ung. <sup>46</sup> Teketa nau moo' pankaing-koonu oovura toroarara ookara kapoo'nanka bakaning baavevura mooni' nkavura teu moo'uu'."

**Tee Sionung-koong Mirumiru'**

<sup>47</sup> "Napo' tee muu' paninung tee tee-pina' sionung-pina' oro'ke. Nuaru'koo dua'aara tavi' amutemurii' barampaaru'. <sup>48</sup> Bera tenang aa'na' maanto'ui' teinge tavi' baranukai deto piisi'koo barampau'. Teketa ba'na'niaara tampenanka tavi' bire'arima peku'koo kuung sipaaru', teka oreng dua'aaru'. <sup>49</sup> Tee' ee'na' nari' nkoaravaing te'mung doong asi'na'mung. Teinge koosinunankai porora simpe'aariaing teing orananka teing-eta tampeng-eta. <sup>50</sup> Ee'noko nta'koo kuung urung-koo dua'aariai te' ee'noo' nantoong biromparima si'da' dovang kakirinkuarimatoainoo' sisikeera-koo otoroi." <sup>51</sup> Teketa Jiisuu'ke nia'urima aa'puru', "Aing ee kapoo'nanka dii'ke tasi'pering?" Teinge maku'aama aa'pau', "Ee'". <sup>52</sup> Napo' teie aa'puru' teing, "Ookara

teing-koo boto nau-antanuka ning-koo barevaremaing muu' paning-aapening-koo teing teing biraanke-nupoong, ai' teinge urikupoong nakaro-nupoong bi-ikaang kara tasi'pai otorong ee'noko ning-koo dupearamana' tasi'pai otong tampa' nantoong nau-antavaarii'naang nara'ka."

**Nasareti'nupoonge Jiisuu' Dama'duau'na'**

(Mak 6:1-6; Luk 4:16-30)

<sup>53</sup> Tenang Jiisuu'ke aing mirumiru'nanka minku bakevura teketa diiri'aru'. <sup>54</sup> Bera bakanoo' osi masipo' pora nantoong nau-anta tutumpuru' biikanava dootuu'navakoo. Ee'noko teing ta'ninaara aa'pau', "Aunge tee aung noru' are'ka nkavuu'nung, ee'noko teing aing ta'nimpaarii'nanka iri'po'ning?" <sup>55</sup> Aung ee ee'nung tee anke pava kani bauring ee deea'? Bauko miring Meeri' ee'noko baara'mainkaang ainge ee deea' aa'ning, Jeemisi, Josepa', Saimoni' ee'noko Judasi? <sup>56</sup> Ba'marikaampi anke ee otoroa' nii' ninka? Are'ka nkavuu'nunge aunge aing kapoo'nanka?" <sup>57</sup> Ee'noko teing tee-koo domang oraka' otoroko Jiisuu'ke aa'puru', "Mmau' nantoonge nii' nakaro-nupoong pankaing-antamaariaung. Niikanoo'nupoonge deeko' pankaing-antamaariaung, nii'marange." <sup>58</sup> Ee'noko teie mmau' taa'ni'antananka teke nkovuaruu' biikaang masika'anta otoaruio'.

**Eeroti'ke Jiisuu' Tee Jooni Minkinara-pina' Daang noru'uu'na'**

(Mak 6:14-29; Luk 3:19-20; 9:7-9)

**14** Tenang ee'ngang tee teie Eeroti'ke, Kaaleli'nameng tarevuko'nunge Jiisuu'koong doorenang taaravura aa'puru' bakaning bautarananka, <sup>2</sup> "Tee tee ee'nung Jooni Minkinara; boo'keta napo' daa'aring. Tee'koo iri' ninka mintooparamaang." <sup>3</sup> Tee tee ee'nunge Eeroti'ke botoario' Jooni moo'ura, dai'uu', ee'noko kiimatanava-koo sipau' Erodiasi dotu-antakoo; <sup>4</sup> Ai' Eeroti'ke teni ninka Erodiasi, baara'ma'nung Pilipi' ba'aang ninka otoresio' Joonie tero aa'puu', "Tee' botoi potevui otoina' nkoraring teni nampera." <sup>5</sup> Eeroti'ke Jooni tee dupisi'koo piavou', teka nantoong-koo avorou' teinge tee nakaronung noru'ai otoromanoo'koo. <sup>6</sup> Teketa nii'na'mung tee, tee Eeroti' bakaang doong ponto'aru'na'mung-koo teni ee'nani Erodiasi baurang damisimainku-ankoi neekavarara Eeroti' aa'na' karaa'antavuu'. <sup>7</sup> Bera teie marakavarama teni kapoo' piavora eentavarako avuu'naung tampuu'. <sup>8</sup> Teketa baukoi botovuko tenie aa'puu', "Jooni tee Minkinara-koong bore' a' daara-koo si'memura ameaing." <sup>9</sup> Teketa teie daurange~ tee' taaravura domang oraka' dee'ou', teka tee bakaang maraka-anta nkovuu'nung deemparako ee'noko napo' teing damisimainku otoroko, tee botoaru' teni avu'koo tee' eentavaru'na'. <sup>10</sup> Ee'noko botoario' bakaning-koo narung bera pava kiimatanava'koo kuunga kuru tako'pevuu'. <sup>11</sup> Ee'noko Jooni bakaang bore' daara-koo nkavui pora teni nera'na' avuu'. Ee'noko tenie bauko-anko tavou'uu'. <sup>12</sup> Ee'noko Jooni bakaning barevare-nupoonge

porora bakaang mono nkavaara dako'au'. Teketa Jiisuu'anko berora nauau' tee.

**Jiisuu'ke Nantoong Pa'noko' Kokorei' Divu' Bau'uru'na'**  
(Mak 6:31-44; Luk 9:10-17; Jon 6:1-13)

<sup>13</sup> Tenang Jiisuu'ke taaravura tee kapoo' Jooni Minkinara-koo nkoaru'nung, teketa tenkenuu'nung ee'noko bakaasi-koo bakaning ninka aa'earira bii'ka oto'noo' berou'. Tee' taaravaara nantoong karingai siompai kau'ke berou' osinanka-ita. <sup>14</sup> Tenang Jiisuu' bakaning ninka te' duumearira~ teka nantoonanka mmou' karinga oovurira bakaang domang aa'na' piaavou' teing-koo, ee'noko siipa-nupoong po'antavaaru'ning taare-antavuru'. <sup>15</sup> Teketa muung-aapevuma nanuu'ning teinge bakaning barevare-nupoonge tee-anko porora aa'pau' tee, "Nii' mee'bora' sirakamaa'koo o'noring ee'noko batei nanuinge. Aing nantoong kari-ka' botoveriko osinanka-koo berora taamang moo'si-iaavai." <sup>16</sup> Jiisuu'ke maku'urima aa'puru', "Aing aa' toko'i bata'koo tampa' deea' nii' apuka'maria'. Dii'ke kapoo' averereriko naiaavaing." <sup>17</sup> Ee'noko teinge maku'aama aa'pau', "Nii' anke berete' pa'noko' naing otong ee'noko tavi' keura oto'memurimaang." <sup>18</sup> Jiisuu'ke aa'puru', "A' ning-anko po'antaveriaing teing." <sup>19</sup> Ee'noko teie nantoong karinga karaasi'koo doonko ba'namparii'naang botovuru'. Ee'noko Jiisuu'ke teing pa'noko' berete' ee'noko tavi'ning keura nkavura tee paning-aape ankamparara biraankevura pisi'uu' teing berete'ning. Teketa teing bakaning barevare-nupoong avuriko teinge teing karinga avaaruu'. <sup>20</sup> Ee'noko ookara taamanaara poovorou'. Ee'noko teinge bakaning barevare-nupoonge kakita'nanka oosiaara kivora-ita keveku'ka peku' maanto'antavau' siparu'ninge. <sup>21</sup> Nantoong donkaang teke taamanau'ning-koong deerunoo' pa'noko' kokorei', maniku' ee'noko toire' nari' deeruaria'.

**Jiisuu' Ntong-koo Daue Nanuu'na'**  
(Mak 6:45-56; Jon 6:16-21)

<sup>22</sup> Teketa tenang namu'ke Jiisuu'ke bakaning barevare-nupoong bakaasi-nareng-koo aa'e-antavurira nuaru'koo nii'navete-koo be'koo botovuru' tee-koo uro'ke, teing beroko nantoong karinga tenkeng-koo botovurii'naang. <sup>23</sup> Teketa Jiisuu'ke teing karinga botovurira tee mii-koo deto baka beu' teke kunsiaaraa'naang, bera muumpuu' teke baka otoko. <sup>24</sup> Ee'noko tereng bakaasi-nareng tee kansi'keta isipo' basiaru', teka pionge kosi'uko boo'ai aa'na' neekavuko'. <sup>25</sup> Bera tane' dere'uaruko Jiisuu' teing-aape pou' nuaru'koo daue nanuma. <sup>26</sup> Teketa teinge barevare-nupoonge ooaara ntong-koo daue nanuko, aa'na' avoreaama bokiaama aa'paako', "Aunkapeto ma'naang!" <sup>27</sup> Teka Jiisuu'ke namu'ke karavuru' teing, aa'purima, "Domang kuaa'doriai aroreria', tee ning ee' nanamang." <sup>28</sup> Teketa Piitai aa'pau', "Ovoring, da' masikung deeko' bokumeko ning ntong-koo daue nanama da'anko meai." <sup>29</sup> Jiisuu'ke aa'pau', "Poaing." Teketa

tenang Piita doonko siaru' bakaasi-eta, ee'noko ntong-koo daue nanuu' Jiisuu'anko bema. <sup>30</sup> Teka tenang teie doving oovura tee avorou', ee'noko minki tutumparu', ee'noko minki tutumparama bokuma aa'pau', "Ovoring, moo'meai!" <sup>31</sup> Teketa namu'ke Jiisuu'ke tanka' toonura moo'ura aa'pau' tee, "Da' bakei dakaang masika'anta oki'nung. Aming-koo keekoo'daramaunge?" <sup>32</sup> Ee'noko tenang bakaasi-koo deto aa'eaesio' tee doving bakearu'. <sup>33</sup> Ee'noko tenang teinge bakaasi-koo otorou'ninge tee-anko kinkinaara daangampaama aa'pau', "Da' tee Kumponing bauring masikung!" <sup>34</sup> Teketa kato pako'arira Kenasereti'nameng-koo tavo'ariru'. <sup>35</sup> Ee'noko tenang nantoonge Jiisuu' teka tasi'paara doorenang ootukunairue tevaro-koo nanu'antavau'. Teketa nantoonge ookara biikaning siipa-po'nupoong Jiisuu'anko tavo'aaru'. <sup>36</sup> Ee'noko eentavariko' tamung bakaang mononopa'koo kainu' kompaama taarevoroo'naang. Ee'noko teing ookara tee kompau'ning tee taarevorou'.

**Kumponing Bakaang Botoi Niikakatauro Biikaang Boto Divu'ui Otoina'**  
(Mak 7:1-13)

**15** Tenang tee nii'ning Boto Keperuu'navitu ee'noko boto naunuka Jerusalema'keta Jiisuu'anko porou'. <sup>2</sup> Ee'noko Jiisuu' nie'aama aa'pau', "Dakaning barevare-nupoonge aming-koo niikakatauroi bamaaru'na' boto siompaavaung, aa'nomaung, biikaang bireng duu'paria' taamanaakoo' domang orari-antavarima Kumponing-koo dutakanoo'ke?" <sup>3</sup> Teketa Jiisuu'ke maku'uma aa'puru', "Nka dii'ke tee Kumponing bakaang boto aming-koo toto'perikoo' tee diikaang minkunaa sintokosintoi-koong toomo siomperima?" <sup>4</sup> Aa'noma, Kumponing ee' botoaru', 'Daumararing deto noru'eresi pakueriaing,'

(Boto 5:16)

ee'noko,  
'Naning baumararing oraka' minkuvureaung tee bakei dupisi'numpo.'

(Toro 21:17)

<sup>5</sup> Teka dii'ke aa'perimaung, 'Naning baumararing kapoo'koo apuka'pareko, beuringe tering paku-koo kupi'ora deeko' aa'pupeu', "A, nkaning kapoo' arompepeu'ning teing temu' Kumponing bareantu'ning." Ee'noko tee'pureta orokoari otoaing teing kapoo' baumararing avu'koo.' <sup>6</sup> Tee' nkorarima dii'ke tee Kumponing bakaang boto daang-antaverimaung tee diikaang sintokosintoi-koong minkunaa daang toomo pina' oro'paraa'naang. <sup>7</sup> Dii' ampirinunuka! Masika' teie nakaronunge Aisaia'ke tarampeearama' dii' ee'ning minkururima Kumponing bakaang kara ee' minkuvuu',

<sup>8</sup> Teinge ainge nantoonge biikaang be'duu'ke narunge pankaing-antamaamaung, teka biikaang domang ning-koo isipo' otoroi.

<sup>9</sup> Tamung ning dootuu'maamaing, ai' teing boto nkaang miring-koo nau-antavaarimaing teing tamung nantoong-etaning."

(Aisaia' 29:13)

### Kapoo' Naning Domang Orari-antavumaung

(Mak 7:14-23)

<sup>10</sup> Teketa Jiisuu'ke nantoong karinga tee-anko boku-vurira aa'puru' teing, "Aing kapoo' dii'ke taaraverira tampa' norunoru'eriaing. <sup>11</sup> Tee kapoo' naning-koo karang-koo tumpamaunge naning bakaang domang orari-antavuaung Kumponing bakaang duta-koo, teka teie kapoo'ke naning-eta karange doompeto pomaunge naning domang orari-antavumaung."

<sup>12</sup> Teketa napo' bakaning barevare-nupoong tee-anko porora nia'aama aa'pau', "Dake ee noru'ei otong teinge Boto Keperuu'navitue da' oraka' noru'daing tee' minkuveio?" <sup>13</sup> Jiisuu'ke maku'uma aa'puru', "Ookara keenkeenanaka Mma'ke paning-koonge keempuri-aruu'ning teing bita'kooning ari'a ninka nari'. <sup>14</sup> Teing teing bii'ka kaputu'ariri nii'ning duta kaputu'nuka taung nau-anta nkoaamaing. Dii'ke teing siperereri-aing, ai' naning kaputu'ke narung napo' kaputu' siong-antavuma tenaanka tee ookaanka dinkung-koo dua'areaing."

<sup>15</sup> Teketa Piitai aa'puru', "Tee mirumiru' nii'koo siraka'antaveai." <sup>16</sup> Jiisuu'ke aa'puru', "Dii' ee teing-pina' nari' mme' noru' siraka'daria?" <sup>17</sup> Arekee' tasi'peria' tee kapoo' naning-koo karange doonko tumpama pakosii'koo bemaung, ee'noko teketa mono-ita napo' siarakoo' domang orarivua'? <sup>18</sup> Teka tee kapoo'nanka karange doompeto pomananka teing teing domang-eta pomaing, ee'noko teinge ee'ninge naning orari-antavumaung. <sup>19</sup> Ai' ee'nooketa domang-eta kapoo' orara noru'nanka pomaunge aing aa'ning: naning dupisi'koong noru', nampeesi orari-koong noru', kaukauro-koong noru', ee'noko bakiaa'nko, daang-koong kara minku tuutunantomai ee'noko poore'. <sup>20</sup> Aing ee'ninge kapoo'nankai naning orari-antavumaung, teka bireng duu'parava' taamang naie naning orari-antavuaung."

### Nani Akovitu-koonanie Tee Jiisuu' Ookara-koo Pankaing Masika'antavuu'na'

(Mak 7:24-30)

<sup>21</sup> Ee'noko Ju' biikanameng-eta uaa-koo tenkenu-rai'nange Jiisuu' bakaning ninka osi Taia' ee'noko Saidoni'nameng-koo berou'. <sup>22</sup> Teka temeng-koo naning Keenang-naving-koonani Jiisuu'anko pora bokuma aa'puru', "Ovoring, Deevita' bakanaving-koong, pi-aameai ning! Nnorang teni ma'naang aa'na' masika' kurumaa'aramanani!" <sup>23</sup> Teka Jiisuu'ke nanaarenoo' karoma maku'ua'. Tee' birompari otoko bakaninge barevare-nupoonge Jiisuu'anko beroma botoaama aa'pau' tee, "Ani bata'eai. Nii' siomurima birompari otomang." <sup>24</sup> Teka Jiisuu'ke aa'puru' teni, "Ning tee Isireeli-nupoong-eta sipisipi'pina' pooariru'ning naing-koo botomuu'nung." <sup>25</sup> Teketa teni pora Jiisuu'koo uro'kanoo' kinkinura eentavarama aa'puru', "Ovoring pakumeai." <sup>26</sup> Jiisuu'ke maku'uma aa'puru', "Tee aa' taamang toire' biikaang mosi'nanka-anko dua'koo tampa' deea'." <sup>27</sup> Tenie aa'puru', "Ee', Ovoring, masika', nka tee

mosi'nankai napo' mukunanka naiaamaung ovoring baurukaa' taamanaamanoo'keta dua'arimaing."

<sup>28</sup> Teketa Jiisuu'ke maku'uma aa'puru' teni, "Ani ee, da' bakei dakaang baito pankaing, tee'koo tee kapoo' een-tararing enang nkoaring." Ee'noko teni baurang tee-koo batei-koo tenang taarevou'.

### Jiisuu'ke Nantoong Siipa-po'nupoong Taare-antavuru'na'

<sup>29</sup> Teketa Jiisuu'ke te' sipura Kaaleli'naru' sionge danto beu'. Teketa miie deto koinuu', bera a'dei' ba'nam-paru'. <sup>30</sup> Teketa nantoong karinga tee-anko porou' nantoong de'doonuka ee'noko kaputu'nuka, koo' mare'nuka, amakoori ee'noko napo' mmou' nii'ning. Porora tee-koo kau'kanoo' bempaario' teka taare-atavuru'. <sup>31</sup> Nantoong bakei aa'na' ta'ninau' tenang aing aa'ning nantoong ooaarira, amakonuka kareaako ooaaru', koo' mare'nuka koompariru', de'doonuka tampa' nanau', kaputu'nuka ookau'. Ee'noko teinge tee Kumponing Isireeli-nupoong biikaang daangampau'.

### Jiisuu'ke Nantoong Deerunoo' Karenaumo Kokorei' Di-vu' Bau'uru'na'

(Mak 8:1-10)

<sup>32</sup> Teketa Jiisuu'ke bakaning barevare-nupoong tee-anko bokuvurira aa'puru', "Nkaang domang aa'na' pi-aamoing aing-koo nantoong-koo. Aing teing ni'ninka beenang doong o'norining ee'noko kapoo' nai-koong oto'evoroa'. Peeravoroi otoroko tokoi boto-koo pi-amoa' taunga peerai tavuri'neeng." <sup>33</sup> Ee'noko bakaning barevare-nupoonge aa'pau', "Aing bau'koong makosi nantoong karinga taamang are'ka nkavampii'naang aung-koo mee'bora' sirakamaa'koo meu'ka?" <sup>34</sup> Ee'noko Jiisuu'ke nia'urima aa'puru', "Teka berete'ning arekee'ning oto'deruring?" Teinge aa'pau', "Pa'noko'keta keura ee'noko nii'ning tavi'ning oki'nareka'."

<sup>35</sup> Ee'noko teie nantoonge karinga kansi'koo ba'nani'aava'naang nauvuru'. <sup>36</sup> Teketa teie teing pa'noko'keta keura berete'ning ee'noko tavi'ning nkavura Ovoring-koo tampara tapura pisi'ura teing bakaning barevare-nupoong avuru', ee'noko teinge nantoong avaaruru'. <sup>37</sup> Ee'noko ookara taamanaara poovorou'. Teketa dama'ke bakaning barevare-nupoonge peku' pa'noko'keta keveku'ka kakita'nankai sipaaruru'ninge maanto'au'. <sup>38</sup> Nantoong donkaang naing teke taamanau'ning-koong deerunoo' karenau-mo kokorei', maniku' dovang toire' nari' deeruarua'. <sup>39</sup> Teketa Jiisuu'ke nantoong karinga tenkeng-koo botovurira tee bakaasi-nareng-koo aa'earu', ee'noko teketa Ma'dala-aape-navete-koo berou'.

### Taa'ni'anta Oo-koo Piavorou'na'

(Mak 8:11-13; Luk 12:54-56)

**16** Nii'na'mung teing Boto Keperuu'navitu ee'noko napo' teing Noru' Pitunavitu Jiisuu'anko porora tee paara-antavaama nia'aama aa'pau', "Narung

taa'ni'anta Paning-etaing naumeriai da' Kumponing-etaing deeko' tasi'dampiaina'." <sup>2</sup> Jiisuu'ke maku'urima aa'puru', "Tenang muung-aapenang dii'ke aa'perimaung, 'Tane' tampa'mung, tampa' otoo'naang, kamo' urung deemparing.'" <sup>3</sup> Ee'noko napo' tane'naang aa'perikoo', 'E'mung irinke nkoaraa'naang, ai' paning kamo'ke urunge nee'uing.' Dii'ke tee tampa' noru'eri otong kamo' ooverima nkoaravaina' noru'koo, teka dii'ke emu'nung batei bakaang taa'ni'anta noru'eriaru-peu'. <sup>4</sup> Dii' enanavarang bakei oreng, nampeesi orar-inuka-pina' diikaang Ovoring siperima, tosirarima aa'merimaing, 'Taa'ni'anta paning-etaing iro' naumeriko deeko' taarampiang.' Bakei Kumponing dii' taa'ni'anta nau-anta-koo kasivuarura narung masikung arurii'naang, aa'noaing: teie ning taa'ni'anta deeng-antamaing temu' Joonaa' taa'ni'anta deeng-antavuu'na'." Teketa Jiisuu' teing teka sipurira tenkenuu'.

**Tee Iisi Teing Boto-koo Keperuu'navitu Ee'noko Noru' Pitunavitu Biikaang**  
(Mak 8:14-21)

<sup>5</sup> Teka tenang tee-koo nuaru'koo beroma teinge bakaning barevare-nupoongee tee taamang nka-koo ampa'orou'. <sup>6</sup> Ee'noko nuaru'koo pako'arirai'nange Jiisuu'ke aa'puru' teing, "Tanatariaing teing-koo Boto Keperuu'navitu-koo ee'noko Noru' Pitunavitu biikaang iisi-koo." <sup>7</sup> Ee'noko tee'puio' tasi'paavarura kareaama aa'peeko', "Aunge pa nii'ke taamang nkavampiaruing-koo tee' minkuvumaang." <sup>8</sup> Teketa Jiisuu'ke tee biikaang minkunaa noru'ura aa'puru' teing, "Dii' baru' masika'antaropanuka, aming-koo dii'ka minkurari-mang taamang nkaveriarura? <sup>9</sup> Koonto' ee mme' dii'ke tasi'meria' ning? Noru'eria' otong teing pa'noko'nuri berete', nantoonge pa'noko' kokorei'ke naiau'ning, ee'noko teing-koo arekee'ning peku' oosierira maanto'eru' dama'ke taa'pario'? <sup>10</sup> Napo' ee noru'eria' otong teing pa'noko'keta keura berete' nantoong karenaumo kokorei'ke naiau'ning ee'noko teing-koo arekee'ning peku' oosierira maanto'eru' dama'ke taa'pario'? <sup>11</sup> Arekee'koo dii'ke tasi'periaunge? Ai' ninge tee taamang-koo minkuampaing. Teketa dii' ee'ning tanatariaing tee-koo Boto Keperuu'navitu ee'noko noru' pitunavitu biikaang iisi-koo." <sup>12</sup> Teketa tenang teinge tasi'pau' teie tee tee iisi berete'koo sipaamaung minkuvuma tee' nauvuria', teka tee kapoo'koo teinge Boto Keperuu'navitue ee'noko Noru' Pitunukai nau-antavaari-maung-koo tee' minkuvuriko'.

**Piitai Jiisuu' Tee Pako'pari'nii' Tasi'pura Sira'puu'na'**  
(Mak 8:27-30; Luk 9:18-21)

<sup>13</sup> Teketa tenang Jiisuu' bakaning barevare-nupoong ninka Sisaria' Pilipai-navuntu'koonoo' berora teing nia'urima aa'puru', "Ning Tee Naning-naumpo' Paning-etaing nantoonge baa tammaamaung?" <sup>14</sup> Teinge maku'aama aa'pau', "Nii'ninge aa'damaung, 'Aung pa tee Jooni Minkinara,' ee'noko nii'ninge Eliasi poaing-koong tantaamaung, ee'noko nii'ninge napo' urikupoong nakaro-nupoong-koo narung, boo'keta

daa'aru'nung, ai' Jeremaia pa." <sup>15</sup> Ee'noko napo' Jiisuu'ke aa'puru' teing, "Teketa dii'ke napo' baa tammerimaung ning?" <sup>16</sup> Teketa Saimoni' Piitai bari'uma aa'puu', "Da' aa' tee Kumponing teroita Pako'pari'nii' nantoong domamperira tareveriainoo'koo, tee Kumponing domantoo' bauring." <sup>17</sup> Jiisuu'ke maku'uma aa'puu', "Biraankeraring da', Jooni bauring, ai' aung tee naning kansi'koonge naurua', teka tee Mma'ke paning-koonge nauruing." <sup>18</sup> Ee'noko ninge aa'damaang, da' tee ee'nung Piita, Manto, ee'noko aung-koo boia'koo e'maniang-koo ninge tee nkaang dootuu' donkong-antavampaing, mosianung-koonge purinto'ke puru'uauka'nung." <sup>19</sup> Ee'noko ninge da' tee kii'nanka arompaing teing muu' paninung-kooning. Aming kapoo' dake anke kansi'koo pinka'eaing deeko' paning-koo tee' pinka'aravaing, ee'noko aming kapoo' anke kansi'koo dapa'eaing deeko' paning-koo tee' nari' dapa'aravaing." <sup>20</sup> Teketa potevuru' teing bakaning barevare-nupoong sira'paavaroo'naang tee Kumponing Pako'pari'nii'.

**Jiisuu'ke Bakaang Aarumo Bare-antavuru'na' Boaina'mung Due'uko**

(16:21–20:34)

**Piitai Jiisuu' Booaing Tamparako Orokovuu'na'**  
(Mak 8:31-33; Luk 9:22)

<sup>21</sup> Tenang-eta deto Jiisuu'ke tee te' Jerusalema' bera kapoo'nanka arikananka tora'puaining bakaning barevare-nupoong nau tutumpuru'. Aing aa'ninge tora'antavaavaing: nantoong pankenge, piristi'koong ovontunankai, ee'noko boto naunukai. Ee'noko tee tee' nkoaama dupisi'avaing, ee'noko beenang doong deemparako napo' domamparara daa'aravai. <sup>22</sup> Teketa Piitai taapo' be'antavura teka potevuma aa'puu', "Bakei makotua' da' tee' nko-koo, Ovoring. Tee' da'koo nkoaravauka'nung." <sup>23</sup> Teketa Jiisuu' bakaning barevare-nupoong-aape bere'arama Piita turampuma aa'puu', "Tokoi beai da' Sietani'. Da' tee ning-koo baanka' makosi. Dake tee Kumponing bakaang noru' noru'ea', nantoong biikaang noru' narung noru'ei otong."

**Karistoo' Siong-koo Amariaina'**  
(Mak 8:34–9:1; Luk 9:23-27)

<sup>24</sup> Teketa Jiisuu'ke aa'puru' teing bakaning barevare-nupoong, "Naning ning siomui poo'naang piavora deeko', baka bakaang pia iro' doonko tompimpara-vaing ee'noko bakaang aa'barata' poru'ui ning siomu-maatoaing. <sup>25</sup> Ee'koo, baa tee naning bakaang do-maang ning-koo orokovuma baka tare-koo piavoang tee paa'aravaing, teka baa tee naning bakaang do-maang ning-koo aroo'ari dua'uaing, teie tee napo' daa'uaing. <sup>26</sup> Ee'noko aming kapoo' tampara basiarapeu' naning-koo ookara kapoo'nanka kansi'po' baram-puma okovui baka orariarakotaa' domaang paa'ara-

vaina? Ee'noko naning aming avupeu' tee bakaang domaang paa'aru'nung napo' moo'koo? <sup>27</sup> Ai' ning Tee Naning-naumpo' Paning-etaing tee teie Mma' bakaang meenasie baumari moaing teing ninka nkaning koosinunanka ninka, teketa moo' avorompang nantoong naruna' naruna' kapoo' nkoau'ning siompario'. <sup>28</sup> Teka ninge masikung naurampimang, dii'koo nii'ning anke nari' donkoniri otorining-koo mme' boo'koo mantonkiria' ning Tee Naning-naumpo' Paning-etaing nkaang muu'koo Daurarong~ deemari moko oomeriaing."

**Jiisuu' Paning-etaing Daurarong-pina' Oro'paru'na'**  
(Mak 9:2-13; Luk 9:23-36)

**17** Teketa pa'noko'keta na'mung doong tankinuiio' Jiisuu'ke Piita dovang Jeemisi ee'noko baara'ma'nung Jooni, bokuvurira iu' isikung-koo deto koinau' teing naing bii'ka. <sup>2</sup> Ee'noko teke teinge ooaio' Jiisuu' bakaang mono aampari'arama aa'nou', bakaang oing duaa'pina' siisiou' ee'noko bakaang mononopa' aa'na' kakaaravou' araka-pina'. <sup>3</sup> Ee'noko tenang teing-ankoi Moosesi naanka Eliasi oro'pareta Jiisuu' ninka kareaako'. <sup>4</sup> Ee'noko Piitai aa'puu' tee Jiisuu', "Ovoring ee, bakei tampa' nii' anke o'norimaang. Da' piaroko deeko' ninge bare beevaari kaniampaing, nava da' dakanava, nava Moosesi bakanava ee'noko nava Eliasi bakanava." <sup>5</sup> Ee'noko tenang tee Piita tee' karoi otoko narunge kamo'ke sisisiisie teka daka'puru', ee'noko teieta kamo'keta auronge karoma aa'puu', "Aung tee nnuring ninge piaavamaung. Ning tee-koo aa'na' dotumaramaung. Taaraveriaing tee."

<sup>6</sup> Tenang teing bakaning barevare-nupoonge tee aorong taaravaara avoreaara oing kansi'koo doonko kinkinai'. <sup>7</sup> Teka Jiisuu'ke pora kompurima aa'puru', "Deto daa'dariai, aroreria'." <sup>8</sup> Teketa tenang deto daa'arira ookaama nii'nara naning ooaava', Jiisuu' narung teka ooau'.

<sup>9</sup> Teketa iu'keta depeto siarima Jiisuu'ke teing orokovuru' tee kapoo' ooau'nung nauaariaroo'naang bera tee Naning-naumpo' Paning-etaing boo'keta daa'aravainoo'ke basi.

<sup>10</sup> Teketa teinge bakaning barevare-nupoonge tee nia'aama aa'pau', "Teinge boto naunukai aming-koo aa'paamaung Eliasi tee tee-koo Kumponing Pako'pari'nii'koo~ uro'ke poaing?" <sup>11</sup> Ee'noko Jiisuu'ke maku'urima aa'puu', "Masika' Daari Meekung-koo Eliasi tee poo'naang tampari otong ookara kapoo'nanka nerivuu'naang. <sup>12</sup> Teka ninge aa'dampimang, tee Eliasi aa' tee tero pou'nung, teka teinge tasi'paavarura tee oraka' piavorou'na' nari' nkoau' tee. Tee' nari' napo' ning Tee Naning-naumpo' Paning-etaing nantoonge sisikeera-antamaavaing." <sup>13</sup> Teketa tee' minkuvuio' teinge bakaning barevare-nupoonge tasi'pau' tee ee'nung Jooni Minkinara miru'ui Eliasi tee' minkuvuu'nung.

**Jiisuu'ke Narung Nemaka Kookokoarako'nung~ Taare-antavuu'na'**  
(Mak 9:14-29; Luk 9:37-42)

<sup>14</sup> Tenang teing nantoong karinga-anko poroio' naning narung pora Jiisuu'anko kinkinura aa'puu', <sup>15</sup> "Ovoring ee, nnuring piaaveai kookokoaramaung, ee'noko aa'na' sisikeeravokoo'. Mmau'namu'pie nta'koo nii'noo' ntong-koo dua'arakoo'. <sup>16</sup> Aing-anko dakaning barevare-nupoong-anko tavo'ansio' teinge taare-anta-koo makosiaavaruing." <sup>17</sup> Ee'noko Jiisuu'ke maku'urima aa'puru' teing, "Nko dii' masika'anta toriaing, koon-tariaing, are' basinaroonge dii' ninka nari' o'norimaatoaing dooroontampiri? Po'antaveai tee oki'nara a' ning-anko." <sup>18</sup> Teketa tavo'uiio' Jiisuu'ke tee ma'naang teka aka'puio' teieta nemaka-ita bakoaru', ee'noko tenang-eta deto taarevou'.

<sup>19</sup> Teketa teing bakaning barevare-nupoong makenge tee-anko porora aa'pau', "Nii' aming-koo tee ma'naang bata'koo makotumpia'?" <sup>20</sup> Jiisuu'ke maku'uma aa'puru', "Diikaang masika'anta bakei oki'nung deemparako tee' bata'eriarupeu'nung. Masika' naurampimang ninge, diikaang masika'anta tee masitara'koong sinang-pina' basi oto'derui dei dii'ke aunteto iu' aa'peripeu', 'Anka' diiri'daravai anketa,' ee'noko tee diiri'arapeu'. Tee'koo kapoo' dii'ke nko-koo makosi deeaung otoarupeu' dii'koo. <sup>21</sup> Teka tee aung amurii' tamung bakoaravarupeu', naninge kunsiarama ee'noko unkumoarama deeko' makosi temurii' bata'koo."

**Jiisuu'ke Dama'ke Boo'antavaavaing Kemu'kana' Sira'puu'noo'**

(Mak 9:30-32; Luk 9:43-45)

<sup>22</sup> Ee'noko tenang teing ookara Kaaleli' porora oosiarirai'nange Jiisuu'ke aa'puru' teing, "Ning Tee Naning-naumpo' Paning-etaing tee nkaning-koo navu-mainuka-koo narunge tooka kompu' taura'muu'naang nantoong oreng biikaang bireng-koo. <sup>23</sup> Teinge dupisi'maavaing, teka beenang doong deemparako napo' domamarara daa'maravaing." Ee'noko teing bakaning oraka' dee'orou' tee'puio'.

**Piita naankai Jiisuu' Taakisi Dua'uretu'na'**

<sup>24</sup> Teketa Jiisuu' bakanavitu ninka Kapaneume'navuntu'koo basiaririo' taakisi nkanukai porora Piita nia'aama aa'pau', "Diikaang nau-antai ee taakisi dootuu'nava pankava-koong dua'uaung?" <sup>25</sup> Piitai maku'uma aa'puu', "A, tee aa' dua'umaung." Teketa tenang Piita pava-koo pora mme' nauvuaruko teie Jiisuu'ke tutung minkuvuma aa'puu', "Saimoni' ee, arekee' noru'emaang, ookara dauraronukai kansi'kooning baata-koo taakisi barampaamaung, biurukaa'koo ai' oovuning-koo?" <sup>26</sup> Piitai maku'uma aa'puu', "Oovuning-eta barampaamaung." Teketa Jiisuu'ke aa'puu', "Tee tee tee'koo dauraronuka biurukaa' teing unaanisi oto'nuka, ee'noko ning napo' tee'ke, unaanisi oto'nara.

<sup>27</sup> Teka makosi nee'ke moo'ampeaing noru' orari-antavarampe'neeng teing. Enang bera a'doong nuaru'koo airiraravaing, teketa tutuna'nu tavi'nu barampeainu-koo karang kaake'era teka mooni' ooveaing. Oovera nkavera teing averiaing, neekaang taakisi deemparavaing."

**Toire' Teing Pankenuka Tee-koo Muu' Paninung-koo**  
(Mak 9:33-37,42-48; Luk 9:46-48; 17:1-2; 15:3-7)

**18** Tenang ee'nang napo' teinge bakaning barevare-nupoonge porora Jiisuu' nia'aama aa'pau', "Pankaing baa tee-koo muu' paninung-koo?" <sup>2</sup> Teketa Jiisuu'ke narung tooto' bokuvura teing-koo meu' donkong-antavura aa'puru', <sup>3</sup> "Masika' naurampimang, dii' diikaang domang bere'dariarura deeko' toirekaa'pina' onou-koo dii' teing bakei makosiria' te' muu' paninung-koo tung-koo. <sup>4</sup> Tee'koo baa tee naning baka boonko noru'aravaing aung-pina' tooto'pina' tee tee ee'nung muu' paninung-koo pankaing. <sup>5</sup> Ee'noko baa tee naning ning nkaang miring-koo onkeonke'uaing narung tooto' oki'nara aung-pina' oro' teie tee onkeonke'muaing.

<sup>6</sup> "Teka Baa tee naning aing toire' ning masika'antamaaing-koo narung dua'antavuaing tee-koo orara aarumo-koo deeko' tee tee piaaru'. Tee' oro' naning baukoi paravuaruu'nung dei tampa', ai' Kumponing aa'na' kiimatavuaing tee. <sup>7</sup> Bakei piaaru'nuka kansi'nupoong amutemuriaunanka orara aarumo-koo nantoong dua'antavaarimaing. Masika', tee' oro' aarumo dua'anta-koong tee poaing, teka bakei piaaru'nuka teing nantoong tee' oro' aarumo tavo'antavaavaining!

<sup>8</sup> "Ee'noko dakaang birenge nii'noo' kau'ke dua'antaruko deeko' orara aarumo-koo, napu'darara taapo' dua'eaing tenau'. Tampa' masika' tee da' nanau' kopu'darara de'doonima domaang otoi oto'noo' beaing, ookanau'ka otoi nta'koo otoi-oto'koong-koo dua'du'neenga. <sup>9</sup> Ee'noko napo' dakaang dutai orari-antaruko deeko' ka'bantarara taapo' dua'ei. Tampa' masika' tee da' naruta otoi domaang otoi oto'noo' beaing, ookaruta otoko mosianung-koong nta'koo dua'daa'neenga. <sup>10</sup> Tee'koo tarerariri otoriaing dii'ke aing-koo narung oki'nareka'koo tamung baa'pina' oori'neeng, ai' toire' biikaning koosinunakai tee paning-koo uatepa Mma'anko beroma sira'paarimaung baata teing anutua oraka' nkoarimaing.

<sup>11</sup> "Ee'noko ning Tee Naning-naumpo' Paning-etaing tee nantoong toire' makosinuka pooariru'ning besikoo mou'nung. <sup>12</sup> Arekee' noru'erimang dii'ke, naning narung daaku' sipisipi' oto'evuma otopeu'nung ee'noko teing-koo nau pooari dei, teie ee teing nii'ning mmau' tee-koo mii-koo nii'nameng-koo sipurira teu nau besikoo nanuarupeu' pooarapeu'nu? <sup>13</sup> Ee'noko masika' minkuamaang, teie daa'ura deeko' teu, tee tee bakei aa'na' dotuarapeu' teu-koo ee'nu-koo sipisipi'nu-koo, bane teing nii'ning mmau' otoroko pooariarupeu'ning. <sup>14</sup> Tee' nari' napo' tee ee'nung Diuma paning-koong koonto' piavo' narung toire'koo oki'nareka' makosinuka-koong paa'koo."

**Naning Da'maiko' Oraka' Nkoarapeu'nung Koong-antana'**

<sup>15</sup> "Naning da'marang-koonge oraka' nkoruko deeko' bera naueai bakaang oraka'nko dee' dee'ka otores, ee'noko da' taararu'ning deeko' tee dake tampameng-koo barampeing tee. <sup>16</sup> Teka da' taaruaruko deeko' nii'nara nii'noo' kenaankara da' ninka bokuereta nari' beriai tee-anko. Tee' nkoveko ookara kapoo'nanka makosina' masika' sira'paravaing kenaankarai nii'noo' beenaumoi ooaio'.

(Boto 19:15)

<sup>17</sup> Ee'noko napo' teing taara-koo piavoaruko deeko' dootuu'koo sira'peai. Ee'noko napo' dootuu'nupoong taara-koo piavoaruko deeko' koonto' mutaanang-koong-pina' nii'noo' taakisi nkanuka-koong-pina' nari' nkoveriaing. <sup>18</sup> Masika' naurampimang, aming kapoo' dii'ke anke kansi'koo pinka'eriaing tee napo' paning-koo pinka'ari otoaing, ee'noko aming kapoo' anke kansi'koo dii'ke dapa'eriaing deeko', paning-koo tee' nari' dapa'ari otoaing. <sup>19</sup> Napo' ee' naurampii'naang, dii'koo nii'naankai anke kansi'koo kapoo'koo kara nroompereta nia'kireko deeko' tee tee' nari' piaroreaina' nko-antavuaing teie Mma'ke paning-koonge. <sup>20</sup> Ai' are' tokoo beenaumo nii'noo' kenaanka nara' poroainoo' nkaang miring-koo, ning tee teke teing-ankoi nari' o'noaing."

**Tee Mirumiru' Naning Tonta'anta Noru'uaung-koong**

<sup>21</sup> Teketa Piitai pora Jiisuu' nia'uma aa'puu', "Ovoring, ninge naning mmarang-koong arekee'ning bateie tonta'antavampeu' ning oraka' nkomuko deeko'? Ai' ~kemu'ka-taae?" <sup>22</sup> Teka Jiisuu'ke maku'uma aa'puu', "Ninge ee' naurama'naang, ~kemu'ka-taae deea', teka teing ~kemu'ka-taa tampematomaing amutemu'ari ~kemu'ka-taa kivora-namupie tonta'antaveaing tee da'maiko'.

<sup>23</sup> "Tee'koo tee muu' paninung tee ee' oro'pari otong: Narung daurarong~ otopeu'nung, ee'noko teie bakaning botovotonaa'nuka biikaang komaaru~ tee-koo nkoau'ning nerivuu'naang piavou'. <sup>24</sup> Teketa nerivuri otoko naning mmau' koko-kokorei' mooni' nkavuu'nung tee-anko po'antavau' bakaang komaaru narivuu'naang. <sup>25</sup> Teketa pora teie moo' kasi-antavuaruio' teie bakaang ovoring ee' minkuvuu', 'Ookara-da', da'aang, ee'noko daurukaa', ee'noko dakaning kapoo'nanka baave-koong tee komaaru maku'aravaina'. <sup>26</sup> Teketa teie botovotonaa' tee-koo uro'kanoo' miinge keemparara eentavarama aa'puu', 'Io' si'mera batei ameko ookara kapoo'nanka maku'derompang.' <sup>27</sup> Ee'noko teie bakaang ovoring tee' oovura bakaang domang aa'na' piaavou' tee-koo, ee'noko unaa-antavuma tonta'evuu' tee bakaang komaaru.

<sup>28</sup> Teka tee ee'nung botovotonaa' teketa tenkenura teie nii'nung botovotonaa' oovuu' napo' tee-koo nau kiina'nu komaaru oto'evuing. Ee'noko teie moo'ura keni'uma aa'puu', 'Koonto' maku'memui tee nkaang

moonii' dake nkaveu'nung!<sup>29</sup> Teketa tee ee'nung ba'maiko' doonko kinkinura eentavarama aa'puu', 'Io' si'mera batei ameko maku'derompaing.'<sup>30</sup> Teka teie aroo'ua' tee' minkuarako, nka teie bera kiimatanava-koo dai'antavuu' teke otoo'naang bera tee komaaru maku'uainoo'ke basi.

<sup>31</sup> Ee'noko nii'ning botovotonaa'nukai tee teie tee' nkovuko ooaara oraka' dee'orora berora tee biikaang ovoring nauau' ookara kapoo' teie nkovuu'nung.

<sup>32</sup> Teketa teie bakaang ovoringe tee botovotonaa' ku-ung bokuvuu'. Bokuvura aa'puu', 'Da' tee bakei orara botovotonaa'!<sup>33</sup> Ninge teing dakaning komaarunanka eentameio' ookara o'antarerensio' dake aming-koo tee da'maiko' nari' botovotonaa' piaavearui tee' ninge pi-aarantu'na' da'?'<sup>34</sup> Ee'noko teie bakaang ovoringe iiravoma tee kiimata-nupoong tanatanuka-anko kosi'uu' teke kiimatavari otoo'naang bera ookara komaarunanka maku'uainoo'ke basi.

<sup>35</sup> Tee' ee'na' nari' teie Mma'ke paning-koonge dii' naruna' naruna' nkoruriaing dii'marang tonta'antaver-ereriarkoo deeko' diikaang domang-eta."

#### Nampeesi Toto'koo Jiisuu' Nia'au'na'

(Mak 10:1-12; Luk 16:18)

**19** Teketa tenang Jiisuu'ke tee aung karananka minku bakevura Kaaleli'nameng sipura Judia'navora'aape pare'aru' Joo'dani-nari-koo amenka'koonoo'.<sup>2</sup> Ee'noko nantoong karingai Jiisuu' siompai te' napo' berou', ee'noko teka taare-antavuru' teing.<sup>3</sup> Ee'noko nii'ning boto keperuu'navitu nari' Jiisuu'anko poro-rai'nange aavavaama aa'pau', "Botoi ee taura'pui otong naning ba'aang bata'koo baka piavoma deeko'?"<sup>4</sup> Jiisuu'ke maku'urima aa'puru' teing, "Dii'ke ee deeruerima tasi'periaung tee Kumponing pupu'uu'hang donkaani ee'noko manikuma nari' nkovuretu'na'?"<sup>5</sup> Ee'noko aa'pui otong Daari Meekung-koo, Tee'koo donkaanie baumararing sipureta ba'aang ninka pinka'areaing, ee'noko tee tenaanka narung mono deempareaing.'

(Pupu' 2:24)

<sup>6</sup> Enang tee, kenaanka deempareai' teka narung deem-paresing. Tee'koo kapoo' Kumponing be'nu'an-tavuu'nung nara'ka naning tankaampuauka'nung."

<sup>7</sup> Ee'noko teinge nia'aama napo' aa'pau', "Teketa Moosesie aming-koo taura'puma aa'puu',

'Naning ba'aang sipuma deeko' narung karavoto~ daarivuaing nampeesi toto'puing tasi'anta-koo?'"

(Boto 24:1-4)

<sup>8</sup> Teketa Jiisuu'ke maku'urima aa'puu', "Moosesie tee' taura'puu'noo' dii'anakaampi si'koo tee dii' diikaang domang iveka'doriko, teka pupu'aru'noo'ke Kumponing tee' minkuvua'.<sup>9</sup> Teka ee' naurampimang ninge, baa tee naning ba'aang tutung kaukauro nkovuaruko ba-ta'ura ee'noko oovunani nampura deeko' teie nampeesi orarivumaung."

<sup>10</sup> Teketa bakaning barevare-nupoonge aa'pau' tee, "Ei, bakei naning ba'aang ninka tee' nari' dai'aresi

otoremaatoaing deeko' nantoong nampeesiarai' otoaing-koo tampa'." <sup>11</sup> Teketa Jiisuu'ke maku'uma aa'puru', "Tee' minkuerimatomana' ookara nantoonge aroo'aavarupeu', teing naing Kumponing tee' oto'koo miru'urimaing deeko' tee' otoropeu'.<sup>12</sup> Aa'nomaung-koo: nii'ning makosiaavaing ke'de-ita ponto'arikoo', ee'noko nii'ning nantoonge deeko' tuukavaarikoo', ee'noko nii'ning maroita nampeesi-koo piavoroarukoo' muu' paninung narung-koo kei'oroo'naang. Baa naning tee' oto'koo aroo'aravaing tee makosi tee' otoaing."

#### Toirekaa' Jiisuu'anko Tavo'aaru'na'

(Mak 10:13-16; Luk 18:15-17)

<sup>13</sup> Teketa toirekaa' oki'nareka' Jiisuu'anko tavo'aaru' Jiisuu'ke bireng pante'urira kunsivurii'naang teing. Teka teinge bakaning barevare-nupoonge poteaariko' teing tavo'aaru'ning.<sup>14</sup> Ee'noko Jiisuu'ke aa'puu', "Teing toirekaa' taura'perereriko poroai ning-anko, para'ere-ria', ai' tee muu' paninung nantoong amurii' okovur-iaing."<sup>15</sup> Teketa tenang bireng pante'urira teing-koo teketa tenkenuu'.

#### Narung Nemaka Barevarenku Mmau' Oto'evuko'nung

(Mak 10:17-31; Luk 18:18-30)

<sup>16</sup> Enang tee teketa naning narung Jiisuu'anko pora nia'uma aa'puu', "Nau-anta, aming kapoo' tampara ninge nkoamira tee domaang oparavauka'nung kom-pampaing?"<sup>17</sup> Jiisuu'ke maku'uma aa'puu' tee, "Dake aming-koo ning kapoo' tampara nkovepeu'nung-koo nia'memaang? Ai' Kumponing narung masikung tampara otong. Da' tee domaang oparavaung-koo tuntaraa'naang piarora deeko' dake tee bakaang botonanka siompeaing."<sup>18</sup> Teie aa'puu', "Boto areing?" Ee'noko Jiisuu'ke maku'uma aa'puu', "Aing ee' oro' botonanka:

<sup>19</sup> 'Naning dupisi'eauka',

Nampeesi orarieauka',

Bakiaa' nkoveauka',

Daang-koo tuutunampeauka',

Daumararing deto noru'eresi pakureaing,'

(Toro 20:12-16)

ee'noko

'Dake tee naning da'koo due'nung daka piaarara-mana' nari' tee' piaaveaing."

(Boontu 19:18)

<sup>20</sup> Ee'noko teie nemakai aa'puu', "Aing ookara teroita tanatavantu'ning, ai' aming kapoo' ninge mme' nkoampa'?"<sup>21</sup> Jiisuu'ke maku'uma aa'puu' tee, "Dake ookara dupe-anta-koo piarora deeko' bera kapoo'nan-ka dakaning ookara baavevera mooni' nkavera ata'oi'nuka-koo tankaampeaing. Tee' nkovera Paning-koong kavonanka oto'deruaing. Ee'noko ning siomei poi."

<sup>22</sup> Ee'noko teie nemakai tee' taaravura teketa orarun-siari tenkenuu' tee kavokavoro mmau'po'nung deem-parako.<sup>23</sup> Jiisuu'ke tee' oovura bakaning barevare-nupoong nauvurima aa'puru', "Ninge masika' nau-

rampimang dii', tee naning kapoo' mmau'po'nung bakei pore' masikung te' muu' paninung-koo tung-koo. <sup>24</sup> Ee'noko napo' unampansi naurampii'naang, kaameli'navoro' bamaru'koong busie tumparavaru-peu'na' bakei naning kavonanka-po'nung dau basinoo' makotua' Kumponing bakaang muu'koo tung-koo."

<sup>25</sup> Ee'noko tenang teinge bakaning barevare-nupoonge tee' minkuvuko taaravaara bakei aa'na' ta'ninau'. Ee'noko aa'pau', "Nka enang baa domaang moo'aravaing?" <sup>26</sup> Ee'noko Jiisuu'ke teing oovurira aa'puru', "Nantoong bii'ka domaang moo'koo makosi deea', Kumponing deeko' ookara kapoo' nko-koo makosi." <sup>27</sup> Teketa Piitai baari'uma aa'puru', "Aung ee, teka nii'ke ookara kapoo'nanka niikaning sipampiru'nung da' siontampima, ee'noko nii'ke aming nkavampiang?" <sup>28</sup> Jiisuu'ke maku'urima napo' aa'puru' teing, "Ninge masika' naurampimang, tenang ookara kapoo' neraka'paravainang, ning Tee Naning-naumpo' Paning-etaing teke nkanoo' ba'nava'nani'domai ovorimari ba'nanampainang paninung meenasie bau-maritaa', tee' nari' napo' dii' kante ba'nantariri kara simpe'erimaatoaing teing kivora-ita kenaanka muu' Isireeli-nupoong-koo ovontuntariri. <sup>29</sup> Ee'noko ookara nantoonge aing aa'ning nkaang miring pankaing-antakoo sipau'ning: pavananka, biumaraang, biurukaa' toire', nii'noo' biikaang kansi', teinge tee daaku'namu'pie maku' nkavaavaing ee'noko napo' tee barenku domaang oparavaung-koong okovuriaing teing. <sup>30</sup> Teketa mmau' nantoong ureai otoromaing dama'ke dama'duaraiing, ee'noko dama'duariri otoromaing ureaavai."

#### Tee Mirumiru' Mintoomparira Moo' Nkavau'na'koong

**20** "Tee muu' paninung tee tee-pina' oro', naning mintonau-po'nung tero tane'ke bera nantoong bakanau-koo mintoong-koo bokuvuru'nung, na'mung doong-koo mintoompariko moo'koo namikue moo'urii'naang tampura; <sup>2</sup> Ee'noko aroo'aririo' teie bakanau-koo botovuru'. <sup>3</sup> Teketa napo' duaa' deto sirang poio' bera baaveromaa nii'ning nantoong tamung donkoniao' oovuru'. <sup>4</sup> Ee'noko aa'puru' teing, 'Dii' aing berira nkanau-koo mintoontariai, ee'noko ninge tee makosina' moo'dampiang.' Ee'noko teing berou' mintoong-koo. <sup>5</sup> Teketa napo' duaaki'hang ee'noko kamunoo'hang napo' beu' bera tee' nari' tutung nkovuu'na' nkovuu'. <sup>6</sup> Teketa napo' muung-aapenang berai'nange nii'ning nantoong tamung donkoniao' oovuru', ee'noko nia'uru' teing, aa'puru', 'Dii' aming-koo tamung donkoniri otorimaang e'mung ootukuna'mung kapoo' nkoveria'?' <sup>7</sup> Teinge aa'pau', 'Nanginge bokumuriaruko tee' o'norimaang.' Ee'noko teie aa'puru' teing, 'Dii' napo' berira nkanoo'ke mintoontariaing, ee'noko moo' makosina' nkaveriaing.'

<sup>8</sup> "Teketa muumpuko teie mintoong okovenunge teing bakaning mintoong-nupoong tarevuriko'ning bokuvura aa'puru', 'Teing nantoong mintoomparirining bokuerira moo' averiaing asi'ning-eta bera tutuna'nupoong-koo basi.' <sup>9</sup> Teing mintoong-nupoong

muung-aapenang bokuvurio' tutumpariru'ning poroio' moo'koo namikuna' avuru'. <sup>10</sup> Tee'koo teing tutung bokuvurio' mintoong tutumpariru'ning mmau' nkavaavaing-pina' noru'ariru', teka teing napo' tee' namikuna' mono kante nkakau'. <sup>11</sup> Ee'noko teinge tee' nkavaara minkuminkuu' tee mintoong okovenung, aa'paama, <sup>12</sup> 'Dake aing dama' mintoong tutumparira narung aua mintoomparirining nii' uipaari'koo aa'na' mintoomaririning ninka nari' basie moo'ering.' <sup>13</sup> Teketa teie narung teing-koo karavuma aa'puru', 'Ee mmaiko', ninge dii' oraka' nkorampia'. Aroo'eriaruinge ee temiku namiku mintoontarira nka-koo? <sup>14</sup> Nkaverira aung diikaang moo' beria. Teing dama' bokuaransing tee' nari' avu'koo piamoi o'nong. <sup>15</sup> Oraka'ke kapoo' nkaang mooni' ninge piamopeu'na' nari' nko-koo? Ai' dii' domang oraru'kiring ee ning tampa' avusiro'mario?' <sup>16</sup> Tee' nari' teing nantoong dama'dunupoong teing ureaavainang, ee'noko ureaamaing teing dama'duaraiing."

#### Jiisuu'ke Dama'ke Boo'antavaavaing Beemu'pina' Sira'puru'noo'

(Mak 10:32-34; Luk 18:31-33)

<sup>17</sup> Enang tee Jiisuu' uroita' Jerusalema'aape daanto beroma bakaning nanai'keta kenaankara barevare-nupoong taapo' tonta'urira teka aa'puru' teing, <sup>18</sup> "Aing ee, Jerusalema'aape merimang ee'noko teka ee'noo'ka naninge tooka kompui ning Tee Naning-naumpo' Paning-etaing taura'muu'naang aa'ning-koo Piristi'nukakoo ovontung ee'noko boto naunuka, ee'noko teinge tee ning dupisi'koo manemaavaing. <sup>19</sup> Ee'noko teinge Ju'deeaing-anko si'maavaing teka akapeu'maama mura'maava'naang, ee'noko aa'barata'koo bi'maara dupisi'maavaing. Teketa beenang doong deemparako napo' daa'maravaing."

#### Jeemisi Namainta Jooni Beuko Bakaang Piapia

(Mak 10:35-45)

<sup>20</sup> Teketa napo' Siebedi baurinketa beuko Jiisuu'anko pou' baurinketa ninka. Pora uro'kanoo' kinkinura eentavaru'. <sup>21</sup> Jiisuu'ke aa'puru', nia'uma, "Da' aming kapoo' piaromaang?" Ee'noko tenie aa'puru', "Amainta nnurinketa dake enang ee' miru'ereaing narung tampavine-aape ba'nanuaing ee'noko narung mare'aanavine-aape da'koo tenang da' daurarong deentaravainang." <sup>22</sup> Teketa Jiisuu'ke temainta aa'puru', "Dee'ke noru'erea' tee kapoo' eentameremaatomaung. Dee'ke ee teru' ntonaru' oraka' dee'naru' ning naikampainaru' naikirepeu'? Ee'noko tee sisikeera ning meeka'antamaravainge ee meeka'antararepeu'?" Ee'noko temainta maku'urema aa'puru', "Ee', nee' makosira." <sup>23</sup> Teketa Jiisuu'ke aa'puru', "Ee', masika' dee'ke naiereaing teru' nkanareng-eta, ee'noko tee' sisikeera meeka'antarareaing ning meeka'antamaravaina', teka tee ba'nava'nani' ning-koo tampavine-koo nii'noo' mare'aanavine-koo ning-koo ninge miru'koo makosi deea'. Teie Mma'ke bampuu'na' ba'nantareaing."



<sup>24</sup> Ee'noko teinge napo' nanai'ke tee' taaravaara teinge iikoo'aaretu' temainta. <sup>25</sup> Teketa Jiisuu'ke ookara naro' bokuvurira aa'puru', "Dii'ke noru'eri otong teing nantoong Ju'deeaing-kooning urantanuka bii'ka ovontumparimaing ee'noko biikaning pankenankai biikaang iri'ke nantoong etuaarikoo'. <sup>26</sup> Teka dii'koo tee' nkoaravauka'nung. Ee' nkoaravaing dii'koo: baa tee naning Kumponing bakaang duta-koo pankaim-paraa'naang piavoang dii'koo meu'ke tee tee ee'nung pakupakunung deemparavaing. <sup>27</sup> Ee'noko napo' baa tee naning dii'koo dau basi deemparaa'naang piavoang tee tee ee'nung napo' dii'koo botovotona' otoaing. <sup>28</sup> Ning Tee Naning-naumpo' Paning-etaing tee'ke, kansi'koo oving-pina' oto'koo moa', teka pakupakunung deemaraa'naang mou'nung, ee'noko nkaang domaang dua'koo teing-koo mmou' boo'keta simpiri'arii'naang."

### Kenaanka Kaputu'ka Ookuretu'na'

(Mak 10:46-52; Luk 18:35-43)

<sup>29</sup> Teketa tenang Jiisuu' teing ninka bakaning barevare-nupoong Jerikoo'namono sipaara beroko nantoong karingai siompau' tee. <sup>30</sup> Kenaanka naninka kaputu'ka taung miiringe ba'nanuresi otoreko', ee'noko tenang tee Jiisuu' teketa tankinuko taaravureta tenaanka bokurema aa'puretu', "Oving, Deevita' bakanaving-koong, piaamereai nee'." <sup>31</sup> Teka nantoong karingai aka'paarema dooroomparee'naang botoaaretu'. Teka tenaanka baru' aa'na' bokuretu' aa'purema, "Oving, Deevita' bakanaving-koong, piaamereai nee'." <sup>32</sup> Jiisuu'ke te' datearara bokuvuretu' tenaanka, teketa aa'puretu', "Dee' ninge arekee' nkoram-pee'naang piaroremang?" <sup>33</sup> Tenaankai navurema aa'puretu', "Oving ee, nee' ookampee'naang piamoreng." <sup>34</sup> Jiisuu' bakaang domang aa'na' pi-aavou' tenaanka-koo, ee'noko beekaang duta kompureko namu'ke bantoreta ookuretu'. Teketa Jiisuu' siompuretu'.

### Jiisuu'ke Nantoong Asi'noo' Nau-antavuru'na' Jerusalema'

(21:1-25:46)

### Jiisuu' Daurarong Deemparara Jerusalema' Tumparu'na'

(Kena 118:25-27; Mak 11:1-11; Luk 19:28-40; Jon 12:12-19)

**21** Tenang Jiisuu' bakaning ninka Jerusalema' duerue'aama Bepasi-namono-koo basiarima Olive'po'namii-koo otoinoo', Jiisuu'ke bakaning barevare-nupoong-koo kenaanka uro'ke botovuretu' aa'purema, <sup>2</sup> "Temono-koo danto uro'kanoo'ke otoi-namono-koo du'dareai, ee'noko du'dareta namu'ke doonkii'navoro' mo'ming-koo bi'ari teke otoko ooveree'naang, bauring-navoro' kampia-navoro' nari'. Tevoro' dapa'ereta ookeng a' ning-anko po'antavereai.

<sup>3</sup> Nii'nung naninge tokoona' minkurureko nauerema aa'pereai, 'Oving piavoing akong,' ee'noko teie namu'ke botorureaing aa'puma, 'Bokuvereri bereai.'"

<sup>4</sup> Aung tee kapoo' narunge temu'nunge nakarunge tarampeearama~ minkuvuu'nung dupear-aa'naang tee' nkoaru', tee Daari Meekung-koo aa'puu'noo'ka minkuvuu'nung,

<sup>5</sup> "Bera naueriai teing Saioni-nupoong, aa'periaing, 'Ooveriaing, diikaang daurarong~ dii'anko dooroom-pari banaing pomaang, doonkii'nu † kampionu-koo dau ba'nanui, kau' karenaumo-nu dooroompari manki'nanka nkavumau-koo.'"

(Aisaia' 62:11; Sekaraia 9:9)

<sup>6</sup> Teketa tenaanka Jiisuu' bakaning-konaanka barevare-nupoong-naanka bereta tee' navuretu'na' nkoaretu'. <sup>7</sup> Tenaankai teu doonkii'nu baurinu ninka po'antavuresio' teinge biikaang baarong dau tani'au', ee'noko Jiisuu' baaronanka-koo dau ba'namparu'.

<sup>8</sup> Teketa nantoong karingai biikaang baaronanka taunge danto tani'au', ee'noko nii'ninge uurung tovang napu'aama tani'au'.

<sup>9</sup> Ee'noko teing karinga Jiisuu'koo uro'kanoo'ke nanau'ninge ee'noko dama'du-eta porou'ninge eura bokiaama aa'paako', "Biraanke tee-koo Deevita' bauring! Biraanke-po'nung aung Oving bakaang miring-koo pomaang! Biraanke otoi otoaing a'dei'ke paning-koo nari'!" <sup>10</sup> Teketa tenang Jiisuu' Jerusalema' tumparako ookara nantoong temono-koo-nupoong irikung-antavarira nia'kaama aa'paako', "Aung baa?"

<sup>11</sup> Ee'noko nantoong karingai maku'aama aa'pau', "Aung tee nakaronara Jiisuu', Nasareti'nung, te' ee'noo' Kaaleli'koonoo'."

### Jiisuu'ke Dootuu'nava Pankava-koo Baave Nkonuka Bata'uru'na'

(Mak 11:15-19; Luk 19:45-48; Jon 2:13-22)

<sup>12</sup> Teketa Jiisuu' parang-koo tumparara pava dootuu'nava pankava-koong-koo nantoong sipisipi' dovang parekanumpo' baaveveeko'ning bata'uru'nung. Aa'noko batanananka mooni' aampari'aako'ning biikaning ee'noko napo' ba'nava'nananka kuukuu' baave-aariko'ning biikaning teka piakatu'uru'. <sup>13</sup> Aa'puru' teing, "Kumponing bakaang kara Daari Meekung-koo tee ee' daariari otong, 'Nkaang pava tee pava kunsinava tampari otoaing,'

(Aisaia' 56:7)

teka dii'ke 'bakiaa' nkonuka biikanoo' deeng-antavering."

(Jeremaia 7:11)

<sup>14</sup> Teketa kaputu'nanka ee'noko dootananka tee-anko porou' te' dootuu'nava pankava-koo, ee'noko teka taare-antavuru' teing. <sup>15</sup> Teka teing piristi'nuka-koo pankenge ee'noko boto naunukai tee' ooaara domang oraka' dee'orou' teie kapoo' tampeng ta'nimpaarii'nan-ka nkovuko ee'noko napo' toire'ke dootuu'nava pankava-koo parang-koo kuunga oovavaama

† Nii'ning dauraronanka oosi pankenankai kare-koo datavoro-maing nanaamaung nantoonge ankampaarii'naang.

aa'paako'nung-koo, "Daangampampimaatoaing tee Deevita' bauring." <sup>16</sup> Teinge nia'aama aa'pau', "Dake ee taaravemaang tee kapoo' toire'ke minkuaam-atomaung?" Jisuu'ke maku'urima aa'puu', "Ee'. Teka ee dii'ke tee Daari Meekung-koo deeruerima noru'eri-aung aa'pumanoo'ka,

'Toire' ee'noko nerakau'nuka biikaang be'duu'keta dake tee dangaraangang tavo'antaveaing?"

(Kena 8:2)

<sup>17</sup> Ee'noko teing teka temono-koo sipurira Beetaninavuntu'aape tenkenura teke aatuu'.

#### **Tee Koi' Piiki' Mara'ou'na' Jisuu'ke Barakosi'ui'o'**

(Mak 11:12-14,20-24)

<sup>18</sup> Teketa dauna'mung tero maata Jerusalema'aape napo' bema Jisuu' tee peeravou'. <sup>19</sup> Teketa piiki'navari taung miiringa oovura te' tevari-anko beu'. Teka sinang tevari-koo oovua', para' narung otoko oovuu'. Teketa aa'puu' tevari, "Da'koo tee napo' sinang bi'du-auka'nung." Teketa namu'ke tevari mara'oi boo'paru'.

<sup>20</sup> Teketa tenang bakaning barevare-nupoonge tee ooaara teing bakei ta'ninau' ee'noko aa'pau', "Aung avari arekee' namu'ke mara'oi boo'paring?" <sup>21</sup> Jisuu'ke teing maku'urima aa'puru', "Masika' naurampimang ninge, dii' masika'anta oto'deruri deeko', keekoo'daria', aung avari-koo nkoaring-pina' oro' dau basina' nkoveriaing, aa'noko aunteto iu' dii'ke aa'periko, 'Bita'darara pirung-koo dua'daravai,' tee' nkoarapeu'. <sup>22</sup> Masika'antaveri nia'kiriaing deeko' tee nkaveriaing kapoo' eentariaing diikaang kungsi-koo."

#### **Jisuu' Bakaang Purinto'koong Okora' Nia'au'na'**

(Mak 11:27-33; Luk 20:1-8)

<sup>23</sup> Teketa tee Jisuu' pava dootuu'nava pankava-koong-koo parang-koo kuung tumparu', ee'noko teke nau-antavarako piristi'koo ovontung ee'noko nantoong urang-antanuka tee-anko porou'. Porora tana'aama aa'pau', "Tee aung aremurii' taura' otoko dake aing kapoo'nanka nkovemaatoing? Ee'noko napo' baie aruu'nunge tee taura'?" <sup>24</sup> Jisuu'ke maku'urima aa'puru', "Ninge dii' napo' tana'dampiaing, ee'noko ning maku'meriko ninge naurampiaing tee taura' ning oto'memuko teing aing kapoo'nanka nkoamaung okora'nou'. <sup>25</sup> Jooni Minkinara-koo nia'dampii'naang: baie taura'puio' nantoong ntong-koo minkivurima meeka'antavuriko'? Kumponing, ai' tamung nantoonge?" Teketa teing bii'ka nia'eema aa'peeko', "Are'pampii'naang? Aa'pampiko deeko', 'Kumponing, teie aa'murii'naang, 'Teka dii'ke aming-koo Jooni masika'antaveriaruko'?" <sup>26</sup> Napo' aa'pampiko deeko', 'Tamung nantoong-etaing,' nantoonge tamaari'neenga, ai' teinge tee ookarai Jooni nakaronara Kumponing-etaing tasi'pai otong." <sup>27</sup> Teketa Jisuu' maku'aama aa'pau', "Nii'ke aa' noru'ampia'." Teketa Jisuu'ke aa'puru' teing, "Ee', ninge tee'ke dii' naurampiaroo'naang baa tee ning taura' amuu'nung aing kapoo'nanka nko-koo."

#### **Tee Mirumiru' Naning-namainta Kemaintara-koong**

<sup>28</sup> "Aung minkunaa arekee' pa noru'erii'naang dii'ke? Naning narung baurinketa kenaanka otoko'nung. Tutuna'nung bauring-anko bera aa'puu' tee, 'E'mung da' bera mintonau-koo mintoontaravai.' <sup>29</sup> Ee'noko teie maku'uma aa'puu', 'Ning aa' mearoo'naang,' teka dama'ke noru' paariarara mintoong-koo nanuu'.

<sup>30</sup> Teketa tee bauma napo' nii'nung-anko bauring-anko bera tee' nari' minkuvuu', ee'noko teie aa'puu', 'Mera mintoomaraa'naang,' teka dama'ke bearuu' mintoong-koo. <sup>31</sup> Temainta-koo arerai beuma bakaang pia siompoo'?" Teinge maku'aama aa'pau', "Teie tutuna'nunge." Teketa Jisuu'ke aa'puru' teing, "Masika' naurampimang ninge dii', teinge taakisi nkanukai ee'noko teing maniku' auning nkonuka teinge tee dii' divu'daari muu' Kumponing bakaang-koo beroaing. <sup>32</sup> Ai' Jooni tee dii'anko pora taung koonto'navung naururiko dii'ke masika'antaveriaruu', teka teinge taakisi nkanukai ee'noko maniku' auning nkonukai masika'antavaamaung, ee'noko bane bere'ariko ooverira, dii'ke tee masika'antaverima bere'daria' otong."

#### **Kara Dikito' Teing Nantoong Oreng Mintoong Tanata-koo Sipuru'ning-koong**

(Mak 12:1-12; Luk 20:9-19)

<sup>33</sup> "Napo' nii'nung mirumiru'koo taarakiriaai. Aung aa' tee naning narung oving otoko'nung bakaang kansi'koo mintonau uaininau keempura. Ee'noko parampuu' tenau, dinkung nenke'uu' uaini mii'doma tenau-koong. Ee'noko pava tarena siarua' kanivuu'. Teketa nii'ning nantoong tenau tare-antavurira nii'naameensi'koo tenkenuu'. <sup>34</sup> Teketa batei sinang kavu'koong due'uko teie bakaning botovotonaa'nuka botovuru' teing-anko uaini tarenuka-anko bakaang baarauni' tenau-koong nkaevaava'naang. <sup>35</sup> Teketa teinge tenau tarenukai teing bakaning botovotonaa'nuka moo'arima dai'aaru', narung murasiavaama nii'nung dupisi'au', teketa beenaumo-nung kapange tavaama dupisi'au'. <sup>36</sup> Teketa napo' teie overinge nii'ning mmuu' botovotonaa'nuka napo' teing-anko botovuru' tutuna'namu'koo botovuru'ning-koo dau basining, teketa teinge tenau tare-antavuru'ninge tee' nari' tutuna'ning nkoaa'ru'na' nkoaa'ru'. <sup>37</sup> Asi'na'moo masika'moo teie bauring botovuu' teing tarenuka-anko, ee' noru'ura, teing tee nnuring-koo amaa'iaa'oroaing. <sup>38</sup> Teka teing tare nkonukai tee bauring ooaara teinge bii'ka kareaama aa'paako', 'Tee aung ee'nung barenku okovuaing. Aia' dupisi'ampiaing tee, barenku okomuriaina'.' <sup>39</sup> Teketa teinge kompaara tee uaininau-eta dama'du dua'aara teka dupisi'au' tee. <sup>40</sup> Ee'noko tenau okonarai pora teing tenau tarenuka arekee' nkovuriaing?" <sup>41</sup> Teinge aa'pau', "Teie aa' teing maarekusi'nuka bakei maremaarenou' basi-antavuri dupisi'uriaing, ee'noko tee tenau teie nii'ning napo' tare-antavuriaing baarauni' tenau-koong avaama-toainng sinang kavaama." <sup>42</sup> Teketa Jisuu'ke aa'puru' teing, "Dii'ke ee' tee Daari Meekung-koong kara

deeruerima dama' nkoaravaina' tasi'periaung aa'pui otoi'noo'ka,

'Tere' ee'nare' kapanare' pava kaninukai poore'aama dua'au'nare' ookutunava-koo e'manianare' tumanare' deempario' tasi'pau' dama'ke. Ovinge tee' ee'na' nko-antavuu' ee'noko bakei ta'nimpaarii' niikaang duta-koo.'

(Kena 118:22-23)

<sup>43</sup> Tee'koo ninge naurampimang, tee muu' Kumponing bakaang tee dii' pari'duriaing bera teing nantoong sinang tampara tavo'antavaavaining avuriai. <sup>44</sup> Ee'noko ookara nantoong tere'koo tasi'paava' tupampariaining tee bii'ka pisira'ariaing, bera baa tee naning tere' dau dua'aravaing tee tere'ke puutuvuaing." <sup>45</sup> Teketa tenang teinge piristi'koo ovontunge ee'noko Boto Keperuu'navitue Jiisuu' bakaang kara mirumiru' taaravaara tee teing tasi'pariru' teing ee'ning minkuvuru'nung Jiisuu'ke. <sup>46</sup> Teka tee dai'aava'naang taung besi'aama nantoong karinga-koo avoreaako', nantoonge tee ee'nung nakaronung noru'ai otoi'noo'koo.

#### Kara Mirumiru' Nampeesi-koong Paroro-koo

(Luk 14:16-24)

**22** Napo' Jiisuu'ke kara mirumiru'po'nung nauvuri-ma aa'puru', <sup>2</sup> "Tee muu' paninung napo' tee tee' oro' narung dauraronge~ bauring nampeesiaraa'naang paroro pankaing maamu-antavuu'nung-pina'. <sup>3</sup> Teie tee bakaning botovotonaa'nuka botovuru' teing nantoong paroro-koo para' avaarun'ning bokuaariko poroo'naang, teka teing kupi'orora poroaru'. <sup>4</sup> Teketa teie napo' nii'ning botovotonaa'nuka botovurima aa'puru', 'Berira nauereriaing teing ninge para' avorontu'ning tee nkaang taamang emu' maamuari otong. Aa'noing boromaka' pankeng bi'aransi, kampioning nunkem-paramaing nari'. Enang tee ookara kapoo'nanka tee maamu-antavari otong. Poroaing enang nampeesi-koong paroro-koo.'

<sup>5</sup> "Teka teinge taaravaava' tenkenau', aa'nou' narung bakanoo' mintoong-koo nanuu', nii'nung mooni' besi'koong-koo nko-nko-koo nanuu'. <sup>6</sup> Ee'noko nii'ninge teing bakaning botovotonaa'nuka moo'arima poore'arima tavaarira dupisi'aaru'. <sup>7</sup> Ee'noko tee daurarong bakei iiravou' bera teie bakaning piatooronuka~ botovurio' berora piniaaru' teing dupisi' nkonuka, ee'noko biikaang osi tai-antavau'. <sup>8</sup> Teketa aa'puru' teing bakaning botovotonaa'nuka, 'Paroro tee nampeesi-koong maamuari otong, teka teing nantoong para' avorontu'ning teing makosinuka deempariarura poroaruing. <sup>9</sup> Berira nantoong kunekune'nairu-koo naniriaing ee'noko baata teka meu'pereriaining ookara paroro-koo para' averereriai.' <sup>10</sup> Teketa teing botovotonaa'nuka taung sionairue nanaama ookara nantoong bokuaaru' meu'paaru'ning ookamurii'ka nantoong, oreng ee'noko tampeng. Ee'noko teketa tee teva' nampeesinava baranee'ke aa'na' maanto'au'.

<sup>11</sup> "Teketa tenang daurarong kuung poma baranee' oovurii'naang teka naning narung nampeesi-koong

paroro-koo mononopa' kurumparavaruu'nung oovuu'. <sup>12</sup> Teketa nia'uma aa'puru' tee, 'Mmaiko' ee, da' arekee' a' poi nampeesi-koong paroro-koo mononopa' kuruntaravaung?' Teka tee naning karoa'. <sup>13</sup> Teketa dauraronge teing bakaning pakupaku-nupoong nauvuri-ma aa'puru', 'Dai'eriai tee aung ookeng kau' ee'noko bireng. Teketa a'dang dama'du dua'eriai mutaananoo', te' ee'nou' nantoong biromparima si'da' dovang kakirinkuarimatoainoo' sisikeera-koo otoroi'. <sup>14</sup> Tee' nari' nantoong mmau' para' avu'nii'nuka otorong, teka oki'ning naing miru'uriaing paninung muu'koo."

#### Taakisi Moo'koo Jiisuu' Nia'au'na'

(Mak 12:13-17; Luk 20:20-26)

<sup>15</sup> Teketa teing Boto Keperuu'navitu tenkenaara taung besi'au' Jiisuu' daua'koo. <sup>16</sup> Teketa biikaning barevare-nupoong Jiisuu'anko botoaaru'. Ee'noko Eeroti' bakanavitu ninka nari' berora aa'pau', "Nau-anta ee, nii'ke da' noru'dampiri otong naning masikung narung minku. Kumponing bakanavung taung nau-antaverimaung miru'ari otoi'na' masika'. Tankaang-antapina' oro'daravaunge, ai' nantoong-koo amaa'iaa'doaunge biikaang miring noru'ema. <sup>17</sup> Enang naumeriaing nii' dake noru'emana': Arekee', nii'ke Ju'nupoonge ee daurarong~ pankaing, Siisa'~, Rooma'nung, taakisi avu'koo makosi, ai' makosi deea'?" <sup>18</sup> Teka Jiisuu'ke tee biikaang noru' orara noru'ura aa'puru', "Dii'ke ampirinunukai ning aming-koo daua'merimaang? <sup>19</sup> Io' mooni'nu naumeriai teu taakisi-koo dua'erimaang." Ee'noko teinge mooni'nu nau tavo'au' tee-anko. <sup>20</sup> Ee'noko Jiisuu'ke nia'urima aa'puru' teing, "Au-koo aung bore' uu'aa' baa-koong aa'nung miring daariari otong?" <sup>21</sup> Teinge aa'pau', "Siisa'koong." Teketa teie aa'puru' teing, "Tee tee averiaing teing kapoo' Siisa' bakaning tee-anko, ee'noko Kumponing bakaning Kumponing-aape averiai." <sup>22</sup> Teketa tenang tee' taaravaara teing bakei ta'ninaara tee teka sipaara tenkenau'.

#### Dama'ke Nampeesi-koo Nkoaravaina' Nia'au'na'

(Mak 12:18-27; Luk 20:27-40)

<sup>23</sup> Te'mung ee'na'mung napo' noru' pitunavitu-koo nii'ning Jiisuu'anko niania' ninka porou', boo'keta napo' daa' masika'antavaava'navitu. <sup>24</sup> Porora avakareaama aa'pau', "Nau-anta, Moosesie ee' naumurima daarivuu', 'Naning narung booko ba'aang otoko toire' otoa' tee donkaani baara'manunge nampuaing teni naaro tee ninka bataata boo'paru'nung tooto' paraevuree'naang.'

(Boto 25:5)

<sup>25</sup> Urikamu' tee namaia' naro'ka pa'noko'keta kenaanka nii'koo otoroko'nung. Ee'noko tutuna'nung nampeesiarara boo'paru' bauring otoa'. Ee'noko baara'manunge teni manikuma nampura tee' nari' boo'paru' bauring otoa'. <sup>26</sup> Teketa beenaumo-nunge. Tee' nari' temaia'koo ookara-koo pa'noko'keta kenaanka-koo nkoaru'. Ookara boorou' biurukaa' otoroa'.

<sup>27</sup> Ee'noko asi'na'moo teni nani manikuma boo'paru'.  
<sup>28</sup> Enang te'mung asirana'mung boo'nuka daa'ari-  
 aina'mung teni ani arera temaia'koo pa'noko'keta ke-  
 naanka-koo ba'aang deemparavainani? Ai' teinge tee  
 ookarai nampau'nanie teni."

<sup>29</sup> Jiisuu'ke maku'uma aa'puru' teing, "Dii' bakei pa-  
 paarararimaung tee Daari Meekung-koong kara  
 ee'noko Kumponing bakaang purinto' noru'eriaruma.

<sup>30</sup> Dama'ke nantoong boo'keta daa'arira teing nam-  
 peesiarua' otoroang Kumponing bakaning koosin-  
 unanka paning-etaning-pina'. <sup>31</sup> Teka tenaare-koo  
 boo'keta napo' daa'naare-koo dii'ke ee deeruerima  
 tasi'periaung aung Kumponing Daari Meekung-koo  
 aa'duru'nung,

<sup>32</sup> 'Ning tee Kumponing teing aing aa'ning  
 temu'nupoong biikaang: Eebaraami', Aisake', Jeekopi'.  
 Teing ninka komeeri O'noi O'nomaung ning.?'

(Toro 3:6)

Tee' minkuvuu'nung-koo tasi'pampiri otong ookara  
 bakaning deempariri domantoo'nuka otorong  
 Kumponing bakaang duta-koo, boo'nuka deea'."

<sup>33</sup> Teketa nantoong karingai tee bakaang nau-anta  
 taaravaara bakei ta'ninau'.

#### **Botonanka-koo Dau Basi Masikung Boto**

(Mak 12:28-31; Luk 10:25-28)

<sup>34</sup> Jiisuu'ke noru' pitunavitu karantavuriaruo' taar-  
 avaara Boto Keperuu'navitu bii'ka naru'ariru'.

<sup>35</sup> Ee'noko teketa narunge teing-koo boto-koo  
 norukasi'ke Jiisuu' paaravuma niania' nia'uma aa'puu',  
<sup>36</sup> "Nau-anta, botonanka-koo arera pankaing masikung  
 boto?" <sup>37</sup> Jiisuu'ke maku'uma aa'puu' tee, "Aung boto  
 pankaing masikung:

'Dake pankaruntoompeaing Oving dakaang  
 Kumponing ootukunung dakaang domang-eta  
 ee'noko ootukunung dakaang uraang-eta~ ee'noko  
 ootukunung dakaang onou-eta.'

(Boto 6:5)

<sup>38</sup> Aung tee ookara-koo boto-koo tutuna'nung ee'noko  
 pankaing masikung. <sup>39</sup> Ee'noko tee kenaanka-nung  
 boto tee tee-pina' nari' oro' aung:

'Dake tee naning da'koo due'nung daka piarara-  
 mana' nari' tee' piaaveaing.'

(Boontu 19:18)

<sup>40</sup> Ookara botonanka ee'noko nakaro-nupoong biikan-  
 ing kara aing-koo kenaanka-koo boto-koo bi'ariri  
 otorong."

#### **Karistoo' Baa Bauring Deempari Poaing?**

(Mak 12:35-37; Luk 10:25-28)

<sup>41</sup> Tenang ee'ning teing Boto Keperuu'navitu  
 naru'arira otoroko Jiisuu'ke biikaang noru' tante-anta-  
 koo nia'urima aa'puru', <sup>42</sup> "Tee naning Kumponing  
 Pako'pari'uu'nung~ nantoong domampuri tarevuriain-  
 oo'koo arekee' noru'erimaung, baa bakanaving-koong  
 deempari tavo'aravainge?" Teinge maku'aama aa'pau',  
 "Deevita' bakanaving-koong deempari tavo'aravaing."

<sup>43</sup> Ee'noko teie aa'puru' teing, "Nka Deevita' are-  
 kee'koo Tanuaang Meekunge karantavuko tee Oving  
 tampuu' Daari Meekung-koo aa'pumanoo'ka,

<sup>44</sup> 'Teie Ovinge nkaang Oving aa'puu', "A', ning-  
 koo tampavine-koo ba'naniai bera ninge dakaning  
 kare-nupoong dakaang kau'koo boonavete-koo  
 siparampainoo'ke basi.'" "

(Kena 110:1)

<sup>45</sup> Tee' minkuvuma Deevita'ke tee Pako'pari'nii' Oving  
 Kumponing-pina' basi tampuu'nung. Enang  
 Kumponing deemparako arekee' napo' Deevita'  
 bakanaving-koong tampaapeu'?" <sup>46</sup> Tee' minkuvuo'  
 naning maku'uma kapoo' minkuvua', ee'noko  
 te'mung-eta deto teing ookara nantoong avoreau' Ji-  
 isuu' nii'ning niania' nia'koo.

#### **Jiisuu'ke Bakaning Ampirinumpariaroo'naang Orokovuru'na'**

(Mak 12:38-39; Luk 11:43,46; 20:45-46)

**23** Teketa Jiisuu'ke nantoong karinga ee'noko teing  
 bakaning barevare-nupoong aa'puru', <sup>2</sup> "Teing  
 boto naunuka ee'noko Boto Keperuu'navitu Moosesi  
 paariau'ning bakaang boto nau-anta-koo. <sup>3</sup> Tee'koo di-  
 ikaning ovo'ma'nuka deempariko taaravereriaing  
 kapoo' nauraariaining, teka kapoo'nanka teinge  
 nkoaavaining dii'ke nkoverta'auka', ai' teinge tee kapoo'  
 daankiaamaung nko-nkoi siong-antavaavaung.  
<sup>4</sup> Teinge tee pore'antavaarimaung mmou' boto nan-  
 toonge tareava'naang botoarima, teka bii'ka teinge  
 oki'noo' tareavaa'.

<sup>5</sup> "Ookara kapoo'nanka teinge nkoaamaing nan-  
 toonge oo-koo maroita nkoaamaung. Aa'nomaung:  
 dootuu'koong taa'ni'anta teing dapapi' dai'arikoo',  
 ee'noko dootuu'koong baarong-koong puraparari  
 bakei isikeng kurumparikoo'. <sup>6</sup> Paroro kante-koo te'  
 ovontung biikanoo' ba'ning-koo piavorokoo'. Napo'  
 pava dootuu'nairu-koo ba'nava'nani'nanka tampeng-  
 koo ba'naniaakoo' nantoonge ankampaaria'naang.  
<sup>7</sup> Napo' nantoong kunekune'nairu-koo nantoonge  
 onkeonke'arimaatoonaang piavorokoo' 'Nau-anta  
 Pankaing' tampaarima. <sup>8</sup> Teka dii' teing 'Nau-anta  
 Pankaing!' tantaariauka'ning, ai' diikaang Siong-anta  
 tee narung masikung otong, ee'noko dii' teing namaia'  
 makosinuka. <sup>9</sup> Ee'noko napo' naning narung anke kan-  
 si'koo diuma tamperiauka', ai' dii' teing narung  
 masikung Diuma otong, ee'noko tee tee paning-koo  
 otomaung. <sup>10</sup> Ee'noko nau-antananka pankeng tanta-  
 ariauka', ai' dii' teing tee narung Nau-anta Pankaing  
 oto'deruring tee Kumponing Pako'pari'nii'. <sup>11</sup> Naning  
 dii'koo pankaing masikung tee ee'nung dii'koo meu'ke  
 pakupaku nkovuaing. <sup>12</sup> Baa tee naning baka deto  
 basiaramaung dama'ke doonko basi deemparavaing,  
 ee'noko baa tee naning boonko noru'ari otomaung tee  
 tee ee'nung deto basi deemparavaing.

**Jiisuu'ke Teing Boto Keperuu'navitu Ioo'uru'na' Ampirinunpariko'nung-koo**

(Mak 12:40; Luk 11:39-52; 20:47)

<sup>13</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirin-unuka. Dii' ee'ning dii'ka muu' paninung-koo tuntari-aruma nii'ning napo' taura'perereriarukoo' te' tumparipeu'ning. <sup>14</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka. Dii'ke naaronku biikaning kapoo'nanka pari'ererima opevurererikoo' kungsi isikanankai dakaraka'darima nantoonge tampa' ooraarii'naang. Tee'koo dii' teing bakei aa'na' ki-imatarariaining. <sup>15</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka. Nanunanu' isipo' basi nkoverikoo' pirung-koo daue ee'noko kansi'koo narung naning dii'koo bere'araa'naang, ee'noko tenang dii'anko poko dii'ke bakei dii'koo dau basina' mosianung-koo nanu'koong deeng-antaverikoo'. <sup>16</sup> Baka' piaaru'nuka dii' kaputu'dariri nantoong taung nau-anta-koo piarorimaing aa'perima, 'Naning dootuu'nava pankava tampuma marakavaravaing tee kapoo' otoa', teka baa tee naning dootuu'nava pankava-koong kooro tampuma marakavaravaing tee tee dai'ari otong tee bakaang maraka-anta dupe-anta-koo.' <sup>17</sup> Dii' bakei kaputu'nuka mutaanang-kooning, arera teing-koo aing-koo aa'ning-koo dau basi: kooro nii'noo' dootuu'nava pankava tee kooro meeka'antavumanava? <sup>18</sup> Napo' aa'perikoo' dii'ke, 'Naning boonturoma-koo marakavarako kapoo' nkoaravauka'nung, teka naning te' kapoo' darimpaamaung-koo marakavarara deeko' teie tee tee dupe-antavuaing.' <sup>19</sup> Dii' bakei kaputu'nuka mutaanang-kooning, arera kapoo' pankaing masiking teing-koo, tee kapoo' darimpaamaung ai' te' boonturoma tee kapoo' te' darimpaamaung meeka'antavumaung? <sup>20</sup> Tee'koo baa naning boonturoma-koo marakavaravaing tee te'koo marakavaravaing ee'noko ookara kapoo'nanka teke otoroining-koo nari'. <sup>21</sup> Ee'noko baa tee naning dootuu'nava pankava-koo marakavaravaing tee teva-koo marakavaravaing ee'noko tee-koo Kumponing-koo teke otomaung-koo nari'. <sup>22</sup> Ee'noko baa tee naning paning-koo marakavaravaing tee tee Kumponing bakanoo' ba'nanui tare nkoroma-koo marakavaramaang ee'noko napo' tee-koo te' ba'nanui otomaung-koo nari'.

<sup>23</sup> "Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirin-unuka, ai' dii'ke tee avutevu' napoka dovang oki'nareka' kivorana' tankaamperima baarauni-koo~ namanto Kumponing averikoo', sirivita' dovang ko'dompuu', teka teing kapoo' boto-koo pankeng dama'duerikoo' aa'ning: aarumo koonto'na' simpe', aarumo piasa unaa-anta-po'nung, ee'noko Kumponing masika'antavui kake'iiari oto'. Aing ee'ning teing dii'ke nara'ka nko-koo makosining. <sup>24</sup> Dii' kaputu'nuka taung nau-anta-

koo piarorimaing, oki'nareka' kapoo'nanka aa'na' puk-erariri maa'erikoo', teka kapoo' pankaing opo' dunkumperikoo'.

<sup>25</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirin-unuka~. Diikaning kaapunanka-koo ee'noko bantovanto'nanka-koo dama'du aa'na' kiiroraa'antaverikoo' duu'perima, teka kuung teing-koo bakiaa'ke maanto', ee'noko mono bakaang pia narung siong. <sup>26</sup> Dii' Boto Keperuu'navitu kaputu'nuka, tutung kuung kiiroraa'antaverimaatoai teing diikaning kaapu ee'noko bantovanto'nanka aa'noaina' dama'du nari' kiiroraa'otoai.

<sup>27</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirin-unuka. Dii' kivi dako'doma dama'du aa'na' kiiroraa'antavaamaing-pina' oro'nuka dama'du-eta tampa' oro'paraa'naang, teka kuung bakei boo'nuka-koong make'ke maanto' ee'noko amutemurii' ku'mi'nanka. <sup>28</sup> Tee' nari' dii' dama'du-eta nantoonge koonto'nuka-pina' ooraarimaung teka dii'koo kuung ampirinunge~ maanto' ee'noko boto toto'ke.

<sup>29</sup> "Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirin-unuka. Dii'ke nakaro-nupoong dako'aaru'noo' tampa' kanierikoo', koonto'nuka biikaning dako'domanairu tampa' nepunepu'erikoo'. <sup>30</sup> Aa'perimaung, 'Nii' tenang nakaro-nupoong niikakatauro otoroko'ngang o'nori dei nakaro-nupoong dupisi'aariko pakumariarupeu'.'

<sup>31</sup> Tekang dakaraka'darima tee' minkurarikoo', ai' diikaang aarumoi teing biurukaa' sira'durimaung nakaro-nupoong tero dupisi'aaru'ning. <sup>32</sup> Aia' enang dupe-antaveriaing tee' nari' tee temurii' aarumo orara diikakatauroi tero nkoaako'nung. <sup>33</sup> Dii' borukoporonuka, boru' doparopa-po'nung baurukaa', arekee' napo' donta'peripeu' tenang Kumponing tuutunanturira mosianung-koo be'koo tanturiko?

<sup>34</sup> "Tee'koo ninge nakaro-nupoong dii'anko botoarampaing ee'noko Daari Meekung-koo norukasi'nuka ee'noko nau-antanuka. Nii'ning tee teing-koo dii'ke dupisi'ereriaining aa'barata' dovang-koo bi'ereriaring. Ee'noko nii'ning teing mura'ereriaining diikaning pava dootuu'nanka-koo kuunge osi kan-teveri bata'ereriaring. <sup>35</sup> Tee tee ookara urikupoong koonto'nuka dupisi'aariko'ning-koong tuutunang dii'ke komperiaing teing-koo Eebelo'keta bera Sakaraia'koo basinoo'ka, tee Sakaraia' tee Berakaia' bauring boonturoma ee'noko meekavaro-koo meu'ka dii'ke diumaraang-koo kuunge dupisi'eru'nung te' dootuu'nava pankava-koo. <sup>136</sup> Masika' naurampimang, aing teing ookara kapoo'nanka enanavarang-koo basiarako tora'kiriaining."

† Tenaanka tutuna'nung ee'noko asi'nung nantoong tampeng orange tavaaretu'naanka Daari Meekung-koo minkuari otaining-koo. (Pupu' 4:8; 2 Noru'anta 24:20-21)

**Jiisuu' Orarunsiaru'na' Jerusalema' Kiimatanumpo'  
Deemparako**

(Luk 13:34-35; 19:41-44)

<sup>37</sup>“Oi baka' Jerusalema'nupoong, Jerusalema'nupoong, dupisi'erererimaing Kumponing bakaning nakaro-nupoong, ee'noko teing dii'koo botovurimaing kapange too'pererima dupisi'ererikoo', are-kee'ning batei-koo ninge dii' naro'koo karirampimaung kokoree'ke baurukaa' kupa'koo boong naru'rimana', teka dii' aroo'dariaung. <sup>38</sup>Aing ee, Kumponing diikanoo' osi si'during dii'ke dii'ka tarekoo bera nuampavoo'naang. <sup>39</sup>Ee'noko naurampimang dii'ke tee ning napo' oomeriaroo'naang bera tenang batei aa'meriaing, 'Biraankenung tee naning Ovoring bakaang miringkoo pomaatomaung.”

(Kena 118:26)

**Taa'ni'antananka Doong Asi'koong**

(Mak 13:1-13; Luk 21:5-19)

**24** Teketa Jiisuu' dootuu'nava pankava-ita siarara tenkenuko bakaning barevare-nupoong tee-anko porou' avatevaronanka-koo nau-antavaava'naang. <sup>2</sup>Jiisuu'ke aa'puru' teing, “Aing kapoo'nanka dii'ke ee ooverimang? Masika' naurampimang, teing aing kapananka teing tuurampaavaining. Teinge pia-tooroi deroaama nare' nii'nare'koo daue pante'ario' sipaavauka'.”

<sup>3</sup>Teketa Jiisuu' teke Olive'po'namii-koo baka ba'nanuio' bakaning barevare-nupoong tee-anko porora bii'ka otoroi nia'aama aa'pau', “Naumeriai tee are'moong tee' nkoaravaing, ee'noko taa'ni'anta aming da' poaing-koong, ee'noko aung batei oparavaing-koong taa'ni'anta aminge?”

<sup>4</sup>Teketa Jiisuu'ke maku'urima aa'puru', “Bakei, tareririri otoriaing nantoonge poo-antaraari'neeng. <sup>5</sup>Ai' nantoong mmou'ke tee poroma nkaang miring tam-paama aa'paavaing, 'Ning tee ee'nung Kumponing Pako'pari'nii', ee'noko tee' nkoarima nantoong mmou' tosiaariko siompaariaing. <sup>6</sup>Ee'noko dii'ke tee karenanka tavo'kuko ee'noko tamung minkuaako taaraveriaing, teka dii' ee'ning tarerariaing dii' domang pu-raaniri'neeng tee-koo, ai' teing teing kapoo' tee' oro'nanka nkoaravaining, teka botu mme' basiarava'. <sup>7</sup>Narung kansii' i'amparama nii'nung kansii' turampuainge. Ee'noko narung muu' i'amparama nii'nung muu' turampuainge. Ee'noko napo' nantoong peera-koo booroainge, ee'noko u'mi'nanka nkoaravai nii'ning kansii'nanka-koo. <sup>8</sup>Aing teing tamung tutuna'ning sisi-keerananka manikuma mantompumana' tooto' poto'ke due'uko.

<sup>9</sup>“Ee'noko tenang ee'hang dii' teing dai'daarira tavo'daariaining oraka' nkoaraari'naang, ee'noko dii'koo nii'ning dupisi'daariaing. Ee'noko dii' teing ookara nantoonge munte'daariaining ning nkaang miringpo'nupoong deentariiko. <sup>10</sup>Ee'noko tenang ee'hang mmou' nantoong tee biikaang masika'anta-ita dua'ari-

aing, ee'noko nii'ninge bii'maikorori' munte'aarima tooka kompai nii'ning kare-nupoong-koo siaariai dupisi'aarii'naang. <sup>11</sup>Ee'noko mmou' nakaro-nupoong oro'pariaing tenang daang Kumponing-etaining tam-parima, ee'noko mmou' nantoong tosiaarima poo-antavaariai. <sup>12</sup>Ee'noko tenang orara aarumo beremparako mmou' biikaang paa tee ka'matompuaing. <sup>13</sup>Ee'noko naning purimpario' bera asirana'mung basiaravaing deeko' domamparavaing. <sup>14</sup>Ee'noko tee tutung tee aung dooreng tampara ookara kansii'koo daankiaavaing ookara nantoonge Kumponing bakaang muu'koo tumpariaina' taaravaava'naang, teketa tee-koo dama'due doong asi' tavo'kuaing.”

**Kapoo' Maarekusi' Oro'paravaina'**

(Mak 13:14-23; Luk 21:20-24)

<sup>15</sup>“Ee'noko tenang tee kapoo' maremaare ooveriaing meepo'ke donkonuio' teie nakaronunge Danieloi minkuvuu'na' tee te' meepo' nuampa-antavaing.” (Daari Meekung-koo deeruerira tasi'peripeu'.) <sup>16</sup>“Tenang tee donkonuio' ooaara teing a' Judia'nameng-koo otoroaining miinanka-koo deto bakei navo'ka koo'ariaing! <sup>17</sup>Naning daunavaro-koo otoaing deeko' siarara pava-koo kuung beauka' bakaang kavo nka-koo. <sup>18</sup>Napo' naning mintoong-koo otoainoo'keta pava-koo toroaravauka' bakaang mononopa' nka-koo. <sup>19</sup>Bakei piaaru'nuka otoroainng teing maniku' kempo'nuka ee'noko napo' teing biurukaa' noonoo'koo otoroainng, ai' teing tapotaponuka, mmari'koo makotua'. <sup>20</sup>Kunsirariaing tee aung batei mmari'riaina'mung ka-maari bakaning batei deemparavauka'na', nii'noo' Doong Uaana'mung deemparavauka'. <sup>21</sup>Tee arikung te'mung tavo'kuaing tee bakei dau basi aung kansii' tutuntoma-ita nkoaru'ning-koo bera e'mung doong-koo basinoo'koo, ee'noko napo' dama'ke tee' basi otoauka'ninge. <sup>22</sup>Teing doong arikeng Kumponing apuka'antavuaruko deeko' ookara nantoong teing oparipeu'ning, teka Kumponing bakaning miru'nisinuka piaavurima tee batei apuka'antavui miru'uu'nung.

<sup>23</sup>“Ee'noko tenang ee'hang nii'nung naningee aa'duriko deeko', 'Ooveriai, aung tee Kumponing Pako'pari'nii' tavo'kuaing-koong! nii'noo' aa'puko, 'Auntang!' tee masika'antaveriauka'. <sup>24</sup>Ai' teing nakaronupoong ee'noko pako'pari'nii'nuka daang Kumponing-etaining tamparimaing porora taa'ni'anta panke-nanka ta'nimpaarii'na' nkoaavaing nantoong tosiaarima Kumponing bakaning naro'ka papaara-antavaarii'naang, tavo'arapeu'nung-pina'. <sup>25</sup>Ooveriko, aung tee ninge tero uro'kanoo'ke naurampimang. <sup>26</sup>Tee'koo naningee nii'ninge naururima aa'duriko, 'Auntanto mee'bora' sirakamaa'ke otomang,' te' beriauka'. Napo' aa'puko deeko', 'Aung anke kuunge otomang,' tee masika'antaveriauka'. <sup>27</sup>Teka tee piping isipo'keta pipimpuma ootukunairu namu'ke siraka'pumana' tee' nari' ookarai oomaavaing ning Tee Naning-naumpo' Paning-etaing moko. <sup>28</sup>Are' tokoo

bonku' otoainoo' teing mareoi'nanka te' oosiarima sira'paavaing."

**Tee Naning-naumpo' Paning-etaing Poaina'**  
(Mak 13:24-31; Luk 21:25-33)

<sup>29</sup> "Tenang ee'nang namu'ke manki'antananka teing doong-koo tavo'kuaining tankinuko tee duaa' tee tenang mutaanampuaing, ee'noko kaara arakavaravauka', ee'noko beento'nanka paning-eta tankavariai. Ee'noko teing purinto'nanka kapoo' paning-kooning teing dankampuriaininge. <sup>30</sup> Ee'noko tenang ee'nang tee taa'ni'anta Tee Naning-naumpo' Paning-etaing ookara kansil' tare-koo poaing-koong oro'paravaing teke paning-koo, ee'noko nantoong ookara kansil'kooning tenang ee'nang avoreaama orarunsiariaing. Ee'noko teinge ning Tee Naning-naumpo' Paning-etaing taa'ni'moi moko oomaavaing, purinto' ninka kamo'ke depeto aa'na' meena'moi. <sup>31</sup> Ee'noko ninge tuuviri aa'na' karantavama~ botoarampaing teing nkaning koosinunanka, ee'noko teinge oosiaariaing teing nkaning miru'nisinuka kansil'koo ookutunairu-eta.

<sup>32</sup> "Enang tee dii'ke tee baisirovang ooverira noru'eriaing, aa'nomaung: Tenang para' nenuvara'uko noru'erikoo' teketa deto puaravuu'naang due'ka.

<sup>33</sup> Tee' nari' napo' dii'ke teing aing ookara kapoo'nanka ooverira noru'eriaing tee tee due', karanaang-anko poing. <sup>34</sup> Masika' naurampimang ninge dii', aing enanavarang mme' paa'ariaruko nkoaravaing teing aing kapoo'nanka ookara. <sup>35</sup> Paning ee'noko kansil' teing paa'areaining teka nkaang kara tee paa'aravauka'nung."

**Doong Ee'noko Batei Naninge Noru'ua'**  
(Mak 13:32-37; Luk 17:26-30; 17:34-36)

<sup>36</sup> "Naninge noru'ua' tee doong ee'noko tee batei. Koosinunanka paning-kooningee noru'aava'. Napo' ninge, tee bauringe, noru'ampa', teka teie narunge Mma'ke noru'ui otong tee batei. <sup>37</sup> Tee' nari' Nooa' bakanang nkoaru'na' nkoaravaing tee ning Tee Naning-naumpo' Paning-etaing moainang. <sup>38</sup> Aa'noko'na': tenang batei doua pankaing mme' poaruko taamanaama, naikaama, nampeema otoroko' bera Nooa' aka'nareng-koo tumparu'na'mung-koo basi. <sup>39</sup> Tee kapoo' nkoaravaing-koo noru' otoroa' bera douai pora teing ookara aaruvuru'. Tee' nari' ee'na' nkoaravaing tenang ning Tee Naning-naumpo' Paning-etaing moainang. <sup>40</sup> Kenaankara naninka mintoong-koo otoreko narung tenaanka-koo pari'uma, narung sipuaing. <sup>41</sup> Napo' manikumaara kenaankara-koo nari' iinkureko nani pari'uma nani sipuaing.

<sup>42</sup> "Tee'koo tanatarariri otorimaatoai, ai' dii'ke tee noru'eria' tee diikaang Oving poaina'mung. <sup>43</sup> Tekaa ee' noru'eriaing dii'ke, naninge pava okovenunge tee bakiaa'nko pomanang muunga noru'ui dei tee tee maamuari otopeu' tee bakaang pava pesi'koo tau-ra'pua'. <sup>44</sup> Tee' nari' dii' maamurariri otoriaingee, ai' tee ning Tee Naning-naumpo' Paning-etaing tenang batei ning moaing-pina' noru'meriaruko moaing."

**Mirumiru' Naninka Kenaankara Mintoongparetu'na'koong**  
(Luk 12:42-46)

<sup>45</sup> "Baa tee naning matau, bakaang ovingee bakanaava tare-koo botovumaung, naning kake'ii'nara botovotonaa'nuka batei makosinang bau'koo miru'nisi, biraanke-antavuaing tee botovotonaa' bakaang ovingee pora tee' nkoarako meu'pura. <sup>47</sup> Masika' naurampimang ninge, teie ookutuning kapoo' okovumaing-koo tarenara deeng-antavuaing. <sup>48</sup> Tekaa teie botovotonaa'ke orarai ee' noru'uaing deeko', 'Nkaang ovingee ana'aring po'koo,' ee'noko tavu' tutumpuriai teing nii'ning botovotonaa'nuka, ee'noko teing ninka nantoong naikaama kanu'arimaing ninka nari' nkoariai, teie bakaang ovingee poma meu'puu'naang doong paapaa'ui otoaina'mung tee po'koo, ee'noko batei noru'uauka'nung. <sup>51</sup> Ee'noko teie aa'na' kiimatavuaing tee, ee'noko naru' sipuai teing ninka ampirinunuka ninka, te' ee'noo' nantoong biromparima si'da' dovang kakirinkuarimatoainoo' sisikeera-koo otoroi."

**Mirumiru' Teing Nerai' Nanai'koong**

<sup>25</sup> "Tenang ee'nang tee tee muu' paninung tee teing pina' nerai' nanai' oro'paravaing biikaning daamunanka kompai nampeesinung kune'koo berou'ning onkeonke'aava'naang. <sup>2</sup> Pa'noko' teing-koo mutaanang-kooning ee'noko pa'noko' matau-po'ning. <sup>3</sup> Teinge mutaanang-kooningee biikaang daamu nkavaama karasini nari' nkavaavaruu'. <sup>4</sup> Ee'noko teinge matau-po'ning karasininanka nari' daamu-koo nkavai berou'. <sup>5</sup> Tekaa tee nampeesinung po'koo ana'aru'. Ana'ario' teing duunkaamparira aasiau'. <sup>6</sup> Teketa meu'namang boku karou' aa'puma, 'Nampeesinung aung enang pomaang. Porira kune'eriai'. <sup>7</sup> Teketa teing nerai' tantearira biikaning daamunanka pankapau'. <sup>8</sup> Teketa teing mutaanang-kooningee teing matau-po'ning karasini-koo eentavaarima aa'pau', 'Nii'ning pare'mereriai karasini-koo. Niikaning daamunanka siri'aring.' <sup>9</sup> Maku'aama aa'pau', 'A, nii'koo aa' ookara-koo makotuaroo'naang. Makosi berira karasini baaveaamaing-ankoa moo'siiriaing.' <sup>10</sup> Tekaa tenang mme' nanai otoroko karasini moo'koo tee nampeesinung te' basiaru'. Ee'noko teing nerai' matau-po'ning maamuari' otoroko'ning tee ninka nari' kuung tumpariru' nampeesikoo'ng paroro-koo. Ee'noko beroko karanaang da'paru'. <sup>11</sup> Napo' dama'ke teing nii'ning napo' porora aa'paako', 'Ovingee, ovingee, daate'meriai'. <sup>12</sup> Tekaa teie maku'urima aa'puru', 'Masika' naurampimang, ninge dii' noru'dampia'. <sup>13</sup> Tee'koo tanatarariri otorimaatoai dii', ai' dii'ke tee doong ee'noko batei noru'eria' ning toromaravainoo'."

## Tee Mirumiru' Mooni' Tankaampuru'na'koong

(Luk 19:11-27)

<sup>14</sup> "Napo' tee muu' paninung aunge minkunaae paara-anta-koo makosi. Narunge naninge ovoringe isipo' nii'naameensi'koo tenkenuma bakaning botovotonaanuka bokuvurira mooni' tankaampuru' teinge bakaang mooni' tare-evaava'naang. <sup>15</sup> Tutuna'nung pa'noko' kokorei'namiku avuu'. Teketa kenaanka-nung kenaanka kokorei'namiku avuu'. Teketa beaunomung narung kokorei'namiku avuu'. Biikaang matau siompui tee' tankaampuru'. Teketa tenkenuu'. <sup>16</sup> Teke ta tee pa'noko' kokorei'namiku nkavuu'nung namu'ke bera teie tee mooni' mintoong-antavuu' ee'noko daua napo' pa'noko' kokorei' basi-antavuu'. <sup>17</sup> Napo' tee kenaanka kokorei'namiku nkavuu'nung bera tee' nari' nkoaru'. Teie napo' asi'ning kenaanka kokorei'namiku basi-antavuu'. <sup>18</sup> Teka teie naninge narung kokorei'namiku nkavuu'nunge bera kansi' nenke'ura dinkung-koo dako'uu' tee mooni' ovoring bakaang.

<sup>19</sup> Teketa pankaroompuio' tee teing biikaang ovoring toroarara baakeenevuru' teing. <sup>20</sup> Ee'noko teie naninge pa'noko' kokorei'namiku nkavuu'nunge napo' nii'ning pa'noko' kokorei'namiku po'antavuu' nari' pora aa'puu', 'Ovoring, dake tee ning pa'noko' kokorei'namiku ameu'. Ooveko ninge napo' nii'ning pa'noko' kokorei' basi-antavantu'nung. <sup>21</sup> Bakaang ovoringe maku'uma aa'puu', 'Bakei tampa' nkoveu'nung, da' tee botovotonaa' tampa, kake'iinung. Aing-koo oki'ning-koo tampa' kake'iiraru'nung-koo ninge tee kapoo'nanka mmahu'nanka tare-koo si'dampaing. Enang pora ni'ninka nari' dotumareaing.'

<sup>22</sup> Napo' tee kenaanka kokorei'namiku nkavuu'nung pou'. Pora aa'puu' tee ovoring, 'Dake tee ning kenaanka kokorei'namiku ameu'. Ooveko enang tee ninge napo' asi'ning kenaanka kokorei'namiku basi-antavantu'nung. <sup>23</sup> Bakaang ovoringe maku'uma aa'puu', 'Bakei tampa' nkoveu'nung, da' tee botovotonaa' tampa, kake'iinung. Aing-koo oki'ning-koo tampa' kake'iiraru'nung-koo ninge tee kapoo'nanka mmahu'nanka tare-koo si'dampaing. Enang pora ni'ninka nari' dotumareaing. <sup>24</sup> Teketa napo' tee naning narung kokorei'namiku nkavuu'nung te' pou'. Pora aa'puu', 'Ovoring ee, da' tee bakei naning ivekung noru'dansi o'nong. Dakaning botovotonaanuka pore'oromatoko dama' pora derarara'naang.

<sup>25</sup> Tee'koo da' dataramparura mera tee aung dakaang mooni' baku'antu' kansi'koo kuung. Ooveko, aung tee dakaang kapoo'. <sup>26</sup> Bakaang ovoringe maku'uma aa'puu', 'Da' bakei orara botovotonaa', kakaru'. Tee' minkumeinaare ninge enang toro-antavama'naang da'koo. Masika' ee noru'mei otong ning naning ivekung? Nkaning botovotonaanuka pore'oromatoko dama' mera deramaramaung ee? <sup>27</sup> Tee' noru'mei deeko' arekee'koo nkaang mooni' beeng-koo si-pearuu', toromarara nkaning taakore'ning ninka nkavampeu'nung? <sup>28</sup> Tee narung kokorei'namiku pari'erira tee naning kivora kokorei'namiku oto'evuing

averiai. <sup>29</sup> Ai' baa tee naning bereng-anta-nko dau basi-na' napo' avu'koong. Ee'noko tee naning bereng-anta-nko deeaung teing oto'evuing naro'ka pari'koonge.

<sup>30</sup> Enang dama'du dua'eriai aung botovotonaa' tamunsi'nung te' mutaananoo', te' ee'noo' nantoong biromparima si'da' dovang kakirinkuarimatoainoo' sisi-keera-koo otoroi.'"

## Jiisuu'ke Dama'ke Siivenke' Nkovuaina'

<sup>31</sup> "Tenang ee'ning tee ning Tee Naning-naumpo' Paning-etaing nkaang meenasi ninka moainang teing ninka nkaning koosinunanka ninka nari' ning tee teekoo nkaang ba'nava'nani' pipi'daari-koo paning-koong-koo ba'nanampaing daurorong taa'ni'antamari.

<sup>32</sup> Ee'noko ookara kansi'koo muu'nanka amutemuu' teing ning-koo uro'kanoo' oosiaraiaing ee'noko teka siivenke'arampaing tee' sipisipi' tarenarai sipisipi' ee'noko mee'mee' simpe'uripeu'na'. <sup>33</sup> Ee'noko aa'noai, sipisipi'nanka ning-koo tampavine-aape siparampai, mee'mee'nanka mare'aanavine-aape. <sup>34</sup> Teketa tenang ninge dauroronge aa'parampaing teing tampavine-koo otoroaing, 'Porira dii' Mma'ke biraankeruru'ning barenku konsiiriai, ai' tee muu' paninung tee dii'koo maamu-antavuu'nung kansi' tutumparu'noo'keta. <sup>35</sup> Ai' dii'ke tee ning tenang peeramoko bau'meriko'. Ntong-koo karaa'marako kapoo' nai-koong ameriko'. Tenang damisimai deemari o'noko kuung bokumeriko'. <sup>36</sup> Tenang duaana o'noaruko duaameriko'. Napo' siipamoko tanatameriko'. Tenang kiimatanava-koo o'noko porima beero'meriko'.'

<sup>37</sup> "Teketa tenang teinge koonto'nukai maku'aama aa'paavai tee, 'Ovoring, are'ka peeraroko oorampima bau'dampiko', ee'noko ntong-koo nekeru'kiko kapoo' nai-koong arompiko'? <sup>38</sup> Napo' are'ka damisimai deentari otoko oorampima kuung bokurampiko', ee'noko are'ka duaana oto'deruaruko duaantampiko'? <sup>39</sup> Napo' are'ka siiparoko oorampima nii'noo' kiimatanava-koo otoko beero'dampiko'? <sup>40</sup> Ee'noko ninge dauroronge maku'arama aa'parampaing, 'Masika' naurampimang dii', aming kapoo' dii'ke aing-koo mmarang-koo baru' miring otoroaing-koo nkoveru'nung tee tee ning-koo nkoveru'nung.'

<sup>41</sup> "Napo' aa'parampaing teing mare'aanavine-koonupoong, 'Dii' barakosi'nisinuka, beriai ning-ankoita tee-koo nta'koo otoi oto'koo Sietani'koo ee'noko bakaning koosinunanka-koo maamu-antanisi-koo. <sup>42</sup> Ai' ning tee peeramoko dii'ke bau'meriaruko'. Ntong-koo nekeru'kanko kapoo' nai-koong ameriaruko'. <sup>43</sup> Damisimai deemari o'noko kuung bokumeriaruko'. Duaana-koo ata'teenko duaameriaruko'. Napo' siipamoko ee'noko kiimatanava-koo o'noko dii'ke tee ning taremeriaruko'. <sup>44</sup> Ee'noko teinge napo' maku'aama aa'paavai, 'Ovoring ee, arenang nii'ke da' aa'noko oorampima pakurampiaruko', peeraroko, ntong-koo nekeru'kiko, damisimai deentari otoko, duaana-koo ata'siiko, siiparoko nii'noo' kiimatanava-koo otoko? <sup>45</sup> Ee'noko ninge maku'arama aa'parampai, 'Masika' naurampimang, aming kapoo' dii'ke aing-koo



mmaikori'koo baru' miring otoroaing-koo nkoveri-aruu'nung tee tee ning-koo nkoveriaruu'nung.'<sup>46</sup> Teke ta tee teing kiimatavariri doong kante tee' nari' otoroainoo' beroaing, teka teing koonto'nuka domampariri tee' nari' otoroainoo' beroaing."

### Jiisuu' Sisikeera Tora'antavai Dupisi'aako Napo' Domamparu'na'

(26:1-28:20)

#### Jiisuu' Mumunsiau'na'

(Mak 14:1-2; Luk 22:1-2; Jon 11:45-53)

**26** Teketa Jiisuu'ke teing aing karananka minku bakevura bakaning barevare-nupoong aa'puru',<sup>2</sup> "Dii'ke noru'eri otong tee Paroro Baari'koong~ makotuu'naang doong deto ke'munta otong, ee'noko ning Tee Naning-naumpo' Paning-etaing tee naninge tooka kompui taura'muaing, ee'noko aa'barata'koo bi'maara dupisi'maavaing."

<sup>3</sup> Tenang ee'nang tee teing piristi'nuka-koo ovontung ee'noko nantong-koo pankenanka tee piristi'pankaing bakanava-koo nara'ariru', bakaang miring tee Kaiapasi.<sup>4</sup> Ee'noko teinge Jiisuu' aavavaara moo'aara tavaava'naang mumunsiau'.<sup>5</sup> Ee'noko teinge aa'pau', "Na'moo paroro ninka nkoampiauka' nantong karingai turamaari'neenga."

#### Naninge Manikumai Jiisuu' Beetania Duunie Sisi'uu'na'

(Mak 14:3-9; Jon 12:1-8)

<sup>6</sup> Teketa tee Jiisuu' teke Beetani-namono-koo otoko tee Saimoni' tero oramuu'po'nung bakanava-koo kunge.<sup>7</sup> Ee'noko tenang teke otoko nani manikuma tee-anko pou' duuninaro' † moo' pankaing-koonaro' nkavui. Ee'noko tenie pora Jiisuu'koo bore'koo dau dakovuu' teke taamang banto'domai ba'nampario'.<sup>8</sup> Tee' nkovuio' teinge barevare-nupoonge ooaara iiravorora aa'paako', "Aung aming-koo anie tamung kera'pumaang?"<sup>9</sup> Aung duuni tee moo' pankaing-koo baavevuma mooni' nkavuma ata'oi'nuka paku-koo makosi."

<sup>10</sup> Ee'noko Jiisuu'ke noru'ura tee kapoo' teinge minkuaako'nung aa'puru' teing, "Dii'ke aming-koo ani manikuma pore'antaverimang? Anie tee kapoo' tampara masikung ning-koo nkovuing.<sup>11</sup> Ai' teing ata'oi'nuka teing dii' ninka doong kante nari' otorimaa-toaining, teka ning tee dii' ninka baru' pankarong o'noriauka'nung.<sup>12</sup> Tenang anie aung duuni ning-koo mono-koo dakovuma tenie tee ning dako'maavaing-koong maamu-antamura tee' nkovuing.<sup>13</sup> Masika' naurampimang, are'ke tokoi tee doorenang tampara daankiaavainoo'ke ookara kansi'koo tee kapoo' ning-

koo anie nkovuing tee minkuaama ani norunoru'aavaing."

### Judasie Kara Naroompuu'na' Jiisuu' Sivuko Tavaava'naang

(Mak 14:10-11; Luk 22:3-6)

<sup>14</sup> Teketa narung teing-koo nanai'keta kenaanka-koo Judasi Kerio'nung tampaako'nung, piristi'nuka-koo pankainuka-anko beu'.<sup>15</sup> Bera nia'urima aa'puru', "Dii'ke ning aming ameripeu' ninge tee Jiisuu' dii'anko sianko?" Tee'puio' teinge mooni'ning siliva'kooning beenaumo kivoranuri deeru-antavaara avau' tee.<sup>16</sup> Teketa deto tee enang Judasie tooka kompui doona besi'uu' Jiisuu' teing-koo sivuainoo'.

#### Ovoring Ninka Asirang-koo Taamanau'na'

(Mak 14:12-21; Luk 22:7-14,21-23; Jon 13:21-30)

<sup>17</sup> Doong tutuna'na'mung basiaro' tee paroro Ju' bikaang berete' iisiropa-koong, bakaning barevare-nupoong Jiisuu'anko porora tee nia'aama aa'pau', "Dake are'ke nii'ke tee Taamang Baari'koong~ maamu-antavampira naiampii'naang piaromaang?"<sup>18</sup> Jiisuu'ke aa'puru', "Jerusalemamono-koo berira naning narung ooveriaing ninge noru'ansi o'noing. Nauerima aa'periaing, 'Teie nau-antai aa'puing, "Nkaang batei tokompansi o'nomaung miru'nisi enang due'uing. Ee'noko ning nkaning barevare-nupoong ninka teke dakanava-koo Baari'koong Taamang naiampima norunoru'ampiaing te'mung doong." "

<sup>19</sup> Teketa teing barevare-nupoong tee' Jiisuu'ke nauvuru'na' berora maamu-antavau' tee Baari'koong Taamang.<sup>20</sup> Bera muumpuio' Jiisuu' teing ninka nanai'keta kenaanka barevare-nupoong ninka teke ba'naniau'.<sup>21</sup> Ee'noko tenang taamanaama Jiisuu'ke aa'puru', "Ninge masika' naurampimang dii', narunge dii'koonge tee tooka kompui ning kare-nupoong-koo simuaing."

<sup>22</sup> Teketa teinge tee' taaravaara bakei orarunsiariru', ee'noko Jiisuu' naruna' doompeitaa' nia' tutumpau' aa'paama, "Tee ee ning ee, Ovoring?"

<sup>23</sup> Jiisuu'ke maku'uma aa'puru', "Teie ee'nunge ni'ninka nari' diisi-koo toonampematomaunge ning tooka kompui taura'muaing.<sup>24</sup> Ning Tee Naning-naumpo' Paning-etaing tee tee' Daari Meekunge minkuvuu'na' nari' nkomaravaing, teka tee naning ning tooka kompui kare-nupoong-koo simuaing tee bakei piaaru' masikung, tora'kuainung. Bakei ponto'aravaru'nung dei tampa'ke."<sup>25</sup> Teketa tenang teie Judasie ee'nunge tooka kompui tee Jiisuu' kare-nupoong-koo tau-ra'puaiinge aa'puu', "Tee ee ning ee, Nau-anta Pankaing?" Jiisuu'ke maku'uma aa'puu', "Ee', da' ee'nung tee."

### Jiisuu'ke Ovoring Bakaang Taamang Nkoaamatoaing Miru'uu'na'

(Mak 14:22-26; Luk 22:15-20; 1Kor 11:23-25)

<sup>26</sup> Teketa tee' taamanaama Jiisuu'ke berete'nu nkavura, biraankevura, pisi'uu'. Pisi'ura bakaning barevare-

† Temurii' duuninaro' tamping tee kapang boo'anta-koo, miring "alabasta"-koo, teka'nisinamurii'. Duuni tampa' nuuraa' miring naarada' kuung sipaako'nung, moo' pankaing.

nupoong avurima aa'puu', "Nkaverira naieriai, aung tee nkaang mono makosi." <sup>27</sup> Teketa napo' uaininareng avaako nkavura kompui tampa' tampa Kumponing-koo teing avurima aa'puru', "Aru'koo naikiriai dii' ookara. <sup>28</sup> Aung tee nkaang ereng nerakung kara narooong-anta pinka'anta-koong makosi, mmau' nantoong biikaang orarananka tonta'anta-koo dakoaravaing. <sup>29</sup> Enang tee ninge ee' naurampimang, enang-eta deto naikamparoo'naang uaininaru'koo bera te'mung uaini-koong urusi' nerakung dii' ninka nari' naiampai'na'munge basi Mma' bakaang muu'koo kuunge." <sup>30</sup> Teketa kenanavu kenavaara danto tenke-naara Olive'po'namii-aape berou' teing.

### Jiisuu'ke Piita Penkemparavaing Uro'kanoo'ka Sira'puu'na'

(Mak 14:27-31; Luk 22:31-34; Jon 13:36-38)

<sup>31</sup> Teketa Jiisuu'ke nauvurima aa'puru' teing, "E'mung ee'na'mung muunga dii'ke ookarai ning si'merira koo'darii'naang, ai' Daari Meekunge tee tero tee' minkuvuu'nung aa'puu'noo'ka, 'Ninge tee sipisipi' tanatanung tavanko teing sipisipi'nanka teing avitoitoi purarenka'ariaining.'

(Sekaraia 13:7)

<sup>32</sup> Teka ning boo'keta daa'marara tee dii'koo uro'ke Kaaleli'nameng-koo meaing." <sup>33</sup> Piitai maku'uma aa'puu', "Ninge tee bakei da' si'dampauka'nung bane ainge nii'ninge si'daako dakaning kare-nupoong-koo avoreaama." <sup>34</sup> Jiisuu'ke maku'uma aa'puu', "Ninge masika' nauramaang, e'mung ee'na'mung muunga kokoree' mme' koo'kuaruko beemu'pie da' penkentaravaing ni'ninka nari' o'noremaung-koo." <sup>35</sup> Teka Piitai napo' aa'puu', "Ning tee da'koo penkemaravauka'nung bane da' ninka nari' moompeaing." Napo' teing nii'ning barevare-nupoong ookara tee' nari' kareau'.

### Jiisuu' Ketsemani-nau-koo Kunsiaru'na'

(Mak 14:32-42; Luk 22:39-46)

<sup>36</sup> Teketa tenang Jiisuu' teing ninka bakaning barevare-nupoong nii'noo' Ketsemani tampaako'noo' † berou', ee'noko te' berora aa'puru' teing, "A' ba'nanirio' ning anka' mera kunsimaravai." <sup>37</sup> Teketa Piita bokuvui ee'noko Siebedi-baurinketa nari' tapotaapo' berou', ee'noko orarunsiarama domang oraka' dee'ou'.

<sup>38</sup> Ee'noko teing aa'puru', "Nkaang domang tee orarunsie bakei boo'pina' dee'antamuing. Anke otoriai ni'ninka nari' tanatarariri." <sup>39</sup> Teketa kato oki'noo' bera te' doonko kinkinura kansikoo teke kunsiaru' aa'puma, "Mma' ee, makosi deeko' aung kiimata-koong kaapu baari'antameaing, teka tee nkaang pia deea', da' dakaang pia siong-koo makosi." <sup>40</sup> Teketa napo' te' bakaning barevare-nupoong otorou'noo' toroarara teing aasiaio' oovuru' teka. Ee'noko teketa aa'puu' tee Piita, "Dii' ee donkaang ni'ninka nari' tanatarariri tamung oki'noo' batei otoriarupeu?" <sup>41</sup> Kunsirarima tanatarariri otoriaing parapaara-koo dua'dari'neenga,

† Ketsemani tee Duuni Mii'doma miru'ari otong. Te' ee'noo' sinang olive'koong mii'aako'noo' duuni nka-koo.

ai' domange tee piarori otoritaa' diikaang mono aru-arudorimang."

<sup>42</sup> Teketa napo' kemu'kana' kato bera kunsiarama aa'puu', "Mma' ee, aung kiimata ninge baari'koo makosi deeaung deeko', makosi dakaang pia siompansi tora'pampaing." <sup>43</sup> Ee'noko napo' pora tee' teing aasiai otoroko oovuru', duta aasi'ke tavorio'. <sup>44</sup> Teketa napo' teka sipurira napo' beemu'pina' beu' kunsiaraa'naang tee' nari' minkuvuu'na' minkuvuma. <sup>45</sup> Teketa napo' barevare-nupoong-anko toroarara aa'puru' teing, "Dii' ee mme' aasiri otong uarorima? Ee aing, batei due'umaang ning Tee Naning-naumpo' Paning-etaing tooka kompui naninge simuu'naang nantoong oreng biikaang bireng-koo. <sup>46</sup> Aia', daa'darira meriai. Ooveriko tee aung tooka kompui ning simua'naang enang pomaang."

### Jiisuu' Moo'au'na'

(Mak 14:43-50; Luk 22:47-53; Jon 18:3-12)

<sup>47</sup> Tenang ee'naang tee Jiisuu' tee' karoi otoko tee Judasi nanai'keta kenaanka-koong narung te' basiaru'. Tee ninka nari' nantoong karinga bainatu dovangpo'nupoong ee'noko ta'baka aa'ning kompai porou', piristi'nuka-koo ovontung ee'noko nantoong biikaning pankeu' urantanuka aa'ninge botoaarun'ning. <sup>48</sup> Teie tooka kompui Jiisuu' kare-nupoong-koo sivuu'naang tee taa'ni'anta maamu-antavuu' aa'puma, "Tee naning nange nuunuampaing tee ee'nung naning dii'ke bokotaanieriaing."

<sup>49</sup> Jiisuu'anko namu'ke bema Judasie aa'puu', "Teie ee Nau-anta Pankaing!" Tee' minkuvuma teka nuunuvuu'. <sup>50</sup> Ee'noko Jiisuu'ke maku'uma aa'puu', "Mmaiko', kapoo' dake nko-koo poing nkoveaing." Teketa tenang teing nantoong uro'kanoo' koo'arira Jiisuu' bokotaanianaara dai'au' tee. <sup>51</sup> Tee' nkoaako narunge Jiisuu' bakaning-koonge bakaang bainatu barampura piristi'koong pankaing bakaang botovotonaa' teka'puma dome' ete'uu'. <sup>52</sup> Teketa Jiisuu'ke aa'puu' tee, "Tee dakaang bainatu te' bakanoo' napo' sipeai, ai' teing nantoong bainatue tavu' nkoaavaining teing napo' bainatue booroaining. <sup>53</sup> Ai' dake ee noru'ea' ninge Mma'koo karonko bakei mmau' kokorei' koosinunanka aa' namu'ke bee'aripeu' ning paku-koo? <sup>54</sup> Teka tee' nkoansi dei tee Daari Meekung-koong kara arekee' dupearapeu', aa'pui otoing, tee' ee' nkomaamatomana' nari' nkomaavaing?"

<sup>55</sup> Ee'noko tenang Jiisuu'ke aa'puru' teing nantoong karinga, "Dii'ke ee ning tavu' nkoaama bakiaa'ka-maung deemerima bainatu dovang ninka ankonu' poring ning dai'merii'naang? Doong kante tee ning oomerio' dootuu'nava pankava-koo doonanairu-koo ba'hamari nau-antamaramaang, teka teke o'noko dii'ke ning dai'meriaang. <sup>56</sup> Teka aung ee' nkoaring tee Daari Meekung-koong kara nakaro-nupoonge daari- au'nung dupearaa'naang." Teketa tenang teinge ookara bakaning barevare-nupoonge teka sipaara koo'ariru'.

### Ju'koong ovontunge Jiisuu' Tuumpiau'na' Kaka'dekeari-ra

(Mak 14:53-65; Luk 22:54-55,63-71; Jon 18:13-14,19-24)

<sup>57</sup> Teketa teinge tee Jiisuu' moo'au'ninge Kaiapasi-anko be'antavau' tee ee'nung piristi'nuka biikaang pankaing, te' ee'noo' teing boto naunuka ee'noko teing pankeu' urantanuka naro'ariru'noo'. <sup>58</sup> Teka Piitai dama'ke isipo'keta kaarie sipuma bera te' piristi'nuka biikaang pankaing bakanava-koo uro'mang basiaru'. Bera te' kuung tumparara teing ninka Ju' biikaang pia-tooronuka~ ninka nari' ba'nanui otoko' tokoona' nkoaavaina' oovuu'naang. <sup>59</sup> Ee'noko Piita te' ba'nanui otoko teinge piristi'nuka-koo ovontunge teing ninka ookara koompaara'navitu karananka mare'nii' be-si'aako' Jiisuu' tuumpi-kooning kara daa'aara deeko' Jiisuu' dupisi'aava'naang. <sup>60</sup> Teka teing kapoo' daa'aava' bane mmou' daang minku nkonankai teke donkonai kara mmou' minkuaako'. Asi'na'moong kenaanka naninka uro'kanoo' poreta aa'puretu', <sup>61</sup> "Aunge tee aa'pumaung, 'Ninge teva dootuu'nava pankava turampamira beenang doong-koo napo' kaniampeu'." <sup>62</sup> Teketa tenang piristi'nuka biikaang pankainge deto donkonura Jiisuu' aa'puu', "Da' ee bari'na' oto'derua'? Sira'daravai aung-koo tuumpiramaung-koo!" <sup>63</sup> Teka Jiisuu' tee' nari' ka'duuaru' otoko'. Teketa teie piristi'nuka biikaang pankainge aa'puu' tee, "Ninge tee Kumponing domantoo' bakaang miring-koo aa'damaang, naumeriai da' tee Kumponing tero Pako'pari'nii' nii' domameri taremeriainoo'koo deeko', tee Karistoo', Kumponing Bauring." <sup>64</sup> Jiisuu'ke maku'uma aa'puu', "Ee', tee' ee'na' masika' minkuemaang. Ee'noko aa'dampii'naang ninge dii' ookara: Dama'ke tee ning tasi'meriaing ning tee ee'nung Tee Naning-naumpo' Paning-etaing Daari Meekunge naururimaung kamo'ke depeto pora ookara kansi' tarevumaatoainung. Ee', Kumponing bakaang iri' deto basi ninka moko oomerira tee dii'ke tenang tasi'meriaing."

(Danielo 7:13)

<sup>65</sup> Teketa tenang teie piristi'nuka biikaang pankainge bakaang mononopa' dere'ura aa'puu', "Aunge bakei Kumponing akapeu'umaang! Nii' nantoong aung-koo kapoo' minku-koo piamoria'. Tee tee aung enang dii'ka taaravering Kumponing akapeu'uko. <sup>66</sup> Enang bakaang kara simpe'erima arekee' noru'erimang?" Ee'noko teinge maku'aama aa'pau', "Aung tee boo'koo makosi." <sup>67</sup> Teketa tenang oing-koo tutupaa'aama ki'bituau'. Ee'noko nii'ninge tanko'paako' aa'paama, <sup>68</sup> "Da' tee Kumponing teroita Pako'pari'nii' nantoong domamperi tareveriaainoo'koo deeko' tarampeerarama~ mansi'dari naumeriai baie tarui?"

### Piita Jiisuu'koo Penkemparu'na'

(Mak 14:66-72; Luk 22:56-62; Jon 18:15-18,25-27)

<sup>69</sup> Tuutunang~ kuunge nkoarako tee Piita tee parang-koo kuunge pava-ita dama'due ba'nanuio' nani nerai'na' botovotona' tee-anko pou' te'. Pora aa'puu', "Da' tee Jiisuu' ninka tee ninka Kaaleli'nung ninka

nanirimaung." <sup>70</sup> Teka Piita penkemparu' teing-koo ookara-koo uro'kanoo'ke, aa'puma, "Ning tee kapoo' dii'ke minkuerimatomaung noru'ampa'." <sup>71</sup> Napo' teke-ta danto tuntoma-navaro-koo bera teke otoko nii'nanie napo' nerai'na'ke teka oovuu'. Oovura teing nantoong teke otoroko'ning nauvurima aa'puru', "Aung tee naning tee ninka Jiisuu' Nasareti'nung ninka nari' nanuremaung." <sup>72</sup> Teketa napo' penkemparu' tee Piita marakavarama; aa'puu', "Ninge tee naning noru'ampa'," <sup>73</sup> Napo' teketa otompuaruko teinge nantoong teke donkonai otoroko'ninge Piita-anko masipo' berora aa'pau', "Bakei masika' da' teie narung teing-koong, ai' da' tee tee' teing-pina' karema sira'daramang." <sup>74</sup> Teketa Piita baka barakosi'arama † maraka-antavarama aa'puu', "Ninge tee naning noru'ampa'!" Teketa namu'ke kokore' koo'kuu'. <sup>75</sup> Teketa tenang Piitai norunoru'uu' tee kara Jiisuu'ke minkuvuu'nung, aa'puu'nung, "Da' tee kokore' mme' koo'kuaruko beemu'pie penkentaravaing ni'ninka nari' o'noremaung-koo." Ee'noko teketa oko siarara aa'na' orarunsiarara biromparu'.

### Jiisuu' Pailati'anko Tavo'au'na'

(Mak 15:1; Luk 23:1-2; Jon 18:28-32)

**27** Teketa minkuaakotaa' tane'puio' ookarai aa'ninge piristi'nuka-koo ovontung ee'noko nantoong-koo pankeu' urantanukai Jiisuu' dupisi'aava'naang maneau'. <sup>2</sup> Ee'noko dai'aara teketa tee Pailati'anko, tee-anko Rooma'nung ovo'ma'anko, tavo'au'.

### Judasi Ke'ni'aru'na'

(Nka 1:18-19)

<sup>3</sup> Teketa tenang teie Judasie tooka kompui Jiisuu' tau-ra'puu'nunge tee maneau'na' oovura orarunsiaru'. Ee'noko orarunsiarara teing mooni' siliva'nanka beenaumo kivora-nuri bera torovuu' piristi' pankenanka-koo ee'noko nantoong-koo pankenuka-anko aa'puma, <sup>4</sup> "Bakei oraka' nkomarieeng! Tee naning orararopa kare-nupoong-koo taura'pansieeng tavaava'naang." Ee'noko teinge pankenankai maku'aama aa'pau', "Tee tee kapoo' dakaang, nii' tee-koo dake manki'antameriauka'nung." <sup>5</sup> Teketa Judasie mooni' te' dootuu'nava pankava-koo kuung dua'ura tenkenuu'. Teketa bera keni'aru'. <sup>6</sup> Teketa teinge piristi'koo pankenankai teing mooni'nanka teka ukuaara aa'pau', "Aung tee boto-koo ee' oro' orokoari otong te' meepo' mooni' kore'doma si'koo tee tooka-koong deemparako." <sup>7</sup> Teketa teinge narung naning utau ta'nung bakaang kansi' moo'koo kara naroompau' nantoong Ju'deeang te' dako'aarimaatoo'naang. <sup>8</sup> Ee'noko tee'koo ee'na'koo tevora' kansi'navora' miring tokanavora' tampaa-maung bera e'mung doonko basinoo'. <sup>9</sup> Ee'noko tee' nkoario' tee kara teie Jeremaia'ke nakaronari minkuvuu'nung dupearu' Daari Meekung-koo aa'puu'noo'ka,

† Baka barakosi'arama ee' minkuarapeu', "Masikung minkuam-parui dei Kumponing tamupeu'!"

<sup>10</sup> "Teinge beenaumo kivora siliva'nanka nkavau', teinge nii'ninge Isireeli-nupoonge miru'au'ning tee naning moo'kooning. Ee'noko naning utau ta'nanng bakanameensi' moo'au' teinge, Ovoringe boto-muu'na'."

(Sekaraia 11:12-13; Jeremaia 32:6; 18:2)

### Jiisuu' Pailati'ankoi Donkonuu'na'

(Mak 15:2-5; Luk 23:3-5; Jon 18:33-38)

<sup>11</sup> Enang napo' tee Jiisuu' tee-anko ovo'ma'anko donkong-antavaio' nia'uma aa'puu' tee, "Da' ee tee Ju'nupoong biikaang daurarong?" Jiisuu'ke maku'uma aa'puu', "Tee' nari' minkueina' o'nong." <sup>12</sup> Teketa teinge pankenankai piristi'nuka-koo ee'noko nantoong-koo daang tuumpiaako kasivua' karoaruko'. <sup>13</sup> Teketa Pailati'ke nia'uma aa'puu', "Dake ee taaravea' otong kapoo' mmu'nanaka-koo tuumpiraamaang da'?" <sup>14</sup> Teka Jiisuu'ke nii'nau' kapoo'nau'koo maku'uria'. Tee'koo tee ovo'ma' aa'na' ta'ninuu'.

### Barabas Jiisuu'ke Paari-antavau'na'

(Mak 15:6-15; Luk 23:13-25; Jon 18:39-19:16)

<sup>15</sup> Tenang tee teke narung aarumo ovo'ma'ke nkovuko'nung ee' oro': Ookara mare' kante-koo Taa-mang Baari'koong~ nkoaako tee narung naning kiimata-nupoong-koo simpiri'antaevuriko' nantoong karika' piavoroko'nung. <sup>16</sup> Ee'noko tenang ee'hang teke tee narung naning orara, ookarai noru'aako'nung miring Barabas kiimata-nava-koo otoko'. <sup>17</sup> Tee'koo tenang nantoong karinga naro'aririo' Pailati'ke nia'urima aa'puru' teing, "Anaanka-koo arera ninge simpiri'antakoo piarorimang, tee Barabas ai' tee Jiisuu', tee Pako'pari'nii' tampaamaung?" <sup>18</sup> Teka ee' noru'ui, teinge tee Jiisuu' mamairo-ita tee-anko tavo'au'nung.

<sup>19</sup> Teketa tenang Pailati' teke bakanoo'ke ba'nanui kara simpe'domai ba'nanuio' ba'aang botoario' narung kara tee-anko po'antavau' ee' minku, "Tee naning kapoo' orararopa dake tokoona' nkovauka', ai' ninge tee e'mung tee-koo noone oamira domang aa'na' manki'moi o'noing." <sup>20</sup> Teka teinge piristi'nuka-koo ee'noko nantoong-koo pankenankai dera-antavaariko' ookara nantoonge Barabas bake-antavuma Jiisuu' dupisi'antavuaing tampaava'naang. <sup>21</sup> Teketa teie ovo'ma'ke aa'puu', "Anaanka-koo naninka-koo baa arera dii'ke bake-anta-koo piarori otong?" Teinge maku'aama aa'pau', "Tee Barabas." <sup>22</sup> Teketa Pailati'ke nantoong nia'urima aa'puu', "Teka tee Jiisuu', tee Pako'pari'nii' tampaamaung, arekee' nkoama'naang?" Teinge ookarai maku'aama aa'pau', "Aa'barata'koo taakaveaing tee." <sup>23</sup> Pailati'ke maku'urima aa'puu', "Aming-koo, ai' kapoo' orara aming nkovuing teie?" Teka teinge napo' baru' aa'na' bokiaama aa'pau', "Aa'barata'koo taakaveaing tee."

<sup>24</sup> Teketa tenang Pailati'ke tamung kariarako'nung noru'arara ee'noko nantoonge karakarare tutumpaio' teie ntong nkavura bireng duu'paru' teing-koo kari-ka'koo uro'kanoo'ke aa'puma, "Ning tee kapoo' o'noa', aung naning bakaang ereng ning-koo biromparavau-

ka'nunge, kapoo' dii' diikaang." <sup>25</sup> Ee'noko ookara nantoonge maku'aama aa'pau', "Makosi, bakaang ereng nii'koo biromparavaing ee'noko ookara-koo niurukaa'koo." <sup>26</sup> Teketa teie Barabasi simpiri'antavavuru'. Teka teie Jiisuu' mura'aava'naang botovuru' Pailati'ke, ee'noko dama'ke aa'barata'koo taakavaava'naang botovuru'.

### Piatooronukai Jiisuu' Akapeu'aako'na'

(Mak 15:16-20; Jon 19:2-3)

<sup>27</sup> Teketa tenang ovo'ma' bakaning piatooronukai Jiisuu' ovo'ma' bakanava-koo be'antavau', ee'noko ookara piatooronukai teka tapo'eera koroau' tee ee' akapeu'aava'naang; <sup>28</sup> Teinge bakaning mononopa'nanka kiru'aara napo' mononopa' urumpumaung dauraronuka biikaang-pina' oro' kurumpau' tee-koo. <sup>29</sup> Teketa baakopo too'murintaap'po'nung dauraronuka biikaang-pina' kaamaum paara tee-koo bore'koo kurumpau'. Ee'noko bana' kong-antavau' tee-koo bireng-koo tampavine-koo ee'noko tee-koo uro'kanoo' kinkinaako' aa'paama, "Tampara masakung, Daurarong Ju'nupoong Biikaang!" <sup>30</sup> Ee'noko teinge tutupaa'aama bana' pari'aama amutemu'ke bore'koo mura'aako' teie.

### Jiisuu' Aa'barata'koo Taakavau'na'

(Mak 15:20-32; Luk 23:26-43; Jon 19:17-27)

<sup>31</sup> Teketa akapeu'aakotaa' tee mononopa' urung kiru'au', teketa tee bakaang masakung mononopa' kurumpau' tee-koo. Teketa aa'barata'koo taakavaava'naang be'antavau'. <sup>32</sup> Teketa beroma naning narung kune'au' Sairini-ning miring Saimoni', ee'noko teinge tee etuau' tee teie aa'barata' nkaevuu'naang. <sup>33</sup> Teketa Kolokata' tampaamanoo' basi-antavau', miru'noo' Makupi'noo'. <sup>34</sup> Ee'noko teka te' basiarira teinge Jiisuu' uaini nonang-koong ma'naange pitunisi avu'koo paaravau' teie naivuu'naang, teka teie tora'pura nai-koo kasivuaruu'. <sup>35</sup> Tenang tee aa'barata'koo taakavaara teinge tee bakaning mononopa' tankaampeu' kapoo' deikoo'koong nkoara. Tee' nkoaio' tee kara nakaronunge minkuvuu'nung dupearu' Daari Meekung-koo aa'puu'nung, "Teing tankaampeu'nung teing nkaning mononopa', ee'noko nkaang baarong-koo deikoo'eu'."

(Kena 22:18)

<sup>36</sup> Ee'noko teke ba'nanai tanatavai otoroko' tee teka. <sup>37</sup> Ee'noko tee-koo bore'koo daua teing kapoo' tee tuumpiaako'ning daariaara sipau' ee' minkuning:

AUNG TEE JIISUU', JU'NUPOONG BIIKAANG DAURARONG.

<sup>38</sup> Napo' kenaanka naninka mutaa'o tee ninka nari' taakavaaretu' teka. Narung tee-koo tampavine-aape ee'noko narung mare'aanavine-aape.

<sup>39</sup> Ee'noko nantoong teke tankinaako'ninge koovi'ai tankinaako', oraka' minkuaama. <sup>40</sup> Ee'noko aa'paako', "Da' tee pava dootuu'nava pankava turampera beenang doong-koo kaniee'naang tantaramaung, enang daka domaang moo'darama aa'barata'keta de-

peto siraravai, da' tee Kumponing Bauring deeko'." <sup>41</sup> Napo' tee' nari' teinge ainge aa'ninge akapeu'aako' tee, piristi'nuka-koo ovontunge, boto naunukai ee'noko nantoong pankeu' urantanukai. <sup>42</sup> Aa'paako', "Aunge tee nantoong oovuning domaang moo'urikoo', teka baka domaang moo'koo makotua'. Tee Isireelinupoong Biikaang Daurarong deeko' enang aa'barata'keta depeto siaravaing ee'noko nii'ke masika'antavampiang tee. <sup>43</sup> Bakei Kumponing bauring tamparama tee-koo aa'na' pinka'aramaung tamparakoo', enang Kumponing pakuvuaing teka tee domamparaanaang piavoi otoing deeko'." <sup>44</sup> Ee'noko napo' tee' nari' tenaanka mutaa'o nkorai tee ninka nari' taakavaaretu'naankai poore'uretu'.

### Jiisuu' Boo'paru'na'

(Mak 15:33-41; Luk 23:44-49; Jon 19:28-30)

<sup>45</sup> Enang tee duaaki'ui'o' mutaanang pou' temeng ookutunameng bera kamunoo'ng-koo basi. <sup>46</sup> Ee'noko kamunoo'ng Jiisuu' aa'na' karoma osinung karai aa'puu', "Eloi, Eloi, lama sabakatani," ee' minkuvuma, "Nkaang Kumponing, nkaang Kumponing, ning dake aming-koo si'meing?" <sup>47</sup> Ee'noko nii'ninge nantoonge teke donkonai otoroko'ninge tee' taaravaara aa'pau', "Eliasi bokuvumaang." <sup>48</sup> Teketa namu'ke narung teing-koo kua'parara kapoo' uaini kaaveerii'ke boovong-antavura bana'koo dai'antavura Jiisuu'aape deto toong-antavuu' musi'uu'naang. <sup>49</sup> Teketa nii'ninge aa'pau', "Sipeko baka otoai tee. Iro' ooampiang, Eliasie pa pora pakuvuu'naang." <sup>50</sup> Teketa Jiisuu' aa'na' napo' deto bokuma tenang ee'ngang domang si'nuu'. <sup>51</sup> Ee'noko tenang ee'ngang tee baarong pava dootuu'nava pankava-koong, meekavaro ku'nung, meu' ke'me'aru' a'dei'keta depeto dere'arama bera a'doong kainu'. Kansi' u'mi'ke aa'na' biru'uu', ee'noko boia'nanka ke'mera'ariru'. <sup>52</sup> Ee'noko napo' nantoong dako'aaru'nanka-koong kuvinanka daate'ariru', ee'noko nantoong meekupoong tero dako' aaru'ning biikaang mononanka domamparira daa'arira kuvi-eta bakoariru'; <sup>53</sup> Teketa Jiisuu' domamparira daa'ario' teing Jerusalema'koo kuung berora nantoong mmou'koo oro'pariru'. <sup>54</sup> Ee'noko tenang teie piatooro daaku' tarenara teing ninka teke Jiisuu' tanatavai otoroko'ning ninka nari' tee u'mi' nkoaru'nung ooaara ee'noko ookara kapoo'nanka tavo'kuu'ning teing teing bakei aa'na' avoreau', ee'noko oita'kaama aa'pau', "Aung bakei masika' Kumponing Bauring." <sup>55</sup> Ee'noko maniku' mmou' teke otoroko' isipo'keta tee Jiisuu' ooa'itaa' Kaaleli'keta Jiisuu' siompaitaa' nari' porou'ning tee pakuaama kapoo' apuka'parako'ning-koo. <sup>56</sup> Teing-koo nii'nani Meeri' Ma'dala-nani, ee'noko nii'nani napo' Meeri' Jeemisi namainta Josepa' beuko, ee'noko napo' Siebedi baurinke-ta beuko.

### Jiisuu' Dako'au'na'

(Mak 15:42-47; Luk 23:50-55)

<sup>57</sup> Muung-aapevuma nanuko naning narung te' pou' kavonanka mmou'po'nung miring Josepa' Ari-matea'nung, teenoo' tee Jiisuu' bakaning-koong barevare-nupoong-koo narung deemparu'nung. <sup>58</sup> Ee'nung tee Pailati'anko bera Jiisuu'koong mono nia'uu', ee'noko Pailati'ke aroo'ura avaava'naang botovuru'. <sup>59</sup> Ee'noko Josepa'ke tee Jiisuu'koong mono nkavura teie baarong kakaarai nerakunge boo'nuka dai'na' dai'uma nopa'uu'. <sup>60</sup> Ee'noko bakaang-koo kuvi dako'doma-koo nerakung-koo kuung sipuu' tee kapang-koo nenke'uu'nareng-koo. Ee'noko kapang pankaing kaavororii' kovempura te' kuvi dako'doma karanaang ku'numpuu', ee'noko tee' nkavura tenkenuu'. <sup>61</sup> Teni Meeri' Ma'dala-nani ee'noko napo' nii'nani Meeri' te' kuvi-eta aveteka'koo ba'nanuresi tarevuresi otoreko'.

### Tee Kuvi Dako'doma Tanatavau'na'

<sup>62</sup> Teketa dauna'mung teing piristi'nuka-koo pankeng ee'noko Boto Keperuu'nuka Pailati'anko berora aa'pau', <sup>63</sup> "Ee' pankaing, nii'ke tee tosi bauko bakaang kara norunoru'ampiring domampari minkuvuu'nung aa'puma, 'Beenang doong tankinuko ning napo' daa'maravaing.' <sup>64</sup> Tee'koo dake boto sipeko te' kuvi dako'doma tanatavaavaing bera beenamparavaina'mung-koo basi, teinge bakaning barevare-nupoonge porora Jiisuu'koong bonku'noo' bakiaa'aara nantoong nauaarima aa'paa'neenga, 'Tee Jiisuu' boo'keta daa'aring.' Aung tee tee' oro' tositosi beremparavaing deeko' bakei koonto' orara masakung, tutuna'nung tositosi divu'ui otoaing." <sup>65</sup> Ee'noko Pailati'ke aa'puu', "Berira tanatavaavainig bokueriaing, ee'noko tee kuvi tampa' mataueri pinka'eriai dii'ke makosieriaina'." <sup>66</sup> Ee'noko tee teinge berora tee kuvi pinka'au', aa'nou', ovo'ma' bakaang taa'ni'anta kapang-koo dau sipau' teie para'aama, ee'noko tanata nkonuka miru'aru'.

### Tee Jiisuu' Boo'keta Daa'aru'na'

(Mak 16:1-10; Luk 24:1-10; Jon 20:1-18)

**28** Doong Uaana'mung tankinui'o' Saandei-na'mung siraka'puma nanuko Meeri' Ma'dala-nani ee'noko teni nii'nani Meeri' beretu' tee kuvi dako'doma oovuree'naang. <sup>2</sup> Tenaanka te' basiareko u'mi' pankaing nkoaru'. Narung koosinung~ Ovoring bakaang paning-eta te' siarara kuvi-aape bera tee kapang kaavororii' kato korimpuu' ee'noko tee-koo dau ba'namparu'. <sup>3</sup> Bakaang oo'oo-koo piping-pina' oro'paritaa', ee'noko bakaang mononopa' aa'na' kakaara sinou-pina'. <sup>4</sup> Ee'noko teing te' tareaako'ning tee-koo aa'na' avoro'ke dai'urio' dankuranku'arima boo'pina' otorou'. <sup>5</sup> Ee'noko teie koosinunge tenaanka manikumaara aa'puretu', "Dee' arorereauka'. Noru'ansi o'nong dee'ke Jiisuu' besi'eremang, tee ee'nung

aa'barata'koo taakavaieeng. <sup>6</sup> Tee tee a' otoa', domamparing tee' minkuvuu'na'. Poreta oovereaing a' bempaieenoo'. <sup>7</sup> Teketa namu'ke bereta bakaning barevare-nupoong aung kara nauereriai, aa'periaing, 'Tee tee boo'keta domamparing, ee'noko Kaaleli'aape dii'koo uroi bemaang. Teka berira ooveriaing.' Tee' ee'na' masika' ninge naurampesina'."

<sup>8</sup> Teketa tenaanka manikumaara namu'ke tenkenuretu' teketa kuvi dako'doma-ita avororema, nka tee domang dotue maanto'uresi. Ee'noko kua'paretu' teing bakaning barevare-nupoong nauaaree'naang. <sup>9</sup> Teketa Jiisuu'ke tenaanka teka taunga ta'nina' oro'pari kune'ureta aa'puretu', "Dee'ke ee!" Ee'noko tenaanka tee-anko poreta bakaang kau' boko'ureta pankaing-antavuretu' tee. <sup>10</sup> Teketa Jiisuu'ke aa'puretu' tenaanka, "Arorerea' bereta teing mmaikori' nauereriko Kaaleli'naameensi'aape beroai teka kune'maavaing ning."

**Teinge Kuvi Dako'doma Tarenukai Jiisuu' Domamparu'nung Sira'pau'na'**

<sup>11</sup> Tenang tenaanka manikumaara taunge nanuresi otoreko nii'ning teing-koo kuvi dako'doma tanatavaako'ning-koo Jerusalema' duparira sira'pau' teing piristi'nuka-koo pankenanka nauaarima ookara kapoo'nanka nkoaru'ning. <sup>12</sup> Teketa teinge piristi'nuka-koo pankenge teing ninka nantoong-koo pankenanka ninka naro'ke minkunaavarira teinge narung taung matauau'. Ee'noko teing piatooronuka mooni' pankaing moo'aaru' aa'paarima teing, <sup>13</sup> "Aa'periaing,

'Bakaning barevare-nupoong muunga aatumpirio' bakiaa'aara nkavaing.' <sup>14</sup> Teka tee aung kara aasirieeng-koong ovo'ma'ke taaravuko deeko' nii'ke boing-antavampiaing tee, ee'noko dii' tee-koo kara-koo kiimatarariauka'." <sup>15</sup> Teketa teinge piatooronukai teing mooni'nanka kompaara tee' nari' nauaaruna' minkuako'. Ee'noko biikaang minkunaa tee avitoitoi beremparu' Ju'nupoong-koo meu'ke bera e'mung doong-koo basinoo'koo.

**Jiisuu'ke Bakaning Avitoitoi Nanaama Kara Nau-antakoo Boto Sipuu'na'**

(Mak 16:14-18; Luk 24:36-49; Jon 20:19-23)

<sup>16</sup> Teketa tenang teing nanai'keta narung barevare-nupoong Kaaleli'aape berou' te' mii-koo Jiisuu'ke beroo'naang nauvuru'noo'. <sup>17</sup> Ee'noko teinge ooaara kinkinaama pankaing-antavau', teka nii'ning keekoo'ariru'. <sup>18</sup> Ee'noko Jiisuu' teing-anko pora aa'puru', "Ookara iri'nanka paning-kooning ee'noko kansi'kooning tee ning oko-antamuining. <sup>19</sup> Tee'koo berira ookara nantoong amutemuu' ning-koo barevare-nupoong deeng-antavereriaing aing aa'ning miring-koo ntong-koo minkiererima meeka'antaverererima: tee Mma' ee'noko ning Bauring ee'noko tee Tanuaang Meekung. <sup>20</sup> Ee'noko nau-antavereriaing ookara kapoo'nanka ninge dii'ke nko-koo botorampiru'ning siompaava'naang, ee'noko ning tee bakei masika' dii' ninka nari' o'noaing ookara batei-koo bera doong asi'noo'ke basi."

# MAAKA'

## Kara Baavootunanka Ane'kooning

1:1 Jiisuu' Pou'na' Kumponing Bakaang Muu' Sira'koo  
 3:7 Jiisuu' Bakanoo'nupoonge Aroo'aavaruu'na', Bane Bakaang Iri' Ooara  
 6:7 Barevare-nupoonge Jiisuu' Papaaravau'na' Bane Bakaang Iri' Nauvuriko  
 8:22 Jiisuu'ke Bakaning Barevare-nupoong Nau-antavuru'na'  
 11:1 Jiisuu' Sisikeera Tora'antavai Dupisi'aako Napo' Domamparu'na'

### Jiisuu' Pou'na' Kumponing Bakaang Muu' Sira'koo

(1:1-3:6)

#### Jooni Minkinara Bakaang Daankinang

(Mat 3:1-12; Luk 3:1-9,15-17; Jon 1:19-28)

**1** Aung doorenang tampara Jiisuu' Karistoo', Kumponing Bauring-koong. <sup>2</sup> Ee' tutumparu', Kumponing urikamu' Aisaia' karantavuma~ Karistoo' nauvuu'na' nari', Daari Meekung-koo aa'pumanoo'ka, <sup>3</sup> "Ee aung, ninge botoampaing nkaang kara-nka da'koo uro'ke tee taung maamu-antareraing uroita'. Tee ee' pina' otoaing, aurong narung naning-koong mee'bora' sirakamaa'koo bokuma aa'pumaang, 'Maamu-antaveriaing tee taung Oving bakaang. Koompevuriai poainavung.'"

(Malakai 3:1; Aisaia' 40:3)

<sup>4</sup> Ee'noko dama'ke tee Jooni Minkinara tavo'kuu' teke mee'bora' sirakamaa'koo nantoong ntong-koo minkivurima meeka'antavurima, minkunaa daankivurima. Aa'puriko', "Bere'darira ntong-koo minkirarima meeka'antarariaing ee'noko Kumponing diikaning oraka' nkonanka tonta'deruriai." <sup>5</sup> Ee'noko ookara Judia'nameng-nupoong ee'noko Jerusalema'navuntu'nupoong beroko' Jooni bakaang kara taara-koo. Ee'noko biikaning orarananka sira'pariko ntong-koo minkivurima meeka'antavuriko' teie Joo'dani-nari-koo. <sup>6</sup> Tee Jooni Minkinara tee tamung mononopa' kaameli'koong dapo-koo nkonii' kurumparako' ee'noko dopa'noo'ke tokoarako'. <sup>†</sup> Ntaa' maa'uriko' ee'noko davainta pora'kooning naivuko'. <sup>7</sup> Ee'noko doorenampurima aa'puriko', "Naning ning-koo dama'due poaing aa'na' apoo'mui otoing iirakuta,

<sup>†</sup> Teing nakaro-nupoong urikupoong tee' kurumpariko' Eliasi kurumparako'na', aarumo baka kirokai kontevoma.

doonge-taara~. Tee ee'nara poko aa'na' tampa' taaraveriai! <sup>8</sup> Ninge tamung ntong-koo minkirampima meeka'antampimaang, teka teie deeko' Tanuaang Meekung ninka meeka'antaruriaing."

#### Joonie Jiisuu' Ntong-koo Minkie Meeka'antavuiu' Sietani'ke Daua'uu'na'

(Mat 3:13-17; 4:1-11; Luk 3:21-22; 4:1-13)

<sup>9</sup> Ee'noko teing doong-koo kuunge Jiisuu' nanuu' Nasareti'keta, Kaaleli'nameng-koonoo'keta. Ee'noko Joonie ntong-koo minkivura meeka'antavuu' teka Joo'dani-koo. <sup>10</sup> Ee'noko Joonie oovuiu' Jiisuu' ntong-eta doompeto daa'arako paning daate'aru', ee'noko Tanuaang Meekung kuukuu'pina' siarara pou' Jiisuu'koo dau. <sup>11</sup> Ee'noko kara auromparu' paning-eta aa'puma, "Da' tee nnuring ninge piaaramaang, ee'noko ning aung-koo aa'na' dotumaramaang." <sup>12</sup> Ee'noko teketa namu'ke Tanuaang Meekunge Jiisuu' mee'bora' sirakamaa'koo tukovuu'. <sup>13</sup> Teke otoko, karenaumo kivora doong tankinuu' Sietani'ke teka daua'uko. Ee'noko kau'karenaumo biikonanka ninka nari' otoroko', bera tee batei oparako koosinunankai porora puring-antavau'.

#### Jiisuu' Pora Tavi' Kapa'nuka Karenaumo Bokuvuru'na' Tee Siompaava'naang

(Mat 4:12-22; Luk 4:14-15; 5:1-11)

<sup>14</sup> Teketa' Eeroti'ke Jooni Minkinara kiimata-nava-koo dai'uiu' Jiisuu' Kaaleli'nameng-koo <sup>††</sup> doorenang tampara daankivurima nanuu', <sup>15</sup> Aa'purima, "Batei enang dupearing ee'noko Kumponing bakaang muu' tee enang due' poing. Orara aarumo siperira Kumponing narung bakaang doorenang tampara masika'antaveriai."

<sup>16</sup> Jiisuu' Kaaleli'naru'koo miiringe nanuma Saimoni' namainta Aanduru' oovuretu' sionung dua'ureko teru'koo, ai' temainta tee tavi' baranka. <sup>17</sup> Ee'noko Ji-

<sup>††</sup> Temeng Eeroti' tarevuko'nameng.

isuu'ke aa'puretu', "Poreta ning siomereai, nantoong baranka deeng-antarampeaina'." <sup>18</sup> Ee'noko namu'ke tee beekaang sionung sipureta Jiisuu' siompuretu'. <sup>19</sup> Teketa napo' oki'noo' nanura Jeemisi namainta Jooni, Siebedi baurinketa, oovuretu' bakaasi-koo otoroko sionung pate'aama. <sup>20</sup> Ee'noko namu'ke bokuvuretu'. Ee'noko beuma Siebedi sipureta bakaasi-koo paku-paku-nupoong ninka otoroko Jiisuu' siompuretu'.

**Jiisuu' Pankaing Pina' Karoma Ma'naang Bata'uu'na'**  
(Luk 4:31-37)

<sup>21</sup> Ee'noko Kapaneume'navuntu'koo nanau'. Ee'noko Doong Uaana'mung Jiisuu' pava dootuu'nava-koo koinura teka kara nau-antavuru'. <sup>22</sup> Ee'noko nantoong aa'na' ta'nimpariru' tee-koo bakaang nau-anta-koo, kara bakaang purinto' deempario', teing-pina' boto naunuka-pina' deea'. <sup>23</sup> Ee'noko teke biikaang pava dootuu'koo naning ma'naang orara-po'nung otoko'. <sup>24</sup> Teie uiarama aa'puu', "Jiisuu', Nasareti'nung, arekee' nkomerii'naang? Da' ee nii' orari-anta-koo poing? Ninge noru'dansi o'nong da' Kumponing-etaing Naning Meekung." <sup>25</sup> Teka Jiisuu'ke tee aka'puma aa'puu', "Kareauka' ee'noko da' teieta bakoraravai." <sup>26</sup> Ee'noko teie ma'naange tee naning aa'na' bokuma nuanua-antavura teieta bakoaru'. <sup>27</sup> Ee'noko ookara aa'na' ta'nimpariru' ee'noko tana'eema aa'paako', "Aing ee, aming tavo'kui? Aung pa nerakung kara! Pankaing-pina' karo-maung. Bakei, ma'narie bakaang kara taaravaakoo'." <sup>28</sup> Ee'noko Jiisuu'nung miring namu'ke beremparu' ookarai osi Kaaleli'namenge.

**Jiisuu'ke Piita Ba'doraa Taare-antavuu'na'**  
(Mat 8:14-17; Luk 4:38-41)

<sup>29</sup> Enang teva pava dootuu'nava-ita Saimoni' namainta Aanduru' beekanava'koo koinau' Jeemisi namainta ninka Jooni, Saimoni' ba'doraa uipaarii' ninka siipavora bempari otoko. <sup>30</sup> Jiisuu' poko namu'ke nauau' teni. <sup>31</sup> Teni-anko pora bireng-koo kompura deto teni daa'uu'. Ee'noko uipaarii' namu'ke boimpuu'. Ee'noko tenie bau'uru' teing. <sup>32</sup> Ee'noko duaa' tumpario' ookara siipa-po'nupoong ee'noko ma'narie koriaariko'ning tavo'aaru' Jiisuu'anko. <sup>33</sup> Ee'noko ookara temononupoong aarentokai naru'arira otorou'. <sup>34</sup> Ee'noko amutemurii' siipa-po'nupoong taare-antavuru', ee'noko ma'nari mmau' bata'uru' kara potevurima Jiisuu' tasi'paio'.

**Jiisuu'ke Daankinampuru'na' Kaaleli'nameng**  
(Luk 4:42-44)

<sup>35</sup> Ee'noko tane' mme' siimpoorovuaruko~ daa'arara Jiisuu' tenkenuu', bera naning otoa'noo' basiarara teke kunsiaru'. <sup>36</sup> Teke otoko Saimoni' ba'maikori' ninka porou' besi'aama. <sup>37</sup> Ee'noko teka pe'numpaarai'nage aa'pau', "Ookarai da' besi'daamang." <sup>38</sup> Ee'noko Jiisuu'ke bari'urima aa'puru', "Meriai ainge kato nii'ning osinankai teing-koo napo' daankimaravaina', ai' ning tee tee'koo simaring." <sup>39</sup> Ee'noko avitoitoi nanuu'

Kaaleli' namenge pava dootuu'nairu-koo daankivurima, ee'noko ma'nari bata'uru'.

**Jiisuu'ke Oramuu'po'nung Taare-antavuu'na'**  
(Mat 8:1-4; Luk 5:12-16)

<sup>40</sup> Naning narung oramuu'po'nung bata'au'noo'keta Jiisuu'anko pora miinge keemparu' ee'noko paku-vuu'naang eentavarama aa'puu', "Da' piarora deeko' ning kuimepeu'nung." <sup>41</sup> Ee'noko Jiisuu' bakaang domang aa'na' piaavora tee-koo, ee'noko birenge kom-puma aa'puu', "Piamoi o'nong. Enang kuiraring!" <sup>42</sup> Ee'noko namu'ke teie oramuu'ke sipuko kiiroraa'aru'. <sup>43</sup> Ee'noko Jiisuu'ke botovuu' tenkeng-koo. Ee'noko aa'na' potevuma aa'puu', <sup>44</sup> "Tarerari naning naueau-ka', teka koonto' bera piristi'koo sira'antaravaing. Ee'noko tampa' ooruko Kumponing-koo boontunang nkoveai nantoonge tee taa'ni'anta ooaara da' teing ninka nari' oto'koo taura'nii' tasi'daavaina', tee' Moosesi bakaang botoi minkuvumana'." <sup>45</sup> Teka tee avitoitoi nanuu' kara bereng-antavuma. Ee'noko baru' berempuio' Jiisuu' osi-koo sirapo'ke daa'umparavaruko'. Ee'noko baka oovue bire'ari otoko nantoonge teka beero'aako' osinanka-ita beroma.

**Jiisuu'ke Doota Taare-antavuu'na'**  
(Mat 9:1-8; Luk 5:17-26)

**2** Nii'ning doong tankinuio' Jiisuu' napo' toroaru' Kapaneume'navuntu'koo. Ee'noko toroarako ooau'ninge pava-koo otoko sira'pau'. <sup>2</sup> Nantoong aa'na' karika' poroio' oto'doma otoaruu' pava-koo ku-unge ee'noko karanaang-koo dama'du. Ee'noko Jiisuu'ke nantoong teka kara daankivuru'. <sup>3</sup> Ee'noko tenang daankivuriko nii'ning porou' naning doota tavo'aa-ma Jiisuu'anko, nantoong karenaumoi nkavaakotaa'. <sup>4</sup> Ee'noko nantoong karika'ke ito'aio' Jiisuu'anko koon-to' tavo'avaa'. Enang tee pava-koo kantu'da dipi'au' Jiisuu' otou'noo'ka dau. Ee'noko naning doota teke doonai sing-antavau' bakaang tani' ninka nari'. <sup>5</sup> Ee'noko tenang Jiisuu'ke teing tee tavo'au'ning biikaang baito oovura aa'puu' tee naning doota, "Ee aung, dakaning orarananka tonta'deronsing." <sup>6</sup> Ee'noko teinge boto naunukai teke ba'nampariri tunsi-koo ee' noru'aako', <sup>7</sup> "Aming-koo aung kara menaankavumaang Kumponing bauvaupaa'uma? Naning otoa' orara aarumo tonta'upeu'nung, Kumponing narung deeko'." <sup>8</sup> Tee' tamung noru'aako Jiisuu'ke namu'ke irakavurira aa'puru', "Aming-koo tee' noru'erimang?" <sup>9</sup> Arera kara masika'poaruko ooverira ning makosi deeaung tammeripeu' aa'ning-koo, aung doota ee' minku-koo, 'Dakaning orarananka tonta'deronsing, nii'na' ee' minku-koo, 'Daa'darara dakaang tani' nkavei naniai.'? <sup>10</sup> Teka dii'ke iro' noru'koo makosi ning Tee Naning-naumpo' Paning-etaing kansi'koo o'noi orarananka tonta'koo makosi..." Tee'pura tee naning doota aa'puu', <sup>11</sup> "Ninge aa'damaang, daa'darara dakaang tani' nkavei naniai dakanava-koo." <sup>12</sup> Tee'puko daa'arara namu'ke tani' nkavui tenkenuu' ooai otoko. Ee'noko aa'na' ta'ninaara



ookarai Kumponing daangampau' aa'paama, "Nii'ke tero tee' oro' kapoo' ooampia'."

**Liivai'ke Jiisuu' Siong Tutumpuu'na'**  
(Mat 9:9-13; Luk 5:27-32)

<sup>13</sup> Ee'noko Jiisuu' napo' tenkenura miiru' Kaaleli'koo basiaru'. Ee'noko teke otoko nantoong karika' poroio' kara nauvuru'. <sup>14</sup> Ee'noko teketa tenkenura Liivai', Alo-peasi bauring, oovuu' taakisi nkavaako'nava-koo ba'nanuio' bakanavaro-koo. Teketa Jiisuu'ke aa'puu', "Ning siomeai." Ee'noko Liivai'ke deto donkonura tenang-eta deto tee siompui nanuu'nung. <sup>15</sup> Ee'noko karika' nantoong orenanka ee'noko napo' taakisi nkanuka ninka Jiisuu' nari' siompau'. Ee'noko teing-koo nari' nking ninka Liivai' bakanava'koo nari' taamanau' Jiisuu' bakaning barevare-nupoong ninka nari'. <sup>16</sup> Ee'noko teke taamanai otoroko nari' Boto Keperuu'navitu-koo nau-antanukai ooau' Jiisuu' nari' taamanaako oreng ninka ee'noko taakisi nkanuka. Ee'noko bakaning barevare-nupoong tana'arima aa'paaru', "Aming-koo taakisi nkanuka ninka nari' taamanaamaang ee'noko nantoong orenanka ninka nari'?" <sup>17</sup> Ee'noko Jiisuu'ke taaravurira maku'urima aa'puru', "Teing nantoong tampa' otoromaing naninge nankai'urii'naang piavoroa', teka teing siipavoromaing naing piavoromaing. Ning nantoong tampenanka-anko moa'. Ning orenanka-koo mou'nung nauaranko bere'aria'naang."

**Nerakung Aarumo-koo Urikung Toomo Dau Si'koo Makotua'**  
(Mat 9:14-17; Luk 5:33-39)

<sup>18</sup> Jooni bakaning barevare-nupoong ee'noko teing Boto Keperuu'navitu biikaning unkumoariko nantoonge Jiisuu'anko porora tana'aama aa'pau', "Aming-koo dakaning unkumoariaung?" <sup>19</sup> Ee'noko Jiisuu'ke bari'urima aa'puru', "Teketa ee nantoong baranee' navitu nampeesi-koo poromaing naning nampeesinara ninka nari' otoroi unkumoaripeu? Oto'a', ai' nantoong nampeesinara ninka nari' otoroi unkumo-koo makotua'. <sup>20</sup> Teketa doonanka pomaang teing bii'maiko' te'nemparako unkumoariaung. <sup>21</sup> Naninge baarong nerakanaa' urikanaa' ninka nara'ka pate'uarupeu'. Ee'noko tee' nkovuko deeko' napo' nerakanaa'ke tenaa' urikanaa' beeto'uko aa'na' dere'arapeu'. <sup>22</sup> Ee'noko napo' naninge uaini nerakaru' urikaro'koo pare'uarupeu'. Tee' nkovuko dei katekate'ora tero' naka'upeu'. Ee'noko naka'uko teru' ee'noko tero' ookeng oraru'kupeu'. Uaini nerakaru' nerakaro'koo deeko' pare'koo makosi."

**Doong Uaana'mung-koo Tana'kau'na'**  
(Mat 12:1-8; Luk 6:1-5)

<sup>23</sup> Ee'noko nii'na'mung Doong Uaana'mung-koo Jiisuu' bakaning barevare-nupoong ninka nanau' mintoong uite'naue'. Ee'noko bakaninge bii'da'paama nanau', Ju'nupoong biikaang aarumo-koo taura'pari otolina'. <sup>24</sup> Ee'noko teinge Boto Keperuu'navitue' Jiisuu' aa'pau', "Ooveai. Aming-koo Doong Uaana'mung-

koong boto toto'paamang dake bare-antaveri-mainge?" <sup>25</sup> Ee'noko Jiisuu'ke maku'urima aa'puru', "Dii'ke aming-koo tee' tuumpimerimaang? Tampa' noru'eri otong tee kapoo' Deevita'ke nkovuu'nung tenang Abieta'ke piristi' pankaing deempari otou'nung, tenang teing ata'ai peeravorora, tee ee'noko teing nari' otoroko'ning ninka; <sup>26</sup> Kumponing bakanava-koo Deevita'ke koinura, nkavura naiau' tee taamang meekung, nii'ninge nai-koo taura'parava', teka piristi'nuka nainge deeko' nai-koo makosi. Ee'noko teie Deevita'ke teing nari' otoroko'ning avurio' boto toto'koo tuumpiaava'." <sup>27</sup> Ee'noko Jiisuu'ke aa'puru', "Kumponing Doong Uaana'mung nkomemuru'nung nii'koo boonge otoi pakumuri oto'koo. Ee'noko te'mung-koo boong si'muria'. <sup>28</sup> Tee'koo ning Tee Naning-naumpo' Paning-etaing tee Ovoring Doong Uaana'mung-koong."

**Jiisuu'ke Bireng Duuai' Tamparu'antavuu'na' Doong Uaana'mung-koo**  
(Mat 12:9-14; Luk 6:6-11)

<sup>3</sup> Ee'noko Jiisuu' napo' toroarui' dootuu'nava-koo, naning teke otoko bireng duuai'. <sup>2</sup> Ee'noko nii'ninge Jiisuu' nempai otorou' te'mung doong meekung-koo taare-antavuko ooaara tuumpiaava'naang. <sup>3</sup> Ee'noko Jiisuu'ke duuai' karavuma aa'puu', "Poai a' uro'kanoo'." <sup>4</sup> Ee'noko aa'puru', "Boto ee Doong Uaana'mung-koo kapoo' tampara ai' naning orari-anta nko-koo taura'muri otong? Ai' domang-antana'munge, ai' dupisi'na'munge?" Ee'noko teing Boto Keperuu'navitu' tenang dooroompariru'. <sup>5</sup> Ee'noko Jiisuu'ke domang tupu'paa'nuka-koo manki'oi noru'urira iiravo' oovuru'. Ee'noko tenang duuai' aa'puu', "Bireng tovorodaravai." Ee'noko tovorodarama tamparu'kuu'. <sup>6</sup> Ee'noko Boto Keperuu'navitu siarira Eeroti' bakanaring ninka mumunsiariru' Jiisuu' tavu'na' matauaama.

**Jiisuu' Bakanoo'nupoonge Aroo'aavaruu'na', Bane Bakaang Iri' Ooaara**

(3:7-6:6)

**Karika' Nuuru'koo Korenge Otorou'na'**  
(Luk 6:17-19)

<sup>7</sup> Ee'noko Jiisuu' bakaning barevare-nupoong ninka tenkenau' bera nuuru' Kaaleli' due'. Ee'noko nantoong miatarai siompau' osi kante-ita porora, nari'ng Kaaleli'nupoong, Judia'nupoong, Jerusalema'nupoong, Idumea'navaro-nupoong, Taia'nupoong, Saidoni'nupoong. <sup>8</sup> Karika' porou' taaravaakotaa' kapoo' Jiisuu'ke nkovuko'ning. <sup>9</sup> Ee'noko mmau' nantoong nara'aririo' Jiisuu'ke bakaning barevare-nupoong botovuru' bakaasi neri-koo karika'ke papuranka'aa'neeng-koo. <sup>10</sup> Jiisuu'ke karika' nantoong taare-antavurio' ookara siipa-po'nupoong Jiisuu'anko tuueneveu' kompaava'naang. <sup>11</sup> Ee'noko ma'nari

oreng-po'nupoonge Jiisuu' ooaama uro'kanoo' dua'ari-ma bokiaama aa'paako', "Da' bakei Kumponing Baur-ing." <sup>12</sup> Ee'noko Jiisuu'ke koonto' orokovuriko sira'paa'neeng-koo.

**Jiisuu'ke Miru'uru'na' Bakaning Nanai'keta Kenaankara**  
(Mat 10:1-4; Luk 6:12-16)

<sup>13</sup> Ee'noko Jiisuu' deto iu'koo koinuu' ee'noko teketa bokuvuru' nantoong piavoko'ning. Ee'noko bokuvurio' porou' tee-anko. <sup>14</sup> Ee'noko nanai'keta kenaanka kara okovuri nkanuka miru'urima aa'puru', "Dii' ni'ninka nari' otoriaining ee'noko dama'ke botorampiai nantoong daanki-koo. <sup>15</sup> Ee'noko iri' oto'deruriainige ma'nari oreng bata'koong." <sup>16</sup> Aing teing Nanai'keta Kenaankara Jiisuu'ke miru'uru'ning: Saimoni', nii'noo' Piita, Jiisuu'ke tampuu'noo'; Jeemisi namainta Jooni, Siebedi baurinketa, nii'noo' Boanesi baurinketa Jiisuu'ke bokuvuretu'noo', kuunoo' kurung-pina' karara; Aanduru'; Pilipi'; Baatolomiu'; Maatiu'; Toomasi; Jeemisi, Alopeasi bauring; Ta'deasi; Saimoni', Ju'nupoong bii'ka donkong-koo pia-navitu-koong; ee'noko Judasi, Kerio'nara, tee tooka kompui Jiisuu' taura'puu'nung bakaning kare-nupoong-koo.

**Jiisuu' Ee'noko Kopeu, Nii'noo' Sietani'**  
(Mat 12:24-32; Luk 11:14-23; 12:10)

<sup>20</sup> Ee'noko Jiisuu' napo' osi-aape toroarua' otoko'noo'. Ee'noko nantoong miatara porora naro'ariru', ee'noko Jiisuu' teing ninka bakaning barevare-nupoong taamanaapeu' nang batei oto'evuriaru'. <sup>21</sup> Ee'noko baukorovoi tee taaravaara berou' moo'aara barampaa'va'naang nantoonge kanu' narung tampaako. <sup>22</sup> Ee'noko nariong boto naunuka-koo Jerusalema'keta porou'ninge aa'paako', "Kopeu dee'ma kurumaa'aring." Ee'noko napo' narionge aa'paako', "Ee', masikung, ai' pa ma'nari biikaang pankaing bakaang purinto' ninka bata'urimatoinge."

<sup>23</sup> Ee'noko Jiisuu'ke nantoong naro' bokuvurira aung kara mirumiru' nauvurima aa'puru', "Teka ma'naang orarai napo' ma'naang orara arekee' bata'upeu'?"

<sup>24</sup> Ee'noko napo' narung muu' baka siivenke'arara deto donkonuarupeu'. <sup>25</sup> Ee'noko napo' narung puata' siivenke'arara nari' donkonaavarupeu'. <sup>26</sup> Ee'noko Sietani' bakaning ma'nari turampeera biikaang muu' siivenke'arara pankaroompua' napo' dua'arara paa'arapeu'. <sup>27</sup> Naning purinto' bakaang pava-koo oovunara tumparara kapoo'nanka nkavuarupeu' iro' okonara tavuitaa' dai'uarura. Ee'noko dai'ura deeko' pari'upeu' bakanava-kooning kapoo'nanka. †

<sup>28</sup> "Noru'eriaing aung, Nantoong biikaang orarananka tonta'koo makosi ee'noko amutemurii' oraka' minku tonta'koo makosie. <sup>29</sup> Teka naning Tanuaang Meekung Kopeu dovang tampuma daviraa'umaung tonta'anta kompuauka'nung. Bakaang orara tee' nari' otoi otoaing." <sup>30</sup> Tee' nauvuru' Jiisuu'ke, ma'naang orara oto'po'nung tampaio'.

† Jiisuu' tee'ke Sietani' puru'uitaa' pari'umaung teing pinka'urimaing.

**Jiisuu' Baumaraang Makosinuka Baata?**

(Mat 12:46-50; Luk 8:19-21)

<sup>31</sup> Ee'noko Jiisuu'ke tee' minkuvuko teni ninka bauko ee'noko baara'mainkaang tee tavo'ariru'. Ee'noko dama'du donkonaitaa' kara Jiisuu'anko be'antavau' pora teing oo-koo. <sup>32</sup> Ee'noko nantoonge Jiisuu' ninka ba'nampariri otoroko'ninge aa'pau', "Daukorovoi dama'due nentaamaang." <sup>33</sup> Ee'noko Jiisuu'ke aa'puru', "Baie ninge nko'? Ee'noko baatai ninge ntara'mainkaang?" <sup>34</sup> Ee'noko nantoong nari' ba'nani-au'ning-aape bere'arara aa'puru', "Ooveriko, ninge nko'dovo makosinuka aing." <sup>35</sup> Nantoong ninge ntara'mainkaang ee'noko mmarikaampi ee'noko nko'kaampi makosinuka teing Kumponing piavomana' nari' nkoaamaing.

**Sinang Tankanara Bakaang Minkunaa**

(Mat 13:1-9; Luk 8:4-8)

**4** Nii'na'mung Jiisuu'ke kara nau tutumpuru' Kaaleli'naru'koo due'ka. Ee'noko nantoong karika' Jiisuu'anko naro'aririo' Jiisuu' bakaasi-koo ba'namparu' nuaru'koo daue otoko ee'noko nantoong tapiru'nairu-koo donkonau'. <sup>2</sup> Ee'noko Jiisuu'ke minkunaananka mirumiru'keta nau tutumpurima aa'puru', <sup>3</sup> "Taaraveriai. Naning narung mintoong-koo sinang tanka-koo nanura aa'nou': <sup>4</sup> Nii'ning sinang taung-koo dau dua'ariru' ee'noko barennankai porora teka tuntu-ravau'. <sup>5</sup> Ee'noko nii'ning sinang dakurakung-koo dau dua'ariru' kapang-koo dau otomaung-koo, ee'noko da'deng narung dupuu', te' kansi' baru' aaveta'noo' deemparako. <sup>6</sup> Ee'noko batei doonkenang bakaang-koo tee keenkeeng mara'ou' teke, baru' biira doonko nanuaung deemparara kansi' baru' makotua'noo'ke. <sup>7</sup> Ee'noko nii'ning sinang napo' too'murintaa' otoroinoo' meu' dua'ariru' ee'noko nari' dupurira too'murintaa'ke iinkenevuu' tee keenkeeng. <sup>8</sup> Ee'noko nii'ning kansi' pankauanoo' dua'ariru' ee'noko teke dupurira sinang aa'na' bi'uru' beenaumo kivora-pina' ee'noko nii'ning ~narung-taa kivora-pina' ee'noko nii'ning daaku'pina'." <sup>9</sup> Ee'noko aa'puru', "Dii' punkang-po'nupoong deeko' enang taaraveriai!"

**Kuunoo' Mirumiru'koo**

(Mat 13:10-17; Luk 8:9-10)

<sup>10</sup> Ee'noko Jiisuu' baka otoko nii'ninge taaravaara porou' teing ninka bakaning Nanai'keta Kenaankara ninka, ee'noko tana'au' kara dipi'ua'naang. <sup>11</sup> Tana'aako bari'uru', "Kumponing dii' bakaang kara pinka'erimaing taura'duru'nung makensi'nung-koo miru'noo' noru'erii'naang tee-koo bakaang muu'koo nkoaramana', ee'noko dama'du otoromaing kara mirumiru' narung taaravaavaing. <sup>12</sup> Tee' Daari Meekunge minkuvuma aa'puu'na', 'Bane ooaama teka papaaravarimatoai. Bane taaravaama teka tasi'paria' otoroi, Kumponing-koo bere'ariko orara aarumo tonta'evuri'neeng-koo.'"

(Aisaia' 6:9-10)

<sup>13</sup> Ee'noko Jiisuu'ke aa'puru', "Aung mirumiru' ee miru'noo' dii'ke bakei noru'eria'? Arekee' noru'eriainge ookara-koong miru'noo'? <sup>14</sup> Aung Kumponing bakaang kara tankanarai sinang pina' tankavuu'nu. <sup>15</sup> Sinang taung-koo dua'ariru'ning miru'noo' ee' oro': Nan-toonge kara taaravaako Sietani'ke namu'ke poma pari'urikoo'. <sup>16</sup> Ee'noko sinang dakurakung-koo dua'ariru'ning miru'noo' ee' oro': Nii'ninge kara taaravaama doturotu-eta kompaamaung. <sup>17</sup> Ee'noko tee kara tampa' ari'avuaruma ee'noko turanturang poko tee-koo kara-koo biikaang baito namu'ke orariarakoo'. <sup>18</sup> Ee'noko tee sinang too'murintaa'koo meu' dua'ariru'ning-koo ee' miru'noo': Narionge baru' pankaruntoonge noru'aakoo' kavonanka piaavaama ee'noko amutemurii' kapoo' karaa'aakoo', ee'noko teinge boon'ukoo' tee karakara ee'noko sinang bi'uarukoo'. <sup>20</sup> Ee'noko sinang kansi' pankauang-koo dua'ariru'ning miru'noo' ee' oro': Nii'ning nantoonge tee kara tarii'oro'i taaravaako bi'umaung nii'ning-koo beenaumo kivora-pina', nii'ning-koo ~narung-taa kivo-ra-pina' ee'noko nii'ning-koo narung daaku'pina'."

**Puu Antona'koo Boong Si'na' Deea'na'**  
(Luk 8:16-18)

<sup>21</sup> Jiisuu'ke aa'puru', "Naning dii'koonge bakaang araka paro'ura antona'koo boong nii'noo' batanang-koo boong ee sipupeu'? Ai' dau batanang-koo sipupeu'? <sup>22</sup> Kapoo' enang makempari otoing dama' sira'anta-koong. Ee'noko kapoo' enang da'pari otoing dama'ke daate'numpo'. <sup>23</sup> Dii' nantoong punkang-po'nupoong deeko' enang taaraveriai!" <sup>24</sup> Ee'noko napo' ee' minkuvuru', "Kara taaraverira siomperiai. Dama'ke nkoveriainoo' basinoo' napo' nkaveriaing, ee'noko Kumponing napo' dau basinoo' aruriai. <sup>25</sup> Naning avuavu' aa'na' kompumaung dama'ke deto basinoo' kompuaing, ee'noko naning avuavu'koo nuaku oto'evuining dama' pari'numpo'."

**Mirumiru' Sinang Dupumana'koong**

<sup>26</sup> Jiisuu'ke aa'puru', "Kumponing bakaang muu' naninge bakaang mintoong-koo sinang tankavu-peu'na'pina' oro'. <sup>27</sup> Ee'noko muunga aatuma doonga avitoitoi nanuko sinang baka peki'kura dupupeu' teie noru'uaruko. <sup>28</sup> Baka kansi'ke du'antavuko panka'parama sinang bi'umaung. Tutuna' dupuma panka'parama bi'ukoo'. <sup>29</sup> Ee'noko sinang petaa'uma meura'uko naninge tenang kavupeu'."

**Mirumiru' Sinang Masitara'koong**  
(Mat 13:31-32,34-35; Luk 13:18-19)

<sup>30</sup> "Tekana nii'ke aminge miru'ampipeu' Kumponing bakaang muu'? Ee'noko aminge mimpama siraka'antavampeu'? <sup>31</sup> Tee aa' sinanu oki'nu-pina' oro'nu masitara'koonu. <sup>32</sup> Bane temurii' mukusiri' ookara sinang kansi'koo keempaamaing-eta, teka tenang naninge kansi'koo keempuko dupura panka'parama taamang mintoong-kooning divu'ura kaumpe'nanka tampa'

tovoro'arapeu' ee'noko amutemurii' barenge bito kani-aama teke ueemparipeu'." <sup>33</sup> Jiisuu'ke tee' oro'ning mirumiru' amutemurii'ke kara navuriko' teinge aroo'aako'ninge nainge noru' nka-koo makosina' mantompurita'. <sup>34</sup> Ee'noko kapoo' navuria' miru-miru'po'nung deeaung. Ee'noko bakaning barevare-nupoong ninka deeko' bii'ka otoroita' miru'noo' sira'puko'.

**Jiisuu'ke Nuaru' Taroro'antavuu'na'**  
(Mat 8:23-27; Luk 8:22-25)

<sup>35</sup> Te'mung doong muung-aapevuio' Jiisuu'ke bakaning barevare-nupoong aa'puru', "Enang nuaru'ka amenka'koo pako'mariai." <sup>36</sup> Ee'noko nantoong karika' teka sipaarira Jiisuu' ninka bakaasi-koo aa'earira tenkenau'. Nii'ning bakaasie nari' berou'. <sup>37</sup> Nanai otoroko piong pankaing basiaru' ee'noko bakaasi boo'ai dapi' minkivuko', Jiisuu' bore' patu'ari aatuo' bakaasi-koo dama'due. <sup>38</sup> Ee'noko bakanninge tanteaama aa'pau', "Nau-anta, da' ee tara'doa' ke'nuru'marimaang?" <sup>39</sup> Ee'noko tee tantearara piong ee'noko tee eemaru' ntong-koong aka'puma aa'puu', "Bakerari dooroontar-avai." Ee'noko piong bakearako nuaru' tenang aa'na' taarorovuu'. <sup>40</sup> Teketa teie maku'urima aa'puu', "Dii' aming-koo arorerining? Dii' ee baitoropanuka?" <sup>41</sup> Ee'noko ta'nimparira tana'eema aa'peeko', "Aung naning baa piong tovange ee'noko ntong taaravaakoo'?"

**Jiisuu'ke Tamparu'antavuu'na' Naning Ma'nari-po'nung**  
(Mat 8:28-34; Luk 8:26-39)

**5** Ee'noko Nuaru' Kaaleli' pako'aara Kerasa'nupoong biikanameng-koo berou'. <sup>2</sup> Ee'noko Jiisuu' bakaasi-eta siarako naning ma'naang orara-po'nunge kune'uu' kuvi dako'domanairu-eta basiarama. <sup>3</sup> Aunoo' dako'domanairu-koo otoko'nung teroita. Naninge patau'uaruko'nunge bane sieenai dai'aama. <sup>4</sup> Mmau' doong-koo sieena dovange kuuka dai'aako totora'puko' oki'noo'na'. Naning purinto' tapupunara otoa'. <sup>5</sup> Doong ee'noko muung ata'uma nanuko' dako'domanairue ee'noko iu'nankai. Ee'noko bakaang mono uiarama kapange dato'arako'. <sup>6</sup> Ee'noko isipo'keta Jiisuu' oovui kua'pari pora tee-koo uro'kanoo' kinkinura pankaing-antavuu'. <sup>7</sup> Ee'noko Jiisuu'ke aka'puma aa'puu', "Dake ma'naang orarai aung naning sipeai." <sup>8</sup> Ee'noko tee'puko bokuma aa'puu', "Jiisuu', Kumponing Deto Basi Bauring, dake ning arekee' nkomee'naang piaring? Da' Kumponing pote-koo piamomaang ning tora'antame'neeng-koo." <sup>9</sup> Ee'noko Jiisuu'ke tana'uma aa'puu', "Da' miring baa?" Ee'noko teie bari'uma aa'puu', "Ning miring Miatara. Nii' aa'na' karika'." <sup>10</sup> Ee'noko tana'uma aa'puu', "Jiisuu', aing ma'nari avora'keta bata'eriauka'." <sup>11</sup> Ee'noko teketa due'ke mii-koo navete-aapei pooro'nanka meru'arima otoroko'. <sup>12</sup> Ee'noko ma'nari orenge Jiisuu'koo eentavarima aa'pau', "Taura'meriko merira tumariai pooro'nanka-koo." <sup>13</sup> Ee'noko Jiisuu'ke taura'puru'. Ee'noko teing

ma'nari bakoarira pooro'nanka-koo tumpariru'. Ee'noko pooro' naro'ka kenaanka kokorei'koo~ makosining pemue doonko koo'arira nuaru'koo bera ke'nuru'ariru' teke.

<sup>14</sup> Ee'noko teing pooro' bau'ariko'ning mmariau' ee'noko aung ee' oro' basiaro' doorenang avitoitoi bereng-antavau'. Ee'noko taaravaara nantoonge berou' ooaava'naang kapoo' nkoaru'na'. <sup>15</sup> Ee'noko Jiisuu'anko poroma aung naning tutuna' ma'nari-po'nung duaanavari ba'nani otoko ooau' bakaang noru' matauari, ee'noko avoreau'. <sup>16</sup> Ee'noko ma'nari-po'nung-koo ee'noko pooro'koo nkoaru'na' ooau'ninge tampa' nauaarur' teing. <sup>17</sup> Ee'noko Jiisuu' teing biikana-meng-eta tenkeng-koo piavorou'. <sup>18</sup> Ee'noko Jiisuu' bakaasi-koo beko aung naning ma'nari-eta tam-paru'kuu'nung nari' tee ninka piavou'. <sup>19</sup> Ee'noko Jiisuu'ke aa'puu', "Tee aa' da' otoko. Da'maikori'anko tororarasi kapoo' pankaing Kumponing piaarura da'koo nkovuina' naueriaing." <sup>20</sup> Ee'noko aung naning tenkenura osinanka kivora-koo kuunge nanuma nau-vuriko' kapoo' ta'nimpaarii' Jiisuu'ke tee-koo nkovuu'na'.

**Jairasi Baurang Ee'noko Manikuma Jiisuu' Bakaang Mononopa' Kompuu'nani**  
(Mat 9:18-26; Luk 8:40-56)

<sup>21</sup> Jiisuu' napo' toroarama nuaru' pako'uitaa' nii'nameng-aape beu', ee'noko nantoong karika' piisi'koo naro'ariru' Jiisuu'anko. <sup>22</sup> Ee'noko naning dootuu'nava tantanuka-koong narung miring Jairasi Jiisuu'koo kau'kanoo' kiunura eentavarama aa'puu', <sup>23</sup> "Nnorang boomang. Da' pora tanka' pante'eko taarevoai."

<sup>24</sup> Ee'noko Jairasi ninka nanuretu'. Ee'noko nantoong karika' bi'ariru' itoveitaa'.

<sup>25</sup> Ee'noko nii'nani manikuma otoko' mare' kivora-ita kemare'ka-koo tarumatearako'nani, mmau' batei-koo boorinang ninka avitoitoi nankai'aava'naang nanuko'nani. <sup>26</sup> Taarevoa' baru' bia'oko' bera boorinang o'siiviu'. <sup>27</sup> Ee'noko Jiisuu'koong doorenang taaravura ee' noru'aru', "Bane oki'noo' kompamira bakaang mononopa'koo, ning teni taaremoainani."

<sup>28</sup> Ee'noko teni dama'ke porai'ning karika'koo meu'ka Jiisuu'koo birokanoo'keta baarong-koo komparu'.

<sup>29</sup> Ee'noko kompura namu'ke ereng tempampuu' ee'noko taarevou'na' mono mantomparu'. <sup>30</sup> Ee'noko tenang Jiisuu' bakaang iri'ke sipuko mantomparu', ee'noko namu'ke karika'koo meu'ke berevere'arama aa'puu', "Baie baarong komeng?" <sup>31</sup> Ee'noko bakaning barevare-nupoonge bari'aama aa'pau', "Teka da' nantoong karika'koo meu'ke otoi arekee'koo aa'pemaang, 'Baie komeng?'" <sup>32</sup> Ee'noko Jiisuu' teke berevere'arako' kompui'nani besi'uma. <sup>33</sup> Ee'noko temurii' kapoo' teni-koo nkoaru'nung baka tampa' tasi'paritaa' Jiisuu'anko avoroi dankusi'kuma pora kinkinuu' ee'noko ookara tampa' siraka'pui nauvuu'. <sup>34</sup> Ee'noko Jiisuu'ke aa'puu' teni', "Ani ee, da' dakaang baitoi taareroinani. Mooa ninka naniaing. Tee' nari' taareroi otoainani."

<sup>35</sup> Ee'noko Jiisuu'ke teni karavui otoko Jairasi bakanoo'keta nantoong porora aa'pau', "Daurang boinani. Arekee'koo napo' Nau-anta pore'an-tavea'naang?" <sup>36</sup> Ee'noko Jiisuu'ke taaravura nasinua' dootuu'nava tanata aa'puu', "Aroreauka', masika'an-taveko naro'!" <sup>37</sup> Ee'noko Jiisuu' nantoonge siong-koo poteario' Jeemisi namainta Jooni ee'noko Piita, teing nainge siompai berou'. <sup>38</sup> Ee'noko dootuu'nava tanatanuka-koong bakanava'koo tavo'arira nantoong karakararearima birong tovang ee'noko ui nkoaako oovuru'. <sup>39</sup> Ee'noko pava-koo tumparara aa'puru' Jiisuu'ke, "Dii' aming-koo birontarimang baru' naam-paverima? Ani oki'nani booa', teka tamung aatu-maang." <sup>40</sup> Ee'noko teinge benkempau' tee. Ee'noko ookara birong-nupoong dama'du sing-koo botovurira tooto' baumararing ninka Piita ee'noko Jeemisie namainta Jooni teing naing bokuvurira teni otou'navarokoo tumpariru'. <sup>41</sup> Ee'noko Jiisuu'ke teni bonku' bireng-koo kompura aa'puu', "Talita kumi." Kuunoo' ee' minkuvuio', "Oki'nani, aa'damaang: Daa'daravai." <sup>42</sup> Ee'noko teni namu'ke daa'arara nanu'nanuu'. Bakaning mare' kivora-ita kemare'ka divu'. Ee'noko aung kapoo' tee' oro' tavo'kuio' nantoong ta'nimpariru'. <sup>43</sup> Ee'noko Jiisuu'ke aung doorenang koonto' naning nau-koo potevurima aa'puru', "Taamang-koo teni averiko naikuai."

**Jiisuu' Nasareti'ka Poore'au'na'**  
(Mat 13:53-58; Luk 4:16-30)

**6** Jiisuu' teketa' tenkenura bakanameng-aape toroaru', ee'noko bakaning siompaitaa' berou'. <sup>2</sup> Ee'noko Doong Uaana'mung pava dootuu'nava-koo daanki tutumpuu'. Ee'noko nantoong karika'ke taaravaara sinka'orora aa'pau', "Aung amurii' kara are'ka nkavuu'nung? Ee'noko aung matau ee' oro' baie avuu'nunge? Ee'noko aung ta'nimpaarii'nanka iri'po'ning arekee' tavo'antavumaunge?" <sup>3</sup> Aung ee ee'nara tee Meeri' bauring deea', tamung anke pava-kani? Jeemisi, Joosesi, Judasi ee'noko Saimoni' aung ninka namaia' ee deea? Ee'noko ba'marikaampi anke nii' ninka ee otoroa?" <sup>4</sup> Ee'noko teing tee-koo domang oraka' otoroko Jiisuu'ke aa'puru', "Napo' ookara nii'ning nakaro-nupoong-koo tee'ke, nantoonge oovunoo'ka pankaing-antavaarimaung, teka bi-ikanoo'ka deea', ee'noko bii'marange deea'." <sup>5</sup> Ee'noko mintoong baru' purinto' nkovuarupeu' teke. Ee'noko nii'ning deeko' siipa-po'nupoong taare-antavuripeu' tanka'ke pante'urima. <sup>6</sup> Ee'noko Jiisuu' ta'nimparur' teing-koo baitoropanuka. Ee'noko osinankai nanuma nantoong nau-antavuru'.

**Barevare-nupoonge Jiisuu' Papaaravau'na'  
Bane Bakaang Iri' Nauvuriko**

(6:7-8:21)

**Jiisuu'ke Bakaning Nanai'keta Kenaankara Mintoong-  
koo Botovuru'na'**

(Mat 10:5-15; Luk 9:1-6)

<sup>7</sup> Ee'noko Jiisuu'ke bakaning barevare-nupoong nanai'keta kenaankara naro' bokuvuru' ee'noko irikung-antavuru'. Ee'noko teketa kenaankarana' botovuru' ma'nari oreng bata'koo. <sup>8</sup> Ee'noko aa'puru', "Kapoo' nkaveriauka', donsi' narung deeko'. Ta'mari' deea', bakura deea', mooni' deea'. <sup>9</sup> Boonamante~ narung deeko' si'dariaing. Ee'noko mononopa'koo nanaa' nkaveriai." <sup>10</sup> Ee'noko napo' aa'puru', "Osi du'dariko teka bokuraariaining ninka otoriai bera temono-ita tenkeniriainoo'ke basi. <sup>11</sup> Ee'noko Nii'navuntu'koo onkeonke'daariarura taararaariaruko deeko' tenkeniriai temono-ita ee'noko da'mong pe'naa'koong te' tankaveriai temono Kumponing-koo maarekusi'noo' taa'ni'antaveri."

<sup>12</sup> Ee'noko teing tenkenaara daankiarima aa'pau', "Bere'darirai orara aarumo-ita." <sup>13</sup> Ee'noko mmau' ma'nari oreng bata'aaru'. Ee'noko karika' siipa-po'nupoong duuni dau koo'aariko taarevorou'.

<sup>14</sup> Enang tee Daurarong~ Eeroti'ke Jiisuu'ning doore-nang berempario' taaravuu' aa'paako, "Jooni Minkinara boo'keta napo' daa'aring, ee'noko tee'koo purinto' ninka mintoomparamaang." <sup>15</sup> Ee'noko nii'ninge aa'paako', "Tee aa' Eliasi † pa." Ee'noko nii'ninge napo' aa'paako', "Aung aa' narung nakaronara pankaing urikavarang-koong." <sup>16</sup> Ee'noko Eeroti'ke taaravurai'nange aa'puru', "Aung aa' Jooni Minkinara ninge kuru bitu'antu'noo'keta napo' domamparara otong."

<sup>17</sup> Teketa tutuna' Eeroti' teni ninka Erodiasi, baara'ma'nung Pilipi' ba'aang ninka otoreko'.

<sup>18</sup> Ee'noko Joonie Eeroti' tautauvuma aa'puko', "Da' bakei boto toto'peitaa' daara'ma'nung ba'aang ninka otoremaatoing." <sup>19</sup> Ee'noko tenang Erodiasi iiravou' tee' minkuvio'. Ee'noko Eeroti'ke teni dotu-anta-koo bakaning botovuru' Jooni moo'aara dai'aava'naang pava kiimata-koo. <sup>20</sup> Erodiasie napo' domang dupisi'koo piavoko Eeroti' tavu'koo kupi'ora donkonu'uu' avoroitaa' Jooni-koo, ai' Eeroti'ke Jooni tee tampa' noru'ui otoko'nung, naning koonto' ee'noko meekarai. Ee'noko bane teie, Eeroti'ke Jooni taaravuma noru' manki'oko'nunge, teka tee taara-koo piavoko'nung.

<sup>21</sup> Ee'noko dama'ke taung narung meu'puu' Erodiasie Jooni dupisi'koong. Enang tee Eeroti' pon-to'aru'na'mung doong makotuu'. Ee'noko nantoong

† Ooveai Malakai 4:5. Teie nakaronarai Malakai-e temu' Ju'nupoong nauvuru'ning tee temu'ning nakaronara pankaing, Eliasi, napo' tavo'aravaing nantoong maamu-antavurii'naang Ovor-ing poaing-koo.

pankainanka paroro nkoevuru': ovo'ma'koo kuunge mintoompariko'ning, piatooronuka~ biikaning bore'nu-ka ee'noko ovontung Kaaleli'nameng-nupoong.

<sup>22</sup> Ee'noko Erodiasi baurang pava-koo kuung tumparara mairu'aru' Eeroti' damisimainku ninka nari' dotu-antavurima. <sup>23</sup> Ee'noko Eeroti'ke mamairoarara, mariaritaa' maraka-antavuma aa'puu', "Kapoo' eentameko makosi aroma'naang. Ookara kapoo' tareamaing-koo meu' pisi'derompaigne piaroko."

<sup>24</sup> Teketa nerai'na' okora' siarara bauko tana'uma aa'puu', "Aming arekee' oro' ninge eentavama'naang?" Ee'noko baukoi aa'puu', "Jooni Minkinara bakaang bore' eentaveaing."

<sup>25</sup> Ee'noko teni nerai'na' namu'ke kua'pari daurarong-anko beu' ee'noko aa'puu', "Jooni Minkinara bakaang bore' namu'ke ameaiing daara-koo si'memura." <sup>26</sup> Ee'noko nauvuio' daurarong aa'na' oraruniaru', ee'noko tutung damisimainku-koo dutakanoo'ke teni-koo marakavaru'ning deemparako paapaa'aru' bakaang kara toto'koo. <sup>27</sup> Ee'noko dauraronge bakaning piatooronuka-koo narung botovuu' Jooni bakaang bore' tavo'ua'naang. Ee'noko bera pava kiimatanava'koo kuunga kuru tako'pevu'. <sup>28</sup> Ee'noko bore' diisi-koo kuung doompura tavo'evuu' teni nerai'na'. Ee'noko tenie napo' bauko-anko tavo'uu'.

<sup>29</sup> Ee'noko Jooni bakaning barevare-nupoonge taaravau' Jooni tavau'na', ee'noko porora Jooni-koong mono nkavaara kuvi dako'doma dako'au'.

**Jiisuu'ke Nantoong Deerunoo' Pa'noko' Kokorei' Divu'  
Bau'uru'na'**

(Mat 14:13-21; Luk 9:10-17; Jon 6:1-13)

<sup>30</sup> Ee'noko Jiisuu'ke botovuru'ning napo' toroarira tasi'antavau' ookara kapoo' osinanka-koo nkoau'ning ee'noko nauaaru'ning. <sup>31</sup> Nantoong karika' poroi otoroko bakaning ninka taamanaapeu'ning batei otoaruu', ee'noko aa'puru' teing, "Enang tokoi nii'ka merira o'noriai uarorima." <sup>32</sup> Ee'noko teketa bakaasie tenkenau' baku'ariri otoroainoo'aape. <sup>33</sup> Ee'noko nantoong karika'ke ooaari otoroko tenkenau' ee'noko tasi'paarira osi ookara-ita nantoonanka kua'pariru', ee'noko Jiisuu' dovang-koo uro'ke tavo'ariru'.

<sup>34</sup> Ee'noko Jiisuu' bakaasi-eta siarama nantoong karika' oovuru' ee'noko bakaang domang aa'na' piaavou' teing-koo, sipisipi' tanatanungropanuka-pina' oro'pariko. Ee'noko tenang Jiisuu'ke kara amutemurii' nau tutumpuru'.

<sup>35</sup> Ee'noko kamunoo'uiu' teing barevare-nupoong bakaning Jiisuu'anko porora aa'pau', "Aung muung-aapevuing. Nii' mee'bora' sirakamaa'koo o'noring.

<sup>36</sup> Nantoong botoveriko osinanka anketa due' otoroining-koo berora taamang moo'siaavai." <sup>37</sup> Ee'noko Jiisuu'ke bari'urima aa'puru', "Dii'ke kapoo' averereriko niaavaing." Ee'noko teinge napo' bari'aama aa'pau', "Teketa arekee'? Ai' kenaanka kivora nopa'koo makosininge moo'ampira bau'arampii'naang?"

<sup>38</sup> Ee'noko Jiisuu'ke napo' tana'urima aa'puru', "Teketa arekee'ning berete' oto'deruring? Berira ooveriai."

Ee'noko ooaara Jiisuu' aa'pau', "Tee aa' pa'noko' masikeng berete' otong, ee'noko tavi'ning keura."

<sup>39</sup> Ee'noko Jiisuu'ke nantoong navituna' karaasi'koo ba'ngang-koo botovuru'. <sup>40</sup> Ee'noko nauvurio' narung daaku'na' ee'noko nariong naruaapena' ba'nampariru'. <sup>41</sup> Ee'noko Jiisuu'ke teing pa'noko' berete' ee'noko tavi'ning keura nkavura tee paning-aape ankamparara biraankevuu', ee'noko berete'nanka pisi'uma bakaning barevare-nupoong avuru' teinge nantoong-koo tankampaava'naang. Ee'noko napo' teing tavi'ning keura tankampuru' ookara-koo. <sup>42</sup> Ee'noko ookara taamanaara poovorou'. <sup>43</sup> Ee'noko Jiisuu' bakaning berete' dovang ee'noko tavi' oparavaru'ning nara'ara peku' kivora-ita keveku'ka-koo makosi maanto'antavau' <sup>44</sup> Ee'noko nantoong taamang na-iau'ning-koo donkaang naing deerunoo' pa'noko' kokorei'.

**Jiisuu' nuaru'koo Daue Nanuu'na'**

(Mat 14:22-23; Jon 6:16-21)

<sup>45</sup> Ee'noko namu'ke Jiisuu'ke bakaning barevare-nupoong bakaasi-nareng-koo aa'e-antavurira ureaitaa' nuaru'koo Besaida-nameng-koo be'koo botovuru', nantoong karinga tenkeng-koo botovurii'naang.

<sup>46</sup> Ee'noko Jiisuu'ke nantoong si'noora'urira baka mii-koo koinuu' teke kunsiaraa'naang. <sup>47</sup> Ee'noko muumpuio' bakaasi-nareng nuaru'koo meu' basiaru' Jiisuu' teke kansi'koo baka otoko. <sup>48</sup> Ee'noko Jiisuu'ke otou'noo'keta oovuru' pore'oroko, pionge uro'kanoo'keta dama'du-aape bii'urima tavuriko. Ee'noko tane' dere'uaruko Jiisuu' nanura pou' teing-aape nuaru'koo daue. <sup>49</sup> Ee'noko ntong-koo daue nanuma dapi' divu'uriko teinge ookarai ma'naang pina' ooaara bokiau', avoro'ke tavurio'; <sup>50</sup> Teka Jiisuu'ke namu'ke karavurima aa'puru', "Aing ee, domang kuaa'doriai aroreria'. Tee ning ee' nanamang."

<sup>51</sup> Ee'noko tenang bakaasi-koo aa'eario' doving taarorovuu'. <sup>52</sup> Ee'noko bakei aa'na' sinka'orou', nantoong domang tupu'paa'nuka deemparira. Tampa' tasi'paavaruu' kapoo' berete'koo nkoaru'na' kuunoo'.

**Jiisuu'ke Siipa-po'nupoong Kenesire'ka Taare-antavuru'na'**

(Mat 14:34-36)

<sup>53</sup> Ee'noko nuaru' pako'aitaa' Kenasereti'nameng-koo tavo'arira biikaang bakaasi teka bi'au'. <sup>54</sup> Ee'noko tenang bakaasi-eta siariko Jiisuu' namu'ke tasi'pau' nantoonge. <sup>55</sup> Ee'noko tevaro-koo osinanka ookutuning dooreveera siipa-po'nupoong batanang-koo nkavaari porou' Jiisuu' otou'noo' taaravaara. <sup>56</sup> Ee'noko ookara osinanka Jiisuu' nanuko'nairu-koo-osi pankeng, osi oki'nareka', pora'nairu-koo-nantoong tee-anko siipa-po'nupoong tavo'aariko'. Ee'noko eentavariko Jiisuu'koo tamung bakaang mononopa'koo kainu' kong-koo taura'purii'naang. Ee'noko ookara mononopa'koo kompariko'ning taarevoroko'.

**Kumponing Bakaang Botoi Niikakatauro Biikaang Boto Divu'ui Otoina'**

(Mat 15:1-9)

**7** Teing Boto Keperuu'navitu ee'noko boto naunuka Jerusalema'keta Jiisuu'anko porou'. <sup>2</sup> Porora ooaaru' Jiisuu' bakaning barevare-nupoong-koo nari-ong tanka' ku'mi'oroi taamanaako. A'noo' tutuna' tanka' duu'pari meeka'paria' Boto Keperuu'navitue nantoong nau-antavaariko'na'. <sup>3</sup> Ai' Boto Keperuu'navitu ninka ookara Ju'nupoonge biikakatauro biikaang toomo tampa' siompaamaung. Tamung taamanaavaung tutuna' tanka' duu'paria'. <sup>4</sup> Ee'noko baavenairu-eta poroma deeko' taamanaavarupeu' tutung ntonge meeka'paria' ee'noko napo' amutemurii' toomo siompaakoo' biikakatauroi bampaaru'na' aing ee' oto' ntonge meeka'antana': kaapu, kokoto, utau, ee'noko batanang. <sup>5</sup> Ee'noko Jiisuu' tana'aama aa'pau' teinge Boto Keperuu'navitue ee'noko boto naunukai, "Aming-koo dakaning barevare-nupoonge niikakatauroi bamaaru'na' boto siompaavaung, aa'nomaung, bireng tovang duu'paria' taamang naiaamatoi?" <sup>6</sup> Ee'noko Jiisuu'ke aa'puru', "Tee nakaronung Aisaia' koonto' masika'pari tarampeearu'nung~ dii' ampirin-unuka minkururima, Daari Meekung-koo ee' daariari otoina',

'Teinge ainge nantoonge biikaang be'duu'ke narunge pankaing-antamaamaung, teka biikaang domang ning-koo isipo' otoroi. <sup>7</sup> Tamung ning dootuu'maa-maing, ai' teing boto nkaang miring-koo nau-antavaarimaing teing tamung nantoong-etaning."

(Aisaia' 29:13)

<sup>8</sup> Ee'noko Jiisuu'ke aa'puru', "Tee' ee'na' dii'ke Kumponing bakaang boto siperi tamung nantoong-etaing sintokosintoi-koong minkunaa pinka'erikoo'." <sup>9</sup> Ee'noko napo' aa'puru', "Dii' aa'na' norukasi'nuka Kumponing bakaang boto nimpa'erima tee diikaang minkunaa sintokosintoi-koong toomo deto kong-koo. <sup>10</sup> Ai' Moos-esie napo' boto ee' sipuu',

'Diumaraang deto noru'ereri paku'ereriainge'.

Ee'noko

'Naning baumararing oraka' minkuvureaing bakei dupisi'numpo'.'

(Toro 20:12; 21:17)

<sup>11</sup> Teka dii'ke aa'perimaung, 'Naninge baumararing kapoo'koo apuka'pareko, beuringe tering paku-koo kupi'ora deeko' aa'pupeu', "A, nkaning kapoo' arompepeu'ning teing temu' Kumponing bakaning bareantu'ning." Ee'noko tee'pura tering baumararing pakuvurearupeu'. Ee'noko tering biromparesio' beuring domang bere'koo piavoko dii'ke taura'periaunge diikaang toomoi dai'erima. <sup>13</sup> Tee' nkorarima dii'ke tee Kumponing bakaang kara daang-antaverimaung tee diikaang sintokosintoi-koong minkunaa barereerimaung siomperima, ee'noko amutemurii' aarumo nari' nkoverikoo'."

**Naning-nung Tanuaang Kumi'antavumaing**

(Mat 15:10-20)

<sup>14</sup> Ee'noko Jiisuu'ke nantoong bokuvurira aa'puru', "Ning iro' taaramerira dii'ke tampa' tasi'periai.  
<sup>15</sup> Kapoo' naninge naivuko kumi'antavupeu'nung otoa'. Ee'noko kapoo' domaang-eta tavo'kupeu'nunge deeko' naning ku'mi'antavupeu' <sup>16</sup> Dii' nantoong punkang-pupoong deeko' enang taaraveriai!"  
<sup>17</sup> Ee'noko nantoong teka sipurira pava-koo koinuu', ee'noko bakaning barevare-nupoonge teka miru-miru'koong kuunoo' tana'au'. <sup>18</sup> Ee'noko Jiisuu'ke aa'puru', "Dii' ee napo' teing-pina' noru'dopanuka? Arekee', tasi'peria' tee kapoo' dama'dunung naninge dunkumpuko tanuaang ku'mi'antavuarupeu'? <sup>19</sup> Aung tee domang-koo kuung bea', pakosii'koo bemaung, ee'noko teketa mono-ita napo' siarakoo'." Tee'purima ookara taamang taura'nisi tampuu'.  
<sup>20</sup> Teketa aa'puru', "Teo kapoo' tee kuung-eta pomaunge deeko' naning ku'mi'antavumaung. <sup>21</sup> Ee', naning bakaang domaang-eta aing ee' oro' pomaung: norunoru' orara ee'noko auning, bakiaa', naning dupisi', nampeesi orari, karakaraa', amutemurii' aarumo orara, tostitosi, maimaia'nko, mamairo, oraka' minku, baka biiving, ee'noko matau bekoi'. <sup>23</sup> Teing ee'ning kapoo' oreng naing ku'mi'anta."

**Nani Akovitu-koonanie Tee Jiisuu' Tee Ookara-koo Pankaing Masika'antavuu'na'**

(Mat 15:10-20)

<sup>24</sup> Ee'noko Ju' biikanameng-eta tenkenurai'nange Jiisuu' bakaning ninka osi Taia' ee'noko Saidoni'nameng-koo berou'. Ee'noko te' bera pava nava'koo kuung tumparu' nantoonge noru'koo piavoarura. Teka baru' baku'arava'. <sup>25</sup> Teke otoko nani manikuma baurang ma'naang orara-po'nanie Jiisuu' poio' taaravuu', ee'noko pora tee-anko kau'kanoo' dua'aru'. <sup>26</sup> Teninoo' Ju'deeaing-koonani, Ponisia-nameensi'ke pon-to'aru'nani, Siiria-nameng-koo. Aa'na' baitoaritaa' Jiisuu' kevi'uu'nani baurang-eta ma'naang bata'koo. <sup>27</sup> Ee'noko Jiisuu'ke teni aa'puu', "A, makotua! Toire' deeko' ookara piavoroaina' bau'numpo', ee'noko tee taamang biikaang mosi'nanka-anko dua'koo tampa' deea'." <sup>28</sup> Ee'noko tenie Jiisuu' bari'uma aa'puu', "Ee', Ovoring, masika', nka tee toire'ke dua'antavaako mosi'nankai mukunanka naiaamaung tarepa-koo boonga." <sup>29</sup> Ee'noko Jiisuu'ke teni aa'puu', "Makosi, osi tororaravaing. Tampa' bari'meing. Ma'naang tenkenuing daurang-eta." <sup>30</sup> Ee'noko teni toroarara baurang batanang-koo bempari otoko oovuu' ma'naang tenkenuio' teni-eta.

**Jiisuu'ke Naning Kipau ee'noko Amako Taare-antavuu'na'**

<sup>31</sup> Jiisuu' Taia'nameng-eta tenkenura osi kivorai nanu-ittaa' Saidoni'namenge tankinui Kaaleli'narukoo basiaru'. <sup>32</sup> Ee'noko narionge naning kipau ee'noko

tampa' karoaruko'nung tavo'au'. Ee'noko Jiisuu' tana'au' bireng tee-koo patu'uko taarevoa'naang. <sup>33</sup> Ee'noko Jiisuu'ke tee naning bokuvura karika'keta taapo' be'antavuu' bee'ka oto'koo. Ee'noko bireng punkang-koo kuung kompuu', ee'noko napo' tutu-paa'arara meneng-koo kompuu'. <sup>34</sup> Ee'noko paning-aape ankamparara kooreerevoitaa' aa'puu', "Epata." Aung kara kuunoo': "Daate'daravai." <sup>35</sup> Ee'noko bakaang punkang tenang daate'aru' ee'noko meneng simpiri'arara tampa' karou'. <sup>36</sup> Ee'noko Jiisuu'ke potevuru' naning nau-koo. Ee'noko nau-koo doong kante potevuriko teinge napo' aa'na' sira'paako'. <sup>37</sup> Ee'noko nantoonge taaravaama aa'na' ta'ninaako' aa'paama, "Aung bakei ookara kapoo'ke mee'du'pinarai, aa'no-maung: Kipaunuka taarakiakoo', ee'noko amakonuka kareaakoo'."

**Jiisuu'ke Nantoong Karenaumo Kokorei' Divu' Bau'uru'na'**

(Mat 15:32-39)

**8** Pankaroompuaruko nantoong karika' porora naro'ariru'. Ee'noko taamang naiaapeu'ning otoaruo' Jiisuu'ke bakaning barevare-nupoong tee-anko bokuvurira aa'puru', <sup>2</sup> "Nkaang domang aa'na' pi-aamoing aing-koo nantoong-koo. Aing teing ni'ninka beenang doong o'norining ee'noko kapoo' nai-koong oto'evoroa'. <sup>3</sup> Ee'noko ninge peeravoroi otoroko osi-aape botoaranko dei taunga peerai tauripeu', ai' nari-ong aing-koo isipo'nupoong." <sup>4</sup> Ee'noko bakaning barevare-nupoonge Jiisuu' tana'aama aa'pau', "Tekaa anke mee'bora' sirakamaa'koo taamang naninge are'ka daa'ura aing bau'uria'naang?" <sup>5</sup> Ee'noko Jiisuu'ke nia'urima aa'puru', "Tekaa arekee'ning berete' oto'deruring?" Ee'noko aa'pau', "Keura-taa."  
<sup>6</sup> Ee'noko Jiisuu'ke botovuru' teing nantoong karinga kansii'koo ba'namparia'naang. Ee'noko keura-taa berete' nkavura tampa' tampura pisi'uma bakaning barevare-nupoong avuriko teinge nantoong miatara avaariko'. <sup>7</sup> Ee'noko napo' nii'ning tavi'ning oki'nareka' oto'evuru'ning-koo biraankevura bakaning botovuru' teing napo' tankampaaria'naang. <sup>8</sup> Ee'noko ookara taamanaara poovorou'. Ee'noko Jiisuu' bakaning barevare-nupoonge peku' keveku'ka-taa kakita'ke maanto'au'. <sup>9</sup> Naro'ka donkaang deerunoo' karenaumo kokorei' pina' teke otorou'. Ee'noko Jiisuu'ke teing nantoong tenkeng-koo botovuru'. <sup>10</sup> Ee'noko namu'ke tee bakaasi-nareng-koo bakaning barevare-nupoong ninka aa'eariru', ee'noko Dalamanuta-nameng-aape berou'.

**Boto Keperuu'navitue Jiisuu' Tana'au'na' Taa'ni'anta Nauvurii'naang**

(Mat 16:1-4)

<sup>11</sup> Nii'ning Boto Keperuu'navitu Jiisuu'anko porou' bakaang kara paara-koo. Tutumpaama teinge tana'au' taa'ni'anta nkoevurii'naang Kumponing botovuu'na'koo. <sup>12</sup> Jiisuu'ke ee'maraanura aa'puru', "Aming-koo dii' avarang taa'ni'anta-koo tana'kirimang?"

Masikung naurampimang, Kumponing dii' enanavarang taa'ni'anta nau-koo kasivua' otong."<sup>13</sup> Tee'purira sipuru' teka, ee'noko bakaasi-koo aa'ear-ara nuaru' pako' tutumpuu' amenka'koo bee'naang.

**Jiisuu'ke Bakaning Koono-antavuru'na' Nii'ning Bi-ikaang Tositosi-koo**  
(Mat 16:5-12)

<sup>14</sup> Jiisuu' bakaning barevare-nupoong ampa'orou' taamang nka-koo. Ee'noko nau masiku berete' oto'evuru' teke bakaasi-koo. <sup>15</sup> Ee'noko Jiisuu'ke siingoravurima aa'puru', "Bakei tarerariai tee-koo iisi Boto Kepe-ruu'navitue ee'noko Eerotinupoonge biikaang taamang ninka bere'amaang-koo." <sup>16</sup> Ee'noko tee'puio' tasi'paavarura kareaama aa'peeko', "Aunge pa nii' taamang oto'memuriaruio' tee' minkuvuing." <sup>17</sup> Ee'noko Jiisuu'ke minkuaako noru'ura aa'puru', "Aming-koo dii'ka minkurarimang taamang nkaveriarura? Koonto' ee mme' dii'ke tasi'meria' ning? Ai' diikaang domang kapanukai? <sup>18</sup> Duta otori, teka ee ookiria'? Pukung otori, teka ee taaraveria'? Aming-koo noru'eria'? <sup>19</sup> Tenang berete' pa'noko'nuri ning nantoong pa'noko' kokorei' bau'aransio' arekee'ning peku' kakita'ke oosierira maanto'eru'?" Ee'noko aa'pau', "Kivora-ita keveku'ka." <sup>20</sup> Jiisuu'ke napo' aa'puru', "Ee'noko tenang ~keura-taa berete' nantoong karenaumo kokorei'ke naiaio' arekee'ning peku' kakita'ke maanto'erieeng?" Ee'noko aa'pau', "Keveku'ka-taa." <sup>21</sup> Ee'noko aa'puru', "Tek a ee dii'ke mme' tasi'peria'?"

**Jiisuu'ke Bakaning Barevare-nupoong Nau-antavuru'na'**

(8:22-10:52)

**Jiisuu'ke Naning Duta Kaputu' Bantang-antavuu'na'**

<sup>22</sup> Jiisuu' bakaning ninka Besaida duparirio' narionge naning duta kaputu' tavo'au' tee-anko bireng kom-pua'naang eentavarima. <sup>23</sup> Ee'noko Jiisuu'ke naning kaputu' bireng-koo kompura osi-eta dama'du tenkeng-antavuu'. Ee'noko duta-koo tutupaa'ura bakaang bireng tee-koo pante'uu', ee'noko aa'puu', "Kapoo' ee oovemaang?" <sup>24</sup> Ee'noko duta bantora aa'puu', "Nantoong aa' koi'pina' nanaako ooaramang." <sup>25</sup> Ee'noko Jiisuu'ke napo' bireng patu'uu' duta-koo, ee'noko tenang duta bantora naapu narung ookuma tam-paru'kuu'. Ookara kapoo' siraka'paru'. <sup>26</sup> Ee'noko Jiisuu'ke koonto' bakanoo'aape botovuma aa'puu', "Amono-nupoong-koo bera naueriauka!"

**Piitai Jiisuu' Tee Pako'pari'nii' Tasi'pura Sira'puu'na'**  
(Mat 16:13-20; Luk 9:18-21)

<sup>27</sup> Nii'na'mung Jiisuu' bakaning barevare-nupoong ninka Sisaria' Pilipai navuntu'aape taunge nanaama bakaning barevare-nupoong tana'urima aa'puru',

"Nantoonge ning baa tammaamaung?" <sup>28</sup> Ee'noko teinge aa'pau', "Nii'ninge Jooni Minkinara tantaa-maung. Ee'noko narionge Eliasi poaing-koong tantaa-maunge. Ee'noko nii'ninge urikupoong nakaro-nupoong-koo narung, boo'keta daa'aru'nung." <sup>29</sup> Ee'noko napo' Jiisuu'ke teing tana'urima aa'puru', "Ee'noko dii'ke napo' ning baa tammerimaung?" Ee'noko Piitai bari'uma aa'puu', "Da' aa' tee Kumponing teroita Pako'pari'nii' nantoong domam-perira tareveriainoo'koo." <sup>30</sup> Ee'noko Jiisuu'ke potevurima aa'puru', "Naning-koo sira'meriauka'."

**Piitai Jiisuu' Booaing Tamparako Orokovuu'na'**  
(Mat 16:21-23; Luk 9:22)

<sup>31</sup> Ee'noko Jiisuu'ke bakaning nau tutumpuru' boo'paravaina', aa'purima, "ning Tee Naning-naumpo' Paning-etaing teing amutemurii' arikananka tora'pampaing, ee'noko aing aa'ninge tompimaavaing: pankenukai, piristi'koong ovontunukai ee'noko boto naunukai, ee'noko tee dupisi'maavaing. Teketa beenang doong tankinuko napo' domamarara daa'maravaing." <sup>32</sup> Siraka'pui tampa' nauvurio' Piitai taapo' be'antavura potevuu' temurii' kara minkuvua-roo'naang. <sup>33</sup> Ee'noko Jiisuu' bakaning barevare-nupoong-aape bere'arama Piita turampuma aa'puu', "Tokoi beai da' Sietani', ning-ankoita. Dake tee Kumponing bakaang noru' noru'ea', nantoong biikaang noru' narung noru'ei otong."

**Karistoo' Siong-koo Amariaina'**  
(Mat 16:24-28; Luk 9:23-27)

<sup>34</sup> Ee'noko Jiisuu'ke nantoong miatara bakaning barevare-nupoong ninka naro' bokuvurira aa'puru', "Naning ning siomui poo'naang piavora deeko', baka bakaang pia iro' doonko tompimparavaing ee'noko bakaang aa'barata' poru'ui ning siomumaatoaing. <sup>35</sup> Ee'koo, baa tee naning bakaang domaang ning-koo orokovuma baka tare-koo piavoainng tee paa'aravaing, teka baa tee naning ning-koo ee'noko nkaang doore-nang tampara-koo bakaang domaang aroo'ari dua'uaing tee domamparavaing. <sup>36</sup> Naning kapoo' ookara kansi'kooning barampui okovura bakaang domaang darove'uko teinge arekee' pakuaapeu'? <sup>37</sup> Ee'noko naning aming avupeu' tee bakaang domaang paa'aru'nung napo' moo'koo? <sup>38</sup> Aing avarang oreng otorong nampeesi orarinuka, ee'noko naning teing-koo meu'ke otoi nkaang miring sira'koo ee'noko nkaang kara-koo maia'omaung dama'ke ning Tee Naning-naumpo' Paning-etaing tee-koo maia'moainng mora teing ninka koosinung~ meekupoong ee'noko Mma' bakaang meenasi ninka."

**9** Jiisuu'ke napo' karoma aa'puru', "Tek a ning e masikung naurampimang, Dii'koo nariong anke otorining dooria' ooverio' Kumponing bakaang Muu' basiaravaing tee ninka purinto'."

† Miru'noo' ee': Jiisuu' bakaning teing Jiisuu'pina' Kumponing bakaang pia narung nko-koo dai'ariri otoromaing baike kune'koo taura'pari.



**Jiisuu' Bakaang Mono Paariaru'na'**

(Mat 17:1-13; Luk 9:28-36)

<sup>2</sup> Ee'noko ~na'mung-taa doong tankinuio' Jiisuu'ke Pi-ita dovang Jeemisi ee'noko Jooni bokuvuritaa' bii'ka iu' isikara-koo deto koinau', ee'noko teke otoroi ooaio' Jiisuu'nung mono nii'na' paariaru'. <sup>3</sup> Bakaang mononopa' aa'na' kakaravora siisiou'. Naning otoa' duu'pura tee' oro'antavupeu'nung. <sup>4</sup> Ee'noko Jiisuu' bakaninge ooau' Eliasi ee'noko Moosesi nari' kareaako Jiisuu' ninka. <sup>5</sup> Ee'noko Piitai karoma Jiisuu' aa'puu', "Nau-anta Pankaing ee, bakei tampa' nii' anke o'norimaang. Aia', nii'ke beevaari bare kaniampiai: nava' da' dakanava', nava' Moosesi bakanava', ee'noko nava' Eliasi bakanava'." <sup>6</sup> Aing teing avoreaara minkuvupeu'ning otoaruko aung minkuvuu'nung. <sup>7</sup> Ee'noko teka kamo'ke daka'puru', ee'noko teketa auronge karoma aa'puu', "Aung tee nnuring ninge piaava-maung. Taaraveriaing tee."

<sup>8</sup> Ee'noko da'deng avitoitoi ookaama naning ooaava', Jiisuu' narung teing ninka otoko ooau'. <sup>9</sup> Ee'noko iu'keta depeto siarima Jiisuu'ke teing potevuru' kapoo' ooau'ning nantoong nauaariaroo'naang bera Tee Naning-naumpo' Paning-etaing booainoo'keta daa'aravainoo' basi. <sup>10</sup> Ee'noko teinge Jiisuu' bakaang kara meumpau', ee'noko bii'ka kareaama aa'paako', "Aunge aming kapoo' boo'keta napo' daa'aravaing tam-pumang?" <sup>11</sup> Ee'noko Jiisuu' tana'aama aa'pau', "Aming-koo boto naunukai aa'paamaung Eliasi dama' tee tee-koo Kumponing Pako'pari'nii'koo uro'ke poaing?" <sup>12</sup> Ee'noko Jiisuu'ke bari'urima aa'puru', "Masikung, Daari Meekunge aa'pui otong, 'Eliasi tutung poaing ookara kapoo' maamu-antavua'naang.' Ee'noko Daari Meekunge napo' ning-koo aa'pui otong, 'Tee Naning-naumpo' Paning-etaing aa'na' sisikeera kompuaing poore'aako.'

(Malakai 4:5; Aisaia' 53:1-8)

<sup>13</sup> Teka iro' ninge naurampiai. Eliasi tee masika' tutuna' pou'nung, ee'noko nantoonge tee-koo oraka' pia-vorou'na' nari' nkoau' tee, Daari Meekunge minkuvui otoi'na'."

**Jiisuu'ke Naning Nemaka-koo Ma'naang Bata'uu'na'**

(Mat 17:14-21; Luk 9:37-43)

<sup>14</sup> Ee'noko Jiisuu' ninka iu'keta siarima nii'ning barevare-nupoong meu'paaru', ee'noko napo' nantoong karika' kune'aaru', nariong boto naunuka Jiisuu' bakaning barevare-nupoong ninka mantekaveeko. <sup>15</sup> Ee'noko namu'ke Jiisuu' ooaara bakei ookara ta'nimparira kua'pariru' tee-anko onkeonke'aava'naang. <sup>16</sup> Ee'noko Jiisuu'ke bakaning tana'urima aa'puu', "Dii' aming-koo mantekareerimang?" <sup>17</sup> Ee'noko naninge karika'koo meu'keta bari'uma aa'puu', "Nau-anta ee, ninge nnuring da'anko tavo'ama moing ma'naang orara otoi kara kereng-antavuu'nung. <sup>18</sup> Teie ma'naange tavuma kansi'koo kosi'uko ka'buairavara-ma kakirinkuarakoo', ee'noko bakaang mono ta'naa'okoo'. Ninge dakaning barevare-nupoong

tana'aransio' tee ma'naang bata'koo makosiaavaru-ing." <sup>19</sup> Ee'noko tenang Jiisuu'ke aa'puru', "Nko dii' masika'anta otoriainge, koontariaing, are' basinaroonge dii' ninka nari' o'norimaatoainge dooroontampiri? Po'antaveai tee oki'nara ning-anko." <sup>20</sup> Ee'noko tenang po'antavau' Jiisuu'anko. Ee'noko ma'naange Jiisuu' oovura namu'ke tee nemaka kanu'antavuiu' dankuranku'arama kansi'koo dua'arara korimparu' ka'buua'ke sisi'arama. <sup>21</sup> Ee'noko Jiisuu'ke bauma tana'uma aa'puu', "Aung arekee'ning doonge tee' nkoaramaung?" Ee'noko baumai bari'uma aa'puu', "Oki'na'noo'keta. <sup>22</sup> Mmau' doonge ntong tovang-koo nta' dua'antavukoo' dupisi'koo kevi'uma. Da' makosi deeko' piaamerira pakumeriai."

<sup>23</sup> Ee'noko Jiisuu'ke aa'puu', "Arekee'koo ning makosi deeko' tammemang, ai' teie da' makosi deeko'. Ookara kapoo' arika'parava' naning-koo Kumponing masika'antavumaung-koo." <sup>24</sup> Ee'noko tooto'ke bauma namu'ke bokuma aa'puu', "Masika'antavansing. Makotumparuko deeko' pakumeaing." <sup>25</sup> Ee'noko Jiisuu'ke nantoong karika' porora nara'ariko oovurira tee ma'naang orara aka'puma aa'puu', "Da' kipau ee'noko amako ma'naang botoramaang naning-eta bakorarara tenkeng-koo ee'noko napo' tee-koo kuung beauka'."

<sup>26</sup> Ee'noko tenang ma'naang uiarama naning kanu'antavura sipuu'. Ee'noko nemaka bakei davoru-pina' oro'pario' nantoonge aa'pau', "Aung aa' boo'paring."

<sup>27</sup> Ee'noko Jiisuu'ke aung naning nemaka bireng-koo kompura deto donkong-antavuiu' donkonuu'.

<sup>28</sup> Ee'noko Jiisuu' teketa pava-koo tumpario' bakaninge barevare-nupoong makenge tana'aama aa'pau', "Arekee'koo nii'ke ma'naang bata'koo makotumpia'?" <sup>29</sup> Ee'noko Jiisuu'ke bari'urima aa'puru', "Unkumuari kungsi narunge deeko' temurii' bata'koo makosi."

**Jiisuu'ke Napo' Bakaang Boo' Nauvuru'na'**

(Mat 17:22-23; Luk 9:43-45)

<sup>30</sup> Ee'noko teketa tenkenaara Kaaleli'namenge berou' makemparitaa', bii'ka bire'ariri bakaning barevare-nupoong nau-anta-koo. <sup>31</sup> Ee'noko aa'puru', "Ning Tee Naning-naumpo' Paning-etaing tee nkaning-koo navu-mainuka-koo narunge tooka kompiu simuu'naang nantoong oreng biikaang bireng-koo. Teinge dupisi'maavaing, teka beenang doong tankinuko napo' domamarara daa'maravaing." <sup>32</sup> Ee'noko teinge nauvurio' tasi'paava', ee'noko napo' amaiaa'orou' tana'koo.

**Baata Teing Pankeng?**

(Mat 18:1-5; Luk 9:46-48)

<sup>33</sup> Ee'noko Kapaneume' tavo'arira Jiisuu'ke bakaning tana'urima aa'puru', "Dii' taunge aming mantekaver-ing?" <sup>34</sup> Ee'noko kareaava', ai' taunge nanaama mantekaveema aa'pau', "Nii'koo baa pankaing?" <sup>35</sup> Ee'noko Jiisuu' ba'nanurainange bakaning nanai'keta ke-naankara bokuvurira aa'puru', "Naning paninung muu'koo uro'nara deemparaa'naang piavora deeko',

baka enang ookara-koo dama'du siparara biikaang pakupakunung otoai." <sup>36</sup> Ee'noko Jiisuu'ke tooto' kom-pura uro'kanoo' teing-koo donkong-antavuu'. Ee'noko tanka'ke boko'ura aa'puru' teing, <sup>37</sup> "Baa tee naning ning nkaang miring-koo narung tooto' oki'nara aung-pina' oro' onkeonke'uainge tee ning onkeonke'muaing, ee'noko ning narung deea', naning ning botomuing onkeonke'uainge."

**Nantoong Turamaaria' Otoromaing Teing Nii' Paku-paku-nupoong**  
(Luk 9:49-50)

<sup>38</sup> Joonie aa'puu', "Nau-anta, nii'ke naning ooampiring dakaang miring-koo ma'nari bata'uriko. Ee'noko ooampira poteampiri tee nii' ninka nari' da' siontu-aung-koo." <sup>39</sup> Ee'noko Jiisuu'ke bari'uma aa'puu', "Poteveriauka' tee. Naning nkaang miring-koo kuunge kapoo' purinto' nkovura namu'ke oraka' minkumuarupeu'. <sup>40</sup> Baa naning nii' too'demuriaung tee pakumuri-maung-pina' noru'ampiaing. <sup>41</sup> Ee'noko noru'eriai naning oovununge dii' ntong aruriko deeko' Karistoo' bakaning tantaririo' teie bakaang moo' divu'uau-ka'nunge."

**Orara Aarumo Nii'ankoita Toto'pampira Tampa' O'norina'**  
(Mat 18:6-9; Luk 17:1-2)

<sup>42</sup> Baa tee naning aing toire' ning masika'antamaa-maing-koo narung dua'antavuaing tee-koo orara aarumo-koo deeko' tee tee piaaru'. Tee' oro' naning baukoi paravuaruu'nung dei tampa', ai' Kumponing aa'na' ki-imatavuaing tee. <sup>43</sup> Ee'noko dakaang tanka'ke dua'antaruko napu'daravai. Tampa' masika' tanka'nanaang ninka domaang otoi-oto'noo' beaing, ee'noko tanka' kenaanta ninka tampa' deea' mosianung-aape nanu'koo. <sup>44</sup> Tee' aa'nomanoo' kiki'nanka booroa'noo'ke ee'noko nta' siri'arava'noo'ke. <sup>45</sup> Ee'noko dakaang kau'ke dua'antaruko napu'daravai. Tampa' masika' kau'nanau' ninka domaang otoi-oto'noo' beaing, ee'noko kau' kenau'ka ninka tampa' deea' mosianung-aape nanu'koo. <sup>46</sup> Te' aa'nomanoo' kiki'nanka booroa'noo'ke ee'noko nta' siri'arava'noo'ke. <sup>47</sup> Ee'noko duta narutai tapiri'antaruko pasi'darara dua'eai. Aa'na' tampara duta naruta ninka Kumponing bakaang muu'koo tung-koo ee'noko duta kerutara ninka tampa' deea' mosianung-aape dua'koo. <sup>48</sup> Te' aa'nomanoo' kiki'nanka booroa'noo'ke ee'noko nta' siri'arava'noo'ke."

<sup>49</sup> Nii' ookara teing meeka'mariri Kumponing-koo boontunang deemarii'naang nta'ke miang-pina' taimuriko, Daari Meekunge minkuvui otoi'na'. <sup>†50</sup> Miang tee kapoo' tampara, teka miang-koo tarii'noo' paa'arako arekee' napo' naning tarii'antavupeu'? Makotua! Tee'koo, dau basina', ning-koo aroo'dariri

† Moosesie temu' botovuru'nung miang sipaava'naang biikaang boontunang-koo, mooa-aapenung deeng-antavai. Ooveaing Boontu 2:13; Kena 50:5; 2 Noru'anta 13:5.

ima'dariaing, ee'noko meekupoong masikeng otori pinka'darima nari' mooaririri otoriai."

**Niania' Naning Ba'aang Bata'koong Nia'aako Jiisuu'ke Maku'uru'na'**  
(Mat 19:1-12; Luk 16:18)

**10** Jiisuu'ke temono sipura Judia'nameng-koo beu' Joo'dani-nari pako'uitaa'. Ee'noko nantoong kari-ka' napo' tee-anko naro'aririo' kara nauvuru' teroita nauvuriko'na'. <sup>2</sup> Ee'noko nii'ning Boto Keperuu'navitu nari' pororai'nange aavavaama aa'pau', "Naumeriai. Niikaang boto-koo ee naning ba'aang bata'koo taurapui otong?" <sup>3</sup> Ee'noko aa'puru', "Teka aremurii' boto Moosesie aruru'?" <sup>4</sup> Ee'noko bari'aama aa'pau', "Moosesie taura' avu'nisi naning ba'aang si'koo piavora deeko' karavoto~ daarivuaing nampeesi toto'puing tasi'anta-koo, ee'noko ba'aang bata'uai." <sup>5</sup> Ee'noko Jiisuu'ke aa'puru', "Moosesie aung boto daarivuu'nung dii' dii'ka domang iveka'dariko. <sup>6</sup> Teka Kumponing ookara kapoo' pupu'uu'ng-eta minkuvuma aa'pui otong Daari Meekung-koo, 'Kumponing donkaani ee'noko manikuma nari' nkovuretu'. <sup>7</sup> Ee'noko 'Tee'koo donkaanie baumararing sipureta ba'aang ninka pinka'areaing, ee'noko tenaanka narung mono deempareaing."

(Pupu' 1:24; 2:24)

<sup>8</sup> Tee'puu'noo'koo tenaanka kenaanka deea'. <sup>9</sup> Tee'koo kapoo' Kumponing be'nu'antavuu'nung nara'ka naning tankaampuauka' nung."

<sup>10</sup> Ee'noko teketa pava-koo toroarira bakaning barevare-nupoong tampa' tasi'koo tana'au'. <sup>11</sup> Ee'noko Jiisuu'ke aa'puru', "Tenang naning ba'aang bata'uma oovunani nampupeu' ee'noko nampeesi ba'aang ninka teka orarivuing. <sup>12</sup> Ee'noko ba'aange bata'uma ba'ung oovunara nampupeu' ee'noko nampeesi tee teka orarivuing."

**Jiisuu'ke Toire' Biraankevuru'na'**  
(Mat 19:13-15; Luk 18:15-17)

<sup>13</sup> Ee'noko nantoong toire' oki'nareka' Jiisuu'anko po'antavaariko' teie kompurira biraankevurii'naang. Ee'noko teinge bakaning barevare-nupoong poteaaruu' tee-anko tavo'ariko. <sup>14</sup> Ee'noko Jiisuu'ke oovurira iiraevuru' bakaning barevare-nupoong aa'purima, "Taura'perereriai toire' ning-anko po'koo, potevereria'. Kumponing nantoong toire'pina' bere'arimaing bakaang muu'kooning. <sup>15</sup> Masika' naurampimang ninge dii', baa tee naning Kumponing bakaang muu' tooto'ke bauta' nkavui aroo'aramana' kompuarura tee bakei tumparavauka'nung te' Kumponing bakaang muu'koo." <sup>16</sup> Ee'noko minku bakevura toire' naruna' boko'urima tanka' pante'uru' Kumponing biraanke-koo."

**Narung Nemaka Barevarenku Mmau' Oto'evuko'nung**  
(Mat 19:16-30; Luk 18:18-30)

<sup>17</sup> Tenang Jiisuu' nii'nameng-aape nanu' tutumparako naning narung kua'pari pora miinge keemparu' uro'kanoo' ee'noko aa'puu', "Nau-anta tampara, ninge aming kapoo' nkoamira domaang oparavauka'nung kompampaing?" <sup>18</sup> Ee'noko Jiisuu'ke maku'uma aa'puu' tee, "Arekee'koo dake ning tampara tammemang? Nii'nara naning tampara otoa', Kumponing narung tampara. <sup>19</sup> Dake Moosesi bakaang boto ee' oro' noru'ei otong:

'Naning dupisi'eauka'.

Nampeesi orarieauka'.

bakiaa' nkoveauka'.

Daang-koo tuutunampeauka'.

Kapoo' kokonoveauka'.

Daumararing deto noru'eresi pakuereaing."

(Toro 20:12-17)

<sup>20</sup> Ee'noko teie aa'puu', "Nau-anta, ninge oki'na'noo'keta aing ookara boto tanatavantu'ning." <sup>21</sup> Ee'noko Jiisuu'ke oovui piaavura aa'puu' tee, "Da' narung kapoo'koo makosia'. Bera ookara kapoo'nanka dakaning baavevera mooni' nkavera ata'oi'nuka averiai. Tee' nkovera paning-koong kavonanka oto'deruaing. Ee'noko teketa ning siomei poai." <sup>22</sup> Ee'noko aung kara taaravura aa'na' muri'ou', ee'noko domang manki'oitaa' tenkenuu', ai' aung naning tee maneenara.

<sup>23</sup> Ee'noko Jiisuu'ke oo'oovurima bakaning barevare-nupoong aa'puru', "Bakei pore' masikung manee-nupoong Kumponing bakaang muu'koo tung-koo."

<sup>24</sup> Ee'noko bakaning barevare-nupoong aa'na' ta'ninau' tee'puio'. Ee'noko Jiisuu'ke napo' kara bari'evurima aa'puru', "Ee toire', bakei pore' masikung Kumponing bakaang muu'ke tung-koo teing maneariri otoromanoo'koo noru' sipaamaing. <sup>25</sup> Kaameli'navoro' bamaru'koong busi-koo kuunge tung-koo makotua', ee'noko naning maneenara-koo bakei aa'na' koonto' makotua' Kumponing bakaang muu'koo tung-koo."

<sup>26</sup> Ee'noko teing aa'na' ta'ninaara bii'ka kareaama aa'pau', "Nka enang baa domaang moo'aravaing?"

<sup>27</sup> Ee'noko Jiisuu'ke teing oovurira aa'puru', "Nantoong bii'ka domaang moo'koo makosi deeaing, Kumponing deeko' makosi, ai' teie ookara kapoo' nko-koo makosie."

<sup>28</sup> Ee'noko Piitai karoma aa'puu', "Aung ee, teka nii' teing ookara kapoo' sipampira siontampimaing."

<sup>29</sup> Ee'noko Jiisuu'ke aa'puu', "Masikung naurampimang, naning aing sipuu'nung: pava, baumaraang, baurukaa', bakaang kansi' sipura ning-koo ee'noko nkaang kara tampara bereng-anta-koo, e'mung-eta dau basinoo' maku' nkavuaing daaku'pina' anke kansi'koo otoitaa'; <sup>30</sup> Aa'noko: pava, baumaraang, baurukaa', kansi'. Ee'noko nantoonge turampaavai ee'noko dama'naroong-koo napo' domaang oparavaung okovuaing. <sup>31</sup> Teka mmau' nantoong ureai otoromaing dama'ke dama'duariaing, ee'noko dama'duariri otoromaing ureaavai."

**Beemu'pina' Jiisuu'ke Booaing-koo Minkunaa Nauvuru'na'**

(Mat 20:17-19; Luk 18:31-34)

<sup>32</sup> Ee'noko Jiisuu' uroitaa' Jerusalema'aape daanto taunge nanau', ee'noko ta'nimpariru' teing siompaako'ning avoreaama. Ee'noko bakaning nanai'keta kenaanka naru'urira minkunaavuru' dama'ke nkoaravaina' <sup>33</sup> Aa'puru', "Ee aing, nii' teing Jerusalema'navuntu'koo deto merimang. Ee'noko teka ee'noo'ka naning tooka kompui ning Tee Naning-naumpo' Paning-etaing taura'muu'naang aa'ning-koo Piristi'nuka-koo ovontung ee'noko boto naunuka; ee'noko teinge tee tuutunamaara ning boo'koo makosi tampaarai'nange sing-antamaavaing teing-koo Ju'deeaing-koo. <sup>34</sup> Ee'noko teinge Ju'deeaing siisimaavai tutupaa'maama, ee'noko mura'maara dupisi'maavaing. Teketa beenang doong tankinuko napo' daa'maraavaing."

**Entaeenta Jeemisi Namainta Jooni Beekaang**

(Mat 20:20-28)

<sup>35</sup> Jeemisi namainta Jooni, Siebedi baurinketa, Jiisuu'anko poretu' aa'purema, "Nau-anta, kapoo' nkomemuree'naang piamoreming." <sup>36</sup> Ee'noko Jiisuu'ke aa'puretu', "Aming nkorerompee'naang piaroreming?" <sup>37</sup> Ee'noko temaintai maku'urema aa'puretu', "Taura'mereaing nee' da' ninka ba'ngangkoo, tenang dakaang meenasie kororuio' ovorintari ba'nantaravainang, narung tampavine-aape ee'noko narung mare'aanavine-aape." <sup>38</sup> Ee'noko Jiisuu'ke temainta aa'puretu', "Dee'ke tee kapoo' eentameresing noru'erea'. Dee'ke ee' teru' ntonaru' oraka' dee'naru' ning naikampainaru' naikirepeu'? Ee'noko napo' sisikeera ninka meeka'antamaravaina' ee' meeka'antararepeu'?" <sup>39</sup> Ee'noko temaintai maku'urema aa'puretu', "Ee', nee' makosira." Ee'noko Jiisuu'ke aa'puretu', "Ee', masika', kaapu-koo ninge naikampaing-koo naikireaing, ee'noko meeka'antamaravaina' meeka'antarareaing. <sup>40</sup> Ee'noko ning taura' o'noa' miru'koo naning ning-koo tampavine-koo ee'noko mare'aanavine-aape ba'ngang-anta-koo. Aung tee kapoo' Kumponing bakaang. Teie bampuu'na' ba'nampareaing."

<sup>41</sup> Ee'noko teinge napo' nanai'ke tee' taaravaara Jeemisi namainta Jooni iikoo'aaretu'. <sup>42</sup> Ee'noko Jiisuu'ke ookara naru' bokuvurira aa'puru', "Dii'ke ee' noru'eri otong teing nantoong Ju'deeaing-kooninge biikaning ovontung miru'aarimaing iri'oromana' nantoong-koo. Ee'noko biikaning pankenankai biikaang iri'ke nantoong etuaarikoo'. <sup>43</sup> Teka dii'koo tee' deea'. Naning dii'koong bore' oto'koo piavora diikaang pakupakunung otoai. <sup>44</sup> Ee'noko naning dii'koo dau basi deeng-koo piavora botovotona' otoai ookara-koo. <sup>45</sup> Ning Tee Naning-naumpo' Paning-etaing tee'ke, kansi'koo overing-pina' oto'koo moa', teka pakupakunung deemaraa'naang mou'nung, ee'noko nkaang do-

maang dua'koo teing-koo mmou' boo'keta sim-piri'arii'naang."

**Jiisuu'ke Naning Duta Kaputu' Miring Batimiasi Tam-paru'antavuu'na'**

(Mat 20:29-34; Luk 18:35-43)

<sup>46</sup> Ee'noko Jerikoo'namono-koo tavo'ariru'. Te' otorokotaa' napo' tenkenau' Jiisuu' ee'noko bakaning barevare-nupoong. Ee'noko napo' nantoong karika' nari'. Ee'noko naning duta kaputu' taunge ba'nampari otoi nantoong mooni'koo eentavuriko'. Aung naning miring Batimiasi, Timiasi bauring. <sup>47</sup> Ee'noko teie taaravura Jiisuu' Nasareti'nung tankinuko boku tutumpuu' aa'puma, "Jiisuu', Deevita' bakanaving-koong, pi-aameai ning." <sup>48</sup> Ee'noko nantoong karika'ke poteaama dooroomparaa'naang botoau'. Ee'noko tee'paako bakei aa'na' bokuma aa'puu', "Deevita' bakanaving-koong, piaameai ning." <sup>49</sup> Ee'noko Jiisuu'ke nasinura aa'puu', "Bokueriai." Ee'noko bokuau' tee kaputu', aa'paama, "Doturari daa'daravai. Bokurumaang." <sup>50</sup> Ee'noko bakaang mononopa' dua'ura namu'ke daa'arara Jiisuu'anko beu'. <sup>51</sup> Jiisuu'ke aa'puu', "Da' are-kee' nkorama'naang piaroi?" Ee'noko naning kaputu'ke aa'puu', "Nau-anta Pankaing ee, ning duta bantang-antameaing." <sup>52</sup> Ee'noko Jiisuu'ke aa'puu', "Naniaing. Dakaang baitoi tamparu'kiing." Ee'noko namu'ke bantora tee Jiisuu' siompuu' taunge nanuko.

**Jiisuu' Sisikeera Tora'antavai Dupisi'aako Napo' Domamparu'na'**

(11:1-16:20)

**Jiisuu' Daurarong~ Deemparako Jerusalema'nupoonge Onkeonke'au'na'**

(Kena 118:25-27; Mat 21:1-11; Luk 19:28-40; Jon 12:12-19)

**11** Ee'noko poroma Jerusalema' due' Olive'po'namii-koo basiariru', osi Bepasi ee'noko Beetani due' masipo'. Ee'noko bakaning barevare-nupoong-koo Jiisuu'ke kenaankara uro'ke botovurema aa'poretu', <sup>2</sup> "Dee' ureresi bereta osi uro'kanoo'ke otoi-namono-koo du'dareai. Ee'noko basirareta doonkii'nu kampionu oovereai bi'ari otoko naning mme' teu-koo ba'namparava'. Dipi'ereta po'antavereai." <sup>3</sup> Ee'noko naning tana'durema aa'dureko, "Aung aming-koo tee nkoveremang? Aa'pereai, 'Ovoring piavoing. Napo' torovuaing namu'ke.'" <sup>4</sup> Ee'noko bereta oovuretu' tee doonkii' kambia taung-koo meu'ke bi'ari otoko pava karanaange; <sup>5</sup> Ee'noko dipi'ureko narionge due' donkonai otoroko'ninge tana'aarema aa'paaretu', "Dee' aming nkoverema doonkii' dipi'eremang?" <sup>6</sup> Ee'noko tenaankai Jiisuu'ke nauvuretu'na' maku'uretu', ee'noko nantoonge tenang taura'paaretu'. <sup>7</sup> Ee'noko tenaankai po'antavuresio' Jiisuu'anko teinge biikaang baarong tevoro'koo dau tani'au'. Ee'noko Jiisuu' tee-koo dau ba'namparu'. <sup>8</sup> Ee'noko nantoong

karika'ke biikaang baaronankai taunge danto tani'au', ee'noko narionge uurung tovang pora'ka napu'aama tani'au'. <sup>9</sup> Ee'noko nantoong Jiisuu'koo uro'ke nanau'ning ee'noko nii'nariong dama'du-eta porou'ninge eura bokiaama aa'paako', "Biraanke! Biraanke-po'nung aung Ovoring bakaang miring-koo pomaang! <sup>10</sup> Biraankenii' tee muu' niuma Deevita'ke-taing napo' donkonge due'umaang! Biraanke otoi otoaing a'dei'ke paning-koo nari!" <sup>11</sup> Ee'noko aarenuu' Jiisuu' tee-koo osi Jerusalema'. Ee'noko teketa pava dootuu'nava pankava-koo kuung tumparara avitoitoi nanuma beero'uu'. Ee'noko muung-aapevui'o' napo' toroaruru' Beetani-aape bakaning nanai'keta ke-naankara ninka.

**Jiisuu'ke Koi' Piiki' Barakosi'uu'na'**

(Mat 21:18-19)

<sup>12</sup> Ee'noko dauna'mung Jiisuu' toroaruru' Beetani'keta peeravoitaa'. <sup>13</sup> Ee'noko koi'navari miring piiki' isi'isipo'keta oovuu' para' narung uumaananu'. Ee'noko sinang-po'navari tampuma beu' tevari-anko. Ee'noko berai'nange sinang oovua', para' narung otoko oovuu', sinang bi'koong bakaang batei deea'. <sup>14</sup> Ee'noko Jiisuu'ke tevari aa'puu', "Naning otoa' dakaang sinang napo' maa'deruaing." Ee'noko bakaning barevare-nupoonge taaravau'.

**Jiisuu'ke Dootuu'nava Pankava-koo Baave Nkonuka Bata'uru'na'**

(Mat 21:12-17; Luk 19:45-48; Jon 2:13-22)

<sup>15</sup> Ee'noko Jerusalema' napo' tavo'arira Jiisuu' parang-koo tumparara pava dootuu'nava pankava-koong-koo, nantoong sipisipi' dovang parekanumpo' baaveveeko'ning bata' tutumpuru'nung. Aa'noko batanananka mooni' aampari'aako'ning biikaning ee'noko napo' ba'nava'nananka kuukuu' baaveaariko'ning biikaning teka piakatu'uru'. <sup>16</sup> Ee'noko potevuru' Pava Dootuu'koo kapoo'nanka nkavai be'koo. <sup>17</sup> Ee'noko napo' nau-antavurima aa'puru', "Aming-koo noru'eria' otong Kumponing bakaang kara Daari Meekung-koo aa'pumana' 'Nkaang pava tee pava kunsinava tampari otoaing, nantoong amutemurii' biikaang.?"

(Aisaia' 56:7)

Teka dii'ke 'bakiaa' nkonuka biikanoo" deeng-antaver-ing."

(Jeremaia 7:11)

<sup>18</sup> Ee'noko teinge piristi'nuka-koo ovontunge ee'noko boto naunuka taaravaara taung besi'au' Jiisuu' tavu'na', nantoong karika' Jiisuu' bakaang kara-koo ta'nimparima bi'ariko avoreaara. <sup>19</sup> Ee'noko muung-aapevui'o' Jiisuu' bakaning ninka tenkenau'

**Koi' Piiki' Mara'ou'nung-koong Tautau**

(Mat 21:20-22)

<sup>20</sup> Ee'noko napo' dauna'mung ora'ka-ita tevunge toroarima tevari piiki'navari ooau' mara'ora boo'pario' untu'keta kaakeng-koo basi. <sup>21</sup> Ee'noko Piitai

nkoaru'na' noru'ura Jiisuu' aa'puu', "Nau-anta Pankaing, ooveai. Tee koi' dake barakosi'eieng mara'oi boo'paring." <sup>22</sup> Jiisuu'ke teing kara maku'urima aa'puru', "Masika' naurampimang ninge, <sup>23</sup> Baa naning baito Kumponing-koo oto'evui dei aunteto iu' aa'pu-peu', 'Daa'darara pirung-koo dua'daravai,' ee'noko bakaang noru' keekoo'arava' minkuvuina' nkoaraa'naang masika'antavuko tee' nkoarapeu'. <sup>24</sup> Tee'koo aa'dampimang, tenang eentarama ee' noru'eriai, 'Kapoo' nkavampiring,' ee'noko tee okoruaing. <sup>25</sup> Ee'noko tenang donkoniri kunsirarima tonta'evurereriai kapoo' orara dii'koo nkoau'nanka. Ee'noko Diuma, paning-koo otomaunge napo' diikaang orara tonta'deruriai. <sup>26</sup> Ee'noko napo' dii'ke nari-ong biikaang orara tonta'eriaruko Diuma paning-koo otomaunge diikaang aarumo orara tonta'koo makotua'."

**Jiisuu' Bakaang Purinto'koo Okora' Nia'au'na'**  
(Mat 21:23-27; Luk 20:1-8)

<sup>27</sup> Ee'noko Jerusalema'aape napo' toroariru' ee'noko Jiisuu' dootuu'nava pankava-koong-koo parang-koo kuunge nanuu'. Ee'noko piristi'koo ovontung, boto naunuka ee'noko nantoong-koo urang-antanuka Jiisuu'anko porou'. <sup>28</sup> Ee'noko tana'aama aa'pau', "Tee aung aremurii' taura' otoko dake aing kapoo'nanka nkovemaatoing? Ee'noko napo' baie taura' aruio' nkovemaatoing?" <sup>29</sup> Ee'noko Jiisuu'ke kara bari'evurima aa'puru', "Enang aa' napo' ninge tana'dampiang ee'noko dii'ke bari'meriko ninge napo' naurampiai tee taura' ning oto'memuko aing kapoo'nanka nkoamaung. <sup>30</sup> Naumeriai, Jooni baie taura'puio' nantoong ntong-koo minkivurima meeka'antavuriko, Kumponing ai' tamung nantoong? Enang bari'meriai." <sup>31</sup> Ee'noko teing bii'ka nia'eema aa'peeko', "Are'pampia'naang? Aa'pampiko deeko', 'Kumponing, teie aa'murii'naang, 'Teka aming-koo dii'ke Jooni masika'antaveriaruko?' <sup>32</sup> Ee'noko aa'pampiko deeko', 'Tamung nantoong-etaing,' nantoong tamaari'neenga, ai' teinge tee ookarai Jooni nakaronara Kumponing-etaing tasi'pai otong." <sup>33</sup> Ee'noko teinge Jiisuu' maku'aama aa'pau', "Nii'ke aa' noru'ampia'." Ee'noko Jiisuu'ke aa'puru', "Nna' ninge napo' dii' naurampiaroo'naang baa tee ning taura' amuu'nung aing kapoo'nanka nko-koo."

**Kara Mirumiru' Teing Nantoong Oreng Mintoong Uaini Tareaako'ning-koong**  
(Mat 21:33-46; Luk 20:9-19)

**12** Jiisuu'ke nii'ning kara mirumiru' nauvurima aa'puru', "Naning narunge mintoong uaininau keempura parange korovui kaavane'uu', ee'noko dinkung nenke'uu' uaini mii'doma tenau-koong. Ee'noko napo' pava tarenava siarua' kanivuu'. Ee'noko napo' nii'ning nantoong tenau tare-antavurira nii'namsi'koo tenkenuu'. <sup>2</sup> Ee'noko tenang batei sinang kavu'koong makotuio' teie narung bakaang botovotona' botovuu' teing-anko uaini tarenuka-anko

nii'ning sinang baarauni-koong~ tenau-koo nkaevua'naang. <sup>3</sup> Ee'noko teinge tare nkonukai tee botovotona' moo'aara bata'au' murasiavaama, tee baarauni avaava'. <sup>4</sup> Ee'noko napo' narung botovotona' botovuu'. Ee'noko teinge bore' bape'aama maimaia'na' nkoau'. <sup>5</sup> Ee'noko tenau-koo ovinge napo' narung botovotona' botovuu'. Ee'noko teinge tee dupisi'au'. Ee'noko napo' mmau' botovotona'nuka tee' nari' nkoaru' nari'ong mura'arima, napo' nari'ong koonto' dupisi'aaru'. <sup>6</sup> Ee'noko teing-koo asi'nara botovupeu'nung biruanisi bauring piaavumaung. Ee'noko asi'namu'koo deeko' tee bauring botovuu' tare-antavuru'ning-anko ee' noru'ura, 'Aung-koo pa nnuring-koo amaiaa'oroo'naang.' <sup>7</sup> Ee'noko teinge tare nkonukai bii'ka kareaama aa'paako', 'Aung tee barenku okovuaing. Aia', dupisi'ampiang tee barenku okomuriana'. <sup>8</sup> Ee'noko teinge tee bauring kompaara teka dupisi'au' tee. Ee'noko uaininau-koo dama'du dua'au'." <sup>9</sup> Ee'noko Jiisuu'ke tana'urima aa'puru', "Enang tenau okonarai arekee' nkovuruaing? Teie aa' tee teing tare nkonuka-anko pora tavurima opuruaing, ee'noko nii'ning oko-antavuruaing. <sup>10</sup> Dii'ke ee tee Daari Meekung-koong kara deeruerima dama' nkoaravaina' tasi'periaung aa'pui otoinoo'ka, 'Tere' ee'nare' kapanare' pava kaninukai poore'aama dua'au'nare' ookutunava-koo e'manianare' tumanare' deempario' tasi'pau' dama'ke. <sup>11</sup> Ovinge tee' ee'na' nko-antavuu' ee'noko bakei ta'nimpaarii' niikaang duta-koo."

(Kena 118:22-23)

<sup>12</sup> Ee'noko teketa mirumiru'ke too'puru'nung tasi'parira boto naunukai ee'noko piristi'koo ovontunge taung besi'au' Jiisuu' dai'aavainavung, teka teing nantoong karika'koo avoreaara teka sipaara tenkenau'.

**Taakisi Moo'koo Jiisuu' Nia'au'na'**  
(Mat 22:15-22; Luk 20:20-26)

<sup>13</sup> Ee'noko botoaaru' teing Boto Keperuu'navitu ee'noko Eeroti' Bakanavitu Jiisuu'anko porora nii'ning tanatana'ke avakareaama tee dua'antana'koo. <sup>14</sup> Ee'noko Jiisuu'anko porora aa'pau', "Nau-anta ee, nii'ke da' noru'dampiri otong naning masikung narung minku. Da' tee kapoo' naning minkurupeu'ning tamung taarai. Ee'noko naning ankang noru'ea'. Kapoo' masikung narung Kumponing nantoong pia-antavurimana' nauerimaung; <sup>15</sup> Enang aung naumeriaing nii'ke Ju'nupoong ee daurarong~ pankaing, Siisa~, Rooma'nung, taakisi avu'koo makosi, ai' makosi deea'?" Ee'noko Jiisuu'ke tokompurira aa'puru', "Aming-koo daua'merimaang ai' ning taavi'merimaang? Teu mooni'nu iro' po'antaveriko ooampai." <sup>16</sup> Ee'noko teinge mooni'nu nau avai' tana'urima Jiisuu'ke aa'puru', "Aung uu'aa' ee'noko aung miring baa bakaang?" Ee'noko aa'pau', "Daurarong Siisa' bakaang." <sup>17</sup> Ee'noko Jiisuu'ke aa'puru', "Tee tee averiaing kapoo' Siisa' bakaang, ee'noko kapoo' Kumponing bakaang Kumponing averiai." Ee'noko tee' maku'urio' aa'na' ta'nimpariru'. †

**Tanatana' Boo'keta Domang-koong**

(Mat 22:23-33; Luk 20:27-40)

<sup>18</sup> Teketa napo' Noru' Pitunavitu~koo nii'ning Jiisuu'anko niania' ninka porou', boo'keta napo' daa' masika'antavaava'navitu. <sup>19</sup> Porora avakareaama aa'pau', "Nau-anta, Mosesie aung boto daarimemu-ru'nung,

'Tenang naninge ba'aang siraraavi'aresi naaroarako napo' baara'ma'nungge teni dama' moo'ura bataata-aape paroreai.'

(Boto 25:5)

<sup>20</sup> Urikamu' tee namaia' naru'ka ~kenaanka-taa otoroko'nung. Ee'noko tutuna'nung nampeesiarara boo'paru' beurukaa' oturea'. <sup>21</sup> Ee'noko teketa kenaanka-nunge napo' teni naaro dama'moo'ura parorea' boo'paru'. Ee'noko napo' beenaumo-nung tee' nkoaru'. <sup>22</sup> Ee'noko teing ookara tee' nari', teka aing ~kenaanka-taa namaia' teni nampau'ning biurukaa' oto'evuria' boorou', ee'noko asi'na'moo teni manikuma boo'paru'. <sup>23</sup> Ee'noko teing te'mung asirana'mung boo'nuka daa'ariaina'mung teni temaia'koo arera ba'aang deemparavainani? Ai' ookara ~kenaanka-tae nampau'nani teni."

<sup>24</sup> Ee'noko Jiisuu'ke aa'puru', "Dii' bakei papaararimaung, ai' dii'ke doma Daari Meekung ee'noko Kumponing bakaang purinto' noru'eria'. <sup>25</sup> Nantoong dama'ke boo'keta daa'arira koosinung-nanka~ paning-nupoong-pina' nampeesiarara' otoroaing. <sup>26</sup> Ee'noko tenaare-koo boo'keta napo' daa'naare-koo dii'ke ee deeruerima tasi'periaung Moosesie tee' nau-antamuru'na' Daari Meekung-koo daarivuu'navaro-koo? Kumponing tuu'doi'navari tamung urusivuko'navari-eta karoma Moosesi aa'puu',

'Ning tee Kumponing teing aing aa'ning biikaang: Ee-baraami', Aisake', Jeekopi'. Teing ninka komeeri O'noi O'nomaung ning.'

(Toro 3:2, 6)

<sup>27</sup> Aung kara tee miru'noo' ee' otong: Ookara bakaning deempariri domantoo'nuka otorong Kumponing bakaang duta-koo, boo'nuka deea'. Dii' bakei daang noru'erimaing."

**Aung Tee Pankaing Boto**

(Mat 22:34-40; Luk 10:25-28)

<sup>28</sup> Narung boto-nau te' otoitaa' taaravuru' tana'eeko, ee'noko Jiisuu'ke Noru' Pitunavitu tampa' bari'uriko oovuu'. Ee'noko Jiisuu'anko pou' ee' tana'uu'naang, "Boto arera aa'na' pankaing ookara-ita?" <sup>29</sup> Ee'noko Jiisuu'ke aa'puu', "Aung boto aa'na' pankaing masikung: 'Dii' Isireeli-nupoong taaraveriai, Kumponing niikaang Ovoring tee narung masikung. <sup>30</sup> Ee'noko dake piaaveaing Ovoring dakaang Kumponing teieta dakaang domang ootukunung ee'noko teieta dakaang uraang~ ootukunung ee'noko teieta dakaang onou

† Taakisi dua' orokovuko deeko' teinge Eeroti' bakanninge tavaapeu', ee'noko tamung taura'puko deeko' teinge Boto Kepe-ruu'navitue turampaapeu'.

ootukunung ee'noko teie dakaang purinto' ootukunung.'

(Boto 6:4, 5)

<sup>31</sup> Ee'noko kenaanka-nung boto aung: 'Dake tee naning da'koo due'nung daka piaararamana' nari' tee' piaaveaing.'

(Boontu 19:18)

Nii'nara boto otoa' aing-koo dau basi."

<sup>32</sup> Ee'noko boto-naue Jiisuu' aa'puu', "Nau-anta, dake bakei tampa' minkueing. Tee' minkueina' nii'nara Kumponing otoa', tee narung. <sup>33</sup> Ee'noko napo' naninge piaavuui Kumponing teieta bakaang do-maang ootukunung ee'noko teieta bakaang norunoru' ootukunung ee'noko teieta bakaang purinto' ootukunung. Ee'noko oovunara piaavuui baka piaavaramana'. Aing boto meung-koo bakei tampa', dau basi teieta kau' karenaumo boonturomai tai-antavaamaung-eta ee'noko napo' avuavu' nii'ning Kumponing-koo."

<sup>34</sup> Ee'noko Jiisuu'ke aung naning bakaang makumaku' mataa'ivui bari'uiio' aa'puu', "Da' isipo' otoa' Kumponing bakaang muu'keta." Ee'noko tenang-eta deto teing ookara nantoong avoreau' Jiisuu' nii'ning niania' nia'koo.

**Karistoo' Baa Bauring Deempari Poaing-koong?**

(Mat 22:41-46; Luk 20:41-44)

<sup>35</sup> Jiisuu'ke kara nauvurima pava dootuu'nava pankava-koo teing tana'urima aa'puru', "Areke'e'koo boto naunukai aa'paamaung, 'Tee naning Kumponing tero Pako'pari'uu'nung~ nantoong domampuri tarevuriain-oo'koo tee Deevita' bakanaving-koong deempari ta-vo'araa'naang.'? <sup>36</sup> Ai' Deevita'ke baka Tanuaang Meekunge karantavuko~ aa'puu',

'Teie Ovoringe nkaang Ovoring nauvuma aa'puu', 'A' ning-koo tampavine-koo ba'naniai bera ninge dakaning too'de-nupoong dakaang kau'koo boonavete-koo siparampainoo'ke basi.'"

(Kena 110:1)

<sup>37</sup> Tee' minkuvuma Deevita'ke baka tee Pako'pari'nii' Ovoring Kumponing-pina' basi tampuu'nung. Enang areke'e' napo' Deevita' bakanaving-koong tampapeu'?"

**Jiisuu'ke Nantoong Boto Naunuka-koo Koono-antavuru'na'**

(Mat 23:1-36; Luk 11:37-54; 20:45-47)

<sup>38</sup> Ee'noko minkuvurima aa'puru', "Koonorariri otoringe boto naunuka-koo mononopa' isikara ninka nanu'koo piavoromaing; nantoonge pankaing-antavaarii'naang pianuka baaveroma-nairu-koo. <sup>39</sup> Napo' pava dootuu'nairu-koo ba'nava'hani'nanka tampeng-koo ba'naniaakoo' nantoonge ankampaaria'naang. Ee'noko paroro nainang tampoo' ba'ng-koo piavorokoo'. <sup>40</sup> Naaroonku biikaang pavapo' baki-aa'aakoo', ee'noko kungsi isikananka nkoaakoo' nantoonge tampa' ooaarii'naang. Tee'koo biikaang kiimata bakei orara masikung."

**Naaro Sitovuru'nani Bakaang Bauta' Kumponing-koo**  
(Luk 21:1-4)

<sup>41</sup> Jiisuu' pava dootuu'nava pankava-koo karika'koo meu'ke ba'nanui oovurio' nantoonge mooni' dua'au'. Ee'noko manee-nupoong mau'ke mooni' deto dua'au'. <sup>42</sup> Ee'noko nii'nani naaro ata'oi' porai'ning mooni'ning keura dua'uu', baru' mooni' masikeng deea', nau toea' pina' basining. <sup>43</sup> Ee'noko Jiisuu'ke bakaning barevare-nupoong naro' bokuvurira aa'puru', "Masika' ninge naurampimang, anie naaro ata'oi'ke bakei bauta' masikung sipuing ookarai dua'aining-eta dau basi. <sup>44</sup> Narionge masika' daang-pina' dua'aing mooni' mmau' oto'evurita', ee'noko teni bakei bane ata'oi'ke teka ookara-koo oto'evuining dua'uing bakaning taa-mang moo'siipeu'ning."

**Jiisuu'ke Pava Dootuu'nava Pankava Pesi'aravaina' Nauvuru'na'**  
(Mat 24:1-2; Luk 21:5-6)

**13** Ee'noko Jiisuu' pava dootuu'nava pankava-ita siarako bakaning barevare-nupoong-koo narunge aa'puu', "Nau-anta, ooveai aung bakei pavananka kapang boo'antana' oro'ke kaniau'nung." <sup>2</sup> Ee'noko Jiisuu'ke bari'uma aa'puu', "Tek aung pava pankainanka boo'antana' ooverimang? Dama'ke tee enang paupaureari otona' otoauka'nung tuuravarira dua'ariaing."

**Jiisuu'ke Mmau' Ariananka Tavo'aravaing Nauvuru'na'**  
(Mat 24:3-14; Luk 21:7-19)

<sup>3</sup> Jiisuu' ba'namparu' Iu' Olive'po'namii-koo, pava dootuu'nava pankava-aape toroaritaa'. <sup>4</sup> Teke otoko Pita dovang Jeemisi, Jooni ee'noko Aanduru' tee-anko porora bii'ka otoroi nia'aama aa'pau', "Naumeriai tee are'moong tee' nkoaravaing? Ee'noko taa'ni'anta aing tee' nkoaraa'naang due'uko oo'koonge?". <sup>5</sup> Ee'noko Jiisuu'ke tenang tutumpurima aa'puru', "Bakei tarerari otoriaing naninge poo-antaruri'neenga. <sup>6</sup> Mmau' nantoong poroang nkaang miring tampama, aa'paama, 'Ning tee ee'nara.' Ee'noko nantoong mmau' papaara-antavaariai tee' minkuaama. <sup>7</sup> Tek a aroreriauka' karenanka tavo'kaako ee'noko tavo'kaavaining-koo taaraverima. Kapoo'nanka tee' oro' tee nkoaravaining, teka botu mme' due'ua'. <sup>8</sup> Narung kansi' i'amparama nii'nara kansi' tavuaing, ee'noko narung muu' i'amparama nii'ning muu' turampuaing. U'mi' avitoitoi nkoaravaing ee'noko nantoong peera-koo booroaing. Tutuna'ning teing oraka' mantong manikumai tooto' ponto'ke due'uko mantona'.

<sup>9</sup> Tek a dii' tampa' tarerariai. Ee'noko ta'niniriauka' nantoonge dii' dai'daarira tuutunantaariko koompaara'navitu-koo, nii'noo' murasiaraariko pava dootuu'nairu-koo. Dii' teing donkong-antavaariai ovo'ma'nuka-anko ee'noko dauraronuka-anko dii' nkaang miring sira'koo miru'nii'nuka deentari'ko. <sup>10</sup> Ee'noko doorenang tampara navo'ka tutung

daankiari otoai nantoong amutemurii'koo. <sup>11</sup> Ee'noko teing dai'daarima tuutunang-koo be'antaraariko avitoitoi noru' manki' doriauka' paa'erima minkueriaina'. Tek a teing tana'daariko, Kumponing kapoo' tenang ee'ning naururiko tamung kato minkueriaing. Dii' dii'ka tee kariauka'nung, teka tee Tanuaang Meekung karoaing. <sup>12</sup> Napo' aa'noaing: bataatai tooka kompui baara'ma'nung taura'puaing dupisi'ava'naang, ee'noko baumai bauring tee' nari' nkovuai. Napo' biurukaa'ke biumaraang turampaarima dupisi'aariaing. <sup>13</sup> Dii' teing ookara nantoonge munte'daariaining ning nkaang miring-po'nupoong deentari'ko, ee'noko naning purimpario' bera asirana'mung basiaravaing deeko' domamparavaing."

**Kapoo' Orara Masikung Tavo'kuaing Nauvuru'na'**  
(Mat 24:15-28; Luk 21:20-24)

<sup>14</sup> "Teie nakaronarai Danieloi daarivuu'nane'koo deeruerima tasi'periaing: 'Naning maarekusi' donkonuaing pava dootuu'nava pankava-koo Kumponing meeka'antavuu'noo'ke.' (Danielo 9:27; 11:31; 12:11)

Tee taa'ni'anta osi orari-koong. Tenang tee donkonuio' ooverira dii' a' Judia'nameng-koo otoriaing miinanka-koo deto bakei navo'ka koo'dariaing! <sup>15</sup> Naning dau-navaro-koo otoaing deeko' depeto siarara pava-koo kuung beauka'. Tamung kapoo' nka-koo tung-koo makotuauka'nung. <sup>16</sup> Napo' naning mintoong-koo otoainoo'keta pava-koo toroaravauka' bakaang mononopa' nka-koo. <sup>17</sup> Aung batei manki' masikung teing-koo maniku' kempo'nuka ee'noko noonoo'kai otoroaing. <sup>18</sup> Tek a dii' kunsirariaing te'mung mmari-aina'mung kamaarinang-koo tavo'kuauka'na'. <sup>19</sup> Tee arikung te'mung tavo'kuaing tee bakei dau basi aung kansi' tutuntoma-ita nkoaru'ning-koo bera e'mung doong-koo basinoo'koo, ee'noko napo' dama'ke tee' basi otoauka'nung. <sup>20</sup> Tek a Kumponing teing nantoong baka miru'uru'ning piaavurira aing doong apuka'antavuu'. Ee'noko teing doong ariananka apuka'antavuriarui dei ookara nantoong booropeu'.

<sup>21</sup> Ee'noko tenang ee'ning nii'ning naninge aa'duriko deeko', 'Ooveriai, aung tee Kumponing Pako'pari'nii' tavo'kuaing-koong!' nii'noo' aa'puko, 'Ooveriai aunting!' tee masika'antaveriauka'. <sup>22</sup> Ai' teing nakaro-nupoong ee'noko pako'pari'nii'nuka daang Kumponing-etaning tamparimaing porora taa'ni'anta pankenanka ta'nimpaarii'na' nkoavaing nantoong tosiaarima Kumponing bakaning nara'ka papaara-antavaarii'naang, tavo'arapeu'nung-pina'. <sup>23</sup> Ee'noko dii' teing donta'ke moronuka. Ninge tero nau bakerampiru'ning."

**Dama'ke Tee Naning-naumpo' Paning-etaing Poaina'**  
(Mat 24:29-31; Luk 21:25-28)

<sup>24</sup> "Tenang batei arikung bakearako tee duaa' tenang mutaanampuai ee'noko kaara arakavaravauka'. <sup>25</sup> Ee'noko beento'nanka tankavarai paning-eta. Ee'noko purinto'nanka paning-koo otoromaing

dankampariai. <sup>26</sup> Ee'noko tenang teinge ning Tee Naning-naumpo' Paning-etaing taa'ni'moi moko oomaavaing, purinto' ninka kamo'ke depeto aa'na' meena'moi. <sup>27</sup> Ee'noko tenang ninge botoarampaing koosinunanka ookara kansi'koo teing nkaning miru'nisinuka naro'koo doving karenaumo-ita ee'noko napo' kansi' kainu'nairu-eta."

**Baavootunoo' Koi'keta' Para' Nenuvara'upeu'nung-eta**  
(Mat 24:32-35; Luk 21:29-33)

<sup>28</sup> "Enang tee dii'ke tee baisirovang ooverira noru'eriaing, aa'nomaung: Tenang para' nenuvara'uko noru'erikoo' teketa deto puaravuu'naang due'ka. <sup>29</sup> Tee' nari' kapoo' aing ee' oro' tavo'arako ooverira dii'ke ee'pina' noru'eriaing, due'ui otong, karanaang poing. <sup>30</sup> Masika' naurampimang, Teing aing kapoo' ookara nkoaravaing aung avarang boo'pariaruko. <sup>31</sup> Paning ee'noko kansi' teing oparavaininge teka nkaang kara tee oparavauka'nung."

**Naninge Noru'ua' Doong Ee'noko Batei**  
(Mat 24:36-44)

<sup>32</sup> "Naninge noru'ua' batei poainoo'. Paning-nupoong koosinunukai noru'aava'. Ninge tee bauringe noru'ampa'. Teka teie Mma' narunge noru'ui otong tee batei. <sup>33</sup> Teka dii' tanatarariri otorimaatoai, kungsi ninka tanterariri, ai' dii'ke noru'eria' batei tavo'aravainoo'. <sup>34</sup> Tee' nari' naning pankaing isipo' nanuma osi-eta tenkenupeu'nung-pina' bakaning botovotonaa'nuka taura' avurima mintoonge kantevuripeu' ee'noko karanaang tampa' tanata-koo teing-koo narung botovupeu'. <sup>35</sup> Teka dii' teing tanatarariri otorimaatoaing. Noru'eria' arenang dee'ma pava okonara poaing, ai' pa muungaapenang, ai' pa meu'namang, ai' pa siimporovuko~, ai' pa tane'ngang. <sup>36</sup> Ta'nina' poma deeko' aasirio' po'neeng. <sup>37</sup> Teka ninge naurampimana' ookara nauarama aa'pamaung: Teka dii' teing navo'ka tarerariai."

**Nantoong Bore'nukai Jiisuu' Tavu'koo Mumunsiau'na'**  
(Mat 26:1-5; Luk 22:1-2; Jon 11:45-53)

**14** Te'mung Taamang Baari'koong~ ee'noko tee Paroro Iisiropa ke'munta doong deto otoko naiaako'na'mung, piristi'nuka-koo ovontung ee'noko boto naunuka mumunsiariru' Jiisuu' aavavaama moo'aara dupisi'koo. <sup>2</sup> Ee'noko teinge aa'pau', "Na'moo paroro ninka nkoampiau'ka' nantoonge karingai tura-maari'neenga."

**Naninge Manikumai Jiisuu' Beetania Duunie Sisi'uu'na'**  
(Mat 26:6-13; Jon 12:1-8)

<sup>3</sup> Teketa tee Jiisuu' teke Beetani-namono-koo otoko tee Saimoni' tero oramuu'po'nung bakanava-koo kunge. Ee'noko tenang Jiisuu' teke taamang banto'domai ba'nampario' nani manikuma tee-anko pou' duuninaro' † moo' pankaing-koonaro' nkavui. Ee'noko tenie pora Jiisuu'koo bore'koo dau dakovuu' teke taamang banto'domai ba'nampario'. <sup>4</sup> Ee'noko nariong iiravoro-

ra bii'ka kareaama aa'pau', "Anie aung duuni aming-koo kera'pumaang tamung? <sup>5</sup> Aung duuni baavevui dei beenaumo daaku' nopa'ke moo'aapeu' ee'noko mooni' ata'oi'nuka avuripeu'." Tee' nari' mamairoarima poore'au' teni.

<sup>6</sup> Ee'noko Jiisuu'ke aa'puru', "Teni siperiai. Dii'ke aming-koo pore'antaverimang? Anie tee kapoo' tampara masikung ning-koo nkovuing. <sup>7</sup> Dii' ninka ata'oi'nuka teing doong kante otorimaatoainng nari'. Nii'ngang pi-arorira pakueripeu'. Teka ning tee doong kante dii' ninka o'noriauka'nung. <sup>8</sup> Anie kapoo' makosina' nkovuing. Anie ning-koo duuni mme'ka dakovuing maamu-antamura ning dako'maavaina'mung-koo. Tenie duuni koo'uing nkaang mono dako'koo maamu-antavuma. <sup>9</sup> Masikung naurampimang: Are'ke tokoi ookara kansi'koo tee tampara dooreng daankiaavainoo'ke tee kapoo' anie ning-koo nkovuing minkuaama ani norunoru'aavaing."

**Judasie Kara Naroompuu'na' Jiisuu' Sivuko Tavaa-va'naang**  
(Mat 26:14-16; Luk 22:3-6)

<sup>10</sup> Teketa Judasi Kerio'nara Jiisuu' bakaning nanai'keta kenaanka-koo narung nanuu' piristi'nuka-koo pankainuka-anko nari' mumunsiaara teing-anko sivuu'naang. <sup>11</sup> Ee'noko teinge taaravaara bakei dotuariru'. Dotuarira tee mooni' teinge avu'koo tampau'. Ee'noko teie batei ee'noko taung besi'uu' Jiisuu' sivuaina'.

**Jiisuu'ke Bakaning Ninka Asirang-koo Nai'ua'na' Baari'koong~ Paroro**  
(Mat 26:17-25; Luk 22:7-14,21-23; Jon 13:21-30)

<sup>12</sup> Tutuna'na'mung tee-koo paroro Ju' biikaang berete' iisiropa-koong basiaru'. Te'mung ee'na'mung doong sipisipi' kampia pareka Taamang Baari'koong-koo tavaariko'na'mung, ee'noko te'mung basiaro' bakaning barevare-nupoong Jiisuu' aa'pau', "Dake nii' are' merira tee Taamang Baari'koong~ maamu-antavampira naiampii'naang piaromaang?" <sup>13</sup> Ee'noko Jiisuu'ke bakaning barevare-nupoong-koo kenaankara botovuretu' aa'purema, "Bereta osi pankaing-koo bereai. Ee'noko naning narunge utau ntong-po'nung kuru-koo ipampui nanuko kune'dureaing. Ee'noko tee siomperesi bereai. <sup>14</sup> Pava-koo tumparako siomperesi bereta teva' okonara aa'pereai, 'Teie nau-antai aa'pu-ing, "Nkanavaro are' otong paroro nai-navaro nkaning barevare-nupoong ninka?" <sup>15</sup> Ee'noko teie daunavaro pankavaro tarepa ee'noko ba'nava'ngang-po'navaro naurureai. Ee'noko tevaro-koo kapoo' maamu-antavereai nii'koo makosi." <sup>16</sup> Tee' nauvuresio' tenaanka tenkenuretu' osi pankaing-koo. Basiareta ookara kapoo' Jiisuu'ke nauvuretu'na' oovuretu'. Ee'noko tenaankai maamu-antavuretu' tee Taamang Baari'koong.

† Duuni tampa' nuuraa' miring naarada' kuung sipaako'nung, moo' pankaing.



<sup>17</sup> Ee'noko muumpuio' Jiisuu' teing ninka nanai'keta kenaanka barevare-nupoong ninka porou'. <sup>18</sup> Ee'noko tenang taamanaama Jiisuu'ke aa'puru', "Ninge masika' nauramping, dii'koo nari' taamanampimaatomaunge tee tooka kompui ning too'de-nupoong-koo simuaing."  
<sup>19</sup> Ee'noko teing domang manki' tutumparima naruna' doompeitaa' nia'aama aa'pau', "Baie? Ai' pa ninge?"  
<sup>20</sup> Ee'noko Jiisuu'ke aa'puru', "Dii'koo narunge nari' utau-koo toonampematomaunge. <sup>21</sup> Ning Tee Naning-naumpo' Paning-etaing moompaing Daari Meekung-koo minkuau'na', teka piaaru' masakung tee naning tooka kompui kare-nupoong-koo ning simuaing. Torarakuainung tee. Ponto'aravaruu'nung dei bakei tampa'."

**Jiisuu'ke Ovoring Bakaang Taamang Nkoaamatoaing Miru'uu'na'**

(Mat 26:26-30; Luk 22:15-20; 1Kor 11:23-25)

<sup>22</sup> Ee'noko tee' taamanaama Jiisuu'ke berete'nu nkavura, biraankevuma, pisi'ura teing avuru' aa'purima, "Nkaveriai, aung tee nkaang mono makosi."  
<sup>23</sup> Tee'pura napo' uaininareng avaako nkavura kompui tampa' tampa' Kumponing-koo teing avuru', ee'noko teing ookara teru'koo naikau'. <sup>24</sup> Naiaako aa'puru', "Aung tee nkaang ereng nerakung kara naroong-anta pinka'anta-koong makosi, mmou' nantoong domang-anta-koo dakoaravaing. <sup>25</sup> Masikung naurampimang, aung uaini-koo napo' naiampauka'nung bera nerakung-koo naikampainoo'ke basi Kumponing bakaang muu'koo."  
<sup>26</sup> Ee'noko tee' minkuvura kenanavu kenavau' ee'noko danto tenkenau' Olive'po'namii-aape.

**Jiisuu'ke Piita Penkemparavaing Uro'kanoo'ka Sira'puu'na'**

(Mat 26:31-35; Luk 22:31-34; Jon 13:36-38)

<sup>27</sup> Jiisuu'ke aa'puru', "Dii'ke ookarai ning si'merira koo'darii'naang Kumponing tero minku bakevuu'na' Daari Meekung-koo aa'puu'na', 'Ninge tee sipisipi' tanatanung tavanko teing sipisipi'nanka teing avitoitoi purarenka'ariaining.'  
*(Sekaraia 13:7)*  
<sup>28</sup> Teka ning boo'keta daa'marara Kaaleli'nameng-koo meaing dii'koo uro'ke."  
<sup>29</sup> Ee'noko Piitai kara maku'uma aa'puu', "Ninge tee bakei da' si'dampauka'nung bane ainge nii'ninge si'daako."  
<sup>30</sup> Jiisuu'ke maku'uma aa'puu', "Ninge masika' nauramaang, e'mung ee'na'mung muunga kokoree' kemu'kana' koo'kuaruko da' beemu'pie penkentaravaing ni'ninka nari' o'noremaung-koo."  
<sup>31</sup> Ee'noko Piitai aa'na' karoma bari'uma aa'puu', "Ning tee da'koo penkemaravauka'nung bera da' ninka moompeainge." Ee'noko ookara teing nii'ning barevare-nupoong tee' nari' kareau'.

**Jiisuu' Kunsiaru'na' Mintoong Ketsemeni-nau-koo**

(Mat 26:36-46; Luk 22:39-46)

<sup>32</sup> Ee'noko berora ketsemeni tampaako'noo' † tavo'ariru'. Ee'noko Jiisuu'ke bakaning barevare-nupoong aa'puru', "Anke ba'nantaririo' ning anka'

mera kunsimaraa'naang."  
<sup>33</sup> Ee'noko Piita dovang Jeemisi, Jooni bokuvurira berou'. <sup>34</sup> Ee'noko bakaang domang aa'na' manki'oitaa' oraka' dee'ou'. Ee'noko aa'puru', "Nkaang domang orarunsie bakei boo'pina' dee'moing. Anke tanatarariri otoriko."  
<sup>35</sup> Teketa kato oki'noo' bera te' doonko kinkinura kansi'koo teke kunsiaru' tee batei arikung divu'antavuu'naang makosi deeko', aa'puma, <sup>36</sup> "Mma', Mma', da' makosi ookara kapoo' nko-koo. Aung kiimata koong kaapu baari'antameai, teka kapoo' ninka piamomaung makosi deea', kapoo' daka piaromaung deeko' makosi."  
<sup>37</sup> Ee'noko teketa toroaru'. Ee'noko teing beenaumo pe'numpuru' aasiaako, ee'noko tee Piita aa'puu', "Saimoni', da' ee aasii otong? Da' ee makosi deea' oki'noo' batei tanatarari oto'koo?"  
<sup>38</sup> "Tanatarariri otoriai kunsirarima parapaara-koo dua'dari'neenga, ai' domange tee piarori otoritaa' diikaang mono aruaru'dorimang."  
<sup>39</sup> Ee'noko napo' kato bera kunsiaru' iro' minkuvuu'na' karoma. <sup>40</sup> Ee'noko napo' pora tee' teing aasiai otoroko oovuru', duta aasi'ke tavurio'. Ee'noko teinge Jiisuu' maku'na' paa'au'.

<sup>41</sup> Ee'noko napo' beemu'pina' pora aa'puru' teing, "Dii' ee mme' uaarorima aasirimang? Enang makotuing. Batei enang tavo'kung. Ning Tee Naning-naumpo' Paning-etaing tooka kompui naninge simuu'naang nantoong oreng biikaang bireng-koo. <sup>42</sup> Aia', daa'darira meriai. Ooveriko naning baavemuung aung enang pomaang."

**Jiisuu' Moo'au'na'**

(Mat 26:47-56; Luk 22:47-53; Jon 18:3-12)

<sup>43</sup> Ee'noko namu'ke tee Jiisuu' tee' karoi otoko tee Judasi pou' teing-koo nanai'keta kenaanka-koong narung nantoong karika' ninka bainatu ee'noko ta'baka dovang nkavaitaa' botoaario' teinge: piristi'nuka-koo ovontung ee'noko boto naunuka ee'noko pankeu' urantanuka. <sup>44</sup> Teie tooka kompui Jiisuu' kare-nupoong-koo sivuu'naang tee taa'ni'anta maamu-antavuu' aa'puma, "Tee naning ning nuunuampaing tee ee'nara naning dii'ke bokotaanierira dai'erira baramperiaing."  
<sup>45</sup> Ee'noko Judasi basiarara namu'ke Jiisuu'anko bera aa'puu', "Nau-anta Pankaing!" Ee'noko nuunuvuu'. <sup>46</sup> Ee'noko Jiisuu' tanka'ke pinka'ai moo'au' tee.

<sup>47</sup> Ee'noko due' donkonai otorou'ning-koo narunge bakaang bainatu barampura piristi'koong pankaing bakaang botovotonaa' teka'puma dome' ete'uu'.  
<sup>48</sup> Ee'noko Jiisuu'ke karoma aa'puru', "Dii'ke ee ning tavu' nkoaama bakiaa'kamaung deemerima bainatu dovang ninka ankonu' aa'ning nkaveri poring ning dai'merii'naang?  
<sup>49</sup> Doong kante ning tee dii' ee'ning ninka o'nori dootuu'nava pankava-koo nau-antamara-maung teka teke doonanairu-koo o'noko dii'ke ning dai'meriaung. Teka koonto' Daari Meekung-koong kara dupearavaing."  
<sup>50</sup> Ee'noko tenang teinge ookara bakaning barevare-nupoonge teka sipaama koo'ariru'.

† Ketsemeni tee Duuni Mii'doma miru'ari otong. Te' ee'noo' sinang olive'koong mii'aako'noo' duuni nka-koo.

<sup>51</sup> Ee'noko narung naning nemaka baarong kakaarai duaanisie Jiisuu' siompuko teinge moo'aako teie du-aana sipura simpeng mmaruu'.

**Jiisuu' Ju'koong Ovontung Biikaang Tuutunang-koo~**  
(Mat 26:57-68; Luk 22:54-55,63-71; Jon 18:13-14,19-24)

<sup>53</sup> Ee'noko Jiisuu' piristi'nuka biikaang-anko be'an-tavau' naro'ariru'noo' piristi'koo ovontunuka, pankeu'koo urantanuka ee'noko boto naunuka. <sup>54</sup> Pi-itai dama'ke isipo'keta kaarie sipurima siompuru' ee'noko tumparu' piristi'nuka biikaang pankaing bakanava'koo uro'mang, ee'noko teke Ju' biikaang pia-tooronuka~ ninka nari' ba'nampariri nta'koo anka-voroko'.

<sup>55</sup> Ee'noko piristi'nuka-koo ovontung ee'noko ookara koompaara'navitue kapoo' Jiisuu'ke nkovuu'nung-koo kara besi'au' Jiisuu' tuumpi-kooning kara daa'aara deeko' Jiisuu' dupisi'aava'naang. Ee'noko teinge kapoo' daa'aava'. <sup>56</sup> Nantoong mmou'ke Jiisuu' daang dai'nav-impau' dua'anta-koo, teka biikaang minkunaa nari' deea'. <sup>57</sup> Narionge donkonaama daang minkuaama aa'pau', <sup>58</sup> "Nii'ke taaravampirio' aa'pau', 'Ninge pava dootuu'nava pankava tanka'ke nkonisinava' turam-pamira napo' beenang doong-koo nii'nava kani-ampaing nantoonge tanka'ke nkonii'nava deea'."

<sup>59</sup> Teka ainge biikaang minkunaa nari' minkuaavaruko'.

<sup>60</sup> Ee'noko piristi'nuka biikaang pankaing meu' donkonura ookara-koo uro'kanoo'ka Jiisuu' tana'uma aa'pau', "Da' ee bari'na' oto'derua'? Sira'daravai aung-koo tuumpiraamaung-koo!" <sup>61</sup> Ee'noko Jiisuu' tamung ka'duuaru' otoko'. Oki'noo' karaa'. Napo' piristi'nuka bi-ikaang pankaing tana'uma aa'pau', "Da' ee tee Kumponing te ro Pako'pari'nii' nii' domameri tareme-riainoo'koo, Kumponing Biraanke Bauring?"

<sup>62</sup> Ee'noko Jiisuu'ke maku'urima aa'puru', "Ee', ning aa' tee. Ee'noko due'ke tee ning tasi'meriaing ning tee ee'nung, Tee Naning-naumpo' Paning-etaing Daari Meekunge kamo'ke depeto pora ookara kansu' tarevu-maatoainung naururimaung. Ai' ning tee' nari' moko dii'ke oomeriaing, Kumponing tee ninka iri' oko-ra'noo' ba'hang-antamui'o'."

(Danielo 7:13)

<sup>63</sup> Ee'noko piristi'nuka biikaang pankaing iiravora bakaang mononopa' dere'uma aa'pau', "Nii' nantoong aung-koo kapoo' minku-koo piamoria'. <sup>64</sup> Kumponing akapeu'uko taaravering deeko' arekee' mataueri-maang?" Ee'noko nari' kareaama poore'au', ee'noko aa'pau', "Boo'anta-koong, oraka' karomaung."

<sup>65</sup> Ee'noko narionge tenang-eta tutupaa'aako'. Ee'noko duta baaronge dai'aara tavau' aa'paama, "Iro' taram-peerarama~ mansi'dari naumeriai, 'Baie pa taru-mang?" Ee'noko teinge pia-tooronukai moo'aara tanko'pau'.

**Piita Penkemparu'na' Jiisuu'koo**  
(Mat 26:69-75; Luk 22:56-62; Jon 18:15-18,25-27)

<sup>66</sup> Tenang Piita pava-koo dama'du-navaro-koo otoko Piristi' Pankaing bakaning-koonani nerai'na' bautara

pou'. <sup>67</sup> Ee'noko Piita ankavoko oovuu', ee'noko koon-to' tee oovuitaa' tenie aa'pau', "Narung dake Jiisuu' Nasareti'nung ninka otorimaung." <sup>68</sup> Ee'noko Piitai penkemparama aa'pau', "Ning aa' noru'marava' dake minkumeina'." Ee'noko Piita karanaang-aape diiri'aru'. Ee'noko tenang kokoree' karou'. <sup>69</sup> Ee'noko tenie bau-tarai napo' oovura due' donkonai otorou'ning nauvuri-ma aa'puru', "Aung teing-koo narung." <sup>70</sup> Ee'noko Piita napo' penkemparu'. Ee'noko napo' pankaroom-puaruko teinge nantoonge teke donkonai otoroko'ninge Piita tuumpiaama aa'pau', "Bakei da' teie, teing-koo narung masika', ai' da' Kaaleli'na' kare-mang." <sup>71</sup> Ee'noko Piita baka barakosi'arama † maraka-antavarama aa'pau', "Ninge tee naning noru'ampa' dii'ke minkuerimatomaung." <sup>72</sup> Ee'noko namu'ke koko-ree' koo'kuu' kemu'kana'. Ee'noko Piitai tenang noru'uu' Jiisuu'ke minkuvuma aa'pau'na', "Kokoree' mme' kemu'kana' koo'kuaruko da' penkentaravaing ni'ninka nari' o'noremaung-koo beemu'pie." Ee'noko tee' noru'urai'nange biromparu'.

**Jiisuu' Pailati'anko Tavo'au'na'**  
(Mat 27:1-2,11-14; Luk 23:1-5; Jon 18:28-38)

**15** Tero maatanang teing piristi'nuka-koo ovon-tung pankeu'koo urantanuka, boto naunuka ee'noko ookara koompaara'navitu naro'ke mumun-siariru'. Ee'noko teketa Jiisuu' dai'aara tavo'au' Pailati'anko. <sup>2</sup> Pailati'ke tana'uma aa'pau', "Da' ee Dau-rarong~ Ju'nupoong Biikaang?" Jiisuu'ke bari'uma aa'pau', "Masikung minkuemaang." <sup>3</sup> Ee'noko ookara piristi'nukai kapoo' avutevu'koo tuutuau'. <sup>4</sup> Tuutuuaako Pailati'ke napo' tana'uma aa'pau', "Arekee', bari'ea-roo'naang? Taaraveko mmou' kapoo'koo tuumpiraa-maang." <sup>5</sup> Ee'noko Jiisuu'ke napo' kara-koo nii'naare maku'evua'. Ee'noko tee'koo Pailati' aa'na' ta'nimparu'.

**Pailati'ke Botovuru' Jiisuu' Koi'koo Taaka-koo**  
(Mat 27:15-26; Luk 23:13-25; Jon 18:39-19:16)

<sup>6</sup> Ookara mare' kante-koo Taamang Baari'koong-koo~ Pailati'ke kiimata-ita narung simpiri'antaevuriko' nantoonge tana'aako. <sup>7</sup> Ee'noko te'mung batei-koo naning miring Barabasi kiimata-koo otoko nariong ninka ovo'ma' turampaako'ning ninka, turampeema naning dupisi'au'ning. <sup>8</sup> Ee'noko nantoong naro'ariru' Pailati'ke tana'koo mare' kante nkovuko'na' nkovua'naang. <sup>9</sup> Ee'noko Pailati'ke tana'urima aa'puru', "Teko dii'ke aung Ju'nupoong Biikaang Daurarong ninge simpiri'anta-koo ee piarorimang?" <sup>10</sup> Tampa noru'uitaa' ai' piristi'nuka-koo ovontunge Jiisuu' tee mamairo-ita tee-anko tavo'au'nung. <sup>11</sup> Ee'noko pankeng piristi'nukai nantoong tukoaaru' Pailati'anko bokiaako, Barabasi narung simpiri'antavuko teing-anko po'koo. <sup>12</sup> Ee'noko Pailati'ke napo' nantoong nia'urima aa'puru', "Teko ninge arekee' nkoama'naang piarorimaang aung Ju'nupoong Biikaang Daurarong?" <sup>13</sup> Ee'noko teinge bokiaama aa'pau', "Aa'barata'koo

† Baka barakosi'arama ee' minkuarapeu', "Masikung minkuam-parui dei Kumponing tamupeu'!"

taakaveaing." <sup>14</sup> Ee'noko Pailati'ke aa'puru', "Teka aming orara nkovuing-koo?" Ee'noko tee' minkuvuio' napo' baru' aa'na' bokiaama aa'pau', "Aa'barata'koo taakaveaing tee." <sup>15</sup> Ee'noko Pailati'ke nantoong pinau-anta-koo piavora Barabasi simpiri'antavuu' teing-anko po'koo. Ee'noko Jiisuu' mura'koo botovuru' Pailati'ke, ee'noko avuru' aa'barata'koo taaka-koo.

**Piatooronukai~ Jiisuu' Doisina'au'na'**

(Mat 27:27-31; Jon 19:2-3)

<sup>16</sup> Ee'noko piatooronukai Jiisuu' ovo'ma' bakana-va'koo kuung tung-antavau'. Ee'noko ookara bii'marang naro' po'koo bokuaaru' tee akapeu'aa-va'naang. <sup>17</sup> Ee'noko mononopa' isikung dauraronuka biikaang-pina' iiraampumaung kurumpau', ee'noko baakopo mo'ming kunikunisi-koo nkoaara tee-koo bore'koo kurumpau' dauraronuka kurumpaariana'. <sup>18</sup> Ee'noko tenang atatai'aako' aa'paama, "Tampara masikung, Daurarong Ju'nupoong Biikaang!" <sup>19</sup> Ee'noko bore'koo mura'au' bana'ke tutupaa'aama, ee'noko minging keemparima kinkinaako' Jiisuu'koo. <sup>20</sup> Ee'noko akapeu'aakotaa' mononopa' iiraampumaung kiru'au', ee'noko bakaang mononopa' napo' kurumpau' tee-koo. Ee'noko tenkeng-antavau' aa'barata'koo taaka-koo.

**Jiisuu' Dupisi'au'na' Aa'barata'koo**

(Mat 27:32-44; Luk 23:26-43; Jon 19:17-27)

<sup>21</sup> Ee'noko beroma taunga naning miring Saimoni' kune'au' tamung pora'keta pora tankinuko, ee'noko botoau' Jiisuu' bakaang aa'barata' poru'koo. Aung Saimoni' Sairini-nung, Aleksanda' namainta Ruupasi beuma. <sup>22</sup> Ee'noko teketa Jiisuu' tavo'au' Kolokata' tampamaanoo', miru'noo' Makupi'noo'. <sup>23</sup> Ee'noko teka te' basiarira, teinge Jiisuu' uaini bankinie pitunisi miring maara' ninka Jiisuu' avu'koo paaravau'. Ee'noko naikoo kupi'ou'. <sup>24</sup> Ee'noko tenang Jiisuu' aa'barata'koo taakavau'. Baaronanka bakaang bii'ka-koo tankee'eera kapoo' deikoo'koong nkoaama, ee' noru'aitaa' baie pa aung mononopa' nkavuu'naang? <sup>25</sup> E'moo duaa' sirang poio' bi'au' aa'barata'koo. <sup>26</sup> Ee'noko daua aung kara tuumpiau'naare daariau', JU'NUPOONG BIIKAANG DAURARONG. <sup>27</sup> Ee'noko Jiisuu' ninka nari' nii'naanka mutaa'o nkora aa'barata'koo taakavaaretu', narung tee-koo tampavine-aape, ee'noko narung mare'aanavine-aape. <sup>28</sup> Ee'noko enang Daari Meekunge minkuvuma aa'puu'na' dupearu', "Oreng ninka nara'ka tapo'nisi."

(Aisaia' 53:12)

<sup>29</sup> Ee'noko nantoong teke tankinaako'ninge siisiai tankinaako', koovi'aama. Ee'noko aa'paako', "Ei, da' tee pava dootuu'nava pankava pesi'era napo' doong beenange kaniepeu'nung tantaramaung. <sup>30</sup> Enang daka teketa aa'barata'keta dipi'darara sirarara domaang moo'daravai!" <sup>31</sup> Napo' tee' nari' teinge piristi'nuka-koo ovontunge, ee'noko boto naunukai akapeu'aako' tee, aa'paama, "Aunge tee nantoong oovuning domaang moo'urikoo', teka baka domaang moo'koo makotua'.

<sup>32</sup> Aung Kumponingero tero Pako'pari'nii' nantoong domampuri tarevuriaing-koong, ee'noko Daurarong Isireeli-nupoong Biikaang, enang aa'barata'keta depeto siaravai ooampira masika'antavampiaina'." Ee'noko napo' tenaanka tee ninka nari' taakavaaretu'naankai Jiisuu' poore'uretu'.

**Jiisuu' Bou'na'**

(Mat 27:45-56; Luk 23:44-49; Jon 19:28-30)

<sup>33</sup> Ee'noko duaaki'ning mutaanange ookara kansi' tunumparavaru' bera kamunoo'ke basi. <sup>34</sup> Ee'noko kamunoo'ui' Jiisuu' aa'na' karoma osinung karai aa'puma, "Eloi, Eloi, Lama Sabakatani." Kuunoo' aa'puitaa', "Nkaang Kumponing, nkaang Kumponing, ning dake aming-koo si'meing?" <sup>35</sup> Ee'noko nii'ninge nantoonge teke donkonai otorou'ninge tee' taravaara aa'pau', "Taaraveriai. Eliasi bokuvumaang." <sup>36</sup> Ee'noko narung kua'parara kapoo' uaini kaaveerii'koo du'mumpura bana'koo dai'antavura Jiisuu'ke musi'koo toong-antavuu' aa'puma, "Iro' ooampiai, Eliasie pora aa'barata'keta sing-antavuaing deeko'." <sup>37</sup> Ee'noko Jiisuu' tenang aa'na' bokuma asi'namu' domaang oparu'. <sup>38</sup> Ee'noko tee baarong pava dootuu'nava pankava-koong, meekavaro ku'nung, meu' ke'me'aru' a'dei'keta depeto dere'arama bera a'doong kainu'. <sup>39</sup> Ee'noko tenang teie piatooro daaku' tarenarai Jiisuu'aape bere'arama donkonui tee'puko taaravura ee'noko tee' boo'paru'na' oovura aa'puu', "Aung bakei masika' Kumponing Bauring!" <sup>40</sup> Ee'noko nii'ning maniku'ke isipo'keta ooai otorou'. <sup>41</sup> Teing-koo nii'nani Meeri' Ma'dala-nani, ee'noko nii'nani napo' Saalome', ee'noko napo' Meeri' nemakara Jeemisi namainta Joosesi beuko. Aing teing maniku' tenang Jiisuu' Kaaleli'ke otoko siompaama pakuaako'ning kapoo' apuka'parako'ning-koo.

**Jiisuu' Kuvi Dako'doma Sipau'na'**

(Mat 27:57-61; Luk 23:50-55; Jon 19:38-42)

<sup>42</sup> Te'mung Doong Uaana'mung-koo maamu-na'mung, muung-aapevuio' † Doong Uaana'mung due'uko, naning miring Josepa' Arimatea'nung tavo'aru'. Josepa' tee narung koompaara'navitu-koong pankaing Kumponing bakaang muu' donkonuko oovuu'naang nempuko'nung; <sup>43</sup> Avoroa' Pailati'anko bera tana'uu' Jiisuu'nung mono nka-koo. <sup>44</sup> Ee'noko Pailati'ke taaravura Jiisuu' bou'na' aa'puu', "Teka ee boo'paring, ai' boo'parava?" Teketa komanda' bokuvura tana'uma aa'puu', "Jiisuu' ee masikung boo'paring?" <sup>45</sup> Ee'noko Pailati'ke komanda'nung kara taaravura Jiisuu' masikung bou'na' taura'puu' Josepa'ke mono nka-koo. <sup>46</sup> Ee'noko Josepa'ke pankaing baarong kakaara moo'uu' Jiisuu'nung mono nopa'koo, ee'noko aa'barata'keta sing-antavura teie baaronge kakaarai nopa'uu'. Ee'noko kuvi dako'doma boia'koong

† Tenang duaa' tumparako doong maamuna'mung-koo tee Doong Uaana'mung tutumparako'nung. Josepa' Arimatea'nung ee'noko Nikodemasi iri'narumpuresi dako'uretu' tee Jiisuu', Doong Uaana'mung orarivure'neeng-koo.

nenke'au'nung-koo kuung sipura karanaang kapang kaavororii' kovempura ku'numpuu'. <sup>47</sup> Ee'noko Meeri' Ma'dalanani, Meeri' Joosesi bauko tenaankai tampa' keperuu' uresi Jiisuu' bempau'noo' oovuretu'.

**Jiisuu' Daa'aru'na' Boo'keta**  
(Mat 28:1-8; Luk 24:1-12; Jon 20:1-10)

**16** Doong Uaana'mung tankiniuio' Meeri' Ma'dalanani, Meeri' Jeemisie bauko, ee'noko Saalome' duuni tampa' nuuraa' moo'au' Jiisuu'koong mono sisi'koo. <sup>2</sup> Ee'noko tero ora'ka Saandei-na'mung kuvi dako'doma berou' duaa' mme' pata'uko. <sup>3</sup> Ee'noko bii'ka minkuarima aa'paako', "Nii' dee'ma baie kapang korimemurii'naang kuvi dako'doma karanaang-eta?" <sup>4</sup> Ee'noko beroma kapang teketa kosi'ario' ooau'. Tee kapanoo' bakei aa'na' pankaing. <sup>5</sup> Ee'noko tumpariru' kuvi dako'doma. Ee'noko teka narung naning nemaka ooau' ba'nampario' tampavine-aape. Bakaang mononopa' kakaara kurunisi. Ee'noko teing ta'nimpariru' tee-koo. <sup>6</sup> Ee'noko teie aa'puru', "Ta'niniriauka'. Dii'ke Jiisuu' besi'erimang Nasareti'nung aa'barata'koo taakavaieeng. Tee tee a' otoa', tero daa'aring. Ooveriai a' bempaieenoo'. <sup>7</sup> Enang berira aung kara nauereri-aing bakaning barevare-nupoong tee ninka Piita, aa'perima, 'Jiisuu' dii'koo uro'ke bemaang Kaaleli'aape. Tek a berira ooveriaing baka naururu'na'." <sup>8</sup> Ee'noko kuvi dako'doma-ita avoro'ke nopa'uri bakoarira kua'pariri berou'. Nii'ning-ankoi kapoo' minkuaava' avoreaara.

**Jiisuu' Sira'paru'na' Teni Meeri' Ma'dalanani-ankoi**  
(Mat 28:9-10; Jon 20:11-18)

<sup>9</sup> Dama'due Jiisuu' bou'noo'keta daa'arara tero maatanang doong Saandei-na'mung Meeri' Ma'dalanani-ankoi tutung oro'paru' ~kenaanka-taa ma'nari bata'uru'nani. <sup>10</sup> Ee'noko tenie bera Jiisuu' ba'marang nauvuru' orarunsiarima birompariko. <sup>11</sup> Ee'noko tenang tenie aa'puriko, "Jiisuu' daa'aring,

ninge ooansing," teing masika'antavaava' bakaang kara.

**Jiisuu' Kenaankara Barevarera-koo Basiaru'na'**  
(Luk 24:13-35)

<sup>12</sup> Teketa oovunara-pina' oro'paritaa' bakaning-koon-aanka taunga nanureko kune'uretu' osi-eta isipo'ka.

<sup>13</sup> Tenaankai toroareta napo' nariong barevare-nupoong nauaaretu', ee'noko teinge masika'antavaarea' beekaang kara.

**Jiisuu' Bakaning-koo Basiarara Mintoong Nkoaavainoo' Nauvuru'na'**

<sup>14</sup> Dama'ke Jiisuu' teing-koo nanai'keta narung-koo basiaru' taamanaako. Ee'noko iikoo'uru' domampario' ooau'ninge minkuaako noru' tupu'paa' otoroi masika'antavaariaru'nung-koo. <sup>15</sup> Ee'noko aa'puru', "Ookara kansi'koo naniriaing nantoong ookara-koo dooreng tampara dankierima. <sup>16</sup> Ee'noko naning masika'antavui ntong-koo minkiarara meeka'an-tavarara tee moo'aravaing, ee'noko masika'antavuu-ka'nung Kumponing kiimata-koo tampuaing. <sup>17</sup> Ning masika'antamaavaining ninka aing ee' oro' taa'ni'anta tavo'aravaing: Ma'nari bata'aariainge nkaang miring-koo, ee'noko oovunung karai kareaavai. <sup>18</sup> Bane boru' kompaavaing ee'noko bane dopa naiaama teie baike-vuriauka'. Teinge biikaang bireng narung pante'aariko siipa-po'nupoong taarevoroaing."

**Jiisuu' Paning-aape Koinuu'na'**  
(Luk 24:50-53; Nka 1:9-11)

<sup>19</sup> Dama'due Jiisuu' teing ninka kareaakotaa' baka sir-amparara paning-aape koinuu', ee'noko Kumponing-koo tampavine-aape ba'namparu'. <sup>20</sup> Ee'noko bakaning barevare-nupoong avitoitoi nanau' ookara osi-koo dankiarima. Ororing nari' teing ninka mintoomparu' puring-antavurima biikaang kara taa'ni'anta ninka tavo'anta-koo.

# LUUKE'

## Kara Baavootunanka Ane'kooning

1:1 Jiisuu' Naning-naumpo' Taa'ni'poi A' Kansi'koo Pou'na'  
 4:14 Jiisuu' Kaaleli'navaro Bera Tampa' Mintoomparu'na' Tanuaang Meekunge Iri'antavui'o'  
 9:51 Jiisuu' Jerusalema'aape Nanuu'na' Boo' Kune'uu'naang  
 19:29 Jiisuu' Jerusalema' Tavo'arara Nau-antavuru'na' Dootuu'nava-koo Kuunge  
 22:1 Jiisuu' Sisikeera Tora'antavai Dupisi'aako Napo' Domamparu'na'

### Jiisuu' Naning-naumpo' Taa'ni'poi A' Kansi'koo Pou'na'

(1:1-4:13)

**1** Aung ee, pankaing, Teopilasi'; <sup>2</sup> Mmau' nantoonge teing kapoo'nanka nii'ankoi nkoaru'ning daariau'nung taaravaara teinge tutuntoma-ita dutai ooau'ning-eta teing kara sira'nuka deempariko teekoong minkunaa pare'aama naumaarimaing-eta; <sup>3</sup> Daariaako ooamirai'nange ninge tee' nari' napo' da' Teopilasi'anko daarireroma'naang piamoing, io' tutung kapoo'nanka okora'keta, tampa' pukeansi kenkumpamira'; <sup>4</sup> Ee'pina' piamoma, dake tee kara tero nau-antarau'ning toomosiario' tampa' noru'era masikung-pina' tasi'pee'naang. Aung tee kara.

#### Jooni Minkinara Ponto'aravaing Uro'ke Sira'paru'na'

<sup>5</sup> Tenang teie dauraronge~ Eeroti'ke Judia'navaro tarevuko'ngang narung piristi' otoko' miring Sakaraia', piristi'nanka-koo Abaisia' bakanavitu-koong. Teie ba'aang Eeroni ba'dompenkuri-koonani, miring Elisabeta'. <sup>6</sup> Ee'noko tering ookaring koonto'daring Kumponing-koo dutakanoo'ke, ookara boto siompureko'naring Oving bakaang, tuumpi otorea'. <sup>7</sup> Teka tooto' otorea'naring teni Elisabeta' bisiira deemparako, ee'noko tering ookaring aa'na' pankaring. <sup>8</sup> Nii'na'mung biikaang batei dootuu' tare-koong makotui'o' Sakaraia' bakanavitu ninka teke dootuu'nava pankava-koo piristi'nanka biikaang nko-nko nkoaakonung. <sup>9</sup> Ee'noko tee' piristi'nanka miru'aariko'na'koong aarumo siompai, teinge Sakaraia' miru'au'nung pava dootuu'nava pankava-koo meekavaro-koo kuung tumparara boontunamparaa'naang ii tampa' nuuraa' bereng-antavui. <sup>10</sup> Ee'noko tenang tee kapoo' tampa' nuuraa'

paro'koong batei makotui'o' teie kuunge paro'uko nantoonge karika' teing dama'du-navaro-koo kunsiariko'.

<sup>11</sup> Ee'noko teie tee' nkovuko Oving bakaning-koo narung koosinung~ tee-ankoi oro'paru' batanang boonturoma-koo tampavine-aapei donkonui.

<sup>12</sup> Ee'noko Sakaraia'ke oovura tee domang puraanura avorou'.

<sup>13</sup> Teka teie koosinunge aa'puu' tee, "Aroreauka' Sakaraia'. Kumponing dakaang kungsi tee taaravuu'nung. Da'aange Elisabeta'ke tee dauring parare-ruu'naang, ee'noko dake tee miring Jooni † tampeaing.

<sup>14</sup> Ee'noko da' tee doturama do'dero'de'daravaing tee-koo, ee'noko nantoonge mmau' dotuariainge ponto'arako. <sup>15</sup> Ai' tee tee naning pankaing deemparavaing Oving-koo dutakanoo'ke. Uaini dovang teing nainai purinto' poteario' naivuauka'nunge. Tanuaang Meekung narunge maanto'ui otoaing ke'de-koo otoko-ita. <sup>16</sup> Mmau' Isireeli-nupoong teie tee Oving-koo napo' bere'antavuriaing tee-koo biikaang Kumponing-koo. <sup>17</sup> Ee'noko tee tee Oving-koo uro'kanoo'ke nantoonge doorevurima nanuaing Eliasi-pina' bakaang aarumo ee'noko iri' nari' kompui. Biumaraang domang biurukaa'aape bere'antavurii'naang ee'noko teing taarapiikanuka koonto'nuka biikaang matau-koo. Tee' nari' nerivuri maamu-antavuriaing nantoonge Oving poaing-koo."

<sup>18</sup> Ee'noko Sakaraia'ke koosinung nia'uma aa'puu', "Ninge arekee' tasi'pampeu' tee masikung deeko'? Ai' ning tee pankara ee'noko nnaang teni pankaa'ke."

<sup>19</sup> Ee'noko koosinunge maku'uma aa'puu', "Ning tee Kepareli' Kumponing-koo uro'kanoo'ke donkonansi o'nomaung. Teie ee'narai ning da'anko botomuing da' kara-koo tee aung dooreng tampara nauramaang. <sup>20</sup> Aung ee, ninge nauransina' masika' nkoaravaing batei makotuinang, teka da'aange dauring parare-ruu'naang masika'antavearuing-koo Kumponing da'

† Iiburunupoong biikaang kara-koo miring "Tokanan" tee "Kumponing piaaevooni," miru'ari otong. Kiriki'nupoonge Ioanen tampaako'.

enang-eta ka'duu-antarui'o karearoo'naang bera aing nauransining tavo'aravainoo'ke basi."

<sup>21</sup> Ee'noko nantoonge nempai otoko'nung Sakaraia', paapaa'arima ana'ario' dootuu'nava pankava-koo ku-unge. <sup>22</sup> Ee'noko tenang amakoari siarara teie teing kara-koo makotuaruu'nung, teka bireng narunge tee' nari' karavuriko teinge tasi'paara aa'pau', "Kapoo'ke apaikovuio' kara karoarui." <sup>23</sup> Ee'noko tenang bakaang nko-nko nkonang opario' bakanoo' osi duparu'.

<sup>24</sup> Tee-koo dama'due ba'aang Elisabeta' tooto' nkoaru'nung, ee'noko kaara pa'noko'naveraa'ka-koo pava-koo kuung narok'ke otoko' teni, ee' noru'uma:

<sup>25</sup> Aung tee Ovinge ning-koo nko-antavuing; piamukotaa' ning tee' nkomuing maia' ton-ta'memuu'naang.

### Koosinung~ Kepareli'ke Jiisuu' Ponto'aravaing Sira'puu'na'

<sup>26</sup> Ee'noko tenang Elisabeta' ~nau-taa kaara deem-parako kempo'kuu'noo'keta tee koosinung Kepareli' napo' Kumponing osi nii'namono-koo botovuu' Kaaleli'navaro-koonoo' miring Nasareti'namono.

<sup>27</sup> Nani manikuma nerai'na' kuukuma~anko botovuu'nung miring Meeri'anko. Aninoo' teni miru'nii' naning-koo miring Josepa', Daurang~ Deevita' ba'dompenkuri-koong-koo. <sup>28</sup> Ee'noko tee koosinung teni-anko bera aa'puu'nung, "Ani ee, da' bakei Kumponing domange tampa' noru'dui otomai. Oving tee da' ninka otong. Maniku'koo meu'ka biraanke-nani da'."

<sup>29</sup> Tee' minkuvuio' teni noru' paapaa'arara avitoitoi noru'aru'nung aa'puma, "Aung kara aremurii' tee' minku?" <sup>30</sup> Ee'noko koosinunge aa'puu' teni, "Ee Meeri', aroreauka'nung, ai' da' teni domange tampa' noru' Kumponing. <sup>31</sup> Da'koo tooto' poontoaraa'naang~ ke'de-koo, ee'noko tee dauring donkaani par-avee'naang, ee'noko dake tee miring Jiisuu' † tam-peaing. <sup>32</sup> Tee tee ee'nung pankaing deempari otoaing ee'noko tee tee Oving Deto Basi Bauring tampaavaing. Ee'noko Oving Kumponing tee Daurarong deeng-antavaing bakaaka Deevita' paari-antavui. <sup>33</sup> Ee'noko teie Jeekopi' bakanariong, teing Isireeli-nupoong tanatavuriaing ookutunung batei-koo, ee'noko bakaang muu' tee bakearavauka'nung."

<sup>34</sup> Ee'noko Meeri'ke koosinung tana'uma aa'puu', "Tee aung kapoo' arekee' nkoaravaing tee' ning kuukuma o'noko?" <sup>35</sup> Ee'noko teie koosinunge teni maku'uma aa'puu', "Tee Tanuaang Meekung da'koo poko ee'noko tee purinto' Oving Deto Basi bakaange daka'duaing da'. Tee'koo tee ee'nung tooto' ponto'aravaing meekung tampaavaing, tee Kumponing Bauring. <sup>36</sup> Ani ee, da'maasie Elisabeta'ke pankaa'ke tooto' poontoari~ otong. Emu' tee kaara ~nau-taa deemparamang teni-koo bisiira tampaako'nani-koo; <sup>37</sup> Ai' Kumponing tee kapoo' nkovuarupeu'nung otoa'."

† *Iiburunupoong biikaang kara-koo tee miring "Iesua" tee "Kumponing niikaang Domang-anta" miru'ari otong.*

<sup>38</sup> Ee'noko Meeri'ke maku'uma aa'puu', "Aung ee, ning masika' Oving bakanani botovotonaa'. Makosi, tee' minkueina' nkoaravaing ning-koo." Ee'noko tenang tenkenuu' tee koosinung teni-ankoita.

### Meeri'ke Elisabeta' Beero'uu'na'

<sup>39</sup> Teketa' pankaroompuaruko Meeri' daa'arara nanuu'nung iri'narung iu'po'navora'ke deto bera Sakaraia' bakanoo' osi Judia'navaro-koonavuntu'koo. <sup>40</sup> Ee'noko Sakaraia' bakanava'ke tumparara Elisabeta'koo tampa' tampa' tampa'. <sup>41</sup> Ee'noko tenang Elisabeta'ke tee tampa' tang Meeri'keta taaravuko tooto' ke'de-koo kuunge to'dinuu'; <sup>42</sup> Ee'noko Elisabeta' Tanuaang Meekunge maantu'ura duuru'kuma aa'na' karo-ma aa'puu', "Biraankerarinani da' ee'nani maniku'koo dau basina', ee'noko napo' tee tooto' dakaang ke'de-koo biraankearing. <sup>43</sup> Oi baka'e, ning piaaru' arekee' noru'mei beero'mei nkaang Oving baukoi? <sup>44</sup> Ani ee, tenang dake ning-koo tampa' tampeko tee tooto' ning-koo ke'de-koo dotue to'ding-antavuing. <sup>45</sup> Da' teni biraankenani Kumponing bakaang kara dupear-aa'naang masika'antaveinani!"

<sup>46</sup> Ee'noko Meeri'ke maku'uma aa'puu', <sup>47</sup> "Nkaang domange Oving pankaing-antavansi otong, ee'noko nkaang tanuaang doturotuaramaung Kumponing-koo tee ning domaang moo'muu'nung-koo, ai' teie tee ning norunoru'muing ning boonko tamung botovotonaa' deemari o'nomai; <sup>48</sup> Bakei, emu'keta deto tee ning teni ookarai avatevarange doturotue biraanke-nani tammaamaa'noainani teie Kumponing Purinto'po'nunge kapoo' pankaing ning-koo nkovuing-koo; <sup>49</sup> Ee'noko miring bakaang meekunge. <sup>50</sup> Teie tee pi-aavurimaung teing bakaang kara dimpa'koo avoreamaing. <sup>51</sup> Bakaang iirakuta bakaang bireng nkovuu'ning-koo sira'pario' oro'antavumaung, ee'noko purarenka'antavurikoo' teing baka daanganuka ee'noko onou-koo pankainanka-pina' oarimaing. <sup>52</sup> Teie tee dauraronanka iirakutananka kosi'urikoo' bi-ikaning ba'nava'nani' dovang-eta, ee'noko teing boong-koo noru'arimaing pankaing-antavurikoo'. <sup>53</sup> Teing peera-nupoong poo-antavurikoo' kapoo'ke tampenge ee'noko kapoo' mmu'po'nupoong tang torovurikoo' kapoo' avuria'. <sup>54</sup> Teie tee nii' bakaning bautaranuka pakuvurikoo', nii' Isireeli-nupoong, tee piam-etanung unaa-anta noru'ui niikakatauro-koo maraka-antavuu'nung, aa'ning-koo Eebaraami' ee'noko baurukaa' avatevarang-koo doompeto tee' nari'."

<sup>56</sup> Ee'noko Meeri' Elisabeta' ninka nari' otoretu'nung teke. Beekuri kaara-pina' otoreta toroaru' bakanoo' osi-aape.

### Jooni Minkinara Ponto'aru'na'

<sup>57</sup> Emu' tee batei makotuu'nung Elisabeta'ke tooto' para-koong ee'noko tooto' tenie donkaani paravuu'.

<sup>58</sup> Ee'noko teni ninka nari' otoroko'ninge napo' ba'marange taaravau'nung Ovinge piam pankaing

teni-koo oro'antavuu'na' ee'noko teing dotuariru'nung teni ninka. <sup>59</sup> Ee'noko teketa ~beenang-taa doong tank-inuko porou'nung tee tooto' dopa' napu'aava'naang; <sup>60</sup> Teka bauma Sakaraia' namirimpaava'naang tampaako baukoi aa'puu'nung, "A, tee' deea', tee Jooni tang-koong." <sup>61</sup> Ee'noko teinge aa'pau' teni, "Naning da'maiko' tee' boku otoa'." <sup>62</sup> Ee'noko teinge bauma birenge tamung nia'au'nung arekee' tampauina' tee bauring. <sup>63</sup> Ee'noko teie bentang daari-koonavento' eentavuru'nung ee'noko ee' daarivuu', "Bakaang miring tee Jooni." Ee'noko ookara ta'ninau'. <sup>64</sup> Ee'noko tenau'ka Kumponing kara-koo taura'puio' karou' Kumponing biraankevuma. <sup>65</sup> Ee'noko ookara bee'marang asikovorou' tee-koo ee'noko tee aung kapoo' minkuaama nanau'nung avitoitoi iu'nairu-kooning-koo teka Judia'navaro-koo. <sup>66</sup> Ee'noko Kumponing tee' oro'ning taa'ni'antananka Jooni ponto'aru'nook'ke nkovuio' ookarai tee aung taar-avau'ninge norunoru'aama aa'paako'nung, "Aung tooto' aremurii' deemparavaing?"

### Sakaraia'ke Nakaronara-pina' Kara Sira'puu'na'

<sup>67</sup> Aung kara tee Sakaraia'ke Kumponing daangampui minkuvuu'nung Jiisuu' ponto'aravaing minkuvuma. Teie Tanuaang Meekunge maanto'ura karantavuko~ aa'puu', <sup>68</sup> "Biraankeampiaing tee Ovoring Kumponing nii' Isireeli-nupoong niikaang, ai' teie nii' beero'murira enang narung daurarong deto i'ampuu'naang domamuriaing nii'; <sup>69</sup> Ee'noko teie nii' bakaning nantoong boorimurira napo' moo'murii'naang dai'mariri o'norimanoo'keta. Tee ee'nara Kumponing bakaang muu' tarenung, Deevita', ba'dompenkuri-koong pakumuriaing; <sup>70</sup> Tee' Kumponing uripo'keta minkuvuko'na' bakaning nakaronuka~ meekupoong karantavurima~. <sup>71</sup> Kumponing tee' naumuru'nung ee'narai dauraringe te'nemurii'naang niikaning kare-nupoong-eta', teing munte'maarimaing biikaang bireng-eta. <sup>72</sup> Ee'noko napo' bakaang paa-eta unaa-antamurii'naang maraka-antavuu'na', tee kara meekung niikakatauro ninka narooong-antavuu'nung noru'ui. <sup>73</sup> Tee aa'nou'naare: niikaaka Eebaraami'koo tumpearama~ maraka-antavuu' taaru'murii'naang niikaning kare-nupoong biikaang bireng-eta, ee'noko puring-antamurii'naang amorompia' tampa' siompampimatoaina', meeka'mariri, koonto'nuka o'nori tee-ankoi, ookara doong domamariri o'norianing-koo. <sup>76</sup> Ee'noko da' tooto' tee Ovoring Deto Basi Bakaang Nakaronara tantaavaing, ai' da' tee urei nanima Ovoring-koo maa-mu-antaveaing bakaang taung. <sup>77</sup> Teing bakaning nantoong teie domampuriaing-koong kara nau-eriaing biikaang oraka'nko pankaruntoonge piaavuri tonta'antavuriaing nauerima; <sup>78</sup> Aa'noaing: Siroong-eta siim-pooromurira~ araka-antamurii'naang nii' mutaanang-koo o'norimaing boo'aapenameng-koong uu'aa'koo, niikaang pe'naa' koong-antamurima tevung mooa-aapenavung-koo." Tee'puu' Sakaraia'ke.

<sup>80</sup> Ee'noko dama'ke tee tooto' panka'parara tanuaang purimparu', ee'noko tee mee'bora' sirakamaa'koo otoko' bera tee batei makotuu' Isireeli-nupoong-koo karika'koo dutakanoo' tavo'kuu'nung.

### Jiisuu' Ponto'aru'na'

(Mat 1:18-25)

**2** Tenang Jooni ponto'aru'nook'keta nii'ning batei tankinura otoko tee daurarong~, Siisa', miring Akastasio botonang sipuu'nung ookutuning nantoong tarevuriko'ning-koo biikaang miring daariarii'naang bakaang buuku-koo. <sup>2</sup> Aung tee tutuna'namu' miring daari nkoaru'nung tenang Sairiniasi' Siiria-nameensi'koo ovoring deempari otoko'ning. <sup>3</sup> Ee'noko ookara tee biikanairu porou'nairu siompai nanau'nung miring daariarii'naang. <sup>4</sup> Ee'noko Josepa' tee'ke, Kaaleli'koonoo'keta, Nasareti'keta, deto Judia'navaro-koonoo'aape nanuu'nunge Beeteleema', te' Deevita' bakanavuntu' deemparako, ai' tee tee Deevita' baurukaa' bakanamuaang-koong. <sup>5</sup> Tee teni ninka Meeri' ninka ba'aang ninka nari' nanuretu'nung miring daariaree'naang. Teni tee tooto'po'nani. <sup>6</sup> Ee'noko teke otoreko tooto' ponto'koong bateinang makotuu'nung. <sup>7</sup> Ee'noko tenie tooto' tutuna'nung paravuu' donkaani, ee'noko baaronge korovui dai'ura kau' karenaumonanka biikanava-koo otoroi karaasi' maa'aako'navaro-koo bempuu', po'nupo'nuka biikanava'koo doona otoaruo'.

### Sipisipi' Tanatanukai Jiisuu' Beero'au'na'

<sup>8</sup> Ee'noko teke Beeteleema'keta due'ke nii'ning sipisipi' tanatanuka otoroko' muunga biikaning sipisipi' binaa'koo tanatavaarima. <sup>9</sup> Ee'noko narung koosinung Ovoring bakaang teing-ankoi tavo'aru', ee'noko Ovoring bakaang meenasi teing korovuri arakavaru' ee'noko tenang avoro' pankaing maanto'uru'. <sup>10</sup> Ee'noko koosinunge aa'puru', "Aroreriuka', ninge dooreng tampara po'antarerompimang doturotu-koong dii' ookara nantoong-koo basiaravaing. <sup>11</sup> Aa'noing e'mung dii'ankoi teke Deevita' bakanavuntu'koo narung Domang-anta ponto'aring, tee Ovoring Pako'pari'nii', Kumponing teroita maraka-antarurio' nemperimaung. <sup>12</sup> Taa'ni'anta ee' ooverira masikung tasi'periaing: Narung nerakau' baaronge koroari dai'nii' nako'bo-koo bempari otoko ooverii'naang." <sup>13</sup> Ee'noko namu'ke ta'nina', tee ninka koosinung ninka paning-nupoong-koonavitu karika' nari' tapo'eu' Kumponing daangampaama ee' minkuaama, <sup>14</sup> "Kumponing paning-koo siroong otomaung daangampampimaang, ai' mooa tee kansi'koo poing nantoong tampa' nkovuriko aroo'arimaing-koo." <sup>15</sup> Tenang koosinunanka paning-aape toroaririo' sipisipi' tanatanukai aa'pau' bii'ka kareaama, "Aia', Beeteleema' du'marira, ooampiai tee kapoo' nkoaring Ovoringe nau-antamuring nii'." <sup>16</sup> Ee'noko teing iri'narung berora ooaaru' teing, aa'noko Meeri', Josepa' ee'noko tee tooto' nako'bo-koo bempari otoko. <sup>17</sup> Ee'noko tenang teinge ooaara tee sira'pau' tee

† Oovei 2 Samuela' 7:8-16.

minkunaa tooto' minkuari otoing koosinunge nauvuru'nung. <sup>18</sup> Ee'noko ookara taaravau'ninge tee minkunaa avutevu'ai noru'au' sipisipi' tanatanukai teing nauaario'. <sup>19</sup> Teka Meeri'ke teing aing kapoo'nanka kinkompura bakaang domang-koo norunoru'uko'. <sup>20</sup> Ee'noko teing sipisipi' tanatanuka toroariru' bi-ikanairu-koo Kumponing daangampaama, bakaang meenasi sira'pai kapoo'nanka teinge taaravaama ooau'ning-koo tee' ee'na' teie koosinunge nauvuru'na' teing.

### Simioni' Naankai Aana' Jiisuu' Onkeonke'uretu'na'

<sup>21</sup> Ee'noko Jiisuu' ponto'aru'na'mung-eta ~beenang-taa doong deemparako tenang dopa' napu'au' nang tee, miring Jiisuu' tampau', tee ee'nara koosinunge tampuu'nung tee miring tenang mme' poontoar-avaruko~ ke'de-koo. <sup>22</sup> Ee'noko Meeri'ke tooto' par-avuu'noo'keta meekava-koo be'koo untu'anta-koong batei makotuiu', tee' Moosesi bakaang botoi tampui otoina', teringe Jiisuu' tavo'uretu' Jerusalema'aape Ovoring oko-antavuree'naang teie botoi napo' minkuvui otoina' aa'puma,

<sup>23</sup> "Ookara toire' donkaang tutung ponto'ariaining Ovoring bakaning meekupoong tang-koong."  
(Toro 13:2,12)

<sup>24</sup> Ee'noko untu'anta-koo boontunamparii'naang berou' botoi Ovoring bakaange tampui otoina' aa'puma,

"Urareng-koo~ manta'nisining ninka boonturariaing nii'noo' nii'namurii' kuukuu'koo koo'nening keura."  
(Boontu 12:8)

<sup>25</sup> Tenang teke Jerusalema' naning narung otoko'nung bakaang miring tee Simioni'. Aung tee naning koonto' Kumponing-koo mee'du'piari otoko'nung. Nempui besi'uko'nung Isireeli-koong Dunsirunsinara~ tavo'aravaing, ee'noko Tanuaang Meekung tee tee-koo otoko'nung. <sup>26</sup> Ee'noko Tanuaang Meekunge tee tee-koo sira'puu' tee booa'ka'nung teie mme' oovua' tee Domang-anta Ovoringe tero Pako'pari'uu'nung~. <sup>27</sup> Ee'noko Tanuaang Meekunge nau-antavui' dootuu'nava pankava-koo kuung tumparu'; <sup>28</sup> Ee'noko tenang tee tooto' Jiisuu' baumararinge kuung po'antavuretu' nang botoi minkuvu-mana' aarumo nkovuree'naang, teie pora birenge nkavura biraankevuma Kumponing-koo aa'puu', <sup>29</sup> "Ovoring ee, emu' tee ning dakaang botovotona' mooa ninka bakemari moompaing makosi, tee' temu' marakarari naumeu'na', ai' ninge tee emu' ooansing nkaang dutai Tee Domamuraing dake maamu-antaveu'nung nantoong-koo dutakanoo'ka. <sup>32</sup> Teie Arakai teing Isireeli-eta taapo'nupoong kapoo' masakung bii'ka noru'aavaruko'nung sirapo'evuriaing ee'noko Isireeli-nupoong meenasi kong-antavuriai." <sup>33</sup> Ee'noko Jiisuu' baumararing ta'ninuretu' teing-koo kapoo'nanka Jiisuu'koo minkuvuu'ning-koo.

<sup>34</sup> Ee'noko Simioni'ke tekang biraankevurira Meeri' nauvuma aa'puu' teni Jiisuu' bauko, "Ani ee, aung tooto' tee miru'ari otoing mmu' nantoong Isireeli-

nupoong-kooning aa'noaing nii'ning dua'antavuriai ee'noko napo' nii'ning daa'antavuriai; <sup>35</sup> Ee'noko napo' tee tee taa'ni'anta deempari otoo'naang miru'ari otong nantoong tompimpaavaing, ee'noko tee' tompimpaako nantoong mmu' biikaang domang-eta onounanka sira'paravai. Ee'noko da' bainatu-pina' orarunsie domang too'duainanie."

<sup>36</sup> Ee'noko napo' nii'nani manikuma nakaronani teke otoko' miring Aana', Panuele baurang, Aasia bakana-muiaang-koonani. Teni ba'ung ninka mare' ~ke-mare'ka-taa otoretu'nani nampeesiaru'noo'keta, ee'noko emu' beenaumo kivora-ita karemareu ookara mare' bakaning; <sup>37</sup> Ee'noko ani teni pava dootuu'nava pankava-ita tokoo bearuko'nani; teke otoi unkumoarama kunsiamara dootuu'araku'nani muunga ee'noko doonga. <sup>38</sup> Tenang tee-koo batei-koo pora Kumponing tampara tampuu'nung ee'noko tee tooto'koo nantoong minkuvuru' teing Tee Poaing nempai besi'aako'ning Jerusalema'nupoong dai'ariri otoro-manoo'keta napo' moo'uriaing Ovoringe maraka-antavuru'nung.

<sup>39</sup> Ee'noko tenang ookara kapoo'nanka nkovureta botoi Ovoring bakaange minkuvui otoina' tekang toroariru'nung Kaaleli'navaro-aape bera biikanoo' osi Nasareti' tavo'ariru'nung. <sup>40</sup> Ee'noko tooto' pankaparara purimparu'nung mataue maanto'nii', ee'noko Kumponing tampa' oovui otoko' biraankevui.

### Tee Nemaka Jiisuu' Datavou'na' Dootuu'nava Pankava-koo

<sup>41</sup> Emu' tee, ookara mare'koo tee Paroro Baari'koong~ nkoaako' nang baumararing tee Jerusalema'aape bereko'nung. <sup>42</sup> Ee'noko tenang tee kivora-ita kemare'ka mare' makotuu' nang tee nari' berou' baumararing ninka, tering nanureko'na' nari'. <sup>43</sup> Tenang paroro bakearaku nantoong toroariko tee nemaka Jiisuu' teke otou'nung Jerusalema'ke. Baumararinge tee noru'urea'. <sup>44</sup> Te'mung nanaama ee' noru'ureko', nii'ning ninka poromang. Ee'noko taunga muumpuru'noo'ka besi'uretu' bee'marang-ankoa ee'noko ookara teringe noru'aasesining-ankoa. <sup>45</sup> Teka oovurearuta toroaretu' Jerusalema'aape tee besi'uree'naang. <sup>46</sup> Teketa beenang doong tankinuko daa'uretu' teka dootuu'nava pankava-koo boto naunuka-koo meu' ba'nanuio' taaravurita' otoko niania'nanka nia'urima. <sup>47</sup> Ee'noko teing taaravau'ning bakei asikovorou' tee-koo bakaang norukasi'koo ee'noko makumaku'koo. <sup>48</sup> Ee'noko tee baumararinge oovureta ta'ninuretu', ee'noko baukoi aa'puu', "Nnuring, arekee'koo dake nee' tee' nkomesi? Aung ee, nee'daring pore'moresing da' besi'koo noru' manki'moresitaa'." <sup>49</sup> Ee'noko teie aa'puretu', "Ning aming-koo besi'koo pore'doremang? Dee'ke ee noru'erea' tee ning Mma' bakanava-koo o'noaing?" <sup>50</sup> Tee'puresio' teringe tasi'purearu' bakaang kara. <sup>51</sup> Ee'noko teie tee tering siompuresi tekang Nasareti'aape doonko berou', ee'noko otoi osie kara siompuko' tering



beekaang. Ee'noko baukoi aing ookara kapoo'nanka domang-koo kinkompuu'.

<sup>52</sup> Ee'noko Jiisuu' panka'paru'nung matau ninka nari'. Kumponinge ee'noko nantoonge deto tampa' nari' ooaako'.

### Joonie Jiisuu' Bakaang Taung Daare'uu'na'

(Mat 3:1-12; Mak 1:2-8; Jon 1:19-28)

**3** Emu' tee Jooni, Sakaraia' bauring, mee'bora' sirakamaa'koo nempari otoko, tenang Kumponinge kara nauvu' nantoong nauvurii'naang. Tee' nkoaru'nung tenang teie Taibiriasi ookara kansi'nanka-koo ovorimpari miring Siisa' nkavuu'noo'keta kivora-ita pa'noko' mare' deemparu'naang. Tenang aing aa'ning ovo'ma'nuka deempariri otoroko'naang; Poontiasi Pailati' Judia'navaro-koo, ee'noko napo' Eeroti' Kaaleli'navaro-koo, ee'noko baara'ma'nung Pilipi' aa'ning-koo Iturea, ee'noko Takonisi, ee'noko Laisani-asi' Abilini-navaro-koo. <sup>2</sup> Ee'noko Aanasi naanka Kaia-pasi piristi' deto basira otoreko'naang; <sup>3</sup> Tenang ee'naang Kumponinge bakaang kara sira'koo botovuio' Jooni ookutunairue Joo'dani-nari-aapei nanuu'nung ee' daankiarama, "Bere'darira ntong-koo minkirarira mee-ka'antarariaing ee'noko Kumponinge diikaang ora-ka'nko tonta'deruriai."

<sup>4</sup> Daari Meekung-koo tee nakaronara Aisaia' bakaang karapo'nane'koo urikamu' minkuvuu'na' tee, aa'puma, "Aurong narung naning-koong mee'bora' sirakamaa'koo bokuma aa'pumaang, 'Maamu-antaveriaing tee taung Ovoring bakaang. Koompevuriai poainavung.

<sup>5</sup> Ookara biri'nairu maanto'antaveria, Ee'noko ookara iu'nanka ee'noko i'nunairu tanoom-periai.

Ave'ave'nairu taung-koo koomperiai, Ee'noko ariiruteriirunairu naroomperiai.

<sup>6</sup> Ee'noko ookara nantoonge ooaavaing tee Domang-anta Kumponing-etaing."

(Aisaia' 40:3-5)

<sup>7</sup> Karinga nantoong poroko'nung Jooni-koo ntong-koo minkivurima meeka'antavurii'naang. Ee'noko aa'puriko', "Dii' borukoporonuka, baie aa'duri dii' tamung ntong-koo minkirarira meeka'antararima koo'dariaining Kumponing bakaang iira tavo'kuaing-eta? <sup>8</sup> Masika' bere'dariaing tee-koo sinang oro'paravaina'. Tamung dii'ka aa'periauka', 'Eebaraami' tee nii'ke niuma otong, 'ai' masikung ninge naurampimang Kumponinge tee Eebaraami' baurukaa' aing-eta kapananka-ita nkovuripeu' dii' pari'anta-koo, domang iveka'dariko deeko'. <sup>9</sup> Teri' marekenari' teri' maamuari otong koi'koo okora'. Dii' teing koi' makosinuka. Dii'koo ookara sinang tampara nkaveriauka'ning tee nokiraarira nta'koo dua'daariaining."

<sup>10</sup> Ee'noko karika'ke nia'au'nung, aa'paama, "Enang aming nkoampii'naang nii'ke bere'maririnoo'keta?"

<sup>11</sup> Ee'noko teie maku'evurima aa'puu', "Baa tee naning mononopa' kenaa'ka oto'evuinge nii'nung oto'evuaung

nii'naa' avuaing. Baa tee naning taamang oto'evuinge tee' nari' nkovuai."

<sup>12</sup> Napo' taakisi nkanuka ntong-koo minkiarira mee-ka'antavarii'naang porora aa'pau', "Nau-anta, nii'ke napo' aming nkoampii'naang?" <sup>13</sup> Ee'noko teie aa'puru', "Miru'nii'noo'keta bono' divu'eri nii'noo' nkaveriauka'nung."

<sup>14</sup> Napo' piatooronukai' nia'au', "Nii'ke ee'ninge napo', arekee' nkoampii'naang?" Ee'noko teie aa'puru' teing, "Naning tamung taverima, nii'noo' daang tu-umpierima, bakaang kapoo' bakiaa'eriauka'. Diikaning moo'koo araarimaing-koo doturarimatoai."

<sup>15</sup> Nantoonge Tee Domang-anta Kumponinge tero Pako'pari'uu'nung' bakaang bateinang tavo'aravaing-koong basiaro' noru'aama biikaang domange Jooni-koo nia'kaama aa'paako', "Aunge pa tee nempampimaung." <sup>16</sup> Tee'paako maku'urima aa'puu'nung, "Ning aa' tee Domang-anta nempierimaing deea', tamung ntong-koo minkirampima meeka'antarampimaang, nka tee ning aa'na' apoo'mui otoing iirakuta mme' po-maang, doonge-taara'. Tee ee'nara poka aa'na' tampa'taaraveriai, ai' teie tee meeka'antaruriaing dii' Tanuaang Meekung ninka ee'noko nta' ninka. <sup>17</sup> Teie, tee simpe'nkoi' teing makosinuka bakaang muu'koo kunga onkeonke'uriaing, ee'noko teing makosinuka deeaing tee-koo nta'koo siri'paa'koo tai-antavuriaing."

<sup>18</sup> Tee' nari' amutemurii' tautaunanka ninka tampara doorenang dankivuko'nung teing-koo nantoong-koo.

<sup>19</sup> Teka Joonie tee ovo'ma' Eeroti' turampuu' baara'ma'nung ba'aang Erodiasi' nampuu'nung-koo ee'noko nii'ning kapoo' oreng mmau' nkovuu'nung-koo. <sup>20</sup> Ee'noko Eeroti'ke oraka'nko nkovuma Jooni kimata-koo sipuu' bakaning oraka' nkonanka-koo dau pau'ui.

<sup>21</sup> Teka Jooni mme' kiimatavarava' nantoong ntong-koo minkivurima meeka'antavuriko'naang Jiisuu' tenang teing ninka nari' ntong-koo minkivura meeka'antavuu'nunge. Ee'noko tee Jiisuu' kunsiarako paning daate'aru'. <sup>22</sup> Ee'noko Tanuaang Meekung tee-koo siaru' kuukuu'naumpui, ee'noko tee-koo dau otoko kara auromparu' paning-eta aa'puma, "Da' tee nnuring ninge piaaramaung. Ning da'koo aa'na' dotumaramaung."

### Jiisuu' Bakakatauro-koong Deerunoo'

(Mat 1:1-17)

<sup>23</sup> Jiisuu'ke tee bakaang nko-nko mare' beenaumo kivora-pina' deemparama tutumpuu'nung. Nantoonge Josepa' bauring-pina' noru'aako'nung.

Tee Josepa' tee Eelai' bauring.

<sup>24</sup> Tee Eelai' tee Maatata' bauring.

Tee Maatata' tee Liivai' bauring.

Tee Liivai' tee Melekai' bauring.

Tee Melekai' tee Janai' bauring.

Tee Janai' tee Josepa' bauring.

<sup>25</sup> Tee Josepa' tee Matataiasi' bauring.

Tee Matataiasi' tee Eimos bauring.

Tee Eimos tee Neeamu bauring.

Tee Neeamu tee Eslai' bauring.  
 Tee Eslai' tee Naakai' bauring.  
<sup>26</sup> Tee Naakai' tee Meeata' bauring.  
 Tee Meeata' tee Matataiasii' bauring.  
 Tee Matataiasii' tee Siemen bauring.  
 Tee Siemen tee Joseke' bauring.  
 Tee Joseke' tee Joda' bauring.  
<sup>27</sup> Tee Joda' tee Joanang bauring.  
 Tee Joanang tee Reesa' bauring.  
 Tee Reesa' tee Serababele bauring.  
 Tee Serababele tee Sieluteala bauring.  
 Tee Sieluteala tee Neerai' bauring.  
<sup>28</sup> Tee Neerai' tee Melekai' bauring.  
 Tee Melekai' tee Eidai' bauring.  
 Tee Eidai' tee Kosang bauring.  
 Tee Kosang tee Elemadang bauring.  
 Tee Elemadang tee Eere bauring.  
<sup>29</sup> Tee Eere tee Josiua' bauring.  
 Tee Josiua' tee Eliesa' bauring.  
 Tee Eliesa' tee Joring bauring.  
 Tee Joring tee Maatata' bauring.  
 Tee Maatata' tee Liivai' bauring.  
<sup>30</sup> Tee Liivai' tee Simioni' bauring.  
 Tee Simioni' tee Juda bauring.  
 Tee Juda tee Josepa' bauring.  
 Tee Josepa' tee Jonang bauring.  
 Tee Jonang tee Elaiakim bauring.  
<sup>31</sup> Tee Elaiakim tee Melia' bauring.  
 Tee Melia' tee Meena' bauring.  
 Tee Meena' tee Matata' bauring.  
 Tee Matata' tee Neetani bauring.  
 Tee Neetani tee Deevita' bauring.  
<sup>32</sup> Tee Deevita' tee Jeese' bauring.  
 Tee Jeese' tee Oobete' bauring.  
 Tee Oobete' tee Booasi bauring.  
 Tee Booasi tee Salamong bauring.  
 Tee Salamong tee Naasoni bauring.  
 Tee Naasoni tee Aminadapi' bauring.  
<sup>33</sup> Tee Aminadapi' tee Araminu' bauring.  
 Tee Araminu' tee Aarani' bauring.  
 Tee Aarani' tee Eesirong bauring.  
 Tee Eesirong tee Peeresi bauring.  
 Tee Peeresi tee Juda bauring.  
<sup>34</sup> Tee Juda tee Jeekopi' bauring.  
 Tee Jeekopi' tee Aisake' bauring.  
 Tee Aisake' tee Eebaraami' bauring.  
 Tee Eebaraami' tee Teera' bauring.  
 Tee Teera' tee Neeoo bauring.  
<sup>35</sup> Tee Neeoo tee Seraka' bauring.  
 Tee Seraka' tee Reu' bauring.  
 Tee Reu' tee Peleke' bauring.  
 Tee Peleke' tee Iibere' bauring.  
 Tee Iibere' tee Siila' bauring.  
<sup>36</sup> Tee Siila' tee Keenani bauring.  
 Tee Keenani tee Apasata' bauring.  
 Tee Apasata' tee Siemi' bauring.  
 Tee Siemi' tee Nooa' bauring.  
 Tee Nooa' tee Leemeki' bauring.

<sup>37</sup> Tee Leemeki' tee Metusela' bauring.  
 Tee Metusela' tee Iinoke bauring.  
 Tee Iinoke tee Jerete' bauring.  
 Tee Jerete' tee Maaleli' bauring.  
 Tee Maaleli' tee Kenan bauring.  
<sup>38</sup> Tee Kenan tee Iinosi' bauring.  
 Tee Iinosi' tee Set bauring.  
 Tee Set tee Aadama bauring.  
 Tee Aadama tee Kumponing bauring.

#### Sietani'ke Jiisuu' Paaravuu'na'

(Mat 4:1-11; Mak 1:12-13)

**4** Ee'noko Jiisuu' Tanuaang Meekunge maanto'ura toroaru'nung teketa Joo'dani-nari-eta, ee'noko Tanuaang Meekunge be'antavuu' mee'bora' sirakamaa'koo karenaumo kivora doonanka-koo Sietani'ke daua'koo; <sup>2</sup> Ee'noko teie tee kapoo' naivua' teing doong-koo. Ee'noko teing doong oparu'noo'ke tee peeravou'nung. <sup>3</sup> Ee'noko Sietani'ke Jiisuu' dua'antakoo paaravuma aa'puu' tee, "Da' Kumponing bauring deeko' aung kapang naueko taamang deempara-vaing." <sup>4</sup> Ee'noko Jiisuu'ke maku'uma aa'puu'nung tee, "A, tee Daari Meekung-koo ee' daariari otong, 'Naning taamang narunge domampari otoaug, teka ookara kara Kumponing-etaning siompui domampari otomaung.'"

(Boto 8:3)

<sup>5</sup> Ee'noko Sietani'ke deto koing-antavura oki'nung batei-koo oo-antavuu' ookara muu'nanka kansi'kooning. <sup>6</sup> Ee'noko aa'puu' tee, "Ninge tee da' aing ookara tare-koo purinto' arompaing biikaning meenasi ninka, ai' aing ning okomui otoring ee'noko ninge tee avo-maung baa ninge pia-antavamaung avu'koo. <sup>7</sup> Teka dake ning dootuu'mei dei aing ookara oko-antaram-peu'." <sup>8</sup> Ee'noko Jiisuu'ke maku'uma aa'puu'nung, "A, Daari Meekung-koo ee' daariari otong: 'Dii'ke Ovoring diikaang Kumponing narung dootuu'eriaing, ee'noko nii'nung siomperia' otoriai.'"

(Boto 6:13)

<sup>9</sup> Ee'noko Sietani'ke Jerusalema'aape be'antavuu' tee Jiisuu', ee'noko a'dei' pava dootuu'nava pankava-koo miiraka-koo pante'antavura aa'puu', <sup>10</sup> "Da' Kumponing bauring deeko' anke doonko to'di'daravaing, tampa' dua'darako masika'antaraavaina', ai' Daari Meekung-koo ee' daariari otong,

<sup>11</sup> 'Teie bakaning koosinunanka botovuriaing da' nee'daava'naang. Teinge biikaning birenge deto doon-taavaing, kapang-koo kau' naapurara'neeng-koo.'"

(Kena 91:11-12)

<sup>12</sup> Ee'noko Jiisuu'ke maku'uma aa'puu', "A, teka napo' Daari Meekunge aa'murimaung, 'Dii'ke tee Ovoring diikaang Kumponing parapaara-koo siperiauka'.'"

(Boto 6:16)

<sup>13</sup> Ee'noko tenang Sietani'ke paaravuma bakevura sipuu' napo' nii'hang makosivuaing nempuitaa'.

## Jiisuu' Kaaleli'navaro Bera Tampa' Mintoom-paru'na' Tanuaang Meekunge Iri'antavui'o'

(4:14-9:50)

### Nasareti'nupoonge Tutung Bata'au'na' Jiisuu'

(Mat 4:12-17; 6:1-6; 13:53-58; Mak 1:14-15)

<sup>14</sup> Ee'noko Jiisuu' mee'bora' sirakamaa'keta toroarunung tee ninka purinto' Tanuaang Meekung-etaing ninka Kaaleli'nameng-aape; <sup>15</sup> Teie Jiisuu'ke nau-antavuriko'nung biikaning pava dootuu'nanka-koo biivimpaako, ee'noko tee-koong doorenang avitoitoi nanu'antavau' tevaro-koo;

<sup>16</sup> Ee'noko tee Nasareti' pou'nung te' tee panka'antavuretu'noo'. Ee'noko biikaang pava dootuu'nava-koo tumparu' bakaang aarumo Doong Uaana'mung-koong siompuitaa'; <sup>17</sup> Ee'noko deeruvuu'naang donkonuio' avau'nung buukunane' temu'nung Kumponing-etaing nakaronarai Aisaia'ke daarivuu'nane'. Teie tene' bere'ura koonto' piavou'noo' oovura deeruvuu' ee' daariari otoinoo',

<sup>18</sup> "Tee Tanuaang Meekung Ovoring bakaang ning-koo otong ai' ning tee pako'pari'muu'nung teie daankiama'naang doorenang tampara ata'oi'nuka-koo. Teie botomuu'nung ning nauaranko dai'nisinanka dipi'arii'naang ee'noko kaputu'nuka ookaava'naang;

<sup>19</sup> Napo' botomuu'nunge unaa-antavarama'naang teing booni'uri otoromaing ee'noko nauarama'naang enanung batei Ovoringe miru'uu'nung piaavurira domampuriang-koo teing."

(Aisaia' 61:1-2)

<sup>20</sup> Ee'noko teie tene' avo'ura avuu' napo' tee naning dootuu' nko-koo pakupakunung ee'noko nau-anta nko-koo neriarama doonko ba'namparu' nantoonge ookarai teke pava dootuu'koo otoroko'ninge naapu narung ooai otoko; <sup>21</sup> Ee'noko tee kara tutumpuma aa'puu', "E'mung tee dupearing taaraverio' tee Daari Meekunge minkuvuu'nung." <sup>22</sup> Ee'noko teing ookarai tampa' tampau'nung tee-koo, ee'noko ta'ninaiu' kara maneena' karou'nung-koo. Ee'noko teinge aa'pau', "Nko aung baie, Josepa' bauring ee deea?"

<sup>23</sup> Ee'noko teie aa'puru', "Masika' noru'ansing, anaare karanaare mirumiru'naare napo' ning naumerii'naang dii'ke, ee' minkunaare, 'Nankai', da' daka taare-antararavai. Teing kapoo' Kapaneume'navuntu'koo nkoveu'ning taaravampiru'ning anke dakanoo'ke napo' nkoveaing masakung deeko'." <sup>24</sup> Masikung naurampimang, naning Kumponing-etaing nakaronara bakanoo'ka tee aroo'aavaung. <sup>25</sup> Masika' aa'nou'nung naurampimang: Mmau' naaronkunanka otoroko' Isireeli-nameensi'koo tenang tee temu'nung Kumponing-etaing nakaronara Eliasi otoko'ngang peera pankaing nkoaru' aa'ngang, paning pankaroong avo'ari otoko mare' beemareu-eta nau-taa kaara-koo.

<sup>26</sup> Ee'noko teing-koo naning-anko Kumponing

botovua' Eliasi, teka naaro Ju'deeaing-koonani-anko naro' botovuu' paku-koo aroo'uainani noru'ui Sarepati'navuntu'koo, Saidoni'koonoo'. <sup>27</sup> Ee'noko napo' tenang tee Kumponing-etaing nakaronara Elaia' bakanang aa'nou', mmau' oramuu'po'nupoong otoroko' Isireeli-nameensi'koo, ee'noko teing-koo nii'narai Elaia' aroo'ua' kui-koo, teka Ju'deeaing-koo narung deeko', Neeamani, Siiria-nameensi'koong, Elaia' aroo'ui'o' kuiaru'."

<sup>28</sup> Tenang teinge tee' taaravaara ookara pava dootuu'koo otoroko'ning aa'na' iiravorou'nung.

<sup>29</sup> Ee'noko daa'arira kompai osi-eta tuu'aama bata'au'nung bera mare-koo auremping osi siroong kani- au'noo'keta due', teke doonko kosi'aava'naang bore'ke uroio'. <sup>30</sup> Teka teketa' teing-koo meu'ke beentevuri tankinura tenkenuu'.

### Jiisuu'ke Kapaneume'navuntu'koo Ma'naang Bata'uu'na'

(Mak 1:21-28)

<sup>31</sup> Ee'noko Jiisuu' Kapaneume'navuntu'aape danto beu', osi pankaing Kaaleli'nameng-koonoo'; <sup>32</sup> Ee'noko teke otoi Doong Uaana'mung kara nau-antavuriko aa'na' ta'ninaiu' tee-koo bakaang nau-anta-koo, kara bakaang purinto' deempario'; <sup>33</sup> Ee'noko teke pava dootuu'koo naning narung otoko'nung ma'naang orara kurumaa'aru'nung. Ee'noko aa'na' uiarama aa'puu', <sup>34</sup> "Ei, arekee' nkomerii'naang, Jiisuu'ke Nasareti'nunge? Da' ee nii' bata'koo poing? Ninge noru'dansi o'nong da' Kumponing-etaing Naning Meekung."

<sup>35</sup> Teka Jiisuu'ke tee aka'puma aa'puu', "Kareauka', ee'noko da' teieta' banke'daravai." Ee'noko teketa ma'naange teing-koo meu' te' doonko dua'antavura teieta banke'aru'nung tokoona' baikevua' tee.

<sup>36</sup> Ee'noko ookarai aa'na' ta'ninaara bii'ka kareama aa'paako', "Aung aremurii'ke karai iirakutai karomaung purinto'ke aa'nunge ma'nari orenanka botovuriko banke'arikoo'?" <sup>37</sup> Ee'noko doorenang aung-koong tee ookutunairue osinankai nanuu'nung temeng korovui otoininge.

### Jiisuu'ke Piita Ba'doraa Taare-antavuu'na'

(Mat 8:14-17; Mak 1:29-39)

<sup>38</sup> Ee'noko tee teketa' donkonura teva pava dootuu'nava sipura Saimoni' bakanava'ke deto koinuu'. Ee'noko Saimoni' ba'doraa teke aa'na' siipavora otoko uipaarii' ninka teinge Jiisuu' nia'au' teni paku-vuu'naang. <sup>39</sup> Ee'noko tee teni-anko donkonura tee siipa aka'puu'nung ee'noko tee uipaarii' namu'ke boimpuu'. Ee'noko namu'ke tenie deto i'amparara bau'uru' teing.

<sup>40</sup> Emu' tee tenang duaa' tumpario' ookarai biikaning siipa-po'nupoong tavo'aaru'nung amutemurii' siipa oto'evoroko'ning. Ee'noko teie tanka' ookara-koo naruna' naruna' pante'urima taare-antavuru'nung.

<sup>41</sup> Ee'noko mmau' nantoong-eta ma'nari banke'ariko' bokiaama aa'paama, "Da' tee Domang-anta

Kumponing tero nantoong marakavuru'nung, Kumponing bauring." Teka teie orokovurima kara-koo taura'puriaruko', ai' teinge tee tasi'pau'nung tee tee Kumponing tero Pako'pari'uu'nung~ nantoong domampuri tarevuriainoo'koo.

<sup>42</sup> Ee'noko siimpoorovuma~ nanuko Jiisuu' tenkenura baka oto'noo' beu' teke kunsiaraa'naang. Ee'noko nantoonge besi'aama porou' tee-anko. Ee'noko pinka'koo paaravaako'nung teing-ankoita tenkenuaroo'naang.

<sup>43</sup> Teka teie aa'puru' teing, "Ninge aa' daankia-ma'naang tee doorenang tampara napo' nii'ning osi-koo Kumponing bakaang muu'koong, ai' ning tee tee' nko-koo botomuu'nung." <sup>44</sup> Ee'noko tee teketa' Judia'naameensi'koo bera daankiarako' pava dootuu'nanka-koo.

#### Jiisuu' Karoko Piitai Tavi' Mmau' Barampuru'na'

(Mat 4:18-22; Mak 1:16-20)

**5** Nii'na'mung tee Jiisuu' tee nuaru' Kaaleli'naru' due'ke donkonuio' nantoong mmau' porora paampa'aako' kara Kumponing bakaang taara-koo. <sup>2</sup> Ee'noko teie teka kerenta bakaasining oovuko' nuaru'koo tapirua tavi' baranukai sipaara biikaning sionung duu'paako. <sup>3</sup> Nareng-koo teing-koo bakaasi-koo Saimoni' bakanareng-koo aa'earara Saimoni' nia'uma aa'puu', "Daampeto oki'noo' naro' tuu'ei mereai." Ee'noko teie tuu'uoio' te' bakaasi-koo ba'nanui nau-antavuru'nung nantoong tereng-eta.

<sup>4</sup> Ee'noko kara bakearako teie Jiisuu'ke Saimoni' aa'puu', "Kankonoo' danto be'antavera dakaang sionung doonko dua'ei tavi' barang-koo." <sup>5</sup> Ee'noko Saimoni'ke maku'uma aa'puu', "Ovoring, nii' pore'moring oookutuna'mung muunga. Konkampia', teka botomeina'koo dake ninge doonko dua'ampaing tee sionung." <sup>6</sup> Ee'noko teinge tee' nkoaara tavi' uumono' oraura~ avo'aaru'; <sup>7</sup> Ee'noko biikaang sionung dererere'arako biikaning manta'nanka birenge bokuaaru'nung oovunareng-koo otoroko'ning porora pakuaarii'naang. Ee'noko teing porora ookeng bakaasining maanto'aara dapi' minkiariko'.

<sup>8</sup> Teka Saimoni' Piitai oovura tee, asikovura Jiisuu'koo kau'kanoo' kinkinura aa'puu', "Ovoring ee, ning naning orara, da'koo due' oto'koo makosi deea'." <sup>9</sup> Teing ookara Saimoni' ba'maikori' nari' asikovuru' teing tavi'nanka barampaaru'ning ooaarira. <sup>10</sup> Jeemisi namainta Jooni napo' nari', Sebeti' baurinketa, Saimoni' ninka nari' manta'ka tavi' barang-koo. Ee'noko Jiisuu'ke Saimoni' aa'puu', "Aroreauka'nung. Enang-eta deto dake nantoong baramperimatoo'naang." <sup>11</sup> Ee'noko tenang teinge teing biikaning bakaasinanka tapiru duumeaarira~ ookara kapoo' sipaarira teinge tee siompau'.

#### Jiisuu'ke Oramuu'po'nung Taare-antavuu'na'

(Mat 8:1-4; Mak 1:40-45)

<sup>12</sup> Jiisuu' nii'navuntu'koo teing-koo osinanka-koo otoko naning narung pou' oramuu'ke maanto'. Ee'noko tenang Jiisuu' oovura tee kinkinura eentavaru'

tee-koo, aa'puma, "Ovoring, da' piarora deeko' dake ning kuimepeu'nung." <sup>13</sup> Ee'noko Jiisuu'ke bireng tovororara kompuu' tee, aa'puma, "Piamoi otong. Enang kuiraring!" Ee'noko namu'ke tee oramuu'ke sipuu'. <sup>14</sup> Ee'noko Jiisuu'ke naning nau-koo orokovura aa'puu', "Bera piristi'koo sira'antararavaing ee'noko boontunang nkoveai da' nantoong due'koo untu'anta-kooing Moosesi bakaang botoi minkuvumana'."

<sup>15</sup> Teka tee' minkuvuio' baru' aa'noo' doorenang bereravari nanuu'nung tee-koong, ee'noko mmau' nantoong porou' taara-koo ee'noko taare-anta nka-koo biikaning siipananka-koo. <sup>16</sup> Teka nii'ning batei-koo mee'bora' sirakamaa'koo nantoong-eta tonta'arاما teke kunsiarako'.

#### Jiisuu'ke Naning Doota Taare-antavuu'na'

(Mat 9:1-8; Mak 2:1-12)

<sup>17</sup> Nii'na'mung teroong-koo Jiisuu' nau-antavarako Boto Keperuu'navitu ee'noko boto naunuka teke due'ke ba'nana'i otoroko' ookara osinairu-eta porora aa'ning-eta: Kaaleli'navaro-ita, Judia'navaro-ita, ee'noko Jerusalema'keta. Ee'noko Ovoring bakaang purinto' tee ninka otoko' nantoong taare-anta-koo.

<sup>18</sup> Ee'noko nantoonge naning narung batanang-koo otoko po'antavau' dootavou'nung. Ee'noko teinge taung besi'aako' kuung po'antavaara Jiisuu'koo uro'kanoo' beng-koo. <sup>19</sup> Teka karika'ke paampa'ao' doona ooaava' tee kuung po'anta-koo, ee'noko teinge daukava-koo koinaara teke to'ba'aara batanang-koo otoko siau'nung meu' Jiisuu'anko. <sup>20</sup> Ee'noko tenang Jiisuu'ke teing tee tavo'au'ning biikaang baito oovura aa'puu' tee naning doota, "Aung ee, dakaning orarananka tonta'deronsing." <sup>21</sup> Ee'noko teinge boto naunuka ee'noko Boto Keperuu'navitu~ aa'ning ninka niania' tutumpau' aa'paama, "Aunge aming-koo Kumponing bauvaupaa'umaang? Naning otoa' orara arumoo tonta'upeu'nung, Kumponing narung deeko'."

<sup>22</sup> Tenang Jiisuu'ke biikaning niania'nanka tasi'pura teie maku'urima aa'puru', "Dii' aming-koo diikaang domang-koo kuunge tee' munkururarimaang?" <sup>23</sup> Arera kara masika'poaruko ooverira ning makosi deeaung tammeripeu' aa'ning-koo, ee' minku-koo, 'Dakaning orarananka tonta'deronsing,' nii'na' ee' minku-koo, 'Daa'darara naniai.?' <sup>24</sup> Teka dii'ke iro' noru'merii'naang ning Tee Naning-naumpo' Paning-etaing tee purinto' oto'memu'ing anke kansi'koo o'noi orarananka tonta'koo..." Tee'pura tee naning doota aa'puu', "Ninge aa'damaang, 'Daa'darara dakaang tani' nkavei naniai dakanava-koo.'" <sup>25</sup> Ee'noko namu'ke, ooai otoko, tee daa'arara bempari otoko'nung tani' deto nkavui bakanava-koo beu', Kumponing daangampuma. <sup>26</sup> Ee'noko ta'ninta'ning noru' paapaa'ke ookara dako'uru' ee'noko dankuranku'arima Kumponing daangampaama aa'pau', "Nii'ke e'mung kapoo' damisi-mainanka ooampiring."

**Jiisuu'ke Liivai' Bokuvuu'na'**

(Mat 9:9-13; Mak 2:13-17)

<sup>27</sup> Teketa tee kato tenkenura Jiisuu'ke naning taakisi-nka-nung oovuu'nung miring Liivai', † taakisi nkavaako'nava-koo ba'nanuio' bakanavaro-koo. Teketa Jiisuu'ke aa'puu', "Ning siomeai." Ee'noko Liivai'ke ookara kapoo'nanka sipura, deto donkonura tenang-eta deto tee siompui nanuu'nung. <sup>28</sup> <sup>29</sup> Ee'noko Liivai'ke bakanava-koo paroro pankaing nkoevuu'nung Jiisuu'. Ee'noko teke karinga taakisi nkanuka ninka napo' nii'ning oovuning ninka nari' otoroko'ning teing ninka ee'ning ninka nari' ba'naniau'nung taamantomai.

<sup>30</sup> Ee'noko teing Boto Keperuu'navitu biikaning boto naunuka ninka minkuminkuaariko' bakaning barevare-nupoong-koo aa'paama, "Dii' aming-koo nari' taa-manirimaang taakisi nkanuka ee'noko nantoong ore-nanka ninka nari'?"

<sup>31</sup> Ee'noko Jiisuu'ke maku'urima aa'puu', "Teing nantoong tampa' otoroining naninge nankai'urii'naang pi-avoroa', teka teing siipavoromaing naing piavoromaung. <sup>32</sup> Ning nantoong tampenanka-anko moa'. Ning orenanka-koo mou'nung nauaranko bere'aria'naang."

**Unkumo-koo Nia'au'na' Jiisuu'**

(Mat 9:14-17; Mak 2:18-22)

<sup>33</sup> Ee'noko teinge Jiisuu' aa'puu', "Jooni bakaning barevare-nupoong amutemu'ke unkumoarimaung kungsi ninka, ee'noko Boto Keperuu'navitu biikaning barevare-nupoong tee' nari'ke, teka da' dakaning nai narung-koo otoromaung tuaamparima." <sup>34</sup> Ee'noko Jiisuu'ke maku'urima aa'puru' teing, "Dii'ke ee teing baranee'navitu nampeesi-koo poromaing unkumo-antavereripeu' tenang tee nampeesinara nari' otoroko teing ninka? <sup>35</sup> Otong nii'ning doong tee nampeesinara teing-eta tonta'aravaina'nung. Ee'noko tenang teing doong-koo unkumoariaing."

<sup>36</sup> Ee'noko Jiisuu'ke kara dikito' nauvuru'nung napo', aa'puma, "Naninge nerakara'koo mononopa'nara'koo nii'noo' dere'ura urikara' ninka nara'ka pate'uarupeu'. Tee' nkovuaing deeko' tee tamung orarivuu'naang tera' nerakara' dere'uinara' urikara' ninka pate'koo makotua'nara' ninka. <sup>37</sup> Ee'noko napo' naninge nerakaru' uaininaru' urikaro'koo koo'uarupeu'. Tee' nkovuaing deeko' teru'ke nerakaru'ke urikaro' ta'da'pura piamparapeu' ee'noko tero' tee urikaro' oraru'kuainaro'. <sup>38</sup> Teka nerakaru' uaininaru' tee nerakaro'koo koo'uaing. <sup>39</sup> Ee'noko napo' naninge urikaru' uaininaru' naivura nerakaru'koo piavoarupeu' aa'puma, 'Urikaru' aru' tamaru'."

**Doong Uaana'mung-koo Jiisuu' Turampau'na' Sinang Kavaio'**

(Mat 12:1-8; Mak 2:23-28)

**6** Nii'na'mung Doong Uaana'mung Jiisuu' bakaning ninka nari' uite'naue~ tankinaama bakaninge barevare-nupoongee nii'ning bii'da'pau'nung uite'koong sinang-koo untu'noo', ee'noko naako'paara maa'au' tamung tankinaama Ju'nupoong biikaang aarumo-koo taura'pari otona'. <sup>2</sup> Teka nii'ninge Boto Keperuu'navitu~ aa'puu', "Dii' aming-koo mintoontarimaang boto toto'peritaa' Doong Uaana'mung-koong?"

<sup>3</sup> Ee'noko Jiisuu'ke maku'urima aa'puru', "Dii'ke aming-koo tee' tuumpimerimaang? Tampa' noru'eri otong tee kapoo' Deevita'ke nkovuu'nung tenang tee peeravora, tee Deevita' ee'noko teing nari' otoroko'ning ninka. <sup>4</sup> Kumponing bakanava-koo Deevita'ke koinura nkavura naiau' tee taamang meekung, nii'ninge naikoo taura'parava', teka piristi'nuka nainge deeko' naikoo makosi. Ee'noko teie Deevita'ke teing nari' otoroko'ning avurio' boto toto'koo tuumpiaava'." <sup>5</sup> Ee'noko napo' aa'puru'nung teing, "Ning Tee Nanging-naumpo' Paning-etaing tee Oving Doong Uaana'mung-koong."

**Doong Uaana'mung Duuai' Taare-antavuu'na' Jiisuu'ke**

(Mat 12:9-14; Mak 3:1-6)

<sup>6</sup> Napo' nii'na'mung Doong Uaana'mung pava dootuu'nava-koo tumparara Jiisuu'ke nau-antavuriko'nung narung naning teke otoko bireng tam-pavine duuai'. <sup>7</sup> Ee'noko boto naunuka ee'noko Boto Keperuu'navitu dovange tareaako' ooaava'naang taare-antavuko deeko' Doong Uaana'mung kapoo' tee tuumpiaavaing daa'aava'naang. <sup>8</sup> Teka teie noru'uru' biikaang norunoru' ee'noko aa'puu' tee naning duuai', "Deto donkoniko ooraavai." Ee'noko teketa daa'arara donkonuu'.

<sup>9</sup> Ee'noko Jiisuu'ke aa'puru' teing, "Ninge ee' tana'dampimang: Arekee' oro' aarumo taura'pari otong Doong Uaana'mung nko-koo, ai' naning tampa' nko-koo ai' oraka' nko-koo; ai' domaang moo'koo ai' dupisi'koo makosie?"

<sup>10</sup> Ee'noko teie oo'ovuru'nung teing ookara, ee'noko teka aa'puu', "Bireng tovorodaravai." Ee'noko tee' nkoaru', ee'noko bakaang bireng tamaru'kuu'.

<sup>11</sup> Ee'noko teing karinsi'orora bii'ka minkuarima kapoo' Jiisuu'koo oraka' nkoaavaing minkuaako'.

**Jiisuu'ke Nanai'keta Kenaankara Miru'uru'na'**

(Mat 10:1-4; Mak 3:13-19)

<sup>12</sup> Ee'noko teing doong-koo Jiisuu' osi sipura beu'nung iu'aape kunsiaraa'naang; muung ookutu-na'mung Kumponing-koo kunsiarama otou' teke.

<sup>13</sup> Ee'noko tenang tane'puio' teie bokuvuru'nung bakaning barevare-nupoong ee'noko teing-koo nanai'keta kenaanka miru'uru', teing kara okovuri nkanuka tampuru'ning, miring aing aa'ning: <sup>14</sup> Sai-moni', nii'noo' Piita tampuu', ee'noko Aanduru', teie

† Aung Liivai' tee nii'noo' miring Maatiu', teing-koo narung Jiisuu'koo daariau'ning.

baara'ma'nung, ee'noko Jeemisi, ee'noko Jooni, ee'noko Pilipi', ee'noko Baatolomiu', ee'noko Maatiu', ee'noko Toomasi, ee'noko Jeemisi, Alopeasi bauring, ee'noko Saimoni', nii'noo' Sieloti' miring dama' ere'au'nung, † ee'noko Judasi, Jeemisi bauring, ee'noko Judasi, Kerio'nara, tee ee'nara Oving baavevuu'nung.

### Jiisuu'ke Mmau' Nantoong Taare-antavuru'na'

(Mat 4:24-25; Mak 3:7-12)

<sup>17</sup> Ee'noko tee siaru' doonko teing ninka, ee'noko donkonau' dumpangoo' deepo' nantoong karika' barevare-nupoong ninka. Ee'noko nantoong miatara porou'nung taaravaava'naang ee'noko biikaning siipa-ita taare-antavurii'naang. Teing osi aa'ning-eta porou': ookara Judia'navaro-eta, Jerusalema'keta ee'noko pirung due'nairu-eta (Taia'koonairu-eta ee'noko Saidoni'keta). <sup>18</sup> Ee'noko teing napo' ma'nari orange pore'antavaariko'ning unaavorou'. <sup>19</sup> Ookara nantoonge Jiisuu' tanka'ke kompaava'naang kevi'ariko' ai' purinto' Jiisuu'keta pare'arama teie ookara taare-antavuriko'nung.

### Biraankenavung Nau-antavuru'na' Jiisuu'ke

(Mat 5:1-12)

<sup>20</sup> Ee'noko Jiisuu'ke dutai keenavuri oovurira bakaning barevare-nupoong aa'puru'nung,

"Biraanke-nupoong dii' enang ata'erima baitorari-maing, ai' Kumponing bakaang muu' tee dii' okorurinaing.

<sup>21</sup> "Biraanke-nupoong dii' enang peerarorima baitorari-maing, ai' dii' teing pooruriaining.

"Biraanke-nupoong dii' enang birontarimatomaing, ai' dii' teing benkenirimatomaing.

<sup>22</sup> "Biraanke-nupoong napo' dii' tenang nantoonge munte'daariko, poka'daariko deu'daarima diikaang miring oraka' tantaarima ning Naning-naumpo' Paning-etaing siomerimaung-koo. <sup>23</sup> Te'mung tee' ta-vo'arako doturoturaririta' dinkitoo'dariaing doturoturarima, ee' noru'erima, 'Niikaang moo' pankaing otong teke paning-koo,' ai' tee tee' nari' biumaraange temu'nupoong Kumponing-etaing nakaro-nupoong nkoariko'na'.

<sup>24</sup> "Teka dii' kavo mmau'nuka baka' piaaru'nuka, tora'kiriaing, ai' dunsirunsi-anta' tero nkaveru'nung.

<sup>25</sup> "Dii' enang pooruri otaining piaaru'nukai, dii' teing peerarorinaing.

"Dii' enang benkenirimatomaing piaaru'nukai, dii' teing orarunsi ninka birontarinaing.

<sup>26</sup> "Dii' nantoonge tampa' nari' minkuraari-maatomaing piaaru'nukai, tora'kiriaing, ai' dii' teing urikupoong tositosinanka nakaro-nupoong-pina' oro'nanka. Diumaraange tee' nkoariko'."

### Kare-nupoong Piaavarampiaina'

(Mat 5:38-48)

<sup>27</sup> "Teka ninge aa'dampimang dii' tampa' taamerimaing: Diikaning kare-nupoong piaavererimaa-toaing, tampa' nkovererima teing dii' munte'daari-maing. <sup>28</sup> Teing barakosi'daarimaing biraanke-antavererimaatoai. Teing oraka' nkoraarimaing kungsi-koo pakuererimaatoai. <sup>29</sup> Baa naning dii' amo'koo tanko'duriaing napo' bari'nameng naueriai napo' tanko'durii'naang. Baa tee dii' mononopa' daunanaa' pari'duriaing tee-koo orokoveriauka' napo' boonanaa' pari'duriko. <sup>30</sup> Ookara eentaraarimaatoaining avereremaatoai ee'noko teing baata diikaning kapoo'nanka pari'daariaining dii'ke napo' eentaverereriauka' teing. <sup>31</sup> Ee'noko nantoonge dii' tampa' nko-raarii'naang piarorimana' tee' nari' nkovererimaa-toaing teing dii'ke. <sup>32</sup> Dii'ke teing nantoong piaaraari-maing naing piaavereremaatoaing deeko' arekee' tee-koo Kumponing tampa' ooruripeu? Ai' aa' orange piaavaariko' teing piaavaarimaing napo'. <sup>33</sup> Ee'noko dii'ke tampa' nkovererima teing dii' tampa' nkoraari-maing arekee' tee-koo Kumponing tampa' ooruripeu? Ai' aa' orange tee' nari' nkoakoo'.

<sup>34</sup> Ee'noko komaaru' nka-koo taura'perererima teing dii'ke maku'daariaining-pina' noru'erimaing arekee' Kumponing tampa' noru'duripeu', ai' aa' orange tee' nari' nkoakoo'.

<sup>35</sup> Teka dii'ke piaavereremaatoaing dii'koo kare-nupoong tampa' nkovererima, ee'noko komaaru' eentaraariko averererima tamung teka siperimaatoai maku'koo noru'eria'. Tee'koo diikaang moo' bakei pankaing ee'noko dii' teing tee Oving Deto Basi bau-rukaa' deentariaing, ai' teie tee tampa' nkovererima teing oreng, tampa' tang noru'aavaing. <sup>36</sup> Piaae maanto'dariri otorimaatoaing Diuma paning-koong piaae maanto'ari otomana'.

### Nantoong Birevire' Pote-konaare

(Mat 7:1-5)

<sup>37</sup> Nantoong koong-anta-koo oioi'daria' otoai Kumponing nari' koong-antaruriauka'na'. Kiimata-koo tamperereria' otoai Kumponing kiimata-koo tanturiauka'na'. Tonta'antareeri otorimaatoai dii' tonta'antariaina'. <sup>38</sup> Avuavu' nkoverimatoai arurimaatoaina'. Tampoo' basinoo' dankarankampuma meenki'ora pi-aampura aruriaina'. Tee' dii'ke avereriaina' tee' basina' napo' dii' aruriaing."

<sup>39</sup> Ee'noko teie napo' kara dikito' nauvuru'nung, aa'puu'nung, "Kaputu'ke ee napo' kaputu' taung nau-antavupeu? A, makotua'. Tenaanka ookaanka dua'arepeu' dinkung-koo. <sup>40</sup> Ai' tee naning barevare-nung tee bakaang nau-anta-koo dau basi deea', teka ookara barevare-nupoong tenang dupeario' nau-antavaariko biikaning nau-antanuka-pina' otoroiaing.

<sup>41</sup> Tee' oro' nau-anta baka tasi'paravaung aa'pampii'naang, 'Aming-koo dake nanki' daara'ma'nung-koo duta-koo oovemaunge teka daka

† Sieloti'navitu-koong deemparako, teing bii'ka Ju'nupoong Rooma'keta keta'koo paaravariko'navitu-koong.

noru'darava' da'koo duta-koo konkinarong otoing?<sup>42</sup> Nii'na', 'Arekee' dake aa'pepeu' tee daara'ma'nung, "Ntara' ee, ninge nankang moo'dampai da'koo duta-koo otoing," tenang daka oorarava' tee konking da'koo duta-koo otoing. Da' ampirinung~, iro' tutung daka-koo moo'daravaing tee konking duta-koo ee'noko tenang daara'ma'nung-koo siraka'pei oovera moo'eai tee nanki' daara'ma'nung-koo duta-koo otoing.'

### Koi'navari Ee'noko Bakaning Sinananka

(Mat 7:16-20; 12:33-35)

<sup>43</sup> "Ee'noko koi' tampara sinang orara bi'umaung otoa', ee'noko napo' koi' orara sinang tampara bi'umaung otoa'. <sup>44</sup> Koi'navarina' biikaang sinang-koo tasi'paarimaung. Tee sinang piiki' too'murin-taa'po'navari-koo kavaavarupeu', ee'noko karikau' napo' mo'ming nana'mosirii'koo kavaavarupeu'. <sup>45</sup> Teie naning tamparai tee teieta tampara domang-koong kore'ngang-eta tampara tavo'antavumaung ee'noko teie naning orarai tee teieta orara domang-koong kore'ngang-eta orara tavo'antavumaung, teieta bakaang domang-koo otoring piamparako bakaang karange minkuvurimaung."

### Matauna' Ee'noko Kanu'na' Pava Kani-koo

(Mat 7:24-27)

<sup>46</sup> "Aming-koo ning dii'ke 'Ovoring, Ovoring' tammerimaunge kapoo' ninge naurampimaung nkoveria?<sup>47</sup> Ookara nantoong ning-koo poroma aung nkaang kara taaravaama siompaamaing naurampii'naang ninge, teing oro'parimana'. <sup>48</sup> Teing tee-pina' naning-pina' oro'nanka pava kanivuu'nung-pina' dinkung isikung nenke'ura natuku boia'koo e'mang-antavuu'. Ee'noko tenang doua pora teva-ankoi koo'ura biru'ua' teva, aming-koo nna' tampa' kaninii'nava deemparako. <sup>49</sup> Ee'noko baata teing nkaang kara tamung taaravaama siompaavarukoo' teing teing tee-pina' naning-pina' oro'nuka pava kanivuu'nung-pina' tamung piisi'koo dau e'mang-antavua', ee'noko doua teva-ankoi koo'ura namu'ke dua'antavuu' ee'noko bakei aa'na' masika' orariaru' teva."

### Piatooronuka~ Tarenara Bakaang Botovotonaa' Jiisuu'ke Taare-antavuu'na'

(Mat 8:5-13)

**7** Tenang Jiisuu'ke bakaang daankinang bakearara taaravau'noo'keta tumparu'nung tee Kapa-neume'navuntu'koo. <sup>2</sup> Teke tee naning narung daaku' piatooronuka tarenara otoko' bakaang botovotonaa' teie aa'na' piaavuko'nung siipavou'nung boo'koo tumpituumpi. <sup>3</sup> Tenang teie Jiisuu' taaravura Ju'koong Ovontung botovuru' tee-anko nia'aako pora taare-antavuu'naang bakaang botovotonaa'. <sup>4</sup> Ee'noko tenang teing Jiisuu'anko porora teing aa'na' eentavariru'nung aa'paama, <sup>5</sup> "Tee tee naning tampara aung, dake paku-koo makosi, ai' teie tee nii' Ju'nupoong pakumuri-maung ee'noko niikaang dootuu'nava kanimemuru."

<sup>6</sup> Ee'noko Jiisuu' teing ninka nari' beu'. Tenang tee pava due' basiarako teie daaku' tarenarai ba'maikori' nii'ning botovuru' Jiisuu'anko aa'puma, "Ovoring, daka baru' pore'antaravauka', ai' ning tee makosi deea' da' nkanoo' pava-koo kuung po'koo. <sup>7</sup> Tee'koo ning ninka daangamarama da'anko moa', teka dake tamung karai minkueko nkaang botovotonaa' taarevoaing. <sup>8</sup> Ninge da' pankaing tasi'damira tee' minkuamaang, ai' ning tee napo' nii'noo' basi-koo iri'koo kuung o'nong piatooronuka tare-koong-koo. Ee'noko nii'nung aa'panko dei, 'Beai,' tee bepeu'. Ee'noko nii'nung aa'panko dei, 'Poai,' tee popeu'. Ee'noko nkaang botovotonaa' aa'panko, 'Aung nkoveai,' teie nkovupeu' tee."

<sup>9</sup> Tenang Jiisuu'ke tee' taaravura ta'ninuu' tee-koo, ee'noko dama'du bere'arara karika'koo siompaako'ning-koo karoma aa'puu', "Ninge naurampimang dii': temu'keta aung amurii' baito pankaing oampaung bane Isireeli-nupoong ninka nari' o'norimaunge." <sup>10</sup> Ee'noko tenang teing botovuru'ning toroarira pava-koo teinge ooau'nung tee botovotonaa' taarevora otoko.

### Jiisuu'ke Naaro Bauring Boo'keta Daa'antavuu'na'

<sup>11</sup> Batei oki'namu'koo teketa' Jiisuu' nii'namono-koo osi pankaing-koo beu'nung Neini' tampaamanamono-koo. Ee'noko bakaning barevare-nupoong ee'noko nantoong karinga nari' tee ninka berou'nunge. <sup>12</sup> Osi-koo karanaang due'arako naning boo'paru'nung nkavai siariko' temono-ita. Aung tee bauring narung masikung anie baukoi, ee'noko teni teie bauko naaro. Ee'noko nantoong karinga teni ninka nari' poroko'. <sup>13</sup> Ee'noko tenang Ovoringe oovura bakaang domang aa'na' piaavou' teni-koo, ee'noko aa'puu', "Birontaravauka'." <sup>14</sup> Ee'noko teie pora kompuu' tee kave, ee'noko teing nkavaako'ning dantavarira donkonai otorou'. Ee'noko teie aa'puu', "Nemaka, ninge aa'damaang da', 'Daa'daravai.'" <sup>15</sup> Ee'noko tee naning boo' deto ba'namura kara tutumparu', ee'noko Jiisuu'ke tee teni bauko avuu'.

<sup>16</sup> Avoro'ke amporo'uru' teing ookara. Ee'noko teinge Kumponing daangampau' aa'paama, "Nakaronara Kumponing-etaing nii'koo meu'ke anke daa'aring; Kumponingee nii' bakaning beero'muring!" <sup>17</sup> Ee'noko teie aunge doorenage tee-koonge ookara Ju-dia'navaro punkaraampuu'nung ee'noko te' korovui otoiainuru nari'.

### Jiisuu'naanka Jooni Minkinara Minkuaresi Otoina'

(Mat 11:2-19)

<sup>18</sup> Emu' tee, Jooni Minkinara kiimatanava-koo otoko bakaning barevare-nupoong tee-anko berora nauau'nung aing ookara kapoo'nanka Jiisuu'ke nkovuko'ning. <sup>19</sup> Ee'noko Joonie kenaankara bakaning-koo barevare-nupoong-koo bokuvureta Ovoring-anko botovuretu'nung aa'puma, "Aa'pereai, 'Da' ee tee tavo'kuaiing-koong, ai' mme' nii'nung nempampiainge?"

<sup>20</sup> Ee'noko tenang tenaanka poreta tee-anko aa'puretu'nung, "Jooni Minkinarai nee' da'anko botomuresinung aa'puma: 'Da' ee tee tavo'aravaing-koong, ai' mme' nii'nung nempampiainge?"<sup>21</sup> Ee'noko tenaankai Joonie botovuretu'naankai maku'noo' nempuresi otoko Jiisuu'ke karinga amutemurii' siipa-po'nupoong taare-antavuru', nii'ning oramurii' siipa avo'avoro' otoroining ee'noko nii'ning tanuaananka oreng-po'nupoong. Ee'noko kaputu'nuka mmau' bantang-antavuru'nunge. <sup>22</sup> Ee'noko teie aa'puretu'nung tenaanka, "Bereta nauereai tee Jooni Minkinara kapoo' dee'ke ooveresining ee'noko taaraveresining, aa'noining: kaputu'nuka banteama ookai, kau' de'doonuka nanai, oramuu'po'nupoong kiioraa'ariri ee'noko kipaunuka taareai, boo'nuka daa'ariri, ata'oinku tampara doore-nang daankianko taaravai. <sup>23</sup> Ee'noko biraankeara-vaing tee naning ning-koo date'pari baitoaravaing, ee'noko nkaang nko-nko akovee' mare'uauka'."

<sup>24</sup> Tenang Jooni Minkinara bakanaanka kara nkara toroaresio' Jiisuu'ke kara-nau tutumpuru' nantoong karinga Jooni minkuvuma; ee'noko aa'puu', "Dii'ke aremurii' naning doore taaraverira mee'borā' sirakamaa'koo ooverii'naang beriko' karika'duri? Naning tunsi-paaka onou avitoitoi eeari oto' oo-koo te' beriarupeu', ape'? <sup>25</sup> Napo' naning nepu'arama kirokaiari otomaung oo-koo beria', ape' aing? Ai' teing nantoong baarong tampenge nopa'arimaing, ee'noko kavō mmau'po'nupoong-pina' otoromaing dauraronanka biikaning-koo pava-koo oovereripeu', mee'borā' sirakamaa'koo deea'. <sup>26</sup> Teka arekee' masika' oro' oo-koo beriko' dii', ai' narung nakaronara? Ee', tee bakei nakaronara masakung Kumponing-etaing emu' ninge naurampimang dii', tee tee aa'nung ookara nakaronuka-koo dau basie tee. <sup>27</sup> Ai' aung ee'nara miru'ui Daari Meekung-koo ee' minkuari otong Kumponing bauring temu' nauvu'u'noo'ka aa'puma, 'Ee aung, ninge botoampaing nkaang kara-nka da'koo uro'ke tee taung maamu-antareraing uroita'."

(Malakai 3:1)

<sup>28</sup> Emu' ninge aa'dampimang dii', Jooni Minkinara tee ookara nantoong tee-koo uro'ke ponto'ariru'ning-koo tee deto basi pankaing, teka ninge ee' naurampimang, enang-eta deto baa tee ninge tare-koo aroo'aravaing, bane Kumponing bakaang muu'koo oki'narai, teie tee Jooni puru'ui otoaing."

<sup>29</sup> Ookarai nantoonge ee'noko taakisi nkanukai taaravau'nung tee. Aing teing ee'ning Kumponing bakaang kara koonto' tasi'paara aroo'aako Joonie ntong-koo minkivurira meeka'antavuru'ning. <sup>30</sup> Teka teing Boto Keperuu'navitu ee'noko teing boto naunuka Kumponing bakaang miru' teing-koo kontevorora Joonie ntong-koo minkivuma meeka'anta-koo taura'pariaruu'. <sup>31</sup> Tee'koo Jiisuu'ke napo' aa'puu', "Dii' nantoong emu'navarang ninge aminge pa miru'dampipeu'? Arekee' naurampiko dii'ka tasi'daripeu' diikaang aarumo? <sup>32</sup> Dii' teing toire'pina' oro'nanka baaveroma ba'naniai turampeemaing bii'ka

aa'peema, 'Kovi puunterorompiko konterorima neekarariarukoo'. Ai'nontu'mariko dii' birontariarukoo'. Tee' nari' oorampimaung nee' tokomererimaing. <sup>33</sup> Jooni Minkinara porai'nange taamang tovang uaini kerempuko konterorima aa'periko', 'Tee ma'naang-po'nung.' <sup>34</sup> Ee'noko ning Tee Nanging-naumpo' Paning-etaing mora taamanama tuaamarako napo' konterorima aa'merimaung, 'Aung ooveriai taamang ee'noko uaini nai bauko, taakisi nkanuka ee'noko nii'ning orengē bii'maiko'ke.' <sup>35</sup> Teka Kumponing avutevu'muresi botomuresina' sinampuko dii'ke bakaang matau tasi'periaing."

#### Teni Jiisuu'ke Tonta'antavuu'nanie Tampa' Tang Oro'antavuu'na'

<sup>36</sup> Teketa' nii'nunge Boto Keperuu'navitu-koonge Jiisuu' bokuvuu'nung tee ninka taamanuree'naang, ee'noko bakanava-koo kuung tumpareta taamantoma ba'namparu'nung. <sup>37</sup> Ee'noko ta'nimpaarii'na' nanie manikumai oranie temono-koonanie taaravura tee taamanuko Boto Keperuu'navitu-koong bakanava-koo, duuni tampa' nuuraa'po'naro' nkavui pou'. <sup>38</sup> Ee'noko teni pora Jiisuu'koo dama'du donkonuu'nung kau'kanoo'ke birompama. Bakaang kau' ta'due duu'puko' ee'noko piu'uko' bakaang dapoi bore'koonge, ee'noko kau' bakaang nuunuvuko' ee'noko duunie sisi'uu' tampa' nuuraa'ke. <sup>39</sup> Emu' teie Boto Keperuu'navitu-koonge bokuvuu'nungē tee oovura baka-koo aa'puko', 'Aung naning nakaronara dei noru'upeu' ani baa aremurii' manikuma kom-pumatomai aung, ai' ani teni orani."

<sup>40</sup> Ee'noko Jiisuu'ke bakaang noru' tasi'pura aa'puu'nung tee, "Saimoni', ning kapoo' oto'memumang da' naurama'naang otoing." Ee'noko teie maku'uma aa'puu', "Aming ee, nau-anta?" <sup>41</sup> Jiisuu'ke aa'puu', "Narung naning otoko'nung tee-koo kenaanka naninkai komaaru nkovuretu'nung. Narunge pa'noko' daaku' namikuri nkavuu', napo' nii'nunge pa'noko' kivora namikuri. <sup>42</sup> Teketa tenaankai bari'koo makoturearuio' teie tenaanka tonta'antavevuretu' ookaanka. Emu' tenaanka-koo arera teie aa'na' pankaruntoompupeu'na' oro'pari?" <sup>43</sup> Saimoni'ke maku'uma aa'puu'nung, "Tee naning baru' aa'na' tonta'antavuu'nung-pina' noru'amaang."

Ee'noko Jiisuu'ke aa'puu' tee, "Dake masika' minkueing." <sup>44</sup> Teketa' teni-aape manikuma-aape bere'arara Saimoni' aa'puu'nung, "Dake ee ani manikuma oove-maang? Ning a' dakanava-koo tumarako dake niikaang toomo siompei ning ntong amea' kau' duu'koo, teka anie duu'muing nkaang kau' bakaang ta'due ee'noko dapoi bakaange piu'mui. <sup>45</sup> Dake napo' onkeonke'mema nuunumea', teka tenang ning a' kuung moinoo'keta' teni siparava' ning-koong kau' nuunu-koo. <sup>46</sup> Dake ning-koong bore' duunie sisi'mea', teka anie nkaang kau' duunie sisi'muing tampa' nuuraa'ke. <sup>47</sup> Tee'koo ninge nauramaang da': Ani bakaning orarananka mmau' tonta'ario' piaa pankaing oro'an-



tavuing, teka baa tee bakaning oraka' nkonanka-koo oki'ning tonta'arako piasa oki'noo' oro'antavumaung."

<sup>48</sup> Tenang tee Jiisuu'ke teni aa'puu', "Dakaning orarananka tonta'deronsing."<sup>49</sup> Teketa teing teke nari taamanaako'ning kara tutumpariru' nung bii'ka aa'paama, "Aung baa naning aa'nung orarananka tonta'ukoo?"<sup>50</sup> Ee'noko teie aa'puu'nung teni manikuma, "Dakaange baitoi moo'duinani. Mooa ninka naniaing."

### Teing Manii' Jiisuu'koo Barearima Pakuaako'ning

**8** Teketa due'ka Jiisuu' osi pankeng-kooninge ee'noko pora'kooninge nanuu' daankiarama ee'noko nauvurima tee dooreng tampara tee muu' Kumponing bakaang-koong;<sup>2</sup> Ee'noko teing nanai'ke-ta kenaanka nari', bakaning barevare-nupoong, ee'noko nii'ning maniku' nari' teie unaa-antavuru'ning tanuaananka oreng-eta ee'noko siipananka-ita;<sup>3</sup> Aa'ning: Meeri' Ma'dala-nani, ma'nari ~kenaanka-taa bata'uru'nani; ee'noko Joana, teni Siusa ba'aang, tee Eeroti' bakaang pava tarevuko'nung; ee'noko Susana ee'noko napo' nii'ning maniku' mmau' biikaning mintoong-eta taamang avariko' nari' nanaama.

### Keenkeeng Nkovumaung-koong Minkunaa Dikito'

(Mat 13:1-9; Mak 4:1-9)

<sup>4</sup> Ee'noko tenang nantoong karinga avuntevuntu'ke-ta Jiisuu'anko nara'ariru'ning teie mirumiru'ke nau-antavurima aa'puu'nung,<sup>5</sup> "Naning mintoong-koo sinang tanka-koo nanura tankavuko aa'nou': nii'ning sinang taung-koo dua'ariru', ee'noko teka nantoonge mmemme'aaru' kau'ke ee'noko barenankai depeto porora tunturavau'.<sup>6</sup> Ee'noko nii'ning sinang kapang-koo dau dua'ariru' ee'noko dupurira teke mara'orou' tompa' otoaruo'.<sup>7</sup> Ee'noko nii'ning too'murintaa' otoroinoo' meu' dua'ariru', ee'noko nari' dupurira too'murintaa'ke iinkenevuu' tee keenkeeng.<sup>8</sup> Ee'noko nii'ning kansii' pankauanoo' dua'arira teke dupuru' ee'noko sinang bi'uru' daaku'na' ookara-ita." Tee' minkuvura enang bokuma aa'puu'nung, "Dii' punkang-po'nupoong deeko' enang taaraveriai!"

### Kuunoo' Tee-koo Mirumiru'koo

(Mat 13:10-23; Mak 4:10-20)

<sup>9</sup> Ee'noko tenang bakaning barevare-nupoonge nia'aama aa'paio', "Aung kara dikito' miru'noo' aming?" teie aa'puu',<sup>10</sup> "Kumponinge dii' bakaang kara pin-ka'erimaing taura'duru'nung makensi'nung-koo miru'noo' noru'erii'naang tee-koo bakaang muu'koo nkoaramana', teka teing nii'ning kara dikito' narunge nauaramaung aa'noaina':

'Ooaama ooaavauka', taaravaama taaravaavauka.'  
(Aisaia' 6:9-10)

<sup>11</sup> "Enang kara dikito' miru' aung: Tee sinang tee Kumponing bakaang kara.<sup>12</sup> Teing taung dua'ariru'ning miru'noo' aung: Nii'ning nantoonge kara taaravaako Sietani'ke poma pari'urikoo' tee kara biikaang domang-eta, maroita, masika'antavaara domampari'neeng-koo.<sup>13</sup> Teing kapang-koo

dua'ariru'ning miru'noo' aunge: Nii'ning nantoonge kara taaravaama dotuariri kompaamaung, teka ima'aria'. Batei oki'namu'koo masika'antavaakoo' ee'noko parapaara poko namu'ke biikaang baito orari-arakoo'.<sup>14</sup> Teing too'murintaa'koo kuung dua'ariru'ning miru' aunge: Nii'ning nantoonge kara taaravaama beroko amutemurii'ke iinkenevurimaung aa'ninge noru' manki'nankai, kavonankai ee'noko doturotunankai kansii'kooninge. Ee'noko biikaang sinang natasi'.<sup>15</sup> Ee'noko teing kansii' pankauang-koo dua'ariru'ning miru'noo' aunge: Nii'ning nantoonge tee kara taaravaama ima'ai kompaakoo' tunsii' paakavaria' domang tampara ninka. Ee'noko teing tee' nari' purimpariri otoroainng bera sinang bi'urii'."

### Araka Boong Si'koo Tampa' Deea'

(Mak 4:21-25)

<sup>16</sup> Tee' nauvurira Jiisuu'ke napo' aung mirumiru' nauvuru', "Naning araka paro'ura utau'e daka'puarupeu' nii'noo' batanang-koo boong sipuarupeu', teka sirang batanang-koo pante'upeu' teing tumpariainng araka ooaava'naang.<sup>17</sup> Ookara kapoo' enang makempari otomaing dama' sira'anta-koong. Ee'noko ookutuning kapoo' nopa'ariri otomaing teing dama' dapa'numpo'. Nantoonge taaravaara noru'aavai.<sup>18</sup> Tee'koo tarerari-ainng dii' taaraverimaing. Tee naning taaravura oro'antavuaing Kumponing napo' nii'ning nauvuaing, ee'noko baa tee taaravura oro'antavua'ung pari'uaing tee araka oto'evuing-pina' noru'ui oting."

### Jiisuu' Baukorovo Makosinuka Baata'

(Mat 12:46-50; Mak 3:31-35)

<sup>19</sup> Teketa te' Jiisuu' baukorovo porou'nung tee ooo-koo, teka tee-anko basi-koo makosiaavaruu' karingai itoao'.<sup>20</sup> Ee'noko teinge Jiisuu' taaravaako'ninge nauaama aa'pau'nung: "Daukorovo dama'du donkonai da' oo-koo piavoromang."<sup>21</sup> Teketa teie aa'puru'nung teing, "Teing ninge nko' ee'noko ntara'mainkaang makosinuka teing Kumponing bakaang kara taaravaama nkoamaing."

### Jiisuu'ke Piong Ee'noko Pirung Taroro-antavuu'na'

(Mat 8:23-27; Mak 4:35-41)

<sup>22</sup> Nii'na'mung Jiisuu'ke bakaning barevare-nupoong aa'puru', "Nuaru'ka amenka'koo pako'mariai." Teketa bakaasi-koo aa'earira tenkenau'.<sup>23</sup> Teketa beroma Jiisuu' aasi'koo dua'aru'. Ee'noko piong pankaing pou' depeto teru'koo, ee'noko ntonge maanto'uko' minkiantavuu'naang-pina' nkovuma.<sup>24</sup> Ee'noko teinge berora Jiisuu' tanteau'nung aa'paama, "Ovoring, Ovoring, nii' enang ke'nuru'marii'naang!" Ee'noko tee tantearara piong ee'noko tee boo'a i'nui'nung teing teka aka'puretu', ee'noko teke bakeareta pirung koonto' tarorovuu'.<sup>25</sup> Teketa teie maku'urima aa'puu', "Dii' ee ni'ninka o'nori ning baitomeria?" Ee'noko teing avore-aama ta'ninau'nung bii'ka kareaama aa'pau', "Aung ee'nung baa naning? Aa'ninge taaravaakoo': piong ee'noko ntong botovuriko."

**Jiisuu'ke Ma'narie Kurumaa'nii' Taare-antavuu'na'**  
(Mat 8:28-34; Mak 5:1-20)

<sup>26</sup> Teketa' teinge Kaaleli'nameng-eta tee nuaru' bakaasie pako'aara Kerasa'nameng-koo tavo'ariru' Kaaleli'nameng ninka bari'eeresi otoinameensi'koo. <sup>27</sup> Ee'noko teketa kansi'koo siarako naninge Jiisuu' kune'uu' osi pankamono-koonge ma'nari-po'nunge. Mmau' namu'pie koriaako'. Sieenai dai'aama nantoonge tanatavaako', kau'koo apasika' kaki-antavaama; <sup>28</sup> Teka tee dai'nisi totora'paara ma'narie mee'bora' sirakamaa'aape be'antavau'. Teke pankaroong kuvinanka-koo otoko' boo'nuka dako'domai, pava-koo deea', ee'noko simpenoi' otoko'. Teie naninge Jiisuu' kune'uko Jiisuu'ke tee ma'naang nauvuu'nung teieta bakoaraa'naang; <sup>29</sup> Ee'noko Jiisuu' taaravura tee boku-ma boonko dua'arara kinkinuu'nung Jiisuu'koo uro'kanoo', ee'noko aa'na' karoma aa'puu', "Jiisuu', dake arekee' nkomee'naang ning, Kumponing Deto Basi Bauringe? Eentamaramaang dake ning tora'an-tameauka'."

<sup>30</sup> Jiisuu'ke nia'uma aa'puu', "Da' miring baa?" Ee'noko teie aa'puu', "Karinga." Mmau' ma'narie kurumaa'au'nung-koo tee'. <sup>31</sup> Ee'noko teing nuu'ariru'nung ma'dinku'~noo' dua'koo botovuriaroo'naang. <sup>32</sup> Ee'noko teketa due'ke mmau' pooro'navontu meru'arima otoroko' mii-koo navete-koo. Ee'noko teing ma'nari oreng Jiisuu'koo eentavariko' tumparii'naang pooro'navontu-koo. Ee'noko teie taura'puru'. <sup>33</sup> Tee tee tenang ma'nari naning-eta bakoarira pooro'nanka-koo tumpariru', ee'noko tevontu pemue doonko koo'ariru' nuaru'koo bera ke'nuru'ariru' teke.

<sup>34</sup> Tenang teing pooro' bau'aariko'ninge ooaara kapoo' nkoaru'nung, mmariau' teing, ee'noko aung ee' oro' basiaro' dooreng avitoitoi bereng-antavau'.

<sup>35</sup> Teketa nantoong berou'nung ooaava'naang tee kapoo' nkoaru'nung. Ee'noko Jiisuu'anko porora tee naning kune'au' ma'nari teieta tenkenau'nung Jiisuu'koo kau'kanoo' ba'nanuio' duaanavari ee'noko noru' matauari. Ee'noko teing avoreau'. <sup>36</sup> Ee'noko teinge ooau'ninge tee nii'ning nauaariko' Jiisuu'ke taare-antavuu'na' tee naning ma'narie kurunk-eau'nung. <sup>37</sup> Teketa tee ookara nantoonge Kerasa'naameensi'kooninge due'ke otoroko'ninge nia'au'nung Jiisuu' teing-ankoita tenkenuu'naang pankainge avoro'ke aporo'urio' teing. Teketa tee napo' bakaasi-koo aa'earuu' toroaraa'naang. <sup>38</sup> Teie naninge ma'narie sipau'ninge nia'uu'nung Jiisuu' nari' otoree'naang tee ninka, teka teie potevuu'nung aa'puma, <sup>39</sup> "Dakanoo' osi tororarara tasi'antaveriaing Kumponing baru' deepo' tampa' nkoruina'." Ee'noko tee teketa tenkenura doorevurima nanuu'nung ooku-tunamono-koo teke osie Jiisuu'ke baru' deepo' tampa' nkovuu'na'koo.

**Jiisuu'ke Jairus Baurang Daa'uu'na' Ee'noko Nii'nani Ereng Take-antavuu'**  
(Mat 9:18-26; Mak 5:21-43)

<sup>40</sup> Teketa Jiisuu' nuaru'ke kato aveteka'koo toroarako nantoong karingai onkeonke'au'nung nempai otoko poio'. <sup>41</sup> Ee'noko teka narung naning tee-anko pou' miring Jairus, pava dootuu'nava tanatanuka-koong narung, ee'noko Jiisuu'anko kau'kanoo' kinkinura eentavaru' bakanava-koo pava-koo poo'naang. <sup>42</sup> Aung tee baurang nani masikani oto'evuko'nung, teni mare' kivora-ita kenaanka panka'noo'koo, teni ee'nani oki'naru'kuio'.

Jiisuu' teni oo-koo beko nantoong karingai paampa'aako' itoveema. <sup>43</sup> Ee'noko teke nani manikuma otoko' tarumatearako'nani mare' kivora-ita kemare'ka-koo, aa'nani nankai'nanka-koo ookara bakaang booring o'siiviu', teka nii'narai taare-antavua'. <sup>44</sup> Teni Jiisuu'koo dama'du pora komparu'nung bakaang mononopa'koong-koo kainu'koo, ee'noko namu'ke ereng takevuu'. <sup>45</sup> Ee'noko Jiisuu'ke aa'puu', "Tee baie ning komung?"

Tenang ookara penkempariko Piitai aa'puu', "Ovoring, da' karingai kororai da'koo iimparimang." <sup>46</sup> Teka Jiisuu'ke aa'puu', "Nii'nunge naninge taarevoo'naang komuio' iri' ning-eta tee-koo pare'arako mantompamira tee' minkuamaang."

<sup>47</sup> Ee'noko tenang teni manikuma baku'ar-avaruu'nung noru'arara teni dankuranku'arama pora kinkinuu'nung tee-koo uro'kanoo', ee'noko ookara nantoonge taaravaio' sira'paru'nung arekee' komparu'na' ee'noko namu'ke taarevou'na'. <sup>48</sup> Ee'noko Jiisuu'ke aa'puu' teni, "Ani ee, domang kuaa'doi otoaing. Da' dakaang baitoi taareroi nani. Mooa ninka nani-aing."

<sup>49</sup> Tenang teni ninka karesi otoko narung naning pou'nung tee naning pava dootuu'nava-koo pankaing bakanava-ankoita. Pora aa'puu'nung, "Daurang boo'paring. Nau-anta tamung pore'antaveauka'."

<sup>50</sup> Teka Jiisuu'ke taaravura tee aung nauvuma aa'puu', "Aroreauka', masika'antaveko naro' teni taarevoo'naang."

<sup>51</sup> Ee'noko tenang tee pava-koo pora teie nii'ning taurapuriaru' kuung tung-koo, teka Piita ee'noko Jooni ee'noko Jeemisi dovang ee'noko baumararing tenie taura'puru'. <sup>52</sup> Ee'noko ookara birong-nupoong biromparima ai'nontu'ariko oovurira aa'puru', "Birontariauka', ai' ani teni booa', teka tamung aatu-maang."

<sup>53</sup> Ee'noko teinge benkempau' tee, mono patorompau' aa'nani noru'ai. <sup>54</sup> Teka bireng teni-koong kompura teni bokuma aa'puu', "Tooto' daa'daravai."

<sup>55</sup> Ee'noko bakaang tanuaang tenang toroaru' ee'noko teni deto i'amparu' namu'ke. Ee'noko kapoo' nai-koong avuree'naang nauvuretu'. <sup>56</sup> Ee'noko teni baumararing bakei ta'ninuretu'nung, teka teie orokovuretu' nii'ning nauaarearoo'naang kapoo' nkoaru'nung-koo teke.

**Jiisuu'ke Teing Nanai'keta Kenaanka Mintoong-koo Botovuru'na'**  
(Mat 10:5-15; Mak 6:7-13)

9 Ee'noko Jiisuu'ke teing bakaning barevare-nupoong nanai'keta kenaanka naro' bokuvurira iri' avuru'nung makosi-antavurima ma'nari amute-murii' bata'aarii'naang ee'noko siipananka taare-anta-koo. <sup>2</sup> Ee'noko teie botovuru'nung teing taare-anta nkoaama Kumponing bakaang muu' daankiaa-va'naang. <sup>3</sup> Ee'noko teie aa'puru' teing, "Kapoo' nkave-riauka' nanirima: Donsi' ee'noko siirau' nii'noo' taamang nii'noo' mooni'. Ee'noko mononopa' kenaa'ka ninka naniriauka'. <sup>4</sup> Ee'noko areva tuntariainava-koo te naro' otoriai bera te' osi siperiainoo'ke basi. <sup>5</sup> Ee'noko are' tokoo dii' onkeonke'daariauka'noo' temono siperi-ma temono-koong da'mong tankaveriaing diikaang pe'naa'keta, temono Kumponing-koo maarekusi'na-mono taa'ni'antaveri." <sup>6</sup> Ee'noko teing tenkenaara nanau'nung osinankai daankiaama tee dooreng tampara ee'noko avitoitoi-koo siipa-po'nupoong taare-antavaarima.

**Eeroti' Papaaravaru'na' Mmau' Taa'ni'anta Ta'nimpaarii' Taaravura**  
(Mat 14:1-2; Mak 6:14-16)

<sup>7</sup> Enang teie Eeroti'ke, temeensi'koong ovo'ma'ke taaravuu'nung ookara kapoo' Jiisuu' bakaning ninka nkoau'ning, ee'noko papaaravaru'nung tee nantoonge avitoitoi minkuaako. Nii'ninge aa'paako', "Jooni napo' daa'aring bou'noo'keta." <sup>8</sup> Napo' nii'ninge aa'paako', "Tee Eliasi poaing-koong tavo'aring." Ee'noko nii'ninge ee' minkuaako', "Nii'nung pa Kumponing-etaing urikupoong nakaro-nupoong-koo daa'aring." <sup>9</sup> Eeroti'ke aa'puu'nung, "Jooni tee ning botomario' kuru napu'au'nung. Teka tee baa aung tee' naumaari-maang?" Ee'noko teie taung Jiisuu' oo-koong besiu'nung.

**Jiisuu'ke Nantoong Pa'noko' Kokorei' Divu' Bau'uru'na'**  
(Mat 14:13-21; Mak 6:30-44; Jon 6:1-13)

<sup>10</sup> Teketa botovuru'noo'keta toroarira kara okovuri nkanukai Jiisuu' nauaako'nung kapoo' teinge nkoau'ning. Ee'noko teie bokuvurira teing tonta'ariru' bii'ka otoroo'naang osinamono-koo miring Besaida. <sup>11</sup> Tenang karika'ke noru'aara tee teinge siompau' Jiisuu', ee'noko teie onkeonke'uru' teing, ee'noko kara nauvuru' Kumponing bakaang muu'koong. Ee'noko taare-antavuru' teing siipa-nupoong. <sup>12</sup> Enang doong oparama nanuko teing bakaning barevare-nupoong nanai'keta kenaanka porora aa'pau' tee, "Aing nantoong karika' botoveriko osinanka anketa due' otoroining-koo berora aasi'doma ee'noko taamananka ooaavai, ai' nii' anke tee tamung mee'bora' sirakamaa'koo o'noring." <sup>13</sup> Teka teie aa'puru'nung teing, "Dii'ke kapoo' averereriko naiaavaing." Ee'noko teinge aa'pau', "Nii' pa'noko'nuri berete' ee'noko keura tavi'ning naing oto'memuring, daua

otoa'. Taamang mmau' moo'ampiri dei makotupeu' aing ookara karika' bau'koo dake tampeko deeko'." <sup>14</sup> Aing-koo teing deerunoo' donkaang naing pa'noko' kokorei'pina' otorou'nung teke. Ee'noko teie aa'puru' bakaning barevare-nupoong, "Navituna' ba'ngan-antavereriai, naruaape-pina' navitu-koo."

<sup>15</sup> Ee'noko teinge tee' nkoarima doonko ba'ngan-antavaaru'. <sup>16</sup> Ee'noko Jiisuu'ke teing pa'noko' berete' ee'noko tavi'ning keura nkavura tee ankamparu' deto paning-aape ee'noko biraanke-antavura pisi'uru' teing. Ee'noko avuru' teing bakaning barevare-nupoong tan-kee'aarii'naang nantoong karika'. <sup>17</sup> Ee'noko ookara taamanaara poovorou'. Ee'noko kakita'nanka sipaarun'ning kivora-ita keveku'ka peku' maanto'an-tavau'.

**Piitai Jiisuu' Tee Pako'pari'nii' Tasi'pura Sira'puu'na'**  
(Mat 16:13-19; Mak 8:27-29)

<sup>18</sup> Nii'na'mung Jiisuu' baka kunsiamama ee'noko bakaning barevare-nupoong nari' otoroita' nia'uru'nung teing aa'puma, "Ning baa nantoonge tammaamaung?" <sup>19</sup> Ee'noko teinge maku'aama aa'pau', "Nii'ninge Jooni tee minkinara tantaamaung, ee'noko nii'ninge tee Eliasi poaing-koong tantamaung, ee'noko nii'ninge urikupoong nakaro-nupoong-koong narung boo'keta daa'aru'nung tantamaung." <sup>20</sup> Ee'noko napo' teie aa'puru' teing, "Teka dii'ke ning baa tammerimaung?" Ee'noko Piitai bari'uma aa'puu', "Da' aa' tee Kumponing teroita Pako'pari'nii' nantoong domamperira tareveriainoo'koo."

**Jiisuu'ke Uro'ke Nauvuru'na' Boo'parara Napo' Domamparavaina'**  
(Mat 16:20-28; Mak 8:30-9:1)

<sup>21</sup> Teka Piitai Jiisuu' tee Pako'pari'nii' tampuio' Jiisuu'ke nii'nung naning nau-koo aa'na' orokovurima † aa'puru', <sup>22</sup> "Ning Tee Naning~naumpo' Paning-etaing teing amutemurii' arikananka tora'pampaing, ee'noko aing aa'ninge tompimaavaing: pankenukai, piristi'koong ovontunukai ee'noko boto naunukai, ee'noko tee dupisi'maavaing. Teketa beenang doong tankinuko napo' domamarara daa'maravaing."

<sup>23</sup> Ee'noko teie napo' aa'puru' teing ookara, "Naning ning siomui poo'naang piavora deeko', baka bakaang pia iro' doonko tompimparavaing ee'noko doong kante bakaang aa'barata' poru'ui ning siomumaa-toaing. <sup>24</sup> Ee'koo, baa tee naning bakaang domaang ning-koo orokovuma baka tare-koo pivoaing tee paa'aravaing, teka baa tee naning bakaang domaang ning-koo aroo'ari dua'uaing tee domamparavaing. <sup>25</sup> Nanging kapoo' ookara kansi'kooning barampui okovura bakaang domaang darove'ari paa'arako teinge arekee' pakuaapeu'? Ee'noko naning aming avupeu' tee bakaang domaang paa'aru'nung napo' moo'koo? <sup>26</sup> Napo' baa tee naning nkaang miring

† Nii'ninge Jiisuu' daurorong deeng-anta-koo paaravaa'neeng-koo.

sira'koo maia'omaung ee'noko nkaang kara-koo, tee-koo naning-koo ning Tee Naning-naumpo' Paning-etaing tee maia'moaing tenang moainang nkaang meenasi ninka ee'noko Mma' bakaang meenasi ninka ee'noko teing koosinunanka meekupoong biikaang. <sup>27</sup> Teka ninge masikung naurampimang, nii'ning nantoong anke nari' donkonai otoroining teing boo'koo tora'kaava' muu' Kumponing bakaang taa'ni'poi otoko ooaavaing."

**Jiisuu'ke Beenaumo Taura'puru'na' Muu' Kumponing Bakaang Meenasi Oo-koo**  
(Mat 17:1-13; Mak 9:2-13)

<sup>28</sup> Enang aung minkuvuu'noo'keta ~beenang-taa doong-pina' tankinuko teie aing aa'ning bokuvurira berou': Piita, Jooni, ee'noko Jeemisi nari', iu'koo deto teke kungsi-koo. <sup>29</sup> Ee'noko tenang tee kunsiarako aasi'ke Piita dovang tavuru'. Teketa Jiisuu' mme' kunsiaritaa' bakaang oing oro'noo' aampari'aru' ee'noko bakaang mononopa' kakaara sisisiisi deemparu'. <sup>30</sup> Ee'noko tenang kenaanka naninka ta'nina' paning-etaing meenasi ninka oro'pareta tee ninka kareaako' aa'naanka Moosesi ee'noko Eliasi. Ee'noko Kumponing bakaang miru' dupevui Jiisuu' boo'paravaina' teke Jerusalema'ke minkuaako'. <sup>32</sup> Enang tee Jiisuu' ninka minkuai otoko Piita dovange tantearira Jiisuu' bakaang meenasi ooau' ee'noko tenaanka naninka tee ninka donkonuresio'. <sup>33</sup> Ee'noko tenang tenaanka naninka Jiisuu'ankoita tenkeng-aapeareko Piitai Jiisuu' aa'puu', "Ovoring ee, bakei tampa' nii' anke o'norimaang. Aia' nii'ke beevaari bare kaniampiai, nava da' dakanava, nava Moosesi bakanava ee'noko nava Eliasi bakanava." Botu noru'ua', tamung tee' minkuvuko'.

<sup>34</sup> Ee'noko tenang Piitai tee' minkuvuko kamo'ke pora daka'puru' teing, ee'noko avoreau' ka'mo'ke kuung deempurio'. <sup>35</sup> Ee'noko teieta kamo'keta auronge karo-ma aa'puu',

"Aung tee nnuring, ninge piaavansi miru'antu'nung. Taaraveriaing tee."

<sup>36</sup> Ee'noko tenang aorong karoio' Jiisuu' baka otoko ooau'. Ee'noko teinge teing doong-koo makempau' naning nauaava' kapoo' teinge ooau'ning bera Jiisuu' boo'keta daa'aru'noo'ke basi.

**Jiisuu'ke Nemaka Taare-antavuu'na' Ma'naange Kookoko-antavuko'nung~**  
(Mat 17:14-21; Mak 9:14-29)

<sup>37</sup> Teketa dauna'mung iu'keta siarira poroio' nantoong mmau'ke kune'au'nung tee Jiisuu'. <sup>38</sup> Ee'noko naning karika'koo meu'keta bokuma Jiisuu' aa'puu', "Nau-anta, eentamaramaang da'koo nnuring oovee'naang ai' tee tee narung masikung nnuring. <sup>39</sup> Ee'noko da'maiko' namu'ke teie ma'naange korivuko ta'nina' bokukoo'. Teie nuanua-antavuma bera ka'buaira-antavukoo' napo' mapou-antavuma~, ee'noko da'deng sipuarukoo'. <sup>40</sup> Ee'noko eentamaring dakaning barevare-nupoong-koo bata'aava'naang, teka teing makosiaavaruing."

<sup>41</sup> Ee'noko Jiisuu'ke maku'urima aa'puu', "Nko dii' masika'anta otoriainge, koontariaing, are' basinaroonge dii' ninka nari' o'norimaatoainge dooroontampiri? Po'antaveai tee dauring a'." <sup>42</sup> Teketa tenang tee nemaka Jiisuu'anko poko teie ma'naange papaara-antavura nuanua-antavuu'. Teka Jiisuu'ke aka'puu' tee ma'naang orara, ee'noko unaa-antavura tee nemaka bauma napo' avuu'. <sup>43</sup> Ee'noko ookara asikovuru' Kumponing aa'na' pankaing tasi'paara.

**Jiisuu'ke Dama'ke Boo'antavaavaing Kemu'kana' Sira'puu'noo'**  
(Mat 17:22-23; Mak 9:30-32)

Teka ta'ninaara karakaraarearima Jiisuu' daangampaako ookara kapoo' nkovuu'ning-koo teie teing bakaning barevare-nupoong aa'puru', <sup>44</sup> "Kara aing pinka'eriaining: Ning Tee Naning-naumpo' Paning-etaing tee nkaning-koo navumainuka-koo narunge tooka kompui taura'muu'naang nantoong oreng biikaang bireng-koo." <sup>45</sup> Teka teinge tasi'paava' tee tee' minkuvuu'nung kapoo' teing-koo baku'nisi deemparako teinge tasi'paa'neeng-koo, ee'noko teinge avore-aara nia'aava' tee aung anaare kara.

**Baata Teing Pankeng?**  
(Mat 18:1-5; Mak 9:33-37)

<sup>46</sup> Ee'noko teketa bii'ka tata'eeko' aa'paama, "Nii'koo baa pankaing?" <sup>47</sup> Teka Jiisuu'ke biikaang domangkoong noru' noru'ura teie narung tooto' nkavura tee-anko donkong-antavuu'. <sup>48</sup> Ee'noko aa'puru' teing, "Baa tee naning ning nkaang miring-koo aung tooto' oki'nara onkeonke'uaing teie tee ning onkeonke'muaing, ee'noko baa tee ning onkeonke'muaing teie tee onkeonke'uaing tee ning botomuu'nung, ai' tee naning dii'koo meu'ke oki'narapina' otoaing tee tee dii'koo pankaing."

**Nantoong Turamaaria' Otoromaing Teing Pakupakunupoong Noru'kooning**  
(Mak 9:38-40)

<sup>49</sup> Joonie bari'uma aa'puu', "Ovoring, nii'ke ooampiring naning narung ma'nari bata'uriko dakaang miring-koo ee'noko nii'ke poteampiri tee nii' ninka nari' da' siontuaung-koo." <sup>50</sup> Teka Jiisuu'ke aa'puu' tee Jooni, "Orokoveriauka' tee, ai' tee naning dii' turanturiaung tee dii' pakururimaung."

**Jiisuu' Jerusalema'aape Nanuu'na' Boo' Kune'uu'naang**

(9:51-19:28)

**Sameria'nupoonge Onkeonke'aavaruu'na'**

<sup>51</sup> Tenang Jiisuu' bakaang doong due'uoio' Kumponing paning-aape boku-koong Jiisuu' Jerusale-

ma'aape be'koo deravaru'.<sup>52</sup> Ee'noko teie kara nkanuka tutung uro'ke botovurio' Sameria'koonavuntu'koo berou'nung Jiisuu' bakaning ninka aasiaavainoo' maa-mu-antavaava'naang.<sup>53</sup> Teka nantoonge onkeonke'aavaruu'nung tee Jiisuu', biikanoo' meepo' oki'naa-antavuing-pina' Jerusalema'aape nanuaing deemparako'.<sup>54</sup> Ee'noko tenang bakaning barevarenaankai oovureta, aa'noko Jeemisi ee'noko Jooni, aa'puretu', "Ovoring, dake ee nee' pia-antameremang nta' paning-eta bokuampeko siarara opuri taivuriaina' aing Eliasie nkovuu'na?"

<sup>55</sup> Teka teie bere'arara orokovuretu'nung tenaanka aa'purema,<sup>56</sup> "Dee'ke noru'erea' aremurii' tanuaang dee' oto'derureng, ai' ning Tee Naning-naumpo' Paning-etaing nantoong orari-koo moa', teka nantoong domang-anta-koo mou'nung." Ee'noko teing teketa nii'namono-koo berou'nung.

### Jiisuu' Siong-koo Makotua'na' Noru'areko'naanka (Mat 8:19-22)

<sup>57</sup> Ee'noko taunge beroma naninge Jiisuu' aa'puu'nung, "Ninge tee da' siontampaing are' tokoo da' beainoo'." <sup>58</sup> Teka Jiisuu'ke maku'uma aa'puu' tee, "Nkaunanka biikaning kumpenanka oto'evoromaung, ee'noko barennanka auvi'au-kooning biikaning bitonanka, teka ning tee Naning-naumpo' Paning-etaing tokoo bore' patu'maravainoo' oto'memua'."

<sup>59</sup> Napo' Jiisuu'ke nii'nara aa'puu', "Ning siomeaing dake." Teka teie aa'puu', "Ovoring, io' taura'meko mma' dako'ampainoo' basinoo' mma' ninka o'nore-aing, ee'noko mma' dako'amirai'nange da' siontampai." <sup>60</sup> Teka Jiisuu'ke aa'puu' tee, "Siperiko boo'nukai bii'ka boo'nuka dako'aariaing, teka da' aa'damaang: Bera daankieaing tee Kumponing bakaang muu'." <sup>††</sup>

<sup>61</sup> Nii'nunge napo' aa'puu', "Ninge tee da' siontampaing, Ovoring, teka iro' taura'meko tutung si'noo-ra'arampaing nkanoo'nupoong." <sup>62</sup> Teka Jiisuu'ke tororee'arama-nanu' kenkumpura aa'puu' tee, "Tee naning mintoong-koo mme' komparama torotorara-peu'nung tee' oro' tee, naning makotua' Kumponing bakaang muu'koo mintoomparaa'naang."

### Jiisuu'ke Naruaape-ita Kenai'ka Kara Nka-koo Botovuu-ru'na'

**10** Teketa Jerusalema'aape deto nari' nanaava'naang piavora Jiisuu'ke naruaape-ita kenai'ka miru'urira kenaankana' botovuru' osinanka beero'aari nanaava'naang uro'ke. <sup>2</sup> Ee'noko teie aa'puru', "Sinang tee bakei aa'na' meura'puing, teka kavu'nupoong oki'ning, tee'koo kunsirariaing sinang kavu'koo Ovoringe kavu'nupoong botovuriaina' tee-koo bakaang mintoong-koo. <sup>3</sup> Aia' beriai naurampirina'.

† Ee' oro'pari otong: Tee naning kapoo' baumai deing nka-koo noru'uitaa' Jiisuu' tee' minkuvuu'. †† Nantoong Jiisuu' domaang okora' tasi'paarimaingee tee siompaama domaang oparavaung oto'evoromaung, teka kansi'koong kapoo' domange dai'aamaing teing domaang okora'keta taapo'nupoong, boo'nuka Kumponing-ankoi.

Aing ee, ninge tee dii' sipisipi'koo kampionu-pina' botorampimang nkaunanka-koo meu'ke botorampipeu'na'. <sup>4</sup> Kereka dovang siirau' nkaveriauka', boonamante~ nkaveriauka'. Nantoong ninka taunge minkurariauka'.

<sup>5</sup> "Areva pava dii' tuntariaina' tutung aa'periai: Tampara! Mooa dii'koo ava-koo otoaing. <sup>6</sup> Ee'noko naning mooa bauko teke otoko deeko' diikaang mooa tee-koo keemparavaing. Teka dii' taara-koo kasiaavaruko deeko' tee diikaang biraanke napo' dii'koo toroara-vaing. <sup>7</sup> Ee'noko teva nava-koo otoriai taamanirima tu-aantarima kapoo' teinge araariaing ninka, ai' teie naninge mintoomparamaunge tee tee' bakaang moo' nka-koo makosi. Pava paareveriauka'.

<sup>8</sup> "Arenang tenang dii' osi navuntu'koo du'dariko onkeonke'daarima taamang araariaing naieriai. <sup>9</sup> Siipanoong taare-antavererema teing ookara aa'periai, 'Tee muu' Kumponing Bakaang dii'koo due' poing.'

<sup>10</sup> "Teka arenang dii' du'dariko osinamono-koo onkeonke'daariauka'nung deeko' osi-koo meu' berira aa'periai, <sup>11</sup> 'Aung diikaang da'mong nii'koo pe'naa'koo na'nampuing tankamarimang amono Kumponing-koo maarekusi'namono taa'ni'anta-koo. Bane taaramereria' teka dii'ke noru'eriaing Kumponing bakaang muu' dii'koo due' poing.' <sup>12</sup> Ninge naurampimang dii', teing enang onkeonke'daariauka'ning teing doong asi'na'mung kiimata tora'paavaining, Sodom-navuntu' nta'ke paning-eta pora taivuru'nung-koo dau basinoo'."

### Piaaru'nanka Bakei Teing Osi Pankeng Bere'ariaing. (Mat 11:20-24)

<sup>13</sup> "Baka'e piaaru'nuka dii' Korasin-nupoong, tora'kiri-aining. Piaaru'nuka dii' Besaida-nupoong, dii' tora'kiri-aining, ai' dii' teing kapoo'nanka iri'po'ning ta'nim-parii'nanka dii'koo nkoaru'ning ooverima bere'daripuru'. Teinge Ju'deeaing Saidoni'nupoong ee'noko Taia'nupoonge ooaara dei namu'ke bere'aripeu', sipunge poo'arima mononopa' orarunsi-koong kurumparipeu' bere'ariru'nung-koo taa'ni'antavarima. <sup>14</sup> Teka aa'dampimang, te'mung Kumponing nantoong ki-imatavuriaina'mung dii'ke dau basinoo' tora'periaing Taia' naankai ee'noko Saidoni' tora'pureainoo'keta. <sup>15</sup> Ee'noko dii' Kapaneume'nupoong deto paning-koo basirariaing-pina' daang noru'darimaing. Dii' aa' doonko nekipa'noo'koo sing-antaruraining."

<sup>16</sup> Ee'noko teing bakaning naruaape-ita kenai'ka nanaava'naang botovurima napo' aa'puru', "Baa tee naning dii' taararurimaatoaingee tee ning nari' taaramumatoaing. Ee'noko tee naning diikaang kara dimpa'umaatoaingee teie tee ning nkaang kara dimpa'umaatoaing. Ee'noko tee ning nkaang kara dimpa'umaatoaingee tee ning botomuu'nung bakaang kara tee' nari' dimpa'umaatoaing."

### Jiisuu'ke Iri' Kompau'nung-koo Biivimpariaroo'naang Nauvuru'na'

<sup>17</sup> Teketa tee Jiisuu'ke teing naruaape-ita kenai'ka tee botovurio' nanaakotaa' doturotu narung ninka toroariru'nung aa'paama, "Ovoring ee, siipa narung deea' ma'narinanka apoo'arampirieenge dakaang miring ninka." <sup>18</sup> Ee'noko teie aa'puru' teing, "Ninge oosio' Sietani' paning-eta depeto piping-pina' dua'aru'nung. <sup>19</sup> Aing ee, ninge tee dii' purinto' arompiping boru'nanka ee'noko munkeitananka mme'koong ee'noko ookara iri' Sietani'nung puru'koong, ee'noko dii' teing kapoo'ke baikeruriauka'nung. <sup>20</sup> Teka tee dii' baru' doturariauka'nung tee-koo, aa'noko ma'narinanka dii'koo boong otoroinoo'koo, teka doturariaing diikaang miring paning-koo daariari otoinoo'koo."

### Jiisuu' Dotuaru'na' Kumponing Tamunsi'nupoong Siraka'antavurio'

(Mat 11:25-27; 13:16-17)

<sup>21</sup> Tenang teing naruaape-ita kenai'ka toroarira minkuaako tee-koo batei-koo Tanuaang Meekunge Jiisuu' dotu-antavuo' aa'puu', "Mma' ee, tampara tantamang da' Ovoring paning-koong ee'noko kansikoonge, Dake aa'nou'nung-koo: Dake tee doorenang tampara baku'eu'nung-koo teing-koo aa'ning-koo matau-po'nupoong ee'noko noru'po'nupoong ee'noko sira'peu' teing-koo tootoia-koo. Teing nantoong pi-aaveri piarou'na' tee'. Ee', Mma'."

<sup>22</sup> Ee'noko nantoong karavurima aa'puru', "Ookutunung kapoo'nanka tee Mma'ke pare'muu'nung ee'noko naning otoa' ning Tee Bauring noru'mui otong, Mma'ke deeko' noru'mui otong. Ee'noko napo' naning otoa' Mma' noru'ui otong, teka ninge Bauringe deeko' noru'ansi o'hong. Ee'noko nantoong teing naing ninge Bauringe miru'arampaining-koo oro'antavanko noru'aavaing tee."

<sup>23</sup> Tenang barevare-nupoong-anko bere'arara bii'ka-mai' otoroi aa'puru', "Biraanke-nupoong teing nantoong ookaavaining dii'ke ooverimaing-koo. <sup>24</sup> Ai' ninge tee naurampimang, karingai-nakaro-nupoong ee'noko dauraronuka-oo-koo piavoroko' ninge kapoo' nkoanko enang ooverimana', ee'noko tee ooaavaruko'. Ee'noko taara-koo piavoroko' kapoo' daankianko dii'ke taaraverimaing, ee'noko tee taaravaavaruko'."

### Naning Sameria'nung Tampara-koong Minkunaa

<sup>25</sup> Ee'noko narunge boto-naue donkonura paaravuma aa'puu', "Nau-anta, ninge aming nkoamira domaang oparavaung okomuaing?" <sup>26</sup> Jiisuu'ke aa'puu', "Aming tee Moosesi-nung boto-koo daariari otong? Arekee' deeruemaunge?" <sup>27</sup> Ee'noko teie maku'uma aa'puu',

"Dake pankaruntoompeaing Ovoring dakaang Kumponing ootukunung dakaang domang-eta ee'noko ootukunung dakaang uraang~eta ee'noko

ootukunung dakaang purinto'keta ee'noko ootukunung dakaang onou-eta, ee'noko tee naning da'koo due'nung daka nari'."

(Boto 6:5)

<sup>28</sup> Ee'noko Jiisuu'ke aa'puu' tee, "Dake tampa' bari'meing. Tee' nkovera da' domantaravaing."

<sup>29</sup> Teka teie maia' daka'koo piavoma aa'puu' tee Jiisuu', "Ee'noko baie tee naning ning-koo due'nung miru'ari otoing?" <sup>30</sup> Jiisuu'ke maku'uma aa'puu'nung, "Naning Ju'koo narung Jerusalema'keta Jerikoo'navuntu'aape doonko beko'nung ee'noko bakisipunuka-koo maamunoorak'koo dau basiaru'nung. Teinge mura'ama ookara kapoo' teka kiru'aara tenkenau'nung oki'naruu'kuio'. <sup>31</sup> Teketa tee narung piristi' tevunge doonko bema tee oovura baari'ui nii'namenge beu'. <sup>32</sup> Tee' nari' napo' narunge Liivai'ke bakanamuaang-koonge pora teka oovura tee, teie napo' baari'uu' nii'namenge.

<sup>33</sup> "Teka narung dii'ke munte'ererimaing-koong, Sameria'koong, nanuma te' pou'nung tee otou'noo', ee'noko teie oovura piaavuu'nung tee. <sup>34</sup> Ee'noko teianko bera teka'pau'nairu dai'uu', duunie ee'noko uaini dovange sisi'uma, teketa bakanavoro' doonkii'navoro'koo ba'hang-antavura po'nupo'nuka biikanavakoo be'antavuu' ee'noko teka tarevuu'. <sup>35</sup> Ee'noko dau'namung po'nupo'nuka biikanava' tarenara keura kina'ning avuma aa'puu', 'Aung tareveaing dake, ee'noko arekee'ning aing-koo daua dua'eaining aung tarevema dama'ke mora maku'dampaing.' <sup>36</sup> Emu' baa teing-koo aing-koo beenaumo-koo dake noru'ei, naning tee-koo due'nung-pina' tasi'paring maamunoorak'koo tavau'nung-koo?"

<sup>37</sup> Ee'noko teie boto naunuka-koonge aa'puu', "Tee narung tee piaa oro'antavuu'nung tee-koo." Ee'noko Jiisuu'ke tee aa'puu', "Bera tee' nari' nkoveaing."

### Jiisuu'ke Meeri' Biivimpuu'na' Tee-koo Barorompario'

<sup>38</sup> Enang tee teketa taunge nanaama nii'namono-koo osi basiariko nanie manikumai miring Maata'ke Jiisuu' onkeonke'ura bokuvuu'nung bakanava-koo. <sup>39</sup> Ee'noko anie tee baara'ma'naang nani otoko'nung bakaang miring Meeri', teni Jiisuu'koo kau'kanoo' ba'nanura baroromparakoni bakaang nau-anta-koo. <sup>40</sup> Teka Maata'ke taamang avutevu' maamu-antavuma tapotaparama noru' baava'aru', ee'noko tenie Jiisuu'anko bera aa'puu', "Ovoring ee, da' ee tara'doa' otong ani ntara'ma'naang ning si'muinani? Ning ninka pore'momaang. Dake naueko pakumuai."

<sup>41</sup> Teka Ovoringe maku'uma aa'puu' teni, "Maata', Maata', da' pore'domaang avitoitoi noru'darama avutevu'koo. <sup>42</sup> Kapoo' narung masikung da' piaropeu'nung otong. Meeri' teni tee kapoo' tampara bamparinani pari'koo makosinamurii' deea'."

### Kunsi Nkona'

(Mat 6:9-15; 7:7-11)

**11** Nii'noo'ke tee Jiisuu' nii'namung kunsiarako'nung. Ee'noko tenang bakearako bakan-

ing barevare-nupoong-koo narunge aa'puu', "Ovoring, naumeriai kungsi bakana' Joonie bakaning barevare-nupoong nau-antavuru'na'." <sup>2</sup> Ee'noko Jiisuu'ke aa'puru' teing, "Tenang kunsirarima aa'perimatoaing: Niuma paning-koo otomaung, dakaang miring meeka'antavari otoaing; dakaang muu' po'antaveai; dakaang pia nkoaravaing anke kansi'koo paning-koo nkoarimana' nari'. <sup>3</sup> Doong kante-koo taamang makosina' amerimaatoai; <sup>4</sup> Ee'noko tonta'memuriai niikaning orarananka, nii'ke nii'ka tonta'evorompimaung-koo teing nii' oraka' nkomaarimaing. Ee'noko parapaara-koo si'meriauka', teka tonta'antameriai teieta naning orara bakaang purinto'keta."

<sup>5</sup> Ee'noko Jiisuu'ke bakaning barevare-nupoong aa'puru'nung, "Dii'koo narung da'maiko' oto'derupeu'nung ee'noko meu'namang tee-anko bera aa'pepeu', 'Mmaiko' ee, io' taamang-koo beekuri amesai. <sup>6</sup> Naning narung mmaiko' isipo'keta ning-anko poing ee'noko ning kapoo' oto'memua' tee avompang.' <sup>7</sup> Ee'noko da'maiko'ke kuung-eta ee' bari'dupeu', 'Ning pore'antameauka'. Karanaang tero da'mariring ee'noko nnurukaa' nari' aatumpiri otong nii'daang. Ning deto daa'koo makosi deea' da' kapoo' avu'koo.' <sup>8</sup> Teka ninge ee' naurampimang, tee tee tamung daa'aravarupeu' kapoo' aruu'naang bane da'maiko'ke, teka tee dake ereanavei otoko deeko' daa'arara teie arupeu' aming kapoo' ookara pi-aroepu'ning.

<sup>9</sup> "Ee'noko ninge aa'dampimang, Eentarariai aruriana'. Besi'eriai daa'eriaina'. Kopikopi'eriai karanaang daate'deruriaina'. <sup>10</sup> Ai' ookara nantoonge eentavari-mainge tee nkavaamaung, ee'noko besi'aamainge tee daa'aamaunge, ee'noko karanaang kopikopi'aamaing teinge daate'evurimaunge. <sup>11</sup> Dii'koo baa dauring-pou'nung dauringe taamang eentaruko dei dake ee kapang avepeu', nii'noo' tavi' eentaruko dake ee boru' avepeu', nii'noo' sinkaa' eentaruko dake ee munkeita avepeu'? Otoa! <sup>13</sup> Tee tee dii'ke orange diurukaa'koo tampa' avuavu' nkoverimaung deeko' noru'eriaing Kumponingee tee Niumai paning-koonge Tanuaang Meekung tampa' masika' aruriaing dii' tee-koo eentariaining."

#### Jiisuu'ke Tee Tenaare Kara Kopeu Ninka Pau'aako'naare Daang-antavuu'na'

(Mat 12:22-30; Mak 3:20-27)

<sup>14</sup> Enang tee Jiisuu'ke ma'naang amako-anta nkovuko'nung bata'uu'nung. Tenang tee ma'naang tenkenuko tee naning karou'. Ee'noko nantoong ta'nimpariru' karakararearima. <sup>15</sup> Teka nii'ninge aa'paako', "Aunge tee Kopeu bakaang purinto'ke ma'nari bata'urimaung, tee ma'nari biikaang pankaing." <sup>16</sup> Tee' minkuaako napo' nii'ninge paara-antavaama aa'pau', "Taa'ni'anta paning-etaing naumeriaing tee purinto' kompei oting Kumponing-etaing deeko'."

<sup>17</sup> Teka teie biikaang onou tasi'pura aa'puru'nung teing, "Ookara muu'nanka bii'ka siivenke'arimaing

kare-nupoonge pini daako'arimaung, ee'noko tee pu-ata' siivenke'arimaung teie dua'arimaunge. <sup>18</sup> Ee'noko Sietani' tee'ke, baka siivenke'ari dei arekee' bakaang muu' napo' donkonui nari' otopeu'? Dii'ke aa'merimatomana'koo: ninge ma'nari Kopeu ninka bata'arimaung. <sup>19</sup> Ee'noko ooveriko dii' siontaarimaing-koo nii'ning ma'nari bata'arimaing otorong. Ee'noko ninge Kopeu ninka ma'nari bata'arimaung tamperima deeko' teing siontaarimainge baa ninka bata'aarimaung tamperikoo'? Arekee', teing napo' ning-pina' nari' Kopeu bakaang purinto'ke bata'arimaing tampereremaing ee? Tee' taararaarira teinge tuutunantaariaing dii', ai' teing tee'ke ni'ninka nari' nkomarimaing. <sup>20</sup> Teka Kumponing bakaang iri'ke ma'nari bata'arimaung deeko' tee muu' Kumponing bakaang tee dii'anko taa'ni'poi poing.

<sup>21</sup> "Tenang teie naningee purinto'ke tavu'kooningee tanke'pari bakanava tampava tarevui otoko bakaning kapoo'nanka pinka'ari otomatopeu'. <sup>22</sup> Teka tenang narung aa'na' purinto' tee-koo dau basi tee-koo kokoroarara puru'ura dei, teie pari'upeu' ookara bakaning tavu'kooning tee e'manumaing ee'noko tankaampu-peu' bakaning kapoo'nanka. <sup>23</sup> Ee'noko dii'ke tasi'meriarura dii' teing ning-koo kare-nupoong, ee'noko dii' ni'ninka nari' nantoong oosiarampiarura dii' purarenka' nkonuka Kumponing bakaang muu'keta."

#### Ma'nari Bata'nii'nanka Toroaripeu'na'

(Mat 12:43-45)

<sup>24</sup> Ee'noko Jiisuu'ke kato nau-antavurima aa'puru', "Tenang ma'naang orara tamung bata'nisi naning-eta tenkenura avitoitoi nanupeu'nung ntong otoa'nairue uaavoainoo' besi'uma, ee'noko tokoo oovuarura aa'pu-peu', 'Ning toromaravaing napo' nkanava ning mou'nava-koo.' <sup>25</sup> Ee'noko tenang toroarara kiiroraa'ari neriario' oovupeu' Tanuaang Meekung borivua' bakaang doomang-koo. <sup>26</sup> Teketa bera teie ~kenaankataa ma'nari napo' bokuvurira toroaripeu' baru' aa'na' oreg tee puru'ai. Ee'noko teing tumparira tee-koo otoropeu', ee'noko asi'nung ootoo' tee naning bakaang bakei aa'na' oraru'kupeu' tutung otoko'na'keta."

<sup>27</sup> Aung tee' oro' kara Jiisuu'ke minkuvui otoko nani manikumai karinga-koo meu'keta bokuma aa'puu', "Biraankearu'nani teni dauko da' pararuu'nani ee'noko noonoo'duu' da'." <sup>28</sup> Teka teie aa'puu', "A, teing oo nantoong biraankeariaining Kumponing bakaang kara taaravaara i'ma'aavaining."

#### Jiisuu'ke Tautauvuru'na' Taa'ni'anta Paning-etaing Mu-tuariri Besi'aako

(Mat 12:38-42; 5:15; 6:22-23; Mak 8:12)

<sup>29</sup> Tenang nantoong karika' aa'na' mmau'paririo' Jiisuu'ke kara tutumpuu'nung, aa'puma, "Dii' enanavarang bakei oreg, nii'ning Sietani'keta una-antavaranko tokomerima aa'merimaing, 'Taa'ni'anta paning-etaing naumeriaing dake Kumponing bakaang iri'ninka mintoontaramaung deeko'.' Bakei

Kumponingee dii' taa'ni'anta nau-anta-koo kasivuarura narung masikung arurii'naang, aa'noaing: teie ning taa'ni'anta deeng-antamuang temu' Joonaa' taa'ni'anta deeng-antavuu'na'. <sup>30</sup> Ee', tee'pina' Joonaa' nekipa'noo'keta daa'ui' teing Nineva-nupoongee tee Kumponing-etaing nakaronara tasi'pau'na' tee' nari' Kumponingee boo'keta daa'muko ning Tee Naning-naumpo' Paning-etaing tasi'meriaing dii'ke. <sup>31</sup> Tenie ovorinaang amentei'keta depeto pou'nanie † te'mung simpe' nkona'mung dii' emu'navarang ninka nari' daa'arara dii' kiimata-koo makosinuka tanturiaing, teni kansi' botu-eta' pou'noo'koo taara-koo tee daurarong~ Solomoni' bakaang matau, ee'noko ee aing, naning baru' aa'na' matau Solomoni' puru'ui oting aung anke otoko dii'ke taaraveriaung. <sup>32</sup> Napo' te'mung simpe' nkona'mung teing Nineva-nupoong †† teinge daa'ariaingee dii' ninka enanavarang ninka nari' ee'noko napo' dii' kiimata-koo makosinuka tantaari- aing Joonaa' daankiarako temu' bere'ariru'ning deem- parima, ee'noko ee aing, naning aa'na' pankaing Joonaa' puru'ui oting aung anke daankiarako dii' bere'dariaung.

<sup>33</sup> "Naninge araka paro'ura baku'uarupeu', nii'noo' antona'ke daka'puarupeu', teka teie batanang-koo dau pante'upeu' teinge tumpariaininge araka ooaava'naang. <sup>34</sup> Duta tee diikaang mono bakaang puu. Tenang diikaang duta tampa' otoko diikaang mono ootukunairu arakai maanto'ui otopeu', teka tenang tampa' otoaruko deeko' diikaang mono mutaanange maanto'ui otopeu'. <sup>35</sup> Tee'koo tanatarariri otoriai tee araka dii'koo oting mutuuariko mutaanampu'neenga. <sup>36</sup> Tee tee diikaang mono tee ookutunairu arakai maanto'uaing deeko' nii'navaro mutaanampua' tee bakei ookutuiri siraka'puaing teie puue oovuko ookutuiri arakarurimana'."

### Jiisuu'ke Teing Boto Keperuu'navitu Naapuvuri Nauvu-ru'na'

(Mat 23:1-36; Mak 12:38-40; Luk 20:45-47)

<sup>37</sup> Tekaa kara bakearako narunge Boto Keperuu'navitu-koongee Jiisuu' bokuvuu' tee ninka taamang-koo. Tee tee tumparara taamantoma ba'nanuu'. <sup>38</sup> Ee'noko tee Boto Keperuu'navitu-koong ta'nimparu' oovura tee tutung ntong-koo bireng duu'ke meeka'parava' taamanuko. <sup>39</sup> Ee'noko Ovoringee aa'puu' tee, "Dii'ke tee Boto Keperuu'navitue kaapu dovang-koo diisi dama'du nara' duu'perimaung teka dii' pakareererariri orara aarumo ninka oko'okoi maanto'duri otong. <sup>40</sup> Dii' kanu'nanka. Arekee', teie Kumponingee dama'du nkoruru'nunge ee napo' kuung nkoruria' nari' kiioraa'dariri otoripeu'na'? <sup>41</sup> Diikaang domang Kumponing-koo tutung ararima deeko', napo' ata'oinku-koo avusiro'rariri otorimaatoai makosina', ee'noko tee'koo ookara kapoo' kiioraa'ari oting dii'koo.

† Ooveai 1 Dauraronanka 10:1-13 ee'noko 2 Noru'anta 9:1-12.  
†† Ooveai Joonaa' 3:1-10. ‡ Jiisuu'ke aa'pumaang, "Ning tee'ke, tampa' sira'mari nau-antarampimang, teka dii' duta maroita kaputu'darima taa'ni'anta besi'erimang."

<sup>42</sup> "Baka' piaaru'nuka dii' Boto Keperuu'navitu, tora'kiriaining, ai' dii'ke tee avutevu' napoka dovang oki'nareka' kivorana' tankaamperima namanto Kumponing averikoo' sirivita' dovang ko'dompuu'; aarumo koonto' ee'noko tee paa Kumponing bakaang siperi. Aing ee'ning teing dii'ke nara'ka nko-koo makosining. <sup>43</sup> Piaaru'nuka dii' Boto Keperuu'navitu, tora'kiriaining, ai' dii' teing pava dootuu'nairu-koo ba'nava'nani'nanka tampeng-koo ba'nantarikoo' nantoonge ankantaarii'naang, ee'noko nantoonge pankaing-antaraarii'naang pianukai bavevaave-nairu-koo. <sup>44</sup> Piaaru'nuka dii' Boto Keperuu'navitu, tora'kiriaining, dako'doma tasi'paa'noo' makosinuka aa'noo'ke nantoonge daue noru'aava' nanaamaatopeu'noo', ai' dii' diikaang kara tampa' taararaari siontaarima tasi'paavang Kumponing-eta keta'antavereriko boo'nameng-aape."

<sup>45</sup> Narunge boto naunuka-koongee bari'uma aa'puu' tee, "Nau-anta, nii' tee' dake minkuvema teing ninka nari' maia'antamerimaang." <sup>46</sup> Ee'noko Jiisuu'ke aa'puu' tee, "Dii' piaaru'nuka boto naunuka, tora'kiriaining, ai' dii' teing nantoonge manki'antavererimang aarumo mmuu' siong-koo pore'antavererima, ee'noko dii'ke pankire'koo-navireng ee'ka komperia' tee-koo manki'nanka-koo pakuereritaa'. <sup>47</sup> Piaaru'nuka dii', tora'kiriaining, ai' dii' teing Kumponing-etaing nakaronuka dako'aaru'noo' tamung nerinuka oreng diumaraange tavaaru'ning. <sup>48</sup> Tee'koo dii' diumaraang-koo aroo'dariri otorining sira'darimaung, teinge nakaronupoong tavaarira dako'aaru'noo' nerierimaung-koo. <sup>49</sup> Tee'koo Kumponing bakaang mataue aa'dampimaung, 'Ningee botoevorompang teing nakaronupoong ee'noko kara okovuri nkanuka, nii'ning tee teing-koo dupisi'aariaining oraka' nkoaarima.' <sup>50</sup> Tee tee Kumponing-etaing nakaronupoong biikaang ereng-koo temu'keta kansi' pupu'aru'noo'keta bera enang tuuvumaung-koo dii'ke avarange tuutunang~ komperiainge, teing-koo Eebelo'keta bera Sakaraia'koo basinoo'ke boorou'ning-koo, tee Sakaraia' boon-turoma ee'noko meekavaro-koo meu'ka dupisi'au'nung. <sup>51</sup> Ee', masikung naurampimang, dii'ke avarange tee-koo tuutunang komperira tora'kiriaining; <sup>52</sup> Piaaru'nuka dii', tora'kiriaining, boto naunuka, ai' dii' teing kii' paa'antaveru'ning karanaang noru'koonavung daate'koong. Dii' dii'ka tuntaria' tevaronge ee'noko dii'ke avo'ererikoo' teing teke tumpariko."

<sup>53</sup> Ee'noko Jiisuu' teketa tenkenuko teinge boto naunukai ee'noko Boto Keperuu'navitue karai tuu'antavaako' maroita kapoo'nanka mmuu' maku'uma minkuvuko nii'naare-koo baanka'aava'naang nempaitaa'.

†† Tenaanka tutuna'nung ee'noko asi'nung nantoonge tampeng oreng tavaaretu'naanka Daari Meekung-koo minkuari oting-koo. (Pupu' 4:8; 2 Noru'anta 24:20-21)



**Jiisuu'ke Bakaning Avoreaavaro'naang Nauvuru'na'**  
(Mat 10:26-33; 12:32; 10:19-20)

**12** Boto Keperuu'navitue Jiisuu' tee' paaravai otoko nantoong dakuraaku' oosiariru' baru' aa'na' itovei dapi' mme'eema. Ee'noko Jiisuu'ke bakaning barevare-nupoong bire'uri kara tutumpuma aa'puru', "Tarerariri otoriai tee-koo iisi Boto Keperuu'navitue biikaang taamang ninka bere'aamaung-koo, ai' tampeng nau-antanuka oro'antavarima biikaang kara oraka' noru' ninka pituaamaung Kumponing bakaang kara avo'koo. <sup>2</sup> Ai' ookara kapoo'nanka nopa'ari otointing teing sira'paravaining. Ee'noko ookara kara baku'nii' nantoonge ookarai taaravaavainge. <sup>3</sup> Ee'noko tee Kumponing bakaang mirumiru' arorerima mu-taanang-koo minkurarimaung tee araka-koo ookarai taaranumpo'. Ee'noko tee kara dii'ka ku'nuntarima iaange minkuerimaung dama'ke sirakura' daankieriaing.

<sup>4</sup> "Ninge naurampimang dii' mmaikori', aroreriauka' teing-koo nkaang kara avo'aama diikaang mono boo'antavaavaining-koo ee'noko dama'ke nii'nung kapoo' nkoaavarupeu'. <sup>5</sup> Teka ninge koono-antarampiri baa dii' aroreriaing naurampii'naang, mono tavorira mosianung-koo dua'duripeu'nung. Ee', tee-koo Kumponing-koo aroreriaing naurampimang, bakaang kara ima'eriaina'. <sup>6</sup> Noru'eri otong nantoonge tee pa'noko' barenning oki'nareka' baaveaamaung keura toea'ning-koo, teka tee bane oki'nareka'ke Kumponing tee teing-koo nau ampa'oaung tare-koo. <sup>7</sup> Tee aa'no-maung, diikaang daponanka bore'kooning-koo deeru noru'ui otong. Nantoonanka-koo aroreriauka', ai' dii' teing baru' deto basinoo' noru'duri otong bareng oki'nareka'koo.

<sup>8</sup> "Ee'noko ninge naurampimang, ookara teing nantoong-koo uro'kanoo'ke ning aroo'mai oting sira'pariko ninge, Teie Naning-naumpo' Paning-etainge, tee koosinunanka-koo Kumponing bakaning-koo uro'kanoo'ke nkaning tamparampaing. <sup>9</sup> Teka baa tee naning ning penkemuang nantoong-koo uro'kanoo'ke, ninge tee tee' penkempampaing koosinunanka Kumponing bakaning-koo uro'kanoo'ke.

<sup>10</sup> "Ee'noko baata teing nantoong ning Tee Nanging-naumpo' Paning-etaing oraka' minkumaavaining teing tee Kumponing tonta'anta-koo makosinuka, teka baata teing Tanuaang Meekung mintoomparako oraka' minkuaavaining teing teing tonta'anta-koo makosinuka dea'.

<sup>11</sup> "Ee'noko tenang ainge Boto Keperuu'navitu dovange tuutunantaariko tare nkonuka ee'noko kara simpe'nuka-ankoa, avitoitoi noru'dariauka' minkueriaina'koo aa'perima, 'Aminge maku'ama'naang?' <sup>12</sup> Ai' Tanuaang Meekunge tee tenang tee-koo batei-koo nau-antaruriaing dii'ke minku-koo makosina'."

**Tee Naning Kanu' Kavokavoro-po'nung Minkuari Otoina'**

<sup>13</sup> Narunge karinga-koonge Jiisuu' nia'uu'nung aa'puma, "Nau-anta, taata' naueko neumai deining barenku tankaampuai nee'koo." <sup>14</sup> Teka Jiisuu'ke aa'puu' tee, "Aung ee, nko ning baie simpe'nko~ ee'noko tankaang-nko dee'mainta-koo miru'muinge?" <sup>15</sup> Ee'noko teketa be'nu'ui teing ookara nau-antavurima aa'puu', "Oorariri tarerariai tee-koo aarumo oko'oko-koo, ai' naning bakaang domaang kavokavoro-ita nkonii' deea'."

<sup>16</sup> Teketa teie kara dikito' nauvuru' teing; aa'puu', "Temu' naning narung kavo mmau'po'nung otoko'nung bakanau kansii' aa'na' maneenau doong kante-koo. <sup>17</sup> Ee'noko baka karoma aa'puu': Ning aming nkoama'naang? Aing nkaning taamananka sipampainoo' oto'memua'. <sup>18</sup> Teketa aa'puu': Enang aa' ee' nkoama'naang, aing nkaning taamang kore'maramaing pava oki'nareka' pesi'amira pankainanka kaniampaing, ee'noko teing-koo sipampaing ookara nkaning sinananka ee'noko kavonanka. <sup>19</sup> Ee'noko ninka aa'maravai: Aung ee, da' mmau' kavonanka oto'derung mare' amatemare'koo makosining. Un-aaroi otoi bau'darama, tuaantarama doturari otoaing. <sup>20</sup> Teketa Kumponing aa'puu' tee, 'Da' kanu', e'mung muunga dakaang tanuaange si'duu'naang, ee'noko tee' nkorarako baa okovuu'naang teing kapoo'nanka maamu-antaveining?' <sup>21</sup> Tee' nari' tee naning baka-koo kavo oosisiimaung nkoaravaing Kumponing-aape oosivua'."

**Tautau Noru' Manki'moriauka'nung-koong**  
(Mat 6:25-34; 6:19-21)

<sup>22</sup> Ee'noko Jiisuu'ke aa'puru' bakaning barevare-nupoong, "Tee'koo ninge naurampimang dii', noru' manki'doria' otoai aa'ning-koo taamang domanturiain-ing ee'noko mononopa'nanka. <sup>23</sup> Aming-koo, nna' domaang tee taamang-koo bi'ari otoa' ee'noko mono tee baarong-koo io'arava'. <sup>24</sup> Oovereriai teing kaukaunanka, keeng ee'noko kavu' noru'aavainge, taamang kore'nairu oto'evoroa', nka tee Kumponing bau'urimaung. Bakei, dii' teing baru' deto basinoo' noru'duri otong barennanka-koo.

<sup>25</sup> "Ee'noko baie dii'koo noru' manki'oma doong naraanga'noo' be'nu'ura te'koo domampari otopeu'? Otoa'. <sup>26</sup> Tee tee dii'ke kapoo' oki'naa aung-pina' nko-koo makosiriaruma deeko' aming-koo noru' manki'dorimaung nii'ning kapoo' piarorima? <sup>27</sup> Oovereriai teing iioo'nanka tamung dupurimana', baarong tua'koo pore'oroainge. Teka ninge ee' naurampimang, aa'na' tampa' nerampurimaung nantoong biikaang meenasi puru'uitaa', bane dauraronanka Solomoni'pina'. <sup>28</sup> Teka Kumponing baa'nanka tee' nerampurimaung deeko', teing aa'nomaing na'mung doong-koo domamparara dauna'mung mara'oko tai-antavaakoo', tee tee tee' nari' tasi'periaing dii'ke, masika'anta oki'naa oto'derurininge, ai' dii' teing deto basi-

nou' noru'duri duaanaruriaining. <sup>29</sup> Tee tee kapoo' naieriaing tuaantarima besi'eriauka' ee'noko onoue norunoru' nkoveria' otoai. <sup>30</sup> Aing ee' oro' kapoo' ookara mutaanang-nupoong ookara kansi'koo kaari-aamaing, teka dii' tee' deea', ai' dii' Diumai paning-etaing noru'ui otong aing ookara kapoo' dii' apuka'darimaing.

<sup>31</sup> "Tee'koo ainkato noru'eria' Kumponing bakaang muu' deto pankaruntoonge noru'erimatoai, ee'noko teing aing kapoo' apuka'darimaing nari' aruriainge. <sup>32</sup> Aroreriauka' dii' oki'navitu, ai' teie tee Diumai tampa' noru' ninka oko-antaruriaing bakaang muu'. <sup>33</sup> Diikaning kavo baaveverima mooni' ata'oinku averererimatoai. Tee' nkoverima kore'darimatoai kerekasi'nanka muuninava-po'ning~ tamunsi'ning deemparavauka'ning paning-koo. Te' bakiaa' nkonuka tumparia'noo' ee'noko pumpu'ke orariaava'noo'ke. <sup>34</sup> Ai' 'te' tokoo naning bakaang muuninava otoainoo' bakaang pankaruntoonge noru' tee te' otoaing."

**Jiisuu' Bakaning Barevare-nupoong Mantompariri Otoroaina'**  
(Mat 24:42-51)

<sup>35</sup> Ee'noko Jiisuu'ke danto nari' nau-antavurima aa'puru', "Maamurariri otoriai tokonii'ke pinka'dariri, ee'noko puu paro'erira. <sup>36</sup> Ee'noko teing-pina' nantoong biikaang oving nampeesiroma-ita toroaravainang nempai otoromaing-pina' otoriai, kopikopi'uko namu'ke daate'aava'naang nempariri otoromaing-pina' otoroi. <sup>37</sup> Bakei biraankenuka deempariaing teing botovotonaa'nuka tantearirio' biikaang ovinge kune'uriaining tenang poma. Masika' naurampimang, tee tee baka mamuarara ba'ngang-antavuriaing teing taamantoma ee'noko pora bau'uri- aing teie teing. <sup>38</sup> Tenang meu'namang nii'noo' tane'aapenang poma deeko', tantearirio' meu'puriaing teing botovotonaa'nuka teie biraankevuriaining. <sup>39</sup> "Napo' ee' noru'eriai dii' teing tee-pina' naning pava okovenung, aa'nung naning bakiaa'nko bakaang batei po'koong noru'ura dei tee tampa' maamuarapeu' tee pava taura'puarura derovuma kuung tung-koo. <sup>40</sup> Dii' tee'ke maamurariaininge, ai' Tee Naning-naumpo' Paning-etaing tee batei naning noru'uaruko poo'naang."

<sup>41</sup> Piitai aa'puu', "Oving, dake ee tee dikito' nii'koo miru'ei naumerimang ai' ookara nantoong-koo?"

<sup>42</sup> Ee'noko Ovinge aa'puu', "Tee aa' ninge baa tee naning matau bakaang ovinge bakanava tare-koo botovumaung miru'ama minkuamaang, naning kake'iinara botovotonaa'nuka batei makosinang bau'koo miru'nisi. <sup>43</sup> Biraanke-antavuaing tee botovotonaa' bakaang ovinge pora tee' nkoarako meu'pura. <sup>44</sup> Masika' naurampimang ninge, teie ookutuning kapoo' okovumaing-koo tarena deeng-antavuaing.

<sup>45</sup> Teka teie botovotonaa'ke ee' noru'uaing deeko', 'Nkaang oving ana'aring po'koo,' ee'noko teing bautaranuka tavu' tutumpuriai donkaang ee'noko maniku', ee'noko taamanuma purinto'naru'ke naivu-

ma kanu'aravai. <sup>46</sup> Teketa teie bakaang ovinge poma meu'puu'naang doong paapaa'ui otoaina'mung tee po'koo ee'noko batei noru'uauka'ng. Ee'noko teie aa'na' kiimatavuaing tee, ee'noko naru' sipuai teing ninka masika'antavaava' kakaru'a'nuka ninka.

<sup>47</sup> Ee'noko tee botovotonaa' oving bakaang pia tasi'pui siompuauka'nung deeko', maamuarava', tee aa'na' mura'koong. <sup>48</sup> Teka tee noru'kua' tee' nkovuaing deeko' tee oki'noo' mura'koong. Ai' ookara nantoong naruna' naruna' mmou' avuavu' nkavaa- maing napo' mmou'na' avu'koo miru'ariri otorong. Tee mmou' avaamaung-eta napo' mmou' nka-koo makosi."

**Jiisuu' Nantoong Siivenke'anta Tampusu'na'**  
(Mat 10:34-36)

<sup>49</sup> Teketa Jiisuu'ke danto nari' nau-antavurima aa'puru', "Ninge a' kansi'koo nta' betu'ama'naang mou'nung. Bakei tero moo'kupeu'nung tampa'. <sup>50</sup> Teka tee tutung sisikeera ninka mme' meeka'antamarava' ning bakei oraka' dee'moi kakau o'ngong dupear-avaruko tee. <sup>51</sup> Dii'ke ee ning mooa a' kansi'koo tavo'ama'naang mou'nung-pina' noru'merimang? A, tee' aa' deea', ning tankaang-anta nko-koo mou'nung tee' naurampimang. <sup>52</sup> Enang-eta deto pa'noko' nantoong nava-koo otoromaing tee' tankamparii'naang, beenaumo kenaanka ninka turampeematoonaang, ee'noko kenaanka beenaumo ninka. <sup>53</sup> Teing siivenke'eeing bauma bauring-eta ee'noko bauring bauma-ita; bauko baurang-eta ee'noko baurang bauko-ita; bakaampo baampuru'naang ninka ee'noko baampuru'naang bakaampo ninka."

**Jiisuu' Tasi'paa'nuka Teing Kiimata-kooning**  
(Mat 16:2-3; 5:25-26)

<sup>54</sup> Ee'noko Jiisuu'ke napo' nauvuru' nantoong karika', aa'puu', "Tenang kamo' duaa' tumparamanoo'ke nkoarako dii'ke namu'ke aa'perimaung: Apo'uu'naang. Ee'noko apo'ukoo'. <sup>55</sup> Ee'noko tenang doving uipaarii'noo'ke depeto poko ooverima aa'perimaung: Uipaarii' baa' mara'anta tavo'kuu'naang. Ee'noko tee' nari' nkoaramaung. <sup>56</sup> Dii' ampirininuka, tee' noru'eri otong tasi'koo taa'ni'anta kansi'kooning ee'noko doona-kooning. Teka areke'koo dii'ke ning-kooning taa'ni'anta tasi'peria' otong? <sup>57</sup> Aming-koo dii'ke koon- to'na' simpe'eriaung nkaang kara diikaning oreng tu- umpirampima minkuanko? <sup>58</sup> Ee'pina', tenang naning da' tuumpirura tuutunang-koo tavo'duu'naang nanire- ma aa'na' paaraveai koonteeree'naang teke taunge simpe' nkonara-anko tavo'duaruko, ee'noko simpe'nkoi piatooro avuriko kiimata-koo si'daa'neenga. <sup>59</sup> Ninge ee' nauramaang, da' tee teketa tamung tonta'daravarupeu' moo' pukevei ookutuning dua'ea'."

**Bere'aravaruma Boo'na'**

**13** Tenang nii'ning nantoong Jiisuu'anko porora nauaama aa'pau', "Pailati'ke piatooronuka~ botovurio' nii'ning Kaaleli'nupoong boontunang nkoari

otoko dupisi'aario' ereng biikaning boontunang-koon-ing ereng ninka pitu-antavaaring."

<sup>2</sup> Ee'noko Jiisuu'ke aa'puru', "Dii'ke ee' noru'eriauka': teing tee' boorou'ning kapoo' orara makensi'ning dii' oto'deruiaining-pina' oro' otoko Kumponing Rooma'nupoong taura'puru' teing Kaaleli'nupoong dupisi'koo. <sup>3</sup> Otoa', tee' deea'. Teka dii' tee' nari' paa'dariaininge bere'dariauka'ning deeko'. <sup>4</sup> Ai' ee' noru'erimang teing nanai'keta ~beenaumo-taa [18] pa-va deto isikava dau dua'arara tavuru'ning bakei oreng masikeng nii'ning Jerusalema'nupoong divu'aari otong? <sup>5</sup> A, otoa', tee' naurampimang. Dii' tee' nari' paa'dariaininge bere'dariauka'ning deeko'."

<sup>6</sup> Ee'noko teie aung dikito' navuru', "Narung naning koi' piiki' keempuunung bakanoo' uaininau-koo, ee'noko nii'na'mung sinang kavu'koo pou'nung tevari-koo, teka oovua'. <sup>7</sup> Ee'noko teie uaininau tanata navuma aa'puu', 'Aung ee, aing beenaumo mare'koo ning sinang kavu'koo momaung avari-koo piiki'navari-koo, teka sinang ooampaung ninge. Nokieaing tevari tamung kans'i' orarivumato'neenga.' <sup>8</sup> Ee'noko teie maku'uma aa'puu', 'Ovoro' ee, sipeio' amare' iro' otoai napo' bera okora' nenke'amira kans'i' pankauang sipampaing. <sup>9</sup> Daunamare'koo sinang bi'uaing deeko' tampa' masika', teka bi'uaruko deeko' nokieaing.'"

#### Jiisuu'ke Nani Manikuma Kopini Kai'nii' Koong-antavuu'na'

<sup>10</sup> Teketa nii'na'mung Doong Uaana'mung, nau-antavarako'nung pava dootuu'nanka-koo nii'nava-koo.

<sup>11</sup> Teke nani ma'naange siipa-antavuko'nani otoko' mare' kivora-ita ~beemare'pi-taa-koo [18], kai'arita' baka deto koompari donkong-koo makotuaruko'.

<sup>12</sup> Ee'noko tenang Jiisuu'ke oovura teni, teie bokuvuko uro'ke poko aa'puu', "Ani ee, da' unaaroinani dakaang siipa-ita." <sup>13</sup> Ee'noko teie bakaang bireng pante'uu' teni-koo dau ee'noko tenang namu'ke teni koomparu'. Ee'noko tenie Kumponing daangampuu'.

<sup>14</sup> Teketa Jiisuu'ke Doong Uaana'mung-koo taare-anta nkovuu'nung-koo teie pava dootuu'nava tanatavuko'nunge iiravoma ee' minkuvuru' teing nantoong, "'Na'mung-taa doong otong nko-nko nko-kooning. Teing-koo doonko porira taare-anta nkaveri-aing, Doong Uaana'mung-koo deea'." <sup>15</sup> Teketa Ovinge maku'uma aa'puu' tee, "Da' ampirinung~, dii'koo ee narunge te'mung Doong Uaana'mung bakaang boromaka' nii'na' doonkii' dapa'uma bi'ari otomanoo'keta barampui beaung ntong nai-anta-koo? <sup>16</sup> Ee'noko tee' makosi deeko', aming-koo ani manikuma Eebaraami' baurang makosi deea' Doong Uaana'mung-koo unaa-anta-koo, Sietani'ke dai'uu'nani booni'antavuma teing-koo mare' kivora-ita ~beemare'pi-taa-koo?'"

<sup>17</sup> Tee' minkuvura teing bakaning too'de-nupoong maia'antavuru' ee'noko ookara nantoong dotuariru' ookara kapoo' nepu'na' nkovuu'ning-koo teie.

#### Kumponing Bakaang Muu' Pankaimparavaina' Teing-pina' Sinang Ee'noko Iisi (Mat 13:31-33; Mak 4:30-32)

<sup>18</sup> Napo' nii'na' Jiisuu'ke ee' minkuvuu', "Kumponing bakaang muu' aming-pina' oro'? Aminge pa paara-antavampeu' tee? <sup>19</sup> Tee aa' sinanu oki'nu-pina' oro' masitara'koonu naning nkavura mintoong-koo keempuu'nu, ee'noko dupura koi' pankavari deemparu', ee'noko barennankai bitonanka kaniau' kaumpe'nanka-koo."

<sup>20</sup> Ee'noko napo' aa'puu', "Kumponing bakaang muu' aminge pa paara-antavampeu' tee? <sup>21</sup> Tee aa' tee teupina' parauanu naako'nii'nu iisi-po'nu-pina' naning manikumai nkavura paraua diisi beerentu'koo maantoura naro'ka bere'uko bera teue ookara pangapan-gavoepu'."

#### Karanaang Oki'navarong Kumponing Bakaang Muu' Tung-koong (Mat 7:13-14,21-23)

<sup>22</sup> Teketa tee tenkenura Jiisuu' nanuu'nung Jerusalema'aape osi pankeng ee'noko oki'nareka' beero'ui nau-antavurima. <sup>23</sup> Ee'noko nii'ninge aa'pau' tee, "Ovinge, teing ee moo'ariaining oki'ning?" Ee'noko teie aa'puru' teing, <sup>24</sup> "Muu' paninung-koo tuntoma te' ito-navarong. Teke tevaronge aa'na' purintariri paararai-aing tung-koo avutevu'daria', aming-koo, nna' teing karinga avitoitoi miru'arima paaravariaining makosi-aavauka'nung. <sup>25</sup> Tenang namu'ke pava okonarai i'am-parara karanaang pinka'uko dii' tee dama'due donkoniri otoriaing kopikopi'erima te' karanaang, aa'perima, 'Ovinge, daate'meriai.' Ee'noko teie aa'duriaing dii', 'Ning dii' noru'dampia' areketa porininge.' <sup>26</sup> Tenang dii'ke aa'periaing, 'Nii' aa' da' ninka nari' taamanampima tuaamariko'ning, ee'noko da' niikaning osinanka-koo nau-antararako'.' <sup>27</sup> Teketa teie aa'duriaing, 'Ning naurampimang dii' noru'dampia', are'nupoonge. Tokoi beriaing ning-ankoita dii' oraka' nkorarimaing.'

<sup>28</sup> "Teke ee'noo'ke dama'du otoritaa' birontariai si'da' kakirinkurarima sisikeera-koo otori, aa'ning oovererima: Eebaraami', Aisake', Jeekopi' ee'noko teing ookara Kumponing bakaning nakaro-nupoong teka muu' Kumponing bakanoo'ka. <sup>29</sup> Ee'noko nantoong aa'ning-eta poroaining teke muu' Kumponing bakanoo'ke nari' taamanaavaing: duaa' pomanoo', tumparamanoo', ee'doompeto ee'noko ee'depeto. <sup>30</sup> Ee aing, nii'ning teing enang dama'duariri otoroining ureaavaining ee'noko napo' nii'ning enang ureai otoroining napo' dama'duariaing."

#### Jiisuu' Jerusalema'koo Orarunsiaru'na' (Mat 23:37-39)

<sup>31</sup> Ee'noko tenang tee-koo batei-koo nii'ning Boto Keperuu'navitu porora aa'pau'nung Jiisuu', "Tenkeniai anketa, Eeroti'ke da' dupisi'duu'naang piavomaang."

<sup>32</sup> Ee'noko Jiisuu'ke aa'puru'nung teing, "Berira naueri-

ma tee daang-koong daurarong aa'periaing, 'Aung ee, Jiisuu'ke aa'puing, "Ninge aa'nomaang: ma'nari ba-ta'aramang, taare-anta nkoamaang-e'mung, tane' tee'ke, ee'noko dauna'mung opama'naang nkaning nko-nko nkoama Kumponing miru'muu'ning. <sup>33</sup> Teka e'mung, tane', ee'noko dauna'mung nkoampaing teing nkaning nko-nko, bera Jerusalema'ke bakeampaing, ai' Kumponing bakaning nakaro-nupoong teing Jerusalema'koo taapo'ke booroaung."'

<sup>34</sup> "Oi baka' Jerusalema'nupoong, Jerusalema'nupoong, dupisi'erererimaing Kumponing bakaning nakaro-nupoong, ee'noko teing dii'koo botovurimaing kapange too'pererima dupisi'ereririkoo', are-kee'ning batei-koo ninge dii' naro'koo kariamaung kokoree'ke baurukaa' kupa'koo boong naru'urimana', teka dii' aroo'dariaung. <sup>35</sup> Aing ee, Kumponing di-ikanoo' osi si'during dii'ke dii'ka tare-koo. Ee'noko nau-rampimang, dii' teing ning napo' oomeriaroo'naang bera tenang batei aa'meriaiang, 'Biraankenung tee naning Ovoring bakaang miring-koo po-maatomaung.'"

#### Doong Uaana'mung-koo Jiisuu'ke Naning Siipai Dore-motu' Taare-antavuu'na'

**14** Nii'na'mung Doong Uaana'mung Jiisuu' taamang-koo beu'nung narung pankaing Boto Keperuu'navitu-koong bakanava'koo. Teinge Boto Keperuu'navitue Jiisuu' nempai tareaako'nung baanka'aava'naang. <sup>2</sup> Teke naning narung Jiisuu'koo uro'kanoo'ke otoko' siipai mono doremparako'nung. <sup>3</sup> Ee'noko Jiisuu'ke oovura nia'urima aa'puru' teing boto naunuka ee'noko Boto Keperuu'navitu, "Doong Uaana'mung ee taare-anta nko-koo makosi ai' makosi deea?" <sup>4</sup> Teka teing kareaava'. Teketa' teie kompura taare-antavura si'nara'uu'. <sup>5</sup> Ee'noko teing aa'puru', "Dii'koo baa bauring-po'nung nii'noo' boromaka'navoro' oto'evuing dinkung-koo dua'ari dei ee teie iri'narung taaru'uarupeu' Doong Uaana'mung?" <sup>6</sup> Ee'noko teing tenaare maku'koo makosiaavaruu'.

#### Boonko Noru'ari Oto'koo Nau-antavuru'na'

<sup>7</sup> Jiisuu'ke tee teka nantoong taamang-koo bokuaaru'ning tampoo' ba'ng-koo piavoroko oovurira kara dikito' nauvurima aa'puu', <sup>8</sup> "Tenang nii'narai bokuruko da' nampeesi-koong-koo taamang-koo pankeng ba'namparimanoo' ba'naniauka' naning da'koo dau basi bokuvuing poko teie bokururepeu'nunge aa'du'neenga, 'Aung ee, tonta'daraka aung ba'nanuai,' <sup>9</sup> Ee'noko tenang da' maia'doitaa' boonko oko batari'darapeu'. <sup>10</sup> Teka tenang bokuraako da' bera oko ba'naniai, ee'noko bokuruinge pora aa'duai, 'Mmaiko', deto a'dei' ba'naniai.' Tenang ookara-koo teke da' ninka taamang-koo nari' ba'nantariaining-koo miring pankaing nkavee'naang dake. <sup>11</sup> Ai' toomo aung ee' oro': Baa naning baka deto nkoaramaung doonko batari'numpo' ee'noko tee naning baka boonko otomaung deto i'anumpo'."

<sup>12</sup> Ee'noko Jiisuu'ke napo' nauvuma aa'puu' tee naning bokuvuu'nung, "Tenang dake paroro nkovema da'maikori' bokueriuka', aing aa'ning: daara'mainkaang, dakanamuaiaang ee'noko kavakavoro-po'nupoong, dama'ke napo' bokuraara maku'ari'neeng. <sup>13</sup> Teka tenang paroro nkovema aing ee' oro'nuka bokueriai: ata'oinku, kaikuu'nuka, kau' de'doonuka ee'noko kaputu'nuka. <sup>14</sup> Tee' nkoveko tee Ovoringe da' biraankeruaing teinge bari'daavauka'noo'koo, ee'noko dama'ke te'mung koonto'nuka boo'keta daa'ariaina'mung Kumponing tee-koo moo' aruaing."

#### Paroro Pankaing-koong Minkunaa Teing Kontevorora Naikaavauka'na'

(Mat 22:1-10)

<sup>15</sup> Tenang teing-koo narunge Jiisuu' taaravura nari' ba'nampariri otoroko'ning-koonge aa'puu', "Biraankepunoong teing nantoong taamang-koo naikaavaining Kumponing bakaang muu' donkonuainoo'ke."

<sup>16</sup> Teka Jiisuu'ke aa'puu', "Nii'na'mung narung naning paroro pankaing nkovura karinga nantoong bokuvuru'nung. <sup>17</sup> Ee'noko mororu'na'mung botovotonaa' botovuu' para' sipuma aa'puu'naang, 'Porai, taamang maamuari otong.' <sup>18</sup> Teka teing nari' para'ariri kareau'. Tutuna'nunge aa'puu', 'Ninge kansi' nerakung moo'ansieeng; mera ooama'naang. Aung ee, tampa' naueaung ee, moaroo'naang.' <sup>19</sup> Ee'noko nii'nunge aa'puu', 'Ninge boromaka'navong moo'aransieening mera paaravarama'naang. Aung ee, tampa' naueaung ee, moaroo'naang.' <sup>20</sup> Ee'noko nii'nunge napo' aa'puu', 'Ning a'mung nampeesimarieeng; tee'koo moaroo'naang.'

<sup>21</sup> "Tee tee enang botovotonaa' toroarara bakaang ovoring kontevorou'na' nauvuu'nung. Teketa' tee pava okonara iiravoi bakaang botovotonaa' aa'puu', 'Beaung iri'narung taung pankenankai ee'noko oki'nareka'ke kantevei osi pankaing-kooning ee'noko po'antaveriaing teing ata'oi'nuka ee'noko kaikuu'nuka ee'noko kau' de'doonuka ee'noko kaputu'nuka.' <sup>22</sup> Teketa tee' nkovura toroarara teie botovotonaa'ke aa'puu', 'Ovoring ee, kapoo' botomeing ninge nkoansing, teka pava mme' maanto'ua'.' <sup>23</sup> Ee'noko teie ovoringe botovotonaa' aa'puu', 'Taung pankaraunge naniaing ee'noko buru'buurunairue naniai. Ee'noko nantoong eturi kuung po'antaveriai nkanava maanto'aavaina'. <sup>24</sup> Ee' nauramaang, teing tero bokuaranko kupi'orou'ning ookara mantonkaavauka'ning nkaang-koo paroro-koo.'"

#### Tutung Norunoru'na' Jiisuu' Siong-koo Piavoma

(Mat 10:37-38; 5:13; Mak 9:50)

<sup>25</sup> Nii'na'mung nantoong aa'na' karinga Jiisuu' ninka nari' Jerusalema'aape nanaama teie teing-aape bere'arara aa'puru' teing, <sup>26</sup> "Tee naning ning-anko poainge tee ning aa'na' deto basinoo' pankaruntoonge noru'muaing aing aa'ning piaavurimanoo'keta dau basinoo': bauma, bauko, ba'aang, baurukaa', batatakaampi, baara'mainkaang, ba'marikaampi

ee'noko tee baka bakaang domaang nari'. Makosi deeaung deeko' tee makotua' nkaang barevare-nung deempari oto'koo. <sup>27</sup> Ee'noko baata teing ning siong-koo baike aa'barata'koo kune'koo taura'pariarupeu'ning teing makosiaava' nkaning barevare-nupoong deempariri oto'koo.

<sup>28</sup> "Dii'koo narunge pava pankava kani-koo piavora deeko' tutung ee ba'nanura norunoru'uarupeu' moo' noru'uu'naang teva bake-kooning makosi oto'evuing deeko'. <sup>29</sup> Noru'ua' tamung tutumpuma tuuku-koo dorang pante'ura opuaruko ookarai ooaavaininge akapeu'aama bemkempaa'neeng tee. <sup>30</sup> Aa'paa'neeng, 'Aunge naninge kani tutumpura kanivuma o'koo makotuaruu'."

<sup>31</sup> "Nii'na' narung dauraronge nii'nara dauraronge~ ba-ta'uu'naang kare-koo ee tutung ba'nanura bakaning ninka mumunsiararupeu' aa'paama, 'Nii'ke ee oki'ning ninka kivora kokorei' piatooronuka ninka kenaanka kivora kokorei' piatooro bata'koo makosi, ai' makotumpia'?" <sup>32</sup> Ee'noko teie dauraronge makosi deeaung noru'ura deeko' tenang mme' isipo' otoroko teie kara nka-nupoong botovuripeu' mooveereaina' nia'koo. <sup>33</sup> Tee' nari' baa naning dii'koong ookara kapoo' bakaning-eta siparavarura deeko' tee nkaang barevare-nung deempari otoarupeu'."

<sup>34</sup> "Tee'koo dii' miang-koo tasi'dariaing. Miang tee kapoo' tampara, teka deva'noo' opari dei, arekee' tarii'antavupeu' napo'?" <sup>35</sup> Tee aa' tee tee enang makotua' kapoo' nko-koo, tamung dua'koong deemparing. "Dii' punkang-po'nupoong deeko' enang taaraveriaii!"

### Sipisipi'nu Ee'noko Mooni'nu Paa'aretu'na'koong Mirumiru'

(Mat 18:12-14)

**15** Enang tee taakisi nkanuka ee'noko nii'ning orananka nari' tee-anko due' porou'nung.

<sup>2</sup> Ee'noko teinge Boto Keperuu'navitue ee'noko boto naunukai minkuminku nkoau' aa'paama, "Aunge naninge orananka poraporaivurimaung teing ninka nari' taamanaama." <sup>3</sup> Tee'koo Jiisuu'ke aung dikito' navuru'nung, aa'puu'nung,

<sup>4</sup> "Baa naning dii'koong narung, narung daaku' sipisipi' oto'evupeu', teketa teing-koo nau pooari dei dake ee teing nii'ning mmau' tamung siperira teu nau pooaru'nu besi'koo naniarupeu' bera daa'eainoo'ke basi?' <sup>5</sup> Ee'noko tenang daa'era dake teu poru'epeu' ukaamau'ke doturotu ninka. <sup>6</sup> Ee'noko tenang osi pora dake da'marang bokueripeu' ee'noko da'maikori' aa'perima, 'Ni'ninka nari' dotumariaing ninge nkaang sipisipi' paa'aru'nung daa'ansing-koo.' <sup>7</sup> Tee' nari' bakei paning-koo doturotu pankaing otomaunge naning narung orara bere'arako tee doturotu teing nantoong karika' koonto'nuka otoromaing-koong doturotu puru'ui otong, aa'ning bii'ka bere'koo makosiaavaing tamparikoo'.

<sup>8</sup> "Napo' nani manikuma mooni' kivoranuri oto'evupeu'nani ee, nau paa'antavura puu paro'ura keperuu'ari siimuvuma tee pava besi'uarupeu' bera

daa'upeu'noo'ke basi?' <sup>9</sup> Ee'noko tenang tenie daa'ura teu, tenie ba'marang ee'noko ba'maikori' bokuvuripeu' aa'puma, 'Ni'ninka nari' dotumariai ninge au mooni'nu daa'ansing-koo, paa'antavantu'nu.' <sup>10</sup> Tee' nari' bakei Kumponing bakaning koosinunanka dotuarimaung narung orara bere'aramaung-koo."

### Bauring Pooaru'na'koong Mirumiru'

<sup>11</sup> Ee'noko napo' Jiisuu'ke aa'puu', "Naning narung otoko'nung baurinketa kenaankara. <sup>12</sup> Ee'noko baara'ma'nunge tenaanka-koo aa'puu' tee bauma, 'Mma' ee, nkanamanto barenku-koo enang amesai.' Ee'noko baumai tankaampuu' kapoo' okovuining tenaanka-koo. <sup>13</sup> Teketa mmau' doong tankinuaruko baara'ma'nunge bakaning nkavura tenkenuu' tokoon-amenge isipo'ke, ee'noko teke nainai dovang-koo ee'noko moru, naviuraa'eema tamung dua'uu' botur-opa. <sup>14</sup> Ee'noko tenang ookutunung kapoo' dua'uko pankaing peera tavo'kuu' temeng-koo, ee'noko ata' tutumparu'. <sup>15</sup> Tee' nkoarara osikaiaang-koong narung-koo bi'antavaru' temeng-koo. Ee'noko teie bakanavora'koo botovuu' pooro'nanka bau'koo. <sup>16</sup> Ee'noko bakei aa'na' peeravoi teing dopa' nai-koo piavoko' pooro' avuriko'ning-koo. Naninge kapoo' nau' avua'."

<sup>17</sup> "Teketa baka norunoru'arara teie aa'puu', 'Baka'e, teing mintoong-nupoong mma'ke moo'urimaing kari-ka' otorong taamang makosining oto'evorong ee'noko kore'arikoo', teka ning aung peerai anka dupisi'mumang. <sup>18</sup> Ning enang i'amarara nanampaing mma'anko, ee'noko aa'pampai tee, "Mma' ee, ning oraka' nkomaru'nung Kumponing-koo ee'noko da'koo. <sup>19</sup> Ning enang dauring tang-koo makotumpa'. Aing dakaning mintoong-nupoong-koong narung-pina' nkomeaing." <sup>20</sup> Ee'noko teketa' i'amparara bauma-anko nanuu'. Teketa mme' isipo' otoko baumai oovura bakaang domang piaae aa'na' maanto'ura tee-koo bauring-koo, ee'noko teketa kua'parara boko'ura nu-unuvuu'. <sup>21</sup> Ee'noko bauringe aa'puu' tee bauma, 'Mma', ning oraka' nkomaru'nung Kumponing-koo ee'noko da'koo. Ning dauring tang-koo makotumparuing.'

<sup>22</sup> "Teketa baumai bakaning botovotonaa'nuka aa'puru', 'Mononopa' tampara masakung iri'narung nkaveri porira kurumperiai aung-koo, ee'noko riing pankiri'koo kurumperiai ee'noko boonamante~ kau'koo. <sup>23</sup> Ee'noko boromaka'nu kampianu bau'naanu bi'erira taveriai, ee'noko maa'ampiai dotumarima, ai' aung nnuring tee boo'paru'nung-pina' noru' enang napo' domamparing; tee pooaru'nung enang napo' toroaring.' Ee'noko teinge tenang kovi tutumpau'."

<sup>25</sup> "Enang tee tutuna'nung bataata pora'ke otoko, ee'noko teketa poma pava due' basiarama teie neekavarima koviariko taaravuu'. <sup>26</sup> Ee'noko botovotonaa'nuka-koo narung nia'uma aa'puu', 'Aming-koo koviarimang?' <sup>27</sup> Ee'noko teie aa'puu' tee, 'Daara'ma'nung poing, ee'noko daumai teu kampianu bau'naanu tavuing tee bauring tampa' otoko kune'ura onkeonke'uma'."

<sup>28</sup> "Teka tee iiravora kuung po'koo piavoaruu'. Teketa baumai dama'du siarara kevi'uu' tee. <sup>29</sup> Teka teie bari'uma bauma aa'puu', 'Ee mma' ooveko, aing mmou' mare' ning da'koo dai'mari pakurama o'noretu'ning. Dakaang kara siompamaung taarapiikamara'va', teka dake ning sie'nu bi'memua' ning mmaikori' ninka nari' kovimaripeu'nu. <sup>30</sup> Teka tee aung dauring poio' dakaang kokononang tamung kera'puu'ning manii' bakispunanka moo'urima dake tamung teu kampianu bau'naanu tavevuing.'

<sup>31</sup> "Ee'noko baumai aa'puu' tee, 'Nnuring ee, da' ni'ninka ookara batei-koo nari' o'noremaung, ee'noko ookara kapoo' ning nkaning teinge dakaning. <sup>32</sup> Tee tee makosi doturotumarima kovimariaing, ai' aung daara'ma'nung tee boo'paru'ning-pina' noru' enang napo' domamparing; tee pooaru'ning enang napo' toroaring.'"

### Kavo-tanata Tosiro'koong Mirumiru'

**16** Nii'na'mung Jiisuu'ke bakaning barevare-nupoong nau-antavurima aa'puru'ning, "Naning narung kavo mmou' po'nung otoko'ning. Teie nii'ning bakaning kavonanka avutevu' tare-koo sipuu'. Ee'noko nii'ninge tuumpiau'ning oraka' tare tampaa-ma. <sup>2</sup> Ee'noko teie okonarai bokuvura aa'puu' tee, 'Tee aming-koo da' minkuraako taaravansing? Kavo tareve-mana' daariera ameasing. Da' tee bake-antarama'naang.' <sup>3</sup> Ee'noko teie tare-nkoi baka karoma aa'puu', 'Nkaang pankaing enang tonta'muu'naang tanatamaramanoo'keta. Ninge enang aming nkoa-ma'naang? Ai' ning tee kansii' nenke'koo makotumpa'. Ning baka-eenta-koo maia'momang. <sup>4</sup> Ee', enang noru'ansing. Nantoong pakuarampaing biikanairu-koo bokumaavaina' tanatamaramanoo'keta bata'muko.'

<sup>5</sup> "Tee tee teie naruna' naruna' bokuvuru'ning teing bakaang oving-koo komaaru' oto'evorou'ning. Tutuna'ning aa'puu', 'Da' nkaang oving-koo arekee'ning komaaru oto'derung?' <sup>6</sup> Teie aa'puu', 'Narung daaku' daramu duuni-po'nanka.' Ee'noko teie aa'puu' tee, 'Aung ane' komaaru-koonane' tero daarieu'nane' nkavera iri'narung ba'nanira pari'ema nii'nane'koo naruaape daarieai.'

<sup>7</sup> "Napo' nii'ning aa'puu', 'Da' arekee'ning komaaru oto'derung?' Teie aa'puu', 'Narung daaku' daramu uite'koonanka~'. Teie aa'puu' tee, 'Aung ane' komaaru-koonane' daarieu'nane' nkavera pari'ema nii'nane'koo naruaape-ita beenaumo kivora daarieai.'

<sup>8</sup> "Ee'noko tee tarenara bakaang ovinge taaravura aa'puu', 'Tee aung tarenara aa', bane koonto' deeaunge, teka bakei tampa' uro'ke noru'umaung!'"

Ee'noko Jiisuu'ke minkunaavarama aa'puu', "Nantoong aung kansii'nupoong kansii'koo mintoona' tero uro'ka matauarimaung dii' araka-koo-nupoong divu'daari paninung mintonuka tantarimaing. <sup>9</sup> A'noo' kansii'nupoong tamung apupo' uro'ke noru'aama kavokavoro kompaamaung bii'ka dotu-anta-koo, Kumponing deea'. Teka ninge ee' botorampimang dii' araka-koo-nupoong, kavokavoro tampa' komperiaing

nii'ning nantoong paku-koo, Kumponing tampa' oorurira onkeonke'duriaina' paning-koo, te' tampa' otoi otorimaatoainoo'.

<sup>10</sup> "Baa tee naning kake'iinung oki'ning-koo napo' tee'ke kake'iinung mmou'koo. Ee'noko baa tee naning oki'ning kompuu' kavuruaramaung teie mmou' tampa' tanatavuarupeu'. <sup>11</sup> Tee tee tee'koo dii' naurampiri-na'koo kake'iiriarura deeko' aung kansii'koong kavokavoro-nanka-koo, baie noru'duria' kapoo' masikung oko-antaruripeu'? <sup>12</sup> Ee'noko teing kapoo' Kumponing oki'noo' kong-koo taura'durining-koo kake'iiriaruruko deeko' baie dii'ka dii' okoruriaining arurii'naang? <sup>13</sup> Narung bautarai kenaanka ovontura siompurearupeu', ai' teie tee narung munte'uma nii'ning piaavumatopeu', nii'noo' narung siompuma nii'ning siompuarupeu'. Tee'koo dii'ke Kumponing ee'noko kavokavoro ookeng deto deeng-antaveriarupeu'."

### Kara Mirumiru' Aa'ning-koong Naning Maneenung Ee'noko Tee Sitovuru'

<sup>14</sup> Teinge Boto Keperuu'navitue mooni' pi-aavaako'ninge aing ee' oro' taaravaara Jiisuu' benkem-pau', teka teie aa'puru' teing, <sup>15</sup> "Dii' aing dii'ka koon-to'nuka-pina' nkorarimaung nantoonge daangan-taarii'naang, teka Kumponing noru'ui otong diikaning domang oreng, ai' aming tee kapoo' nantoonge daangampaamaung tee maremaare Kumponing-koo duta-koo. <sup>16</sup> Temu'keta tee Jooni Minkinara mme' poaruko Moosesi-ning boto ee'noko Kumponing-etaing nakaro-nupoong biikaang dariraari oto'deruriko'ning dii'ke siong-koo, teka Joonie tampara dooreng Kumponing bakaang muu' poaing-koong tasi'antaruru'noo'keta karika' aa'na' itoveema taatoiarimang tung-koo dii' tamung doororariri otoko.

<sup>17</sup> Nka Moosesi bakaang boto-koo oki'nanaare daanaare deemparavauka', bane paning ee'noko kansii' tankinureko. <sup>18</sup> Ee'pina', dii' ookara dii'ankaampi bata'erererima oovuning namperererimaing dii'ke tee nampeesi orarierimaung. Ee'noko dii' donkaang maniku' bii'unkaampie bata'aarimaing namperereerimaing tee'ke, nampeesi orarinukai Moosesi bakaang boto toto'peri.'"

<sup>19</sup> "Narung aunge, dii'maiko', mmou' kavopo'ning atang-pina' oro'ninge tampenge mononopa'ke nopa'arako'ning, doong kante paroro narunge mavo-mavo'po'ninge bau'arako'. <sup>20</sup> Ee'noko bakanoo'ke karanaang-koo naning narung ata'oi' bempari otoko' miring Lasarusi, pentai maanto'. <sup>21</sup> Mukunge bau'arako' tee ovo'ma'nung taamang banto'doma-ita dua'arako'ninge. Aa'noko'ning, mosi'ke poroma penta nempii'aako'. <sup>22</sup> Teketa' tee ata'oi' boo'pario' koosin-unankai nkavaara Eebaraami'koo bireng-koo kuung sipau'. "Tee kavo mmou'po'ning tee' nari' boo'pario' dako'au'.

<sup>23</sup> Ee'noko boo'nuka biikanoo'ke sisikeeravoi duta bere'arara ookuko' Eebaraami'koo isipo' otoko

† Ooveai Mat 5:31-31; 19:9; Mak 10:11-12.

Lasarusi ninka nari'.<sup>24</sup> Ee'noko tee bokuvuu'nung aa'puma, 'Mma', Eebaraami', piaamera Lasarusi botoveko pora pankiri' ntong-koo duu'parara meneng komura boimuai, ai' ning tee sisikeerai puru'antamuing aung-koo urung-koo meu'ka.'<sup>25</sup> Teka Eebaraami'ke aa'puu', 'Nnuring ee, noru'eaing da' tee kansi'koo otoi kapoo' tampeng nkasiiko'nung ee'noko Lasarusie tenang oreng nkavuko', teka enang aung anke boiravui domang kuaa'oi otong ee'noko da' sisikeerai puru'antarui otong.<sup>26</sup> Napo' nii'nung kapoo' nii'koo meu'ke keeva' bakatemota otong nantoong anketa tanking-koo piavoropeu'ning beroarupeu', ee'noko teketa dakanameng-eta aa' nii'anako naning tankinuarupeu'.

<sup>27</sup> "Ee'noko tee kavo mmou'ke Eebaraami' maku'uma aa'puu'nung, 'Mma' ee, nuu'damaang dake Lasarusi botoeaing mma' bakanamono-koo, ai' ninge pa'noko' ntara-mainkaang otorong.<sup>28</sup> Bera siingoravuriaing aa' oroo' sisikeera-po'noo' poro'neenga.'<sup>29</sup> Teka Eebaraami'ke aa'puu', 'Tee aa' Moosesi ee'noko teing Kumponing-etaing nakaro-nupoong biikaang dariraari otong. Teing deeruaavaing.'

<sup>30</sup> "Ee'noko teie kavo mmou'ke maku'uma aa'puu', 'A, mma' Eebaraami', naning boo'keta bei dei teing-anko teing bere'aripeu'.'<sup>31</sup> Ee'noko teie maku'uma aa'puu' tee, 'Tee aa' tee Moosesi ee'noko teing nakaro-nupoong taaravaariauka'nung deeko' tee tee' nari' masika'antavaavarupeu', bane naninge boo'keta daa'arapeu'nunge nauvuriko.'"

#### Purimariri Aarumo Orara-ita Koomariaina' Pakumeeri- ma

(Mat 18:6-7,21-22; Mak 9:42)

**17** Ee'noko Jiisuu'ke aa'puru'nung barevare-nupoong, "Amutemuriaunanka kapoo' otong nantoong orara aarumo-koo dua'antavurimaung, teka bakei piaaru'nuka teing nantoong nii'ning dua'antavaariaining.<sup>2</sup> Teka tee' oro' naning baukoi paravuaruu'nung dei tampa', ai' Kumponing ee'na' kiimatavuaing tee naning aing toire'koo narung dua'antavuaing tee-koo orara aarumo-koo.<sup>3</sup> Tanatarariaing dii' dii'ka. Da'marang-koong oraka' nkoarako sira'pei naueai ee'noko orarunsiarako deeko' tonta'antaevuai tee.<sup>4</sup> Ee'noko tee na'mung doong-koo ~kemu'ka-aae oraka'nko nkovupeu' da'koo ee'noko teing kante napo' ~kemu'ka-aae da'anko bere'arama poma aa'puko deeko', 'Ning oraka' nkomaring,' tonta'antaevumatoai dake."

<sup>5</sup> Teinge kara okovuri nkanukai aa'pau' tee Ovoring, "Niikaang baito pankaing-antamemuriaing."<sup>6</sup> Ee'noko Ovoring maku'urima aa'puru', "Teu masitara'koonu sinanu teu oki'nu, teka teu-eta tee koi' pankaing dupuma deemparaang, ee'noko tee' nari' dii'ke masika'anta ninka, bane oki'navu' komperi, bakei aa'noaing, avarireto koi'navari aa'periko deeko', 'Deto bita'darara pirung-koo keentaravai,' tevarie meunturipeu'.

<sup>7</sup> "Dii'koo narung ovo'ma' botovotonaa' oto'evu-matopeu' mintoomparama nii'noo' sipisipi' tanatavuri-

ma, ee'noko tenang tee botovotonaa' osi duparako teie ovo'ma'ke ee kirokaivupeu'?<sup>8</sup> A, tee' aa' kirokaivuarupeu', teka aa'pupeu' tee, 'Dake taamang ua'memuai ee'noko mononopa' paarirarara bantomemuko naiampai ee'noko da' doinang daka taamaniang.'<sup>9</sup> Tee ovo'ma' amaiaa'oarupeu' bakaang botovotonaa'koo kapoo' botovuko nkoevumaing-koo.<sup>10</sup> Ee'noko dii'koo tee' nari'ke, tenang dii'ke bakeveriko tee kapoo'nanka ninge diikaang ovoringe naurampimaing nko-koo ninge dii' pankaing-anta-koo piaroriauka', aming-koo, nna' dii'ke tee nko-nko diikaang bantampiru'nung narung nkoverimang."

#### Nanai' Oramuu'po'nupoong Taare-antavuru'na'

<sup>11</sup> Jerusalema'aape bema Jiisuu' kevora'ka-koo meu'ke tankinuu' aa'ning-koo Sameria' ee'noko Kaaleli'.<sup>12</sup> Ee'noko namono-koo osi-koo duparako nantoong nanai'ke oramuu'po'nupoong kune'au'. Teketa isipo' donkonai bokiaama aa'pau', 'Jiisuu', Ovoring, piameraing nii'."<sup>14</sup> Ee'noko tenang teie oovurira teing aa'puru', "Berira piristi'nanka-koo sira'antarariaing, ee'noko tampa' ooruko Kumponing-koo boontunang nkoveai nantoong tee taa'ni'anta ooaara da' teing ninka nari' oto'koo taura'nii' tasi'daavaina', tee' Moosesi bakaang botoi minkuvumana'." Ee'noko tee' bema mono kiirora'orou'.<sup>15</sup> Teketa narung teing-koong taarevou'nung ooarara napo' toroarun'nung Kumponing aa'na' bokuma daangampuma.<sup>16</sup> Ee'noko Jiisuu'koo kau'kanoo' kinkinura tampara tampuu'. Aung tee ee'nung Sameria'koong.

<sup>17</sup> Enang Jiisuu'ke aa'puu', "Nanai' ee deea' kuiaririning? Teing ~karenaumo-taa areinge?<sup>18</sup> Teing-koo narung ee otoa' toroarara Kumponing daangampupeu'nung teka aung narung ako'nung toroari?"

<sup>19</sup> Ee'noko Jiisuu'ke aa'puu' tee, "Daa'darara naniai. Dakaange baitoi domang-antaruing."

#### Muu' Paning-nung Poaina'koong Minkunaa Nauvuru'na'

(Mat 24:23-28,37-41)

<sup>20</sup> Nii'hang napo' Boto Keperuu'navitue Jiisuu' nia'aa-ma aa'pau', "Kumponing bakaang muu' arenang poa'naang?" Teie maku'urima aa'puru' teing, "Tee Kumponing bakaang muu' taa'ni'anta ninka poauka'nung dutai oo-koo.<sup>21</sup> Naninge aa'puauka', 'Ooveriai, aung tee,' ai' 'Aunka' tee.' Aming-koo, nna' Kumponing bakaang muu' tee bakaning nantoong-koo meu'ke otoi tarevuri otomaung."

<sup>22</sup> Ee'noko teketa dama'ke Jiisuu'ke aa'puru' bakaning barevare-nupoong, "Batei orananka tee pomaang tenang ning Tee Naning-naumpo' Paning-etaing ninka nari' oto'koo aa'na' piaroriaiang, teka ning oomeriauka'nung dii'ke.<sup>23</sup> Nka tee nantoong aa'daariaing dii', 'Tee aunka' nemperimaung berira ooveriai.' Nii'noo' aa'daariai, 'Tee aung a' otong.' Teka biikaang kara siomperia' otoaing.<sup>24</sup> Aming-koo nna' piping tavo'kuma paning-koo auvi'au bereravaramana' tee' nari' ning Tee Naning-naumpo' Paning-etaing oro'mara-

vaing te'mung nkana'mung. <sup>25</sup> Teka tutung ninge kapoo' arikananka kune'ampaing tompimaama nko-maavaining enanavarange.

<sup>26</sup> "Tee' nari' Nooa' bakanang nkoaru'na' tee' ee'na' nari' ning Tee Naning-naumpo' Paning-etaing moainang nkoaravaing. <sup>27</sup> Aa'noko'na': Taamanaama, naikaama, nampeema otoroko' bera Nooa' aa-ka'nareng-koo tumparu'noo'ke basi, ee'noko douai pora aaruvuru' ookara. <sup>28</sup> Napo' tee' nari' nkoariko' tenang Lotee' bakanang: Taamanaama, naikaama, baaveveema, keenkeeng nkoaama, pava kaniaarima. <sup>29</sup> Teka te'mung Lotee' Sodom-navuntu'keta tonta'arako urung ee'noko kapang nta'po'ning apo'pina' paning-eta dua'arara taivuru' teing ookara.

<sup>30</sup> "Napo' tee' nari' nkoaravainge ning Tee Naning-naumpo' Paning-etaing napo' moainang. <sup>31</sup> Te'mung basiarako naning kavo-po'nung daunavaro-koo otoainoo'keta siarama bakaning kavo nka-koo pava-koo kuung tumparavauka'nunge. Napo' tee' nari' naning mintoong-koo otoainoo'keta pava-koo toroaravauka'. <sup>32</sup> Noru'eriaing Lotee' ba'aang denki'ou'na' tenang nta'ke osi taivuko'namono-aape toroarako bakaang kavo noru'uitaa'.

<sup>33</sup> "Baa tee naning bakaang domaang baka tarearamaung tee bakaang domaang tee paa'aravaing, ee'noko baa tee naning ning-koo bakaang domaang dua'aravaing tee teie tee' nkoarama tampa' pinka'antavuaing. <sup>34</sup> Napo' naurampimang, muunga tee kenaanka naro'ke aaturesi otoko narung pari'uma narung sipuaing. <sup>35</sup> Napo' manikumaara kenaanka-koo nari' iinkureko nani pari'uma nani sipuaing. <sup>36</sup> Napo' kenaanka naninka pora'ke otoreko narung pari'uma narung sipuai."

<sup>37</sup> Ee'noko teinge aa'pau' tee, "Ovoring, are'ka?" Ee'noko Jiisuu'ke aa'puru' teing, "Are' tokoo dera' otoinoo' mareoi'nanka tee te' poroma naro'arimaung maa'aava'naang tee."

#### Teni Naaro Ereana Bauko Ee'noko Tee Kara-simpe'

**18** Ee'noko Jiisuu'ke nauvuru'nung kara dikito' baito-koo date'pariri doong kante kunsiarimatoonaang kontevoroa'. <sup>2</sup> Aa'puu'nung, "Nii'namonokoo naning narung kara-simpe' otoko'nung, aa'nung Kumponing-koo avoroaruko', nantoong noru'uriaruko'. <sup>3</sup> Ee'noko temono-koo nani manikuma naaro otoko', tee-anko doong kante poma aa'puko'nani, 'Donkomei pakumeai ning naninge turamumaa-toinani.' <sup>4</sup> Tutuna'namu'pi-koo taaravuaruko'nung, teka dama'ke baka karoma aa'puu', <sup>5</sup> 'Ai, ning aa' Kumponing-koo amoromparukoo' ee'noko nantoong noru'aramparukoo', nka makosi anie naaro'i ereana-mumaung-koo donkompampaing pore'antamumaa-to'neenga tee' nari' poi otoma.'"

<sup>6</sup> Teketa Ovoringe aa'puu', "Tasi'peri noru'eriai tee aung naning kara-simpe' orara nkoaru'na'. <sup>7</sup> Ee'noko Kumponing ee aarumo koonto' kansi'koo donkompevuriaroo'naang bakaning miru'nii'nanka tee-koo bokiamaing doong ee'noko muung nantoonge oraka'

nkoarimaung-koo? Ai' pankaroong tamung taaravuri otopeu'? <sup>8</sup> Ninge ee' naurampimang, teie tee namu'ke aarumo koonto' donkompevuriaing. Teka bane tee'koo, ning Tee Naning-naumpo' Paning-etaing napo' kansi'koo mora arekee', nantoong mme' baitoariri otoroko oorampaing e?"

#### Boto Keperuu'navitu-koong Ee'noko Tee Taakisi Nkanuka-koong Kunsiaretu'na'

<sup>9</sup> Napo' nii'nung narung kara dikito' Jiisuu'ke nauvuru'nung aunge too'puri teing nantoong bii'ka koonto'nuka tamparimaing ookara oovuning doonko ooaarima, <sup>10</sup> "Kenaanka naninka nanuretu'nung dootuu'nava pankava-koo kunsiaree'naang, narung Boto Keperuu'navitu-koong ee'noko nii'nung taakisi nkanuka-koong. <sup>11</sup> Tee Boto Keperuu'navitu-koong donkonui kunsiarama aa'puu', 'Kumponing, ninge tampara tantamang da'koo, ai' ning tee nii'ning nantoong-pina' deea' aa'ning oko'okonuka, tosi ninka bakiaa' nkonuka, nampeesi orarinuka, napo' bakei aung-pina' taakisi nkanuka-koong-pina' deea'. <sup>12</sup> Ning tee kemu'kai unkumomaramaung uiki kante tampa' kunsimaraa'naang. Kapoo'koo kompamaing-koo Kumponing bakaning avonkoo'."

<sup>13</sup> "Teka tee nii'nung isipo' donkonura, domang putu'arama, deto ankamparava' paning-aape aa'puu', 'Kumponing ee, piaamera tonta'meai ning naning oreng nkoamaung.' <sup>14</sup> Tee aung naning naurampimang Kumponing bakaang duta-koo koonto' deem-pari duparu'nung, tee nii'nung deea'. Ai' ookara nantoong bii'ka detoarimaing Kumponing doonko batarivuriaing, ee'noko baa tee naning baka depetoaramaung Kumponing deto sipuaing."

#### Jiisuu'ke Toire' Oki'nareka' Biraankevuru'na'

(Mat 19:13-15; Mak 10:13-16)

<sup>15</sup> Enang teing nantoonge toire' nerakau'nanka ninka Jiisuu'anko po'antavaariko' teie kompura biraankevurii'naang. Ee'noko tenang teinge bakaning barevare-nupoonge ooaarira poteaarua' teing. <sup>16</sup> Teka Jiisuu'ke toire' bokuvurima bakaning barevare-nupoong aa'puru'nung, "Toire' taura'perereriko poroai ning-anko, para'ereria', ai' Kumponing bakaang muu' nantoong amurii' okovuriaing. <sup>17</sup> Masika' naurampimang ninge dii', baa tee naning Kumponing bakaang muu' tooto'ke bauta' nkavui aroo'aramana' kompuarura tee bakei tumparavauka'nung te' Kumponing bakaang muu'koo."

#### Tee Naning Pankaing Kavo Mmau'po'nung Jiisuu' Ninka Minkuaretu'nung

(Mat 19:16-30; Mak 10:17-31)

<sup>18</sup> Teketa tee naning pankaing nia'uu'nung Jiisuu', aa'puma, "Da' nau-anta tampara, ninge aming nkoamira domaang oparavaung okomupeu'?" <sup>19</sup> Ee'noko Jiisuu'ke maku'uma aa'puu' tee, "Arekee'koo dake ning tampara tammemang? Nii'nara naning tam-



para otoa'. Kumponing narung tampara. <sup>20</sup> Dake Moosesi bakaang boto noru'ei otong, ee' minkuvu-maung,

'Nampeesi orarieauka', naning dupisi'eauka', bakiaa' nkoveauka', daang-koo tuutunampeauka', daumararing deto noru'eresi pakuereaing.'"

(Toro 20:12-16)

<sup>21</sup> Ee'noko teie aa'puu', "Aing ookara ninge tanata-vantu'ning ning oki'na'noo'keta." <sup>22</sup> Ee'noko tenang Jiisuu'ke taaravura aa'puu' tee, "Da' narung kapoo'koo makosia'. Baaveveaing ookara kapoo'nanka dakaning, ee'noko mooni' nkavera tankaampeai teing-koo ata'oi'nuka-koo. Tee' nkovera paning-koong kavonanka oto'deruaing. Ee'noko ning siomei poai."

<sup>23</sup> Teka teie tee' taaravura orarunsiaru' tee, ai' tee aung tee kavu mmu'po'nung. <sup>24</sup> Jiisuu'ke tenkenuko oovuma aa'puu'nung, "Bakei pore' masakung teing-koo kavu mmu'po'nupoong-koo muu' Kumponing bakaang-koo tung-koo. <sup>25</sup> Kaameli'navoro' bamaru'koong busie tumparavarupeu'na' bakei naning kavonanka-po'nung dau basinoo' makotua' Kumponing bakaang muu'koo tung-koo."

<sup>26</sup> Teinge taaravau'ninge aa'pau', "Arekee'? Kavv mmu'po'nupoong domaang moo'ariarupeu'ning deeko' enang baa domaang moo'aravaing?" <sup>27</sup> Teka teie aa'puu', "Kapoo' nantoonge nko-koo makosiaavaung tee, teie Kumponing nko-koo makosi."

<sup>28</sup> Ee'noko Piitai aa'puu', "Aung ee, teka nii'ke siparampiru'nung niikaning osinanka-po' da' sion-tampima." <sup>29</sup> Ee'noko Jiisuu'ke aa'puru' teing, "Masika' naurampimang ninge dii', baa tee naning aing aa'ning sipuu'nung: pava, ba'aang, ba'marang, nii'noo' baurukaa' Kumponing bakaang muu' bereng-anta-koo, napo' tee temurii' mmu' oto'evuaing emu'naroong-koo kansii'koo otoitaa'; <sup>30</sup> ee'noko dama'naroong-koo napo' domaang oparavaung okovuaing."

#### Jiisuu'ke Dama'ke Boo'antavaavaing Beemu'pina' Sira'puu'noo'

(Mat 20:17-19; Mak 10:32-34)

<sup>31</sup> Ee'noko bakaning poka'urira nanai'keta kenaanka aa'puru' teing, "Aing ee, Jerusalema'aape deto merii'naang ee'noko ookutunung kapoo'nanka ning-koo, Tee Naning-naumpo' Paning-etaing-koo, nakarunupoonge teroita minkumaama daariako'ning teke dupearaa'naang, aa'nora: Ju'koong ovontunge si'maavaing Ju'deeaing-anko, ee'noko teka teinge akapeu'maama maimaia'na' nkomaavaing tutu-pee'maama. <sup>33</sup> Teinge ning mura'maara dupisi'maavaing, teketa beenang doong deemparako napo' daa'maravaing." <sup>34</sup> Teka teinge tasi'paava' teing aing kapoo'nanka. Aung minkunaa tee teing-koo baku'aru'nung, noru'ke nkavaava' teing kapoo' minkuvu'ning.

#### Tee Naning Kaputu' Jerikoo'nung

(Mat 20:29-34; Mak 10:46-52)

<sup>35</sup> Teketa Jiisuu' Jerusalema'aape nari' bema Jerikoo'navuntu'koo due'aru'nung teke kaputu', eenta bauko, taung miiringe ba'nampari otoko. <sup>36</sup> Ee'noko teie kaputu'ke nantoong karika' tee-koo miiringe tankinaako taaravuru'nung ee'noko nia'kuma aa'puu', "Aung naampa aming-koo?" <sup>37</sup> Teinge aa'pau', "Jiisuu', Nasareti'nung tankinumaang." <sup>38</sup> Teketa bokuma aa'puu', "Jiisuu', Deevita' bakanaving-koong, piaameai ning!" <sup>39</sup> Ee'noko teinge ureai nanaako'ninge orokoau' tee aa'paama, "Doorontaravai!"

Teka tee baru' aa'na' bokuu' aa'puma, "Ovoring Deevita' bakanaving-koong, piaameai ning!"

<sup>40</sup> Ee'noko Jiisuu' nasinura po'anta-koo botoaru' teeanako. Ee'noko tenang due' poio' Jiisuu'ke nia'uu' tee, <sup>41</sup> "Arekee' nkorama'naang piaromaang da', ninge?" Ee'noko teie aa'puu', "Ovoring ee, duta ning bantantameaing." <sup>42</sup> Ee'noko Jiisuu'ke aa'puu' tee, "Banteaing, dakaang baitoi tamparu'kiing." <sup>43</sup> Ee'noko namu'ke bantora tee Jiisuu' siompuu' Kumponing daangampuma. Ee'noko ookara nantoonge teie ooaara Kumponing daangampau'.

#### Sakiasi Bere'aru'na'

**19** Teketa Jiisuu' mme' Jerusalema'aape bema Jerikoo'namonoi tumparara osi-koo meeroo'ke tankinuko, ee'noko teke naning narung otoko'nung miring Sakiasi; <sup>2</sup> Tee taakisi nkanuka-koong narung pankaing, ee'noko mooni'ke maanto'ke. <sup>3</sup> Ee'noko tee Jiisuu' tasi'pui oo-koo piavou'nung, teka makotuaruu' nantoong karika'ke nee'aako naning apukung deemparama. <sup>4</sup> Tee'koo uro'kanoo' kua'parara koi'navarie miring sikamo'a'ke deto koinuu' Jiisuu' oovuu'naang tevunge tankinuaing noru'ui.

<sup>5</sup> Ee'noko tenang Jiisuu' te' basiarama deto ookuma oovura tee aa'puu', "Sakiasi, iri'narung depeto siraravai, ai' ning dakanava'koo e'mung o'noo'naang."

<sup>6</sup> Tee'koo iri'narung depeto siarara dotuaritaa' onkeonke'uu' tee Jiisuu'.

<sup>7</sup> Ee'noko nantoonge ooaara tee minkuminkuau' aa'paama, "Naning orara bakanava-koo otoo'naang being." <sup>8</sup> Teka Sakiasie donkonura Ovoring aa'puu', "Aung ee Ovoring, nkaang kavonanka-koo namarang ata'oi'nuka avorompaing, ee'noko nii'nung naning kapoo' tamung nkaevontu'nung deeko' napo' karemu'pie ori'ampaing."

<sup>9</sup> Ee'noko Jiisuu'ke aa'puu' tee, "E'mung domang-anta ava-koo poing, ai' aung teie narung, Eebaraami' baurukaa'koong. <sup>10</sup> Ee'noko ning Tee Naning-naumpo' Paning-etaing tee nantoong pooarimaing ee' ee'na' besi'arama domamparama'naang mou'nung."

**Ovo'ma'ke Mooni' Kantevuru'na'koong Kara Mirumiru'**  
(Mat 25:14-30)

<sup>11</sup> Tenang teinge aing kapoo'nanka taaravai otoroko Jiisuu'ke danto minkuvuma kara dikito' nauvuru' noru' koong-antavurii'naang. Ai' mmou' nantoonge daang ee' noru'aako'nung, Jiisuu' daurarong~ deempari Jerusalema' due'ka basiarara Rooma'nupoong bata'urii'naang Kumponing bakaang muu' dupe-antavuma. <sup>12</sup> Tee'koo aa'puu' teie, "Naning narung ovoroo' nii'naameensi'koo isipo' nanuu'nung daurarong pankaing teka daurarong deeng-antavuko toroaraa'naang. <sup>13</sup> Mme' bea' teie bakaning botovoton-aa'nuka-koo nanai' bokuvurira narung daaku'namikuna' kantevuru'. Ee'noko aa'puru' teing, 'Aing mintoong-antaveriaining bera ning toromaravainoo'ke basi.'

<sup>14</sup> Teka bakaning osikaiaang-koo nii'ninge munte'aara tee-koo dama'due kara nkanuka botoaarima tee daurarong pankaing-anko aa'pau', 'Nii' niikaang daurarong deeng-antaveauka'. Teka teie taaravuriaru'.

<sup>15</sup> "Teketa tenang daurarong deeng-antavuiu' toroarara tee botoaru'nung bakaning botovotonaa'nuka mooni' avuru'ning tee-anko porora sira'paa-va'naang bereng-antavau'na'. <sup>16</sup> Ee'noko tutuna'nung tee-anko uro'kanoo' pora aa'puu', 'Oving, dakaang mooni' narung daaku' ameu'namiku napo' kivora daaku'namiku deeng-antarerontu'nung.' <sup>17</sup> Ee'noko teie aa'puu' tee, 'Bakei tampa' nkoraru'nung da' tampa' botovotonaa'. Tee'koo tampa' oki'navu'koo kake'iiraru'na'koo da' enang kivora-namonori osi pankeng-koo tarenung deeng-antaramaang.'

<sup>18</sup> "Ee'noko kenaanka-nung pou' tee-anko aa'puma, 'Oving, dakaang mooni' narung daaku' ameu'namiku pa'noko' daaku'namiku deeng-antarerontu'nung.' <sup>19</sup> Ee'noko teie aa'puu' tee, 'Da' enang pa'noko'namonori osi pankeng-koo tarenung deeng-antaramaang.'

<sup>20</sup> "Teketa napo' nii'nara pora aa'puu', 'Oving, dakaang mooni' narung daaku' ameu'namiku aing, baarong-koo dai'amira teka tareantu'namiku. <sup>21</sup> Da' dataramparura tee', ai' da' tee naning ivekung. Dakaning botovotonaa'nuka pore'oromatoko dama' pora derararaa'naang.' <sup>22</sup> Ee'noko teie dauraronge tee aa'puu', 'Da' botovotonaa' orara masikung, tee' minkumeinaare ninge enang toro-antavama'naang da'koo. Masika' ee' noru'mei otong naning ivekung? Nkaning botovotonaa'nuka pore'oromatoko dama' mora deramaramaung ee? <sup>23</sup> Tee' noru'mei deeko' are-kee'koo nkaang mooni' beeng-koo sipearu', toro-marara nii'ning taakore'ning ninka nkavampeu'nung?'

<sup>24</sup> "Ee'noko tee dauraronge teing nantoong due'ke donkonai otoroko'ning aa'puru', 'Tee mooni' pari'eraii tee aung, ee'noko tee kivora daaku'namiku oto'evuing averiai.' <sup>25</sup> Ee'noko teinge aa'pau' tee, 'Oving, aung aa' kivora daaku'namiku oto'evuing mmou' oto'evung.'

<sup>26</sup> Teka teie aa'puu', 'Ninge naurampimang dii' aa'dampima, teing ookara kapoo' basi-antavaamaing dau basinoo' napo' avu'koong, ee'noko tee naning

kapoo' basi-antavuaung teing oto'evuing naru'ka pari'koong. <sup>27</sup> Teka teing nkaning too'de-nupoong ninge tare-koo piavoroing tee teing po'antavererira anka ning-koo dutakanoo'ka dupisi'erereriaing.'" <sup>28</sup> Ee'noko tenang aung ee' oro' kapoo' minkuvura uroi Jerusalema'aape deto beu'.

**Jiisuu' Jerusalema' Tavo'arara Nau-antavuru'na' Dootuu'nava-koo Kuunge**

(19:29-21:38)

**Jiisuu' Jerusalema' Daurarong~ Deempari Tumparu'na'**  
(Kena 118:25-27; Mat 21:1-11; Mak 11:1-11; Jon 12:12-19)

<sup>29</sup> Ee'noko tenang Jerusalema' due'arama teing-koo osi kemonora aa'ning Bepasi ee'noko Beetani teke Olive'po'namii-koo teie bakaning-koo barevare-nupoong-koo kenaankara uro'ke botovuretu' aa'purema, <sup>30</sup> "Amonoka'koo du'dareai. Te' du'dareta doonkii'nu kampionu ooveree'naang bi'ari otoko naning mme' ba'nanuau. Dapa'ereta a' po'antavereai.

<sup>31</sup> Naninge nia'durema aa'dureko, 'Avoro' aming-koo dapa'eremang?' ee' minkuereai, 'Oving avoro'koo nko-nko oto'evung.'" <sup>32</sup> Teketa tee tenaanka botovuretu'naankai bereta tee' nari' navuretu'na' oovuretu'nung.

<sup>33</sup> Ee'noko dapa'ureko tevero' kambia-navoro' okonupoonge aa'paaretu', "Aming-koo avoro' kambia-navoro' dapa'eremang?" <sup>34</sup> Ee'noko tenaankai aa'puretu', "Oving avoro'koo nko-nko oto'evung.'" <sup>35</sup> Ee'noko tenaankai Jiisuu'anko po'antavuretu'nung tevero', ee'noko biikaang baaronge tani'aara Jiisuu' teu-koo dau ba'ngang-antavau'. <sup>36</sup> Ee'noko tevero'ke nanuko nantoonge baaronankai biikaning taung tani'aako'.

<sup>37</sup> Teketa tee Olive'po'namii booru'uma~ Jerusalema'aape due'arama oro'parako teing ookara karika' barevare-nupoong doturotu tutumpariru' Kumponing daangampaama bokiaama teing nko-nko iirakutananka ooaako'ning-koo aa'paama,

<sup>38</sup> "Biraanke-po'nung tee aung daurarong Kumponing bakaang miring-koo pomaang!

Mooa ee'noko tee meenasi a'dei'ke paning-koo otoaing."

(Kena 118:26; Luuke' 2:14)

<sup>39</sup> Ee'noko nii'ninge Boto Keperuu'navitue kari-ka'kooning aa'pau' tee, "Nau-anta, orokoveriai dakaning barevare-nupoong tee' minku-koo.'" <sup>40</sup> Ee'noko teie maku'uma aa'puu', "Ninge naurampimang aing dooroompariko deeko' aing kapananka deto bokiaama tee' minkuaapeu'."

**Jiisuu'ke Jerusalema'nupoong Birompuru'na'**

<sup>41</sup> Ee'noko tenang Jerusalema' due' pora te' osi pankamono oovuma birompuru' temono-nupoong, aa'puma, <sup>42</sup> "Baka'e, e'mung dii'ke tasi'peri dei tampa', ninge mooa-koo basi-antampipeu'na' dii', teka

enang tee dii'keta duta-ita baku'aring. <sup>43</sup> Pomaang te'mung doong tenang diikaning kare-nupoonge porora kororai ku'nuntaariaina'mung taamang moo'eriauka' bera peerai taruriko teinge o'daari doonko kansikoo dua'raariai diikaning pavananka nari', teing-kooning kapananka tuurampaama; <sup>44</sup> Am-ing-koo, nna' Kumponingee dii' piaaruri beero'duriko tasi'periaung-koo."

**Jiisuu'ke Dootuu'nava Pankava-koo Baave Nkonuka Bata'uru'na'**

(Mat 21:12-17; Mak 11:15-19; Jon 2:13-22)

<sup>45</sup> Ee'noko Jiisuu' Jerusalema' basiararai'nange, parang-koo tumparara pava dootuu'nava pankava-koong-koo, nantoong sipisipi' dovang parekanumpo' baaveveeko'ning bata' tutumpuru'nung. aa'purima teing, "Daari Meekung-koo tee ee' daariari otong, 'Nkaang pava tee pava kunsinava deempari otoainava.'

(Aisaia' 56:7)

Teka dii'ke 'bakiaa' nkonuka biikanoo" deeng-antaver-ing."

(Jeremaia 7:11)

<sup>47</sup> Teketa doong kante kara nau-antavuriko' pava dootuu'nava pankava-koo. Ee'noko piristi'koo ovontunge ee'noko boto naunukai ee'noko pankenge taung besi'aako' Jiisuu' dupisi'aava'naang. <sup>48</sup> Teka teinge kapoo' nkoaapeu'ning ooaava', ai' nantoong dompirompi'oroko'nung bakaang kara taara-koo.

**Baie Jiisuu' Taura' Avuu'nung Nia'au'na'**

(Mat 21:23-27; Mak 11:27-33)

**20** Nii'na'mung Jiisuu'ke teke dootuu'nava pankava-koong parang-koo daankiarama dooreng tampara nau-antavuriko'; <sup>2</sup> Teketa teinge piristi'koo ovontung ee'noko boto naunuka, nantoong-koo urang-antanuka ninka tee-anko pororai'nange aa'pau', "Naumeriai dake aremurii' taura' otoko dake aing kapoo'nanka nkovemaatoingee, baie aruu'nunge tee taura'?" <sup>3</sup> Teie maku'urima aa'puu', "Iro' ninge dii' napo' tana'dampiko naumeriaing dii'ke. <sup>4</sup> Baie taura'puio' Joonie nantoong ntong-koo minkivurima meeka'antavuriko', Kumponingee ai' tamung nantoongee?"

<sup>5</sup> Ee'noko teing bii'ka nia'eema aa'peeko', "Are'pampia'naang? Aa'pampiko deeko', 'Kumponingee, teie aa'murii'naang, 'Teka dii'ke aming-koo Jooni masika'antaveriaruko'?' <sup>6</sup> Teka aa'pampiko deeko', 'Tamung nantoong-etaing,' ookarai nantoongee kapange dupisi'maarii'naang, ai' teinge tee Jooni nakaronara Kumponing-etaing tasi'pai otong." <sup>7</sup> Teketa aa'pau' maku'aama, "Nii'ke aa' noru'ampia' baie pa taura'puio'." <sup>8</sup> Ee'noko Jiisuu'ke aa'puru' teing, "Ee', ninge tee'ke naurampiaroo'naang baa tee ning taura' amuu'nung aing kapoo'nanka nko-koo."

**Teing Oreng Mintonau Oko-antavuru'ning-koong Mirumiru'**

(Mat 21:33-46; Mak 12:1-12)

<sup>9</sup> Ee'noko Jiisuu'ke kato nau-antavurima aung kara dikito' nauvuru' teing nantoong, "Naning narunge mintonau uaininau keempuu'nung, teketa nii'ning nantoong tenau tare-antavurira nii'naameensi'koo tenkenuu' pankaroong otoo'naang teke. <sup>10</sup> Ee'noko tenang batei sinang kavu'koong makotuo' teie narung bakaang botovotona' botovuu' teing-anko uaini tare nkonuka-anko nii'ning sinang baarauni-koong~ tenau-koo nkaevua'naang. Teka teinge tenau tare nkonukai tee botovotona' murasiavaama bata'au' tee baarauni avaava'. <sup>11</sup> Teketa teie napo' nii'ning botovotona' botovuu'. Tee ee'nung napo' tee nari' mura'aama maimaia'na' nkoaama bata'au' tee baarauni avaava'. <sup>12</sup> Ee'noko napo' tee' nari' teie ovoringee beenaumo-ning botovuu', ee'noko tee aung ereng-antavaara dama'du dua'au'.

<sup>13</sup> "Teketa teie uaininau ovoringee aa'puu', 'Enang aming nkoama'naang? Enang aa' tee nnuring kirokai ninge aa'na' piaavamaung botoampaing. Teing pa amaiaa'oropeu' tee-koo.' <sup>14</sup> Teka tenang teinge tare nkonukai tee bauring ooaara bii'ka kareaama aa'paako', 'Tee aung ee'nung barenku okovuaing. Aia' dupisi'ampiai tee barenku okomuriaina'.' <sup>15</sup> Ee'noko teinge tee uaininau-eta dama'du dua'aara teka dupisi'au' tee. Enang arekee' nkovuriaing teie tenau okovenunge? <sup>16</sup> Teie aa' tee teing tare nkonuka-anko pora tavurima opuriaing, ee'noko nii'ning oko-antavurimaing."

Tenang teinge taaravaara tee aung minkunaa aa'pau', "Ee aing, teing aa' oo nii'ke tee' nkoau'na' nkoampiarupeu'." <sup>17</sup> Teka teie oo'ovurima teing aa'puru', "Nko temurii' nko-koo makosiriaung deeko' anaare Daari Meekung-koonaare aming miru'ari otong, 'Tere' ee'nare' kapanare' pava kaninukai poore'aama dua'au'nare' ookutunava-koo e'manianare' tumanare' deempario' tasi'pau' dama'ke.?"

(Kena 118:22)

<sup>18</sup> Ookara nantoong tere'koo tasi'paava' tupampariain-ing tee bii'ka pisira'ariaing, bera baa tee naning tere' dau dua'aravaing tee tere'ke puutuvuaing."

<sup>19</sup> Ee'noko teketa tenang boto naunuka ee'noko piristi'koo ovontung tasi'pariru' teie tee kara dikito' teing too'antavuri minkuvurio'. Ee'noko tenang ee'ng taung besi'au' Jiisuu' dai'aavainavung, teka nantoong-koo avoreau'.

**Taakisi Moo'koo Jiisuu' Nia'au'na'**

(Mat 22:15-19; Mak 12:13-17)

<sup>20</sup> Tee tee teinge keuai otoko'nung makensi'navitu botoaarima tee-anko barevare-nupoong masakeng-pina' oro'pariri avakareaava'naang, ee'noko kara minkuvuaining-koo oranaare taaravaara deeko' ovo'ma'koo tavo'aava'naang. <sup>21</sup> Teinge nia'aama aa'pau' tee, "Nau-anta ee, nii'ke noru'dampiri otong

da' koonto'na' karema nau-antamerimaung, tankaang-anta-pina' oro'daravaunge, teka bakei masika' Kumponing bakanavung naumerimaung. <sup>22</sup> Arekee', nii'ke Ju'nupoonge ee daurarong~ pankaing, Siisa', Rooma'nung taakisi avu'koo makosi ai' makosi deea'?"

<sup>23</sup> Teka teie biikaang avakare tasi'pura aa'puru' teing, <sup>24</sup> "Io' mooni'nu naumeriai. Au-koo aung bore' uu'aa' baa-koong aa'nung miring daariari otong?" Teinge aa'pau', "Siisa'koong."

<sup>25</sup> Teketa teie aa'puru' teing, "Tee tee averiaing teing kapoo' Siisa' bakaning tee-anko ee'noko Kumponing bakaning Kumponing-aape averiai." <sup>26</sup> Tee' maku'urio' doona ooaava' baanka'aapeu'na' nantoong-koo uro'ka, teka ta'ninaara dooroompariru' teing. †

### Boo'keta Daa'koong Nia'au'na'

(Mat 22:23-33; Mak 12:18-27)

<sup>27</sup> Teketa napo' Noru' Pitunavitu-koong~ nii'ning Jiisuu'anko niania' ninka porou'. Teing teing boo'keta napo' daa' masika'antavaava'navitu. †† Tevitu-koo nii'ning Jiisuu'anko porora avakareaama ee'pina' nia'au'nung, <sup>28</sup> "Nau-anta, Mosesie aung boto daarimemuru'nung,

'Naning narung booko ba'aang otoko toire' otoai tee donkaani baara'ma'nunge nampuai teni naaro tee ninka bataata boo'paru'nung tooto' paravevuree'naang.'

(Boto 25:5)

<sup>29</sup> Urikamu' tee namaia' nara'ka ~kenaanka-taa otoroko'nung. Ee'noko tutuna'nung nampeesiarara boo'paru' bauring otoa'. <sup>30</sup> Ee'noko baara'ma'nunge teni manikuma nampura tee' nari' boo'paru' bauring otoa'. Teketa beenaumo-nunge; <sup>31</sup> Tee' nari' temaia'koo ookara-koo ~kenaanka-taa-koo nkoaru'. Ookara boorou' biurukaa' otoroa'. <sup>32</sup> Ee'noko asi'na'moo teni nani manikuma boo'paru'. <sup>33</sup> Enang te'mung asirana'mung boo'nuka daa'ariaina'mung temaia'koo arera ba'aang deemparavainani? Ai' ookara ~kenaanka-taa nampau'nanie teni."

<sup>34</sup> Ee'noko Jiisuu'ke aa'puru' teing, <sup>35</sup> "Aung emu'nung batei-koo donkaang ee'noko maniku' nampeesiari-maung, teka dama'nung batei-koo teing Kumponing makosi-antavuriaining boo'keta daa'arira oto'koo tee teing nampeesiarauka'ning, <sup>36</sup> ai' teing tee napo' boo'koo makosinuka deea'; aming-koo, nna' koosin-unanka-pina' oro'nanka deempariko. Teing boo'keta daa'ariainoo'koo Kumponing baurukaa' deempariri otoroaing. <sup>37</sup> Moosesie ee'narai tee' nau-antamuru'nung teing boo'nuka domampariaing-koong kara. Bakaang dariraari-koo Kumponing tuu'doi'navari tamung urusivuko'navari-eta karoma Moosesi aa'puu', 'Ning tee Kumponing teing aing aa'ning biikaang: Ee-baraami', Aisake', Jeekopi'. Teing ninka komeeri O'noi O'nomaung ning.'

(Toro 3:6)

† Taakisi dua' orokovuko deeko' teinge Eeroti' bakaning tavaapeu', ee'noko tamung taura'puko deeko' teinge Boto Keperuu'navitue turampaapeu'. †† Aa'paama, "Boo'keta daa' Moosesi bakaang dariraari-koo ooampiang."

<sup>38</sup> Tee' minkuvuu'nung-koo tasi'pampiri otong ookara bakaning deempariri domantoo'nuka otorong Kumponing bakaang duta-koo, boo'nuka deea'." ‡

<sup>39</sup> Ee'noko napo' nii'ning boto naunukai maku'aama aa'pau', "Nau-anta, da' tampa' kareing." <sup>40</sup> Teketa tee, teing ookara nantoong avoreau' Jiisuu' nii'ning niania' nia'koo.

### Tee Pako'pari'nii' Baa Bauring Deemparavaing Jiisuu'ke Nia'uru'na'

(Mat 22:41-46; Mak 12:35-37)

<sup>41</sup> Teketa Jiisuu'ke biikaang noru' tante-anta-koo aa'puru' teing, "Arekee'koo nantoonge aa'paamaung, 'Tee naning Kumponing tero Pako'pari'uu'nung nantoong domampuri tarevuriainoo'koo tee Deevita' bakanaving-koong deempari tavo'araa'naang.'? <sup>42</sup> Ai' Deevita'ke baka aa'puu'noo'koo tee-koo Buuku Kena-koo,

<sup>43</sup> 'Teie Ovoringe nkaang Ovoring aa'puu', "A' ning-koo tampavine-koo ba'naniai bera ninge dakaning kare-nupoong dakaang kau' patu'nanka deeng-antarerompainoo'ke basi.'" ' "

(Kena 110:1)

<sup>44</sup> Tee' minkuvuma Deevita'ke tee Pako'pari'nii' Ovoring Kumponing-pina' basi tampuu'nung. Enang Kumponing deemparako arekee' napo' Deevita' bakanaving-koong tampaapeu'?"

<sup>45</sup> Ee'noko ookara nantoonge taaravaio' teie aa'puru' bakaning barevare-nupoong, <sup>46</sup> "Tarerariai teing boto naunuka-koo biikaang aarumoi baaro'antaraari'neeng. Teing mononopa' isikeng ninka avitoitoi nanu'koo piavoromaing. Ee'noko nantoonge pankaing-antavaarii'naang piavorokoo' baaveromanairu-koo. Napo' pava dootuu'nairu-koo ba'nava'nani'nanka tampeng-koo ba'naniaakoo' nantoonge ankampaaria'naang, ee'noko paroro kante-koo pankeng-pina' noru'arii'naang piavorokoo'. <sup>47</sup> Ee'noko naaronku biikaning pava ookeng daping opo' dunkumpaama kungsi isikenge dakaraka'paakoo' oraka' noru'aari'neeng-koo. Teing teing ee'ning pankaing kimata nkavaavaining."

### Naaro Bakaang Avuavu'

(Mak 12:41-44)

**21** Jiisuu'ke baakeenevuri oovuriko'nung mooni' mmau'po'nupoonge biikaang avuavu' sipaako teke dootuu'nava pankava-koo. <sup>2</sup> Ee'noko teie teka nani naaro ata'oi' oovuu' mooni'ning keura oki'ning kung sipuko. <sup>3</sup> Ee'noko teie bakaning barevare-nupoong aa'puru', "Masika' naurampimang ninge, anie ata'oi'ke naaroi aa'na' mmau' sipuing ookara-ita. <sup>4</sup> Teinge tee biikaang kapoo'nanka mmau'keta sipaing, teka tenie tee

‡ Teing Noru' Pitunavitu teing ookara piristi'nanka. Eeroti'ke biikaang pankaing piristi' miru'uko deeko' donkonupeu'. Paarivuko deeko', paariavaing. Tee piristi' pankaing tee Ju' biikaang koompaara'navitu-koong bore'. Eeroti' dotu-anta-koo Daari Meekung-koo Moosesie daarivuu'navaro navaro masika'antavaako'ning, ee'noko napo' Rooma' ee'noko Kiriki'nupoong biikaang aarumo aroo'ariko'.

ata'oi'keta ookara oto'evuining teni paku-koo makosining sipuing."

### Arikananka Tavo'ariaining-koo Jiisuu' Bakaning Pakuaraiaina'

(Mat 24:1-14; Mak 13:1-13)

<sup>5</sup> Nii'ninge bakaning barevare-nupoong-koo pava dootuu'nava pankava teke minkuaako'nung aa'paama, "Bakei tampa' oro'nava, kapang pipi'daarie ee'noko nepunepu'nanka avuavu'kooning maanto'nava."

<sup>6</sup> Ee'noko tee' minkuaako Jiisuu'ke aa'puu', "Ooverimatomaing teing aing kapoo'nanka naurampiang: Doong pomaang teing aing kapananka tuurampaavaina'mung. Teinge piatooroi deroaama nare' nii'nare'koo daue pante'ario' sipaavauka'nung."

<sup>7</sup> Ee'noko teinge napo' nia'aama tee aa'pau', "Nau-anta ee, tee are'moong tee' nkoaravaing? Ee'noko taa'ni'anta aming tee' nkoaraanaang due'uko oo'koonge?" <sup>8</sup> Ee'noko teie aa'puu', "Bakei tarerari' otoriaing nantoonge poo-antaraari'neeng, ai' nantoong mmau' nkaang miring tampaama poroo'naang aa'paama, 'Batei botu basiarang Tee Pako'pari'nii' toroaraanaang.' Nii'na' ee', 'Ning tee ee'nung.' Teing tee' kareavaining siompereriauka'. <sup>9</sup> Ee'noko tenang dii'ke taaraverira karenanka ee'noko nantoong biikaning taretarenanka paari-anta-koo turampeeko dankuranku'dariauka', ai' aing teing kapoo'nanka tee' oro' tutung uro'ke tavo'kuaining, teka botu namu'ke tavo'kuauka'nung."

<sup>10</sup> Teketa' aa'puru' teing, "Narung kansi' i'amparama nii'nung kansi' tavuainge, ee'noko narung muu' i'amparama nii'nung muu' turampuainge. <sup>11</sup> Tenang pankainanka u'mi' nkoaravaing, ee'noko anairu tenairu-koo doovang ninka peera-koo booroainge. Avorokesi'nanka ee'noko pankeng taa'ni'antananka paning-eta nkoariainge. <sup>12</sup> Teka mme' aing ee' oro' tavo'kuaruko dii' tee moo'daari' nkaang da'riaing manki'antaraarima, dootuu' tare-nupoong-anko tavo'daari' ma ee'noko kiimatanairu-koo si'daari' ai. Ee'noko dauaronanka ee'noko ovo'ma'nuka-anko tavo'daari' nkaang miring nkaverimaung-koo. <sup>13</sup> Ee'noko tee' nkoaraarima tampara doona araari' ning sira'meriaing. <sup>14</sup> Tee tee koonto' okote'doriaing norunoru' mmau' nkoveria' otoriaing tuutunang~ nimpa'eriaina' nemperi. <sup>15</sup> Ai' ninge tee arompiang tee matau minkueriaing aa'nung turantaarining-koo narung makotua' dii' maku'duriaing daang deeng-antarurima. <sup>16</sup> Dii' teing kare-nupoong-anko sing-antaraariaining bane ainge aa'ninge: diumatakaampie ee'noko dii'marang ee'noko teing diikanamuaing ee'noko dii'maikorori' ee'noko nii'ning dii'koo teing dupisi'daariaining. <sup>17</sup> Ee'noko napo' munte'daari' ookarai nkaang miring-koo. <sup>18</sup> Teka tee dii'koo daponavi' navi' diikaang bore'keta paa'aravauka'nung. <sup>19</sup> Teka purintariri otoriaing dii' do' mantariaina'."

### Jerusalema' Pesiaravaing-koo Minkunaa Jiisuu'ke Tampusu'na'

(Mat 24:15-21; Mak 13:14-19)

<sup>20</sup> "Teketa tenang dii'ke temono Jerusalema'namono piatooronukai koroaio' ooverira tee noru'eriaing temono pesiaravaina'mung emu' due'uing. <sup>21</sup> Ee'noko tenang teing a' Judia'nameng-koo ooroaining miinanka-koo deto bakei navo'ka koo'ariaing! Ee'noko osi panka-mono-koo kuung otoromaing mmariaavai, ee'noko dama'du-eta nantoong kuung tumpariauka' naro'ka tavaari'neeng-koo. <sup>22</sup> Ai' teing aing doong teing Kumponing mero'aravaining tee' nari' Daari Meekung-koo daariari otolina' dupe-anta-koo. <sup>23</sup> Bakei piaaru'nuka otoroaing teing kempo'nuka ee'noko napo' teing biurukaa' noonoo'koo otoroaining, ai' teing tapotaponuka, mmari'koo makotua'. Te'mung te'mung paa'paa'na'mung avaro-koo, Kumponing bakaang iira aing-koo nantoong-koo tavo'arako. <sup>24</sup> Teing-koo tee nii'ning bainatue too'paarima nii'ning dai'arima avora'tevoara'ke be'antavaariaing. Ee'noko Jerusalema' te' Ju'deeaing mmemme'aavainoo' bera tenang teing biikanang doong oparavainange basi."

### Tee Batei Jiisuu' Toroaravaing-koo

(Mat 24:29-35; Mak 13:24-31)

<sup>25</sup> "Teketa tee taa'ni'antananka oro'paravaing aing aa'ning-koo duaa' ee'noko kaara, beento'. Ee'noko anke kansi'koo ookutunairu-koo tee nantoong domang aa'na' manki'oroaing aa'noaing-koo pirung tang korimparavai boo'a ta'da'pama. <sup>26</sup> Ee'noko nantoong teing avoro'ke kai'antavuriaing, ookara kansi' oraru'kuainoo' naro' nempai. Ai' teing purinto'nanka kapoo' paning-kooning teinge dankampuriaining. <sup>27</sup> Teka tenang teing aing ookara kapoo'nanka nko tumparako deto ookirai ankantariri, ai' tee batei ninge moo'dampianang due'durimang; <sup>28</sup> Ee'noko tenang teinge ning Tee Naning-naumpo' Paning-etaing oomaavaing purinto' ninka moko kamo'ka kuunge depeto aa'na' meena'moi."

<sup>29</sup> Teketa Jiisuu'ke narung kara dikito' nau-antavuru', aa'puma, <sup>30</sup> "Tee baisi dovang nenuvara'uko ooverima ee' noru'erikoo' teketa deto puaravuu'naang due'ka.

<sup>31</sup> Tee' nari' napo' dii'ke teing aing kapoo'nanka naurampirining tavo'kuko ooverira tee noru'eriaing Kumponing bakaang muu' tee due' pomaang. <sup>32</sup> Masi'ka' naurampimang ninge dii', aing enanavarang mme' paa'ariaruko nkoaravaing teing aing kapoo'nanka ookara. <sup>33</sup> Paning ee'noko kansi' teing paa'areaining, teka nkaang kara tee paa'aravauka'nung.

<sup>34</sup> "Teketa domang pinka'dariri otoriai Kumponing-koo dompirompi'dariaina'. Tamung iri' o'dariauka' paroro narung naierima, purinto'naru'ke kanu'darima, ee'noko kansi'koong manki'nanka-koo norunoru'darima, tee' tarerariaruko te'mung ta'nimpaarii'na' taavi'duri'neenga. <sup>35</sup> Ai' te'mung doong te'mung ooku-

† Nii'ning Daari Meekunge kara mirumiru'ui ookara nantoong amutemurii' kansi'koo-nupoong "pirung" tampumaung.

tunairu daka'pui tavo'aravaina'mung. <sup>36</sup> Teka ookara batei-koo tanatarariri otorimaatoai, kunsirarima aing ookara kapoo'nanka-koo purintariri divu'eriaina' ee'noko ning-koo, Tee Naning-naumpo' Paning-etaing-koo, uro'kanoo' tampa' donkoniriaina'."

<sup>37</sup> Ookara batei-koo tee Jiisuu'ke Dootuu'nava-koo Pankava-koo nau-antavuriko', ee'noko muunga tenkenuma Olive'po'namii tampaamanamii-koo teke otoi dauna'mung nempuko'. <sup>38</sup> Ee'noko tane'puko ora'ka ookara nantoong dootuu'nava pankava-koo poroko' tee taaravaava'naang daankiarako teke.

### Jiisuu' Sisikeera Tora'antavai Dupisi'aako Napo' Domamparu'na'

(22:1-24:53)

#### Judasie Mumunsinang Nkovuu'na'

(Mat 26:1-5,14-16; Mak 14:1-2,10-11; Jon 11:45-53)

**22** Enang tee tee paroro Ju' biikaang berete' iisiropa-koong due'uu'nung, tee doong Kumponingee Iisipi'nupoong biurukaa' boo'antavurima Ju'nupoong biurukaa' baari'uru'na' taa'ni'anta-koong. Aa'noio' Ju'nupoonge sipisipi'koo sie'nanka boo'antavaarira erenge pavananka-koo karanaang sisi'au' ee'noko Kumponingee tee' oovura baari'uru'. Tee'koo miring Paroro Baari'koong~ tampaako'nung. <sup>2</sup> Te'mung doong due'uko teinge piristi'nuka-koo ovontunge ee'noko boto naunukai taung besi'aako' Jiisuu' boo'anta-koong, teka pore'oroko' nantoong karika'koo avoreaama. <sup>3</sup> Teketa tenang Sietani' Judasi Kerio'nung-koo kuung tumparu' tee ee'nung nanai'keta kenaanka-koong narung. <sup>4</sup> Tee bera aing aa'ning ninka mumunsia': piristi'nuka-koo ovontunuka ee'noko teing dootuu'nava pankava orokovui tarenuka~koo bore'nuka arekee' teie teing-anko Jiisuu' sing-antavaina'. <sup>5</sup> Ee'noko teinge dotuarira tee mooni' avu'koo tampa'. <sup>6</sup> Ee'noko teie makosina' tapura doong besi'uu' teing-anko sing-antavainoo' karika'ke ooaavaruko.

#### Ovoring Ninka Asirang-koo Taamanau'na'

(Mat 26:17-30; Mak 14:12-26; Jon 13:21-30; 1Kor 11:23-25)

<sup>7</sup> Teketa tee Paroro Berete' Iisiropa-koong doong tavo'kuu'nung, te'mung ee'na'mung sipisipi'koo sie' Taamang Baari'koong pareka nkona'mung. <sup>8</sup> Ee'noko te'mung doong Jiisuu'ke Piita naanka Jooni botovurema aa'puu'nung, "Bereta niikaang Taamang Baari'koong maamu-antamemurereriai naiampaiina'." <sup>9</sup> Tenaankai aa'puretu' tee, "Dake are'ke maamu-antavampee'naang nee'ke botomeremang?"

<sup>10</sup> Teie aa'puretu' tenaanka, "Anaanka ee, tenang dee' Jerusalema' tuntareko naning narunge utau ntongpo'nung ipampui kuru-koo teka kune'dureaing. Tee siomperesi bereaing tee tumparavainava-koo.

<sup>11</sup> Ee'noko tee pava okonara nauerema aa'pereaing, 'Teie nau-antai da' aa'duinung, "Davisimainku bi-

ikanavaro arevaroi teke nkaning barevare-nupoong ninka Baari'koong Taamang naiampiai-navaro?"'

<sup>12</sup> Ee'noko teie tee pankavaro daunavaro naurureaing neri bakenii'navaro. Teke taamang maamu-antavereaing." <sup>13</sup> Ee'noko tenaankai basiareta tee' ee'na' navuretu'na' ookara oovuretu', ee'noko tenaankai teke maamu-antavuretu' tee Taamang Baari'koong.

<sup>14</sup> Ee'noko tenang batei makotui'o' taamantoma tumpariru'nung Jiisuu' bakaning kara okovuri nkanuka ninka nari'. <sup>15</sup> Ee'noko teie aa'puru' teing, "Ning aa'na' noru'ke piamou'nung aung Taamang Baari'koong dii' ninka nari' nai-koo tutung baike tora'pampa', <sup>16</sup> Ai' ninge tee naurampimang ning tee aung amurii'koo napo' naikampauka'nung bera bakaang miru' masikung dupearavainoo'ke basi Kumponing bakaang muu'koo."

<sup>17</sup> Teketa' tenang uaininareng avaako nkavura kom-pui tampa' tapura Ovoring-koo aa'puru', "Aung nkaverira tankaanteeriai, <sup>18</sup> Ai' ninge tee naurampimang enang-eta deto tee naikamparoo'naang uaininaru'koo bera Kumponing bakaang muu' tavo'kuainoo'ke basi."

<sup>19</sup> Ee'noko teie berete'nu nkavura Kumponing-koo tampa' tapura pisi'ura avurima aa'puu', "Aung tee nkaang mono makosi dii' nee'dampima boo'koo tau-ra'maring. Ee' naierima ning norunoru'merima'noaing."

<sup>20</sup> Ee'noko taamang bakearako napo' tee' nari' nkovuu' uaini-po'nareng nkavura, aa'puma, "Enang-eta deto areng-koo naikirima ee' noru'meriaing: Ninge Kumponing ninka nerakung kara naroong-anta nkaang erenge pinka'antavantu'nung dii' doman-tarii'naang. <sup>21</sup> Teka, ee aing, tee bireng tee-koong ning kare-nupoong-anko simuaing-koong ni'ninka nari' toonampemang avento'koo. <sup>22</sup> Ai' ning Tee Naning-naumpo' Paning-etaing tee' Kumponingee temu'keta maromuu'na' moompaing, teka tee naning tooka kom-pui kare-nupoong-koo ning simuaing tee bakei piaaru' masikung, tora'kuainung." <sup>23</sup> Ee'noko teing tee bii'ka niania' tutumpeu' naruna' naruna', aa'paama, "Baa nii'koo tee' nkoaravainge?"

#### Baa Pankaimparavai-koo Tata'eu'na'

<sup>24</sup> Ee'noko napo' teing barevare-nupoong bii'ka tata' tutumpeu' teing-koo baa pankaing masikung ookarai noru'ava'naang. <sup>25</sup> Ee'noko Jiisuu'ke aa'puru' teing, "Teing dauraronanka akovitu biikaning tee booni'antavaarimaing teka ookarai teinge tareaarimaing miring pankaing nkavaamaung nantoong tampa' nkonuka tang-koong. <sup>26</sup> Teka dii'koo tee' nkoaravauka'. Dii' tee aa'noaing, tee pankaing dii'koo tee asi'noo'nung-pina' otoaing, ee'noko tee urantanung pakupakunung otoaing. <sup>27</sup> Baa pankaing tamperikoo', ai' tee naning nii'ning botovurimaung, ai' tee naning pakupakunung? Tee ee'nara nantoong botovurimaung naning pankaing tamperikoo', ape' aing? Teka ning dii'koo meu'ke tee naning pakupakunung-pina' o'nomaung.

<sup>28</sup> "Dii'ke tee ni'ninka nari' parapaara-koo oraka' o'nori si'meria'. <sup>29</sup> Ee'noko Mma'ke ning iri' tare-koong amuu'na' napo' tee' nari' ninge dii' iri' tare-koong arompimaang dii' aa'noaina' taamanirima tuaantariai nkanavento'koo nkaang muu'koo kuunge; <sup>30</sup> Ee'noko tee dii' kante ba'nantariri kara simpe'erimaatoaing teing kivora-ita kenaanka muu' Isireeli-nupoong-koo ovontuntariri."

### Jiisuu'ke Piita Penkempuaing Tutung Sira'puu'na'

(Mat 26:31-35; Mak 14:27-31; Jon 13:36-38)

<sup>31</sup> Ee'noko Ovinge aa'puu', "Saimoni' ee, Saimoni', Sietani' tee taura'pari otong parapaarai naaran-turii'naang; <sup>32</sup> Teka ninge da' paku-koo eentamaring dakaang baito paa'aravaroonaang. Ee'noko tenang duaruadaravainoo'keta napo' bere'darara da'maikori' puring antaveriaing." <sup>33</sup> Ee'noko Piitai maku'uma Jiisuu' aa'puu', "Ovinge, ning maamumari o'nong da' ninka nari' nanu'koo kiimataroma ee'noko boo'aape." <sup>34</sup> Jiisuu'ke aa'puu', "Ninge nauramaang, Piita, e'moong kokoree' mme' koo'kuaruko beemu'pie da' penkentaravaing ning noru'mei otoinoo'koo."

<sup>35</sup> Ee'noko Jiisuu'ke napo' aa'puru' teing, "Tenang ninge dii' botorampiru'nang aing aa'ning oto'deruri-arukonung: kereka, ee'noko siirau' ee'noko boona-mante~, nii'ning kapoo'koo ee apuka'dariko?" Teinge aa'pau', "Otoa'."

<sup>36</sup> Ee'noko teie aa'puru' teing, "Teka enang baa naning siirau' oto'evuinge nkavuaing, kereka oto'evuinge deeko'. Ee'noko bainatu oto'evuaung deeko' bakaang mononopa' baavevurai'nange nii'nari' moo'siivai. <sup>37</sup> Ai' ninge naurampimang dii', aung kara Daari Meekung-etaing tee dupearavaing ning too'mui ee' minkumui o'noing,

'Tee tee boto-toto'nuka ninka deerunii'.

(Aisaia' 53:12)

Ee'noko kapoo' ning-koo daariari otoring teing koon-to' dupearavaininge." <sup>38</sup> Ee'noko daunang kuuntu'kai aa'pau' teinge, "Ovinge ee, bainatuning kerika aing." Ee'noko aa'puru', "Otoaing, makosi."

### Jiisuu' Kunsiaru'na' Olive'po'namii-koo otoi

(Mat 26:36-46; Mak 14:32-42)

<sup>39</sup> Teketa danto tenkenura Olive'po'namii-koo nanuu', teroita beko'noo'. Ee'noko bakaning barevare-nupoonge nari' siumpai berou'. <sup>40</sup> Teka teie ee' nauvuru' teing, "Kumponing-koo kunsirariai parapaara-koo dua'dari'neenga." <sup>41</sup> Teketa oki'noo' danto nanuu' kapang bai'koo makosinoo' dee'ma, ee'noko kinkinura ee' kunsiaru', <sup>42</sup> "Mma', da' piarora deeko' pinau taura'meaing aung kiimata-koong kaapu baari'ama'naang, teka tee nkaang pia deea', daka dakaang pia siong-koo makosi."

<sup>43</sup> Ee'noko tenang koosinung~ paning-eta tee-anko pora puring-antavuu' tee. <sup>44</sup> Ee'noko tee aa'na' orarunsie puru'antavui otoko aa'na' deto iri'oi kunsiarako ionta erenamurii' aa'na' mootu'oi tuuvui dua'aru' kansi'koo. <sup>45</sup> Ee'noko tenang kunsiaru'noo'keta deto i'am-

parara barevare-nupoong-anko pora teing aasiaio' oovuru' orarunsie puru'urira. <sup>46</sup> Ee'noko teie aa'puru' teing, "Aming-koo aasirimang dii'? Daa'darira kunsirariai parapaara-koo dua'dari'neenga."

### Jiisuu' Dai'au'na'

(Mat 26:47-56; Mak 14:43-50; Jon 18:3-11)

<sup>47</sup> Teka Jiisuu' tee' karoi otoko karika' teke ta-vo'ariru'ning Judasie barampuri, tee ee'nung nanai'keta kenaanka-koong narung. Ee'noko Judasi Jiisuu'anko beu'nung nuunuvuu'naang. <sup>48</sup> Teka Jiisuu'ke aa'puu' tee, "Judasi, dake ee ning Tee Naning-naumpo' Paning-etaing nuunu ninka kare-nupoong-koo simemaang?"

<sup>49</sup> Ee'noko tenang bakaning barevare-nupoonge nari' otoroko'ninge arekee' nkoaravaina' ooaara teinge aa'pau', "Ovinge, bainatue tavarampai ee?" <sup>50</sup> Ee'noko teing-koo narunge piristi'koong pankaing bakaang botovotonaa' teka'puma dome' tamparome' ete'uu'. <sup>51</sup> Teka Jiisuu'ke aa'puu', "Ei, bakerari." Ee'noko Jiisuu'ke bakaang dome' kompura tempa'antavuu'.

<sup>52</sup> Ee'noko Jiisuu'ke teing tee too'deaama porou'ning aa'ning: piristi'nanka-koo ovontung, dootuu'nava pankava orokovui tarenuka~koo bore'nuka ee'noko Ju'nupoong-kooning pankenanka aa'puru', "Dii'ke ee ning tavu' ninka bakiaa'nko deemerima bainatu dovang ninka ee'noko ankonu' poring?" <sup>53</sup> Tenang ning dii' ninka nari' o'noi doong kante dootuu'nava pankava-koo ning dii'ke komeria', teka aung tee batei dii' diikaang, mutaanang-koong iri' ninka."

### Piita Jiisuu'koo Penkempuru'na'

(Mat 26:57-58,67-75; Mak 14:53-54,65-72; Jon 18:12-18,25-27)

<sup>54</sup> Teketa tee teinge Jiisuu' moo'aara nkavau'ning be-  
ra piristi'nuka biikaang pankaing bakanava'koo ta-vo'au'. Piitai dama'ke isipo'keta kaarie sipuma siompuko'. <sup>55</sup> Ee'noko pava-koo uro'mang teing Jiisuu' moo'au'ninge nta' betu'aara ba'naniaio' napo' Piita te' ba'nanuu' teing-koo meu'. <sup>56</sup> Teketa' nanie nerai'na'ke botovotonaa'ke oovuu'nung araka-koo ba'nampario', ee'noko keuvukotaa' aa'puu'nung, "Aung naning tee Jiisuu' ninka nari' otoremaung." <sup>57</sup> Teka tee penkempuru', aa'puma, "Ani ee, ninge tee noru'ampa'."

<sup>58</sup> Napo' teketa pankaroompuaruko nii'nunge napo' oovura aa'puu', "Da' aung teie, teing-koong narung." Teka Piitai aa'puu', "Aung ee, ning deea'."

<sup>59</sup> Ee'noko nii'ning batei narung aua-pina' tankinuko, napo' nii'nunge deravari aa'puu', "Bakei tasi'pansi o'ngong aung, tee narung napo' teing ninka otoromaung, ai' aung Kaaleli'nupoong-pina' karomang."

<sup>60</sup> Teka Piitai aa'puu', "Aung ee, ning noru'ampa' kapoo' dake minkuemaatomaung." Ee'noko tenang namu'ke tee' karoi otoko kokoree' koo'kuu'. <sup>61</sup> Ee'noko Ovinge bere'arama Piita dutai naapu narung oovuu'. Ee'noko Piita-koo tenang noru'koo pou' tee Ovinge bakaang kara tee ee' minkuvuu'nung, "Kokoree' mme' koo'kuaruko da' beemu'pie penkentaravaing ning noru'mei otoinoo'koo." <sup>62</sup> Ee'noko teketa tenkenura orarunsiairi biromparu'.

<sup>63</sup> Enang tee teinge nantoonge Jiisuu' kompai otoko'ninge duta dai'aara mura'aama akapeu'aama aa'paako', <sup>64</sup> "Tarampeerarama~ tampeai baie tee' mura'dumaang?" <sup>65</sup> Ee'noko nii'ning mmau' kara oreng minkuaako' tee-koo.

### Jiisuu' Koombaara'navitu-koo Uro'kanoo' Donkong-antavau'na'

(Mat 26:59-66; Mak 14:55-64; Jon 18:19-24)

<sup>66</sup> Tenang tane'puio' pankeu' urantanuka oosiariru' aa'ning: piristi'nuka-koo ovontung ee'noko boto naunuka kara taaraevaava'naang, ee'noko Jiisuu' teing-koo koombaara'navitu-koo meu' po'antavau'. <sup>67</sup> Ee'noko aa'pau', "Da' tee Kumponingero Pako'pari'nii' nii' domameri taremeriainoo'koo deeko' naumeriai!" Tekateie aa'puru' teing, "Ninge naurampiko deeko' masika'antameriaroo' naang." <sup>68</sup> Ee'noko ninge nia'dampiko deeko' maku'meriaroo'naang, nii'noo' simpiri'antameriaroo'naang. <sup>69</sup> Tekateie enang-eta deto tee ning Tee Naning-naumpo' Paning-etaing Kumponing Iri' Okonara-koo tampavine-koo ba'namaraa'naang tare-nko deemari." <sup>70</sup> Ee'noko ookarai aa'pau', "Arekee' miru'emaang? Da' ee Kumponing Bauring?" Ee'noko maku'urima aa'puu', "Tee' minkuerina' nari' o'nong." <sup>71</sup> Ee'noko teinge aa'pau', "Nii'ning aming kara besi'ampii'naang nii'ke aung dupisi'koo makosi? Tee tee aung enang nii'ka taaravampiring bakaang be'duu'ke Kumponing akapeu'uko bauring tamparama!"

### Jiisuu' Pailati'ankoi Donkong-antavau'na' Koosinang-koo

(Mat 27:1-2,11-14; Mak 15:1-5; Jon 18:28-38)

**23** Teketa ookara naro'ariru'ning daa'arira Pailati'anko tavo'au' ee'nung daurarong Siisa'ke botovuu'nung Judia'navaro tare-koo. <sup>2</sup> Ee'noko teka teinge tuumpi tutumpau' aa'paama, "Nii'ke enang daa'ampiring aung naning nantoong Siisa' bakaang tare-ita onou kentaang-antavurimaung, tee Siisa'anko taakisi dua'koo orokovurikoo', ee'noko aa'pukoo', 'Ning tee tero Kumponingero dii' domang-anta-koo marakantaruru'nung, daurarong pako'pari'antamuma.'" <sup>3</sup> Ee'noko Pailati'ke nia'uu' tee, aa'puu', "Da' ee tee Ju'nupoong biikaang daurarong?" Ee'noko teie maku'uma tee aa'puu', "Tee' nari' minkueina' o'nong." <sup>4</sup> Ee'noko Pailati'ke teing piristi'koo ovontunanka karika' ninka nari' aa'puru', "Ninge kapoo' oraka' nkovuing oampa' aung-koo dii'ke tuumpi-koo makosi." <sup>5</sup> Tekateie e'manai aa'paako', "Aunge nantoong Rooma'nung daurarong bakaang tanata-ita ketapari'naang irikung-antavurimaung nau-antavurima Judia'naameensi' daka'pui, Kaaleli'naameensi'keta bera aa' amono-koo basivukoo'."

### Jiisuu' Eeroti'ankoi Donkong-antavau'na' Koosinang-koo

<sup>6</sup> Tenang Pailati'ke taaravura tee aung kara teie tana'uu' tee Kaaleli'nung deeko'. <sup>7</sup> Ee'noko tenang teie Pailati'ke Kaaleli'nung noru'ura, teie Jiisuu' Eeroti'anko botovurio' be'antavau', tee Siisa'ke Kaaleli'navaro tare-nara deeng-antavuu'nung-anko, ai' Eeroti' Kaaleli'keta Jerusalema' beero'ui otoko'nung tee paroro oo-koo.

<sup>8</sup> Tenang Eeroti'ke Jiisuu' oovura aa'na' dotuaru' pankaroong oo-koo piavoko'nung-koo nantoonge minkuaako taaravuko'noo'ka tee. Ee'noko teie nii'ning taa'ni'anta iri'po'ning nkovuko deeko' oovuu'naang piavou'. <sup>9</sup> Tee'koo Eeroti'ke pankapankaroonge niania' nia'uu', teka Jiisuu'ke nii'nau' maku'evua'. <sup>10</sup> Teketa piristi'koo ovontung ee'noko boto naunukai teke donkonai iri'oroitaa'nange tuumpiaako'. <sup>11</sup> Ee'noko Eeroti' ninka bakaning piatooronukai uri'narimpaama oraka' nkoaako' akapeu'aama, teketa nepu'na' mononopa' boo'antananka tee-koo daurarong-pina' kurumpaara Eeroti'ke toro-antavuu' Pailati'anko. <sup>12</sup> Ee'noko te'mung ee'na'mung Eeroti' naanka Pailati' napo' navueeretu' temu'keta tee turampeereko'naanka.

### Jiisuu' Pailati'ke Boo'koo Tampuu'na'

(Mat 27:15-26; Mak 15:6-15; Jon 18:39-19:16)

<sup>13</sup> Teketa Pailati'ke piristi'koo ovontung, tare-nupoong ee'noko nantoong naru'urira aa'puru', <sup>14</sup> "Dii'ke tee aung naning ning-anko tavo'ering daurarong Siisa' bakaang tare-ita nantoong onou kentaang-antavurimaung tamperima. Tee-koo ee aing, ninge dii'koo uro'kanoo'ka baakeeneama kapoo' dii'ke tuumpierimaing-koo narung oampa'. <sup>15</sup> Eeroti'ke tee'ke, nii'anko toro-antavuing-koo noru'ampiringe kapoo' oovua'. Ooveriko, kapoo' aung boo'anta-koo makosi aunge nkovua'. <sup>16</sup> Ninge mura'ke kiimata-antavamira niikaang toomo siompansitaa' si'antarerompiaing." <sup>17</sup> Tee tee toomo ookara mare' kante Baari'koong~ Paroro-koo Pailati'ke tee narung kiimatanuka-koo kiimata-ita simpiri'antavuriko' nantoong piavoroko. <sup>18</sup> Tekateie ookarai nari' bokiaama aa'pau', "Boo'antaveainung tee aung naning, ee'noko Barabas sing-antaveai nii'anko." <sup>19</sup> Barabas tee naning kiimata-koo sipau'nung Siisa' bakaang tanata toto'koo tavu' tutumpuio' Jerusalema'koo meu'ke ee'noko naning dupisi'uu'.

<sup>20</sup> Pailati'ke Jiisuu' simpiri'anta-koo piavora napo' nii'namu' daankivuru', teka teinge bokiaama aa'pau', "Aa'barata'koo, aa'barata'koo taakaveai!"

<sup>22</sup> Napo' beemu'pina' teie aa'puru' teing, "Aming-koo? Aming orara kapoo' nkovuinge? Ninge aung-koo oroo' aung boo'anta-koo makosinoo' oampa'. Tee'koo ninge kiimata-antavamira simpiri'antavama'naang." <sup>23</sup> Tekateie aa'na' deravariri bokiaama aa'barata'koo taakavaava'naang tampaako'. <sup>24</sup> Ee'noko baru' aa'na' bokiaako tee'koo Pailati'ke taura'puma boto sipuu' kapoo' piavorou'na' nkoaraa'naang. <sup>25</sup> Tekateie



bake-antavuu' tee naning kiimata-koo sipau'nung Si-isa' bakaang tanata toto'koo tavu' tutumpuio' ee'noko naning dupisi'uiio', tee ee'nara teing een-tavaariko'nung, ee'noko Jiisuu' teing biikaang bireng-koo sipuu'.

### Jiisuu' Aa'barata'koo Taakavau'na'

(Mat 27:32-44; Mak 15:21-32; Jon 19:17-27)

<sup>26</sup> Ee'noko teinge Jiisuu' tuutunantoma-ita tenkeng-antavaama aa'barata' poru'antavau'. Teketa manki'oi nkavuko naning pora'keta poko kompau' miring Sai-moni', Sairini-nung, ee'noko teinge tee aa'barata' tee-koo poru'antavau' Jiisuu'koo dama'due nkavuu'naang.

<sup>27</sup> Ee'noko teketa nantoong karika'ke siompau', ee'noko nii'ning maniku'ke nari' orarunsiariri birompaama tee siompau'. <sup>28</sup> Teka Jiisuu' teing-aape bere'arara aa'puru', "Dii' maniku' Jerusalema'nupoong, ning biromeriauka', teka dii'ka birontariai ee'noko diurukaa' toire' birompererima. <sup>29</sup> Ai', ee aing, doonanka pomaang ookara manki'oroainang, baru' teing biurukaa'po'nupoong biurukaa' baikeeariko orarunsiarining. <sup>30</sup> Ee'noko tenang baiarima aa'paavai, 'Iu'nanka nii'koo dau dua'dariai ee'noko miinankai daka'mereri-ai.' <sup>31</sup> Ning naning tampara ee' kiimatamaako oomerira tasi'periaing dii' aa'na' dau basinoo' tora'antaraariaing kiimata-koo makosinuka deentariko."

<sup>32</sup> Nii'naanka kenaankara oraanka tee' nari' be'antavaaretu' tee ninka nari' dupisi'aaree'naang.

<sup>33</sup> Ee'noko tenang te' basiarira Makupi' tampaamanoo' teka tee aa'barata'koo taakavau', ee'noko tenaanka oraanka nari', narung tampavine-aape ee'noko narung mare'aanavine-aape. <sup>34</sup> Ee'noko Jiisuu'ke aa'puu', "Mma' tonta'antaveriaing teing, ai' teinge tee noru'aa-va' nkoamang tee aung kapoo'." Ee'noko teinge pia-tooronukai deikoo'eema bakaang mononopa' tankaampeu'.

<sup>35</sup> Ee'noko nantoong tee-ankoi due'ke donkonai ooai otoko', ee'noko ovontunge akapeu'aako' tee aa'paama, "Aunge tee nantoong oovuning domaang moo'urikoo', enang baka moo'aravai, aung Kumponing Pako'pari'nii', tero nii' domang-anta-koo maraka-antamuru'nung deeko'."

<sup>36</sup> Ee'noko napo' teke tee narunge dariraari ee' oro' beemu'pie daariau' tee-koo bore'kanoo'ke:

AUNG TEE JU'NUPOONG BIKAANG DAURARONG;

<sup>37</sup> Kiriki'na', Rooma'na' ee'noko Iiburuna' daariau';

<sup>38</sup> Ee'noko teinge pia-tooronukai akapeu'aama porora uaini kaaveerii' avu'koo paaravau' aa'paama, "Da' tee Ju'nupoong Biikaang Daurarong deeko' enang daka domaang moo'daravai."

<sup>39</sup> Narunge tenaanka-koo oraanka-koo nari' bi'aare-tu'naanka-koo Jiisuu' oraka' minkuvuma aa'puu', "Da' ee tee Domang-anta Kumponing tero Pako'pari'nii' deea'? Enang daka domaang moo'daravai, ee'noko nee' nari' moo'mereai." <sup>40</sup> Teka teie nii'nunge tee aka'puma aa'puu', "Da' ee Kumponing-koo arorea' otong ee' nari' boo'aape o'norita'?" <sup>41</sup> Nee'ke tee makosina' tora'pampemang mero'koo nkoampe-

maing-koo, teka aunge kapoo' orara nkovua'."

<sup>42</sup> Ee'noko teie aa'puu' Jiisuu', "Norunoru'meai ning tenang dakaang muu' taa'ni'doi kompema." <sup>43</sup> Ee'noko Jiisuu'ke aa'puu' tee, "Masika' ninge nauramaang da', e'mung ee'na'mung ni'ninka nari' o'noree'naang da' osi tampoo'ke~."

### Jiisuu' Boo'paru'na'

(Mat 27:45-56; Mak 15:33-41; Jon 19:28-30)

<sup>44</sup> Enang tee duaaki'uko duaa' namu'ke ka'murunta'uu' ookutunairu-koo bera kamunoo'naang deeko' du-aa' koo'uu'. <sup>45</sup> Tenang duaa' mutaanampuio' tee baarong pava dootuu'nava pankava-koong, meekavaro ku'nung, meu' ke'me'aru'. <sup>46</sup> Ee'noko Jiisuu' aa'na' deto bokuma aa'puu', "Mma' ee, nkaang tanuaang dakaang bireng-koo sipansing." Ee'noko tee' minkuvuma asi'namu' domaang oparu'.

<sup>47</sup> Teketa enang teie pia-tooro daaku' tarenunge tee aung kapoo' nkoaru'nung oovura teie Kumponing pankaing-antavuu' aa'puma, "Masika', tee aung naning tee oraka'nko oto'evuaung." <sup>48</sup> Ee'noko ookara kari-ka' te' naru'ariru'ning dooroarii'naang tenang ookara kapoo' nkoaru'nung-koo osi-aape toroariru' orarunsiariri domang tavarima. <sup>49</sup> Ee'noko ookarai Jiisuu' noru'aako'ninge, ee'noko maniku' Kaaleli'keta siompau'ning nari', teinge isipo' donkonai ooau' tee kapoo'nanka.

### Jiisuu' Dako'au'na'

(Mat 27:57-61; Mak 15:42-47; Jon 19:38-42)

<sup>50</sup> Enang tee naning narung otoko' miring Josepa', Arimatea'namono-koong, Ju'nupoong biikaning-koo osi-koo namono. Aung Josepa' tee narung koompaara'navitu-koong pankaing, naning tampara, koon-to', ee'noko nemparako'nung Kumponing bakaang muu' oo-koo; <sup>51</sup> Bane teie koompaara'navitu-koong narung, nka Jiisuu' dupisi'ava'naang minkuaako tee kontevou'. <sup>52</sup> Teie ee'nunge Pailati'anko bera Jiisuu' bakaang mono eentavuu'. <sup>53</sup> Ee'noko aa'barata'keta sing-antavura baaronge boo'nuka dai'na' dai'uma nopa'ura sipuu' teie kuvi dako'doma-koo kuung, aa'noo' kapang-koo nenke'uu'nareng, naning tutung dako'ava'nareng. <sup>54</sup> Tee tee te'mung Doong Uaana'mung-koo maamuna'mung ee'noko tee Doong Uaana'mung due'ui otoko namu'ke dako'au'.

<sup>55</sup> Ee'noko teinge maniku'ke Kaaleli'keta Jiisuu' ninka porou'ninge Josepa'koo bi'ariri berora tee kuvi dako'doma ooau' ee'noko Jiisuu' bakaang mono bempau'na' ooau'. <sup>56</sup> Teketa tee osi duparira duuninanka numpompo'ning maamu-antavau' bakaang mono sisi'koo, ee'noko te'mung Doong Uaana'mung tee uavoroi otorou' botoi minkuvui otoina'.

† Tenang duaa' tumparako doong maamuna'mung-koo tee Doong Uaana'mung tutumparako'nung. Josepa' Arimatea'nung ee'noko Nikodemasi iri'narumpuresi dako'uretu' tee Jiisuu', Doong Uaana'mung orarivure'neeng-koo.

**Jiisuu' Boo'keta Daa'aru'na'**  
(Mat 28:1-10; Mak 16:1-8; Jon 20:1-10)

**24** Teka Saandei-na'mung tero maata teing maniku' berou' te' kuvi dako'doma, duuni numpompo'ning maamu-antavau'ning nkavai, Jiisuu'koong mono sisi'aava'naang. <sup>2</sup> Ee'noko teinge kapang kuvi dako'doma karanaang-eta korimpario' ooau'. <sup>3</sup> Teka tenang kuung tumparira Ovoring Jiisuu'koong mono ooaava'. <sup>4</sup> Tenang noru' tee-koo paa-paa'ariri otoroko bakei ta'nina' kenaanka naninka teing-koo due' donkonuretu' mononopa' sisisiisie nopa'aresi. <sup>5</sup> Ee'noko teketa avoreaara teing te' doonko kansi'koo kinkinau'nung, ee'noko tenaankai aa'paaretu', "Aming-koo dii'ke tee domantoo' anka boo'nuka biikanoo'ka besi'erimang? <sup>6</sup> Tee a' otoa'; tero daa'aring; <sup>7</sup> Napo' noru'eriai tee' Kaaleli' otori naururu'na', tee tee Naning-naumpo' Paning-etaing ta-vo'aavaing orananka biikaang bireng-koo ee'noko aa'barata'koo taakavaako beenang doong deemparako napo' daa'aravai."

(Luk 9:22; 18:31,33)

<sup>8</sup> Ee'noko teinge tenang noru'au' tee bakaang kara.

<sup>9</sup> Ee'noko kuvi dako'doma-ita osi duparira teinge teing nanai'keta narung nauaaru' tee aung kapoo'nanka, ee'noko napo' teing nii'ning ookara barevare-nupoong nari'. <sup>10</sup> Ainge manii'ke dooreaaru' teing kara okovuri nkanuka, ainge aa'noko Meeri' Ma'dala-nani, ee'noko Joana ee'noko Meeri' teni Jeemisi bauko, ee'noko nii'ning maniku' napo' nari'. <sup>11</sup> Teka tee aung karananka teinge nauaaru'ning minkunaa boturopapina' noru'au'. Ee'noko teinge masika'antavaaria' teing. <sup>12</sup> Teka Piita i'amparara kuvi-aape kua'paru', ee'noko kinkinura daanto kuung oovuma baarong teka oovuu' boo'nuka dai'koong baka otoko. Ee'noko teketa osi duparu' paapaa'ari tee-koo kapoo' nkoaru'nung-koo.

**Jiisuu'ke Emeasi-navung-koo Kenaankara Kune'uretu'na'**

(Mak 16:12-13)

<sup>13</sup> Teketa te'mung ee'na'mung Jiisuu' bakaning barevare-nupoong-koo kenaanka nanuretu' nii'namonokoo miring Emeasi aa'noo' Jerusalema'keta kenaanka aua makosinoo' nanu'koo. <sup>14</sup> Ee'noko tee kapoo'nanka nkoaru'ning-koo nari' minkuarema nanureko Jiisuu' baka due' pora nari' nanaako'. <sup>16</sup> Teka beekaang duta dootai tavuretu' tee tasi'koo. <sup>17</sup> Ee'noko teie aa'poretu' tenaanka, "Aung minkunaa aremurii' dee'ke orarunsiraresi minkuerema naniremaang?" Ee'noko te' dantavaretu' tenaanka orarunsi-po'naanka-pina' oro'pare-si. <sup>18</sup> Tenang narunge tenaanka-koo miring Kiliopasi'ke aa'puu' tee, "Arekee' minkuemaang? Da' ee Jerusalema'ke aing-koo doompeto otoitaa' taarakia' teing-koo kapoo' nkoarieening-koo?"

<sup>19</sup> Ee'noko teie aa'poretu' tenaanka, "Aming kapoo'nanka?" Ee'noko tenaankai tee navuurema aa'poretu', "Jiisuu' Nasareti'nung bakaang minkunaa,

tee nakaronara karoma nko-koo purinto'po'nung Kumponing-koo ee'noko ookara nantoong-koo uro'kanoo'ke. <sup>20</sup> Tee ee'nung niikaninge piristi'nankakoo ovontunge ee'noko tare-nupoong aa'ninge ta-vo'au'nung kavumani-aape simpe'ai orara tampaara dupisi'aava'naang, ee'noko aa'barata'koo taakavau'. <sup>21</sup> Teka nii'ke ee' noru'ampiko'nung tee tee ee'nung nii' Isireeli-nupoong napo' donkomuriaing. Ee', teketa tee aung ookara nkoarieenoo'keta e'mung tee beenang doong deemparing. <sup>22</sup> Aa'noing nii'ninge maniku'ke nii'kooninge ta'ning-antamaaring. Tane'ke tero berorai'nange kuvi dako'doma ee'noko teinge ooaavaruing bakaang mono; <sup>23</sup> Ee'noko teinge toroari-ra aa'paing, 'Nii'ke koosinunka noone-pina' ooarampir-ing, aa'puresinaanka, "Tee domamparing." <sup>24</sup> Teketa barevare-nupoong-koo nii'ning te' kuvi dako'doma-aape beroing, ee'noko tee' nari' ooi maniku'ke minkuaina', teka tee ooaava' teinge."

<sup>25</sup> Ee'noko teie tenaanka aa'poretu', "Bakei kanu'ka ee'noko domange masika'anta-koo ana'kai tee kapoo'nanka Kumponing-etaing nakaro-nupoonge tero minkuau'nanka-koo. <sup>26</sup> Arekee', tee' ee teing aing baikenanka kune'uarupeu' teie domang-anta-koo Pako'pari'nii'ke aarenuu'naang bakaang nerang-koo kuung?" <sup>27</sup> Ee'noko ookutunairu Daari Meekunge tee baka-koo minkuvui otoinairu tasi'antavuretu' Moosesi bakanarong-eta tutumpura doonko teing nakaronupoong biikanaronge basivuma navuuretu'.

<sup>28</sup> Tee' minkuarima osinamono-koo due' porou' tenaanka bereko'namono-koo. Ee'noko basiarima tankinuu'naang-pina' nkoarako teka tenaankai datevuretu' tee. <sup>29</sup> Aa'poretu', "Nee' ninka o'noreai, ai' aung muung-aapevuing, doong pankarong oparing." Tee tee nari' tenaanka ninka berou' teke nari' otoroo'naang.

<sup>30</sup> Tenang taamantomai otoroitaa' teka berete'nu nkavura biraankevura ee'noko pisi'ura tenaanka avuretu'. <sup>31</sup> Ee'noko beekaang duta tenang daate'arara tasi'poretu' tee, ee'noko tee teke paa'aru' tenaankakoo dutakanoo'keta. <sup>32</sup> Tenaanka bee'ka karorema aa'paretu', "Maiko', nee'koo tee domang-koo nta' betu'antamuresing taunge nee' karamurema Daari Meekung-kooning kara nee'koo sira'puma!"

<sup>33</sup> Ee'noko tenaanka tenang tee batei-koo i'ampareta Jerusalema'aape toroaretu' ee'noko bereta teing nanai'keta narung kune'aareta nari' oosiariri otoroko napo' nii'ning ninka nari'. <sup>34</sup> Ee'noko teinge tenaanka aa'paaretu', "Ovoring bakei masika' daa'aring. Sai-monikoo oro'pari." <sup>35</sup> Ee'noko tenaankai napo' teing nauaaretu' teing kapoo' tenaanka-koo taunge nkoaru'ning, ee'noko tenaanka-koo tasi'paru'na' berete' pisi'uu'noo'ke.

**Jiisuu' Bakaning-koo Oro'paru'na' Tautauvurima**

(Mat 28:16-20; Mak 16:14-18; Jon 20:19-23)

<sup>36</sup> Tee tee tenaankai tee' minkuvuresi otoreko tee Jiisuu' baka te' teing-koo meu' donkonura aa'puu', "Tampara, ee aing! Mooa tee dii'koo otoaing!" <sup>37</sup> Teka

teing domang ta'ninaara avoreau' tanuaang ooau'nung-pina' noru'aama. <sup>38</sup> Ee'noko teie aa'puru' teing, "Nko dii' aming-koo avoro'ke tairurimang? Aming-koo noru' keekoo'dariri? <sup>39</sup> Oomeriai bireng ee'noko kau' tasi'meri, ning tee ning. Io' komerira oomeriai, ai' tanuaang tee aa'ning bio' ee'noko koo' otoaug tee' ning oomerimatomana'."

<sup>40</sup> Ee'noko tee' minkuvurira nau-antavuru' bakaang bireng ee'noko kau' niirie too'pau'nairu. <sup>41</sup> Ee'noko tee' nari' dotue maanto'urira noone-pina' noru'ai masika'antavaava' papaaravaririo' aa'puru' teie teing, "Kapoo' ee nai-koo makosi anke otomang?" <sup>42</sup> Ee'noko teinge tavi'noo' ua'nii'noo' avau', davainta nari'.

<sup>43</sup> Ee'noko teie nkavura tee teinge ooai'o' maa'uu'.

<sup>44</sup> Teketa tenang aa'puru' teing teie, "Aing teing nkaning kara dii' naurampiru'ning tenang dii' ninka nari' o'noi aa'pama: Ookara tee kapoo'nanka Daari Meekunge ning-koong tero minkuvuu'nung koonto' dupearavaining aa'noo'ke Moosesi bakaang boto, nakaro-nupoong biikaang kara, ee'noko ookara kenananka otoinoo'ke."

<sup>45</sup> Tenang tee' minkuvura biikaang onou daate'antavuru' noru'aava'naang tee Daari Meekung-koong karananka aa'purima, "Teroita ee' daariari otomaung, tee Domang-anta Kumponing Pako'pari'uu'nung~ pora baike kune'ura beenang doong deemparako

boo'keta daa'aravai, ee'noko napo' tee domang bere'anta ee'noko tonta'anta oraka' nko-ita daanki-aavaing bakaang miring-koo ookara kansi'koo-nupoong-koo Jerusalema'keta tutumpaara. <sup>48</sup> Ee'noko ninge aa'dampimang, ninge tenaare dupeanko ooverimaing deentariio' dii' ee'ning teing daanki nkonuka miru'dampimang aing kapoo'nanka sira'periaining. <sup>49</sup> Ee'noko ee aing, ninge tee Tanuaang Meekung Mma'ke maraka-antavuu'nung botoampaing dii'koo dau oto'koo. Teka anke osi pankamono-koo otoriaing dii' bera purinto'ke paning-etainge maanto'duriainoo'ke basi."

#### Jiisuu' Deto Paning-aape Koinuu'na'

(Mak 16:19-20; Nka 1:9-12)

<sup>50</sup> Teketa temono-ita bakaning barevare-nupoonge Jiisuu' siompai berou' bera Beetani-navuntu'koo, ee'noko bakaang bireng toonura biraankevuriko' teing bakaning barevare-nupoong. <sup>51</sup> Ee'noko biraankevurima tee deto i'amparara paning-aape tenkenuu' teing-ankoita. <sup>52</sup> Ee'noko teinge pankaing-antavaara tee toroariru' Jerusalema'aape aa'na' doturotuarima. <sup>53</sup> Ee'noko be'nu'ai Kumponing daangampaama ee'noko biraankeama otoroko' pava dootuu'nava pankava-koo.

# JOONI

## Kara Baavootunanka Ane'kooning

1:1 Kuunoo' Jiisuu' Karistoo' Kansii'koo Pou'nung-koong  
 2:1 Jiisuu'ke Taa'ni'antananka Ta'nimpaarii'nanka Nko Tutumpuu'na'  
 5:1 Jiisuu'ke Taare-antavurima Nau-antavuriko'na' Kuunoo' Doong Meekeng-koo  
 11:1 Jiisuu' Jerusalema'aape Nanuko Ovontunge Tee Dupisi'koo Piavorou'na'  
 13:1 Barevare-nupoong Sipurira Jiisuu' Bauma-anko Toroaravaing Nauvuru'na'  
 18:1 Jiisuu' Sisikeera Tora'antavai Dupisi'aako Napo' Daa'aru'na'

## Kuunoo' Jiisuu' Karistoo' Kansii'koo Pou'nung-koong

(1:1-51)

### Tee Kara Masikung Okonaa Paning-eta Naning-naumpuu'na'

**1** Tenang tutuna' masipo' Kumponing bakaang Kara~ Matau Okonara † ovorimpari otoko'nung. Tee aa'nung kansii' mme' pupu'aravaruko Kumponing ninka nari' otoresii' Kumponing-naumpui otoko'.  
<sup>2</sup> Ee', tee ee'nung tee' tutuna'noo'ka Kumponing ninka otoreko'.<sup>3</sup> Ookara kapoo'nanka teing teie nkovuru'ning. Kapoo'nanka nkonii'nanka-koo narung kapoo' otoa' teie nkovuaruko tavo'aru'nung. <sup>4</sup> Tee-koo kuunge domaang okora'ari otou', ee'noko tee domaang tee nantoong biikaang araka deempari otou'. <sup>5</sup> Ee'noko tee araka mutaanang-koo arakavari otoi otomaung, teie mutaanange tee daka'koo punkaampuaruko~.  
<sup>6</sup> Aung aa' tee, naning nii'nara tavo'aru'nung miring Jooni. <sup>7</sup> Kumponing botovuio' pou' ookara nantoong nauvurii'naang tee araka, sira'parako masika'antavaavaina'. <sup>8</sup> Jooni tee, tee araka deea', nka tee Jooni pou' tee araka minkuvuma. <sup>9</sup> Tee minkuvuko'nung tee araka masikung, ookara nantoong a' kansii'koo ponto'arimaing araka-antavurimaung. <sup>10</sup> Tee tee kansii'koo ponto'arara otoko', tee aa'nung kansii' nkovuu'nung, teka teing kansii'nupoonge tasi'paavaruko'nung tee.  
<sup>11</sup> Bane baka bakaning meekupoong-anko poio', teka teinge tee aroo'aavaruko'nung. <sup>12</sup> Nii'ninge deeko' aroo'aako teie teing ookara iri' avuru' Kumponing bau-

† Aung tee Karistoo', tee Kumponing uro'ke noru'ui pako'pari'uu'nung nantoong domaang moo'evurira tarevuriang. Ooveai Mkn 19:13.

rukaa' deemparii'naang, teing bakaang miring pankaing masika'antavau'ning deempariko. <sup>13</sup> Teing teing Kumponing baurukaa' ponto'nii'nuka; biu-maraang-koong erenge deea', mono-koong piai deea', ee'noko naning bakaang mataue deea'; teing baka Kumponing baurukaa' deeng-antavuru'ning.

<sup>14</sup> Ee', tee Kumponing bakaang Kara Okonara tee mono-po'nung deemparu' ee'noko nii' ninka nari' otou' tee teinge piai naankai ee'noko tee kara masikung aa'ninge maanto'. Bakaang domaang-eta arakavario' ooampiru'nung tee tee-pina' tee Bauring narung masikung kirokai bakaang meenasi Bauma-itaing.

<sup>15</sup> Joonie tee minkuvuu'; bokuma aa'puu', "Aung ee'nara naning minkuanko'nung, aa'panko'nung: Naning tee ning-koo dama'ke pomaang tee bakei ning puru'mui otong. Ning paramaavaruko teroita otou'nunge." <sup>16</sup> Biraanke-antamuriko nii' ookara bauta'nanka nkavampikoo' bakaang avusiro' pankaing okora'ario'. <sup>17</sup> Kumponing bakaang boto Moosesi avuio' teie nii' pare'muru'; piai †† naning otoa' tee boto tampa' tarevui tee kiimata baari'upeu'nung (Rom 8:3).<sup>18</sup> Ee'noko kara masikung ‡ ta'ni'poi minku Jiisuu' Karistoo'koo kuunge po'antavuu'. <sup>18</sup> Naning otoa' Kumponing oovuu'nung. Bauring narung masikung kirokai, tee narung bauma ninka navuaremaung. Teie ee'narai Kumponing tampa' naumurimang.

### Jooni Minkinara Bakaang Daanki

(Mat 3:1-12; Mak 1:7-8; Luk 3:15-17)

<sup>19</sup> Ju'koong ovontung Jerusalema'nupoonge pristii'nanka ee'noko biikaning pakupakunanka botoaaru' Jooni tana'aava'naang, aa'paava'naang, "Da'

†† Tee urikung kara Mosesie pare'uu'nung naning toto'pura tee nau'ka dupisi'koong tampuu', piai otoa' (Ibr 10:28). Ee'noko ‡ Tee tee kara dupeari oto' (Ibr 10:1), aa'noko tee taung masikung domamariainavung ee'noko tee iri' Tanuaang Meekung-etaing makosi-antamurimaung tevung siong-koo.

baa ee'nara?"<sup>20</sup> Ee'noko tana'aako Joonie kapoo' baku'ua' tampa' sira'pari aa'puru': "Ning tee Kumponing-etaing teroita Pako'pari'nii" deea', nantoong domampurira tarevuriaing."<sup>21</sup> Tee'puko aa'pau', "Da' ee'nara baa, Eliasi ee?"<sup>†</sup> Ee'noko Joonie maku'urima aa'puru', "A, ning tee deea'." Ee'noko napo' nia'aama aa'pau', "Da' ee tee nakaronung nempampimaung ee?"<sup>††</sup> Ee'noko maku'urima aa'puru', "Otoa'."<sup>22</sup> Ee'noko napo' nia'aama aa'pau', "Nka da' ee'nara baa? Naumeriaing nantoong botomaaring nauarampiaina'. Da' baa daka tantaramaung?"<sup>23</sup> Ee'noko Joonie maku'urima aa'puru', "Teie nakaronarai Aisaia'ke urikamu' ning-koo minkuvuu' Daari Meekung-koo aa'puu'noo'ka,

'Aurong narung naning-koong, naning mee'bora' sirakamaa' otoi bokuma aa'pumaang, maamu-antaveriaing tee taung Ovoring bakaang. Koompevuriaing poainavung."

(Aisaia' 40:3)

<sup>24</sup> Nii'ning napo' te' otoroko' Boto Keperuu'navitue~ botoaario'.<sup>25</sup> Teinge napo' Jooni nia'aama aa'pau', "Da' ee'nara Tee Pako'pari'nii', Eliasi, ee'noko tee nakaronung nempampimaung deeaung deeko' aming-koo ee'narai dake nantoong ntong-koo minkiverima meeka'antaverimaung?"<sup>26</sup> Ee'noko Joonie kara maku'urima aa'puru', "A, tamung ntong-koo minkie meeka' antavarampimang. Nka nii'nung noru'eriaung naning pankaing dii'koo meu' donkonui otong.<sup>27</sup> Tee ning-koo dama'ke poaing naurampimaung aa'na' apoo'mui otong, doonge-taara~. Tee ee'nara poko aa'na' tampa' taaraveriaii!"<sup>28</sup> Aung kapoo' ookara Beetani-namono-koo nkoaru' Joo'dani-nari-koo amenka'aapei, Joonie nantoong ntong-koo minkivurima meeka'antavuriko'noo'ke.

#### Joonie Tee Uripo'keta Pako'pari'nii' Poko Tasi'puu'na'

<sup>29</sup> Teketa tee dauna'mung Joonie Jiisuu' oovuu' poko, ee'noko aa'puru', "Ooveriko, aunkapeto tee ee'nara Kumponing Bakaang Sipisipi'koong Kampia aarumo orara tonta'uaing ookara kansi'nupoong-koo.<sup>30</sup> Tee aung ee'nara tee naning ninge minkuamaung, aa'pama, ning-koo dama'ke poaing naning bakei ning-koo dau basi. Ning o'noaruko otou'.<sup>31</sup> Aung ee'nara naning ninge noru'ampa' minkuankonung, ee'noko ning tavo'maru' dii' Isireeli-nupoong ntong-koo minkirampima meeka'antampiko, dii'ke tasi'perii'naang aung naning."

<sup>32</sup> Joonie daankivurima aa'puru', "Ninge Tanuaang Meekung kuukuu'pina' siarako paning-eta siarara tee-koo dau pantoko ooansing.<sup>33</sup> Ee'noko ninge koonto' noru'ampa', nka Kumponing, botomuu'nunge nantoong ntong-koo minkirama meeka'antavara-

† Teie nakaronarai~ Malakai-e temu' Ju'nupoong nauvuru'ning tee temu'nung nakaronara pankaing, Eliasi, napo' tavo'aravaing nantoong maamu-antavurii'naang Ovoring poaing-koo. Ooveai Malakai 4:5. †† Temu' urikamu' Kumponing Moosesi karantavuma~ Karistoo'koo minkuvui aa'puu', "Dama'ke ninge nii'nara nakaronara pankaiang teing Isireeli-nupoong-koo meu'keta daa'evorompang da'pina' oro'nara." (Boto 18:18)

ma'naang, aa'muu', 'Dake Tanuaang Meekung siarara dau pantoko oovee'naang tee-koo naning-koo. Tee ee'nara tee Tanuaang Meekung ninka meeka'antavuriaing."<sup>34</sup> Joonie aa'puru', "Ninge ooansing, ee'noko naurampimang, aung ee'nara tee Kumponing Bauring."

#### Tutuna'ning Barevare-nupoong Jiisuu' Bakaning

<sup>35</sup> Teketa tee Jooni dauna'mung napo' te' otoko nee' ninka bakaning barevare-nupoong-koonanka ninka.<sup>36</sup> Ee'noko Joonie Jiisuu' nanuko oovura aa'muretu', "Aunkato ee'nara Kumponing Bakaang Sipisipi'koong Kampia."<sup>37</sup> Ee'noko tee nee'ke Jooni taaravampeta Jiisuu' siompampetu'.<sup>38</sup> Jiisuu'ke dama'du-aape nee'ke siompampeko oomureta nia'muretu' aa'puma, "Dee'ke aming besieremang?" Ee'noko nee'ke maku'ampetu' kara, aa'pampema, "Raabai' ee, da' are' otomaung?" (Aung Raabai' miru'noo' Nau-anta Pankaing.)

<sup>39</sup> Ee'noko bokumurema aa'muretu', "Poreta ooveriai." Teketa tee nanampetai'nange ooampetu' te' ee'noo' otoko'noo'. Tenang ee'ngang duaa' sirang poio'. Ee'noko te'mung doong tee ninka o'horu'.

<sup>40</sup> Tenang Joonie tasi'antamureko Jiisuu'koo bi'maresi nanampetu'. Nee' ee'naanka Aanduru', Saimoni' Piita baara'ma'nung ninka.<sup>41</sup> Ee'noko namu'ke Aanduru'ke bataata Saimoni' besi'uu'. Ee'noko oovurai'nange nauvuma aa'puu', "Nee'ke pe'numpampesing tee Kumponing Pako'pari'nii' nii' domang moo'murima taremuriaing-koong" (Kiriki'na' tee Karistoo' tampaamaung).<sup>42</sup> Ee'noko Aanduru'ke enang Saimoni' Jiisuu'anko tavo'uu'. Jiisuu'ke oovurai'nange aa'puu', "Da' Saimoni', Jooni bauring. Dakaang miring Siipasi deemparavaing," Kiriki'na' tee Piita ‡ tampaamaung.

#### Jiisuu'ke Pilipi'naanka Natanielo' Bokuvuretu'na'

<sup>43</sup> Aung aa' napo' dauna'mung Jiisuu' Kaaleli'navete-aape nanu'koo piavou'. Ee'noko Pilipi' oovurai'nange aa'puu', "Ni'ninka nanampeaing."<sup>44</sup> Aunoo' Pilipi' Besaida-ning. Te' osi Aanduru'namainta Piita otoreko'noo'.<sup>45</sup> Ee'noko Pilipi'ke Natanielo' besi'uma oovura nauvuma aa'puu', "Nii'ke pe'numpampirieeng tee ee'nara naning Moosesie buuku-koo daarivuu'nung Kumponing bakaang boto-koong-koo, tee ee'nara naning nakaro-nupoong urikupoong daari- au'nung biikaang buuku-koo. Aung bakaang miring Jiisuu', Josepa' bauring, Nasareti'nung."<sup>46</sup> Ee'noko Natanielo'ke maku'uma aa'puu', "Arekee? Kapoo' ee tampara Nasareti'keta popeu?" Ee'noko Pilipi'ke aa'puu', "Pora ooveaing."

<sup>47</sup> Ee'noko Jiisuu'ke oovuu' Natanielo' tee-anko poko, ee'noko aa'puu', "Aung ee'nara koonto' Isireeli-nupoong-koong. Tosi nkovuaunge."<sup>48</sup> Natanielo'ke nia'uma aa'puu', "Dake arekee' ning noru'meing?" Jiisuu'ke aa'puu', "Da' ninge tero ooransing Pilipi'ke mme' bokuruaruko kokoki-navari-koo boong ueentari otoko."<sup>49</sup> Ee'noko Natanielo'ke maku'uma aa'puu',

‡ Tee Manto pina' nari'.

"Nau-anta Pankaing, da' ee'nara Daurarong~ nii' Isireeli-nupoong niikaang." <sup>50</sup> Jiisuu'ke aa'puu', "Dake ee masika'antamemang aa'dansing-koo, 'Da' ninge ooransing kokoki-koo boong ueentari otoko.'? Dake kapoo' mmou' pankainanka aung-koo dau basining ooveainge." <sup>51</sup> Ee'noko Jiisuu'ke aa'muru', "Masika' nau-rampimang, paning bere'arako ooveriainge, ee'noko Kumponing bakaning koosinunanka ee'deto ee'noko ee'depeto nanaako ooveriaing ning-anko Tee Naning-naumpo' Paning-etaing-anko."

### Jiisuu'ke Taa'ni'antananka Nko Tutumpuu'na'

(2:1-4:54)

#### Minkunaa Nampeesi Nkoau'nung-koong Kana-navuntu'koo

**2** Ke'munta doong tankinuio' nampeesi-koong paroro Kana-navuntu'koo nkoau' Kaaleli'nameng-koonoo'ke. Jiisuu' bauko te' otou'. <sup>2</sup> Jiisuu' ee'noko nii' bakaning barevare-nupoong nanampiru' tee-koo ee'nara-koo paroro-koo nampeesi-koong-koo. <sup>3</sup> Teketa tee, ookara uaini oparako Jiisuu' baukoi aa'puu', "Uaini oparing. Enang oto'evoroa'." <sup>4</sup> Ee'noko Jiisuu'ke aa'puu', "Ee nko', arekee'? Nkaang batei mme' makotua'." <sup>5</sup> Teketa Jiisuu' baukoi teing taamang banto'nuka teke otoroko'ning nauvurima aa'puru', "Kapoo' nau-ruriaing nkoveriai."

<sup>6</sup> Teke ~nareng-taa utau kapang-kooning ntong-po'ning te' otoko' taramu-pina' basi pankaing-pina', Ju'nupoonge temurii'keta ntong nke'aama amute-murii' kapoo' duu'paako'ning biikaang toomo siompai. <sup>7</sup> Ee'noko Jiisuu'ke teing taamang banto'nuka aa'puru', "Aing utauning maanto'eriaing ntonge." Ee'noko teinge maanto'ama koonto' a'dei'ke karange basiau'. <sup>8</sup> Ee'noko maanto'aio' Jiisuu'ke nauvurima aa'puru', "Enang tee-koo ntong-koo nii'naru' nke'erira tavo'eriaing tee-anko paroro okovenung-anko." Ee'noko tee-anko tavo'au'. <sup>9</sup> Ee'noko ntong avai' mantompuu', koonto' uaini deempario'. Teie noru'uaruu' aung uaini okora'noo'. Teinge nainge taamang banto'nankai ntong nke'au'ninge noru'au'. Ee'noko teie paroro okovenunge mantompura tee naning nampeesiarako'nung bokuvura aa'puu', <sup>10</sup> "Nii'ke ookarai uaini tampara masikung tutung avorompimaung, ee'noko nantoonge tee opaako dama'ke tamunsi'nung uaini avorompikoo'. Ee'noko dake tampara uaini pinka'eing bera nang dama'ke amerimaang."

<sup>11</sup> Aung Jiisuu' bakaning taa'ni'antananka-koo tutuna'nung. Tee nkovuu'nung Kana-navuntu'koo, Kaaleli'nameng-koonoo'ke. Teke ee'nook'ke bakaang meenasi sira'paru' ee'noko nii'ke bakaning barevare-nupoonge masika'antavampiru'.

<sup>12</sup> Ee'noko teketa Jiisuu' ee'noko bauko ee'noko baara'mainkaang ee'noko nii' bakaning barevare-

nupoong nanampiru' Kapaneume'navuntu'aape. Ee'noko temono-koo nii'ning doong o'noru'.

### Jiisuu'ke Dootuu'nava Pankava-koo Baave Nkonuka Bata'uru'na'

(Mat 21:12-13; Mak 11:15-17; Luk 19:45-46)

<sup>13</sup> Tenang Ju'nupoong biikaang Taamang Baari'koong~ due'ui'o' Jiisuu' Jerusalema'aape nanuu'. <sup>14</sup> Ee'noko Jiisuu'ke nantoong oovuru' parang-koo dootuu'nava pankava-koong-koo kuunge baaveveeko boromaka' dovang, sipisipi' dovang, kuukuu' dovang parekanumpo'. Ee'noko napo' nantoong mooni' aampari'aako'ning oovuru' biikaang ba'nava'nang-koo ba'namparirio'. <sup>15</sup> Ee'noko Jiisuu'ke mo'ming nerivura nipo'urima ookara kau' karenaumo bata'uru' dootuu'nava pankava-ita, sipisipi' dovang, boromaka' dovang. Ee'noko Jiisuu'ke batanang-nanka pe'dempuru' mooni' aampari'aako'ning biikaning, ee'noko biikaang mooni' purarinka'evuru'. <sup>16</sup> Ee'noko teing nantoong kuukuu' baaveaako'ning Jiisuu'ke nauvurima aa'puru', "Te'nemperiaing anketa. Mma' bakaang pava baaveroma deeng-antaveriauka'." <sup>17</sup> Ee'noko nii'ke bakaning barevare-nupoonge noru'ampiru' Daari Meekunge minkuvuu'na', aa'puu'na', "Nkaang domang-eta pia aa'na' o'nong dakaang pava meekung otoi oto'koo."

(Kena 69:9)

<sup>18</sup> Teketa tee Ju'koong ovontunge maku'aama tuu'ai nia'aama aa'pau', "Da' pankaing deeko', tee' nkovepeu'nung, taa'ni'anta naumeriaing." <sup>19</sup> Jiisuu'ke maku'urima aa'puru', "Aung pava dootuu'nava turamperiko beenang doong-koo napo' daa'ampaing."

<sup>20</sup> Teketa napo' teinge nia'aama aa'pau', "Beenang doong-koo masika' kaniepeu'? Makotua'. Ava dootuu'nava pankava pankaroonge kaniampiru'nava karenaumo kivora-ita ~namare'taa-koo."

<sup>21</sup> Tee dootuu'nava tampuko'nung miru'noo' tee ee'nara Jiisuu'nung mono. <sup>22</sup> Dama'ke boo'keta daa'ario' nii'ke bakaning barevare-nupoonge napo' noru'ampiru' tee' minkuvuu'na'. Ee'noko Daari Meekung masika'antavampiru' ee'noko tee kara Jiisuu'ke minkuvuu'nung.

### Jiisuu'ke Ookara Nantoong Biikaang Aarumo Noru'uri Otong.

<sup>23</sup> Teketa tee Jiisuu' otou' Jerusalema' Taamang Baari'koong-koo~. Ee'noko te' otoko mmou'ke masika'antavau' taa'ni'antananka nkovuu'ning ooaama te' otoroitaa'. <sup>24</sup> Nka Jiisuu'ke tee masika'antavuriaruko' ookara biikaang aarumo noru'uitaa'. <sup>25</sup> Bane naninge kapoo' nauvuvaruko tampa' noru'uko' nantoong-koo tumsi-koo oting.

### Jiisuu' Nikodemasi Ninka Minkuaretu'na'

**3** Enang tee naning narung otoko' miring Nikodemasi. Tee Ju'nupoong-koong pankaing, Boto Keperuu'navitu-koong~. <sup>2</sup> Ee'noko nii'na'mung muunga

Jiisuu'anko pora aa'puu', "Nau-anta Pankaing ee, da' nii'ke noru'dampiri otong. Da' nau-anta Kumponing botoruu'nung. Aing taa'ni'antananka nkovemaing naninge baka nkovuarupeu' Kumponing ninka nari' otorea' dei." <sup>3</sup> Jiisuu'ke maku'uma aa'puu', "Masika' nauramaang, naning napo' ponto'aravarui dei, Kumponing bakaang muu' oovuarupeu'." <sup>4</sup> Nikodemasi aa'puu', "Arekee' napo' naning pankara ponto'arapeu'? Bauko-koong-koo manong-koo napo' tumparavarupeu' kemu'kana' napo' ponto'araa'naang." <sup>5</sup> Ee'noko Jiisuu'ke maku'uma aa'puu', "Masika' nauramaang, naning Kumponing bakaang muu'koo tumparavarupeu' ponto'aravarui dei ntong-eta ee'noko Tanuaang Meekung-eta. <sup>6</sup> Mono-koong ponto' mono-pina' oampimaung, ee'noko Tanuaang Meekung-koong ponto' domaang-pina' oampiarupeu' dutai. <sup>7</sup> Ta'niniauka' aa'pansing-koo, 'Dii' nau'ka napo' ponto'dariaing.' <sup>8</sup> Doving piavomana' duparama eevumaunge. Dake tamung bakaang kara taaravepeu' ee'noko dake noru'earupeu' areketa pomaang ai' are'aape nanumang. Tee' nari', dake tasi'pearupeu' nantoong Tanuaang Meekung-eta ponto'arimana'." <sup>9</sup> Nikodemasi aa'puu', "Arekee' tee' nkoarapeu'?" <sup>10</sup> Jiisuu'ke maku'uma aa'puu', "Arekee' dake aung noru'ea' otong bane pankaing, kake'ii-anta Isireeli-nupoong biikaange? <sup>11</sup> Masika' nauramaang, nii'ke tampa' noru'ampiritaa' karompimaung, ee'noko kapoo' oampiritaa' minkuampimaunge. Ee'noko dii' aung niikaang kara taara-koo piaroriaung. <sup>12</sup> Dii'ke masika'antameriaung kapoo'koo kansi'koong-koo naurampiko arekee' masika'antameripeu' ninge kapoo' paning-kooning naurampiko? <sup>13</sup> Ee'noko nii'nung naning paning-koo nanuu'nung otoa', ning narung, ning Tee Naning-naumpo' Paning-eta mou'nung. <sup>14</sup> Tee' Moosesie boru' koopa'koong intampuu'na' tuuku-koo mee'bora' sirakamaa'koo tee' nari' nau'ka ning Tee Naning-naumpo' intamaavaing. <sup>15</sup> Kumponing tee' nkoaraa'naang miru'uu'nung taung daare'uu'naang nantoong domaang isikung okovuriaing-koong, teing ookara ning masika'antamaavaining." Jiisuu'ke tee'puu'.

<sup>16</sup> Ee', Kumponing nii' ookara kansi'nupoong aa'na' piaamurikotaa' tee Bauring narung masikung kirokai taura'puu'nung tee boo'paraa'naang nii' paku-koo; bera tee naning tee masika'antavaing paa'aravauka'nung, teka domaang oparavaung oto'evuaing. <sup>17</sup> Kumponing Bauring botovuu' domang-antanung deemparaa'naang, tuumpinung deea'. <sup>18</sup> Baa tee Kumponing Bauring masika'antavumaung tee kiimata nkavuauka'nung, ee'noko baa tee Kumponing Bauring masika'antavaung tee kiimata-numpo', Kumponing Bauring narung masikung kirokai masika'antavuaruko. <sup>19</sup> Tee kiimata nka-koong okora'noo' ee': Araka a' kansi'koo poko nantoong kontevorou', mu-taanang narung piavoroi biikaang orara-nko daka'koo. <sup>20</sup> Naning tee kapoo' orara nkovumaung bakei aa'na' piavoang araka-koo ee'noko kupi'omaung araka-anko po'koo bakaning orara nko-nko sira'para'neeng-

koo. <sup>21</sup> Ee'noko naning tee kapoo' masikung siom-puitaa' nkoaramaung tee araka-anko pomaung, ookara kapoo' nkovuining sira'paraa'naang Kumponing dotu-anta-koo nkonii' deemparako.

### Jooni Minkinarai Jiisuu' Tasi'antavuru'na'

<sup>22</sup> Aung aa' tee teketa nii' bakaning barevare-nupoong tee Jiisuu' ninka nanampiru' Judia'nameng-koo. Nii'ning doong teke tee ninka o'noru' nantoong ntong-koo minkivurima meeka'antavurima. <sup>23</sup> Tenang napo' Joonie nantoong nii'ning ntong-koo minkivurima meeka'antavuriko' Iinong-a, Sielima'navantu'koo due'ka, te' ntong mmau'po'noo' deemparako. Nantoong mmau' te' beroko' Joonie minkivurira meeka'anta-koo. <sup>24</sup> Tenang ee'ning mme' Jooni kiimatavarava'.

<sup>25</sup> Ee'noko nii'ning Jooni bakaning barevare-nupoong-kooning tata'eeko' Ju'nupoong-koong narung pankaing ninka kiirora'anta aarumo meekung-koong. <sup>26</sup> Aung aa' tee, Jooni bakaning Jooni-anko berou' nauaava'naang. Aa'pau', "Nau-anta Pankaing, tee ee' dake naning noru'emaang ntong-koo aveteka'koo otoresieeng Joo'dani-nari-koo tee ee'nara naning dake minkueu'nung? Tee ee'nara naninge enang nantoong ntong-koo minkivurima meeka'antavurimaang, ee'noko ookara tee-anko nanaamaang." <sup>27</sup> Joonie maku'urima aa'puru', "Naning otoa' kapoo' oto'evupeu'nung Kumponing avuaruko. <sup>28</sup> Dii'ke tero taaraveru' tee kara ninge minkuama aa'pantu'nung, 'Ning tee Pako'pari'nii' tavo'aravaing-koong deea', teka Kumponing botomuu' tee-koo ee'nara-koo uro'kanoo' nanama'naang.' <sup>29</sup> Nampeesi-koong paroro-koo, teni manikuma teni tee nampeesinara ba'aang. Ee'noko tee ba'maiko' tamung due'ke donkonui nem-pari taaravuma doturotuarapeu' tee nampeesinara karoko. Tee' ee'na' teing nantoong Jiisuu' ninka otoroko oaransi nkaang doturotu dupenii' otoi otong. <sup>30</sup> Tee nau'ka pankaimparavaing ning oki'na'marako."

### Jiisuu' Tee Tee Naning Paning-eta Pou'nung.

<sup>31</sup> Naning a'dei'keta pou'nung ookara-koo dau basi. Naning kansi'koo otoi tee kansi'nung ee'nara, kansi'kooning kapoo' minkuvumaung. Ee'noko tee naning paning-eta pou'nung ookara-koo deu basi. <sup>32</sup> Teie ee'narai naumurimaung oovuu'ning ee'noko taaravuu'ning. Nka nantoonge bakaang kara masika'antavaavaung. <sup>33</sup> Ee'noko naning tee bakaang kara masika'antavumaung tee ee'narai sira'pui aa'pumaung, "Kumponing bakaang kara bakei kara masikung." <sup>34</sup> Tee ee'nara Kumponing botovuu'nung Kumponing-koong kara koonto' taa'ni'poio' minkuvumaung, Tanuaang Meekung Kumponing ootokuorio' avuu'nung ninka. <sup>35</sup> Baumai Bauring piaavura ookara kapoo'nanka avuu' kompuu'naang. <sup>36</sup> Ee'noko naning Kumponing Bauring masika'antavumaung domaang oparavauka'nung oto'evumaung. Ee'noko naning tee Kumponing Bauring bakaang kara taaravaung do-

maang oparavauka'nung oto'evuauka'nung koonto'. Kumponing bakaang iira tora'puaing teie doong kante.

#### Jiisuu' Ee'noko Nani Sameria'nani Nari' Minkuaretu'na'

4 Ee'noko teinge Boto Keperuu'navitu~ taaravau' Jiisuu'ke mmau' barevare-nupoong bokuvurima ntong-koo minkivurima meeka'antavuriko Jooni-koo dau basinoo'. <sup>2</sup> A'noo' Jiisuu'ke baka nantoong ntong-koo minkie meeka'antavuria'; nii'ke bakaning barevare-nupoonge nainge deeko' minkiarampima meeka'antavarampiko'. <sup>3</sup> Teketa Jiisuu'ke tee kara taaravurai' nange Judia'nameng-eta toroarua' Kaaleli'aape. <sup>4</sup> Ee'noko maroita tevung taung-navunge Sameria'namenge tankinui-navunge siong-antamuru', nii'ke Ju'nupoonge baari'ampimanavunge. †

<sup>5</sup> Ee'noko Sameria'nameng-koo tumarira osi tavo'mariru' miring Saikaa'. Te' ee'noo' baru' isipi' deea' Jeekopi'ke bauring Josepa' avuu'nau-koo. <sup>6</sup> Te' ee'noo' Jeekopi' bakaang dinkung ntong-po'nung otoko'noo'. Ee'noko Jiisuu' nanu'koo takaa'ora te' ba'namparu' tee-anko dinkung-anko. Tenang ee' nang muung-aapenang.

<sup>7</sup> Jiisuu' te' ba'nampari otoko nii' bakaning barevare-nupoong osi nanampiru' taamang moo'ampii'naang. Ee'noko tee, Jiisuu' sipampirio' nani Sameria'koonani te' ntong nke'koo dinkung-koo pou'. Ee'noko Jiisuu'ke aa'puu', "Ntong-koo amesai." <sup>9</sup> Teketa Sameria'nanie aa'puu', "Da' Ju'koong, ee'noko ning Sameria'nani. Arekee' ning dake nia'memaang ntong-koo aro-ma'naang?" (Ju'nupoonge kompaavaung kapoo' Sameria'nupoonge taamanaama kompaamaing. Tee'koo tenie tee' minkuvuu'.)

<sup>10</sup> Ee'noko Jiisuu'ke maku'uma aa'puu', "Ee baka', dake noru'ei dei Kumponing-nung bauta' ee'noko ning baa ee'nara nia'damaang ntong-koo, ning ee'nara nia'mepeu'. Nia'meko ninge arompeu' ntong domaang-po'nung." <sup>11</sup> Ee'noko tenie manikumai maku'uma aa'puu', "Ee aung, nna' da' baakete oto'derua', ee'noko aung dinkung baru' isikung masikung. Arekee' nkavepeu' tee ntong domaang-po'nung? <sup>12</sup> Nii'kaakai Jeekopi'ke aung dinkung ntong-po'nung amuru'. Tee ee'nara ee'noko baurukaa' ee'noko bakaning boromaka' dovang sipisipi' ookara aru'koo naikau'. Emu' da' ee' Jeekopi'koo dau basi tantamaang?"

<sup>13</sup> Jiisuu'ke kara maku'uma aa'puu', "Nantoong aung-koo dinkung-koonaru'koo naikaara napo' nukaa'oropeu'. <sup>14</sup> Nantoong teing ninge ntong avorompainang napo' nukaa'oroauka'nung. Teru' avorompainaru' teing-koo kuunge puunta-po'naru' deemparavaing ntong domaang-po'nung doong kante tavo'aramatoaina' teing-koo, domaang oparavauka'nung oto'evuriaina'." <sup>15</sup> Ee'noko tenie manikumai maku'uma aa'puu', "Ee', amesaiing tee ee'nara ntong.

† Ju'nupoonge Sameria'ke tankinaavarupeu', ai' teing teing oovu-nupoong deempairu'ning, Asiria-nupoong ninka nampeema, kare-koo tavarira nkavaaru'noo'keta.

Ning tee' nari' oto'koo piamomaang, napo' ntong-koo nukaa'moauka', napo' kemu'kana' moauka'na' ntong nke'koo."

<sup>16</sup> Enang tee Jiisuu'ke botovuma aa'puu', "Bera da'ung bokuera a' poreaing." <sup>17</sup> Tenie manikumai aa'puu', "A, ning aa' inung o'noai." Jiisuu'ke maku'uma aa'puu', "Ee'. Daang deea'. Masika' minkuemaang tee' aa'pema, 'Ning aa' inung o'noai.' <sup>18</sup> Da' pa'noko'ke nantoonge nantau'nani, ee'noko tee naning enang da' ninka otoresing da'ung masikung deea'. Masika' naumeing." <sup>19</sup> Ee'noko tee, tenie aa'puu', "Ee aung, da' masika'dario' ninge nakaronung-pina' noru'damaang. <sup>20</sup> Nii'kakatauroi Sameria'nupoonge amii-koo Kumponing boontuaako', dootuu' nkoama; ee'noko dii'ke Ju'nupoonge aa'perimaung, 'Jerusalem' naru'ke Kumponing boontuampimaatoaing."

<sup>21</sup> Jiisuu'ke aa'puu' teni manikuma, "Masika'an-tameaing, ee ani, batei tavo'aravaing amii-koo ee'noko Jerusalem'ke nantoonge Tee Niuma dootuu'aama boontuavaauka'nung. <sup>22</sup> Dii'ke Sameria'nupoonge baru' noru'eria' tee dootuu'erimaung. Nii'ke Ju'nupoonge tampa' noru'ampiri otong tee dootuu'ampimaung. Kumponing tee Domang-anta-ning Ju-nupoong-koong tavo'araa'naang tam-puu'nung-koo. <sup>23</sup> Tee batei pomaang, aung aa' otong, tenang Tee Niuma dootuu'arimaing masikenge tanuaang-aapena' domange aroo'ariri masika' dootuu'aavainang. Teing temurii'na' dootuu'nupoong Tee Niuma piavomaung. <sup>24</sup> Kumponing tee Tanuaang. Tee'koo Kumponing maromurimaung tanuaang-aapena' dootuu'ampii'naang domaang-eta, aroo'mariri masika'."

<sup>25</sup> Manikumai aa'puu', "Ninge noru'ansi o'nong tee Kumponing urikamu'keta Pako'pari'nii', Karistoo' tampaamaung poo'naang. Tee ee'nara pora ookara kapoo' naumuriaing." <sup>26</sup> Jiisuu'ke maku'uma aa'puu', "Ning tee ee'nara da' ninka karompemaang."

<sup>27</sup> Ee'noko tenang ee' nang nii' bakaning barevare-nupoong toromarima bakei aa'na' ta'ninampiru' manikuma ninka minkuareko, nka nia'ampima aa'pampiaruu', "Aming piaromaang?" nii'na' "Aming-koo minkurareng teni ninka?"

<sup>28</sup> Ee'noko tenie manikumai tee utau te' sipura nanuu' osi-aape. Ee'noko osi-nupoong nauvurima aa'puru', <sup>29</sup> "Porira naning ooveriaing kapoo' ookara ninge tero nkoanko'ning naumuinung. Aung ee'nara dee'ma tee Pako'pari'nii'." <sup>30</sup> Ee'noko teing osi-eta porou' Jiisuu'anko.

<sup>31</sup> Tee aa' nkoario' nii'ke bakaning barevare-nupoonge Jiisuu' aa'na' nia'ampiru' aa'pampima, "Nau-anta Pankaing, taamang-koo naikiaing." <sup>32</sup> Jiisuu'ke kara maku'memurima aa'muru', "Ning nkaang taamang oto'memuung dii'ke noru'eria'." <sup>33</sup> Ee'noko teketa nii' nii'ka niania' nia'meerima aa'meeriko', "Ai' nii'ninge aung taamang tavo'evaing?" <sup>34</sup> Jiisuu'ke aa'muru', "Ning-koo taamang baru' kapoo' masikung deea'. Nka tee Kumponing bakaang nko-nko kapoo' masikung. Teie botomu'na' tampa' nkoansi dupeampaing.



<sup>35</sup> “Dii’ke ee’ minkuerimaung, ‘Keempampimanoo’keta karekuri kaara makosi tankinuko taamang nkavampipeu.’ Nka dii’ke ooveriaing mintonanka. Enang namu’ke petaa’oing, taamang kavu’noo’ makotuing. <sup>36</sup> Nii’ke taamang nkavampima doturotumari-maung. Tee’pina’ nantoong oosiarampimang domaang oparavauka’nung oto’evurii’naang, nii’ sinang tanka-nupoong ee’noko taamang nka-nupoong naro’mariri doturotumariaina’. <sup>37</sup> Aung kara teinge minkuaamaung masikung, ‘Narunge keempuko nii’nunge taamang kavumaung.’ <sup>38</sup> Ninge dii’ botorampiring taamang nkaverii’naang mintoong-koo dii’ pakurariaru’ nau-koo. Aung tee nii’ning mintoong-koo iri’oparing-koo dii’ tamung kavu’ narung-koo pakuraring.”

<sup>39</sup> Ee’noko mmou’ke Sameria’nupoonge temono-nupoonge Jiisuu’ masika’antavau’, tenie ee’nani manikumai tee’ minkuvuma aa’puio’, “Teie kapoo’ ookara naumuing tero nkoanko’ning.” <sup>40</sup> Ee’noko teing Sameria’nupoong Jiisuu’anko porora aa’na’ nia’au’ te’ otoroo’naang teing ninka. Ee’noko tee Jiisuu’ temono-koo ke’munta doong otou’.

<sup>41</sup> Ee’noko mmou’ke napo’ masika’antavau’ Jiisuu’ bakaang-koo kara-koo. <sup>42</sup> Ee’noko teinge teni manikuma nauaama aa’pau’, “Nii’ke enang masika’antavampiring tee-koo dake naumering-koo deea’, tee nii’ke koonto’ taaravampirai’nange. Tee ee’nara koonto’ noru’ampiring tee Domang-antanung ookara kansi’nupoong.”

#### Jiisuu’ke Daurarong~ Bakanaving-koong Bauring Tamparu’antavuu’na’

<sup>43</sup> Ee’noko tee, ke’munta doong te’ otorai’nange Jiisuu’ke temono sipura Kaaleli’aape napo’ nanuu’. <sup>44</sup> Jiisuu’ke aa’puko’, “Naning tee ning-pina’ nakaronara bakanoo’nupoonge nainge deeko’ masika’antavaavaung.” <sup>45</sup> Tee’ nari’ Jiisuu’ke bakanoo’ osi Jerusalema’ sipurai’nange Kaaleli’nameng-koo tumpario’ tevora’nupoonge onkeonke’au’. Aming-koo, nna’ teing ee’ning nanau’ Jerusalema’aape Baari’koong Paroro naiaava’naang, ee’noko te’ otoroita’ ookara kapoo’ Jiisuu’ke tenang nkovuu’ning ooau’ paroro-koo meu’ke.

<sup>46</sup> Ee’noko Jiisuu’ napo’ toroarua’ Kana-namono-koo Kaaleli’nameng-koonoo’, ntong uaini deeng-antavuu’noo’. Ee’noko tee daurarong bakanaving-koong narung pankaing te’ otoko’, bauring Kapaneume’namono-koo otoi siipavou’. <sup>47</sup> Ee’noko teie Jiisuu’ Kaaleli’aape pou’nung Judia’keta taaravuu’. Taaravura tee, Jiisuu’anko bera, nia’uu’ Kapaneume’aape nanuu’naang bauring taare-anta-koo, boo’ke due’uko. <sup>48</sup> Jiisuu’ke tee ee’nara aa’puu’, “Dii’koo naning otoa’ masika’antamepeu’nung tutung aa’na’ iirakuta nko-nko oovuarura, taa’ni’anta ta’nimpaarii’nanka.”

<sup>49</sup> Ee’noko tee daurarong bakanaving-koonunge aa’puu’, “Ni’ninka poaing nnuring mme’ boo’paravaruko.” <sup>50</sup> Jiisuu’ke maku’uma aa’puu’, “Bera nani-ang. Dauring domamparavaing.” Ee’noko teie naninge

Jiisuu’ bakaang kara masika’antavura nanuu’.

<sup>51</sup> Ee’noko taunga toroarama bakaning-koong botovotonaananka-koo nii’ning kune’uru’. Ee’noko teinge aa’pau’, “Dauring domamparaa’naang.” <sup>52</sup> Ee’noko teie maku’urima aa’puru’, “Arenang tee ee’naang nnuring tampatampa’ dee’oinge?” Ee’noko teinge aa’pau’, “Ke’maaki’ mme’ mutaanampuko uipaarii’ boimpueeng.” <sup>53</sup> Ee’noko baumai noru’uu’ tenang ee’naang batei basiarako Jiisuu’ke nauvuma aa’puu’nung, “Dauring domamparavaing.” Tee’koo ee’nara ee’noko baurukaa’ke Jiisuu’ masika’antavau’. <sup>54</sup>

#### Jiisuu’ke Taare-antavurima Nau-antavuriko’na’ Kuunoo’ Doong Meekeng-koo

(5:1–10:42)

#### Jiisuu’ke Naning Tamparu’antavuu’na’ Ntong-koo Poonaru’koo

**5** Ee’noko teketa tee Ju’nupoong biikaang paroro meekung nkoau’. Ee’noko Jiisuu’ Jerusalema’ nanuu’. <sup>2</sup> Ee’noko Jerusalema’koong karanaang sipisipi’ duparimanoo’keta due’ke kankonaru’ poonii’naru’ otoko’, pa’noko’ bare pankeng koroai kaniau’ning ninka, ee’noko teru’ miring Betesira tampaako’ Ju’ biikaang kara-koo. <sup>3</sup> Ee’noko nantoong mmou’ siipa-po’nupoong teke teing-koo bare-koo nempairi otoroko’, aa’noko mutuunanka, kaikuu’nanka, ee’noko dootananka, nempaama ntong eemaaru’araa’naang. <sup>4</sup> Koosinung~ Kumponing-etaing namu’na’ teru’koo bema ntong eemaaru’antavuko’, ee’noko tenang tee ntong eemaaru’arako baa tee tutuna’nung teru’koo du’mumparama taarevoko’, bane aremurii’ siipa-po’nunge.

<sup>5</sup> Ee’noko narung naning te’ bempari otoko’ beenaummo kivora-ita ~ beenaummo-taa [38] masiraani siipavou’nung. <sup>6</sup> Ee’noko Jiisuu’ke tee oovura noru’uu’ tee naning pankaroong siipavou’nung, ee’noko aa’puu’, “Da’ ee taareroo’naang piaromaang?” <sup>7</sup> Ee’noko teie siipa-po’nunge kara maku’uma aa’puu’, “Ning aa’ naning oto’memuaung tee ntong eemaaru’arako si’mupeu’nung. Ning ninka te’ nanu’koo paaramarako teka nii’nung divu’mui be-maung.” <sup>8</sup> Ee’noko Jiisuu’ke aa’puu’ tee, “Daa’daravaing. Tani’ poru’era naniaing.” <sup>9</sup> Ee’noko tee naning namu’ke taarevora bakaang tani’ poru’ura beu’. Te’mung ee’na’mung Doong Uaana’mung.

<sup>10</sup> Ee’noko Ju’koong ovontunge tee naning Jiisuu’ke tamparu’ntavuu’nung tautauaama, aa’pau’, “E’mung Doong Uaana’mung; niikaang boto toto’pei tani’ poru’dari nanimang.” <sup>11</sup> Ee’noko teie kara maku’uma aa’puu’, “Teie naninge ning taare-antamuinge naumu-ma aa’muing, ‘Dakaang tani’ nkavera naniai.’”

<sup>12</sup> Ee’noko teinge nia’aama aa’pau’, “Baa ee’nara tee naning da’ botoruing tani’ nkavei nanii’naang?”

<sup>13</sup> Ee’noko teie naninge Jiisuu’ke taare-antavuu’nunge

Jiisuu' miring noru'ua' Jiisuu' namu'ke tenkenuu'nung-koo, karika' baru' temono-koo otoroko.

<sup>14</sup> Ee'noko dama'ke tee Jiisuu'ke dootuu'nava pankava-koo kune'ura aa'puu', "Ee aung, da' enang taareroing. Dakaang orara aarumo sipeaing kapoo' tee-koo siipa-koo dau basi tavo'ku'neeng da'koo."

<sup>15</sup> Ee'noko tee naning teketa tenkenura Ju'koong ovontung nauvurima aa'puru', "Tee aa' ning Jiisuu'ke tamparu'antamuing." <sup>16</sup> Tee'koo ee'na'koo Ju'koong ovontunge Jiisuu' turang tutumpau' teie Doong Uaana'mung-koo naning taare-antavuio'.

<sup>17</sup> Ee'noko Jiisuu'ke maku'urima aa'puru', "Mma' doong kante mintoopari otong, tee'koo ning napo' nau'ka mintoomari o'nong. <sup>18</sup> Tee' minkuvuio' Ju'koong ovontung bakei oraka' dee'orou'. Jiisuu' tavaava'naang enang bakei aa'na' mau'au' Jiisuu'ke Doong Uaana'mung-koong boto toto'puu'nung-koo, ee'noko teie Kumponing bauma masikung tampuu'nung-koo, tee' minkuvuma Kumponing-pina' basi tamparu'nung-koo."

#### Kumponing Bauring Baumanung Iri' Ninka Otomana'

<sup>19</sup> Jiisuu'ke teing kara maku'urima aa'puru', "Masika' naurampimang, ninge Bauringe kapoo' ninge ninka nkoampaung. Ninge Mma'ke nkovuko ooamana' nari' nkoamaung. Kapoo' Mma'ke nkovumaung ninge Bauringe nkoamaung. <sup>20</sup> Mma'ke ning Bauring piaamui ookara kapoo' nkovumaing naumumaung, ee'noko dama'ke kapoo' aung nkoansing-koo dau basi nau-muko nkoama'naang dii' dooroi taruriaing. <sup>21</sup> Mma'ke boo'nuka daa'urima domang-antavurimana' tee' nari' ninge Bauringe domang-antavaramaung teing ning piamomaing. <sup>22</sup> Ee'noko Mma'ke nantoong-simpe' nkovua', tee ning-koo Bauring-koo sipuu'nung nantoong simpe'nko~, ookarai ning Bauring daangangkoo, Mma' daangampaamana'; <sup>23</sup> Nantoong ning daangamaavauka'ning tee Mma' daangampaavauka'nunge ning botomuu'nung.

<sup>24</sup> "Masika' naurampimang, nantoong teing nkaang kara taaravaamaing, ee'noko teing masika'antavaamaing tee botomuu'nung domaang oparavauka'nung oto'evurimaing. Teing teing kiimatavuriauka'ning, tero boo'nameng-eta domaang-aape tankinaing-koo.

<sup>25</sup> Masika' naurampimang, enang-eta deto tee boo'nukai nkaang kara taaramaavainang ning Kumponing Bauring. Ee'noko teing nkaang kara taaramaavainang domampariaing. <sup>26</sup> Mma' baka domaang okovenung otomana' ning Bauring domaang okovenung deeng-antamuu'. <sup>27</sup> Ee'noko Mma'ke ning bauring makosi-antamuu'nung nantoong simpe'koo ning Tee Naning-naumpo' Paning-etaing deemari o'noing-koo. <sup>28</sup> Ta'niniriauka' aung-koo: bateinang pomaang ookara boorou'ning dako'domanoo' otoromaing nkaang kara taaramaavainang. <sup>29</sup> Ee'noko taaramaara' nange tavo'ariaing dako'doma-ita. Teing nantoong tampa' otoroko'ning daa'arampaing koonto' domamparii'naang, ee'noko teing oraka' otoroko'ning daa'arampaing kiimata nka-koo."

#### Teing Jiisuu' Bakaning Kara Puring-antavaamaing

<sup>30</sup> "Kapoo' ninge ninka nkoamparupeu'. Ninge kara simpe'amaung Kumponing narunge naumumana' nari'. Tee'koo ning to'biimari karomaung, ning ninka piamomana' nkoampa' tee ning botomuu'nung narung piavomana' nkoamaung-koo. <sup>31</sup> Ee'noko nkaang kapoo'koo ning ninka kara minkuamaung dei, tee kara minkuamaung makotua' masikung-pina' noru'koo. <sup>32</sup> Nka nii'nung naning otong nkaang kara puring-antavumaung, ee'noko ninge noru'ansi o'nong kapoo' teie minkuvumaung ning-koo masikung. <sup>33</sup> Dii' diikaning kara nka-nupoong Jooni-anko botovererio' teinge teing bakaang kara nauraru'nung ning masika'anta-koong. <sup>34</sup> Nka ninge nantoong-koo naning bakaang kara-koo aroo'marava' otong. Teo ninge Jooni bakaang karai noru' daa'antarampiring dii'ke masika'antamerira domantarii'naang. <sup>35</sup> Jooni daamupina' urumpari arakavarako dii' oki'noo' batei-koo siomperima doturariko'. <sup>36</sup> Teka ning kapoo' pakumui sira'antamuraung oto'memung aa'na' pankaing masikung Jooni-nung sirasira'koo dau basi. Teinge kapoo'ke Mma'ke botomuio' nkoamaing naururi otong sira'antavui ning tee Mma'ke botomuu'nung. <sup>37</sup> Ee'noko napo' Mma'ke ee'narai nkaang kara puring-antamemumaunge. Dii'ke bakaang kara teroita taaraveria', ee'noko bakaang oing ooveria'. <sup>38</sup> Ee', dii'koo bakaang kara otoa'. Tee'koo dii'ke ning masika'antameria' ning Kumponing botomuu'nung. <sup>39</sup> Dii'ke doong kante Daari Meekung aa'na' pukeveri deeruemaung ee' noru'erima, 'Nii'ke domaang oparavaung okomuriaina';' <sup>40</sup> Nka teie ee'narai Daari Meekunge ning moaing-koong minkunaa naururiko aroo'eria' ning-anko po'koo domaang isikung oto'derurii'naang. <sup>41</sup> "Ning nantoonge pankaing-antamaava'naang piamoa', Kumponing deeko' makosi. <sup>42</sup> Nka ninge dii' noru'dampiri otong, dii' diikaang domang-eta Kumponing-koo piaroria' bakei. <sup>43</sup> Ning Mma'ke botomuio' moio' dii'ke onkeonke'meria'; nka tee nii'nung bakamai' poko tee onkeonke'erikoo'. <sup>44</sup> Dii' Kumponing taaraveri dotu-anta-koo kasieria' dii'ka daangangkoo kei'dorima. Tee'koo ning masika'antameria'. <sup>45</sup> Ning Mma'ankoi tuumpi nkonara deea' tee' dii'ke noru'merimana'; teo teie Moosesie dii' tuumpiruriaing, daang aroo'erimaunge. <sup>46</sup> Dii'ke Moosesi koonto' masika'antaveri dei ning masika'antameripeu', teie daarivuma ning naururu'nung-koo. <sup>47</sup> Ee'noko dii'ke Moosesi bakaang kara deeruemaung masika'antaveriaruma arekee' dii'ke nkaang kara masika'antameripeu'? Makotua'."

#### Jiisuu'ke Nantoong Pa'noko' Kokorei' Bau'uru'na' (Mat 14:13-21; Mak 6:30-44; Luk 9:10-17)

**6** Teketa nii'ning batei tankinuio' Jiisuu' toroarama Kaaleli'narukoo pako'aru' nii'noo' miring Taiberi-asi-narukoo. <sup>2</sup> Ee'noko mmou' nantoonge siompau' taa'ni'antananka nkovuko ooaama. Siipananka unaa-antavuriko'. <sup>3</sup> Ee'noko Jiisuu' miinani-koo koinura ba'namparu' nii' bakaning barevare-nupoong ninka,

<sup>4</sup> Paroro Baari'koong~ Ju'nupoong biikaang due'ui otoko. <sup>5</sup> Ee'noko Jiisuu' oo'oopavarama mmau' nantoong oovuru' tee-anko poroko. Oovurira Pilipi' aa'puu', "Are'ka taamang moo'ampipeu' aing nantoong bau'arampii'naang?" <sup>6</sup> Tamung tee'puu' Pilipi' paara-antavuma baka noru'uitaa' nkovuaina'. <sup>7</sup> Pilipi'ke kara maku'uma aa'puu', "Kenaanka kivora nopa'koo makotua' ainge nantoonge oki'noo'na' berete' naiaava'naang." <sup>8</sup> Ee'noko nii'nunge bakaning barevare-nupoong-koonge, Aanduru'ke, Saimoni' Piita baara'ma'nunge aa'puu', <sup>9</sup> "Nemaka a' otong pa'noko' berete' oto'evuinung, ee'noko tavi'ning keura. Nka are-kee' makotupeu' aing-koo ookara-koo?" <sup>10</sup> Jiisuu'ke aa'puru', "Ba'hang-antavereriaing ookara nantoong." Te' otoroko'noo' karaasi' mmau'po'noo', ee'noko ookara nantoong te' ba'nampariru'. Teing-koong nantoong-koong donkaang deerunoo' pa'noko' kokorei'. <sup>11</sup> Jiisuu'ke berete' kompura Kumponing tampa' tampusuu', ee'noko teing nantoong tankee'uru' ba'nampariru'ning. Ee'noko tavi' tee' siong-antavuu'. Ee'noko ookara taamanaara poovorou'. <sup>12</sup> Ee'noko teing poovorou' Jiisuu'ke nii' bakaning barevare-nupoong aa'muru', "Tee ookara kakita'nanka oosieriaing, tamung kera'para'neeng oki'nairu." <sup>13</sup> Ee'noko oosiam-pira peku' kivora-ita keveku'ka maanto'ampiru' kakitana'kai pa'noko' berete'koo taamanaama sipau'ning. <sup>14</sup> Ee'noko teinge nantoonge Jiisuu' bakaang taa'ni'anta ooaara aa'pau', "Aung ee'nara tee nakarung masikung kansi'koo teroita poo'naang Kumponing barevuu'nung." <sup>15</sup> Jiisuu'ke noru'uu' teinge moo'aara daurong~ deeng-antavaava'naang mau'aako. Tee' minkuaako Jiisuu' tenkenura napo' baka mii-koo koinuu' teka kunsiaraa'naang.

#### Jiisuu' Kankong-koo Daue Nanuu'na'

(Mat 14:22-33; Mak 6:45-53)

<sup>16</sup> Ee'noko muung-aapevuo' nii' bakaning barevare-nupoong ee'danto nanampiru' teru'koo. <sup>17</sup> Bakaasi-koo aa'emarira tankinampii'naang Kapaneume'aape toromarima. Ee'noko muumpuu' Jiisuu' mme' nii'anko poaruko. <sup>18</sup> Ee'noko napo' doving pankaing duparu', boo'a pankaing ninka. <sup>19</sup> Ee'noko tee nii' boo'amariru' beenaumo kivora daaku' daanga'pina' † basinoo'. Te' basimarima Jiisuu' ooampiru' kankong-koo daue nanuko, ee'noko due' poio' aa'na' amorompuru'. <sup>20</sup> Ee'noko amorompiko Jiisuu'ke aa'muru', "Aroreriauka'. Tee ning ee' nanamang." <sup>21</sup> Tee' minkuvuo' nii' pi-amoru' nii'ke bakaasi-koo nkavampii'naang. Ee'noko tee namu'ke da'denga tee bakaasi te' basiaru' piamori nanampiko'noo'.

#### Nantoonge Jiisuu' Besi'au'na'

<sup>22</sup> Teketa dauna'mung nantoonge karingai amenka'koo otoroko'ninge ooau' nareng bakaasi-nareng te' mme' otoko. Teinge ee' noru'au': Jiisuu' nanua' bakaning barevare-nupoong ninka, ai' teinge Jiisuu' sipaara

tenkenaieeng. <sup>23</sup> Teketa bakaasinanka Taiberiasi-eta porora duumiau' te' karingai berete' naiau'noo' Ovinge tampara minkuvuo'. <sup>24</sup> Ee'noko tee karika'ke ooaava' Jiisuu' te' otoaruko. Nii' bakaning oomaaria'. Enang tee nantoong bakaasinanka-koo aa'earira Kapaneume'aape toroariru' Jiisuu' besi'aama.

#### Jiisuu' Tee Taamang Domaang-po'nung Tampusu'na'

<sup>25</sup> Teketa teinge Jiisuu' kune'au' teru'koo amenka'aape otoko ee'noko aa'pau', "Nau-anta Pankaing ee, da' arenang a' poing?" <sup>26</sup> Jiisuu'ke aa'puru', "Masikung naurampimang, dii'ke ning besi'merimang teie berete'ke poorurieeng-koo. Dii'ke besi'meria' nkaang taa'ni'anta tasi'peri masika'antamering-koo. <sup>27</sup> Iri' o'dariauka' taamang dera'omaung besi'koo. Teka kavi'erita' besi'eriai temurii' taamang domaang oparavauka'nung. Temurii' dera'barupeu'. Tee taamang ninge, teie Naning-naumpo' Paning-etainge arompiaing, Mma'ke Kumponing tee' nkoama'naang botomuu'nung-koo." <sup>28</sup> Teinge nia'aama aa'pau', "Am-ing nkoampiaing Kumponing bakaang pia siompampii'naang?"

<sup>29</sup> Jiisuu'ke maku'urima aa'puru', "Aung ee'nara tee nko-nko Kumponing maroruri otoing: Tee naning botovuu'nung masika'antaveriaing." <sup>30</sup> Teinge kara maku'aama aa'pau', "Arera taa'ni'anta nkoveaing nii'ke oorampira masika'anta-koo? Aming nkovee'naang?" <sup>31</sup> Diikakatauroi paning-koong taamang naiau' mee'borasirakamaa'koo tee' ee'na' Daari Meekunge minkuvuma aa'pui otoa'na', 'Kumponing paning-eta taamang avuru' naiaava'naang."

<sup>32</sup> Jiisuu'ke maku'urima aa'puru', "Masika' naurampimang, Moosesi deea' tee taamang paninung arurimaung. Mma' ee'nara tee, taamang masikung paning-etaing arurimaung. <sup>33</sup> Tee taamang Kumponing arurimaung tee naning ee'nara paning-eta pora dii' kansinupoong domang-antaruriaing." <sup>34</sup> Ee'noko teinge nia'aama aa'pau', "Ee aung pankaing, tee ee'nara temuriau taamang doong kante ameriaing." <sup>35</sup> Jiisuu'ke aa'puru', "Nka ning ee'nara tee taamang domang-anta-koong. Naning tee ning-anko poaing peeravoauka'nung, ee'noko naning tee ning masika'antamaing nukaa'oauka'nunge.

<sup>36</sup> "Ninge tero naurampiring, aa'dampima, bane dii'ke oomerira masika'antameria'. <sup>37</sup> Ookara nantoong Mma'ke amuko ning-anko poromaing. Ninge ba'ta'aramparupeu' ning-anko poroko. <sup>38</sup> Ning paning-eta simaru' teie botomuio' bakaang pia nkoama'naang, nkaang pia deea'. <sup>39</sup> Tee botomuu'nung bakaang pia aung: teing amuu'ning tare-koo, nii'nung paa'aravaroonaang, ee'noko ookara daa'arampaing doong asi'noo'na'mung. <sup>40</sup> Tee Mma' piavomana' ee': ookara ning-koo Bauring-koo ookaama masika'antamaaving domaang oparavaung nkavaavaing. Ee'noko ninge daa'arampaing doong asi'noo'na'mung."

<sup>41</sup> Teketa tee, teinge Ju'koong ovontunge makenge minkuminkuau', bakaang kara orara tampaama aa'puu'noo'koo, "Ning ee'nara taamang paning-eta

† 5-6 kilomita.

pou'nung." <sup>42</sup> Ee'noko aa'pau', "Aung naning Jiisuu', Josepa' bauring ai' baa? Nii'ke baumararing noru'arampiri otong. Arekee' paning-eta pou'nung tamparamaung?" <sup>43</sup> Jiisuu'ke maku'urima aa'puru', "Dii' oraka' minkuminkururariauka'. <sup>44</sup> Naning otoa' ning-anko baka popeu'nung, Mma'ke ning botomuu'nunge bokuvuaruko. Ee'noko boo'keta daa'antavampaing doong asi'noo'na'mung. <sup>45</sup> Teinge nakaro-nupoonge urikupoonge Daari Meekung-koo ee' daariau', 'Ookara nantoong Kumponing bare-antanii'nuka otoroi otoroing.'

(Aisaia' 54:13)

Ookara Mma' taaravaamaing ee'noko tee-koo noru' nkavaamaing ning-anko poroing. <sup>46</sup> Nka naning Mma' oovuu'nung otoa'. Ninge Kumponing-ankoita mou'nunge narunge Mma' ooantu'.

<sup>47</sup> "Masika' naurampimang, naning tee ning masika'antamuing domaang oparavaung oto'evung. <sup>48</sup> Ning tee taamang domang-anta. <sup>49</sup> Diikakatauroi nii'namurii' taamang mee'bora' sirakamaa'koo na-iaiu'ning, teka teing boorou'. <sup>50</sup> Ee'noko tee aung taamang paning-eta pomaung naning naivura booau-ka'nung. <sup>51</sup> Ning ee'nara domang-anta-koong taamang paning-eta mou'nung. Naning aung taamang naivura doong kante domampari otomatoing, ee'noko tee taamang arompiainung tee nkaang mono, ookara nantoong kansi'nupoong domang-anta-koo."

<sup>52</sup> Tee' minkuvuio' Ju'koong ovontung iiravoroita' bii'ka tata'eema aa'pau', "Arekee' bakaang mono amuripeu' nii'ke maa'koo?" <sup>53</sup> Jiisuu'ke aa'puru', "Masika' naurampimang, dii'ke ning Tee Naning-naumpo' Paning-etaing nkaang mono maa'meriarui dei, nkaang ereng naimeriarui dei, dii' domaang okorurarupeu' dii'ka. <sup>54</sup> Naning tee nkaang mono maa'muaing, nkaang ereng naimuaing domaang oparavauka'nung oto'evuaing, ee'noko boo'keta daa'antavampaing doong asi'noo'na'mung. <sup>55</sup> Aming-koo, nkaang mono tee taamang masikung, nkaang ereng teie nainai masikung. <sup>56</sup> Baa tee nkaang mono maa'uaing ee'noko nkaang ereng naivuaing, ning-koo otoing ee'noko ning tee-koo o'noai. <sup>57</sup> Mma'ke domampari otomaunge botomuio' ning domamari o'nomana' tee' nari' naning tee maa'muaing domamparavaing ning-koo. <sup>58</sup> Aung tee naurampiring taamang paning-eta pou'nung. Tee taamang-pina' deea' diikakatauroi na-iaakotaa' boorou'nung-pina'. Naning tee aung taamang naivuaing doong kante domampari otomatoing." <sup>59</sup> Jiisuu'ke aung kara nauvuru' dootuu'nava-koo Kapaneume'navuntu'koo.

#### Jiisuu' Tee Kara Domaang Oparavaung Okonara

<sup>60</sup> Aung aa' tee, mmau'ke bakaning barevare-nupoonge taaravaara aa'pau', "Tee kara aa'na' manki'. Baie aroo'upeu'?" <sup>61</sup> Ee'noko teing bakaning barevare-nupoong tee' minkuminkuruariko Jiisuu'ke baka noru'urai'nange aa'puru', "Aung kara minkuansing orara-pina' noru'erima tenkenirii'naang? <sup>62</sup> Ee'noko dii'ke ning Tee Naning-naumpo' Paning-etaing toro-

marako nkanoo' tero o'noko'noo' arekee' noru'dari-aing? <sup>63</sup> Tee ee'nara Tanuaang Meekung domaang avu'koong. Naning baka mono narunge Tanuaang Meekung otoaruko domaang masikung nkavuarupeu'. Nka aung kara ninge naurampiring dii'koo makosi tanuaang-koong domaang avu'koo. <sup>64</sup> Ee'noko dii'koo narionge masika'antameria'." Jiisuu'ke tee' minkuvuu' tee tutuntoma-ita noru'uru'nung-koo, aa'ning: teing masika'antavaavauka'ning ee'noko tee naning tooka kom-pui sivuainung tavaava'naang. <sup>65</sup> Ee'noko Jiisuu'ke napo' aa'puru'nung, "Tee'koo ee'na'koo naurampiring naning ning-anko poarupeu' Mma'ke makosi-antavuaruko."

<sup>66</sup> Teketa emu' tee' minkuvuio' bakaning barevare-nupoong-koo mmau' toroariru', siong-koo kasiaavarura. <sup>67</sup> Ee'noko Jiisuu'ke nii' bakaning nanai'keta kenaanka aa'muru', "Ee'noko dii' arekee', si'merii'naang?"

<sup>68</sup> Saimoni' Piitai aa'puu', "Ovoring ee, baa-anko nanampipeu'? Da' narung oto'derung kara domaang oparavauka'nung-koong. <sup>69</sup> Ee'noko nii'ke enang tasi'dampira masika'antaramping, da' Kumponing-etaing Naning Meekung." <sup>70</sup> Jiisuu'ke aa'puru', "Bane ninge marorampiru' nkaning deentarii'naang, teka dii'koong narung ma'naang." <sup>71</sup> Tee'puma Judasi minkuvuko'nung, Saimoni' Kerio'nung bauring. Tee, bane Jiisuu' bakaning nanai'keta kenaanka-koonunge, nka tee Jiisuu' kare-nupoong-koo sivuainung.

#### Jiisuu'ke Paroro Bare-koo Oto'koong Oovuu'naang Nanuu'na'

**7** Teketa tee dama'ke Jiisuu' Kaaleli'namenge nanuko'nung. Judia'namenge nanu'koo pi-avoaruu' Ju'koong ovontunge te' otoroko'ninge tavaava'naang piavoroko. <sup>2</sup> Ju'nupoong biikaang Paroro Bare-koo Oto'koong due'ui'o' Jiisuu' baara'mainkaange aa'pau', "Ameng sipera Judia'nameng-koo naniang dakaning barevare-nupoonge dakaang nko-nko ooaavaina' nkovemaung. <sup>4</sup> Naning kapoo' nkovumaing ookarai oo-koo piavoi baku'uarupeu'. Tee'koo aing kapoo' ookara nkovemaung deeko' sirapo' si'daravaing ookarai ooraara masika'antaraavaina'." <sup>5</sup> Teinge bane baara'mainkaange masika' antavaava' tee'pau'. <sup>6</sup> Ee'noko Jiisuu'ke teing aa'puru', "Nkaang doong mme' makotua'. Ookara doonanka dii'koo makosi. Kapoo' otoa' dii' avo'duripeu'nung. <sup>7</sup> Kansi'nupoonge dii' munte'koo makosi deea', nka ning munte'maa-maung doong kante ninge biikaang aarumo orara sira'pamaung-koo. <sup>8</sup> Berira naniriaing paroro-koo. Ning mme' nanamparoo'naang tee-koo paroro-koo, ai' ning nkaang doong mme' makotua'." <sup>9</sup> Ee'noko tee' nauvurirai'nange tee, Kaaleli'nameng-koo teke otou'.

<sup>10</sup> Teketa baara'mainkaang paroro-koo ureai berioi' Jiisuu'ke dama'keta sira'parava' baku'aritaa' siompuru'. <sup>11</sup> Ee'noko Ju'koong ovontunge besi'aako' tee-koo paroro-koo, aa'paama, "Tee are' otong?" <sup>12</sup> Ee'noko tee karika' iaampeema nii'ninge aa'paako', "Tee naning tampara." Ee'noko nii'ninge aa'paako', "A, teie nantoong tosvurima orari-antavurimaung." <sup>13</sup> Nka baru'

sirapo'ke minkuaavaruko' avoreaitaa' biikaang ovontung-koo.

<sup>14</sup> Ee'noko paroro-koo navaro opario' Jiisuu' dootuu'nava pankava-koo kuung tumparara kara nau tutumpuru'. <sup>15</sup> Ee'noko Ju'koong ovontung ta'ninaama aa'pau', "Kei. Aung naning sikuru'aravuu'nunge arekee' kapoo' avutevu' noru'ui otong?" <sup>16</sup> Jiisuu'ke aa'puru', "Ninge kara naurampimaung ning ninka nkaang deea', Kumponing-eta pomaung, ning boto-muu'nung-eta. <sup>17</sup> Teinge Kumponing bakaang pia nko-koo okovuriainge ning nkaang kara tasi'paavaing Kumponing-etaing deeko' nii'noo' tamung nkaang noru'keta karomaung deeko'. <sup>18</sup> Naning baka bakaang noru'keta karomaung baka daangang piavoma, ee'noko naning tee botovuu'nung bakaang miring pankaing deemparaa'naang piavomaung tee, tee naning koonto', daang minkuvuaung. <sup>19</sup> Moosesie ee boto aruria? Ee'noko dii'koo narung otoa' doma tee boto siompumaung. Aming-koo dii'ke dupisi'merii'naang pi-arorimang?" <sup>20</sup> Ee'noko karingai maku'aama aa'pau', "Da' ma'naang orara-po'nung. Baie da' taruu'naang tantumang?"

<sup>21</sup> Jiisuu'ke maku'urima aa'puru', "Ninge narung nko-nko pankaing nkoanko ta'niniru'. <sup>22</sup> Moosesie naururu' diurukaa'koong dopa' napu'erii'naang. Tee ee'nara aarumo Moosesie koonto' tutumpua', dii' diikakatauroi tutumpau'nung, ee'noko tooto' donkaani-koong dopa' toto'perimaung bane Uaana'mung. <sup>23</sup> Dii'ke tooto'nung dopa' napu'erimaung Doong Uaana'mung Moosesi-ning boto siomperitaa'. Enang aming-koo dii' iirarori-maang ninge naning mono ookutunung taare-antavansio' Doong Uaana'mung-koo? <sup>24</sup> Tamung dauna'keta tuumpimeriaka'. Tampa' mataueri aarumo simpe'eriai."

#### Jiisuu'koo Nia'eema Tata'eu'na'

<sup>25</sup> Nii'ninge Jerusalema'nupoonge aa'pau', "Ee', masika', aung tee ee'nara naning tavaava'naang mau'aa-mang, ape'?" <sup>26</sup> Ooveriaing, aung ee'nara tee sirapo'ke karoko naninge karavua'. Niikaning pankainankai pa tee Kumponing Pako'pari'nii' tasi'pai otong, ai' arekee'? <sup>27</sup> Nka tee Pako'pari'nii' poaina'mung naninge noru'uauka'nung areketa poainge, ee'noko nii'ke noru'ampiri otong aung pou'noo'."

<sup>28</sup> Teketa Jiisuu'ke dootuu'nava pankava-koo kara nauvurima aa'na' karoma aa'puu', "Ee', dii'ke noru'meri otong, ee'noko mou'noo' noru'eri otong. Ning a' ninka moa'. Nka tee ning botomuu'nung tee masikung dii'ke noru'eria'. <sup>29</sup> Teka ninge noru'ansi o'nong tee, teie botomui'o' ning tee-ankoita mou'nung." <sup>30</sup> Ee'noko teinge tee moo'koo kariaama moo'aavaruko'. Naninge tanka' pante'ua' tee-koo, bakaang batei mme' makotuaruko. <sup>31</sup> Ee'noko karingai nantoonge tee masika'antavaama aa'paako', "Tee Kumponing uripo'keta Pako'pari'nii' nii' domamuri taremuriainoo'koo porai'nange arekee' taa'ni'anta nkovuaing aung naning bakaang-koo dau basinoo'? Makotua'."

#### Piatooronanka~ Jiisuu' Dai'koo Kasiaavaruu'na'

<sup>32</sup> Karingai tee' minkuminkuaako teinge Boto Keperuu'navitue taaravau'. Taaravaara tee teinge ee'noko piristi'koong ovontunankai nii'ning Piatooronanka botoaaru' Jiisuu' moo'aava'naang. <sup>33</sup> Jiisuu'ke aa'puru', "Ning dii' ninka oki'noo' mme' o'noriaing, teketa napo' toromaravaing ning botomuu'nung-anko. <sup>34</sup> Dii'ke ning besi'meriaing ee'noko oomeriaka'nung, ai' ning o'noainoo' dii' beriarupeu'." <sup>35</sup> Ju'koong ovontunge bii'ka kareama aa'pau', "Are' nanuko nii'ke ooampiau-ka'nung? Ai' Kiriki'nupoong biikanameensi'aape nanuu'naang nii'koong nii'ning ninka otoroo'naang, ee'noko teing akopo'nupoong Kiriki'nupoong kara nauvurii'naang dee'ma. <sup>36</sup> Teie aa'muring, 'Dii'ke ning besi'meriaing ee'noko oomeriaka'nung.' Ee'noko napo' aa'muri, 'Dii' beriarupeu' ning o'noainoo'.' Tee miru'noo' aming tee' minkuvuing?"

#### Jiisuu' Ntonari Domaang-po'nari Tamparama Daankiaru'na'

<sup>37</sup> Paroro-koong asirana'mung bakei aa'na' mee-ka'na'mung. Te'mung ee'na'mung Jiisuu'ke donkonura aa'na' karoma aa'puru', "Dii'koong naning tee nukaa'doma ning-anko pora naikiaing. <sup>38</sup> Daari Meekung-koo daariari otoa' aa'pumana', 'Naning tee ning masika'antamuraung ntonari domaang-po'nari tumsi-eta koo'uaing.'"

*(Aisaia 58:11; Sekaraia 14:8)*

<sup>39</sup> Jiisuu'ke tee' minkuvuu' Tanuaang Meekung minkuvuma. Tee ee'nara Tanuaang Meekung teinge Jiisuu' masika'antavaako'ninge due'ka nkavaava'naang. Te'mung ee'na'mung tee' minkuvuko Kumponing Tanuaang Meekung avuria', Jiisuu' meenasi-koo mme' daa'aravaruko.

#### Nantoong Turampeeko'na' Jiisuu' Taaravaara

<sup>40</sup> Jiisuu'ke tee'puio' mmuu' nantoonge karika'ke otoroko'ninge taaravaara aa'pau', "Aung naning masika' tee ee'nara nakaronung Kumponing-etaing."

<sup>41</sup> Ee'noko napo' nii'narionge aa'pau', "A, tee Pako'pari'nii' Kaaleli'keta poauka'nung. <sup>42</sup> Daari Meekunge ee' minkuvumaang: Tee Pako'pari'nii' Deevita' bakanamuiaang-koo tavo'kuang, ee'noko Beeteleema'navuntu'koo ponto'aravaing, te' ee'noo' osi Deevita' otoko'navuntu'koo." <sup>43</sup> Teketa tee, ookara teing nantoong paroro-koo poru'ning pokapoka'ariru' Jiisuu'nung minkunaa tata'eema. <sup>44</sup> Nii'ninge moo'aara dai'aava'naang piavorou', nka naninge birenge kom-pua'.

#### Ju'nupoong Biikaning Pankainankai Masika'antavaavaruko'na'

<sup>45</sup> Teketa tee Piatooronuka toroariru' piristi'koong ovontung-anko Boto Keperuu'navitu-anko. Toroariko nia'arima aa'paaru', "Aming-koo dii'ke tee bokueri poria'?" <sup>46</sup> Ee'noko piatooronukai kara maku'arima

aa'paaru', "Naning tee' karoaung tee karomana'." <sup>47</sup> Ee'noko teinge Boto Keperuu'nukai maku'arima aa'paaru', "Dii' ee napo' teie papaara-antarurining? <sup>48</sup> Nii' nantoong pankainanka-koo ee'noko Boto Keperuu'navitu-koo naninge baitoaring tee-koo? Otoa'. <sup>49</sup> Teka aing karika' Moosesi-nung boto noru'aava' Jiisuu' siompaama barakosi'nii' otorong." <sup>50</sup> Nikodemasi teing-koong narung otoko, tee ee'nara tero Jiisuu' beero'uu'nung. Enang teie aa'puru', <sup>51</sup> "Niikaange botoi taura'muria' naning boo'koo tang-koo tutung kara bakaang taaravampia' ee'noko noru'ampia' aming kapoo' nkovuing." <sup>52</sup> Ee'noko teinge maku'aama aa'pau', "Ekee, da' doma Kaaleli'nung! Daari Meekung tampa' deerueaing noru'eaina' nakaro-nupoong poroaung Kaaleli'keta." <sup>53</sup> Teketa ookara biikanoo' tenkenau', ee'noko Jiisuu' iu'koo nanuu' Olive'po'namii-koo.

### Manikuma Nampeesi Orarivuu'nani

**8** Ee'noko maatanang tero mme' tane'puko Jiisuu' napo' Olive'po'namii-eta dootuu'nava pankava-koo toroaru'. <sup>2</sup> Ee'noko mmäu' karinga tee-anko oosiaririo' tee ba'namparara kara nau tutumpuru'. <sup>3</sup> Enang tee boto naunuka ee'noko Boto Keperuu'navitue nani manikuma tavo'au' tee-anko. Teinge teni nampeesi orarivuo' ooaarai'nange tavo'au'. Ee'noko teinge teni donkong-antavau' uro'kanoo' teing-koo ookara-koo. <sup>4</sup> Ee'noko teinge aa'pau' Jiisuu', "Nau-anta, ani nampeesi orarivuo' ooampiring. <sup>5</sup> Moosesi-nung Boto-koong daarie ee' minkuvumaang, 'Nani tee' nkoaravainani kapange tavampiai nang booaing.'

(Boontu 20:10)

Ee'noko dake arekee' minkuemaang?" <sup>6</sup> Aavavaama tee'pau', tuumpiaavainoo' dau'paava'naang, teka Jiisuu' kinkinuitaa' kansikoo daarikuko' tanka'ke.

<sup>7</sup> Donkonai mmäu' niania' nia'aako', ee'noko nia'aamatoko Jiisuu' kinkinuu'noo'keta koomparara aa'puru', "Dii'koong naninge tero orara aarumo nkovuaruu'nunge tutuna'nare'ke kapanare'ke ani too'puai." <sup>8</sup> Tee' minkuvurai'nange napo' kinkinura kansikoo daarikuko'.

<sup>9</sup> Ee'noko biikang domang tee' too'purio' tee tenkenau' teing-koo pankeu'ke tutumpaara naruna' naruna'. Ee'noko Jiisuu' narung sipau', ee'noko teni manikuma te' donkonuio'.

<sup>10</sup> Ee'noko Jiisuu'ke napo' koomparara aa'puu', "Ee ani, teing are'ke berong? Naning ee otoa' da' tuutunantuing?" <sup>11</sup> Tenie aa'puu', "Ee', pankaing, otoa'." Jiisuu'ke aa'puu', "Nna' ninge da' tuutunantamparoo'naang. Bera naniaing. Ee'noko napo' orara aarumo nkoveauka'."

### Jiisuu' Ookara Nantoong Siraka'antanung

<sup>12</sup> Jiisuu'ke napo' aa'puru', "Ning tee araka ookara kansikoo. Naning tee ning siomuaing mutaanano'ke nanuauka'nung, domaang isikung kompuinge ookara ootoo' siraka'antavuiio'." <sup>13</sup> Boto Keperuu'nukai

aa'pau', "Da' daka minkuema tantaramaang, tee'koo nau'ka masika'antarampiauka'nung."

<sup>14</sup> Jiisuu'ke maku'urima aa'puru', "A, bane ninge ninka kara minkuama tammaramaunge, kapoo' minkuamaung masakung. Aming-koo, nna' ninge noru'ansi o'nong ning mou'noo' ee'noko ning memaatomanoo'. Dii'ke ning noru'meria' mou'noo' ee'noko are' ning memaatomanoo'. <sup>15</sup> Dii'ke ning simpe'merima kansi'koong aarumo narung siomperimaung. Ninge naning simpe'ampa' o'nong. <sup>16</sup> Nka ninge simpe'dampiri dei nkaang kara masakung deempapeu'. Ning ninka o'noi nkoampa', tee'koo Mma', ning botomuu'nung ni'ninka otomaung-koo. <sup>17</sup> Diikaang boto-koo ee' otong, 'Kenaankarai nari' karorema kara sira'pureko noru'eripeu' tee tee masakung kara.'

(Boto 17:6; 19:15)

<sup>18</sup> Ninge ninka kara minkuama tammaramaung ee'noko napo' Mma'ke botomuu'nunge kara tee' napo' siong-antamemumaunge."

<sup>19</sup> Teinge aa'pau', "Dauma are' otong?" Ee'noko Jiisuu'ke maku'urima aa'puru', "Dii'ke aa' ning noru'meria', Mma' noru'eria'. Dii'ke ning noru'meri dei, Mma' napo' noru'eripeu'."

<sup>20</sup> Jiisuu'ke aung kara ookara dootuu'nava pankava-koo nauvuru' mooni' bauta'koong sipaako'navaro-koo. Ee'noko naninge Jiisuu' kiimata-nava-koo sipuaruu' bakaang bateinang mme' makotuaruko.

### Jiisuu'ke Aa'puru'na': Dii' Naniriarupeu' Ning Nanampainoo'.

<sup>21</sup> Teketa Jiisuu'ke napo' aa'puru', "Ning nanampaing ee'noko nananko dii'ke ning besi'meriaing, ee'noko dii' dooriaing diikaning oeng aarumo ninka. Dii' naniriarupeu' ning nanamatomanoo'."

<sup>22</sup> Ju'koong ovontunge aa'pau', "Aunge aa'pumaang, 'Dii' naniriarupeu' ning nanampainoo'.' Kara-koong miru'noo' ee' oro': tee baka tavaraa'naang dee'ma."

<sup>23</sup> Jiisuu'ke kara maku'urima aa'puru', "Dii' paning-koo boong-nupoong ee'noko ning paning-nung. Dii' kansinupoong ee'noko ning kansinung deea'.

<sup>24</sup> Tee'koo naurampiring dii' diikaning oeng aarumo ninka dooriaing. Ee', masika', dii'ke ning ee'nara naning tammaramaung masika'antameriarura deeko' dii' oeng aarumo ninka dooriaing."

<sup>25</sup> Teinge nia'aama aa'pau', "Naumeriaing, da' teing-koo pankenuka poroainng-koo Daari Meekunge minkuvurimaing-koo baa ee'nung?" <sup>†</sup> Jiisuu'ke maku'urima aa'puru', "Ning ee'nara dii' teroita naurampiru' tutumparu'noo'keta. <sup>26</sup> Ninge amutemurii' kapoo' minkuamira diikaang orara aarumo sira'pampeu'. Nka tee naning ning botomuu'nung bakaang aarumo bakei koonto' masakung, orara aarumo otoaunge. Teie naumumana' nari' minkuamaung."

<sup>27</sup> Jiisuu'ke Bauma-koong kara minkuvuko noru'aavaruio' teie napo' aa'puru', <sup>28</sup> "Dii'ke ning Tee Naning-naumpo' Paning-etaing intamerirai'nange

† Ooveai Jooni 1:21-25.

dii'ke noru'meriaing ning ee'nara baa. Tenang dii'ke noru'meriaing ninge kapoo' nkoampaung maroita, ninge kapoo' minkuamaing Mma'ke naumumaing naing. <sup>29</sup> Ee'noko tee botomuu'nung ni'ninka nari' o'noremaung. Ning si'muaung ninka, ninge doong kante kapoo'nanka dotu-antavumaung nkoamaing-koo." <sup>30</sup> Ee'noko tee' minkuvuko mmau'ke Jiisuu' masika'antavau'.

#### Eebaraami' Baurukaa' Ee'noko Sietani' Baurukaa'

<sup>31</sup> Ee'noko Jiisuu'ke teing Ju'nupoong masika'antavau'ning aa'puru', "Dii' nkaang kara nari' pinka'erimatoaing deeko' dii' nkaning barevare-nupoong masikeng otoriaing. <sup>32</sup> Ee'noko Kumponing bakaang kara masika'pari o'toina' noru'eriko teie karai masikai simpiri'antaruriaing dai'dariri otorimano'o'keta."

<sup>33</sup> Teinge maku'aama aa'pau', "Nii' teing Eebaraami' ba'dompenku. Naninge teroita dai'murira bakaning botovoto-koo-nupoong deeng-antamuriaruko'. Enang arekee' tee' minkumerimang dai'mariri o'norimano'o'keta simpiri'antamarii'naang?"

<sup>34</sup> Jiisuu'ke aa'puru', "Masika' naurampimang, nantoo'ng teing oreng aarumo nkoaamaing botovotonaa'nupoong ee'ning, orara aarumoi dai'uri botovurimaing. <sup>35</sup> Naning botovotonaa' tee tamung tankinumaung, teka teing osikaiaang biurukaa' teing te' nari' otoroi otoromaing. <sup>36</sup> Tee'koo ninge Pankaing Bauringe botovoto-koong o'tooto'keta simpiri'antarampiaing deeko', bakei tampa' simpiri'dariri otoriaing! <sup>37</sup> Ninge dii' noru'dampiri o'nong dii' Eebaraami' ba'dompenku, ee'noko dii' ning tavu'koo piarorimaung nkaang kara taaraveriaruma. <sup>38</sup> Ninge kara minkuamaung Mma'ke naumumana', ee'noko dii'ke nkoverimaung diumai naururimana'."

<sup>39</sup> Teinge maku'aama aa'pau', "Niuma Eebaraami'." Jiisuu'ke maku'urima aa'puru', "A, dii' masika' Eebaraami' baurukaa' dei tee' nari' nkovuko'na' nkoveripeu'. <sup>40</sup> Eebaraami'ke temurii' kapoo' nkovuaruu'. <sup>41</sup> Dii'ke tee kapoo' diumai nkovuko'na' nkoverimang."

Ee'noko teinge maku'aama aa'pau', "Nii' aa' auning-koonanka deea'. Nii'ke Niuma narung otong. Kumponing ee'nara." <sup>42</sup> Jiisuu'ke aa'puru', "Kumponing diuma masikung dei dii'ke ning navumeripeu', ning aa' Kumponing-ankoita mou'nung-koo. Ning maroita ninka moa', teie botomuu'nung. <sup>43</sup> Arekee' dii'ke noru'eria' otong kapoo' minkuamaa'nomaung? Dii'ke kara naurampimaung koonto' taara-koo piaroria'. <sup>44</sup> Dii' koonto' Sietani' baurukaa' ee'noko tee diuma, ee'noko diuma piavomana' siong-koo piarorimaung. Tutuntoma-ita dupisi' nkovuko'. Kara masikung siompuaung. Kara masikung-koo oki'noo' okovuaunge. Tee tosi-bauko, ookara tosi-koo okora'. Bakaang aarumo narung siompuma tosi nkovumaung. <sup>45</sup> Kara masikung naurampimang, tee'koo dii'ke masika'antameria' o'nong.

<sup>46</sup> Dii'koo baie ninge orara aarumo nkoantu'nung minkuvupeu'? Ee'noko ninge masika' naurampiko dii'ke aming-koo ning masika'antameria' o'nong?

<sup>47</sup> Naning Kumponing-eta pou'nung Kumponing

bakaang kara taaravumaung, ee'noko dii' Kumponing-ankoita poria'. Tee'koo dii'ke ning taarameria'."

#### Jiisuu' Tee Eebaraami'koo Dau Basi, Ju' Biikaang Okoa'koo

<sup>48</sup> Teketa Ju'koong ovontunge karai maku'au' Jiisuu'. Aa'pau', "Bakei tampa' minkuampiring, da' Same-ria'nung, ee'noko da' ma'naang-po'nung." <sup>49</sup> Jiisuu'ke maku'urima aa'puru', "A, ning ma'naang o'noaung. Ninge Mma' daangampamaung ee'noko dii'ke ning daang-antamerimaung. <sup>50</sup> Ninge daangang ninka-koo besi'ampa', teeo Mma'ke tee' nkovumaung ninge daangang kong-koo, ee'noko teie simpe'muriaing. <sup>51</sup> Masika' naurampimang, naning tee nkaang kara siompumaung booauka'nung."

<sup>52</sup> Ju'koong ovontunge Jiisuu' aa'pau', "Enang koonto' noru'dampiring da' ma'naang-po'nung. Eebaraami' boo'paru', ee'noko Kumponing bakaning nakarounupoong boo'pariru'nunge, ee'noko aa'merimang, 'Naning ning nkaang kara taaravuaing booauka'nung.' <sup>53</sup> Niuma Eebaraami' boo'paru', ai' Eebaraami'koo dau basi tantaramaunge ee? Ee'noko nakarounupoong boorou'. Ee'noko baa tantaramaung?" <sup>54</sup> Jiisuu'ke maku'urima aa'puru', "Ning ninka daangamari dei, nkaang daangang tamunsi'nung. Tee daangamu-maung Mma'ke ee'narai, nkaang meenasi naururima. Tee ee'nara dii'ke diikaang Kumponing tamperimaung.

<sup>55</sup> Dii'ke teroita noru'eriaruu', ee'noko ninge noru'ansi o'nong. Ee'noko ninge aa'pamira, 'Ninge noru'ampa', ning tosimarapeu' dii'pina'. Nka masika' ninge tee noru'ansi o'nong, ee'noko bakaang kara siompamaunge. <sup>56</sup> Diuma Eebaraami' dotuaru' nkaang doong oovuu'naang noru'uitaa'. Teie oovuu' ee'noko oovurai'nange doturotuaru'."

<sup>57</sup> Ee'noko Ju'koong ovontunge Jiisuu' aa'pau'. "Da' mme' pa'noko' kivora masiraani oto'derua', arekee' Eebaraami', teronung masikung ooveu' ee?" <sup>58</sup> Jiisuu'ke maku'urima aa'puru', "Masika' naurampimang, tero Eebaraami' mme' ponto'aravaruko ning o'noi o'nomaung † o'noko'nung."

<sup>59</sup> Tee' minkuvuio' tee kapananka ukua' tee too'paa-va'naang, teka Jiisuu' baku'arara tenkenuu' dootuu'na-va pankava-ita.

#### Jiisuu'ke Oo-antavuu'na' Naning Duta Mutuu Ponto'aru'nung

**9** Aung aa' tee, Jiisuu'ke nanuma naning oovuu' duta mutuu ponto'aru'nung. <sup>2</sup> Nii'ke bakaning barevare-nupoonge nia'ampima aa'pampiru', "Nau-anta Pankaing ee, baie orara aarumo nkovuo' aung duta mutuu ponto'aru'nung? Baka ai' baumararinge?" <sup>3</sup> Jiisuu'ke maku'murima aa'muru', "Bakaang mutuu bakaang aarumo-koong deea'; baumararing beekaang aarumo-koong deea'. Tee mutuu otomaung Kumponing bakaang iri' sira'antavuu'naang tee-koo

† Tee kara "O'noi O'nomaung" tee Kumponing bakaang miring-pina' taara Ju' biikana'koo. Ooveai Pupu' 4:26; Toro 3:6; Mat 22:32.

naning-koo. <sup>4</sup> Nii'ke nau'ka ning botomuu'nung bakaang nko-nko nkoampiang doong tankinuaruko. Muumurii'naang. Naning mintoomparavarupeu' muunganang. <sup>5</sup> Ning kansi'koo o'noi ning kansi'nupoong araka-antanung."

<sup>6</sup> Tee' minkuvurai'nange Jiisuu' kansi'koo tutupaa'kura tutupaa'ke meto' nkovura duta sisi'uu', ee'noko aa'puu', <sup>7</sup> "Bera duu'daravaing poonaru'koo Siloam tampampimanaru'koo." Aung Siloam miru'noo' "Botonisi'". Ee'noko tee naning nanurai'nange duu'parara ookuitaa' toroarua'.

<sup>8</sup> Ee'noko ba'marange ee'noko teinge tero tee ooaako'ninge ba'nampari mooni' eentavuriko, aa'pau', "Aung ee tee deea' ba'nampari mooni' eentavuriko'nung?" <sup>9</sup> Narionge aa'pau', "Ee', tee ee'nara." Nii'ninge aa'pau', "A, tee deea'. Tee tee-pina' oro'." Ee'noko tee baka aa'puru', "Ning ee'nara." <sup>10</sup> Aa'pau', "Nka dakaang duta arekee' banteing?" <sup>11</sup> Teie maku'urima aa'puru', "Teie naninge miring Jiisuu'ke meto' nkovura nkaang duta-koo si'muing. Si'mura naumuma aa'muing, 'Siloam-aape nanira duu'daravaing.' Ee'noko nanamira duu'marara namu'ke ookansing." <sup>12</sup> Ee'noko teinge nia'aama aa'pau', "Are' otong tee ee'nara?" Ee'noko teie maku'urima aa'puru', "Noru'ampaung."

#### Boto Keperuu'navitue Duta Bantou'noo'koong Oko-ra'noo' Besi'au'na'

<sup>13</sup> Tee'puriko tee, teinge nkavau' Boto Keperuu'navitu-anko tee naning. <sup>14</sup> Te'mung ee'na'mung Jiisuu'ke meto' nkovura naning mutuu oo-antavuu'na'mung Doong Uaana'mung. <sup>15</sup> Ee'noko teing Boto Keperuu'nukai napo' tee tana'aama aa'pau', "Arekee' nkorura tamaru'antaruinge?" Ee'noko teie nauvurima aa'puru', "Teie aa' kansi'koong meto' nkovura duta-koo si'muio' oing duu'marara tampa' ookansing."

<sup>16</sup> Ee'noko Boto Keperuu'navitu-koonarioonge aa'pau', "Tee naning temurii' nkovuinung Kumponing-etaing deea', ai' Doong Uaana'mung tampa' tarevua' tee' nkovuing." Ee'noko nii'narionge aa'pau', "Arekee' orara aarumo nkovumaunge temurii' taa'ni'anta iirakuta nkovupeu'?" Ee'noko teie karai pokapoka'antavuru'.

<sup>17</sup> Teketa tee Boto Keperuu'nukai napo' nia'aama aa'pau', "Teie oo-antaruing deentarako nia'dampimang: Dake tee are'pepeu'?" Teie aa'puru', "Tee aa' nakaronung." <sup>18</sup> Nka tee, tee naning enang ookuu'nung tero naning mutuu ponto'aru'nung Ju'koong ovontunge masika'antavaavaruko' bera baumararing bokuaaretu'. <sup>19</sup> Ee'noko teinge aa'paaretu', "Aung ee dee'ke deuring? Aung ee tee duta mutuu ponto'aru'nung tamperemaung? Nka arekee' nkoarara enang ookuing?" <sup>20</sup> Baumararinge maku'urema aa'puretu', "Nee'ke noru'ampesi otong tee neuring ee'nara duta mutuu ponto'aru'nung. <sup>21</sup> Ee'noko nee'ke noru'ampea' arekee' nkoarara enang ookuinge. Ee'noko napo' noru'ampea' baie duta oo-antavuinge. Teie baka naururipeu', tee matarama." <sup>22</sup> Baumararinge tee' minkuvuretu' tero ee' mau'aario': Naninge Jiisuu' tee Pako'pari'nii' tampuaing deeko' ba-

ta'avaing dootuu'nava-ita. <sup>23</sup> Tee'koo ee'na'koo tee' baumararinge aa'puretu', "Nia'eriaing, baka naururipeu', tee matarama."

<sup>24</sup> Ee'noko napo' kemu'kana' bokuaara tee ee'nara naning mutuu ponto'aru'nung aa'pau', "Bameriaing Kumponing taararui' kara masikung narung naumeriaing. Nii'ke noru'ampiri otong tee naning orara aarumo nkovumaung."

<sup>25</sup> Ee'noko teie naninge maku'urima aa'puru', "Tee orara aarumo nkovumaung ai' tampara, ning noru'ampa'. Narung kapoo' noru'ansi o'nong, ning tero mutuu ee'noko enang ning tampa' ookamaang."

<sup>26</sup> Teinge nia'aama aa'pau', "Aming kapoo' nkovuinge da'koo? Arekee' dakaang duta oo-antaruinge?" <sup>27</sup> Teie maku'urima aa'puru', "Tero naurampiko ee'noko dii'ke ee taameria'?' Aming-koo napo' taara-koo piarorina'ng? Ai' dii' bakaning barevare-nupoong deentarii'naang piarorimang?"

<sup>28</sup> Teinge barakosi'aama aa'pau', "Da' ee'nara bakaning-koong. Nii' teing Moosesi bakaning barevare-nupoong. <sup>29</sup> Nii'ke noru'ampiri otong Kumponing Moosesi karavuko'na', ee'noko aung naning noru'ampia' are' pou'noo'."

<sup>30</sup> Ee'noko teie naninge maku'urima aa'puru', "Akokamurii' kara minkuering doma. Dii'ke noru'eria' areketa pou', nka ee'nara ning tamaru'antamuing duta.

<sup>31</sup> Nii'ke noru'ampiri otong Kumponing orara aarumo nkoaamaing taaravuriaung, ee'noko teing nantoong masika'antavaamaing ee'noko marovurimana' nkoaamaing taaravurimaung. <sup>32</sup> Kansi' pupu'aru'noo'keta minkunaa otoa' naning duta mutuu ponto'aru'nung oo-antavuu'nung-koong. <sup>33</sup> Aung naning Kumponing-eta poarui dei kapoo' nkovuarupeu' bakei."

<sup>34</sup> Teinge kara maku'aama aa'pau', "Dii'daang orara aarumo-koo kuunge otori oraka' ponto'daru'nung da'. Arekee' nii' tautau-koo piaromaang?" Ee'noko dootuu'nava pankava-ita bata'au'.

#### Naning Mutuu-pina' Onou Mutaanamparapeu'na'

<sup>35</sup> Jiisuu'ke tee taaravura dootuu'nava-ita bata'aio' besiu'uu', ee'noko besi'ukotaa' oovura aa'puu', "Dake ee tee Naning-naumpo' Paning-etaing masika'antavemang?" <sup>36</sup> Ee'noko teie aa'puu', "Ee pankaing, naumeaing masika'antavampaina'."

<sup>37</sup> Jiisuu'ke aa'puu', "Tee aa' dake tero ooveing ee'noko tee ee'nara naning enang kareremaang."

<sup>38</sup> Teie naninge maku'uma aa'puu', "Ovoring ee, masika'antaransing." Tee'pura kinkinuu' Jiisuu'anko, pankaing-antavuma.

<sup>39</sup> Jiisuu'ke aa'puu', "Ning kansi'koo ee' simpe'koo mou'nung: mutuunanka bantang-anta-koo ee'noko teing banteai otoroining tamarimaing kaputu'antakoo."

<sup>40</sup> Tee'puio' enang Boto Keperuu'navitu-koo-narionge Jiisuu' ninka otoroko'ninge taaravaara nia'aama aa'pau', "Dake arekee' minkuemaang? Nii' mutuunanka ee?" <sup>41</sup> Jiisuu'ke maku'urima aa'puru', "Dii' mutuu sira'rariri tantariko dei tuumpi dii'koo otoarupeu'. Nka



ee'noko 'Nii' ookirining!' tantariko enang tuumpi dii'koo mme' otong."

### Jiisuu' Tee Sipisipi' Tarenara Tampara Makosi Tamparu'na'

**10** "Masika' naurampimang, naning tee karanaange tumparavarura sipisipi' biikaang-koo parang-koo nii'noo'ke tumparapeu'nung tee ee'nara naning bakisipung, tatusi' bauko. <sup>2</sup> Ee'noko tee naning tee karanaange tumparamaung parang-koo sipisipi' biikaang-koo tee ee'nara sipisipi' okovenung. <sup>3</sup> Ee'noko okovenung poko teie naning karanaang tarevumaunge ku'nung bere'evumaung. Ee'noko sipisipi'nankai okovenung bakaang kara tasi'paamaung bakaning bokuvuriko sipisipi'koong mirinanka, barampurima dama'du-aape. <sup>4</sup> Ee'noko dama'du sipurima teing-koo uro'ke nanumaung. Ee'noko bakaning sipisipi'ke siompaamaung, bakaang kara tasi'pai.

<sup>5</sup> Nii'nung naning teinge siompaavarupeu'. Nii'nung-ancoita koo'aripeu' bakaang kara tasi'paavarura."

<sup>6</sup> Jiisuu'ke aung kara mirumiru' nauvuru' Boto Keperuu'nuka, ee'noko teinge noru'aavaruu' tee kapoo' minkuvuko'nung. <sup>7</sup> Tee'koo napo' Jiisuu'ke nauvurima aa'puru', "Masika' naurampimang, ning ee'nara karanaang sipisipi' biikaang parang-koong. <sup>8</sup> Ookara tero porou'ning karanaang tamparima bakisipunanka ee'noko tatusi' baukonanka. Sipisipi'nankai taaravaari-aru' teing. <sup>9</sup> Nka tee, ning ee'nara karanaang parang-koong. Baa tee ning-anko pora tumparavainung domang moo'aravaing. Napo' teie tumparama ee'noko siarama taamang oovumatoaing. <sup>10</sup> Bakisipunanka poromaung bakiaa'aarii'naang, tavaarii'naang, kera'paarii'naang. Ee'noko ning mou'nung domaang oto'evurii'naang, domaang tampa' otoi-oto'ke maanto'nisi.

<sup>11</sup> Ning tampara tarenara. Tampara tarenara bakaning-koo sipisipi'koo boo'parapeu'nung makosi.

<sup>12</sup> Ee'noko tee naning moo' nka-koo tanata nkovumaung tampara tarenara deea' ee'noko sipisipi' okovenung deea'. Teie nkau poko oovuma sipisipi' sipurima koo'aramaung. Ee'noko nkau poma sipisipi'nanka tavuriko purarinka'arimaung. <sup>13</sup> Naning moo'koo tanata nkovumaung koo'aramaung moo'koo narung-koo tanatavumaung deempama. Sipisipi'nanka-koo tara'oaunge. <sup>14</sup> Ning tee tampara tarenara; <sup>15</sup> Mma'ke tasi'mui o'noina' ee'noko ninge Mma' tasi'pansi o'nong, tee' nari' ninge tasi'paransi o'nong nkaning sipisipi'nanka ee'noko teinge tasi'mai o'nong. Teing-koo ning moompaing makosi. <sup>16</sup> Ee'noko nii'ning sipisipi' oto'memung aung-koo parang-koo kuung otoroaing. Teing siomparamira bokuaranko naro' otoi nkaang kara taaramaako ning biikaang tarenara narung o'noai.

† Sipisipi'nanka muunga parang-koo kuung tumparimaung tampa' uaavoroo'naang nkau poarupeu'noo', ee'noko doonganang parang-eta siarimaung para' maa'koo. Biikaang tarenara ookamentakoo tanatavurimaung tee siompaako.

<sup>17</sup> "Ning Mma'ke ning piaamumaung tee ninge nakaang domaang sipampaing-koo; ee'noko napo' nkavampai. <sup>18</sup> Nantoonge nkaang domaang pari'maavauka'nung. Ninge ninka maroita sipampaing. Ning iri' oto'memung nkaang domaang sipampeu'nung-koo, ee'noko napo' iri' oto'memung ninge napo' domaang nkavampeu'nung-koo. Mma'ke tee' nko-koo botomuu'."

<sup>19</sup> Aung aa' tee napo' Ju'koong ovontung pokapoka'ariru' teing kara taaravaara. <sup>20</sup> Mmau'ke teing-koo narionge aa'paako', "Aung-koo ma'naang orara otong. Kanu'aramang. Taaraveriuka'nung." <sup>21</sup> Ee'noko napo' nii'narionge napo' aa'paako', "Naning ma'naang orarapo'nung tee' karoarupeu'. Ee'noko naning ma'naang orarapo'nung arekee' naning duta mutuu tamparu'antavupeu'?"

### Ju'koong Ovontunge Jiisuu' Too'dempau'na'

<sup>22</sup> Nii'na'mung Jerusalema'navuntu'koo doong meekung tavo'kuu', te'mung ee'na'mung dootuu'nava pankava bere'au'na'mung-koong paroro nkoaako'na'mung. Tenang kamaari bakanang.

<sup>23</sup> Te'mung ee'na'mung Jiisuu' nanu'nanuu' dootuu'nava pankava-koo bansing-navaro-koo miring Solomoni'navaro-koo. <sup>24</sup> Ee'noko Ju'koong ovontunge teka koroai aa'pau', "Dake nii' are' basinoo' papaara-antamerii'naang? Koonto' sira'dari naumeriaing. Da' ee tee Domang-anta Pako'pari'nii' tavo'aravaing-koong?"

<sup>25</sup> Jiisuu'ke maku'urima aa'puru', "Tero naurampiru', teka dii'ke ning masika'antameria'. Teing nko-nkonanka Mma'ke botomuio' nkoamaa'nomaing teing taa'ni'antananka ning-koo. <sup>26</sup> Dii' nkaning sipisipi'nanka deea', tee'koo dii'ke ning masika'antameriaung.

<sup>27</sup> Nkaning sipisipi'nankai nkaang kara taaravaamaung, ninge noru'aransi o'nong, ee'noko teinge ning siomaamaung. <sup>28</sup> Domaang oparavauka'nung avoromaung, ee'noko teing booroauka'nunge, ee'noko naning tatusi'uriauka'nunge nkaang bireng-eta.

<sup>29</sup> Mma'ke ookara-koo dau basie teing amuu'. Naning tatusi'urarupeu' Mma'keta, bakaang bireng-eta.

<sup>30</sup> Mma' ee'noko ning narung."

<sup>31</sup> Ee'noko Ju'koong ovontunge napo' kapang ukau' tee too'paava'naang. <sup>32</sup> Teka Jiisuu'ke aa'puru', "Dii'ke oomerio' nko-nkonanka tamparananka nkoamaung Mma'ke pakumuio'. Teing-koo orara arera nkoansing-koo kapange too'merii'naang piarorimang?"

<sup>33</sup> Ju'koong ovontunge napo' Jiisuu' maku'aama aa'pau', "Nii'ke da' kapang na'naang-koo piamoria' dakaang nko-nko tampara-koo, nka dake Kumponing akapeu'emaung-koo, da' tamunsi'nung naning daka Kumponing tantaramaung-koo." <sup>34</sup> Jiisuu'ke maku'urima aa'puru', "Tee aa' diikaang-koo boto-koo nane'koo ee' daariari otong, Kumponing tero-nupoong-kooning pankainuka aa'puru', 'Dii' teing kumponinanka.'

(Kena 82:6)

<sup>35</sup> Tee kara tee Daari Meekung-koong, dii'ke tonta'koo makosi deea'. Ee'noko teie teing bakaang kara taar-

avaama pare'aako'ning kumponinanka tang-koo makosi deeko' ning tee Baumai meeka'antamura a' kansi'koo moo'naang botomuu'nung dau basina' makosi tee miring nka-koo; <sup>36</sup> Tee'koo arekee'koo ninge Kumponing akapeu'amaa'nomaung tammeri-maunge ning Kumponing Bauring tammarako? <sup>37</sup> Makosi, masika'antameriaka'nung ninge Mma' bakaang nko-nko nkoamparuko dei. <sup>38</sup> Nka bane dii'ke nau-antampiko tamung masika'antameriaung, teing nko-nkonanka nkoamaing Kumponing bakaning tasi'peri masika'antaveriaing, koonto' noru'meriaina' Mma' ning-koo otong ee'noko ning Mma'koo o'nong." <sup>39</sup> Ee'noko teketa napo' Ju'koong ovontunge moo'aa-va'naang mau'au', teka teing divu'uri tenkenuu'. <sup>40</sup> Ee'noko Jiisuu' napo' toroaruru' Joo'dani-nari tankimpui Joonie tero nantoong ntong-koo minkivurima mee-ka'antavuriko'noo'aape. Ee'noko Jiisuu' te' otou'. <sup>41</sup> Mmau' nantoong tee-anko poroma aa'pau', "Joonie ta'nimpaarii'na' taa'ni'anta nkovuaruu', teka ookara kapoo' aung naning-koo minkuvuu'nung kara masikung." <sup>42</sup> Ee'noko mmau' nantoonge te' otoroko'ninge Jiisuu' masika'antavau'.

### Jiisuu' Jerusalema'aape Nanuko Ovontunge Tee Dupisi'koo Piavorou'na'

(11:1-12:50)

#### Lasarusi Boo'paru'na'

**11** Nii'na'mung tee, naning Lasarusi tam-paako'nung, Beetani-navuntu'koo otoko'nung si-ipavou'. Te' ee'noo' Beetani Maaria-namainta otoreko'noo' Maata'. <sup>2</sup> Teni ee'nani Meeri' Jiisuu'koo tampa' nuuraa' kau'koo duuni dakovuu'nani ee'noko napo' dapoi piu'uu' aa'nani. Lasarusi teni ba'mari si-ipavou'nung. <sup>3</sup> Ee'noko ba'mari-kaarai Jiisuu'anko kara nanu'antavurema aa'puretu', "Ovoring, tee da'maiko' siipavomang." <sup>4</sup> Jiisuu'ke taaravurai'nange aa'puru', "Lasarusi si-ipavomang, nka booauka'nung. Siipa tavo'aringe Kumponing-nung meenasi tavo'antavuu'naang. Ee'noko aung siipa kompui Kumponing ning Bauring meenasi amuu'naang." <sup>5</sup> Maata'namaia' ee'noko Lasarusi Jiisuu'ke aa'na' piaavuriko'. <sup>6</sup> Ee'noko Lasarusi siipavoko Jiisuu'ke taaravura tamung ke'munta doong otou'. <sup>7</sup> Ke'munta doong tankinui' tee, teie nii' bakaning barevare-nupoong aa'muru', "Meriiaing; nanampiaing; Judia'nameng-aape toromariaing." <sup>8</sup> Ee'noko nii'ke bakaning barevare-nupoonge maku'ampima aa'pampiru', "Nau-anta Pankaing ee, te'mung Ju'koong ovontunge da' daping kapange too'daieeng. Arekee' mau'emaang te'aape toro-rraa'naang?" <sup>9</sup> Jiisuu'ke aa'muru', "Tee batei narung doong-koong nii'koo siraka'pari otong. Nantoong doonganang nanaama pu'ariaung arakai kansi'koonge siraka'pui

otoko. <sup>10</sup> Teka muunga deeko' nanaama pu'aripeu', aming-koo, nna' tee araka otoa'." <sup>11</sup> Jiisuu'ke tee'pura napo' aa'muru', "Niikaang naning Lasarusi aatui otong, nka nanamira daa'ampaing."

<sup>12</sup> Ee'noko nii'ke bakaning aa'pampiru', "Ovoring, tee aatura tampa' dee'oo'naang." <sup>13</sup> Nka Jiisuu'ke Lasarusi boo'paru'nung naumuriko nii'ke noru'ampia', tamung aatuu'nung pina' minkuvuko tampampima. <sup>14</sup> Teketa tee tenang Jiisuu'ke koonto' naumurima aa'muru', "Lasarusi aa' boo'paring." <sup>15</sup> Nka tee ninka o'norearuing-koo dotumaring dii'ke masika'an-tamerii'naang noru'amira. Aia', tee-anko nanamping." <sup>16</sup> Toomasi, nii'noo' miring Pauroung tampampimaunge, nii' ba'marang aa'muru', "Aia' meriiaing Nau-anta ninka, nii' ookara tee ninka nari' moompiaina'."

#### Jiisuu' Boo'keta Daa'nung Tamparu'na'

<sup>17</sup> Ee'noko Jiisuu'ke pora oovuu' Lasarusi karenaumo doong kuvi dako'domanoo' otoio'. <sup>18</sup> Beetani-namono Jerusalema'keta narung kokorei' daanga'pina' basinoo'. <sup>19</sup> Ee'noko mmau' Ju'nupoong poroko' Maata'namainta Meeri' dunsirunsi-antavaarema~ bee'mari boo'paru'nung-koo.

<sup>20</sup> Ee'noko Maata'ke Jiisuu' poko'nung taaravurai'nange taung nanuu' kune'uu'naang, ee'noko Meeri' pava-koo otoko. <sup>21</sup> Maata'ke aa'puu' Jiisuu', "Ovoring, da' a' otoieeng dei mmari booarupeu'. <sup>22</sup> Nka ninge noru'ansi o'nong Kumponing arupeu' kapoo' nialepeu'nung."

<sup>23</sup> Jiisuu'ke aa'puu', "Da'mari domamparaa'naang."

<sup>24</sup> Tenie maku'uma aa'puu', "Noru'ansi o'nong tee daa'aravaing doong asi'noo'na'mung."

<sup>25</sup> Jiisuu'ke teni aa'puu', "Ning aa' naning boo'keta daa'nunge, domang-antai. Baa tee ning masika'antamuraung domamparavaing bane boo'paravaing. <sup>26</sup> Ee'noko baa tee domampari ning masika'antamuraung boo'paravauka'nung. Dake ee masika'antavemang aung?" <sup>27</sup> Tenie aa'puu', "Ee', ee Ovoring, masika'antavamang da' tee Karistoo', Kumponing Bauring, tee Kumponing teroita Pako'pari'nii' a' kansi'koo pora nii' domamuraiaing-koo."

#### Jiisuu' Biromparu'na' Lasarusi Boo'pario'

<sup>28</sup> Ee'noko tee' minkuvura Maata' baara'ma'naang-anko Meeri'anko toroarara baka aa'puu', "Nau-anta anka' otong, da' nia'dumaang." <sup>29</sup> Ee'noko Meeri'ke tee kara taaravurai'nange daa'arara kua'pari nanuu' kune'uu'naang. <sup>30</sup> Jiisuu' mme' tavo'aravaruko osi, te' Maata'ke kune'uu'noro' otoko. <sup>31</sup> Ee'noko nii'ning Ju'nupoong teva-koo kuung otoroko'nung Meeri' ninka teni dunsirunsi-antavaama. Teketa teni iri'narung daa'arara tenkenuko siompau', ee' noru'aama, "Teni dee'ma kuvi dako'doma-aape nanumang teke biromparaa'naang."

<sup>32</sup> Ee'noko Meeri' tavo'aru' Jiisuu' otoko'noo'. Ee'noko tenie oovurai'nange kau'kanoo' dua'aru' aa'puma, "Ovoring, da' otoieeng dei mmari boo'paravarupeu'."

<sup>33</sup> Ee'noko Jiisuu'ke teni biromparako oovura ee'noko Ju'nupoong teni ninka porou'ning birompariko oovurira bakaang domang aa'na' orarunsie manki'ou'.

<sup>34</sup> Ee'noko Jiisuu'ke nia'urima, aa'puru', "Are' dako'erieenge?" Ee'noko teinge bokuaama aa'pau', "Ovoring, pora ooveaing." <sup>35</sup> Ee'noko Jiisuu' biromparu'. <sup>36</sup> Ee'noko Ju'nupoonge aa'pau', "Ooveriaing aa'na' pi-aavumana'." <sup>37</sup> Ee'noko nii'ninge aa'pau', "Teie tee temu' naning duta mutuu tamparu'antavuu', ape? Arekee' a'mung Lasarusi boo'paravaroo'naang kapoo' nkovuaruiee?"

### Jiisuu'ke Lasarusi Boo'keta Daa'uu'na'

<sup>38</sup> Napo' aa'na' oraka' dee'oitaa' Jiisuu' nanuu' kuvi dako'doma-aape. Tee kuvi kapange da'pau'nung. <sup>39</sup> Jiisuu'ke botovurima aa'puru', "Tee kapang diiri'eriai."

Ee'noko Maata'ke, tee naning boo'paru'nung ba'marie aa'puu', "Ee Ovoring, oraka' ka'mi'mori'neeng. Tee karenang doong tankinuieng boo'pario'."

<sup>40</sup> Jiisuu'ke aa'puu', "Ninge nauransing da' ning masika'antameaing deeko' Kumponing bakaang meenasi ooveaing. Ai' da' ampa'doinge?"

<sup>41</sup> Ee'noko tee boia' diiri'au' kuvi dako'doma karanaang-eta. Diiri'ao' Jiisuu'ke ankamparara aa'puu', "Mma' ee, tampara tantamang dake nkaang eenta taaramemaung-koo. <sup>42</sup> Ninge noru'ansi o'nong dake doong kante taaramemaung. Ninge tee' nauransing nantoonge taaramaara masika'antamaava'naang dake botomeu'nung ning."

<sup>43</sup> Ee'noko tee' minkuvurai'nange aa'na' bokuma aa'puu', "Lasarusi, sirapo' poai!" <sup>44</sup> Ee'noko tee boo'paru'nung sirapo' pou' bakaang bireng ee'noko kau' dai'aritaanange baaronge, bakaang oing baaronge dai'arita'. Ee'noko Jiisuu'ke botovurima aa'puru', "Dapa'eriaing nanuaina'."

### Ovontunge Mumunsiau'na' Jiisuu' Tavaava'naang

(Mat 26:1-5; Mak 14:1-2; Luk 22:1-2)

<sup>45</sup> Mmau' Ju'nupoong Meeri' siompau'ning Jiisuu'ke kapoo' nkovuu'nung ooaarai'nange masika'antavau'.

<sup>46</sup> Ee'noko narionge Boto Keperuu'navitu-anko toroarirai'nange nauaarau' kapoo' Jiisuu'ke nkovuu'nung.

<sup>47</sup> Teketa tee, taaravaarai'nange Boto Keperuu'navitue ee'noko piristi'nuka-koo ovontunankai koompaara'navitu ninka mumunsinang nkoaama aa'pau', "Arekee' nkoampii'naang? Aung naning baru' mmau' taa'ni'anta nkovumaatoing. <sup>48</sup> Nii'ke tamung ooampiaing deeko' aung mmau'ke dauramong~pina' masika'antavaara Rooma'nupoong bei'bei'aariko teinge nii' ookara piniraaku'maariaing dootuu'nava pankava nari' pesi'aama."

<sup>49</sup> Narunge naninge miring Kaiapasie Piristi'koo Ovoring deempari otoko'nunge aa'puru', "Dii'ke kapoo' noru'eria'. <sup>50</sup> Dii'ke ee tasi'peria' otong tampa'na' tee' naning narung boi dei nii' ookara domang moo'maripeu'." <sup>51</sup> Nka teie baka tee' minkuvua', tee Piristi'koong Ovoring deemparitaa' tee' tarampeearu'

Jiisuu' boo'paraa'naang nii'koo Ju'nupoong-koo.

<sup>52</sup> Ee'noko nii' naing-koo deea', ookara Kumponing baurukaa' amutemuu'keta oosimurii'naang narung mono-pina' o'norii'naang.

<sup>53</sup> Te'mung-eta tutumpau' Jiisuu' tavaava'naang mumunsi-koo. <sup>54</sup> Ee'noko tee'koo Jiisuu' baru' sirapo'ke nanuaruko' Judia'nameng-koo. Teketa tenkenu-rai'nange nii'noo' osi nanuu' miring Eparaim, mee'borara' sirakamaa'koo due'. Ee'noko te' o'noriko' nii' bakaning barevare-nupoong ninka.

<sup>55</sup> Tenang Ju'nupoong biikaang Paroro Baari'koong~ due'uu'naang. Mmau' nantoong avuntevuntu'keta Jerusalem'aape nanaako' neriarima kiioraa'antavaria'naang tee-koo paroro-koo makosina'.

<sup>56</sup> Ee'noko teinge Jiisuu' besi'aako' teke, ee'noko dootuu'nava pankava-koo oosiarima nia'eema aa'peeko', "Dake arekee' noru'emaang? Tee paroro-koo pa poaroo'naang dee'ma." <sup>57</sup> Tero piristi'koong ovontunge ee'noko Boto Keperuu'navitue boto nauaarima aa'paaru', "Naninge tee Jiisuu' otomanoo' noru'urainange teie nau'ka naumuriaing, teinge Jiisuu' moo'aara kiimata-nava-koo sipaava'naang."

### Meeri'ke Duuni Tampa' Nuuraa' Jiisuu'koo Dakovuu'na'

(Mat 26:6-13; Mak 14:3-9)

**12** Teketa tee, ~na'mung-taa doong otoko Taamang Baari'koong~ nkoaava'naang Jiisuu' Beetani-namono-aape nanuu'. Temono ee'namono Lasarusi bakanamono, tee Jiisuu'ke tero daa'an-tavuu'nung bakanamono. <sup>2</sup> Jiisuu' te' poio' taamang pankaing nkoau'. Maata'ke Jiisuu' ee'noko teing tee oo-koo porou'ning bau'uru', ee'noko Lasarusi Jiisuu' ninka ba'namparesio'. <sup>3</sup> Ee'noko Meeri'ke mou-koong-pina' ntong-pina' basi duuni nkavui pou', tampa' nuuraa' naru', naarada' narunge nkonii', moo' pankaing-koonaru'. Ee'noko Jiisuu'koong-koo kau'koo koo'uu' ee'noko bakaange dapoi napo' kau' pou'uu'. Ee'noko teie tampa' nuuraa'ke teva nari' nuuraa'aru'. <sup>4</sup> Ee'noko nii'koong Jiisuu' bakaning barevare-nupoong-koonarunge, Judasi Kerio'nunge, teie Jiisuu' dama'ke kare-nupoong-koo sivuainunge aa'puu', <sup>5</sup> "Aming-koo anie aru' duuninaru' tampa' nuuraa'naru' kera'puing? Baavevura dei beenaumo daaku' namikuri nkavupeu' ee'noko ata'oi'nuka pakuvuripeu'." <sup>6</sup> Teie ata'oi'nanka-koo tara'oa', tamung tee' minkuvuu' tee baka bak-ispung deempama, teie mooni' sipaako'nara' bakura kompui bakiaa'uriko'noo'koo.

<sup>7</sup> Ee'noko Jiisuu'ke aa'puu', "Teni sipeai. Aung tee ning dako'maavaina'mung-koo makosi kore'memuu'nung, tee' nkovuing. <sup>8</sup> Dii' ata'oi'nuka ninka doong kante otorimaung ee'noko ning doong kante dii' ninka o'noriauka'nung."

### Ovontunge Kara Pinka'au'na' Lasarusi Dupisi'koo

<sup>9</sup> Ee'noko Ju'nupoong karika'ke taaravau' Jiisuu' Beetani-navuntu'koo otoko'nung. Ee'noko te' nanau', Jiisuu' narung oo-koo deea', napo' tee Lasarusi oo-koo berou', tee Jiisuu'ke boo'keta daa'antavuu'nung.

<sup>10</sup> Tee'koo piristi'koong ovontunankai matauau' Lasarusi tavaava'naang, tee Lasarusi ooaarai'nange mmäu' Ju'nupoonge biikaning pankainanka sipaarun'ung-koo, Jiisuu' masika'antavaama.

**Jiisuu' Jerusalema' Tumparu'na' Daurarong-pina' Oro'pari**

(Kena 118:25-27; Mat 21:1-11; Mak 11:1-11; Luk 19:28-40)

<sup>12</sup> Teketa dauna'mung tee karika'ke taaravau' Baari'koong Paroro-koo poroko'ninge Jiisuu' Jerusalema'aape poo'naang. <sup>13</sup> Taaravaara uurung tovang nkavai osi-eta tenkenau' kune'aava'naang. Ee'noko euraavaama bokiaama aa'pau', "Biraanke! Biraanke-po'nung tee aung Kumponing bakaang miring-koo po-maang; aung tee daurarong nii' Isireeli-nupoong ni-ikaang!" <sup>14</sup> Jiisuu'ke doonkii'navoro' nkavura, doonkii'koo dau ba'nanui nanuko, tee' Daari Meekunge minkuvumana', aa'pumana',

<sup>15</sup> "Aroreriauka' dii' Saioni-nupoong, diikaang daurarong dii'anko pomaang doonkii'nu kampionu-koo dau ba'nanui."

(Sekaraia 9:9)

<sup>16</sup> Nii'ke bakaning barevare-nupoonge tasi'pampiaruko' tee kapoo' nkoaru'nung. Jiisuu' daa'aru'ng bakaang meenasi ninka deeko' nii'koo sira'paru' tee Daari Meekunge tutung minkuvuu'nung tee' nkoaraa'naang ee'noko tee' nari' nkoaru' Jiisuu'koo.

<sup>17</sup> Teing karinga Jiisuu'ke bokuma Lasarusi boo'pario' kuvi dako'au'noo'keta domang-antavuo' ooau'ninge dooreaaru'. <sup>18</sup> Teing ookara Jerusalema' porou'ning ta'ninai taaravaara berora onkeonke'au', Jiisuu' tee' taa'ni'poi poko. <sup>19</sup> Ee'noko tee' nari' dooreai otoroko teinge Boto Keperuu'navitue bii'ka kareaama aa'pau', "Ooveriaing, nii'ke matauampimana' nkoarava' otong. Ookara nantoonge tee narung siompaamang."

**Nii'ninge Kiriki'nupoonge Jiisuu' Besi'aako'na'**

<sup>20</sup> Ee'noko teing-kooning dootuu'arii'naang ee'deto Jerusalema'aape nanaako'ninge nii'ning Kiriki' otoroko tenang paroro nkoaako'na'mung. <sup>21</sup> Ee'noko teing Pilipi'anko porou'. Pilipi' Besaida-namono-nung, Kaaleli'nameng-koonoo'nung. Ee'noko teinge aa'pau', "Ee pankaing, nii' Jiisuu' ooampii'naang piamorimang."

<sup>22</sup> Ee'noko Pilipi' Aanduru'anko nanura nauvuu', ee'noko tenaanka Jiisuu'anko nanureta nauvuretu'.

<sup>23</sup> Jiisuu'ke maku'urema aa'puretu', "Tee bateinang enang tavo'aring Kumponing meenasi pankaing amuainang ning tee Naning-naumpo' Paning-etaing. <sup>24</sup> Masika' naurampemang sinang-koo, uite'nu~ nau kansi'koo dua'aravarura ee'noko booarura, teu nau deempari otopeu', nka boora deeko' mmäu' sinang tavo'antavupeu'. <sup>25</sup> Tee tee' nari' baa tee naning bakaang domaang baka kirokaiaramaang bakaang domaang tee paa'aravaing, teketa baa tee naning anke kansi'koo otoi bakaang domaang si'koo taura'pari oting tee bakaang domaang pinka'aravaing. Teie tee domaang oparavaung kompuang. <sup>26</sup> Baa tee naning

nkaang pakupakunung deemparaa'naang piavora deeko' ning siomuainang. Tee'koo nkaning pakupakunupoong ni'ninka o'noriaing ning o'noainoo'. Mma'ke daangampuaing naning tee ning-koo pakunara deemparavaing."

**Jiisuu'ke Boo' Aroo'uko Kumponing Paning-eta Tapa' Karavuu'na'**

<sup>27</sup> Jiisuu'ke aa'puu', "Nkaang domang oraka' dee'moing. Aming minkuampaing? Ee' pa minkuama'naang, 'Mma', aung bateinang ning-anko poauka' poteveaing?' Nka tee' deea'. Ning mou'nung enang-koong sisikeera tora'pama'naang. <sup>28</sup> Ee Mma', nerantaravai dakaang miring pankaing-antararavaina'." Tee' minkuvuko narung aorong paning-eta karoma aa'puu', "Ning neramari o'noma'noing, ee'noko napo' tee' nko-maraa'naang."

<sup>29</sup> Teinge karingai te' donkonaako'ninge tee kara taaravaara aa'pau', "Kurunkurung-pina' taaravampir-ing." Ee'noko nii'ninge aa'pau', "Tee aa' koosinung~ tee-anko karoing." <sup>30</sup> Ee'noko Jiisuu'ke aa'puru', "Aung kara ninge taaravama'naang karoa', dii'ke taaraverii'naang. <sup>31</sup> Enang bateinang tenang Kumponing ookara kansi'nupoong koosinang nkovuma koompurainang. Enang ee'nang Kumponing teing kansi'nupoong biikaang pankaing turampura bata'uaing. <sup>32</sup> Nantoonge ning taakamaara kansi'keta intamaako ookara nantoong baramparampaing ning-anko." <sup>33</sup> Tee' minkuvuma nauvuru' aremurii' boo' tora'puu'naang otoing. <sup>34</sup> Ee'noko teinge karingai maku'aama aa'pau', "Niikaang boto-koo dariraarie ee' naumurimaung: tee Pako'pari'nii' doong kante otoaing. Arekee' dake enang minkuepeu' da' nau'ka enang intantaavaing? Da' aming-koo 'Tee Naning-naumpo' Paning-etaing' tantaramaung?"

<sup>35</sup> Jiisuu'ke maku'urima aa'puru', "Ning dii' ninka okio'ki'noo' o'noritaa' araka-antarampimaang. Ninge mme' araka-antarampirio' ooveritaa' otonaang mutaananturi'neeng. Aming-koo, nna' naning tee mutaananoo' otomaung noru'uaung are'aape nanumang. <sup>36</sup> Tee'koo ninge araka-antarampirio' masika'antameriaing mme' taaramerima, dii' sirapo'nupoong deentariaina'." Ee'noko Jiisuu'ke tee' minkuvura baka nanuu' baku'arita'a'.

**Ju'koong Ovontunge Jiisuu' Masika'antavaavaruu'na'**

<sup>37</sup> Bane aing ookara taa'ni'anta nkovuko ookara-koo dutakanoo'ke, nka masika'antavaavaruko'. <sup>38</sup> Tee' teronunge nakaronunge Aisaia'ke Daari Meekung-koo daarivuu'na' masika' deemparu', aa'puu'na', "Ovoring ee, kapoo' nkoaravaing-koong karamamaung~ nantoonge masika'antavaavauka', ee'noko dakaang tanka'ke iirakutai dupe-antaveko ooaara tasi'koo makosiaavauka' bakei!"

(Aisaia' 53:1)

<sup>39</sup> Tee' ee'na' teinge masika'antavaavaruko'nung. Aisaia'ke temurii' aarumo-koo napo' minkuvuu'nunge, aa'puu',

<sup>40</sup> “Kumponingee biikaang duta mutuu-antavurira biikaang domang iveka'antavuru' aa'no'neeng-koo: dutai ooaama domange tasi'paara ning-koo toroariko ninge tamparu'antavarami'neeng-koo.”

(Aisaia' 6:9-10)

<sup>41</sup> Aisaia'ke tee kara minkuvuu'nung Jiisuu' bakaang meenasi oovurai'nange. Tee'koo tee' minkuvuu' Jiisuu'koo.

<sup>42</sup> Tenang ee'nang mmau' Ju'koong Ovontung Jiisuu' masika'antavaako', ee'noko Boto Keperuu'navitu-koo avoreaama sirapo'ke minkuaavaruko' tevitue dootuu'nava-ita bata'aari'neeng-koo. <sup>43</sup> Nantoonge daangang-koo piavoroma, Kumponingee daangang-koo piavoroa'.

### Jiisuu' Bakaang Karai Nantoong Simpe'uriaina'

<sup>44</sup> Jiisuu'ke aa'na' karoma aa'puru', “Baa tee ning masika'antamuraunge ning narung masika'antamuraunge, teie tee ning botomuu'nung nari' masika'antamuraunge. <sup>45</sup> Baa tee ning oomumaung tee ning botomuu'nung napo' oovumaunge. <sup>46</sup> Ning kansi'koo mou' araka-pina'. Ee'noko ookara nantoong ning masika'antamuraunge mutaanang-koo ooroauka'nung. <sup>47</sup> Baa tee nkaang kara taaravuma masika'antavuaung ninge tuumpiampauka'nung. Ning mou'nung tuumpiamparoo'naang, teka domang-antavarama'naang. <sup>48</sup> Baa tee ning tonta'mumaung ee'noko nkaang kara masika'antavuaung, tee naning bakaang tuutunang~ oto'evung-tee kara ninge minkuansing bakaang tuutunang-nko otoaing te'mung doong asi'noo'na'mung. <sup>49</sup> Tee'koo ee'na'koo ninge ninka tamung minkuampa', teie Mma'ke ning botomuu'nunge moo'naang napo' botomuu' naurampii'naang tee' naurampirina'. <sup>50</sup> Ee'noko noru'ansi o'nong bakaang botoi domaang oparavauka'nung tavoumaung. Ninge kapoo' minkuamaung tee ee'naa Mma'ke naumuu'nung minkuamaung.”

### Barevare-nupoong Sipurira Jiisuu' Bauma-anko Toroaravaing Nauvuru'na'

(13:1-17:26)

### Jiisuu'ke Bakaning Barevare-nupoong Kau' Duu'puru'na'

**13** Aung aa' tee enang kore'noo'na'mung Baari'koong~ Paroro-koo. Jiisuu'ke noru'uu' bakaang doong makotuiu' aung-eta kansi'keta tenkenainoo' Bauma-anko nanuu'naang. Teie kansi'koo otoitaa' bakaning doong kante piaavuriko' bera bou'na'mung-koo basinoo'.

<sup>2</sup> Ee'noko Jiisuu' nii' bakaning barevare-nupoong nin-ka taamang-koo ba'namariru'. Ee'noko Sietani'ke Judasi Kerio'nung, Saimoni' bauring, tero maamu-antavuu' Jiisuu' sivuu'naang kare-nupoong-koo. <sup>3</sup> Jiisuu'ke koonto' noru'uu' Baumai iirakuta ookara

kapoo'koo makosina' avuu'nung, ee'noko noru'uu' Kumponing-eta pou'nung, ee'noko napo' Kumponing-anko toroaraa'naang. <sup>4</sup> Ee'noko tee, Jiisuu'ke taamang banto'nii' sipura daa'aru', ee'noko bakaang mononopa' kiru'arara tauro meu'ke kapeto tokoaru'. <sup>5</sup> Ee'noko ntong diisi-koo koo'urai'nange nii' niikaang kau' duu' tutumuru'. Ee'noko napo' teie tauroi tokoaru'nunge piu'muru'.

<sup>6</sup> Ee'noko tee Jiisuu' Saimoni' Piita-anko basiarako Piitai aa'puu', “Ovoring, nkaang ee kau' duu'mee'naang?” <sup>7</sup> Ee'noko Jiisuu'ke maku'uma aa'puu', “Dake enang kapoo' noru'ea' nkoamaa'no-maung. Dama'ke noru'eaing.”

<sup>8</sup> Ee'noko Piitai aa'puu', “Dake nkaang kau' koonto' duu'meauka'nung.” Ee'noko Jiisuu'ke maku'uma aa'puu', “Da' ninge duu'damparuko deeko' nkaning-koong barevare-nupoong-koong deentaravauka'nung.” <sup>9</sup> Ee'noko Saimoni' Piitai aa'puu', “Ovoring, nkaang kau' narung duu'meauka'nung, bireng duu'meaing; bore' duu'meaing.” <sup>10</sup> Jiisuu'ke aa'puu', “Naning tee mono duu'parinung ookara mono kiiroraa'aring. Napo' duu'paravaung. Bakaang kau' narung duu'paravaing. Dii' ku'mi'doria', nka ookara deea'.” <sup>11</sup> Jiisuu'ke tero noru'uu' tee naning kare-nupoong-koo sivuainung. Tee'koo ee'na'koo aa'puu', “Dii' ookara kiiroraa'dariri otona'.”

<sup>12</sup> Ee'noko Jiisuu'ke kau' duu' bakemurirai'nange Jiisuu' mononopa' napo' siparara bakanoo' taamantoma toroaru'. Teka Jiisuu'ke nia'murima aa'muru', “Dii'ke ee noru'eri otong tee kapoo' nkorampiring? Tasi'peringe? <sup>13</sup> Dii'ke ning Nau-anta ee'noko Ovoring tammerimaung. Ning tee ee'nara. Tampa' miring tammerimaung. <sup>14</sup> Ning diikaang Ovoring, ee'noko Nau-anta ee'noko ninge ee'narai kau' duu'dampiring. Dii' tee' napo' boonko noru'dariri pakureeriaing. <sup>15</sup> Aung dii' nau-anta-koo tee' nkorampiring dii' pakureerii'naang pakurampirina'. <sup>16</sup> Masika' naurampimang, naning botovotona' bakaang pankaing-koo dau basi deea', ee'noko naning kara-okovui-nka tee botovuu'nung-koo dau basi deea'. <sup>17</sup> Aung kara taaraverirai'nange tee' nkoverima biraanke-nupoong otona'ing.”

<sup>18</sup> “Ninge dii' ookara koonto' naurampia'. Ninge barearantu'ning noru'aransi o'nong. Ee'noko aung Daari Meekung nau'ka masikung deemparaa'naang aa'pumaung, 'Teie naningee nari' taamanampemaunge tamaava'naang simuu'.”

(Kena 41:9)

<sup>19</sup> Enang naurampimang mme' nkoaravaruko dii'ke masika'antamerii'naang ning tee ee'nara pankaing tenang nkoaravainang. <sup>20</sup> Masika' naurampimang, baa tee ninge botoampainung onkeonke'uaing tee ning napo' onkeonke'muaing. Ee'noko naning tee ning onkeonke'muaing tee ning botomuu'nung onkeonke'uaing.”

**Jiisuu'ke Tero Nauvuru'na' Naninge Too'dempuaina'**  
(Mat 26:20-25; Mak 14:17-21; Luk 22:21-23)

<sup>21</sup> Teketa Jiisuu'ke tee' minkuvurai'nange domang oraka' dee'ou', ee'noko sira'pui naumurima aa'muru', "Ninge masika' naurampimang dii', narunge dii'koonge tooka kompui ning kare-nupoong-koo simuaing."

<sup>22</sup> Jiisuu'ke tee' minkuvuio' nii' nii'ka oo'oomeeru' avitoitoi noru'ampima, miru'noo' besi'ampima. <sup>23</sup> Ning~ Jiisuu'koo due' ba'namarako' ba'maiko' deemaritaa'.

<sup>24</sup> Ee'noko Saimoni' Piitai birenge pinka'muma aa'muu', "Nia'ei tee baa tee' minkuvumaang." <sup>25</sup> Tee' nia'muko Jiisuu'anko diiri'marara nia'antu', aa'pama, "Ovoring, tee baa ee'nara?"

<sup>26</sup> Jiisuu'ke maku'muma aa'muu', "Ninge navio' duu-ni-koo iimpamira tee avompainung, tee ee'nara tee naning." Enang tee' minkuvura navio' nkavura iimpura Judasi avuu', Saimoni' Kerio'nung bauring. <sup>27</sup> Ee'noko Judasie tevio' kompuko Sietani' namu'ke tumparu' Judasi-koo kuung. Ee'noko Jiisuu'ke aa'puu', "Kapoo' nkoveainung iri'narung nkoveaing."

<sup>28</sup> Tee' minkuvuu'nung-koong miru'noo' nii'ke taamantomai ba'namariri o'noriko'ninge noru'ampiaruu'. <sup>29</sup> Nii'ninge aa'pau', "Tee Judasie kapoo' moo'uu'naang paroro-koo makosi Jiisuu'ke tee' minkuvumaang," Judasie mooni'koonara' bakura-nara' tarevuko'nung-koo. Ee'noko nii'ninge ee' noru'au', "Tee Jiisuu'ke botovuing sitovuru'nuka kapoo' avurii'naang." <sup>30</sup> Judasie tevio' nkavura namu'ke siaru', tenang muunga.

**Jiisuu'ke Nerakung Boto Sipuu'na'**

<sup>31</sup> Teketa Judasi tenkenuio' Jiisuu'ke aa'muru', "Enang ning Tee Naning-naumpo' Paning-etaing nkaang meenasi sira'pari otong, ee'noko Kumponing bakaang meenasi ning-koo sira'pari otong. <sup>32</sup> Ninge Kumponing pankaing-antavansio' teie ning napo' bakaang meenasi amura pankaing-antamuu'naang. Ee', emu' due'ka tee' nkomuaing. <sup>33</sup> Nnurukaa' ee, ning dii' ninka baru' pankaroong o'noriauka'nung. Dii'ke dama'ke besi'meriaing, ee'noko Ju'koong ovontung nauarantu'na' enang naurampimang, ning nanampainoo' dii' poriarupeu'. <sup>34</sup> Nerakung boto arompimaang: Piaareeriaing dii'ka. Tee' ninge dii' piaarampimana' dii'ka piaareeriaing. <sup>35</sup> Dii'ke dii'ka tee' piaareeriko ookara nantoonge tasi'daaripeu' dii' nkaning barevare-nupoong."

**Piita Penkemparavaina' Jiisuu'koo Jiisuu'ke Tero Nauvuru'na'**

(Mat 26:31-35; Mak 14:27-31; Luk 22:31-34)

<sup>36</sup> Teketa Piitai aa'puu', "Ovoring, are'aape nanimang?" Jiisuu'ke maku'uma aa'puu', "Dake ning siomearupeu' enang nanamatomanoo', nka dama' nii'hang siomeriaing."

<sup>37</sup> Piitai nia'uma aa'puu', "Aming-koo ninge siontamparupeu' enang? Ning da' ninka boo'koo makotunsi

o'nong." <sup>38</sup> Jiisuu'ke maku'uma aa'puu', "Da' ee koonto ning-koo boo'koo makosi? Bakei koonto' masika' nauramaang, kokoree' mme' koo'kuaruko da' beemu'pie penkentaravaing ni'ninka nari' o'noremaung-koo."

**Jiisuu' Bauma-anko Nanu' Taung Tamparu'na'**

**14** Jiisuu'ke aa'muru', "Domang oraka' dee'doriauka'. Kumponing masika'antaveriaing, ee'noko ning masika'antameriaing. <sup>2</sup> Mma' bakanava-koo avatevaro otong. Ninge otorianoo' neriaipaing. Tee' naurampiarupeu' tosi dei. <sup>3</sup> Dii' otorianoo' osi neri bakeamira napo' toromaravaing, ee'noko ning-anko po'antarampiaing te' ning o'noainoo' dii' otoriana'. <sup>4</sup> Dii'ke noru'eri otong nanampainoo' ee'noko te' basiraripeu'na' noru'eri otong."

<sup>5</sup> Toomasie aa'puu', "Ovoring, nii'ke noru'ampia' te' da' naniainoo'. Arekee' noru'ampipeu' taung te' tavo'maripeu'navung?"

<sup>6</sup> Jiisuu'ke aa'puu', "Ning tee ee'nara taung masikung, kara masikung okovenung ee'noko domaang okovenunge ning ee'nara. Naning Mma'anko bearupeu' baka. Ninge deeko' tavo'antavampeu'. <sup>7</sup> Dii'ke ning noru'meri dei Mma' noru'eri'peu'; enang-eta noru'er-ing, ee'noko oovering."

<sup>8</sup> Pilipi'ke aa'puu', "Ovoring, Dauma naumeriaing ooampiana'. Tee narung oo-koo piamorimang."

<sup>9</sup> Jiisuu'ke aa'puu', "Ning pankaroonge dii' ninka o'noru'. Arekee', Pilipi', dake ning ee mme' noru'mea'? Naninge ning oomuu'nunge Mma' oovuu'nung. Aming-koo dake aa'pemaang, 'Dauma naumeriai?' <sup>10</sup> Ai' da' masika'antavea' ee, Pilipi', ning Mma'koo o'no-maung ee'noko Mma' ning-koo otomaunge? Ee'noko teing kara naurampimatoining ning-eta poa'. Mma'ke-ee'nara-ita pomaung. Mma'ke ning-koo otomaunge bakaang nko-nko nkovumaung. <sup>11</sup> Masika'antameriaing ning Mma'koo o'nong ee'noko Mma' ning-koo otong. Makotuaung deeko' masika'antameriaing aing-koo nko-nkoning-koo. <sup>12</sup> Masika' naurampimang, baa tee ning masika'antamuraung ninge nko-nko nkoamaung nkovuainig. Ee', nko-nkonanka pankainanka nkoansing-koo dau basi pankaing nkovuainig, ning Mma'anko nanampaing-koo. <sup>13</sup> Ee'noko kapoo' nkaang miring-koo nia'meriaing nkoampaing, Kumponing bakaang meenasi sira'antavuaina' ning-koo Bauring-koo. <sup>14</sup> Kapoo' nkoama'naang nia'meriaing nkaang miring-koo nkoampaing."

**Jiisuu'ke Tanuaang Meekung Botovuaing Minkuvuu'na'**

<sup>15</sup> "Dii'ke ning piaameritaa' nkaang boto siomperi-aing. <sup>16</sup> Ninge Mma' nia'ampaing nii'nung domang kuaa'anta dii'anko botovuaing, Tanuaang Meekung ee'nara, kara masikung tanata, dii' ninka doong kante otoriana'. <sup>17</sup> Teinge tamung kansi'koo otoromaing nkavaavarupeu', ooaavarura noru'avaung-koo. Teka dii'ke tee noru'eri otong, ai' tee dii' ninka otorimaung-koo; ee'noko diikaang domang-koo otoi otoaing.

<sup>18</sup> Ninge dii'ka maantuaara'nuka-pina' si'dampiau-

ka'nung. Napo' toromaravaing dii'anko. <sup>19</sup>Oki'noo' batei tankinuko tamung kansi'koo otoromainge oomaavauka'nung ee'noko dii'ke oomeriaing. Ee'noko ning domamari o'noma'noaing-koo dii' napo' domantari' otoriainge. <sup>20</sup>Te'mung ee'na'mung dii'ke noru'meriaing ning Mma'koo o'nong ee'noko dii' ning-koo otoring tee' ning dii'koo o'nomana'.

<sup>21</sup>"Baa tee nkaang boto aroo'uma siompumaung tee ee'nara naning ning piaamumaung. Ee'noko baa tee naning ning piaamumaung Mma'ke piaavuainge. Ee'noko ninge piaavampainge. Ee'noko ning ninka sira'maravainge tee-koo."

<sup>22</sup>Judasi, Kerio'nunge deea', aa'puu', "Ovoring, aming-koo nii'koo naing-koo oro'daravainge ee'noko ookara kansi'koo-nupoong-koo deea'?"

<sup>23</sup>Jiisuu'ke maku'uma aa'puu', "Baa tee naning ning piaamumaung nkaang boto siompuaing. Ee'noko Mma'ke piaavuainge. Mma' ee'noko ning mereaing tee-anko; tee ninka o'noriaing. <sup>24</sup>Baa tee ning piaamuaung, teie tee nkaang kara meumpuauka'nung. Ee'noko tee kara minkuanga taaraverimaung nkaang deea', Mma' tee ning botomuu'nung bakaang.

<sup>25</sup>"Enang aing kapoo'nanka ninge mme' dii' ninka o'noritaa' naurampimaing. <sup>26</sup>Teka dama'ke teie Domang Kuaa'antai, Tanuaang Meekunge, Kumponing dii'anko botovuainunge nkaang miring-koo, ookara kapoo' nau-antaruaing, ee'noko noru'antaruaing napo' ookara kapoo' ninge naurampiru'ning.

<sup>27</sup>"Tampara, otoriko. Tampara masakung, nkaang mooa koonto' masakung aropimaang. Avitoitoi noru'daria' ee'noko aroreriauka'. <sup>28</sup>Dii'ke taaramering ninge aa'panko, 'Ninge dii' si'dampiang nka napo' toromaravaing dii'anko.' Dii'ke ning piaamerimaung dei doturoturaripeu' ning Mma'anko nananko, tee-anko ning-koo dau basi-anko. <sup>29</sup>Ninge enang naurampiring mme' nkoaravaruko masika'antamerii'naang nkoaravaina'mung. <sup>30</sup>Dii' ninka ning baru' pankaroong minkumariauka'nung. Aming-koo, nna' Sietani' po-maang, tamung kansi'koo otoromaing biikaang pankaing. Nka tee nkaang pankaing deea'. Komaaru' o'noa' baramupeu'nung-koong. <sup>31</sup>Teka pora paaramuko tara'moa' taaravampaing ookara kansi'nupoonge tasi'paavaina' ninge Mma' narung piaavamaung, ee'noko Mma' narung bakaang pia kepe-ruu'mari siompamaung. Aia', daa'darira danto meriai."

#### Jiisuu' Uaini Tamparu'na'

**15** "Ning uaini masakung, ee'noko Mma' uaini tare-nara. <sup>2</sup>Teie ning-koong kaumpe' ookara tooto'umaung teing sinang bi'uriaing. Sinang bi'umaing kaumpe'nanka nerivumaung nii'ning napo' mmou' sinang bi'uu'naang. <sup>3</sup>Dii' enang kiiroraa'dariri otoring nkaang kara naurampimaunge nerirurio'. <sup>4</sup>Ning-koo otoriaing, ee'noko ning dii'koo o'noaing. Dii'ke sinang nkaveriarupeu' ning-koo otoriaura, kaumpe'ke sinang nkavuarupeu'na' koi'koo otoarura. <sup>5</sup>"Ning uaini ee'noko dii' kaumpe'nanka. Baa tee ning-koo otomaung ee'noko ning tee-koo o'nomaung

mmou' sinang nkavuaing. Dii'ke kapoo' nkoveriarupeu' ning-eta taapo' otori. <sup>6</sup>Naning tee ning-koo otoaung Kumponing kaumpe'pina' dua'uaing, mara'ainoo'. Kaumpe' tee' oro'nanka oosiaarima nta'koo dua'numpo' paro'doma. <sup>7</sup>Dii' ning-koo otori dei, nkaang kara dii'koo otoi dei kapoo' nia'meriko dii' pi-aroripeu'ning dii' oto'deruripeu'. <sup>8</sup>Tee' ee'na' Mma'nung meenasi sira'paramana' dii'ke sinang mmou' nkaverio'. Ee'noko tee' nari' nkaning barevare-nupoong deentari' otoriaing. <sup>9</sup>Ninge dii' piaarampimaang Mma'ke ning piaamumana'. Nkaang paa-koo otoriaing. <sup>10</sup>Nkaang boto siomperi dii' nkaang-koo pi-aa-koo otorimaatoaing. Tee' nari' Mma'nung boto siompansi bakaang-koo paa-koo o'nomana'.

<sup>11</sup>"Ninge tee' naurampimang nkaang doturotu dii'koo otoo'naang, ee'noko dii' aa'na' bakei dotue maanto'durii'naang. <sup>12</sup>Nkaang boto aung, 'Dii'ka pakureeri piaareiaing tee' ninge piaarampimana'. <sup>13</sup>Naning boo'pari dei ba'maikori' paari-antavuri paku-vurima, nii'nung aarumo otoa' paa-koong temurii' puru'ui otoring. <sup>14</sup>Ee'noko dii' ninge mmaikori', kapoo' ninge botorampiring nkoveriaing deeko'. <sup>15</sup>Dii' ninge botovotonaa'nuka tantampiauka'nung enang-eta deto, ai' botovotonaa'nukai noru'aavaung kapoo' biikaning ovontunge nkoaamaing. Botovotonaa'nanka-ita mmaikori' tantampimaung kapoo' ookara naurampiru'nung-koo Mma'keta taaravantu'ning. <sup>16</sup>Dii'ke ning miru'meria', ninge dii' miru'dampiru'nung ee'noko ninge barerampiru' berira sinang mmou' nkaverii'naang, temurii' sinang doong kante otoma-toaing. Ee'noko Mma'ke aruriaing kapoo' nkaang miring-koo nia'eriaing. <sup>17</sup>Aung ee'nara boto ninge naurampimang, 'Dii'ka piaareiaing.'"

#### Munte' Nkoaavaina' Jiisuu' Bakaning-koo

<sup>18</sup>"Kansi'nupoonge munte'daariko ee' noru'eriaing, ning tee' ee'na' tero munte'mau'nunge. <sup>19</sup>Ee'noko dii' teing-kooning dei teinge navuraaripeu' biikaning-pina'. Ee'noko dii' ninge meeka'antampirio' teing-pina' deeaing deentariu', ee'noko dii' teing-kooning deea'. Tee'koo ee'na'koo teinge dii' munte'daari-maung. <sup>20</sup>Noru'eriaing kapoo' ninge naurampiring, aa'dampiring, 'Naning botovotonaa' bakaang pankaing-koo dau basi deea'. Teinge ning too'de-mau'nung deemparako napo' dii' tee' too'dentaari-ainge. Ee'noko teinge nkaang kara taaravau'nung dei diikaang kara taaravaapeu'. <sup>21</sup>Teinge tee naning botomuu'nung noru'aava', tee'koo tee' nkoraariaing dii' nkaning deentari'ko. <sup>22</sup>Ninge morai'nange kara nauaranko bei'bei'maavaru'nung dei naninge biikaang aarumo orara tampuarupeu'. Nka tampa' sira'mario' bei'bei'maama biikaang orara aarumo baku'koo makosiaava'. <sup>23</sup>Baa tee ning munte'mumaung Mma' munte'umaunge. <sup>24</sup>Teinge oomaio' kapoo'nanka nkoanko'nung nii'nung naninge tero nkovuaruko'ning. Tee' nkoaravari dei naninge biikaang aarumo orara tampuarupeu'. Nka nii'na' nkoaring-koo biikaang aarumo bakei orara masakung sira'pari otong, kapoo'nanka

nkoanko'ning ooaara nee'daang ookakang munte'maaremaung-koo. <sup>25</sup> Nka tee' nari' nkoaravaing biikaang boto-koong daari masika' tavo'aravaina', aa'pumaung, 'Teinge tamung munte'mau'.'

(Kena 35:19; 69:4)

<sup>26</sup> "Tee Domang Kuaa'anta poaing. Tee ee'nara Tanuaang Meekung, kara masikung tanata, Mma'ketaing. Mma'ankoita ninge botoampaing, ee'noko teie ning-koo kara masikung sira'pumaatoaing. <sup>27</sup> Ee'noko dii'ke tee' napo' ning-koo kara masikung minkuerimatoaing ni'ninka teroita o'noru'ninge."

**16** "Ninge tee' naurampiring dii' dua'dari'neeng-koo. <sup>2</sup> Biikaning dootuu'navananka-ita ba-ta'daariaing; ee', bakei, doong poaining-koo Kumponing dotu-anta tampaama dupisi'raariaing. <sup>3</sup> Teinge ning ee'noko Mma' noru'maarearuta dii' tee' nkoraariaing. <sup>4</sup> Aung tee ninge uro'ke naurampiring teing kapoo'nanka basiaravaining. Ee'noko tenang tee' oro' aarumo dii'koo teinge nkoaako, dii'ke tenang norunoru'eriaing tee aung kara ninge naurampimatomaung. Ninge tee tero naurampiaruu'nung aung kapoo'nanka ning dii' ninka o'horitaa'. <sup>5</sup> Teka enang ning nanamang te' naning-anko botomuu'nung-anko. Nka dii'koo narung otoa' ning nia'mema aa'mupeu'nung, 'Are'aape nanimang?' <sup>6</sup> Ee'noko ninge enang dii' naurampiring-koo dii' pee'dunsie maanto'during.

#### Tanuaang Meekung Bakaang Nko-nko

<sup>7</sup> Ninge masika' naurampimang, Bakei koonto' tampa' masika' dii'koo, ning anketa tenkenampaing-koo. Ning tenkenamparuko deeko' tee Domang Kuaa'anta dii'anko poarupeu'. Ee'noko ning tenkenampaing deeko' naurampirina', tenkenamira Domang Kuaa'anta dii'anko botoampaing. <sup>8</sup> Ee'noko teie porai'nange ookara nantoonanka-koo oko'bosi'ario' oraka' nkoarimanoo' tasi'antavuriaing aing aa'ning nauvurima: orara aarumo, tampa aarumo ee'noko aarumo orara-koo oko'bosi'noo' tee teinge ning Tee Pako'pari'nii' masika'antamaavaruu'nung. <sup>10</sup> Teie tampa aarumo nauvuriaing ning pari'antanunge, ning Mma'anko nanankoo oomeriaka'nung-koo. <sup>11</sup> Napo' nantoong simpe'uriaina' nauvuriaing tamung kansi'koo otoromaing biikaang pankaing tuutunang~koo dua'aru'na' nauvurima. <sup>11</sup>

<sup>12</sup> "Ninge mmau' naurampipeu'ning oto'memung. Nka tee, tee kara baru' aa'na' ivekung, enang tampa' noru'eriarupeu'. <sup>13</sup> Nka tee, Tanuaang Meekunge kara masikung tanatai porai'nange masikung kara ookara taara-antaruriaing. Baka karoauka'nunge, nka kapoo'

† Tanuaang Meekunge Jiisuu' boo'keta daa'uma sira'puu'nung tee Kumponing bauring, naning meekung, tampa ee'noko koonto' masikung. Nii' tee-koo kuung o'noriaing deeko' Kumponingee nii' koonto'nuka tamuriai (Rom 1:4). †† Kumponingee Jiisuu' daa'ura Sietani' tosi-bauko sira'puu'. Napo' Tanuaang Meekunge pakumurio' Jiisuu' tampa' siompampiko Sietani' bakaningee tasi'paavaing Kumponing tee masikung (Kol 2:15; Rom 8:2; Plp 1:28; Mkn 12:11; 20:10).

taaravuaining naururiaing ee'noko kapoo' tavo'aravainanka minkuvuaing. <sup>14</sup> Teie ning daangamuaing. Nkaang meenasi dii' naururiaing. <sup>15</sup> Ookara kapoo' Mma' oto'evumaing ning nkaning. Tee'koo ee'na'koo tee' naurampimang Tanuaang Meekunge nkaang meenasi dii' naururiaing."

#### Oraka' Dee' Paariaravaina'

<sup>16</sup> "Ning oki'noo' batei tankinuko dama' oomeriaka'nung, ee'noko napo' dama'ke oki'noo' batei otorira oomeriaing."

<sup>17</sup> Nii'ke nii'ningee Jiisuu' bakaningee barevare-nupoongee nii'ka niania' nia'meerima aa'meeriko', "Aung kara miru'noo' aming? Ee' naumurima'no-maung, 'Oki'noo' batei tankinuko dama'ke napo' oomeriaka'nung, ee'noko napo' oki'noo' batei tankinuko dama'ke oomeriaing.' Ee'noko napo' aa'murimaung, 'Ning Mma'anko nanampaing.' <sup>18</sup> Tee aung miru'noo' 'oki'noo' aming? Nii'ke noru'ampia' aming tee' minkuvuinge."

<sup>19</sup> Ee'noko nii'ke nia'ampii'naang piamoriko Jiisuu'ke noru'ura aa'muru', "Ninge aa'pamaang, Oki'noo' tankinuko dii'ke oomeriaka'nung, ee'noko dama' napo' oki'noo' tankinuko dii'ke napo' oomeriaing. Aung tee' minkuansing tee dii'ka ee' tana'deerimaang? <sup>20</sup> Masika' naurampimang dii' birontariaing orarunsirarima, ee'noko tamung kansi'koo otoromaing doturotuariaing. Bane dii' orarunsirarira diikaang orarunsi doturotu-koo toroaravaing. <sup>21</sup> Naning manikuma tooto' paravuainoo' noru'uma oraka' dee'ong, bakaang doong sisikeeravoaina'mung due'uko. Nka tee tooto' paravura teni sisikeera ampa'opeu', aa'na' doturotuaritaa' otopeu' tooto' ponto'aring-koo. <sup>22</sup> Tee' nari' dii'koo nkoaravaing. Enang dii' orarunsirarimang ee'noko ninge dii' dama'ke oorampaing, ee'noko diikaang tunsi doturotue maanto'uaing. Naningee te'nempuauka'nunge tee doturotu dii'keta.

<sup>23</sup> "Ee'noko tenang doong basiaravainang ning kapoo'koo nia'meriauka'nung. Masikung naurampimang, dii' nkaning barevare-nupoong deentariiko Mma'ke ookara kapoo' aruriaing nia'eriaing. <sup>24</sup> Dii'ke mme' kapoo'koo nia'eria' nkaang miring-koo. Nia'erira komperiaing dii' dotue maanto'duriaina'."

#### Jiisuu'ke Ookara Avo'avoro'nanka Puru'ura Avoreava-roo'naang Nauvuru'na'

<sup>25</sup> "Ninge aung minkunaananka dii' kara mirumiru'ke naurampimaung. Nka batei pomaang aunge ee' oro'ke karai karompauka'ng. Tenang ninge kara sira'pansi minkuampaing Mma'koo. <sup>26</sup> Te'mung tavo'aravaina'mung nkaang miring-koo nia'eriaing. Ee'noko ninge ee' minkuampa' ninge Mma' nia'derompiaing, teo Mma'ke baka piaarurimaung-koo; <sup>27</sup> Dii'ke ning piaamerimaung ee'noko masika'antamerimaung ning Kumponing-ankoita mou'nung, tee'koo Mma'ke piaarurimaung. <sup>28</sup> Masikung, ning Mma'ankoita mou' aa'



kansi'koo, ee'noko ning enang kansi' sipamang, Mma'anko nanama."

<sup>29</sup> Ee'noko nii'ke bakaning barevare-nupoonge aa'pampiru', "Ee aung, da' enang bakei sira'pei minkuemaang. Kara mirumiru' minkuea' otong. <sup>30</sup> Nii'ke enang da' noru'dampiring dake kapoo' ookara noru'ei otong, bane nii'ninge niania' nia'daavaruko noru'epeu'. Tee'koo ee'na'koo da' nii'ke masika'an-tarampimaang da' Kumponing-ankoita pou'nung."

<sup>31</sup> Jiisuu'ke maku'murima aa'muru', "Ekee, enang asi' masika'antameri! <sup>32</sup> Nka tee bateinang due'umaang, dii' ookara aroreritaa' avitoitoi koo'dariainang, ee'noko ning ninka o'noaing. Nka bakei ning ninka o'noau-ka'nung, Mma' ni'ninka o'noremaung-koo. <sup>33</sup> Ninge dii' naurampiring dii' mooa-po'nupoong deentarii'naang ning-koo otoritaa'. Kansi'koo otoritaa' pore'doriaing. Nka domang purintariaing, ninge ookara kansi'po' ku-ung deempansing-koo."

#### Jiisuu' Eentavaru'na' Bakaning Barevare-nupoong Paku-koo

**17** Jiisuu'ke tee' minkuvurai'nange paning-aape ankamparara aa'puu', "Mma' ee, tee bateinang poing. Ning dauring meenasi ameaing napo' ninge dauringe meenasi arompaina'. <sup>2</sup> Iirakuta ameu' nantoong ookara tanata-koong ninge domaang oparavau-ka'nung avoroma'naang ookara nantoong-koo dake ameu'ning-koo. <sup>3</sup> Domaang oparavauka'nupoong aing: Da' Kumponing masikung noru'daamaing, nii'nung otoa', ee'noko teinge dake botomeu'na' noru'maa-maing ning tee Pako'pari'nii'. <sup>4</sup> Kansi'koo o'noitaa' dakaang meenasi siraka'antavansi o'noing. Dakaang nko-nko opansing nkoama'naang ameu'nung. <sup>5</sup> Enang tee Mma', pora pankaing-antamei nerameaing tero kansi' otoaruko da' ninka o'noresi nerameu'na'. <sup>6</sup> Teing-koo nantoong-koo dake tero kansi'keta ameu'ning-koo ookara-koo ninge da' tasi'antavarantu'nung. Teing dakaning deempairi otoroko, dake ning ameu'ning, ee'noko dakaang kara meumpau'. <sup>7</sup> Ee'noko enang teinge noru'ai otong ookara kapoo' dake ameu'ning ee'noko da'ankoita pou'ning. <sup>8</sup> Ninge tee kara naumeu'nung nauaranko tampa' taaravau', ee'noko siraka'pariri ning tasi'mau'nung ning tee da'ankoita mou'nung, ee'noko masika'antavaamaung dake ning botomeu'nung.

<sup>9</sup> "Ninge teing pakuarama'naang eentaramang. Ookara kansi'nupoong paku-koo eentamarava', teing nantoong dake ameu'ning-koo naing-koo, dakaning deempairi. <sup>10</sup> Ookara kapoo' nantoong oto'memaing dakaning, ee'noko da' oto'derumaing ning nkaning. Nantoonge teing ooaara daangamaavaing. <sup>11</sup> Ning enang da'anko momaang. Ning kansi'koo oto'koong deea', teeo aing a' kansi'koo otoroko. Mma' meekung ee, dua'ari'neeng tareveriaing dakaang miring-koonge purinto'ke, teie ee'narai miring-koo dake ameu'nunge, teing narung deemparii'naang nee' narung-pina' o'noremana'. <sup>12</sup> Ning teing ninka o'noritaa' ninge teing tarearansing dakaang miring-koonge

purinto'ke, teie ee'narai miringe dake ameu'nunge. Ninge komparansio' naning otoa' paa'aru'nung, nka tee naning dua'nii' tee narung paa'aravaing; te'koo Daari Meekung-koong kara masika'paravaing. <sup>13</sup> Ning enang da'anko momaang. Ee'noko ning kansi'koo o'noitaa' aing kapoo'ning minkuamaang teing nkaang doturotu okovurii'naang, biikaning tumsi teie dotur-otue maanto'urii'naang. <sup>14</sup> Ninge dakaang kara avoronko kansi'nupoonge munte'aaru', teing kansi'nupoong deeaing deempariaruko ning pina' nari', ai' ning teie kansi'nupoong-koong deea'. <sup>15</sup> Ninge da' nia'dampa' kansi'nupoong-eta tonta'erii'naang, teka ninge da' tana'damaang tampa' tareverii'naang naning orara-koo. <sup>16</sup> Ning kansi'nupoong-koong deeaung-koo tee' nari' nkaning teing-kooning deea'. <sup>17</sup> Ee'noko teie dakaang kara meekupoong deeng-antaveriaing. Dakaang kara tee masikung ootukunung. <sup>18</sup> Ninge teing botoaransing kansi'nupoong-koo, dake ning botomeu'na' te'. <sup>19</sup> Ee'noko teing noru'aransitaa' ninge ninka aromang teing napo' dakaning meekupoong masikung deemparii'naang.

<sup>20</sup> "Aing-koo naing-koo eenta nkoampa' ee'noko teing-koo nantoong-koo napo' ning masika'anta-maavainig-koo aing biikaang kara taaravaama. <sup>21</sup> Ning eentamaramaung aing ee'noko teing narung deemparii'naang. Mma' ee, narung deemparii'naang nee' ninka piamomaang tee' da' ning-koo otomana' ee'noko ning da'koo o'nomana'. Narung deemparii'naang piamomaang ookara kansi'nupoonge masika'antamaavaina' ning dake botomeu'nung. <sup>22</sup> Tee ee'nara meenasi ameu'nung avorontu'nung narung deemparii'naang, da' ee'noko ning narung deemaresi o'noremana'. <sup>23</sup> Ning teing-koo o'noko ee'noko da' ning-koo otoko teing narung deempariaing koonto'. Ee'noko tee' nari' ookara kansi'nupoonge noru'aapeu' dake ning botomeu'nung, dake piaaverimaung tee' nari' ning piaamemana'.

<sup>24</sup> "Mma' ee, teing dake ning ameu'ning ni'ninka o'norii'naang piamomaang ning o'noainoo' nkaang meenasi ooaavaina' tee dake ameu'nung. Aming-koo, nna' dake ning piaameu'nung kansi' mme' nkoar-avaruko. <sup>25</sup> Mma' ee, da' domang koompari oto'. Tamung kansi'koo otoromaing da' noru'daava', ee'noko ninge da' noru'dansi o'nong, ee'noko ainge noru'ai otong dake ning botomeu'nung. <sup>26</sup> Ninge da' nau-antavarantu', ee'noko tee' nari' nkoamaa'noaing piaa pankaing oto'evurii'naang piaa ning-koo oto'derumana', ee'noko ning teing-koo o'noo'naang."

## Jiisuu' Sisikeera Tora'antavai Dupisi'aako Napo' Domamparu'na'

(18:1-21:25)

### Jiisuu' Moo'au'na'

(Mat 26:47-56; Mak 14:43-50; Luk 22:47-53)

**18** Jiisuu' eentavarama tee'purai'nange tenkenampiru' nii' ninka bakaning barevare-nupoong ninka, Kiidironi-nari oki'nari tankimpampiri. Te' ee'noo' mintoong otoko'noo'; tenau-koo meru'. <sup>2</sup> Tenau tee mmou' doonge nii' bakaning barevare-nupoong Jiisuu'ninka minkumuriko'noo', Judasi nari', tee Jiisuu' sivuainung kare-nupoong-koo; <sup>3</sup> Ee'noko Judasi noru'uitaa' te' pou' tavutavu'navitu ninka ee'noko Ju' biikaang piatooronuka~ ninka, piristi'koong ovontunge ee'noko Boto Keperuu'navitue botoaaru'ning ninka. Teing kaava-po'nupoong, kosiana, daamu dovang ninka porou', puu.

<sup>4</sup> Jiisuu'ke ookara kapoo' tee-koo nkoaravaining noru'uitaa' uro'kanoo' donkonura aa'puu', "Dii'ke baa besi'erimang?" <sup>5</sup> Teinge maku'aama aa'pau', "Jiisuu', Nasareti'nung."

Ee'noko Jiisuu'ke aa'puru', "Ning ee'nara." Judasi, tee too'denung, tee teing ninka donkonuitaa'. <sup>6</sup> Tenang Jiisuu'ke aa'puriko, "Ning ee'nara," teing dama'du-aape duka'arira kansi'koo dua'ariru'.

<sup>7</sup> Jiisuu'ke napo' nia'urima aa'puru', "Dii'ke baa besi'erimang?" Ee'noko teinge aa'pau', "Jiisuu', Nasareti'nung."

<sup>8</sup> Ee'noko napo' Jiisuu'ke maku'urima aa'puru', "Ninge tero naurampiring ning tee ee'nara. Dii'ke ning besi'merima'nomaung deeko' nkaning siperereriko nanaavai." <sup>9</sup> Teie tee' minkuvuu', bakaang kara tero minkuvuu'nung masikung deemparaa'naang aa'puu'naare, "Mma' ee, ookara ameu'ning-koo narung paa'arava'."

<sup>10</sup> Aung aa' Saimoni' Piita bainatu oto'evuko'nung. Bakaang bainatu barampara piristi'koong pankaing bakaang botovotonaa' teka'puma dome' tamparome' ete'uu'. Bakaang miring Malakosi. <sup>11</sup> Jiisuu'ke Saimoni' Piita aa'puu', "Tee dakaang bainatu te' bakanoo' kore'eai bakura-koo. Dake ee ning ee' noru'memaang, tee sisikeera Mma'ke bamuu'nung mantompampauka'nung?"

### Jiisuu' Tavo'au'na' Aanasi-anko

<sup>12</sup> Tevitue tavutavu'navitue biikaang pankaing ninka ee'noko teing piatooronukai Jiisuu' moo'aara dai'au'.

<sup>13</sup> Ee'noko Aanasi Kaiapasi ba'doraa-anko tutung tavo'au'. Tee Kaiapasi tenang piristi'nuka biikaang pankaing deempari otoko'nung. <sup>14</sup> Tee tee ee'nara Kaiapasi Ju'koong ovontung tero ee' nauvuru'nung, "Tampa'na' ee': Narung masikung booaing ookara-koo nantoong-koo."

### Piita Penkemparu'na' Jiisuu'koo

(Mat 26:69-70; Mak 14:66-68; Luk 22:55-57)

<sup>15</sup> Saimoni' Piita ee'noko ning nee'ke Jiisuu' siompampetu'nung. Ee'noko Piristi' Pankaing tampa' noru'muio' ning tumaru' bakanava-koo Jiisuu' ninka dama'du-navaro-koo kuung. <sup>16</sup> Ee'noko Piita dama'du donkonui otoko' karanaang-koo. Tee enang ning napo' toromarara simaru'. Ee'noko teni karanaang tarevuko'nani karavamira Piita tung-antavantu' pava-koo kuung. <sup>17</sup> Enang tee, tenie manikumai karanaang tarevuko'nanie Piita aa'puu', "Da' dee'ma aunka' bakaning barevare-nupoong-koong." Piitai maku'uma aa'puu', "A, ning deea'."

<sup>18</sup> Tenang ee'nanang kamaarinang, tee'koo teing ovontung biikaang botovotonaa'nukai ee'noko piatooronukai nta' betu'aara tee nta' koroai donkonai otoroko' ankavoroma. Piita teing-anko nanurai'nange teing ninka donkonai te' otoroko' nta'koo ankavoma.

### Aanasie Jiisuu' Niania' Nia'uu'na'

(Mat 26:59-66; Mak 14:55-64; Luk 22:66-71)

<sup>19</sup> Teie Aanasie, uro'ke Piristi' Pankaing deemparako'nunge sinevuma Jiisuu' bakaning barevare-nupoong-koo nia'uu', ee'noko kapoo' nauvuriko'ning-koo. <sup>20</sup> Jiisuu'ke maku'uma aa'puu', "Ninge doong kante sirapo'ke minkuamaung ookara nantoong-koo. Ookara nkaang kara nauaramaunge dootuu'domainairu-koo ee'noko dootuu'nava pankava-koo ookara Ju'nupoong oosiarimanoo'ke. Ninge kapoo' makeni'nung minkuampaung. <sup>21</sup> Aming-koo dake ning niania' nia'memaang? Teing nantoong niania' nia'eriaing ning taaramaamaing. Teinge noru'ai otong kapoo' ninge minkuamaung."

<sup>22</sup> Jiisuu'ke tee' minkuvuio' teing piatooronuka-koong narunge tanko'puu' aa'puma, "Tee' kareauka' Piristi' Pankaing-ankoi." <sup>23</sup> Jiisuu'ke maku'uma aa'puu', "Ninge kapoo' oraka' minkuansing deeko' sira'peaing, nka ninge tampa' minkuanko aming-koo tanko'memaang?"

<sup>24</sup> Teketa Aanasie Jiisuu' dai'ari otoko botovuu' Kaiapasi-anko, Piristi' Pankaing-anko.

### Piita Napo' Penkemparu'na' Jiisuu'koo

(Mat 26:71-75; Mak 14:69-72; Luk 22:58-62)

<sup>25</sup> Piita mme' donkonui otoko teke ankavoma nii'ninge aa'pau', "Da' aunka' bakaning barevare-nupoong-koonarung deea', ee?" Ee'noko Piita penkemparama aa'puu', "A, ning deea'."

<sup>26</sup> Ee'noko piristi'nuka biikaang pankaing bakaning-koong botovotonaa'koo narunge, tee Piitai dome' napu'uu'nung ba'maiko'ke karoma aa'puu', "Da' ee ninge teka mintoong-koo Jiisuu' ninka ooramparuing tantaramaang?"

<sup>27</sup> Ee'noko napo' Piitai aa'puu', "Otoa'." Ee'noko tenang namu'ke kokoree' koo'kuu'.

**Jiisuu' Pailati'ke Sinevuu'na'**  
(Mat 27:1-2,11-14; Mak 15:1-5; Luk 23:1-5)

<sup>28</sup> Teketa tero bakei maatanang, Jiisuu' Kaiapasi-na-va-ita Ovo'ma' Pankaing Rooma'nung bakanava-koo tavo'au'. Teka teing Ju'nupoong koinaavaruu' biikaang toomo orari-antavaara Baari'koong Paroro nai-koo makosiaavarupeu'noo'koo. <sup>29</sup> Ee'noko Pailati' siarara dama'dua kune'urira aa'puru', "Aming nkovuiu' tu-umpierimaang aung naning?" <sup>30</sup> Ee'noko ee' maku'au', "Teie kapoo' orara nkovuaruko nii'ke da'anko tavo'ampiarupeu'."

<sup>31</sup> Pailati'ke napo' aa'puru', "Dii'ke dii'ka nkaverira paaraveriaing diikaang botoi naururimana'." Ju'koong ovontunge maku'aama aa'pau', "Nii' taura'maria' naning tavampiko boo'koo." <sup>32</sup> Tee' nkoarako Jiisuu' bakaang kara intampaako tee boo'paravaing-koong masikung deemparu', ai' Ju'nupoongee tee aa'barata'koo' intampaama tavaariaung.

<sup>33</sup> Pailati' kuung-aape tumparara tee-koo pava-koo Jiisuu' bokuvuma aa'puu', "Da' ee daurarong Ju'nupoong biikaang?" <sup>34</sup> Jiisuu'ke maku'uma aa'puu', "Tee niania' dake daka matauei nia'memaang, ai' nii'ninge da' naurai'o?" <sup>35</sup> Pailati'ke maku'uma aa'puu', "A, ning aa' Ju'nupoong-koong deea'. Dakaning nan-toonge ee'ninge ee'noko piristi'koo ovontunukai da' ning-anko tavo'daing. Aming kapoo' dake nkoveinge?"

<sup>36</sup> Jiisuu'ke aa'puu', "Nkaang muu' ninge tareamaung aung kansi'ketaing deea'. Tee kansi'ketaing dei nkaning piatooronukai kare nkoaama pakumaapeu' Ju'koong ovontunge dai'maa'neeng-koo. Teka nkaang taretare oovunoo'ketaing." <sup>37</sup> Tee'puko Pailati'ke nia'uma aa'puu', "Da' ee daurarong ee?"

Jiisuu'ke maku'uma aa'puu', "Masika' minkueing, ning ee'nara daurarong. Ning ponto'marama kansi'koo mou'nung aung kapoo' narung nkoaama'naang, kara masikung sira'pama'naang. Baa tee kara masikung siompumaung ning taaramumaung."

<sup>38</sup> Pailati'ke aa'puu', "Aming ee'nara kara masikung?"

**Jiisuu' Beekavau'na'**

Pailati' napo' dama'du siarara Ju'koong ovontung otorou'noo' aa'puru', "Ninge kapoo' ooampa' aung beeka-koong. <sup>39</sup> Diikaang aarumo ee' siong-antavui otong: ninge narung kiimatanuka-koong sim-piri'antarerompiaing ookara mare' kante Taamang Baari'koong-koo. Enang dii' arekee' piarorimang, aung Ju'nupoong Biikaang Daurarong sim-piri'antarerompiaing'naang?"

<sup>40</sup> Aung aa' bokiaama maku'au'nung, aa'paama, "A, tee deea'. Nii' Barabas piamorimang." Barabasi tee bakiaa' bauko nantoong tavurima.

**19** Aung aa' tee, Pailati'ke botoario' Jiisuu' moo'aara mura'au'. <sup>2</sup> Ee'noko tee mu-ra'arai'nange piatooronukai akapeu'aama mo'ming kunikunisi daurarong~ bakaang baakopo-pina' nkoaara bore'koo kurumpau', ee'noko mononopa' isikung dauraronuka biikaang-pina' karompumaung,

kurumpau'. <sup>3</sup> Tee' nepu'aara tee-ankoi poroko' aa'paa-ma, "Tampara masikung, Daurarong Ju'nupoong Biikaang!" Ee'noko tee' minkuaama tanko'paako'.

<sup>4</sup> Ee'noko Pailati' napo' dama'du toroarara karika' aa'puru', "Ee aing, ninge tee a' dama'du tavo'ampaing dii'koo dutakanoo' dii' nau-koo kapoo' aung-koo ooampa' tee tuumpi-koo makosi." <sup>5</sup> Tee' minkuvuko Jiisuu' dama'du siaru' bore' kunikunisie baakopoari, ee'noko mononopa' isikung karompumaung kurumparita'. Enang tee, Pailati'ke aa'puru', "Ooveriaing, tee aung ee'nara."

<sup>6</sup> Teketa piristi'nuka-koo ovontunge ee'noko biikaang piatooronukai Jiisuu' ooaarai'nange bokiaama aa'pau', "Aa'barata'koo taakaveaing! Aa'barata'koo taakaveaing!" Pailati'ke aa'puru', "Dii'ke dii'ka nkaverira aa'barata'koo taakaveriaing. Ninge kapoo' ooampa' tuumpi-koo makosi." <sup>7</sup> Ee'noko Ju'koong ovontunge maku'aama aa'pau', "Nii' boto oto'memuring aung nau'ka boo'paravaing naumuri otong, aung Kumponing Bauring tamparamaung-koo."

<sup>8</sup> Teketa Pailati'ke tee taaravurai'nange bakei aa'na' avorou'. <sup>9</sup> Ee'noko pava-koo kuung napo' tumparara Jiisuu' aa'puu', "Da' areketa pou'nung?" Ee'noko Jiisuu'ke maku'noo' nauvua'. <sup>10</sup> Pailati'ke aa'puu', "Dake ning karamea' o'ning ee? Noru'ea' ee ninge makosi da' sirapo' si'koo ee'noko aa'barata'koo taaka-koo?"

<sup>11</sup> Jiisuu'ke maku'uma aa'puu', "Da' makosi deea' kapoo' nko-koo ning-koo Kumponing tutung makosi-antaruaruko deeko'. Tee'koo tee naning ning da'anko tavo'muinung kapoo' bakei aa'na' orara nkovuing."

<sup>12</sup> Pailati'ke tee taaravurai'nange bakei napo' aa'na' piavou' sirapo' sipuu'naang. Ee'noko Ju'koong ovontung aa'na' bokiaama aa'pau', "Dake sirapo' sipeaing deeko' ookarai noru'daapeu' da' dakaang pankaing Siisa' ba'maiko' deea', ai' baa tee daurarong baka tamparamaung Siisa' too'denung deempari otong."

<sup>13</sup> Ee'noko Pailati'ke tee kara taaravura siaru' Jiisuu' bokuvui, ee'noko ba'namparu' kara simpe'doma ba'na-va'naang taataru-koo, te' ee'noo' Kapang Tapee'po'noo' tampaamanoo', nii'noo' Ju'nupoong urikupoong biikaang kara-koo Kabata tampaamanoo'.

<sup>14</sup> Tenang ee'naang duaa' tavo'kuko te'mung-koo boona'mung Baari'koong~ Paroro-koo. Pailati'ke Ju'koong ovontung aa'puru', "Diikaang aung daurarong." <sup>15</sup> Teinge kara maku'aama bokiaama aa'pau', "Taveaing! Taveaing! Taakaveaing aa'barata'koo!" Pailati'ke ee' nia'uru', "Dii' ee piarorimang tee ee'nara diikaang daurarong taakavama'naang aa'barata'koo?" Piristi'koong ovontunukai maku'aama aa'pau', "Nii' daurarong oto'memuria', dauraronuka biikaang pankaing, Siisa' narung oto'memuring." <sup>16</sup> Aung aa' tee'paako Pailati'ke kasivuarura taura'puru' aa'barata'koo taakavaava'naang.

**Jiisuu' Aa'barata'koo Taakavau'na'**

(Mat 27:32-44; Mak 15:21-32; Luk 23:26-43)

Enang tee Pailati'ke taura'purio' nii'ning piatooronukai Jiisuu' oko siong-antavau'. <sup>17</sup> Ee'noko Ji-

isuu'ke bakaang aa'barata' nkavui osi-eta tenkenuu' bera Makupi'noo' tampaamanoo' basiaru', Ju'nupoong biikaang kara-koo Kolokata' tampaamanoo'.<sup>18</sup> Teka ee'noo'ka taakavau' aa'barata'koo. Ee'noko ke-naankara nii'naanka napo' taakavaaretu' aa'barata'koo, nii'nara tampavine-aape, nii'nara mare'aanavine-aape, ee'noko Jiisuu' meu'.<sup>19</sup> Pailati'ke taa'ni'anta daarivura aa'barata'koo niiri-antavuu' ee' minkunaare:

"JIISUU' NASARETI'NUNG, JU'NUPOONG BIIKAANG DAURARONG."

<sup>20</sup> Te' Jiisuu' taakavau'noo' osi-koo due' deemparako mmou' Ju'nupoonge tee taa'ni'anta sira'pario' deeru-aako', aing aa'ning kara-koo daariari otoko: Ju'na', Rooma'na', ee'noko Kiriki'na'.

<sup>21</sup> Ju'nupoong-koo piristi'koo ovontunukai Pailati' aa'pau', "Ee' daarieina', Ju'nupoong Biikaang Daurarong,' makosi deea'. Nii'na' daarieaing ee'pina', 'Aung baka aa'pamaung: Ning Daurarong Ju'nupoong Biikaang.'" <sup>22</sup> Nka Pailati'ke maku'urima aa'puru', "Kapoo' daariansing tee' nari' daariari otoaing."

<sup>23</sup> Teketa piatooronukai Jiisuu' aa'barata'koo taakavaarai'nange bakaang mononopa' nkavaama tankee'eu' karemarantu-koo, namarana' piatooro naruna'. Ee'noko tee mononopa' isikung nkavau' tenaa' ootukunaa' navaro-koo bavu'nii'naa', tua'noo' dapa'doma dopa. <sup>24</sup> Teing piatooronuka aa'peeko', "Dere'ampiauka'nung, deikoo'meerima ooampiang baie nkavupeu'." Tee' ee'na' nkoarako Daari Meekung masika'paru' aa'pumaung-koo, "Teing tankee'eu' nkaang baarong bii'ka, ee'noko deikoo'eu' nkaang mononopa'koo."

(Kena 22:18)

Ee'noko tee' ee'na' piatooronukai nkoau'.

<sup>25</sup> Tenang tee Jiisuu' bauko-namainta ee'noko Maaria Kolopas ba'aang, ee'noko Meeri' Ma'dala-nani, teing ee'ning Jiisuu' bakaang aa'barata'koo due' donkonai otoroko'. <sup>26</sup> Jiisuu'ke bauko ee'noko ning ba'maiko' due' donkonampesio' oomureta bauko aa'puu', "Ee nko', dauring tee." <sup>27</sup> Ee'noko napo' tee'purai'nange ning aa'muu', "Dauko teni." Teketa teni bokuantu' ni-ikanava-koo o'norii'naang.

### Jiisuu' Boo'paru'na'

(Mat 27:45-56; Mak 15:33-41; Luk 23:44-49)

<sup>28</sup> Teketa Jiisuu'ke noru'uu' ookara kapoo' nkoaraa'naang makosi Kumponingeroita tampuu'ning tee' dupearako. Ee'noko Daari Meekung dupe-anta-koo Jiisuu'ke aa'puu', "Ning nukaa'moing."

(Kena 22:15; 69:21)

<sup>29</sup> Teke tee kokotonaro' te' otoko' uaini kaaveerii'ke maanto'naro'. Teing kapoo' tee-koo uaini-koo boovong-antavaara napo' bana'koo dai'antavaara intampau' Jiisuu' karankanoo'. <sup>30</sup> Jiisuu'ke teru' mantompura aa'puu', "Bakearing." Ee'noko bakaang bore' aru'arara domang si'nuu'.

### Jiisuu' Tupu'au'na' Mato'ng-koo

<sup>31</sup> Te'mung te'mung doona'mung miring Maamu-an-tana'mung, doong uaana'mung aa'na' meeka'mung-koo boona'mung deempario'. Ee'noko teinge Ju'koong pankenge ee' noru'au', "Teing aa'barata'koo taakavarining tee' nari' otoroko Doong Uaana'mung orariara'neeng." Tee'paara Pailati'koo eentavariru' botoarako piatooronukai teing-koong taakavaaru'ning-koong kau' nenko'aava'naang, bera namu'ke booroio' sing-antavaarii'naang aa'barata'keta. <sup>32</sup> Ee'noko piatooronuka berorai'nange tutuna'hung-koong kau' nenko'au', teketa tee-koong Jiisuu'koo amenka'koo taakavau'nung-koong. <sup>33</sup> Teka Jiisuu'anko pororai'nange tero boo'pario' ooau', tee'koo kau' nenko'aavaruu' Jiisuu'koong. <sup>34</sup> Teketa narunge piatooronuka-koonge daanko'ke Jiisuu' too'puu' mato'ng-koo, ee'noko namu'ke ereng ntong ninka dakoaru'. <sup>35</sup> Masika' naurampimang, ninge ee'narai ooansio' tee' nkoau'. Nii'ke bakaningee noru'ampiri otong tee kapoo' minkuamaa'nomaung tee masakung, ee'noko ninge masakung minkuamaang noru'ansitaa' ninge tee' sira'pamaang dii'ke napo' masika'antaverii'naang. <sup>36</sup> Tee kapoo' nkoaru'nung Daari Meekung masika'paraa'naang aa'puu'na', "Tee-koong koo'nari' nenko'aavauka'nung."

(Kena 34:20)

<sup>37</sup> Ee'noko nii'nung Daari Meekung-koong nanaare ee' otong, "Nantoonge ooaavaing tee too'pau'nung."

(Sakaraia' 12:10)

### Jiisuu' Dako'au'na'

(Mat 27:57-61; Mak 15:42-47; Luk 23:50-56)

<sup>38</sup> Aung aa' tee dama'ke, Josepa' Arimatea'nunge Pailati' nia'uu' Jiisuu' bakaang mono nka-koo tau-ra'puu'naang. Josepa' tee Jiisuu' bakaning-koong barevare-nupoong-koo narung deempari otoko'nung, teka makemparitaa' Ju'koong ovontung-koo avoroma. Ee'noko Pailati'ke taura' avuio' bera Jiisuu'koong mono sivura nkavuu'. <sup>39</sup> Nikodemasi ninka nari' beretu'. Tee Nikodemasi tee ee'nara Jiisuu' tutung beero'uu'nung muunganang. Teie mmou' duuni tampa' nuuraa' meea-koong ee'noko alosi-koo kenotoario' kompu, daping mou-koong nara'pina' basi manki'noo', naning daurarong dako'koo makosinoo'. <sup>40</sup> Tenaankai Jiisuu'nung mono nkavuretai'nange boo'nuka nopa'na' nopa'uretu' baaronge tee ninka tampa' nuuraa' ninka, tee' ee'na' nkoariko'na' Ju'nupoonge dako'aarii'naang mono. <sup>41</sup> Te' aa'barata'koo dupisi'au'noo' mintoong-nanau otoko', ee'noko tenau-koo meu' nerakung kuvi dako'doma otoko' naning mme' siparava'nareng. <sup>42</sup> Te'mung Ju'nupoong biikaang Doong Uaana'mung-

koo maamu-na'mung † deemparako Jiisuu' te' sipuretu' te' kuvi due' otoko.

### Jiisuu' Boo'keta Daa'aru'na'

**20** Aung aa' tee, tero maatanang Saandei-na'mung mme' tane'puko, Meeri' Ma'dala-nani kuvi dako'doma nanuu', ee'noko tee ku'nung kapang-koong diiri'ario' karanaang-eta oovuu'. <sup>2</sup> Ee'noko oovurai'nange teni kua'paru' nee'anko, Saimoni' Piita-anko ee'noko ning Jiisuu' ba'maiko'. Ee'noko naumurema aa'muretu', "Tee Ovoring kuvi-eta nkavaing. Ee'noko sipainoo' noru'ampia'." <sup>3</sup> Teketa tee enang nee'ke Piita naankai simaretai'nange kuvi dako'doma kua'maresi meretu'; <sup>4</sup> Ee'noko aa'na' kua'mari Piita divu'amira kuvi-koo tutung tavo'maru'. <sup>5</sup> Ee'noko kinkinamirai'nange ooantu' baaronanka. Nka kuvi dako'doma tumarava'. <sup>6</sup> Ee'noko Saimoni' Piita porai'nange koonto' tee kuvi dako'doma tumparu', ee'noko baaronanka oovuu' te' tamung otoko. <sup>7</sup> Ee'noko tenaa' baarong-nanaa' Jiisuu'koong bore' dai'au'nanaa', tenaa' oovunoo' otoko, nii'ning baaronanka ninka deea', baka kai'ari otoko. <sup>8</sup> Teketa ning dama'ke tumaru', ee'noko ooamirai'nange deeko' Kumponingee boo'keta daa'uu'nung masika'antavantu'. <sup>9</sup> Nka nee'koo mme' siraka'parava' tee kara Daari Meekung-koo otoing Jiisuu' boo'keta daa'aravaing-koong, bane noru'ampesi naumuru'noo'. <sup>10</sup> Ee'noko teketa tee nee' osi toromaretu'.

### Jiisuu' Meeri' Ma'dala-nani-anko Tavo'kuu'na'

(Mat 28:9-10; Mak 16:9-11)

<sup>11</sup> Aung aa' tee, Meeri' kuvi dako'doma dama'du donkonui biromparako', ee'noko biromparama kinkinura ookuu' kuvi-koo kuung. <sup>12</sup> Ee'noko teka kuvi-koo kuunga koosinunka kenaankara oovuretu' kakaarai duaanavaresi, te' ba'namparesio' Jiisuu'koong mono tero otou'noo', nii'nung bore'kanoo' ee'noko nii'nung kau'kanoo'. <sup>13</sup> Koosinungkai' aa'puretu', "Ani ee, da' aming-koo birontaramang?" Ee'noko tenie maku'urema aa'puretu', "Tee aa' ning nkaang Ovoring nkavaara tokoo sipaio', ee'noko sipainoo' noru'ampa'."

<sup>14</sup> Ee'noko tenie tee' minkuvurai'nange torotoroarama Jiisuu' oovuu' te' donkonui otoko, nka tasi'pua' tenie tee Jiisuu'. <sup>15</sup> Ee'noko Jiisuu'ke aa'puu', "Ani ee, da' aming-koo birontaramang? Dake baa besi'emaang?" Tenie mintoong tarenara-pina' noru'uma aa'puu', "Ee aung, dake nkaveing deeko' ning naumeaing sipeinoo', ninge mera nkavampaina'."

<sup>16</sup> Jiisuu'ke miring tampuma aa'puu' teni, "Meeri'." Ee'noko koonto' tee-anko toroarama tero Ju'nupoong urikupoong biikaang karai karoma tenie aa'puu', "Rabonai." Aung miru'noo' ee' oro', Nau-anta Ovoring.

<sup>17</sup> Jiisuu'ke teni aa'puu', "Ana'antameauka', ai' ning mme' Mma'anko deto toromarava'. Bera mmaikori' ee'noko ntara'mainkaang-anko nanira naueriaing ning

† Tenang duaa' tumparako doong maamuna'mung-koo tee Doong Uaana'mung tutumparako'nung. Josepa' Arimatea'nung ee'noko Nikodemasi iri'narumpuresi dako'uretu' tee Jiisuu', Doong Uaana'mung orarivure'neeng-koo.

nanamang Mma'anko ee'noko diuma-anko, nkaang Kumponing-anko ee'noko diikaang Kumponing-anko."

<sup>18</sup> Ee'noko Meeri' Ma'dala-nanie nii' bakaning barevare-nupoong naumurima aa'muru', "Ninge ooansing Ovoring, ee'noko tee kara naurampiring naumui."

### Jiisuu' Bakaning Barevare-nupoong-anko Tavo'kuu'na'

(Mat 28:16-20; Mak 16:14-18; Luk 24:36-49)

<sup>19</sup> Ee'noko te'mung ee'na'mung Saandei-na'mung muung-aapenang nava-koo nii' bakaning barevare-nupoong oosimariru'. Da'marira o'noru' Ju'koong ovontung-koo amorompima. Ee'noko tenang Jiisuu' pou'. Pora nii'koo meu' donkonuma aa'muru', "Tampara, ee aing! Mooa tee dii'koo otoaing!" <sup>20</sup> Ee'noko tee' minkuvurai'nange bakaang bireng nau-antamuru' ee'noko manto'nang. Ee'noko nii' bakaning barevare-nupoong bakei aa'na' dotumariru' Ovoring ooampira. <sup>21</sup> Ee'noko Jiisuu'ke napo' aa'muru', "Mooa-po'nupoong otoriaing. Mma'ke ning botomuu'na' ninge dii' botorampimang." <sup>22</sup> Tee' minkuvura domaange nii' uupumurira aa'muru', "Tanuaang Meekung nkaveriaing. <sup>23</sup> Dii'ke nantoong biikaning oreng aarumo tonta'evurereriko tonta'ari otoaing, ee'noko dii'ke tonta'evurereriaruko tonta'arava' otoaing."

### Toomasie Jiisuu' Oovura Masika'antavuu'na'

<sup>24</sup> Narung nii'koong Kivora-ita Kenaanka-koong Toomasi, nii'noo' Pauroong tampampiko'nung nii' ninka otoaruko Jiisuu' pou'. <sup>25</sup> Ee'noko nii'ke nauampima aa'pampiru', "Nii'ke Ovoring ooampiring." Toomasie maku'murima aa'muru', "Ninge niiri-koong taamu ooamparura bireng-koo, napo' tanka' dusi'amparura niirie tupu'uu'nung-koo taamu-koo, ee'noko nkaang bireng mato'nang-koo dusi'amparura deeko' ninge masika'antavampauka'nung."

<sup>26</sup> "Beenang-taa doong tankinuo' napo' nii' ookara bakaning barevare-nupoong naru'marira o'noriko' pava-koo kuung, Toomasi nari'. Bane ku'nung pinka'ario' Jiisuu' nii'koo meu' donkonura aa'muru', "Mooa-po'nupoong otoriaing!" <sup>27</sup> Ee'noko Jiisuu'ke Toomasi aa'puu', "Dakaang bireng a' dusi'eai, ee'noko nkaang bireng oomeai. Bireng tovorod'arara a' ning-koo manto'nang-koo dusi'eai. Noru' keekoo'koong bakerarara masika'anta oto'derui otoai." <sup>28</sup> Toomasie maku'uma aa'puu', "Kei, nkaang Ovoring ee'noko nkaang Kumponing Da'!" <sup>29</sup> Jiisuu'ke aa'puu', "Da' ee ning oomera masika'antameng? Nka biraankenanka masikeng teing nantoong oomaava' masika'anta-maavaining."

### Aung Buuku-koong Okora'noo'

<sup>30</sup> Ee'noko tee, Jiisuu'ke nii'ning oovuning taa'ni'anta nkovuu' nii'ke bakaning barevare-nupoonge ooampirio' aung-koo buuku-koo daariarava'. <sup>31</sup> Aing daari-ampiring otomaung dii'ke masika'antaverii'naang Jiisuu' tee Kumponingee Pako'pari'nii' nii' domang-antakoo, Kumponing Bauring ee'nara. Ee'noko tee, tee'

masika'antaverima dii' domaang-po'nupoong  
otorii'naang bakaang miring-koo.

**Jiisuu' ~Kenaanka-taa-anko Bakaning Barevare-  
nupoong-anko Tavo'aru'na'**

**21** Jiisuu' napo' taa'ni'poi sira'antavaru'na' nii'  
bakaning barevare-nupoong Kaaleli'haru'koo  
o'noriko tee' ee' nkoaru': <sup>2</sup> Saimoni' Piita, Toomasi  
(Pauroong tampampiko'nung), Natanielo' (Kana-na-  
mono-nung, Kaaleli'nameng-koonoo'), nee' Siebedi-  
baurinketa, ee'noko nii'naanka kenaankara bakaning  
barevare-nupoong-koonanka nii' nari' o'noriko. <sup>3</sup> Sai-  
moni' Piitai nii'ning aa'muru', "Ning kapa'koo nanang."  
Nii'ke aa'pampiru', "Ee', tee aa' nii' morii'naang." Teke-  
ta bakaasi-koo aa'emarira te'mung ee'na'mung  
ootukuna'mung muunganang kapa'kampima nau  
asi'nu barankampia'.

<sup>4</sup> Duaa' mme' tavo'arako Jiisuu' donkonuu' teru'koo  
tapiru. Ee'noko nii'ke bakaning barevare-nupoonge  
ooampia' tee Jiisuu'pina'. <sup>5</sup> Ee'noko teie aa'muru', "Ee  
aing nemea', dii' ee barankiriaring?"

Nii'ke aa'pampiru', "Ee', barankampia'."

<sup>6</sup> Ee'noko Jiisuu'ke aa'muru', "Napo' sionung dua'eri-  
aing bakaasi-koo tampanaang-aapei nii'ning barankiri-  
aina'." Ee'noko tee'puio' nii'ke sionung napo' dua'am-  
piru' ntong-koo, ee'noko dua'ampira mmou' kapa'nara'  
dau'pampira intampampiaruu'. <sup>7</sup> Ee'noko ning Jiisuu'  
ba'maiko'ke Piita aa'pantu', "Tee aung Oving." Ee'noko  
Saimoni' Piita tee Oving taaravura bakaang  
mononopa'ke io' kiru'aru'nunge nopa'arara dinki-  
too'aru' ntong-koo. <sup>8</sup> Ee'noko nii' nii'ning bakaning  
barevare-nupoong piisi'koo duumumpiru' sionung ka-  
pa'nara'ke maanto'ui'o' taari'marira barampampiri; te'  
tavi' dau'pampiru'noo' baru' isipo' kansi'keta  
deea'noo', pa'noko' kivora daanga'pina'.

<sup>9</sup> Teketa piisi'koo simarirai'nange ooampiru', tavi'  
ee'noko berete' nta'koo dau otoko. <sup>10</sup> Jiisuu'ke nii'  
aa'muru', "Nii'ning tavi'koo tavo'eriaing teing-koo  
barampererining-koo." <sup>11</sup> Teketa Saimoni' Piita enang  
bakaasi-koo aa'earu', ee'noko sionung barampuu' pi-  
isi'aape tavi' pankainankai maanto'ui'o'. Teing tavi'ning  
narung daaku'keta pa'noko' kivora-ita beenaumo  
[153]. Nka bane tavi' mmou', nka sionung dere'arava'.  
<sup>12</sup> Jiisuu'ke nii' aa'muru', "Porira mamompiai." Ee'noko  
nii' maia'moru' ee' nia'koo "Da' baa?" noru'ampiritaa'  
tee tee Oving. <sup>13</sup> Teka Jiisuu' porai'nange berete'  
nkavura amuru', tavi'ke tee' siong-antavui.

<sup>14</sup> Te'mung ee'na'mung beenana' taa'ni'poi sira'an-  
tavaru'na'mung Jiisuu' baka nii'koo bakaning barevare-  
nupoong-koo boo'keta daa'ararai'nange.

**Jiisuu'ke Piita Tautauvuu'na'**

<sup>15</sup> Aung aa' tee, taamang bakemarirai'nange Jiisuu'ke  
Saimoni' Piita aa'puu', "Saimoni', Jooni bauring, dake

ee ning piaamemang aing-koo dau basinoo?" Teie  
maku'uma aa'puu', "Ee'. Dake noru'mei otong, ninge  
piaaramang." Ee'noko Jiisuu'ke aa'puu', "Nkaning sip-  
isipi'koong sie'nanka tanataveriaing."

<sup>16</sup> Ee'noko napo' kemu'kana' Jiisuu'ke aa'puu', "Sai-  
moni', Jooni bauring, dake ee ning piaamemang?" Teie  
maku'uma aa'puu', "Ee', Oving, dake noru'ei otong  
ninge da' piaaramang." Jiisuu'ke aa'puu', "Nkaning sip-  
isipi'nanka tareveriaing." <sup>17</sup> Aung aa' beemu'pina' Ji-  
isuu'ke aa'puu', "Saimoni', Jooni bauring, dake ee ning  
piaamemang?" Piita oraka' dee'ou' Jiisuu'ke beemu'pie  
niania' nia'ui'o', aa'puma, "Dake ee ning piaamemang?"  
Ee'noko Jiisuu' aa'puu', "Oving, da' ookara kapoo'  
noru'ei otong. Dake ning noru'mei o'nong da' ninge pi-  
aaransi o'nong." Jiisuu'ke aa'puu', "Nkaning sip-  
isipi'nanka tanataveriaing. <sup>18</sup> Masika' nauramaang, da'  
nemea'daritaa'nange tokonii' pinka'darama avitoitoi  
naniko' piaroko'na', ee'noko panka'darara dakaang  
bireng tovorodaravaing, ee'noko nii'nunge bireng pin-  
ka'dura tokoo nkaruaing piarouka'noo'." <sup>19</sup> Tee'  
aa'barata'koo Piita boovina' Jiisuu'ke minkuvuma nau-  
vuu', Kumponing-anko meenasi tavo'uma. Ee'noko Ji-  
isuu'ke aa'puu', "Ning siomeaing."

**Jiisuu'ke Jooni Tautauvuu'na'**

<sup>20</sup> Piita dama'du-aape toroarama ning Jiisuu'  
ba'maiko' oomuu', ning ee'nara taamang naiampima  
Jiisuu'koo darimaritaa' nia'ama aa'pantu'nung, "Da'  
baie kare-nupoong-koo sing-antaruu'naang?"

<sup>21</sup> Ee'noko Piitai ning oomurai'nange Jiisuu' aa'puu',  
"Oving, arekee' tee aung naning?" <sup>22</sup> Jiisuu'ke  
maku'uma aa'puu', "Tee domampari otoaing bera ning  
napo' moainoo' miru'ampaing deeko' tee dakaang  
kapoo' deea'. Ning siomeaing dake." <sup>23</sup> Tee' minkuvui'o'  
minkunaa beremparu' Jiisuu' bakaning barevare-  
nupoong-koo ning moompauka'nung. Nka Jiisuu'ke  
minkuvua' ning moompauka'nung. Teeo aa'puu', "Tee  
domampari otoaing bera ning moainoo' miru'ampaing  
deeko' tee dakaang kapoo' deea'."

<sup>24</sup> Ning tee ee'nara bakaning barevare-nupoong-  
koonge aing kapoo' minkuansing ee'noko daariansi.  
Ee'noko nii'ke noru'ampiri otong tee kapoo' ninge  
minkuansing tee masikung.

**Botunanaare**

<sup>25</sup> Ee'noko tee nii'ning oovuning kapoo' mmou' Ji-  
isuu'ke nkovuu' a' otoaing. Ookara naruna' naruna'  
daari-koo ookara kansi' makotuarupeu' pa teing  
buuku kong-koo tee daariaapeu'ning.

# KARA OKOVURI NKANUKA

## Kara Baavootunanka Ane'kooning

1:1 Kara Okovuri Nkanukai Jiisuu' Bakaang Kara Daankiau'na' Jerusalema'ke  
 8:4 Kara Okovuri Nkanukai Judia' Ee'noko Sameria'navora'kai Dooreaaru'na'  
 13:1 Paula'ke Avora'tevora'koo Jiisuu' Bakaang Kara Sira'puu'na'  
 21:15 Judia'nupoonge Paula' Dai'aara Tuutunampaara Taaravau'na' Maku'uriko  
 27:1 Paula' Rooma'aape Beu'na'

## Kara Okovuri Nkanukai Jiisuu' Bakaang Kara Daankiau'na' Jerusalema'ke

(1:1-8:3)

### Jiisuu'ke Tanuaang Meekung Poaing Nauvuru'na'

1 Aung ee, Teopilasi',  
 Tutuna'nane'koo daarireroma tee ookara kapoo'nanka-koo minku-antarantu'nung Jiisuu'ke nkovuko'ning ee'noko nau-antavuriko'ning tutuntoma-ita bera deto paning-aape intamparu'noo'ke basi.  
 2 Mme' intamparava' teie bakaning kara okovuri nka-koo miru'uru'ning boto avuru' Tanuaang Meekung-koo kuunge. 3 Teing-koo mmou'namu'pie oro'paru' do-mamparu'na'koo taa'ni'antavari, mmou' kapoo'nanka tasi'anta ninka, noru' keekoo'ariaroo'naang. Ee'noko boo'paru'noo'keta karenaumo kivora doong tee' otoi Kumponing bakaang muu' nau-antavuru'. 4 Ee'noko tenang teing ninka taamanaama otoroi teie orokovuru' Jerusalema'keta tenkenaavaroo'naang, teka nempaava'naang tampuu' tee avuavu' teing-koo Baumai maraka-antavuru'nung, ee' oro', "Aung tee tero naurampiru'nung aa'pama: 5 Jooni Minkinarai tee ntong-koo minkirurima meeka'antaruriko', teka mmou' doong tankinuaruko dii' teing Tanuaang Meekung ninka meeka'antaraiaining."  
 6 Bera teinge tee naro' porora ee' nia'au', "Ovoring, dake ee enang donkompee'naang tee Isireeli tero donkompuu'na'?" 7 Ee'noko teie aa'puru' teing, "Tee kapoo' dii'ke noru'koong deea'; tee bateinananka Mma'ke baka bakaang, bakaange iri'ke pinka'uru'nanka. 8 Tek a dii'ke tee iri' nkaveriaing tenang Tanuaang Meekung dii'koo dau poko, ee'noko dii' teing nkaning ning sira'meriaining anke Jerusalema'ke, ee'noko

ookutunairu Judia' nameensi'koo ee'noko Sameria' ee'noko bera kansii' oparavainoo'ke basi."

### Jiisuu' Paning Koinuu'na'

(Mak 16:19-20; Luk 24:50-53)

9 Ee'noko tee' minkuvura ooai otoko intamparu' tee Jiisuu', bera kamo'navu'ke nopa'ura paa'antavuu' teing-koo duta-ita. 10 Ee'noko tenang paning-aape ankampariri otoroko, tee beko, ta'nina' kenaanka donkaanira mononopa' kakaarai nopa'nii'ka donkonuretu' te' teing-anko. 11 Ee'noko aa'puretu', "Dii' donkaang Kaaleli'nupoong, aming-koo tee' donkoniri paning-aape ooveri otomang? Tee tee Jiisuu' deto intamparing paning-aape dii'ankoita tee, tee' nari' otoi poaing ooverio' paning-aape beina'."

### Mataiasie Judasi Pari'antavuu'na'

12 Teketa Olive'po'namii-eta toroaruru' teing Jerusalema'aape. Due' te' Jerusalema' teketa. 13 Ee'noko osi duparira deto daukava-koo koinau' te' otoroko'noo' aa'ning: Piita, Jooni, Jeemisi, Aanduru', Pilipi', Toomasi, Baatolomiu', Maatiu', Jeemisi tee Alopeasi bauring, Saimoni' Sieloti', ee'noko Judasi Jeemisi bauring. 14 Aing teing nari' otoroi kungsi-koo bii'ka avariko'ning, napo' nari' teing manii', Meeri' Jiisuu' bauko ninka nari', ee'noko teing Jiisuu' baara'mainkaang.

15 Teketa nii'ning doong tankinuko teing Jiisuu' bakaning barevare-nupoong oosiarira Piita meu' donkonuu' teing-koo, deerunoo' narung daaku'keta kenai'ka-pina' otoroi. 16 Ee'noko aa'puu', "Mmaikori' ee, tee Daari Meekunge minkuvuu'nung kara tee bakei dupenumpo' tee Tanuaang Meekunge urikamu' sira'puu'nung Deevita' karantavuma' mme' nkoar-avaruko, aa'naare Judasi minkuari otong tee ee'nara Jiisuu' dai'au'ning barampuri pou'nung. 17 Tee tee nii' ninka deerunii', Ovoringe nii' ninka nari' mintoomarii'naang miru'muru'nung."

<sup>18</sup> Tee aa' tee Judasie kansinameensi' moo'uu'nung teinge mooni'ninge bakaang oraka' nko-koo moo'au'ninge, ee'noko teke bore'ke uroi dua'arara tompoo'kura mintung taapo' bakoaru'. <sup>19</sup> Ookara Jerusalema'nupoonge tee noru'au'nung tee, ee'noko tevora' kansinavora' Akeldama tampau', miru'noo' Tookanavora'.

<sup>20</sup> Ee'noko Piitai napo' karoma aa'puu', "Tee aung naning tee Daari Meekung-koong Kena-koo ee' minkuari otong, 'Bakanavaro tee doonavaravaing ee'noko naning tee' otoauka'."

(Kena 69:25)

Ee'noko

'Nii'nunge bakanoo' tareroma pari'antavaing.'

(Kena 109:8)

<sup>21</sup> Tee'koo, Daari Meekunge tee' minkuvuio' naning Judasi paari-antanung miring tampampiaing tee Ovoring Jiisuu' boo'keta daa'aru'na'koong kara sira'puaing nii' ninka nari'. Nii' Jiisuu' ninka nari' o'norimaing-pina' masika' oro' miru'ampiaing. <sup>22</sup> Tee Jiisuu' ookara bateikoo nanuu'na' siompuko'nung Joonie minkivura meeka'antavuu'noo'keta bera nii'ankoita deto koinuu'noo'ke basi." <sup>23</sup> Ee'noko teinge kenaanka makosira tampaaretu' aa'noko Josepa', nii'noo' Basabas Jaastas ee'noko Mataias. <sup>24</sup> Ee'noko kunsiarima aa'pau', "Ovoring ee, dake nantoong-koong domang noru'ei otomaunge naumeriaing arera narung anaanka-koo kenaankara-koo dake miru'ei otoing amurii' nko-nko nko-koo Judasi pari'antavaing, oovuna' bere'arara bakanamenge oramenge boo'pari beu'nung."

<sup>26</sup> Ee'noko tee' minkuaara siikiitaakii' nkoako Mataias miring tavo'kuu'. Ee'noko teketa tee tee teing ninka nanai'keta narung kara okovuri nkanuka ninka nari' deeruau'.

### Pava-koo Kunsiariko Tanuaang Meekunge Siarara Kung Deempuru'na'

**2** Teketa tee doong parorona'mung Pentekos tampaako'na'mung tavo'kuu' ~kenaanka-taa uiki Baari'koong ~ Paroro divu'kuio'. <sup>2</sup> Te'mung ee'na'mung tee ookara naro'arira naro' otoroko ta'nina' aorong paning-eta pou' piong pankaing uutarama karamana'. Ee'noko teie teva ookutunava maanto'uu' teing ee'ning ba'nana'i otoko'nava. <sup>3</sup> Ee'noko tee kapoo'nanka nta' meneng-pina' oro'nanka urumpariri teing-koo tankaamparira naruna' naruna' pante'ariru'. <sup>4</sup> Ee'noko teing tenang Tanuaang Meekunge maanto'uru', ee'noko oovuning karai kara tutumpariru' Tanuaang Meekunge karantavuriko'.

<sup>5</sup> Tenang tee teke Jerusalema'ke nii'ning nantoong Ju'nupoong otoroko' Kumponing-koo mee'du'piariri otoroko'ning kansikoo ookutunairu-eta paninga boonamenge otoromaing-eta. <sup>6</sup> Ee'noko tee aung aorong paning-etaing taaravaara tee karinga naro' porora teke paapaa'ariko' teing Kumponing-koo mee'du'piariri porou'ning ookara karanankai teing biikaninge kareiao' taaravaara. <sup>7</sup> Ee'noko ta'ninai karakararearima

asikovuriko' aa'paama, "Aing ape' ookara ee' kareaam-atomaing Kaaleli'nupoong, ee'noko arekee'koo nii'ke naruna' naruna' niikana' osina' kareaako taaravarampimang, aing kara aa'ninge: <sup>9</sup> Paasia'na', Mididia'na', Iilama'na', Mesopotemia'na', Judia'na', Kapadosia'na', Poontusina', ee'noko Eesiana', Pirsia'na', Pampilia'na', Iisipi'na', ee'noko Liibia'na' te' Sairini-aapenoo'. Ee'noko Rooma'na' karompimaing damisimainku o'noring ookamurii'ka Ju'nupoong ee'noko nii' dama' Ju'nuka. <sup>11</sup> Napo' nii' Kiriti' ee'noko Arebianupoong tovange nari', taaravarampimang niikana' kareaama sira'paako tee Kumponing bakaang nko-nko purinto'." <sup>12</sup> Ee'noko ookara asikovurira paapaa'ariko' bii'ka aa'peema, "Aung miru' aming ee' oro'?" <sup>13</sup> Teka nii'ninge akapeu'arima aa'pariko', "Aing uaini purinto' naruke maanto'antavaririning."

### Avora'tevora'nupoong Biikana' Taaravaara Naro'ariko Piita Daankivuru'na'

<sup>14</sup> Teka Piita teing ninka nanai'keta narung ninka nari' deto donkonaara deto karoma daankivurima aa'puru',

"Dii' Judia'nupoong ee'noko dii' ookara Jerusalema' otorimaing enang tasi'perii'naang io' barorontarira nkaang kara-koo. <sup>15</sup> Ai' aing teing naikaara kanu'aria' tee' dii'ke noru'erimatomana' aung-koo mme' tane' ninka-koo. <sup>16</sup> Teka aung tee kapoo' teie Joelie teie Kumponing-etaing nakaronarai' urikamu' minkuvuu'nung aa'puu'noo'ka,

<sup>17</sup> "Kumponingee aa'pumaang: Dama'ke doong asi'ning-koo ee' nkoaravaing: Ninge nkaang Tanuaang piampampaing ookutunung nantoong-koo, ee'noko diurukaa' aa'ning donkaang ee'noko maniku' tarampeeariaing ~ ee'noko diikaning nemea'ke paning-etaning aampoonanka ~ ooaavaing ee'noko diikaning pankareu'ke noonenanka nooneaavai. <sup>18</sup> Ee', ee'noko nkaning botovotonaa'nuka aa'ning maniku' ee'noko donkaang teing-koo doong-koo nkaang Tanuaang piampanko tarampeeariaing. <sup>19</sup> Ee'noko ninge ta'nimpaarii'nanka oro'antavampaing a'dei'ke paning-koo, aa'noaing: duaa' mutaanampuai ee'noko kaara erengpina' oro'paravai; <sup>20</sup> Ee'noko taa'ni'antananka a'doonge kansikoo aa'ning oro'antavampai: ereng, nta' ee'noko ii kamo'pina' Ovoring bakana'mung due' poko doong panka'mung ampa'paa'na'mung. <sup>21</sup> Ee'noko tenang ee' nkoaravaing: Baa tee Ovoring bakaang miring-koo eentavaravaing tee domamparavaing."

(Joeli 2:28-32)

<sup>22</sup> "Dii' nantoong Isireeli-nupoong taaraveriaing aing karananka naurampii'naang otoring, tee Jiisuu' Nasareti'nung-koo. Dii'ke tee noru'eri otong tee nko-nko purinto'nanka ee'noko ta'nimpaarii'nanka ee'noko taa'ni'antananka Kumponingee dii'koo meu'ke nkovuining Jiisuu' bakaang birenge. Tee tee' nkovuu'nanka dii'ke noru'erii'naang tee Kumponingee botovuu'nung. <sup>23</sup> Tero Kumponingee taura'pui miru'uu'na' dii'koo bireng-koo sipuko dii'ke oravitu ninka aa'barata'koo ~ taakaverio' boo'paru'nung. <sup>24</sup> Teka Kumponingee deto



daa'antavuu'nung unaa-antavuma boo'ke sisikeera ninka tanke'pui oto'keta, ai' teie pinka'koo koonto' makosi deea' bakei. <sup>25</sup> Ai' temu'ka Deevita'ke Karistoo' miru'uma aa'puu'nung,

'Ninge Ovinge ookara batei-koo ning-ancoa due'ka ooamaung. Tee ning-koo tampavine-koo otoko ning dua'maravauka'. <sup>26</sup> Tee'koo nkaang domang dotumaramaung menenge kenamarama, baru'noo' nkaang mono dama'ke tampa' o'noaina' noru'marama. <sup>27</sup> Ai' dake tee nkaang tanuaang darove'ea' tutueu oto'koo, nii'noo' ning dakaang naning meekung dera'koo tau-ra'meauka'. <sup>28</sup> Dake tee ning tasi'antameing tevung domang-anta bakanavung. Noru'ansi o'nong da' ninka nari' o'noresi doturotue maanto'antameaina'.

(Kena 16:8-11)

<sup>29</sup> "Ee aing mmarang, koonto' tasi'pario' naninge daang tampuauka'na' minkuama'naang tee-koo Deevita'koo. Tee ee'nung aa'nou'nung boo'pario' dako'au', ee'noko dako'au'nou' tee nii' ninka nari' otong e'mung doong-koo basinoo'ke. <sup>30</sup> Teka Deevita' tee nakaronara~ deemparitaa' Kumponing bakaang kara noru'uko'nung. Kumponing mariarama Deevita' maraka-antavuu'nung bakanaving-koo narung oko-antavuu'naang te' bakanoo' ba'naniu tareroma; tee aa'nung tee Kumponing tero Pako'pari'nii' nantoong domampurira tarevuriaing. <sup>31</sup> Tee' ee'na' noru'uitaa' tee' minkvuu'nung tee Pako'pari'nii' daa'aravaing-koo, tee ee'nung tee darove'uaruu'nung tutueu oto'koo ee'noko bakaang mono dera'oaruu'. <sup>32</sup> Tee ee'nung, Jiisuu', Kumponing boo'keta daa'antavuu'nung ee'noko nii' teing tee-koong kara sira'nuka. <sup>33</sup> Enang tee Kumponing-koo tampavine-koo tareroma ba'naniu otong. Bauma-ita tee Tanuaang Meekung maraka-antavuu'nung nkavura teie piampuing nii'koo enang oomererima taamerererimatomaing dii'ke. <sup>34</sup> Ai' Deevita' tee paning-koo deto koinuaruu'nung, teka teie ee'nunge aa'puu'nung,

<sup>35</sup> 'Teie Ovinge nkaang Ovinge aa'puu'nung, "Ning-koo tampavine-koo ba'naniai teing dakaning kare-nupoong dakaning kau' patu'nuka deeng-antarerompainoo'ke basi."

(Kena 110:1)

<sup>36</sup> Dii' ookarai Isireeli-nupoonge tasi'peri noru'eriaing tee tee Kumponing naro'ka aa'noing nari' Ovinge ee'noko tee Pako'pari'nii' deeng-antavuing, tee ee'nung Jiisuu' dii'ke aa'barata'koo taakaveru'nung."

#### Karika'ke Piita Taaravaara Bere'ariru'na'

<sup>37</sup> Enang tee teinge tee taaravaako teie domang too'puru'nung, ee'noko aa'paaru' teing Piita dovang kara okovuri nkanuka, "Ee aing nii'marang, nii' arekee' nkomarii'naang?" <sup>38</sup> Ee'noko Piitai aa'puru' teing, "Bere'darira ee'noko ntong-koo minkiarira meeka'antarariai dii' ookara tee-koo Jiisuu' tee tero domamuri taremuriainoo'koo Pako'pari'nii' bakaang miring-koo Kumponing oraka' nkonanka tonta'deruriaina' ee'noko dii'ke tee avuavu' tee Tanuaang Meekung nkaveriaing. <sup>39</sup> Ai' aung tee ee'nung avuavu' dii'koo

maraka-antavuu'nung ee'noko diurukaa' ee'noko ookara isipo'ke otoromaing. Ee'noko teing ookara teie Kumponing niikaang Ovinge tee-anko po'koo bokuvuriaining oko-antavurii'naang tampuu'."

<sup>40</sup> Teie Piitai tee aa'na' napo' siingoravurima tee' pin-auvuritaa' daankivuru' ee' minkuvuma, "Domaang moo'dariai dii' teieta kiimata-ita aing emu'navarang koonto' deeaing nkavaavaing-eta."

<sup>41</sup> Ee'noko teing bakaang kara te'mung taaravaara, ntong-koo minkiarira meeka'antavarira, teing-koo tapo'ariru'ning naro'ka beenaumo kokorei'.

#### Karistoo'koo Nerakavitu Tampa' Navuei Otoroko'na'

<sup>42</sup> Ee'noko teing bii'ka avariru' aa'nou'naang: kara okovuri nkanuka biikaang nau-anta taaravaama, naro'ke navuariri, taamang nari' tankaampeema kunsiarimatoo'naang. <sup>43</sup> Ee'noko nantoong ookara ookau'ning asikovorou', kapoo'nanka mmou' ta'nim-paarii'nanka ee'noko taa'ni'antananka teinge kara okovuri nkanukai nkoaako. <sup>44</sup> Ookara baito-nupoong naro' navuariri kune'eeko' ookara biikaning kapoo' nari' kompaama. <sup>45</sup> Ee'noko teinge biikaning kapoo'nanka kavonanka baaveaama tankaampau' teing-koo ookara-koo ata'ai otoroko'ning-koo.

<sup>46</sup> Ee'noko doong kante dootuu'nava pankava-koo nari' beroko' sisia'peea', taamang nari' pisi'eema biikanairu-koo domang doturotu ninka avusiro'ariri. <sup>47</sup> Kumponing daangampaako', ee'noko nantoonge tampa' noru'ariko'. Ee'noko ookara doong-koo Ovinge dootuu'nupoong mmou'antavuriko' teing ninka do-maang moo'ariko'ning ninka.

#### Piita naankai Jooni Naning Kau' Doota Pakuvuretu'na'

**3** Nii'na'mung kamunoo' Piita ee'noko Jooni pava dootuu'nava pankava-koo beretu' kungsi-koong bateinang-koo, duaa' ave'arako. <sup>2</sup> Ee'noko naning kau' doota ponto'aru'nou'keta te' otoko'. Tee ee'nung doong kante nkavai poroma sipaako'nung karanaang pava dootuu'nava pankava-koo, miring Tampa' Oro'navarong tampaako'navarong-koo, baka-ee-tavaramaatoonaang dootuu'nava pankava-koo koinaako'ning-koo. <sup>3</sup> Ee'nunge Piita naanka Jooni dootuu'nava pankava-koo bereko oovureta eentavuretu' kapoo' avuree'naang. <sup>4</sup> Ee'noko Piita naankai Jooni naapu narung oovuresi Piitai aa'puu', "Nee' oomereai." <sup>5</sup> Ee'noko tee tenaanka-koo baroromparu' ee' noru'uma: Kapoo' amuree'naang anaankai. <sup>6</sup> Teka Piitai aa'puu', "Aung ee, ning mooni' oto'memua', teka kapoo' ning oto'memuing aroma'naang. Jiisuu' Karistoo' bakaang miring-koo tee Nasareti'nung da' daa'darara naniai!" <sup>7</sup> Ee'noko teie tampanaang-koo bireng-koo kompura deto i'ampuko namu'ke bakaang kau' ee'noko koposiina purimparu'. <sup>8</sup> Bera tee deto dinkitoo'arara donkonui nanuu' ee'noko tumparu' dootuu'nava pankava-koo tenaanka ninka nari', nanu-ma ee'noko dinkitoo'arama Kumponing daangampuma. <sup>9</sup> Kumponing daangampuma nanuko ookara

nantoonge ooaara tee tasi'pau' tee ee'nara baka-een-tavaramaung Tampa' Oro'navarong-koo ba'nanui dootuu'nava pankava-koo. <sup>10</sup> Ee'noko tee teing aa'na' ta'nimpariru' asikovoroma tee-koo kapoo'koo tee-koo nkoaru'nung-koo.

#### Piita Dootuu'nava Pankava-koo Daankiaru'na'

<sup>11</sup> Tenang tee kau' doota taarevora Piita naanka-koo Jooni bi'antavari beio' ookara nantoong teing-anko nari' aivitu-navaro-koo~ miring Solomoni' bakanavaro-koo kua'parira dooroi tavuru'. <sup>12</sup> Ee'noko tenang Piitai oovurira teing tee teka daankivuru' aa'puma,

"Dii' nantoong Isireeli-nupoong, aming-koo ta'niniri-mang aung-koo, ee'noko nee' aming-koo tuutuu'anta narung oomererimaang? Ai' ee' noru'erima aung neekaang purinto'ke ee'noko aarumo meeka'pari oto'ke kau' taare-antavampesing? <sup>13</sup> Teie Kumponingee niikakatauro Eebaraami' dovang, Aisake', ee'noko Jeekopi' biikaange tee Jiisuu' bakaang muu' tarenung meenasi avuio' aung tamparu'antavuing. Tee ee'nung Jiisuu' dii'ke Pailati'anko be'antaveru', ee'noko Pailati'ke unaa-anta-koo tampuio' piaroriaruu'. <sup>14</sup> Tee Jiisuu' naning meekung ee'noko koonto' tee tompimperira naning tavu'nko piaroru' Pailati'ke sing-antarerurii'naang. <sup>15</sup> Ee'noko dii'ke tee Domaang Okonara dupisi'eru', teka tee ee'nung Kumponingee domang-antavuu' boo'keta. Nee'naanka tee-koong kara sira'ka. <sup>16</sup> Ee'noko teie bakaang miring purinto'ke masika'antavampirio' aung naning puring-antavuing ooverima tasi'perimatomaung. Ee'noko teie ee'nunge masika'antai Jiisuu'ketaingee aung naning ookutuario' taare-antavuing dii'koo ookara-koo dutakanoo'ka.

<sup>17</sup> "Emu' tee dii' mmarang, ninge noru'dampiring dii'ke tee noru'eria' tee' nkooveru'nung teing ninka di-ikaning ovontunanka ninka. <sup>18</sup> Teka tee kapoo' Kumponingee tero sira'puu'nung bakaning nakaro-nupoong biikaang karange, tee ee'nung domamuriainoo'koo Pako'pari'nii'ke baike kune'uaing tee' nari' dupe-antavuieng. <sup>19</sup> Ee'noko enang tee Kumponing-koo bere'dariaing dii' teing diikaang oraka' nkonanka piu'deruriaina' ee'noko napo' unaa-anta Ooring-eta komperiai batei makotuko. <sup>20</sup> Tee' nari' bere'dariri otoriko botovuiaing tee naning Pako'pari'nii' dii' domang-anta-koo miru'uu'nung, tee ee'nung Jiisuu'.

<sup>21</sup> Enang tee paning-koo otomatoo'naang bera tee batei Kumponingee ookara kapoo' neraka'antavuinoo'ke basi tee' maraka-antavuu'na' bakaning meekupoong nakaronuka biikaang karange uripo'keta. <sup>22</sup> Aa'nung Moosesie tee minkuarama niikakatauro aa'puru',

'Ooring Kumponingee tee narung nakaronara donkong-antareruriaing dii'koo dama'navarang-koo meu'ke, tee' nari' ning donkong-antamuu'na', ee'noko dii'ke bakei taaraverimaatoaing teing kapoo' naururaining. <sup>23</sup> Ee'noko teing nantoong ookara naruna' naruna' tee ee'nung nakaronara taaravaavauka'ning bakaning nantoong-eta simpe'uriaing.'

(Boto 18:15,18,19)

<sup>24</sup> "Ee'noko Moosesie narung deea', napo' ookara nakaro-nupoongee Samuela'keta doompeto Kumponingee karantavuriko'ningee~ kara e'munung doong-koong sira'pau'. <sup>25</sup> Ooveriko, Ooring bakaang maramaraka tee dii' diikaang, aa'ning teing bakaning nakaro-nupoong biurukaa', ee'noko teing oko'bosi'nu-ka diikakatauro bii'dompenku. Ee'noko tee kara mara-maraka Kumponingee Eebaraami'koo naroompuu'naare Jiisuu' miru'uitaa' ee' minkuvuu', 'Da'dompenge ookara kansinupoong amutemurii' nantoong biraankevuriaing.'

(Pupu' 22:18; 26:4)

<sup>26</sup> Kumponingee Jiisuu', bakaang muu' tarenung, tutung dii'koo botovuu' dii' ookara naruna' naruna' diikaang oraka' nkonanka-ita bere'antarurira biraanke-antarurii'naang."

#### Piita naanka Jooni Dai'aaretu'na'

**4** Ee'noko tenang Jooni naankai Piita teing nantoong karavaareko teing piristi'nanka ee'noko pava dootuu'nava pankava orokovui tarenuka~koong bore' ee'noko teing Noru' Pitunavitu~ te' tenaanka-anko porou'. <sup>2</sup> Porora teing aa'na' iiravorou' taaravaara tenaankai Jiisuu' daankivurema nantoong boo'keta daa'ariaing minkuvureko. <sup>3</sup> Ee'noko aa'na' ka-munoo'uoio' teinge tenaanka dai'aareta kiimatana-va'koo sipaaretu' bera dauna'mung-koo basinoo' otoree'naang. <sup>4</sup> Teka mmau'ke tenaanka-koo tee kara taaravau'ningee masika'antavau'. Ee'noko deerunoo'koo teing nantoong bere'ariru'ning pa'noko' kokorei'koo~ basi.

#### Tuutunampaario' Piitai Maku'uru'na'

<sup>5</sup> Teketa dauna'mung Ju'nupoong koompaara'navitu naro'ariru' aa'ning tarenuka, pankenanka ee'noko boto naunuka. <sup>6</sup> Aanasi, tee ookara-koo dau basi piristi', ee'noko teing donkaang tee ninka Kaiapasi, Jooni ee'noko Aleksanda' narung puata'kooning nari' porou' te' Jerusalema'. <sup>7</sup> Ee'noko tenang teinge tenaanka meu' ba'ng-antavaareta nia'aareko' aa'paarema, "Iri' ee'noko miring baa bakaange tee aung amurii' nkoveremang dee'ke?"

<sup>8</sup> Teketa' tee Piita Tanuaang Meekunge maanto'ui aa'puru' teing, "Dii' tarenuka ee'noko nantoong-kooning pankenanka, taaramerereriai. <sup>9</sup> Dii'ke e'mung nii'na' noru'erima tuutunamererimaatomaung deeko' kapoo' tampara nkoampetu'nung-koo aung-koo kau' doota-koo, ee'noko tee' taarevou'na' noru'koo pi-aroriko deeko' makosi. <sup>10</sup> Naurarampiko tee aung tasi'periaing dii'ke ee'noko ookarai Isireeli-nupoongee tee Jiisuu' Nasareti'nung tee Domamuri Taremuriainoo'koo Tero Pako'pari'nii' bakaang miring ninka tee' nkoampesing. Tee ee'nung, dii'ke aa'barata'koo dupisi'eriko Kumponingee boo'keta daa'uu'nung, tee bakaang iri'ke aung naning dii'koo dutakanoo'ke tam-pa' otoi donkonui otong. <sup>11</sup> Daari Meekunge tee naning Pako'pari'nii' miru'ui ee' minkuvuu'nung,

'Are' ee'nare' kapanare' dii'ke pava kaninukai poore'erima dua'eru'nare' enang ookutunava-koo e'manianare' tumanare' deempario' tasi'periaing!'

(Kena 118:22)

<sup>12</sup> Ee'noko nii'nung domaang moo'muripeu'nung otoa', Jiisuu' narung. Bakei, ookutunairu-koo paning-koo boonameng-koo nii'nung otoa' bakaang miring bokuampiko domamuripeu'nung."

<sup>13</sup> Enang tee teinge tenaanka Piita naanka ee'noko Jooni avororea' deravareko ooaareta ta'ninau'nung, tamunsi'naanka, tampa' barearearu'naanka-pina' noru'aarema. Teketa tasi'paaretu' Jiisuu' ninka nari' otoreko'naanka. <sup>14</sup> Teka tee naning taarevou'nung tenaanka-koo due' donkonuio' ooaama teinge kapoo' minku-koo makosiaavaruu' tenaanka too'deng-koo.

<sup>15</sup> Bera koompaara'navitue dama'du botoaareta bii'ka makenge minkuarima aa'pau', <sup>16</sup> "Arekee' nkoarampii'naang nii'ke anaanka? Ai' ookara Jerusalema'nupoonge tee noru'ai otong ta'nimpaarii' pankaing nkovuresing, ee'noko nii'ke penkempampiarupeu'.

<sup>17</sup> Teka nantoong-koo avitoitoi beremparavaroonaang deeko' potearampiaing anaanka napo' aung ninka miring ninka naning karavureauka'na'." <sup>18</sup> Teketa tee napo' bokuaareta poteaaretu' koonto' minkuvurearoo'naang ee'noko nau-antavaarearoo'naang Jiisuu' bakaang miring-koo.

<sup>19</sup> Teka Piita ee'noko Jooni naankai maku'aarema teing aa'paaretu', "Arekee' tampa', dii' nantoong taarakoo ai' Kumponing? Kumponing-koo dutakanoo'ka maku'na' enang noru'eriai. <sup>20</sup> Nee'ke nii'na' bere'koo makosi deea', teka tee' nari' taaravampema ooampetu'na' minku-koo makosi." <sup>21</sup> Teketa teinge tee sisi-keera avaarepeu'na' papaaravau', ookarai nantoonge Kumponing daangampaako tee-koo nkoaru'nung-koo. Ee'noko aa'na' avoro'antavaareta sipaaretu'. <sup>22</sup> Ai' tee aung naning ta'nina' taarevou'nung tee bakaning mare' karenaumo kivora divu'.

#### Dootuu'nupoong Eentavariru'na' Iri' Nka-koo Tampa' Daankiaririi'naang

<sup>23</sup> Teketa tee Piita ee'noko Jooni sipaaresio' bee'maikorori'anko bereta nauaaretu' kapoo' teinge piristi'nuka-koo ovontunge ee'noko nantoong-kooning pankenankai minkuau'ning. <sup>24</sup> Ee'noko tenang teinge taaravaara tee teing deto aa'na' nari' kareau' Kumponing-anko aa'paama,

"Ovoring, da' Kumponing ookara kapoo' nkoveu'nung aa'nimpo', paning ee'noko kansi' ee'noko pirung. <sup>25</sup> Dake Tanuaang Meekung ninka temu'nung niama Deevita', dakaang muu' uripo' tarevuko'nung, karantavema aa'peu',

'Aming-koo teing akovituri iira ninka daa'arimang? Aming-koo nantoong oraka' makotua'na' nko-koo maroarimaunge! <sup>26</sup> Ookara dauraronanka kansi'koo otoromaing tavu'koo maamuari' otorong. Pankenuka naru'arira otorong tee Ovoring turang-koo ee'noko tee tero Pako'pari'uu'nung nantoong domampuri tarevuri'ainoo'koo.'

(Kena 2:1,2)

<sup>27</sup> "Masika' minkueing, aa'noing Eeroti' ee'noko Poon-tiasi Pailati', Ju'nupoong ee'noko akovitu nari' tapo'ariring aung-koo osi pankaing-koo Jiisuu' turang-koo, tee dakaang muu' tare-koo dake pako'pari'eu'nung.

<sup>28</sup> Teing naru'ariring nko-koo ookara kapoo'nanka dake dakaang iri'ke ee'noko piat tero miru'eu'ning ta-vo'araa'naang. <sup>29</sup> Enang tee mau'mau'maariko ooverira Ovoring iri' ameriaing dakaning botovotonaa'nuka dakaang kara amorompia' sira'pampaina'. <sup>30</sup> Ee'noko dakaang bireng tovorodaravaing nantoong taare-anta-koo, ee'noko taa'ni'antananka ta'nimpaarii'nanka nko-antamemuriai tee dakaang botovotonaa'koo kunge miring Jiisuu' tampampiko."

<sup>31</sup> Enang tee kungsi bakeariko te' ee'noo' teing oosiariru'noo' danu'arako ookara Tanuaang Meekunge maanto'uru', teketa Kumponing bakaang kara sira'paako' avoreaava'.

#### Dootuu'nupoong Domange Dai'ei Pakueeko'na'

<sup>32</sup> Enang tee tevitu ookutunavitu masika'anta-po'navitu domang nari' noru'arima nari' mantompariko'.

Naninge ee' tampua': Kapoo' ning oto'memuining ninka nkaning, teka teing ookara kapoo' nari'

oto'evoroko'. <sup>33</sup> Ee'noko tee ninka iri' pankaing ninka teinge kara okovuri nkanukai Ovoring Jiisuu' boo'keta domamparu'na'koong kara ooau'na' sira'pau', ee'noko ookara biraanke-po'nupoong deempariru'. <sup>34</sup> Naning kapoo'koo ata'oi' otoaruu' teing-koo meu'ke, ai' teinge ookarai aa'nong teing kansi'po'nupoong ee'noko pavapo'nupoonge kanteariri baaveaama moo'noo' nkavaama kara okovuri nkanuka-anko tavo'aako'.

<sup>35</sup> Ee'noko teing naruna' naruna' bii'ka tankaampeeko' ata'oinku-koo. <sup>36</sup> Narung pakupaku nkovuko'nung tee Josepa', nii'na' "Banabasi" kara okovuri nkanukai tampau'na' (miru'noo': domang kuaa'anta bauko) Liivai' bakanarempo'koong, Saiparasi-namui'nung. <sup>37</sup> Teie ee'nunge kansi'nameng baavevura mooni' kara okovuri nkanuka-anko tavo'uu' tankaampaava'naang.

#### Ananaiasi-daring Sapaira Daang Daangamparekotaa' Boo'paretu'na'

**5** Teka narung naning miring Ananaiasi teni ninka ba'aang Sapaira, teringe kansi'koo nii'noo' baavevuretu'. <sup>2</sup> Ee'noko Ananaiasi, ba'aange noru'ui otoko, nii'ning pinka'ura ee'noko nii'ning kara okovuri nkanuka-anko tavo'uu' ookutunung moo' tampuma. <sup>3</sup> Teka Piitai aa'puu', "Ananaiasi, aming-koo da' Sietani'ke domang maanto'koo taura'daring Tanuaang Meekung tosiee'naang mooni'koo nii'ning pinka'ei kansi' baaveveieeng-koong? <sup>4</sup> Tenang mme' baavevea' tevo-ra' tee da' narung okorui otoko'nung. Ee'noko baaveveieenoo'keta tee mooni' tee dakaang, daka piaropeu'na' nkovepeu'. Naninge eturuarupeu' a' tavo'koo. Ee'noko arekee'koo dakaang domange tee' matauei? Ai' dake tee naning tosiea', teka Kumponing tosieing." <sup>5</sup> Tenang Ananaiasie teing kara taaravura tee te' doonko boo' dua'aru'nung. Ee'noko teing nantoong

taaravau'ning aa'na' avoreau'. <sup>6</sup> Teketa nematic' daa'arira mono nopa'aara nkavai berora dako'au'.

<sup>7</sup> Dama'ke beenaumo aua-pina' tankinuko ba'aang te' tavo'kuu' noru'ua' kapoo' nkoaru'nung. <sup>8</sup> Ee'noko Piitai aa'puu' teni, "Naumeai, dee'ke ee masika' kansi' aing-koo mooni' anke otoning-koo makosi baaveveresieeng?" Ee'noko tenie aa'puu', "Ee', teing-koo makosi."

<sup>9</sup> Teka Piitai aa'puu' teni, "Dee'ke arekee'koo nari' mataueresing Tanuaang Meekung Ovoring bakaang paara-koo? Taaraveai da'ung dako'koo beroining-koong kumpikumpiring, enang toroarima karanaang basiarimang. Teinge ee'ninge napo' da' nkarava'naang." <sup>10</sup> Teketa namu'ke teni te' doonko kau'kanoo' boo' dua'aru'. Ee'noko teinge nematic'ke poroma boo'pario' ooaara oko-aape nkavai berora dako'au' ba'ung-koo nameng-aape. <sup>11</sup> Ee'noko avo'avoro' pankaing tavo'kuu' teing-koo ookara-koo dootuu'nupoong-koo ee'noko napo' teing-koo tang taaravau'ning-koo.

#### Kumponing Teing Karistoo' Bakaning Taa'ni'antavuru'na'

<sup>12</sup> Enang tee teinge kara okovuri nkanukai mmau' taa'ni'antananka ee'noko ta'nimpaarii'nanka nkoaako' nantoong-koo meu'ke, ee'noko teing ookutunavitu dootuu'nava pankava-koo Solomoni' bakanavaro aivitu'navaro-koo teke nari' kune'eema otoroko'.

<sup>13</sup> Nii'ning teing-anko po'koo avoreaako', teka bane avoreaama nantoonge deto aa'na' nari' noru'ariko'.

<sup>14</sup> Ee'noko nii'ninge masika'antavaama dau-eta dau Ovoring-koo tampo'ariko', miatara, aa'noko donkaang ee'noko maniku'. <sup>15</sup> Tee' nkoarima teinge siipa-po'nupoong taung sionairu-koo nkavaari poroma batanang-koo ee'noko tani' dovang-koo bempaariko' Piitai teke tankinuma tamung uu'aa' narunge deeko', daka'antavuriko taarevoroo'naang. <sup>16</sup> Ee'noko napo' nantoonge osi oki'nareka'keta Jerusalema' koroai otoroining-eta siipa-po'nupoong po'antavaariko' ee'noko ma'nari orange koriariko'ning, ee'noko ookara nari' taarevoroko'.

#### Koosinunge~ Simpiri'antavuru'na' Teing Kara Okovuri Nkanuka

<sup>17</sup> Teka piristi' deto basi daa'aru'nung bakanavitu Noru' Pitunavitu ninka mamairoi maanto'uri.

<sup>18</sup> Ee'noko teing kara okovuri nkanuka dai'arira kiimatanava-koo tamung siparimanoo' sipaaru'. <sup>19</sup> Teka muunganang Ovoring bakaang koosinunge karanaang kiimatanava-koong daate'ura dama'du sing-antavuru' teing, ee'noko aa'puru', <sup>20</sup> "Berira donkoniriaing te' pava dootuu'nava pankava-koo ee'noko nauereriaing nantoong ookara minkunaa aung amurii' nerakung ootoo'koong." <sup>21</sup> Ee'noko tenang teinge tee' taaravaara tane'ke tero ora'ka pava dootuu'nava pankava-koo berora nau-antavaariko' teke.

Enang piristi' deto basi bakanoo' kara simpe'doma pou' teing ninka nari' otoroko'ning ninka, teketa koompaara'navitu bokuaaru', teing ookara bore'nuka Isireeli-nupoong tarenuka, ee'noko kiimatanava-koo botoaaru' kara okovuri nkanuka po'antavaarii'naang. <sup>22</sup> Teka tenang piatooronanka~ porora teka kiimatana-va-koo ooaaria', ee'noko toroarira tee' minkuau' ooaariaru'na'. <sup>23</sup> Aa'pau', "Nii'ke kiimatanava tampa' pinka'ario' ooampiring, ee'noko tanatavaamaing karanaange donkonaio', teka tenang daate'ampiring narung naning otoa' kuunge." <sup>24</sup> Enang tee teie teing piatooronuka dootuu'nava pankava tareaako'ning-koong bore'ke ee'noko piristi'koo pankenge taaravaara teing aing karananka teing pa-paaravariru' teing-koo. Paapaa'arima aa'paako', "Ai' pa arekee' nkoaraa'naang?" <sup>25</sup> Ee'noko nii'nunge pora aa'puru', "Teing nantoong dii'ke kiimatanava-koo siperereru'ning pava dootuu'nava pankava-koo donkonai nau-antavaarimaang nantoong." <sup>26</sup> Teketa teing piatooronuka biikaang bore' siompai berora bokuaaru' teing, teka tokoona' nkoaaria' avoreai nantoonge kapange too'paari'neeng-koo.

#### Tuutunanoo'ka Kara okovuri nkanukai Ovontung Maku'aaru'na'

<sup>27</sup> Ee'noko teinge po'antavaarira koompaara'navitu-koo uro'kanoo' donkong-antavaaru'. Bera piristi' deto basie nia'urima aa'puu', <sup>28</sup> "Nii'ke bakei koonto' poterarampirieeng dii' tee aung miring-koo nau-antararioroo'naang. Teka dii'ke maanto'antavering aung Jerusalema'nameng teie diikaang naunaue, ee'noko dii'ke nii' tuumpi-koo kei'dorimang aung naning bakaang boo'koo."

<sup>29</sup> Teka Piitai ee'noko teing nii'ning kara okovuri nkanukai maku'aama aa'pau', "Nii' aa' tee Kumponing-koo narung-koo aroo'marii'naang, naning-koo deea'. <sup>30</sup> Teie Kumponingee niikakatauro biikaange daa'antavuu'nung tee Jiisuu' dii'ke dupisi'eru'nung aa'barata'koo bi'erira. <sup>31</sup> Kumponingee pankaing-antavuu'nung deto tee-koo tampavine-koo sipura nantoong biikaang Ovoring ee'noko Domang-anta deemparaa'naang teketa dii' Isireeli-nupoong pakururio' bere'dariko ora-ka' nkonanka tonta'derurii'naang. <sup>32</sup> Ee'noko nii' teing kara sira'nuka aing-koo kapoo'nanka-koo tee ninka Tanuaang Meekung ninka nari', tee ee'nung Kumponingee avuru'nung teing siompaamaing."

#### Kamelielei Ovontung Ka'duu-antavuru'na'

<sup>33</sup> Tenang teinge ovoro'o'nukai tee' taaravaara teing iirai puru'antavurio' teing dupisi'koo piavorou'nung.

<sup>34</sup> Teka teing-koo narung Boto Keperuu'navitu~koong miring Kameliele otoko' ookarai nantoonge tampa' noru'aamaung. Bera tee teing-koo koompaara'navitu-koo meu'ke donkonura aa'puu', "Aing nantoong dama'du sing-antaverereriai io'." <sup>35</sup> Ee'noko teie aa'puru' teing ovooka'nuka, "Dii' Isireeli-nupoong, tampa' tarerariai aing-koo kapoo' orara nkoveri'neeng. <sup>36</sup> Tero

tee naning Tuudas donkonura baka daangampara-ko'nung pankaing tamparama, ee'noko karingai donkaange deerunoo' karenaumo daaku'ke siompaako'. Teka tee tavaako tee teing tee siompaako'ning avitoitoi purarenka'arira paa'ariru'. <sup>37</sup> Tee-koo dama'ke Judasi Kaaleli'nung napo' donkonuu' tenang Siisa'ke nantoong deeruvuriko'nang, ee'noko teie nii'ning barampuru'. Ee'noko tee napo' tee' boo'paru' ee'noko teing ookara tee siompaako'ning purarenka'ariru'. <sup>38</sup> Tee'koo ninge enang dii' aung kapoo' enang tavo'ku-ing-koo naurampimang, donta'dariri otoriaing aing-eta nantoong-eta, siperereriko bii'ka otoroi. Aing kapoo' ainge maroaama nkoaamatomaing naning-etaing deeko' teing dua'aravaining. <sup>39</sup> Teka teing Kumponing-etaing deeko' dii'ke teing dua'anta-koo makosi deea'. Tee' nkorarima deeko' Kumponing ninka turani'nanka deentarii'naang."

### Teing Kara Okovuri Nkanuka Mura'ariko Doturotu-ariru'na'

<sup>40</sup> Bera tee bakaang kara tampa' taaravaara teing kara okovuri nkanuka kuung bokuaarira mura'arima poteaaruu' Jiisuu' bakaang miring-koo kapoo' minkuaavaroo'naang. <sup>41</sup> Teketa tee koompaara'navitu-ankoita berou'nung dotuaririta' Kumponing tau-ra'puru'nung-koo manki' nkavaava'naang bakaang miring-koo. <sup>42</sup> Ee'noko doong kante pava dootuu'nava-koo ee'noko nantoong biikaning pavananka-koo nau-anta-koo sipariaruko' daankiaama Jiisuu' tee naning Kumponing tero Pako'pari'uu'nung~ nantoong domampuri tarevuriainoo'koo.

### Taamang Tankaananka ~Kenaanka-taa Miru'aaru'na'

**6** Tenang ee'ning tee batei-koo Ju'nupoong Jiisuu' siompaako'navitu karinga deempairu', teing-koo nariong Kiriki'na' kareaako'ning ee'noko nariong Iiburu-na', ee'noko teing Kiriki'na' kareaako'ning teing Iiburu-na' kareaako'ning minkuminkuaariko' aa'pama, "Nii'kooning maniku' naaronku tampa' pakuaari-rukoo' doong kante kapoo' tankaampaama." <sup>2</sup> Ee'noko teinge nanai'keta kenaankai ookara Jiisuu' siompaako'ning naro' bokuaarira aa'paaru', "Nii'ke Kumponing bakaang kara daankiampimaung tamung si'koo makosi deea' taamang banto'arampima. <sup>3</sup> Tee'koo dii'ke mmaikori'ke ~kenaanka-taa nantoong dii'kooning nii'ning miru'ereriaing Tanuaang Meekunge ee'noko mataue maanto'nuka tasi'pererita', teing ee'ning aung-koo amurii' nko-nko-koo siparampiaing. <sup>4</sup> Teka nii' tee kungsi-koo ee'noko Kumponing bakaang kara nau-anta-koo amariaing." <sup>5</sup> Ee'noko teie karai minkuau'nunge ookara karinga dotu-antavuru', bera teinge aing aa'ning tampaaru': Sitiveni, naning baito ee'noko Tanuaang Meekunge maanto', teketa Pilipi', ee'noko Porokorus, ee'noko Naikena, ee'noko Tiimon, ee'noko Paramenas, ee'noko Nikolas, tee naning dama' Ju', Antioko'nung. <sup>6</sup> Teing aing ee'ning kara okovuri nkanuka-anko uro'kanoo'

donkong-antavaariko teinge kunsiaaru' tanka' pante'arira teing-koo.

<sup>7</sup> Ee'noko tee' nari' Kumponing bakaang kara kato beremparu' ee'noko Jiisuu' siompaako'navitu aa'na' mmu'ariru' teke Jerusalema'ke, ee'noko mmu'ariru' pirsti'nanka aroo'ariru' Jiisuu' baito-koo.

### Sitiveni Daang Tuumpiau'na' Ovontung-ankoa

<sup>8</sup> Ee'noko Sitivenie tee, Kumponing aa'na' masika'antavuitaa' ee'noko iri'ke maanto'ui taa'ni'antananka ee'noko ta'nimpaarii'nanka nkovuko' nantoong-koo meu'ke. <sup>9</sup> Teka nii'ninge nantoonge daa'arira Sitiveni turampaako'. Teing Ju' nii'noo'nupoong biikaang pava dootuu'nava-koo dootuu'ariko'ning Kiimata-ita Sim-piri'antani'nanka Biikanava tampaako'nava-koo. Teing ee'ning Sairini-nupoong ee'noko Aleksandaria-nupoong ee'noko Silisia-nupoong ee'noko napo' Eesia-nupoong. <sup>10</sup> Teka Tanuaang Meekunge kake'ii-antavui Sitiveni karantavuko~ makosiaavaruko'. <sup>11</sup> Teketa tenang teinge nii'ning nantoong makenge etuaaru'nung tosiarima aa'paava'naang, "Nii'ke taaravampirio' teie Kumponing oraka' minkuvuing, ee'noko Moosesi." <sup>12</sup> Ee'noko terionge tee tosi-koong minkuminkuru aa'na' berempau'nung meu'ke nantoong-koo, ee'noko biikaning pankenanka-koo ee'noko boto naunuka-koo bera aa'na' iiravorou'. Ee'noko teing Sitiveni-anko porora tee baransii'aara koompaara'navitu naro'ariru'noo' tavo'au'. <sup>13</sup> Bera tee daang-koong karananka masikeng-pina' donkong-antavaaru' aa'pau'ning, "Aunge naninge uatepa ava pava dootuu'nava pankava meekava oraka' minkuvumaung ee'noko tee boto Moosesi-ning. <sup>14</sup> Ai' nii'ke tee taaravampirio' minkuvuma aa'pumaung: Teie Jiisuu' Nasareti'nunge ava derovura toomonanka Moosesie amuru'nanka aampari'antavuai." <sup>15</sup> Ee'noko ookara koompaara'navitu teke ba'nampariru'ninge ooai otoko bakaang oing koosinung~pina' oro'paru'.

### Sitivenie Noru'antavuru'na' Kumponing Eebaraami' Tampa' Biraankevu'na' Dootuu'nava Pankava Mme' Otoaruko

**7** Ee'noko pirsti' deto basie aa'puu', "Tee' ee masika' minkuaamang?" <sup>2</sup> Ee'noko Sitivenie aa'puu', "Dii' mmatarang ee'noko mmarang, io' taameri-aing ning. Tee Kumponing meenasi-po'nung Eebaraami'koo niuma-koo oro'paru' Mesopotemia' otoko Aarani'aape mme' tenkenuaruko. <sup>3</sup> Kumponing aa'puu' tee, 'Tenkeniaing anketa dakanoo'keta kansi'keta, dakanamuaing-ankoita, ee'noko ninge naurampainameensi'koo beaing kansi'koo.'

(Pupu' 12:1)

<sup>4</sup> "Teketa Kaldea-nupoong biikanameensi'keta tenkenura tee bera Aarani'namono-koo otoko'. Ee'noko teketa bauma boo'pario' dama'ke Kumponing botovuu' teketa aa' ee'noo' ameensi'koo nii' enang o'norinoo' poo'naang. <sup>5</sup> Teka ameensi'koo navaro oko-antavua', oki'noo' aa'noo' muku'noo' otoa'.

Teka tamung maraka-antavuu'nung dama'ke teing ninka ba'dompenku ninka doompeto dama'ke ta-vo'kaavaining ninka nari' kompaava'naang bane bauring mme' otoaruko. <sup>6</sup> Ee'noko Kumponingee ee'pina' nauvuu',

'Daurukaa' teing dama'ke tavora-nupoong otoroain-ing oovuning biikanoo'ke, teke teing-koo dai'nisinuka deempariri otoromaatoaing oraka' nkoaariko karenau-mo daaku' mare'koo. <sup>7</sup> Teka ninge kiimatavarampaing teing tevitu da'dompenku tang moo'dopa-koo mintoong-antavaariainavitu. Ee'noko teketa tenke-naarai'nange ning anke ameensi'koo porora dootuu'maamatoaing.'

(Pupu' 15:13,14)

<sup>8</sup> "Kumponingee tee'purai'nange teie napo' kara narooing-antaevuu' dopa' toto'naveu-koong. Ee'noko tee'koo Eebaraami' Aisake' bauma deemparara dopa' napu'uu' bakaning doong ~beenang-taa basiarako. Ee'noko Aisake' tee Jeekopi' bauma deemparuu' ee'noko Jeekopi' tee temaia' nanai'keta kenaanka muu'koo oko'bosi'namaia' biuma deemparuu'."

#### Sitivenie Noru'antavuru'na' Biikakatauroi Josepa' Tom-pimpau'nung-koo

<sup>9</sup> "Ee'noko temaia' oko'bosi'namaia' Josepa'koo maimaroarira baaveau' tee Iisipi'aape, teka Kumponing tee tee ninka nari' otoko'. <sup>10</sup> Ee'noko tee unaa-antavuko' teing-eta bakaning arikananka-ita. Ee'noko Kumponingee Josepa' aa'na' matau deeng-antavuiio' Peero'ke, teie Iisipi'nunge dauraronge~, tampa' oovura ovo'ma' deeng-antavuu' Iisipi'naameensi'koo ee'noko bakanava'koo ookutunava-koo.

<sup>11</sup> "Enang tee peera pankaing tavo'kuu' Iisipi'nameng-koo ee'noko Keenani-nameng-koo, ee'noko aa'na' tora'pau'. Ee'noko niumarange taamang besiaama ooaava'. <sup>12</sup> Bera Jeekopi'ke taamang Iisipi'ka taaravura teie botovuru' teing niumarang Iisipi' beero'aava'naang tutuna'namu'koo.

<sup>13</sup> "Ee'noko kemu'kanamu' berou'hang-koo Josepa' baka sira'paru' batatakaampi-koo, ee'noko Josepa' baumaraang tenang Peero'ke noru'uru'. <sup>14</sup> Ee'noko Josepa' botoaru' bauma Jeekopi' boku-koo tee-anko ee'noko ookara bakanamuiiang, nantoong-koong deerunoo' ~kenaanka-taa kivora-ita pa'noko' [75]. <sup>15</sup> Ee'noko Jeekopi' temaia' ninka, niikaang muu'nanka-koo oko'bosi'namaia' ninka, nari' danto Iisipi'aape berora teke otoroittaa' nari' boorou'. <sup>16</sup> Ee'noko Siekama'aape nkavaarira te' kuvi dako'doma bempaaru' Eebaraami'ke moo'uu'noo' nii'ninge mooni'ke Aamoo baurukaa'koo teka Siekama'ka."

#### Sitivenie Noru'antavuru'na' Napo' Moosesi Tom-pimpaako'na'koo

<sup>17</sup> "Teka tee maraka-anta Kumponingee Eebaraami' nauvuu'nung dupearavaing-koong batei due'uma nanuko nantoong tee deto berempariru' teke Iisipi'ke bera nii'nung daurarong tavo'kuu'noo'ke basi Iisipi'naameensi'koo, Josepa' noru'uaung. <sup>19</sup> Teie ni-

ikanamuiiang aavavurima oraka' nkovurima ni-ikakatauro etuvuriko' tootoia oko dua'ariko booroo'naang. <sup>20</sup> Ee'noko tenang ee'nang Moosesi tee tooto' kirokai ponto'aru'. Ee'noko beekuri kaara-koo baumaraange pava-koo kuunga tareau'. <sup>21</sup> Bera tenang baku'koo makotuaruio' taapo' sipau', ee'noko Peero' baurange nkavura bauring deempura tarevuko panka'paru'. <sup>22</sup> Ee'noko Moosesi tee bare-antavaako' ookara mataunanka Iisipi'nupoong biikaning, ee'noko tee iirakuta deemparuu' kara-koo ee'noko nko-nkonan-ka-koo.

<sup>23</sup> "Tenang tee mare' karenaumo kivora deemparara ba'marang beero'koo piavoko', Isireeli baurukaa' tam-paariko'ning. <sup>24</sup> Ee'noko teie oovuu' narung ba'marang-koong narunge Iisipi'koonge oraka' nkovuko, ee'noko tee Iisipi'koong tavura tee si'antavuu'. <sup>25</sup> Ee' noru'ui, 'Ainge mmarange tasi'pai otong Kumponingee nkaang birenge moo'uriaina'. Teka teinge tasi'paava'. <sup>26</sup> Ee'noko dauna'mung napo' Moosesie ba'marang-koonaanka taveereko oovuretu'. Ee'noko navu-anta-koo piavou' aa'puma, 'Anaanka, dee' namainta. Aming-koo dee'ka oraka' nkoreere-maang?' <sup>27</sup> Teka teie narunge ba'maiko' oraka' nkovuko'nunge nimpau'uma aa'puu', 'Da' baie tarenung ee'noko kara simpe'nara~ nee'koo deeng-antaruing?

<sup>28</sup> Ai' dake ning dupisi'mee'naang piaromaang tee' narung Iisipi'koong ke'maaki' dupisi'eiiena' nari'?

<sup>29</sup> Ee'noko tee Moosesi tenaarei naari-antavuiio' Iisipi'keta tenkenui koo'aru' bera Midian-nameensi'nung deemparuu', teke ee'noo'ke baurinketa kenaankara nkoaretu'.

<sup>30</sup> "Teketa tee mare' karenaumo kivora tankinuiio' narung koosinung~ tee-anko pou' teka mee'bora' sir-akamaa'koo Sainai-namii-ankoa, nta'koo urung-koo meu'ke tuu'doi'navari-koo. <sup>31</sup> Tenang Moosesie oovura tee ta'ninuu' temurii'koo, ee'noko tenang due' poko tee oovuu'naang tee aurong Ovoring-etaing karou' aa'puma,

<sup>32</sup> 'Ning tee Kumponing dakakatauro biikaang ee'noko tee Eebaraami' bakaang, ee'noko Aisake' ee'noko Jeekopi'.'

(Toro 3:6)

Ee'noko Moosesi dankuranku'aru' teke, oo-koo avorou'. <sup>33</sup> Ee'noko Ovoringe aa'puu' tee,

'Tee boonamante~ basi'daravai kau'keta. Te' kansii' da' donkonii' otinoo' meepo'. <sup>34</sup> Ninge tee bakei ooaansing Iisipi'nupoonge nkaning nantoong oraka' nkoaariko, ee'noko tee biikaang bairooto ninka birong taaravansing, ee'noko ning depeto simaring teing moo'koo. Enang aroo'meko da' Iisipi'aape botorampaing.'

(Toro 3:5,7,8,10)

<sup>35</sup> "Tee ee'nara Moosesi tero tompimpaama ee' minkuau'nung, 'Da' baie tarenung ee'noko kara simpe'nara~ deeng-antaruing?' - tee ee'nara narung Kumponingee botovuu' tarenung ee'noko domang-anta deeng-antavura teie koosinunge pakuvuiio', tee-ankoi oro'paru'nunge tuu'doi'navari-koo. <sup>36</sup> Teie ee'narai tee' teing barampuru' taa'ni'anta ta'nimpaarii'nanka

nkovuma Iisipi'ke ee'noko teke Pirung Urung-koo ee'noko teke mee'bora' sirakamaa'koo mare' karenaumo kivora-koo.

<sup>37</sup> "Tee aung tee teie Moosesie aa'puru'nung teing Isireeli-nupoong,

'Oving Kumponingee tee narung nakaronara donkong-antareruriaing dii'koo dama'navarang-koo meu'ke, tee' nari' ning donkong-antamuu'na.'

(Boto 18:15)

<sup>38</sup> Bakei masika' siraka'pari otong, tee Moosesi tee teke mee'bora' sirakamaa'koo tee kara pare' deempari otoko'nung teing nantoong Isireeli-nupoong ee'noko tee koosinung aa'ning-koo meu'ke tee ee'nara boto nkavuu'nung Kumponing bakaang kara domang-anta teka Sainai-namii-koo.

<sup>39</sup> "Nka niuaraange tee taara-koo piavoroaruko' dimpa'aama. Biikaang domang Iisipi'aape bere'ariko' Eeroni aa'paama, 'Narung kumponing ta'namemuriaing nii'ke siompampiaing, ai' tee aung Moosesi nii' Iisipi'keta baramuru'nung tee noru'ampia' are' beu'nunge.' <sup>41</sup> Tenang ee'nang teinge boromaka' kampianu paaravaitaa' ta'nampau'hang, ee'noko ako' boontunampariko' teu-koo, dotuarima biikaang nko-nko birenge nkoau'nung-koo. <sup>42</sup> Teka Kumponingee teing-eta bere'arama teka sipuru' ako' dootuu'arii'naang aa'ning-koo: duaa', kaara ee'noko beento'nanka-koo, tee' ee'na' Kumponingee Daari Meekung-koo minkuvuu'na' nari' bakaning nakaronupoong karantavurima ee'pina',

'Dii' Isireeli-nupoong, tero tee diikakatauro mee'bora' sirakamaa'koo otoroko'ning karenaumo kivora mare'koo, ee'noko teinge boromaka' dovang sipisipi'nanka tavaarima dootuu'koo boontunampaariko'. Tee' nkoarima ee masika' ning-koo dootuu'ariko'? Otoa'. <sup>43</sup> Tee aa' teva oki'nava dooponava nkavai nanaako'nava ning Kumponing nkanava deea', daangkoonaanka kumponinka beekanava deeng-antavau'nung, tenaanka aa'noko Moloko' ee'noko tee beento' miring Reepani, tenaanka tamunsi'naanka daangampaaree'naang teka'paaretu'naanka. Ee'noko tee'koo diikakatauro-pina' nari' nkorariko dii' isipo' Babiloni'keta kato bata'dampiaing.'"

(Eimos 5:25-27)

#### Sitivenie Noru'antavuru'na' Dootuu'nava Pankava Biraanke Okora' Deea'

<sup>44</sup> "Teinge niikakatauroi teva dooponava Kumponing ninka karanava kunu'ai nanaako'nung teke mee'bora' sirakamaa'koo. Teva ee'nava Kumponingee Moosesi paaranang nau-antavuu'na' kaninii'nava. <sup>45</sup> Napo' teinge dama'navarange niikakatauroi teie, teva dooponava kunu'aitaa' Josiua' ninka berou'nunge temeen-si'koo akovitu pari'arira tenang Kumponingee teing kare-nupoong bata'uriko uro'kanoo'ke nanuma. Bera teva teva dooponava pankaroong otou'nava bera Deevita' bakaang batei-koo basinoo'. <sup>46</sup> Ee'noko teie Kumponingee Jeekopi' bakaange tee Deevita' aa'na' biraankevuko'nung, ee'noko tee'koo Kumponing

bakanava' masikava' kanievuu'naang tana'uu' Deevita'ke. <sup>47</sup> Teka Solomoni'ke deeko' dama'ke kanievuu'nung teva. <sup>48</sup> Nka tee bane teva pankava kanievuio', Kumponing tee deto basi, nantoonge kaniaamaing-koo pavananka-koo pinka'ari otoaung. Tee' Kumponingee Daari Meekung-koo nakaronung karanavuma aa'puu'na',

<sup>49</sup> 'Paning te' nkanoo' ba'namari ookara tareroma, ee'noko kansi' te' nkanoo' kau' patu'doma. Tee'koo dake ning pava aremurii' kanimemuaing? Nii'noo' are'ka nkanoo' uaroma daa'memuu'naang? <sup>50</sup> Ninge ee nkoampa' nkaange birenge aing ookara kapoo'nanka? Ovingee tee'puu'.'

(Aisaia' 66:1,2)

<sup>51</sup> "Dii' bakei nantoong kontenuka, mutaananuka noru'koo ee'noko tasi'koo. Doong kante dii'ke Tanuaang Meekung bei'bei'erimaung diikakatauro nkoariko'na' nari' nkorarima. <sup>52</sup> Baa arera Kumponing-etaing nakaro-nupoong-koo diikakatauroi oraka' nkoaavaruu'nung? Aa'noma teing tee Naning Koonto' poainoo' uro'ke sira'paako'ning tavaariko', tee ee'nara dii'ke kare-nupoong-anko sierira nari' dupisi'eru'; <sup>53</sup> Dii'ke ee'ninge boto koosinunge po'antavui'o' nkaverira siomperiarukoo.'"

#### Sitiveni Dupisi'au'na'

<sup>54</sup> Enang tee Sitivenie teing kara nau-antavurio' taaravaara tee aa'na' iiravoroma si'da' kakirinkuariko'.

<sup>55</sup> Teka tee Tanuaang Meekunge maanto'ui Sitiveni deto paning-aape ankamparama oovuu' tee meenasi Kumponing bakaang, ee'noko Jiisuu' Kumponing-koo tampavine-koo donkonuio' oovuu'. <sup>56</sup> Ee'noko aa'puu' teie, "Ee aing, ninge ooansi o'nong paning daate'ario' ee'noko Tee Naning-naumpo' Paning-etaing donkonuio' a'dei'ke Kumponing-koo tampavine-koo."

<sup>57</sup> Teka teing punkang pinka'arima aa'na' bokiaama tee-koo na'moong kokoroariru'. <sup>58</sup> Teketa osi panka-mono-ita dama'du baransi'aara teka kapange too'pau' tee. Ee'noko teinge bakaang kara oraka' masika' taaravau'ninge biikaang mononopa'nanka kiru'arira narung nemaka-koo kau'kanoo' miring Soolo-koo sipau' kapange tampa' too'paava'naang tee.

<sup>59</sup> Ee'noko tenang too'paako tee Sitiveni tee kunsiarama aa'puu', "Oving Jiisuu', nkaang tanuaang nkaveai." <sup>60</sup> Ee'noko kinkinura aa'na' bokuma aa'puu', "Oving, aing aung orara nko-nko-koo tonta'antaveriaing." Ee'noko tee' minkuvura tenang boo'paru'.

#### Sooloi Karistoo'navitu Oraka' Nkovuriko'na'

**8** Ee'noko Sooloi tee tampa' noru'uu' tee' Sitiveni boo'paru'na'. Ee'noko te'mung-eta deto aa'na' oraka' nkoaru'nung teing dootuu'nupoong teka Jerusalemaka, ee'noko teing teketa purarenka'eu' avitoitoi aa'ning-koo Judia' ee'noko Sameria'nameensi'koo, nka teing kara okovuri nkanuka tenkenaava'. <sup>2</sup> Teka nii'ninge Kumponing-koo mee'du'piariri otoroko'ninge dako'au' tee Sitiveni aa'na' birompaama. <sup>3</sup> Teka teie Sooloi tee tooreerevuriko' teing dootuu'nupoong pava

kantevui tumparama bera donkaang ee'noko manii' barampurima kiimatanava-koo sipuriko'.

### Kara Okovuri Nkanukai Judia' Ee'noko Same- ria'navora'kai Dooreaaru'na'

(8:4-12:25)

#### Pilipi' Bera Sameria'nupoong-koo Daankiaru'na'

<sup>4</sup> Enang tee teing purarenka'ariru'ning avitoitoi nanaama Kumponing bakaang kara daankiau'. <sup>5</sup> Pilipi' tee Sameria' osi pankaing-koo beu' ee'noko teing-koo daankiarama aa'puu', "Jiisuu' tee naning Kumponing tero Pako'pari'uu'nung~ nantoong domampuri tarevuriainoo'koo." <sup>6</sup> Ee'noko tenang karingai tee taaravaara ee'noko ooaama taa'ni'antananka teie nkovuko'ning domang-eta barorompariko' Pilipi'ke minkuvuko'ning-koo. <sup>7</sup> Ai' nantoong mmou' ma'narie orange koriariko'ning unaavoroko' tenang ma'nari uiarima taapo' teing-eta bakoariko, ee'noko nantoong karinga dootananka ee'noko kaikuu'nanka unaa-voroko'. <sup>8</sup> Bera tee temono-nupoong aa'na' dotu-  
ariko'nung.

<sup>9</sup> Teka teke osi pankamono-koo tee naning miring Saimoni' aa'na' biivimpama otoko'nung ma'nari biikaang iri'ke ta'nimpaarii' nkovuma. <sup>10</sup> Pankaroong bakaang bankinie aavavuriko bera teinge Same-  
ria'nupoonge asikovurima siempaako'; <sup>11</sup> Ee'noko teinge ookarai temono-koo otoroko'ning ee'noko biikaning ovontunankai tee narung barorompaako' aa'paama, "Aung naning nii'nara Kumponing piikonara deto basi." <sup>12</sup> Teka tenang Pilipi'ke doorenanang tampara daankivuu' Kumponing bakaang muu'koong ee'noko tee muu' tarevuaing Kumponing tero Pako'pari'uu'nung tee miring Jiisuu'. Teinge tee taaravaara ookara, donkaang ee'noko manii' masika'antavaara ntong-koo minkiarira meeka'antavariru'. <sup>13</sup> Tee Saimoni' ee'nara bere'arara nari' masika'antavau', ee'noko dama'ke ntong-koo minkiarara meeka'antavarara Pilipi' ninka nari' nanureko', bera taa'ni'antananka ee'noko nko-nko ta'nimpaarii'nanka oovuma asikovuko'.

<sup>14</sup> Enang tee kara okovuri nkanukai Jerusalema'keta ee' taaravau', "Sameria'nupoonge Kumponing bakaang kara taaravaing." Ee'noko teinge Piita naanka Jooni te' botoaaretu'. <sup>15</sup> Bera te' poreta kunsiaaretu' temono-nupoonge Tanuaang Meekung nkavaa-  
va'naang. <sup>16</sup> Ai' teing ookara tee Tanuaang Meekunge mme' korivuria', tamung ntong-koo minkiarira meeka'antavariru'ning Jiisuu' Oving bakaang miring-koo. <sup>17</sup> Bera tenang teing-koo tenaankai beekaang bireng pante'aaresio' Tanuaang Meekung nkavau'.

<sup>18</sup> Enang Saimoni'ke tee tenaankai kara-okovuresi-  
nkarai bireng pante'aareko Tanuaang Meekung nkavaako oovura, temurii' iri' mooni'ke moo'koo pi-  
avou'. <sup>19</sup> Ee'noko bera aa'puu', "Ning amereai tee

temurii' iri', ee'noko baa naning ninge nkaang tanka' pante'ampaing Tanuaang Meekung nkavuaing." <sup>20</sup> Teka Piitai aa'puu' tee, "Tee ninka dakaang mooni' ninka da' nari' paa'daravaing ee' noru'emaatomaung-  
koo Kumponing bakaang avuavu' mooni'ke pa moo'koo makosi. <sup>21</sup> Da' dakaang deea' aung ee' oro' kapoo' nko-koo, ai' da' dakaang domang tee koompar-  
ava' Kumponing-ankoi. <sup>22</sup> Kiimata-koo areoretai' deeko' bere'daravai da' teieta aung-eta dakaang onou orara-  
ita, ee'noko kunsiraravai Oving-koo dakaning oreng tonta'deruaina' baka makosivura deeko'. <sup>23</sup> Ai' da' tee ninge mamairoi maanto' ooramaang ee'noko ora-  
ka'nkoi dai'dui otong." <sup>24</sup> Ee'noko Saimoni'ke maku'uma aa'puu', "Dee' kunsirareaing Oving-koo teing kapoo'nanka minkuveresining ning-koo basiar-  
avauka'na'."

<sup>25</sup> Ee'noko tenaankai Jiisuu' mintoomparako oovureko'na' sira'puresi nauaaretu' teing Same-  
ria'navoru'koo otorou'ning, ee'noko Oving bakaang kara daankivuretu'. Teketa Jerusalema'aape toroaretu' daankivurema tee doorenanang tampara osinanka mmou'koo Sameria'naameensi'kooning-koo.

#### Pilipi'ke Naning Itiopia'koong Kune'uu'na'

<sup>26</sup> Teka narunge koosinunge~ Oving bakaange Pilipi' aa'puu', "Danto beaing tevung-koo taunavung Jerusalema'keta Kasa-aape be'navung-koo." Tevung ee'navung teke mee'bora'ke nanu'navung. <sup>27</sup> Ee'noko tee i'amparara nanuma narung Itiopia'koong oovuu', naning pankaing, do'ma'nii', teni Kandesi, Itiopia'nupoong biikanani ovorinaang bakaang mooni' tarenara; <sup>28</sup> Ee'nara Jerusalema'aape pou' dootuu'araa'naang ee'noko toroarako' teketa' bakaang kaarisi-koo ba'nani deeruvuma nanuko' Daari Meekung teie temu'nung nakaronarai Aisaia'ke daarivuu'nung. <sup>29</sup> Ee'noko Tanuaang Meekunge Pilipi' aa'puu', "Deto bera kaarisi-ankoi due'ke nari' naniai." <sup>30</sup> Teketa Pilipi' kua'paru' tee-anko ee'noko teie tee temu'nung nakaronung Aisaia'ke daarivuu'nung deeruvuko taaravuu'. Ee'noko tee Itiopia'koong nia'uma aa'puu', "Dake ee' tee kapoo' deerue-  
matomaung tasi'pemaang?"

<sup>31</sup> Ee'noko teie aa'puu', "Arekee' ninge tasi'pampeu' naninge pakumuaruko?" Ee'noko Pilipi' bokuvuu' deto koinura tee-anko ba'nani'naang. <sup>32</sup> Tee kara Daari Meekung-koo deeruvuko'naare anaare:

"Kumponing bakaang bautara dupisi'aava'naang nkoaako karang kamaankuauka'nung tee' nari' sip-  
isipi'nu amakoarapeu'na' nantoonge tavu'doma barampai beroko.

<sup>33</sup> "Teinge poore'aama kara koonto'na' simpe'evaavau-  
ka'. Teing nantoong bakanavarang-kooning bakei aa'nupoong: tee bakaang domaang teie, kansi'keta koonto' tonta'aavaing."

(Aisaia' 53:7,8)

<sup>34</sup> Ee'noko teie Itiopia'nunge Pilipi' aa'puu', "Ee aung, teie nakaronarai baa tee' minkuvuu'? Baka minkuaru' ai' nii'nung tee' minkuvuu'?" <sup>35</sup> Tenang ee'nang Pilipi'



karoma tenaare Daari Meekung-koong deeru-vuu'naare-ita tutumpuma tampara doorenang Jiisuu' Karistoo'koong nauvuu'.<sup>36</sup> Ee'noko teketa nanurema taunge ntong-po'noo' basiaretu'. Ee'noko teie Itiopia'koonge aa'puu', "Ooveko ntong aung. Aminge avo'mupeu' ning enang ntong-koo minkimarara meeka'anta-koo?"<sup>37</sup> Pilipi'ke aa'puu', "Tee aa' kapoo' otoa', dakaang domang-eta koonto' masika'antaveing deeko'." Ee'noko teie maku'uma aa'puu', "Masika'antavansi o'nong tee Jiisuu' tee naning nii' domamuri tare-muriainoo'koo tero Pako'pari'nii', Kumponing Bauring."

<sup>38</sup> Ee'noko tee ee'nara botoaru' tee bakaang kaarisi te' datearaa'naang, ee'noko tenaanka ookaanka Pilipi' ee'noko tee Itiopia'koong doonko ntong-koo siareta Pilipi'ke teka ntong-koo minkivura meeka'antavuu'.<sup>39</sup> Ee'noko tenang ntong-eta deto taapo' poreko Tanuaang Meekunge Ovoring bakaange Pilipi' namu'ke deto batusi'uu', ee'noko teie Itiopia'koonge napo' kemu'kana' oovuaruu' teka. Teketa dotuarama danto nanuu' bakanoo'aape.<sup>40</sup> Teketa Pilipi' Asotasi-navuntu'koo oro'paru', ee'noko teke tankinuma ookara osi-koo tee doorenang tampara daankivuma nanuu' bera Sisaria' basiaru'.

#### Soolo Bere'aru'na'

(Nka 22:4-16; 26:9-18)

**9** Tenang ee'nang tee Soolo domange sipuko'nang teing Ovoring bakanariong tavu'koo.<sup>2</sup> Ee'noko tee ee'nara piristi' deto basi-anko pora nia'kuu' nii'ning karavotoning~ daarievu'naang, bera teing kompui pava dootuu'nanka-koo Damaskasie otointing-koo nanama aa'noo'naang: donkaang ee'noko manii' Karistoo' siompaako'ning oovurira deeko' dai'urira Jerusalema' be'antavurii'naang.<sup>3</sup> Bera tee teketa nanuma Damaskas-navuntu'koo due'arako ta'ning-antana' paning-eta arakai siisioi korovui too'puu'nung.<sup>4</sup> Ee'noko te' doonko kansi'koo dua'arara aulong taaravuu' aa'puko, "Da' Soolo, Soolo, ning aming-koo dake manki'antamemaung?"<sup>5</sup> Ee'noko teie aa'puu', "Da' baa Ovoring?" Ee'noko aa'puu', "Ning ee'nara Jiisuu' dake manki'antamemaung. Nkaang kara dimpa'ema daka baikeraramaung irinto' deemparako."<sup>6</sup> Ee'noko Soolo aa'na' ta'ninui dankuranku'arama aa'puu', "Ning aming nkoama'naang, Ovoring?" Ee'noko teie Ovoringe aa'puu', "Enang donkonira te' Damaskas beaing, ee'noko teka nauraavaing kapoo' dake nkoveaing."<sup>7</sup> Teing nantoong tee ninka nari' nanaako'ning teing teke kareaava' donkonai otorou'nung, aulong taaravaama, teka naning ooaava'.<sup>8</sup> Teketa kansi'keta deto i'amparara Soolo duta bantoma makotuaruu' kapoo' oo-koo. Ee'noko tee bireng-koo kompai ootavau' Damaskas-aape.<sup>9</sup> Bera beenang doong kaputu'ari otoi taamang ee'noko ntong-koo naikua'.

#### Ananiasie Soolo Duta Bantang-antavuu'na'

<sup>10</sup> Enang tee teke naning narung Ovoring bakanavitu-koong otoko'nung miring Ananiasie. Ovoringe tee

tee-koo oro'parara karavuma aa'puu', "Ananiasie ee." Ee'noko teie aa'puu', "Ovoring ee, ning aung."

<sup>11</sup> Ee'noko Ovoringe nauvuma aa'puu', "Naniaing taunavunge miring Koonto'navunge, bera Judasi bakana-va-koo nia'kiaing naning oo-koo miring Soolo, Taasunung. Tee kunsiamang teke.<sup>12</sup> Ee'noko kunsiamama nii'naung~koo bere'arara naning miring Ananiasie pora bireng pante'uko oovuing duta bantang-anta-koo."<sup>13</sup> Teka Ananiasie maku'uma aa'puu', "Ovoring, ning tee nantoonge mmau'ke naumaako taaravamaung tee. Nantoong dakaning aa'na' oraka' nkovurimaung Jerusalema'ka.<sup>14</sup> Ee'noko tee aung taura' oto'evung piristi'nanka-koo ovontunge avau'nung dai'koo teing nantoong anke dakaang miring-koo baitoarimaing."<sup>15</sup> Teka Ovoringe aa'puu' tee, "Beai, ai' tee tee naning ninge tero miru'antu'nung nkaang miring nkavui nanuma daankivuu'naang ookara nantoong-koo, aa'ning-koo Ju'deeaing, dauraronanka, ee'noko teing Isireeli-nupoong.<sup>16</sup> Ee'noko dama'ke tee ninge nau-antavampaing tee aa'na' baike kune'uaina' nkaang miring komputaa'."

<sup>17</sup> Tee' minkuvuio' Ananiasie siarara pava-koo koinuu'. Bera tee-koo bireng pante'uma aa'puu', "Mmaiko', Soolo, teie Ovoring Jiisuu'ke da'koo oro'parieenge taunge da' poieenavung-koo ning botomuing da' napo' ookira Tanuaang Meekunge maanto'duu'naang."<sup>18</sup> Ee'noko tenang tee'puko ta'nina' kapoo' tenteng-pina' oro' Soolo bakaang duta-ita dua'arako napo' ookuu'. Ee'noko tenang teketa i'amparara ntong-koo minkiaio' meeka'antavaru'.<sup>19</sup> Ee'noko taamanura purimparu'.

#### Soolo Daankiaru'na' Damaskasie

Teketa nii'ning doonge Karistoo' bakanavitu ninka otorou' teke Damaskasie.<sup>20</sup> Ee'noko pava dootuu'nanka-koo namu'ke daankinang tutumparu' Jiisuu' ee' sira'puma, "Tee tee Kumponing Bauring."<sup>21</sup> Ee'noko teing ookara tee taaravau'ning ta'ninaama aa'pau', "Aung ee tee naning Jerusalema'ke teing aung Jiisuu' miring tampaama baitoaamaing tooreerevurimaung deea'? Ee'noko tee' nari' napo' temurii' aarumo nko-koo a' poi dai'urima piristi'nanka biikaang ovontung-anko tavo'koo."<sup>22</sup> Teka Soolo aa'na' masika' deto irikumparako' ee'noko Ju'koong ovontung Damaskasie otoroko'ning apoo'uriko' siraka'antavuma Jiisuu' tee ee'nara Kumponing nantoong domampuri tarevuriainoo'koo tero Pako'pari'uu'nung~.

<sup>23</sup> Bera mmau' doong divu'uiuio' Ju'koong ovontunge mumunsiau' dupisi'aava'naang tee.<sup>24</sup> Teka tee biikaang mumunsinang tavaava'naang nempaako'nung osi karanaang aa'ning-koo doong ee'noko muung, taaravuu'.<sup>25</sup> Teka ba'maikori'ke muunga mmari'antavaama burunge doonko osi-koong parang-koo dama'due sing-antavau' ka'baraa'koo otoko.

### Soolo Jerusalema' Toroarara Otoko'na'

<sup>26</sup> Ee'noko tenang Jerusalema' pora teing Karistoo' bakanavitu navu-koo paaravarako', teka teing avore-aako' tee-koo Karistoo' bakanavitu-koong-pina' masika'antavaavaruma. <sup>27</sup> Teka Banabasie bokuvura kara okovuri nkanuka-anko be'antavura siraka'antavuu' teing-koo teie Ovinge taunga karavuko oovuu'na' ee'noko tee' tee Damaskasie avoroa' Jiisuu' bakaang miring ninka daankiaru'na'. <sup>28</sup> Bera tee teing ninka data-antaveera teke Jerusalema'ke aa'na' iri'oi Ovinge bakaang miring-koo daankinang nkovuko'nung. <sup>29</sup> Napo' aa'na' nari' karavurima deepaiko'eeko' teing Ju'nupoong Kiriki'na' kareako'ning Jiisuu' masika'antavaavaruma, ee'noko teinge dupisi'aava'naang besiaako'. <sup>30</sup> Ee'noko tenang teinge nari' baito-nupoonge tasi'paara Sisaria'navuntu'aape be'antavau'. Teketa napo' kato bakanoo' Taasus-aape botoau'.

<sup>31</sup> Enang tee Soolo bere'aru'noo'keta dootuu'nupoong Judia'ke ee'noko Kaaleli'ke ee'noko Sameria'ke otoroko'ning mooa-koo otoroi purimparirunung, ee'noko Ovinge-koo mee'du'piariri otoroko Tanuaang Meekunge domang kuaa'antavurio' berempariru'.

### Piitai Inias Taare-antavuu'na'

<sup>32</sup> Teketa tenang Piitai beero'urima avitoitoi nanuko'ngang, tee' nanuma Liida-namono-koo pou' Ovinge kake'iariri siempaamaing-anko. <sup>33</sup> Tee' nanuma naning doota miring Inias kune'uu' mare' ~beenau-mo-taa-koo pankaroong bempari nari' otoko'nung. <sup>34</sup> Ee'noko Piitai aa'puu' tee, "Inias, teie Jiisuu'ke, Kumponingero tero Pako'pari'nii'ke da' taare-antaruing. Deto donkonira dakaang tani' kai'eai." Ee'noko namu'ke deto i'amparu' tee. <sup>35</sup> Bera Liida-nupoonge ee'noko Saaron-nupoonge ooaara tee Ovinge-aape bere'ariru' teing.

### Piitai Tabita Boo'keta Daa'uu'na'

<sup>36</sup> Teketa napo' nani manikuma Jiisuu' siompuko'nani miring Tabita, nii'noo' Dookasi otoko'. Teni teni tampani, papovuru'nanka pakuvuriko'nani. <sup>37</sup> Tenang tee batei-koo teni siipavora boo'paru'. Ee'noko duu'paara daunavaro-koo bempau'. <sup>38</sup> Te' Liida Joopa'keta due' deemparako, ee'noko Piita teke otoko taaravaara teinge Liida-nupoonge Jiisuu' siempaako'ninge kenaanka naninka botoaaretu' Piita bokuvuree'naang aa'paama, "Aung ee, namu'ke poai nii'anko." <sup>39</sup> Teketa tee Piita tenaanka ninka nari' porou'nung. Tenang tavo'arako tee teinge daunavaro-koo be'antavau' te' ookara naaronku donkonai birompariko'noo'. Ee'noko nau-antavau' teing amutemurii' baarong Dookasie pate'uko'nanka tenang teni teing ninka otoi.

<sup>40</sup> Teketa Piitai teing ookara dama'du botovurira kinkinura kunsiaru'. Bera mono-aape bere'arara aa'puu', "Tabita, i'antaravai." Ee'noko teni duta bantoma Piita oovura deto ba'nanuu'. <sup>41</sup> Bera Piitai bakaang birenge

kompura deto i'ampuu'. Ee'noko ookara baito-nupoong teing ninka naaronkunanka ninka nari' bokuvurira teni domampo' avuru'. <sup>42</sup> Ee'noko ookarai Joopa'navuntu'nupoonge taaravaara karingai Ovinge masika'antavau'. <sup>43</sup> Bera Piita tee teke Joopa'ke mmou' doong otou'nung nii'nara Saimoni' bakanava'koo, kau' karenaumo-koong dopa' takera'uma baavevuko'nung bakanava-koo.

### Koniliasie Koosinung~ Oovuu'na'

**10** Teke Sisaria'namono-koo tee narung naning otoko' miring Koniliasie, narung daaku' piatooro~ tanatavuriko'nung, Itali-nameensi'nupoong tampariko'ning. <sup>2</sup> Koniliasie tee naning dootuu'koo tampara, Kumponing-koo amaiaa'oi mee'du'piari otoko' bakanava-kooning ninka nari'. Ee'noko Ju'nupoong ata'oi'nuka mmou' mooni' avurima pakuvuriko'. Tee ee'nung kungsi bauko Kumponing-koo.

<sup>3</sup> Nii'na'mung kamunoo'aapevuko Kumponingee nii'naung~koo bere'antavuiu' koosinung sira'pari poio' oovuu' Kumponing bakaang. Pora aa'puu' tee, "Koniliasie ee." <sup>4</sup> Ee'noko teie tee oovui avoro'ke korivuma aa'puu', "Arekee', Ovinge?" Ee'noko teie aa'puu', "Dakaang kungsi ee'noko dakaang avuavu' Kumponing-anko tavo'kuio' tasi'deruing. <sup>5</sup> Enang nantoong Joopa'aape botoveriai ee'noko narung Saimoni' nii'noo' miring Piita bokuaavai teka. <sup>6</sup> Nii'nung Saimoni' ninka nari' otoreng, dopa' kau'karenaumo-koong takera'umaung ninka. Bakaang pava pirung due'ke otong." <sup>7</sup> Tenang tee koosinung tee kara nauvuu'nung tenkenuko teie kenaanka bakanaanka bautarara bokuvuretu' ee'noko narung piatooronuka-koong Kumponing-koo mee'du'piari otoko'nung teke nempariri otoroko'ning-koong. <sup>8</sup> Ee'noko ookara kapoo'nanka nauvurira Joopa'aape botovuru' teing.

### Piitai Kapoo' Nii'naung~koo Bere'arara Oovuu'na'

<sup>9</sup> Teketa dauna'mung duaaki'ngang teing nanaama te' due' basiariko osi pankamono-koo Piita daunavaro-koo pava-koo koinuu' teke kunsiaraa'naang. <sup>10</sup> Ee'noko teke aa'na' peeravora kapoo' nai-koo piavoko'. Teke nii'ning iapavariko tee nii'naung-koo bere'arara paning daate'ario' oovuu', bera kapoo' baarong pankaing-pina' sivere'ari depeto kansi'koo siaru' karenaumo kunku'doi'koo bi'ari. <sup>12</sup> Tenaakoo kuunge amutemurii' kau' karenaumonanka, boru'nanka ee'noko barennanka auvi'au-kooning otoroko. <sup>13</sup> Teketa aurong ee' taaravuu', "Piita, deto donkonira tavera maa'eai." <sup>14</sup> Teketa Piitai aa'puu', "A, Ovinge, ninge temu'keta koonto' aing kapoo' ee' oro' maa'ampaung, ai' aing teing ku'mi'po'ning orokoari otong nii'koo Ju'nupoong-koo."

<sup>15</sup> Ee'noko aurong napo' karou' kemu'kana' aa'puma, "Aming kapoo' Kumponingee kiirora'antavuing dake kapoo' ku'mi'po'nung tampema poore'eauka'."

<sup>16</sup> Asi'na'moo beemu'pina' nkoario' tee baarong napo' da'deng paning-aape deto nkavuu'.

### Piita Bokuau'na' Koniliasi-anko

<sup>17</sup> Enang tee Piitai nii'naung-koo bere'arara kapoo' oovuu'nung-koong miru'noo' besi'uma norunoru'uko teing nantoong Koniliasie botovurio' porou'ning teke nia'kaakotaa' Saimoni' bakanava'koo karanaang-koo due' donkonai' otoroko'. <sup>18</sup> Ee'noko bokiaama aa'pau', "Tee ee Saimoni', nii'noo' miring Piita, anke otomang?" <sup>19</sup> Piitai tee mme' tee nii'naung-koo bere'arara oovuu'nung-koong miru' nooruupivuko Tanuaang Meekunge aa'puu', "Ee aung, nantoong beenaumoi da' besi'daamang. <sup>20</sup> Donkonira doonko sirarara teing ninka nari' beriai tokoona' noru'ea', ai' teing teing ninge botoaransining." <sup>21</sup> Ee'noko Piita doonko siaru' teing-anko ee'noko aa'puu', "Ning ee'nara aung dii'ke besi'merimatomaung. Aming kapoo'koo porininge?" <sup>22</sup> Ee'noko teinge aa'pau', "Koniliasi, tee daaku' pia-tooro tanatawurimaung, tee naning koonto' ee'noko Kumponing-koo aa'na' amaiaa'oi otomaung ee'noko tee ookarai Ju'nupoonge tampara tampaamaung, narunge meekunge koosinunge botovui' da'anko botoaring da' bakanava-koo bee'naang ee'noko taaravuu'naang kapoo' dake minkuveaining." <sup>23</sup> Tee' taaravura tee teie kuung bokuvurira na'mung muung teke asiaiu'.

### Piita Koniliasi-anko Beu'na'

Teketa dauna'mung tee daa'arara teing ninka nari' berou', ee'noko nii'ning baito-nupoong Joopa'keta nari' siompau'. <sup>24</sup> Ee'noko keina'mung Sisaria' basiariru', Koniliasie nempuri otoko ookara ba'marang ee'noko ba'maikori' naro' naru'urira. <sup>25</sup> Tenang Piita tumparako Koniliasie kune'ura kau'kanoo'ke miinge keemparara pankaing-antavuu' tee. <sup>26</sup> Teka Piitai deto i'ampuma aa'puu', "Donkoniai, ning tee naning, da'pina' oro'." <sup>27</sup> Ee'noko nari' karorema kuung basiarema nantoong karika' oovuru' teke naru'ariri' otoroko.

<sup>28</sup> Ee'noko aa'puru' teie teing, "Dii'ke tee noru'eri otong Ju'nupoong niikaang botoi taura'muria' nii' oovunavitu ninka nari' navu-koo nii'noo' beero'koo, teka Kumponing tero naumuieeng ninge baa naning tamunsi'nung nii'noo' ku'mi'po'nung tampamparoo'naang. <sup>29</sup> Tee'koo ning-koo botoraririo' ning tee aung moing kupi'moa'. Enang nia'damaang ninge da': Aming-koo ning-koo botorarieenge?"

<sup>30</sup> Ee'noko Koniliasie aa'puu', "Karenang doong tank-inuieening-koo duaa' enang-pina' basiarako batei kamunoo'hang-koong kungsi siompansi kunsimarako anke nkanava-koo ta'nina' naning narung ning-koo uro'kanoo' donkonuu' mononopa' sisisiisi kurumpari. <sup>31</sup> Teie aa'muu'nung, "Koniliasi, Kumponing dakaang kungsi taararering ee'noko dakaang avuavu'nanka ata'oinku-koo nkovemaung noru'derueenge.

<sup>32</sup> Tee'koo aa'damaang: Joopa'aape Saimoni'anko, nii'noo' miring Piita tampaakoo', botoraravai. Nii'nung Saimoni' bakanava-koo otomatoing pirung-koo due', tee dopa'nanka kau'karenaumo-koong tak-

era'umaung.' <sup>33</sup> Tee'koo da'anko iri'narung botomaru', ee'noko tampa' tampamang da' aa' poing-koo. Tee'koo nii' ookara anke naru'mariring Kumponing-koo uro'kanoo' teing kapoo' Ovinge botoruining naumeriko taaravampii'naang."

### Piita Daankiaru'na' Koniliasi Bakanava-koo

<sup>34</sup> Ee'noko Piitai daankinang tutumpuma aa'puu', "Masika' enang tampa' tasi'pansi otong Kumponing tero nantoong tankampuriaung, teka nantoong paninga boonameng-koo-nupoong Kumponing mee'du'piai koonto' otoromaing tero Kumponing dotu-antavaamaung. <sup>36</sup> Aung tee kara Kumponing Isireeli ba'dompenku-anko botovuu', tee doorenang tampara ee' minkuvui oting: Jiisuu' tee naning Kumponing tero Pako'pari'uu'nung nii' ookara domamuri taremurainoo'koo, ee'noko tee'koo Jiisuu' ookara-koo naru'ka Ovinge deempari otong, ee'noko tee-koo kuunge mooa-koo o'noriaing. <sup>37</sup> Dii'ke tee noru'eri otong tee minkunaa beremparu'nung ootukunairu-koo Judia'ke Kaaleli'keta tutumparara tenang Jooni Minkinarai daankivuko'noo'keta dama'ke.

<sup>38</sup> Tenaare anaare: Kumponing Jiisuu' Nasareti'nung Tanuaang Meekung ninka iri'antavuma pako'pari'uu'. Teketa nantoong tampa' nkovurima avitoitoi nanuko' teing Sietani'ke korivuriko'ning unaa-antavurima, ai' tee tee Kumponing ninka nari' otoreko'nung. <sup>39</sup> Nka nii' teing, ookara kapoo'nanka sira'nuka teie nkovuko'ning teke Ju'nupoong biikanoo'ke, nka baru'noo' Jerusalema'ke, ee'noko teinge teka dupisi'au'na' koi'koo bi'aara. <sup>40</sup> Teka Kumponing beenang doong tankinuu' tee bou'noo'keta daa'ura sira'puu'. <sup>41</sup> Ookara nantoong-koo tee oro'parava', teka Kumponing nii' bakaning sira' nkonuka miru'murita' nii'ankoi oro'antavuu' ee'noko nari' taamang tovang ntong naiampiko' boo'keta daa'arara. <sup>42</sup> Ee'noko teie nii'ke ooampiru'na' nau-antavampii'naang botomuru' ookara nantoong daankiarampima tee Jiisuu' tee Kumponing pako'pari'uu'nung boo'nuka ee'noko domantoo'nuka simpe'koo. <sup>43</sup> Ookara urikupoong nakaro-nupoong Kumponing-etainge ee' nari' sira'pau'nung:

'Ookara nantoong tee masika'antavaavaining tonta'anta kompaavaing tee bakaang miring-koo kuunge.'"

(Aisaia' 33:24; 53:5,6; Jeremaia 31:34; Danielo 9:24)

### Nantoong Ju'deeaing Tanuaang Meekung Nkavau'na' Koniliasi Bakanava-koo

<sup>44</sup> Tenang Piita tee' minkuari otoko Tanuaang Meekung tee teing-koo ookara-koo tee kara taaravau'ning-koo pou'. <sup>45</sup> Ee'noko teing Ju'nupoong Karistoo' masika'antavaako'ning nari' Piita ninka porou'ning bakei ta'ninau'nung, aming-koo, nna' Tanuaang Meekung teing-koo piampario' bane Ju'deeaing. <sup>46</sup> Ai' teinge tee oovuning karai kareaama Kumponing daangampaako taaravaaru'. Teketa Piitai siraka'antavuma aa'puu', <sup>47</sup> "Baie orokovuripeu' aing ntong-koo

minkie meeka'anta-koo? Ai' aing teing Tanuaang Meekung nkavaining nii'pina' nari'." <sup>48</sup> Ee'noko teie botovuru'nung ntong-koo minkiarira meeka'an-tavarii'naang Jiisuu' Karistoo' bakaang miring-koo. Teketa teinge Piita dateau' nii'ning doong nari' otoroo'naang tampaama.

**Piitai Ba'marang Nauvuru'na' Kumponing Ju'deeaing Biraankevuru'na'koo**

**11** Enang tee Ju'deeaing Kumponing bakaang kara nkavaio' taaravau'nung kara okovuri nkanukai ee'noko ookara baitoariko'ninge Ju-dia'nupoonge. <sup>2</sup> Tee'koo Piita Jerusalema'aape toroario' teinge dopa' toto'koo purimpariko'navitue tutunampau', aa'paama, <sup>3</sup> "Da' aming-koo teing ninka dopa' napu'ariaing ninka pava-koo bera nari' taamanirieeng?" <sup>4</sup> Teka Piitai ookara kapoo' okora'keta nkoaru'na' nauvurima siraka'antavuu'. <sup>5</sup> Aa'puu', "Ning teke Joopa'navuntu'koo kunsimarama o'noi nii'naung-koo bere'marara kapoo' pankaing baarong-pina' si-vere'ari paning-eta depeto siarako karenaumo kunku'doi'koo bi'ari noone-pina' ooantu'. Ee'noko tee ning-anko siaru'. <sup>6</sup> Bera tee-koo ookama kau' karenaumonanka oarantu', nii'ning iirankesi'nanka, ee'noko boru'nanka ee'noko barennanka auvi'au-kooning. <sup>7</sup> Ee'noko ninge aurong taaravantu' aa'muko, 'Piita, donkonira tavera maa'eai.' <sup>8</sup> Teka ninge aa'pantu', 'A, Oving, temu'keta koonto' aing kapoo' ee' oro'ke ning karang komuaru'nung, ai' aing teing ku'mi'po'ning, orokoari otong nii'koo Ju'nupoong-koo.' <sup>9</sup> Ee'noko teie auronge napo' kemu'kana' paning-eta karoma maku'muma aa'puu', 'Aming kapoo' Kumponing kiirora'antavuing dake ku'mi'po'ning tampema poore'eauka.' <sup>10</sup> Bera tee beemu'pina' nkoario' napo' paning-aape ookutunung deto baram-puu'.

<sup>11</sup> Ee'noko napo' tenang tee batei-koo beenaumo nantoong Sisaria'keta ning-anko botoaaru'ning porou' te' teva-koo nii' o'noriko'noo'. <sup>12</sup> Ee'noko Tanuaang Meekunge ning teing ninka nari' merii'naang boto-muu' tokoona' noru'marava'. Ee'noko aing nii'maikorori' ~narung-taa ni'ninka nari' nanampiru' bera te' tee naning ning bokumuu'nung bakanava-koo tumariru'. <sup>13</sup> Ee'noko teie naumuru' tee' koosinung bakanava-koo pora tee-anko donkonuio' oovuu'na' aa'puma, 'Joopa'aape botoraravai Saimoni', tee Piita tampaamaung boku-koo. <sup>14</sup> Teie ee'narai siraka'antaru'naang tee doorenang da' ee'noko dakanava-kooning nari' do-mantariaina'koong.'

<sup>15</sup> "Teketa ninge kara tutumpanko tee Tanuaang Meekung tee teing-koo siaru' tee' nii'koo tutuntomai nkoaru'na' nari'. <sup>16</sup> Ee'noko ninge norunoru'antu' tee kara Oving bakaang ee' minkuvuu'nung, 'Jooni Minkinarai tee masika' tamung ntong-koo minkirurima meeka'antaruriko', teka dii' teing Tanuaang Meekung ninka meeka'antarariaining.' <sup>17</sup> Kumponing tee, nii'ke Oving Jiisuu' niikaang domang-anta tero Pako'pari'nii' masika'antavampirio' tee bakaang Tanu-

aang Meekung nii' amuru'na' aing avurio' tasi'pamira ning arekee'koo ninka mosii'marapeu' Kumponing bakaang pia toto'pansitaa'?" <sup>18</sup> Tenang teinge tee taaravaara teing dooroomparira Kumponing pankaing-antavau' aa'paama, "Ju'deeaing doma turero'puringe Kumponing bere'arira domamparii'naang."

**Teing Jiisuu' Siempaako'ning Tutung Miring Kiristiani' Tampaaru'na'**

<sup>19</sup> Tenang tee Sitiveni tavaara manki' avu'antavaario' Karistoo' bakanavitu-koo nii'ning avitoitoi mmariau' akovitu otoromanairue bera aa'ning-koo basiariru' Ponisia-nameensi', Saiparasi-namui' ee'noko Antioko'navuntu'. Nka Kumponing bakaang kara Ju'deeaing-koo sira'paava' bii'ka Ju'nupoong naing naueeko'. <sup>20</sup> Teka teing-koo nii'ning Saiparasi ee'noko Sairini-nupoong-koo teketa mmariaama Antioko' bera teke sira'pau' tee kara Oving Jiisuu'koong oovuning-koo Kiriki'navitu-koo. <sup>21</sup> Oving teing aa'na' pakuvuriko'. Ee'noko karingai nantoonge masika'antavaarima Oving-aape bere'ariko'.

<sup>22</sup> Teketa teinge dootuu'nupoonge Jerusalema' otoroko'ninge taaravaara Banabasi Antioko'aape botoau'. <sup>23</sup> Bera Banabasi te' basiarara Kumponing bakaang piaa teing-koo oovura dotuaru', ee'noko tau-tauvuru' teing ookara tee' nari' kake'iariri otoromaa-too'naang, Oving-koo pinka'ariri, avutevu'aria'. <sup>24</sup> Ai' tee tee naning tampaara, Tanuaang Meekunge ee'noko baitoi maanto'ke. Ee'noko teketa pankavitu bere'arira tapo'ariru' Oving-koo.

<sup>25</sup> Tee'koo Banabasi napo' Taasus-aape beu' Soolo besi'uma. <sup>26</sup> Ee'noko oovura Antioko'aape toroaretu'. Ee'noko namare'koo ookutunamare'koo teing mmau' dootuu'nupoong teke otoroko'ning nau-antavaarema nari' otorou'. Bera teka ee'noo'ka Antioko'navuntu'koo tutuna' teing Karistoo' siempaako'ning Kiristiani' tampaaru'.

**Antioko'nung Dootuu'ke Jerusalema'nung Dootuu' Pakuvuu'na'**

<sup>27</sup> Enang tee tee batei-koo nii'ning nakaro-nupoong Kumponing bakaning Jerusalema'keta depeto porou' Antioko'aape. <sup>28</sup> Ee'noko narung teing-koong miring Akabas deto donkonura peera pankaing ookutunung kansi'koo dama'ke tavo'aravaing sira'puu' Tanuaang Meekunge nauvuio'. Tee aung tee tavo'aru'nung dama'ke tenang ovo'ma' miring Kalaudias otoko'ng. <sup>29</sup> Ee'noko teinge Karistoo' sionukai tee' taaravaara teing bii'maikorori' Judia'nupoong pakuaarii'naang ee' matauau': ookarai mooni' bii'ka makosina' naru' oosi-aavai teing paku-koo. <sup>30</sup> Bera oosiara Banabasi ee'noko Soolo botoaaresio' Jerusalema' Karistoo'koonavitu-koo urantanuka-anko tavo'uretu'.

**Eeroti'ke Jeemisi Tavura Napo' Piita Dai'uu'na'**

**12** Tenang tee batei-koo tee daurarong~ Eeroti' botoario' nii'ning dootuu'nupoong-kooning

dai'aaru' oraka' nkoaarii'naang. <sup>2</sup> Bera aa'nou' Jeemisi tee Jooni bataata, Eeroti' botoario' bainatue dupisi'au'. Ee'noko teing ovontung Ju'nupoong Jiisuu' turampaako'ninge tampa' noru'au'; <sup>3</sup> Teketa Eeroti'ke teing dotuariko oovura napo' Piita dai'koo botoaru'. Aung tee tenang Baari'koong~ Paroro, taamang berete' iisiropa-koong nkoaako'naang. <sup>4</sup> Ee'noko tenang teie moo'ura tee kiimatanava-koo sipuu' piatooronuka-koo kareviturie karenaumona' paarieema tanatavaava'naang kiimatanava-koo. Teketa Baari'koong Paroro bakearako nantoong-anko be'antavuu'naang noru'uko'. <sup>5</sup> Tee'koo Piita tee kiimatanava-koo teka tareaako', teka teinge dootuu'nupoonge kungsi ivekung nkoevau' Kumponing-koo.

### Koosinunge~ Piita Sing-antavuu'na' Kiimatanava'keta

<sup>6</sup> Teketa te'mung ee'na'mung muunga teie Eeroti'ke nantoong-anko tavo'uu'naang tampuko'na'mung Piita tee aatui otoko piatoorora-koo~ kenaankara-koo meu'ke kevintai sieenai dai'ari. Ee'noko nii'ning tareariko'ning kiimatanava-koo karanaange donkonai tanatavariko'. <sup>7</sup> Bera tee ta'nina' Oving bakaang koosinung teke oro'paru' ee'noko arakai arakavuu' tevaro. Ee'noko Piita teka mato'naang-koo tanko'puma tantevura aa'puu', "Iri'narung daa'daravai." Ee'noko teing sieenaning doonko dua'aretu' bireng-eta. <sup>8</sup> Ee'noko koosinunge napo' aa'puu' tee, "Baarong tokorarara boonamante~ si'daravai." Ee'noko tee' nkoario' koosinunge Piita aa'puu', "Mononopa' kuruntarara siomeai ning." <sup>9</sup> Ee'noko danto siaru' siompui tee. Teie tee masika'antavua' tee kapoo' koosinunge nkovuu'nung, tang nii'naung-koo bere'ari noone-koo nanuu'nung-pina' noru'uma. <sup>10</sup> Teketa tee tenaanka tutuna'nung ee'noko kenaanka-ning tanata nkora divu'aareta aini-koong ku'nung otoinoo' basiaretu' osi pankamono-aape be'doma. Ee'noko tee tee ku'nung baka daate'ario' tenaanka siaretu' danto dama'du. Bera navunge danto bereta koosinunge teka namu'ke sipuu' tee.

<sup>11</sup> Ee'noko Piita-koo tenang onou poko aa'puu', "Emu' koonto' tasi'pansing aung tee Ovinge bakaang koosinung botovuing ning domamuu'naang Eeroti' bakaang bireng-eta ee'noko bakaning oraka' nkonanka ning-koo basi-antavuko Ju'nupoonge ooaava'naang nempariko'ning." <sup>12</sup> Tenang tee tasi'parara Piita Meeri' bakanava-koo beu', teni tee Jooni Maaka' bauko, te' ee'noo' nantoong karinga oosiarira kunsiariko'noo'. <sup>13</sup> Ee'noko tenang teie karanaang-koong ku'nung kopikopi'uko nani nerai'na' bautara miring Rooda'ke taaravura oo-koo pou'. <sup>14</sup> Bera Piita-koong aurong tasi'pura dotuarama karanaang daate'ua' kuung-aape kua'pari bera navurima aa'puu', "Piita karanaang-koo dama'due donkonui otong." <sup>15</sup> Nka teinge aa'pau' teni, "Da' aa' pa kanu'daring." Teketa teni deravarako teinge aa'pau', "Tee aa' bakaang tanuaang pa." <sup>16</sup> Teketa Piitai tee' nari' kopikopi'uko'. Ee'noko tenang teinge daate'aama Piita ooaara tee ta'ninau'nung. <sup>17</sup> Bera dooroomparii'naang bireng orokovurira teie sir-

ka'antavuu' Ovinge kiimatanava'keta po'antavuu'na'. Ee'noko aa'puu' Piitai, "Aung Jeemisi bakanamiring naueriai ee'noko teing nii'ning nii'maikorori'." Teketa tenang tenkenura oovunamono-koo beu'.

<sup>18</sup> Tenang tane'puio' tee teing piatooronuka oki'noo' biru'aria' Piita paa'aru'nung-koo. <sup>19</sup> Ee'noko tenang Eeroti'ke besi'uma oovuarura teing tare-nupoong tuutunampurirai'nange tavaarima dupisi'aarii'naang botoaru'. Teketa Eeroti' Judia'keta Sisaria'aape doonko bera teke otou'.

### Tee Daurarong~ Eeroti' Oraka' Boo'paru'na'

<sup>20</sup> Tenang Eeroti' teke Sisaria'ke otoko Taia'nupoong ee'noko Saidoni'nupoong naru' naru'arira nii'ning nantoong Eeroti' pinau-antavaava'naang botoaaru', ai' teie Eeroti'ke tee teing aing kemonora osi pankeng aa'na' munte'uri otoko'nung. Ee'noko teing mooa-antanuka porora tutung narung tee Eeroti' bakanava tanatavuko'nung miring Blastus tampa' karavaama mooa-koo eentavariru', ai' teing teing biikaang taamang tee daurarong bakanoo'keta nkavaako'ning.

<sup>21</sup> Bera tee teketa te'mung doong miru'uu'na'mung makotuu'hang Eeroti' nepu'ari daurarong bakanoo' ba'nani'doma ba'nanura boo'antana' daankiaru' teing-koo nantoong-koo. <sup>22</sup> Ee'noko teinge bokiaama aa'paako', "Narung ee'nara kumponing bakaang-pina' auromparamaang, naning-pina' deea'." <sup>23</sup> Teketa namu'ke Kumponing bakaang koosinunge~ teka tavuu' tee, bakaang daangang Kumponing-aape pare'uaruio'. Ee'noko domang ninka otoko kiki'ke puampaako boo'paru'.

<sup>24</sup> Ee'noko teketa tee Kumponing bakaang kara nepu'na' deto aa'na' dupura beremparu'. <sup>25</sup> Ee'noko tenang tee batei-koo Banabas naanka Soolo Jerusalema'keta toroaretu' mooni' tavo'uretu'noo'keta, tee Jooni Maaka' bokuvuresi.

### Paula'ke Avora'tevora'koo Jiisuu' Bakaang Kara Sira'puu'na'

(13:1-21:14)

### Banabasi naanka Soolo Botoaaretu'na' Dooreng Tampara Berempuree'naang

**13** Enang tee teke Antioko'ke dootuu'nupoong-koo nii'ning nakaronuka ee'noko nau-antanuka otoroko'nung, aa'noko Banabasi, Simioni' nii'noo' Mutaanu' tampaako', Lusias Sairini-ning, Maneien, tee ovo'ma' Eeroti' ninka nari' panka'paretu'nung, ee'noko Soolo. <sup>2</sup> Tenang teinge Oving daangampaako ee'noko bakaang paa' besi'ai unkumoariko Tanuaang Meekunge aa'puru', "Banabasi naanka ee'noko Soolo taapo' tonta'memuriai tee nko-nko ninge botoampetu'nung nko-koo." <sup>3</sup> Teketa unkumoarima kun-

siarikotaa' teinge tanka' pante'aareta botoaaretu' tenaanka.

#### Banabasi naanka Soolo Saiparasi-namui'aape Bereko Daankiaretu'na'

<sup>4</sup> Tee'koo Tanuaang Meekunge botovuresio' tenaankai Jooni Maaka' bokuvuretu' teie paku-vuree'naang. Teketa Selusia-navuntu'koo pirung-aape danto berora Saiparasi-namui'aape aarerie~ berou';  
<sup>5</sup> Tenang Salamisi, Saiparasi-koonavuntu'koo basiarira tenaankai Kumponing bakaang kara daankivuretu' pava dootuu'nanka Ju'nupoong biikaning-koo.

<sup>6</sup> Tenang teinge temui' ookutunamui' opai daankiarima nanaara Paaposi-navuntu'koo basiarira teka teinge naning narung nankai'nung kune'au', Ju'nupoong-koong daang Kumponing-etaing nakaronara tamparako'nung miring Baajisuu'.  
<sup>7</sup> Temui'koong ovo'ma' ninka nari' otoreko'nung miring Sesias Paulus, tee naning onou-po'nung. Tee ee'nara botoaru'nung Banabasi naanka-koo Soolo Kumponing bakaang kara taara-koo piavoma. <sup>8</sup> Teka teie nankai'narai, miring Baajisuu'ke, nii'noo' Elimasi Kiri-ki'na'koo, teie turampuretu' Banabasi naanka Soolo, teie ovo'ma'ke Jiisuu' masika'antavu'neeng-koo.

<sup>9</sup> Teka teie, Sooloi, nii'noo' Paula' tampaako', Tanuaang Meekunge maanto'ui aa'na' naapu narung oovuma aa'puu', <sup>10</sup> "Da' aung Sietani' bauring, da' tee karenung ookara kapoo' koonto'nanka-koo, tosinankai ee'noko oraka' nkonankai maanto'. <sup>11</sup> Ee aung, Ovoring bakaang kara mare'koo bakeraravaruko da' tee Ovoringe enang taruko kaputu'darara ookiaroo'naang nii'ning batei-koo; duaa'koo ookiauka'nungge." Teketa tenang namu'ke kamo'ke dako'ura mutaanampuu'. Ee'noko nantoong tee bireng-koo kompai siong-antavai nanaavaining besi'urima nanuu'. <sup>12</sup> Tenang teie ovo'ma'ke tee kapoo' nkoaru'nung oovura ta'nimparara masika'antavuu'. Asikovuu' Ovoring bakaang nau-anta-koo.

#### Paula'naanka Banabasi Mintoomparetu'na' Nii'nung Antioko'ke

<sup>13</sup> Teketa tee Paula' dovang aarerie tenkenau'nung Paaposi-eta teketa Peeka-navuntu'koo basiariru' Pampilia'nameensi'koonoo'. Ee'noko Jooni Maaka'ke teka sipureta Jerusalema'aape toroaru'. <sup>14</sup> Teka tenaanka daanto tankinureta Antioko'navuntu'koo basiaretu', Pisiria'nameensi'koonoo' te'. Ee'noko Doong Uaana'mung tenaanka Ju' biikaang pava dootuu'nava-koo bereta ba'namparetu'. <sup>15</sup> Teketa teinge dootuu'nava-koo pankenge Daari Meekung-koo bere'aara Moosesi-ning boto-koo ee'noko urikupoong Kumponing-etaing nakaronuka biikaang dariraari-koo deeruara tenaanka-koo botoarema aa'pau', "Dee' nii'marang-konaanka, dee'ke tautau nantoong domang kuaa'anta-koong oto'deruresing deeko' minkuereai."

<sup>16</sup> Teketa Paula' deto donkonura bireng toonuma aa'puu', "Dii' nantoong Isireeli-nupoong ee'noko dii'

Ju'deeaing Kumponing nari' aroo'erimaing taameri-ai. <sup>17</sup> Tee ee'nara Kumponing aing nantoong Isireelinupoong biikaange niikakatauro bakaning miru'urira biurukaa' naro'ka pankaing-antavuru' tenang teke Iisipi'ke damisimainku otoroko'ngang, ee'noko bakaang iri' oro'antavui teketa' tonta'uru'. <sup>18</sup> Ee'noko mare' karenaumo kivora-koo tarevuri nanuko' teke mee'bora' sirakamaa'koo. <sup>19</sup> Ee'noko tenang ~kenaanka-taa muu' tavorima opurira Keenani-nameensi'koo teie teing barevuri oko-antavuru' tee temeensi' tankaampurira. <sup>20</sup> Aung tee karenaumo daaku'keta naruaape mare'koo kuunge nkoaru'nung. Ee'noko teketa simpe' nkonanka~ donkong-antaevuriko' bera Samuela'koo basinoo', tee ee'nara Kumponing-etaing nakaronara.

<sup>21</sup> "Teketa teing daurarong-koo eentavariko Kumponing Soolo daurarong deeng-antaevuru' karenaumo kivora mare'koo, tee Kiisi bauring, Bensimani bakanamuaang-koong. <sup>22</sup> Ee'noko teketa tee tonta'ura Deevita' napo' biikaang daurarong deeng-antavuu'. Tee-koo ee'nara-koo Kumponing kara sira'puma Daari Meekung-koo otoina' aa'puu', 'Aung ee'nara Deevita', Jeese' bauring, enang ooansing tee naning nkaang domang ninka nari' onouara-maung. Tee ee'nara ookara nkaang pia siompui nkovuaing.'

(1 Samuela' 13:14; 16:13; Kena 89:20)

<sup>23</sup> "Aung ee'nara Deevita' baurukaa'keta Kumponing po'antavuu' Isireelinupoong-koo tee Domang-anta, Jiisuu', maraka-antavuu'na'. <sup>24</sup> Jiisuu' mme' poaruko Joonie bere'arira ntong-koo minkiarira meeka'antavarii'naang daankivuriko' ookara nantoong Isireelinupoong. <sup>25</sup> Ee'noko tenang Joonie bakaang nko-nko bakevuma aa'puu', 'Dii'ke ning baa-pina' noru'merimang? Ning aa' tee Domang-anta nemperimaung deea', teka ning-koo dama'ke pomaang tee, ning aa'na' apoo'mui doonge-taara~ deempari. Tee ee'nara poko bakei tampa' taaraveriai.'"

<sup>26</sup> Tee' nari' Paula'ke daankiarama aa'puru', "Mmarang ee, Eebaraami' baurukaa'kooning, ee'noko dii' Ju'deeaing Kumponing nari' aroo'erimaing aa'dampimang: Nii'koo ee'ning-koo doorenang tee-koong domamuraiaing-koong botoario' pou'nung. <sup>27</sup> Teing nantoonge Jerusalema'nupoonge ee'noko biikaning pankenankai tasi'paavaruu' tee Jiisuu', teka tee boo'koong kiimata tampau'noo'koo teinge tee dupe-antavau'nung tee kara urikupoong Kumponing-etaing nakaronukai daariau'nung ee'nara deeruampimaung ookara nko-nko-ita uaana'munanka-koo. <sup>28</sup> Teka tee bane okora' boo'anta-koo makosina' ooaavarura teinge Pailati' nia'au'nung tee botoarako dupisi'ava'naang. <sup>29</sup> Ee'noko tenang dupe-antavara tee ookara Daari Meekunge tee-koo minkuvui otoring teinge depeto siau'nung teieta koi'keta ee'noko kuvi dako'doma dako'au'. <sup>30</sup> Teka teie Kumponing boo'keta daa'uu'. <sup>31</sup> Ee'noko mmuu' doong-koo oro'paru' teing-koo tee ninka porou'ning-koo Kaaleli'keta te' Jerusalema'. Teing ee'ning enang batei-koo bakaning sira' nkonuka deempariri otorong nantoong-koo.

<sup>32</sup> "Ee'noko nii'ke tee doorenang tampara po'antarerorompimaang aung anaare: Tee ee'nara Kumponing maraka-antavuu'nung teing-koo urikupoong niumarang-koo enang tee Kumponing dupe-antamemuring nii'koo biurukaa'koo Jiisuu' domang-antavura. <sup>33</sup> Tee' nari' Daari Meekung-koo daari-ari otolina' teke kevranaavu-koo Kena-koo Tee Pako'pari'nii' tero miru'uma aa'pumanavu-koo: 'Da' tee Nnuring. E'mung tee ninge daa'dansing.'

(Kena 2:7)

<sup>34</sup> Ee'noko boo'keta domang-antavuu'noo'koo tee' ee'na' napo' dera' aappearavauka'na'koo ee' daariari otong, 'Teing biraankenanka meekeng Deevita' maraka-antavantu'ning masika' dii' arompiaing.'

(Aisaia' 55:3)

<sup>35</sup> Napo' nii'navu-koo minkuvuma aa'puu': 'Dake taura'peauka'nung tee dakaang naning meekung dera'koo.'

(Kena 16:10)

<sup>36</sup> "Nii'ke tasi'pampiri otong Deevita' baka tee' minkuarava', ai' Deevita' tee Kumponing miru'uu'na' bakanavarang-koo nkoarara tee boo'pario' tee baumarang ninka nari' dako'au' ee'noko teke dera'ou'. <sup>37</sup> Teketa tee Jiisuu' Kumponing daa'antavuu'nung tee dera'oa'.

<sup>38</sup> "Tee'koo dii'ke mmarange noru'eriaing tee aung ee'nara narung-koo dii'ke orara aarumo-ita tonta'anta nkaveria'naang daankirampimaang. <sup>39</sup> Ee'noko teie narunge ookara kante masika'antavaavainng tonta'antavuri otorong ookara kapoo'nanka-ita dii' Moosesi-nung botoi tonta'antaruriarupeu'ning-eta. <sup>40</sup> Tarerariai kapoo' Kumponing teing urikupoong nakarunupoong karantavuriko minkuau'ning dii'koo po'neenga, aa'pau'ning,

<sup>41</sup> "Overiko dii' benkemerimaing, ta'niniri karakararerarima dooriainng, ai' ninge tee diikaning doong-koo kapoo' masikung nkoampaing, tee kapoo' dii'ke tee koonto' masika'antaveriauka'nung bane naning pukevui naururiko deeko'."

(Abakaka 1:5)

<sup>42</sup> Teketa Paula'ke daankinang bakevuko ookara dootuu'nava-ita siarima nii'ninge aa'na' nia'au' teing aing kapoo'nanka napo' nii'na'mung Doong Uaana'mung dankivurii'naang. <sup>43</sup> Teketa tee dootuu'nava-koo minkunaavaruru'noo'keta siarira mmau' nantoong Ju'nupoong ee'noko teing Ju'deeaing nari' dootuu'ariko'ninge siompaaretu'nung Paula' naanka Banabasi. Ee'noko tenaankai Kumponing bakaang paa-koo pinka'ariri otoroo'naang tauaarema nauaaretu'nung.

<sup>44</sup> Teketa daunung-koo Doong Uaana'mung dapi' ookara temono osi pankamono-kooning naruaruru'nung taara-koo tee kara Ovoring bakaang.

<sup>45</sup> Teketa teing Ju'nupoong-koo pankenge nantoong karinga ooaarira mamairoi maantu'urira papuraanka'au' tee kara Paula'ke minkuvuu'nung poore'aama.

<sup>46</sup> Ee'noko Paula' naankai Banabasi aa'na' nari' minkuvurema aa'puru', "Kara Kumponing bakaang

makosi dii' tutung nau-koo, teka dii'ke dimpa'ering-koo ee'noko domaang oparavauka'nung-koo makosina' deea'na' simpe'dariring-koo, nee' makosi teing-anko Ju'deeaing-anko toromarema mereaing. <sup>47</sup> Ai' Ovoring tee Daari Meekung-koo kuunge Karistoo' minkuvuma aa'memuru'nung,

'Da' tee ninge donkong-antaransing araka deentari otoo'naang Ju'deeaing-koo dake domang-anta ta'vo'ee'naang tokooning-koo isipo'ning-koo aung-koo kansii'koo.'"

(Aisaia' 49:6)

<sup>48</sup> Ee'noko tenang teing Ju'deeaingee tee aung kara taaravaara teing dotuarira pankaing-antavau' tee Kumponing bakaang kara, ee'noko teing makosining Kumponing tero miru'uru'ning domaang o'paa' nka-koo teing masika'antavau'. <sup>49</sup> Ee'noko Ovoring bakaang kara teketa berempuru' ookutunairu-koo temeensi'kooning-koo. <sup>50</sup> Teketa teing Ju'nupoong-koo pankenge tee osi pankamono-koo ovontung donkaang ee'noko maniku' Kumponing-koo mee'du'pi-ariri otoroko'ning onou orari-antavaaru' maroita Paula' naanka Banabasi oraka' nkoaaree'naang, ee'noko tee' nkoaarema bata'aaretu' biikanairu-eta. <sup>51</sup> Ee'noko tenaanka da'mong tankavaretu' kau'keta teing nau-anta-koo biikaang oraka'nko teing-koo toroaraa'naang. Teketa Aikoniami'navuntu'aape beretu'. <sup>52</sup> Ee'noko Jiisuu' sionuka doturotu ninka Tanuaang Meekunge maantu'uru'.

#### Paula'naanka Banabasi Aikoniami'navuntu' Basiareta Nkoaaretu'na'

**14** Teke Aikoniami'navuntu'koo tenaanka pava dootuu'nava-koo napo' tumparetu' Ju'nupoong biikanava-koo, ee'noko teke tee' nari' aa'na' daankiare-sio' nantoong karingai masika'antavau' ookavitura-kooningee aa'ning Ju'nupoong teing Ju'deeaing nari' dootuu'ariko'ning. <sup>2</sup> Teketa teke nii'ning Ju'nupoong-kooning Karistoo' masika'antavaavaruko'ninge siingoravaarima aking noru' orari-antavaaru' teing baitonupoong munte'koo. <sup>3</sup> Teketa tee'koo tenaanka pankarong otoretu' teke dera-antavuresi tee minkunaa Ovoring bakaang paa-koong, ee'noko Ovoringee tee minkunaa masikee-anta-koo taa'ni'antananka ee'noko ta'nimpaarii'nanka nkovuree'naang avuretu'. <sup>4</sup> Ee'noko nantoong temono osi pankamono-kooning meu' tankamparuru', aa'nou' nii'ning Ju'nupoong ninka deemparuru' ee'noko nii'ning kara-okovuresi-nkara ninka deemparuru'. <sup>5</sup> Teketa tenang aa'nou' Ju'nupoong ee'noko teing Ju'deeaing nari', biikaning ovontung ninka, tenaanka oraka' nkoaarema kapange too'paarema dupisi'koo mau'aareko taaravareta koo'aretu' nii'ning osinairu-koo aa'ning-koo Liisira' ee'noko Deebi, Laikonianameensi'kooning osi pankeng-koo. <sup>7</sup> Ee'noko tenairu-koo daankivuretu' tee doorenang tampara.

Liisira'nupoonge Paula'naanka Banabasi Kumponinka  
tampaaretu'na'

<sup>8</sup> Teke Liisira'ke naning narung ba'nanui otoko'nung kau' doota, ponto'aru'noo'keta nanuaruko'nung. <sup>9</sup> Teie Paula' karoko taaravuu', ee'noko Paula'ke naapu narung oovuma tasi'pura masika'antavui taarevoaing-pina' noru'arako aa'na' karoma aa'puu', "Deto koontari donkoniai." <sup>10</sup> Ee'noko deto dinkitoo'arara donkonura nanuu'.

<sup>11</sup> Ee'noko tenang nantoong karingai ooaara tee kapoo' Paula'ke nkovuu'nung teing deto bokiaama bi-ikana' Laikonia'na' kareaama aa'pau', "Tenaanka ni-ikanaanka kumponinka tee e'mung siaresing naning-pina' oro'paresi." <sup>12</sup> Ee'noko teinge Banabasi Sius tampau', ee'noko Paula', kara bauko deemparako Eemis tampau'. <sup>13</sup> Ee'noko teie Sius-koong piristi'ke, bakaang boontunava te' osi pankamono-koo be'doma otoko' aa'nunge iioo' tuumpura boromaka'nanka-koo pam-purira karanaang bi'uru' osi pankamono-koo tuntoma, ee'noko nantoong ninka boontunamparii'naang pia-voroko'.

<sup>14</sup> Ee'noko tenang kara-okovuresi-nkarai Banabasi naankai Paula' oovureta tenaankai beekaning mononopa'nanka kurumparetu'ning dere'uretu' orokoarema. Ee'noko teing nantoong karinga-aape kua'paretu' bokurema aa'purema, <sup>15</sup> "Ee aing, aung aming-koo ee' nkoverimang? Nee' tenaanka naninka dii'pina' nari' oro'ka, dii'koo doorenang tampara po'antavampesinaanka dii' bere'darii'naang teing-eta aing-eta kapoo' tamunsi'ning-eta Kumponing domantoo'aape, tee ee'nara paning ee'noko kansi' nkovuu' ee'noko pirung ookara kapoo' kuung otoromaing ninka nari'. <sup>16</sup> Tero urikavarang-koo teie tee taura'pu-ru'nung ookutuning amutemurii' nantoong avitoitoi piavoroaina' siompaava'naang. <sup>17</sup> Teka tee bane tee' nkorurira teie koonto' si'duria' taa'ni'antavari, ai' teie tee tampa' nkorurimaung apo' dovang arurima paning-eta, bateinananka ookara kapoo'nanka tampa' sinampumaing arurikoo' diikaang domang unaa-antarurima taamang tovange ee'noko doturotu." <sup>18</sup> Tee nauaareta teie aunge karai kakau bere'antavaaretu' teing nantoong tenaanka-koo boontu-koo pia-voroko'ning.

<sup>19</sup> Teka teing Ju'nupoong turampaareko'ninge Antioko'keta ee'noko Aikoniami'keta porora nantoong noru' bere'antavaario' teinge Paula' kapange too'pau' ee'noko osi-koo dama'du barampaara dua'au' boo'paru'nung-pina' noru'aama. <sup>20</sup> Teka tenang Karistoo' sionuka tee koroai tee-anko poroio' tee deto donkonura osi pankamono-koo napo' tumparu', ee'noko dauna'mung Banabasi ninka nari' Deebi-aape beretu'.

Paula'naanka Banabasi Toroarema Dootuu'nupoong  
Puring-antavaaretu'na'

<sup>21</sup> Teketa tenang tenaankai doorenang tampara daankivurema teke Deebi-navuntu'koo nantoong karinga Karistoo' sionuka deeng-antavaaretu'nung.

<sup>22</sup> Teketa tenaanka Liisira' ee'noko Aikoniami' ee'noko Antioko'aape toroareta puring-antavaaretu' teing Karistoo' sionuka biikaang masika'anta-koo, tau-tauarema tee' nari' masika'antavariri otoroo'naang ee'noko aa'paarema, "Bakei teing kapoo' manki' mmau'nanka kune'ampima Kumponing bakaang muu'koo tung-koo makotumpii'naang." <sup>23</sup> Ee'noko tenaankai dootuu'nupoong-kooning urantanuka miru'aaretu' osi kante-koo, ee'noko kunsiarima unku-moariri Ovoring-koo sipaareko' masika'an-tavaako'nung-koo.

<sup>24</sup> Teketa tenaanka Pisidia-nameensi'ke tankinureta Pampilia'nameensi'koo basiaretu'. <sup>25</sup> Ee'noko tenang Peeka-namono-koo kara sira'pureta, Atalia-navuntu'aape danto beretu'. <sup>26</sup> Ee'noko teketa beekaang nko-nko opureta Antioko'namono-aape aarerie toroaretu', te' ee'noo' tutung Karistoo' bakanavitue Kumponing-koo sipaaretu'noo' pakuvuree'naang tee nko-nko nkovureko.

<sup>27</sup> Ee'noko tenang te' basiareta tenaankai ookara dootuu'nupoong naro' oosiaaretu' ee'noko siraka'antavuretu' ookara kapoo' Kumponingee nkovuu'ning tenaanka ninka, ee'noko napo' tee' Kumponingee taung nkovuu'na' teinge Ju'deeeingee nari' masika'antavaava'naang. <sup>28</sup> Ee'noko tenaanka teke pankaroong otoretu' Jiisuu' sionuka ninka.

Dootuu'nupoong Kaka'dekeariru'na' Jerusalema'ke  
Botonanka Minkuaama

**15** Teka nii'ning nantoong Judia'keta depeto Antioko'navuntu' porou' baito-nupoong nau-antavaarima aa'paama, "Dii' dopa' napu'dariarura deeko', Moosesie tampuu'na', dii' teing domang-anta komperi-iauka'ning." <sup>2</sup> Ee'noko Paula' naankai Banabasi taaravureta aa'na' turampaareta tata'eeko'. Teketa Paula' ee'noko Banabasi nii'ning ninka nari' miru'aaretu' Jerusalema'aape deto beroo'naang kara okovuri nkanuka-anko ee'noko dootuu'koo urantanuka-anko aung kapoo' tata'eu'nung-koo nia'kaava'naang.

<sup>3</sup> Temono-koong dootuu'nupoonge tee' nanu'koo botoaario' Ponisia ee'noko Sameria'nameensi'ka-kooningee deto dooreaari tankinau' Ju'deeeingee bere'ariru'nung-koong doorenang, ee'noko teinge tee' dooreaama aa'na' doturotu-antavaaru' teing bii'maikorori' baito-nupoong.

<sup>4</sup> Tenang teing Jerusalema' basiariko onkeonke'aaru' temono-koo dootuu'nupoonge ee'noko teing-koo urantanukai ee'noko teing kara okovuri nkanukai. Ee'noko teinge nauaaru' ookara Kumponingee nkovuu'nanka teing ninka. <sup>5</sup> Teketa nii'ning Karistoo' masika'antavaako'ning Boto Keperuu'navitu-kooning~



daa'arira aa'pau', "Teing Ju'deeaing dopa' toto'parira deeko' makosiaapeu' domaang otoi oto' nka-koo, ee'noko Moosesi-nung boto siong-koo botoarampiaai."

<sup>6</sup> Teketa tee teing kara okovuri nkanuka ee'noko Karistoo'koonavitu-koo urantanuka nara'ariru' tee aung minkuaava'naang. <sup>7</sup> Ee'noko teketa aa'na' tata'eekotaa' Piitai donkonura aa'puru' teing, "Ee aing mmaikori', dii'ke noru'eri otong tero tee Kumponing ning dii'koo meu'ka miru'muu'nung daankiama'naang tee doorenang tampara Ju'deeaing-koo taaravaara masika'antavaava'naang. <sup>8</sup> Ee'noko teie Kumponing oookara biikaang domang noru'ui otinge Ju'deeaing onkeonke'urimana' sira'paru'nung Tanuaang Meekung avurima tee' nari' nii' amuru'na'. <sup>9</sup> Ee'noko noru' tankatankaang nii'koo meu'ke otoa' aa'noko nii' ee'noko teing, teka nii'pina' kiiroraa'uru'nung biikaang domang masika'antavaako. <sup>10</sup> Enang tee' noru'erima dii'ke aming-koo Kumponing paaraverimaang Moosesi-nung boto-koo manki' poru'antavererima teing Karistoo' sionuka? Tee ee'nara boto niikakatauroi ee'noko nii'ke nara'ka nka-koo makosi deeaung. <sup>11</sup> Teka nii'ke ee' masika'antavampiri otong nii' nikaang Ovoring Jiisuu' bakaang piaae boo'keta moo'muriainge tee' teing-pina' nari'."

<sup>12</sup> Piitai tee' minkuvuio' oookara nara'ariru'ning kapuaruru', teketa Banabasi naanka Paula' barorompaaretu' minkuvureko taa'ni'antananka ee'noko ta'nimpaarii'nanka Kumponing Ju'deeaing-koo meu'ke tenaanka ninka nkovuu'ning-koo.

<sup>13</sup> Ee'noko tenaanka kara bakeareko Jeemisie karoma aa'puu', "Ee aing, taarameriaing ning. <sup>14</sup> Saimoni'ke tee naururu'nung dii' tee' Kumponing teing Ju'deeaing beero'uru'na' teing-koo nii'ning tonta'urira bakaning deempurii'naang. <sup>15</sup> Ee'noko teke urikupoong nakaropuopong Kumponing-etaing biikaang kara nari' makotuu', ee' daariari otoi'na'":

<sup>16</sup> "Ovoringe aa'pumaang, dama'ke tee toromarara ninge napo' kaniampaing teva bare-nava Deevita' dootuu'arako'nava pesi'aru'nava. <sup>17</sup> Pesi'aru'nooketa napo' kaniamirai'nange deto donkompampaing teinge nii'ninge nantoonge Ovoring tasi'maara poroaina' Ju'deeaing oookara nkaning tamparansi otoi'ninge. <sup>18</sup> Ovoringe tee'puu', teie kansi' pupu'aru'nooketa oookara kapoo'nanka nkovuriaina' noru'ui otomaunge.'"

(Eimos 9:11,12)

<sup>19</sup> "Tee'koo ninge ee' simpe'amaang, tee aa' nii'ke pore'antavarampiauka'nung teing Ju'deeaing Kumponing-aape bere'ariaining. <sup>20</sup> Teka daariampima nauarampiaing aing aa'ning nkoaavaroo'naang, taa-mang naiaavauka' kumponing tosisinanka-koo darimpaama ku'mi'antavaamaung, kaukauro nkoaavauka', bio' tutung tavaama ereng dakoavaung maa'aavauka', ee'noko ereng naiaavauka', Ju'nupoong dii'koo maarevoroneeng. <sup>21</sup> Ai' urikavarang-eta nantoong otoromaung Moosesi-nung boto deeruaama aing kapoo'nanka daankiaamaing osi kante pava dootuu'nanka-koo Doong Uaana'mung kante."

### Nii' Moosesi-nung Boto-koo Boong O'noriaung Tampama Daariau'na'

<sup>22</sup> Ee'noko tenang teinge kara okovuri nkanukai, dootuu'koo urantanukai, ee'noko teing oookara dootuu'nupoonge tamparavaara, aing aa'ning teing-kooning miru'aaru' Paula' naanka ninka Banabasi Antioko'aape nari' nanu'koo: Judasi, nii'nook' Basabas tampaako', ee'noko Sailas, tenaanka teing-koo dootuu'nupoong-koo miring-po'naanka. <sup>23</sup> Karavoto' ee' daarinii' nkavai be'koo botoaaru':

"Dii' teing Ju'deeaing Karistoo'koo baito-nupoong aa'ning-kooning-Antioko', Siiria ee'noko Silisia-nupoong-dii'koo tampara tampampimaang nii'ke dii'maikorori'ke aa'ninge: kara okovuri nkanukai ee'noko Karistoo'koonavitu-koo urantanukai.

<sup>24</sup> Nii'ankoita nii'ning berora kararaarima pore'antaraariko taaravampiring onou-koo oto' dataveria' otomana' nkoraarima, aa'daarima dii' dopa' toto'darira ee'noko Moosesi-nung boto siomperima Ju'pina' otori-aing. Teka nii'ke nauarampiaruko tee' minkuraarimaung. <sup>25</sup> Tee'koo nii' nara'marira nari' noru'mariru'nung nii'naanka miru'arampira botoarampii'naang dii'anko anaanka ninka nii'ke pi-aavarampimanaanka ninka aa'noko Banabasi ee'noko Paula'; <sup>26</sup> Aa'naanka niikaang Ovoring Jiisuu' tee Pako'pari'nii' tasi'puresi avoroora' siompurem-anaankai, nantoonge mau'aareko. <sup>27</sup> Nii'ke anaanka Judasi naanka Sailas botoarampiring bee'ka napo' karai naurarii'naang kapoo' aunge karavotoi naurarampiring.

<sup>28</sup> Tenang Tanuaang Meekung ninka nari' o'nori ee' tampa'na' noru'mariring: Nii'ke kara manki' dii'koo dau pante'ampiauka'nung, teka aing naing aarumo naurarampii'naang dii'ke siong-koo makosi: <sup>29</sup> Taamang kumponing tosisinanka-koo darinii' ee'noko ereng naieriauka', bio' tutung tavaama ereng dakoavaung maa'eriauka', kaukauro nkoveriauka'. Aing-eta tonta'dariri otori-aing deeko' tee' tee tampa'.

Makosi otoriko."

<sup>30</sup> Teketa tee botoaario' teing Antioko'navuntu'aape doonko berou', ee'noko te' basiarira tee Karistoo'navitu nara' oosiarira teka tee karavoto avaaruu'.

<sup>31</sup> Ee'noko tenang teinge deeruaara dotuaruru' teing tee-koong karai domang kuaa'antavurio'. <sup>32</sup> Ee'noko Judasi naankai Sailas nakaronaankai mmau' kara nauaarema daankiaretu' puring-antavaarema teing baito-nupoong. <sup>33</sup> Teketa nii'ning batei teke otorora teinge baito-nupoong moa ninka botoaaretu'ning-anko nanuree'naang tampaarema si'noora'aaretu'.

<sup>34</sup> Teka Sailas teke napo' oto'koo piavoko Judasi baka toroaru'. <sup>35</sup> Ee'noko Paula' naanka Banabasi nari' teke otorou' Antioko'navuntu'koo. Tenaanka nii'ning mmau' ninka nari' Ovoring bakaang kara nau-antavarima daankiaariko'.

**Paula' Napo' Daankiarama Nanu' Tutumparu'na' Sailas Ninka Nari'**

<sup>36</sup> Ee'noko nii'ning doong tankinuko Paula'ke Banabasi aa'puu', "Poai, toromareta neekaning baito-nupoong beero'arampeai ookara osinanka-koo Ovoring bakaang kara daankiampetu'ning-koo oorampeama otoroina'." <sup>37</sup> Ee'noko Banabasie Jooni Maaka' tenaanka ninka nari' bokuvuresi nanu'koo piavou'. <sup>38</sup> Teka Paula'ke ee' noru'uu', "Aung bokuampearui dei tampa', ai' temu' Pampilia'ka nee' si'mureta pakumurearu' pore'moreko." <sup>39</sup> Teketa tata'eereta si-ivenke'eeretu'; Banabasie Maaka' bokuvura Saiparasi-namui'koo aarerie beretu', <sup>40</sup> ee'noko Paula'ke Sailas bokuvura tenkenuretu' teinge baito-nupoonge Ovoring-koo sipaaresio' teie pakuvuree'naang. <sup>41</sup> Ee'noko tenaanka nanu' tutumparema Siiria-nameensi' ee'noko Silisia-nameensi'ke tankinuretu' dootuu'nupoong puring-antavaarema osi kante-koo.

**Timoti Paula' Naanka Ninka Sailas Nari' Nanu'koo Tutumparu'na'**

**16** Ee'noko tenaanka Deebi-navuntu' beero'uresi bereta Liisira'navuntu'koo basiaretu'. Teke naning narung Karistoo' siompuko'nung otoko' miring Timoti, nani Ju'koonani bauring Karistoo' masika'antavuko'nani, teka bauma Kiriki'koong. <sup>2</sup> Teinge baito-nupoong Liisira' ee'noko Aikoniami'nupoonge tampara tampaako' tee. <sup>3</sup> Teka Paula' Timoti ninka nari' nanu'koo piavora bokuvuu', teketa' dopa' napu'uu' Ju'nupoong osi beero'aariaining-kooning pivoroaru'neeng-koo, ai' ookarai noru'ai oting tee bauma Kiriki'nung.

<sup>4</sup> Teketa tee tenang teing osi pankenge nanaama tee kara botonang kara okovuri nkanuka ee'noko Karistoo'koonavitu-koo urantanuka Jerusalema'keta botoariru'na' nauaarima nanaako' teinge siompava'naang. <sup>5</sup> Tee'koo dootuu'nupoong osi kante-koo purimpariru' biikaang baito-koo, ee'noko doong kante mmau'ariko'.

**Paula' Naninge Masedonia'nameensi'nunge Bokuvuko Oovuu'na'**

<sup>6</sup> Ee'noko Eesia-nameensi'kooninge aa'ninge Pirisia'navaro ee'noko Kalesia-navaroi tamung danto tankinau' Tanuaang Meekunge orokovurio' kara sira'koo temeensi'koo. <sup>7</sup> Ee'noko tenang Miisia'navarokoo basiarira Bitinia-nameensi'aape doonko be'koo maroariko teka Tanuaang Meekunge orokovuru' te' be'koo. <sup>8</sup> Tee'koo Miisia'keta danto Toroasi-navuntu'aape tankinaara ee'noko ning Luuke' teka kune'mau'. <sup>9</sup> Ee'noko teke muunga Kumponinge Paula' nii'naung-koo~ bere'antavuo' kapoo' noone-pina' oovuu' naninge Masedonia'nameensi'nunge donkonura eentavarama aa'puko, "A' Masedonia' pora pakumeriai." <sup>10</sup> Ee'noko tenang tee' oovura namu'ke taung besampiru' Masedonia'nameensi'aape kato be'koong,

aa'pampima, "Kumponinge bokumuring tee doore-nang tampara teing-koo daankiampii'naang."

**Teni Liidia Pilipai-koonani Bere'aru'na'**

<sup>11</sup> Tee tee teketa Toroasi-eta aareri-koo koinampira koono' Samoteresia-namui'aape kato meru', teketa napo' dauna'mung Niapolis-navuntu'aape kato meru'. <sup>12</sup> Ee'noko teketa Pilipai-aape meru'. Pilipai tee osi pankaing Rooma'nupoong okovoroi otoroko'ning-koo Masedonia'nameensi'koo. Temono-koo ee'namonokoo nii'ning doong o'noru'. <sup>13</sup> Ee'noko Doong Uaana'mung nii' temono-ita simarira dama'du meru' ntong siong, te' ee'noo' Ju'nupoong kunsiaripeu'noo'pina' oro'noo' noru'ampiri. Ee'noko teke nari' ba'namariri maniku' karavarampiko' teke oosiariru'ning.

<sup>14</sup> Nani nii' taaramuru'nani bakaang miring Liidia, osi Taiataira-nani. Teni baarong karompumaung baavevuko'nani; teninoo' Kumponing-koo dootuu'arako'nani. Ovoring ee'narai domang daate'ui'o' tampa' baroromparu'nani tee-koo kara-koo Paula'ke minkuvuu'nung-koo. <sup>15</sup> Ee'noko tenang ntong-koo minkie meeka'antavarara teni bakanavakoo nari' otoroko'ning ninka tenie nii' aa'na' bokumuru' aa'puma, "Dii'ke ning Ovoring masika'antavansi-nani noru'merira deeko' nkanoo' pava-koo porira otoriaing." Ee'noko tenie deravari be'antamuru' bakanavakoo.

**Paula'naanka Sailas Kiimata-koo Sipaaretu'na' Pilipai-nupoonge**

<sup>16</sup> Nii'na'mung tee napo' kunsiroama-aape meriko naninge manikumai kune'muru'. Teninoo' naning nii'ning-koo botovotona' otoko'nani ee'noko ma'naang orarai tarampee~antavuko kapoo' nkoaravaining sira'puko', ee'noko tee' sira'puko teinge tareaako'ninge moo' pankaing nkavaako'. <sup>17</sup> Tenie Paula' siompui nanuma bokuma nii' aa'muriko', "Aing nantoong Kumponing Deto Basi bakaning botovotona'na'keta dii' boo'keta moo'duriaina' nauraarimaing." <sup>18</sup> Ee'noko mmau' doonge tee' nkoarako' teni. Teka tee-koo Paula' iirau'arara bere'arara tee ma'naang aa'puu', "Ninge Jiisuu' nii' domang-anta-koo tero Pako'pari'nii' bakaang miring-koo da' botoramaang ani-eta bakoraravai!" Ee'noko tenang tee-koo batei-koo bakoaru'.

<sup>19</sup> Teketa tenang bakaninge tareaako'ninge mooni' baranavung taung otoaruio' ooaara teinge Paula' naanka Sailas moo'aareta barampaaretu' kara simpe'doma-aape teing-koo pankenanka-koo dutakanoo'. <sup>20</sup> Ee'noko tenang te' tavo'aareta aa'paaru' teing kara simpe'nuka~, "Anaanka tenaanka Ju'koonanka. Pore'antamaarima iirang-antamaariko' nii' amono-nupoong. <sup>21</sup> Anaankai nii'ning aarumo siong-koo naumaarimaang tee nii' Rooma'nupoong niikaang boto toto'pupeu'ning." <sup>22</sup> Nantoong karingai nari' pakueema tuumpiaareko tuutunang~ taaranukai pia-tooronuka botoario' mononopa' dere'aama kiru'aare-

tu' tenaanka-ita, teketa bana'ke mura'aaretu'.

<sup>23</sup> Ee'noko tenang mmau'namu'pie mura'aarema to-ra'antavaareta teketa pava kiimatanava-koo sipaaretu'. Ee'noko teketa tee kiimatanava tanata nauaama aa'pau', "Anaanka tampa' tarevereaing." <sup>24</sup> Tee' minkuaama botoaio' teie kuung-navaro-koo sipuretu' tenaanka ee'noko teka koi'ke kau' ee'noko bireng naro'ke pau'uresi pinka'uretu'.

<sup>25</sup> Teketa muunga meu'namang Paula' ee'noko Sailas kunsiarema kenavareko' Kumponing-koo ee'noko nii'ninge kiimata-nii'nukai taaravaareko'. <sup>26</sup> Ee'noko tee' kenavaresi otoko ta'nina' u'mi' pankaing pou', po-ra tee pava ookutunava okora'keta nari' dankampuu'. Tee' nkoarako ookara karanaang daate'aru' namu'ke, ee'noko ookara kapoo'nanka nantoong dai'aaru'ning dapa'ariru'. <sup>27</sup> Ee'noko tenang teie kiimatanava tanatai tanteara kiimatanava-koong karanaananka daate'ario' oovura bakaang bainatu barampura baka tavaara'naang nkoarako' aa'puma, "Ai, teing teing ki-imatanuka mmariaining!" <sup>28</sup> Teka Paula'ke aa'na' karo-ma aa'puu', "Ei, Baikeraravauka'! Nii' aing anke o'nori-maang ookara." <sup>29</sup> Ee'noko tee kiimatanava tanata araka nkavai poroo'naang botoarara kuung kua'paru', ee'noko avoro'ke dankuranku'arama bera miinge keemparu' uro'kanoo' Paula' naanka-anko Sailas. <sup>30</sup> Ee'noko sing-antavureta aa'puu', "Anaanka ee, ning arekee' nkomarako Kumponing boo'keta moo'muaing?" <sup>31</sup> Ee'noko tenaankai aa'puretu', "Da', ee'noko dakanava-kooning tee' nari', Ovoring Jiisuu' masika'antaveriko domaang moo'duriaing." <sup>32</sup> Ee'noko tenaankai Ovoring bakaang kara nauvuretu' ookara bakanava-kooning ninka nari'. <sup>33</sup> Ee'noko teie tenang ee'naang muunga bokuvureta pentananka duu'puretu', ee'noko tee namu'ke ookara bakaning nari' ntong-koo minkiarira meeka'antavariru'. <sup>34</sup> Teketa tee teie bakanava-koo deto bokuvureta taamang avuretu', ee'noko tee bakanava-kooning ninka nari' dotuariru' Kumponing masika'antavau'noo'koo.

#### Paula' Naanka Sailas Simpiri'antavaaretu'na'

<sup>35</sup> Teketa tane'puio' teinge tuutunang taaranukai~ pi-atooronuka botoaarima aa'pau', "Tenaanka siper-ereriko nanureai." <sup>36</sup> Ee'noko teie kiimatanava tanatai tee kara Paula'koo basi-antavuu' aa'puma, "Tuutunang taaranukai dee' tenkeniree'naang botoaario' porora naumaing, enang poreta nanireaing mooa ninka." <sup>37</sup> Teka Paula'ke aa'puru' teing piatooronuka, "Nee' aa' tee teinge sirapo'ka mura'maarieseeng tutung nia'maarea', ai' nee' tenaanka Rooma'koonaanka. Tee' nkomaareta kiimatanava-koo dua'maarieseeng. Enang ee'napo' makenge bata'maaree'naang? Tee' makotua'. Teinge bii'ka porora sing-antamaareaing." <sup>38</sup> Tenang piatooronukai tee aung kara teing tuutunang taaranuka nauaario' teinge tenaanka Rooma'koonaanka noru'aareta avoreau' teie dauraronge Siisa'ke tavuri'neeng-koo, Rooma'nupoong-koonaanka tamung mura'aaretu'nung taaravura. <sup>39</sup> Ee'noko teinge porora tenaanka-anko oraka' nkoariru'noo'koo

sira'pariru'. Teketa tenang sing-antavaaretu' tenaanka ee'noko temono-ita tenkenuree'naang nauaaretu'.

<sup>40</sup> Tee tee enang kiimatanava-ita tenkenuretu' tenaanka, bereta Liidia beero'uretu'. Ee'noko teing baito-nupoong ooaaretu'noo'keta domang kuaa'antavaareta teketa tenkenuretu'.

#### Tesalonaika'nupoonge Paula'naanka Sailas Tavu'koo Mau'aaretu'na'

**17** Teketa tee Paula' naanka Sailas Ampipolis ee'noko Apolonia'navuntu'kai tankinureta Tesalonaika'namono-koo poretu' te' ee'noo' Ju'nupoong bi-ikanava pava dootuu'nava otoko'noo'. <sup>2</sup> Ee'noko Paula' teva-koo tumparara daankiaru' temu'keta nkoarako'na' aarumo siompui; <sup>3</sup> Ee'noko beenang doong nko-nko-ita uaaning-koo teke tata'eeko' teing ninka tee Daari Meekung-koong kara-koo, Paula'ke sir-aka'antavuma ee'noko tasi'antavurima teing-koo tee nii' domamuri taremurainoo'koo tero Pako'pari'nii' tee Daari Meekunge tampuu'na' baike kune'ura napo' boo'keta daa'aravaing-koong. Ee'noko aa'puko', "Aung ee'nara Jiisuu' ninge sira'pamaung dii'koo tee naning tero Pako'pari'nii' nemperimaung." <sup>4</sup> Ee'noko nii'ninge Ju'nupoonge taaravaara masika'antavaara tee Paula' naanka Sailas siempaaretu', ee'noko napo' mmau' Ju'deeaing Kumponing-koo mee'du'piari otoroko'ning ee'noko nii'ning maniku' mmau' nari', ovontunavo.

<sup>5</sup> Teka Ju'nupoong-koo pankeng mamairoarira nii'ning taarapiikanuka nkavaarira, karika' tapo'arira tee osi pankaing naampai maanto'antavau', ee'noko Jeelsoni bakanava pava putu'au' teinge Paula' naanka nantoong-anko sing-antavaree'naang piavoroma. <sup>6</sup> Ee'noko tenang tenaanka ooaarearura teinge tee Jeelsoni ee'noko nii'ning baito-nupoong baranta'aari berou' temono tarenuka-anko bokiaama aa'paama, "Aing kansii' ookutunairu apee bere'antavaamaing a' napo' amono-koo poroi. <sup>7</sup> Ee'noko anka aunge Jeelsonie onkeonke'uri. Ee'noko ainge ookarai niikaang daurarong~ pankaing, tee Siisa', bakaang boto toto'pai kapoo' nkoaamang aa'paama, 'Nii'nung daurarong otong, miring Jiisuu'." <sup>8</sup> Ee'noko temono osi panka-mono-kooning oovoka'nuka ninka oraka' noru'au' tee' taaravaara. <sup>9</sup> Ee'noko aa'paaru', "Mooni' tutung siperiko deeko' kiimata-ita tenkeng-antarampii'naang ee'noko tee temurii' kapoo' nkoveri-maung napo' nkoveriaruko deeko' aung mooni' dama' napo' tororerorompiaing." Teketa mooni' dua'aio' teinge sing-antavaaru'.

#### Beeria'nupoong Tampa' Barorompariru'na'

<sup>10</sup> Ee'noko teinge baito-nupoonge te'mung ee'na'mung Paula' naanka Sailas tenkeng-antavaaretu' Beeria'namono-aape, ee'noko Beeria' basiareta Ju'nupoong biikanava pava dootuu'nava-koo kuung beretu'. <sup>11</sup> Teing aing Ju'nupoong teke otoroko'ning bi-ikaang noru' aa'na' daate'nii'nanka teing-koo Tesalonaika'ke otoroko'ning-koo, ai' teinge beekaang kara

aa'na' tampa' taaravaako' ee'noko doong kante Daari Meekung-koo minkuaako'ning-koo bii'ka deeruaako' masikanaare oo-koo piavoroma. <sup>12</sup> Tee'koo teing-koo mmou'ke masika'antavau', ee'noko teing Ju'deeaing-koo ovontung nari' aa'ning maniku' ee'noko donkaang. <sup>13</sup> Teketa Ju'nupoonge Tesalonaika' otoroko'ninge taaravau' Paula'ke Kumponing bakaang kara daankivuko Beeria'navuntu'koo, tee' taaravaara te' napo' porou' irikung-antavuriko turang daa'an-tavaava'naang nantoong karinga-koo meu'ke. <sup>14</sup> Ee'noko teing baito-nupoonge deempariko'ninge namu'ke Paula' tenkeng-antavau' pirung-aape navunge danto, teka Sailas naanka Timoti teke temono-koo otoretu'. <sup>15</sup> Teinge Paula' tanatavai nari' nanaako'ninge Aateni-namono-koo basi-antavau', ee'noko Paula' botoaru' Sailas naanka-anko Timoti, nauaareko namu'ke poree'naang tee-anko. Teketa Paula' te' otoko teing tenkenau'.

### Paula' Aatenie Daankiaru'na'

<sup>16</sup> Aung aa' tee Paula' teke Aatenie tenaanka Sailas naanka Timoti nempuresi otoiata' kumponing tositosi-nanka-koong baka-oonanka mmou' teka temono-koo oovurira domang aa'na' karinsi'ou'. <sup>17</sup> Teketa pava dootuu'nava-koo Ju'nupoong biikanava-koo tumparara teke karai tata'eeko' Ju'nupoong ninka ee'noko teing Ju'deeaing Ju'nupoong ninka nari' dootuu'ariko'ning, napo' baaveroma bema doong kante tee' nari' tata'eeko' te' poroko'ning ninka. <sup>18</sup> Nii'ninge napo' norukasi'nankai kune'aama tata'eeko' aa'ninge Epikuri-an-navitu ee'noko Sitoiki'navitu. Teing-koo nii'ninge aa'paako', "Aunge kara baukoi aming minkuvumaang?" Nii'ninge napo' aa'paako', "Nna' aung kumponinanka akovora'kooning biikaang kara daankivumaang-pina' oro'paramang." Aung tee Jiisuu' ee'nara daankivuko tee', napo' boo'keta daa'aru'nung-koo. <sup>19</sup> Ee'noko teinge moo'aara tee biikanoo' ka-ka'dekeroma be'antavau' miring Areopakasi, aa'paa-ma, "Naumeriai tee kapoo' nerakamurii' dake nantoong nau-antaverimaang. <sup>20</sup> Ai' dake kapoo' tee damisimaing nii' taara-antamering, tee'koo nii' miru'noo' noru'koo piamorimang tee-koo kapoo'koo." <sup>21</sup> Enang tee teing ookara Aateni-nupoong ee'noko damisimaingu teke otoroko'ning kapoo' nii'nung nko-koo piavoroaru' teka doorenananka taara-koo ee'noko nau-koo piavorou'. <sup>22</sup> Tee'koo Paula' Areopakasi-koo meu' donkonura aa'puu', "Dii' nantoong Aateni-nupoong, ninge dii' avutevu'dariri aa'na' pareka nkonuka oorampimatoing. <sup>23</sup> Ai' ninge tankinama tee meekanairu ooankotaa' nii'noo' boonturoma ooansing taa'ni'anta ee'pina' daariari otoko, 'Aung Kumponing tee noru'ampiaung bakaang.' Teketa tee nanning dii'ke parekaverimaang noru'eria' tee aung ninge naurampimang dii'. <sup>24</sup> Tee Kumponing ookutunung kansii' nkovuu'nung ee'noko ookara kapoo'nanka kansii'koo otoromaing tee ee'nara Ovor-ing paning-koong ee'noko kansii'koonge, teka teke boontunava nanninge kanivumanoo'ke otoaung.

<sup>25</sup> Kapoo'koo apuka'paravaunge. Nanninge bakaang birenge pakuvuarupeu', ai' teie ee'narai baka ookara nantoong domang ee'noko domaang avurimaunge ee'noko ookara kapoo'nanka. <sup>26</sup> Ee'noko teie tee nii' ookara nantoonanka narung-eta nkomuru' ookutunairu-koo kansii'koo o'norii'naang. <sup>27</sup> Batei miru'memuru' o'noriainaroong, napo' o'noriainairu bono'memuru' te' o'nori Kumponing besi'ampiana' aa'pampima, 'Ai' pa taampampima pe'numpampii'naang.' Teketa tee teie isipo'ke otoa' nii'koo naruna' naruna', ai' nii' teing tee-koo o'nori domamariri nanampimaang nanning-naum-muri. <sup>28</sup> Tee' dii'ka diikaningene kena toronukai kena toroama minkuaamana' aa'paamana', 'Nii' teing baurukaa' masikeng.'

<sup>29</sup> "Nii' teing Kumponing baurukaa' deemariri ee' noru'ampiauka': Tee Kumponing tee Kooro dovang-koo siliva' ee'noko kapang teka'nii' nantoonge tamung nuuruupiaama matauna' teka'paamaung. <sup>30</sup> Urikamu' nantoong noru' otoroaruko'ning Kumponing tamung oovuriko', teka enang tee Kumponing ookara nantoong ookutunairu-kooning baka narung Kumponing masikung-anko bere'arii'naang botoaring tompimpuri'neeng-koo dama'ke. <sup>31</sup> Ai' teie ookara nantoong kansii'nupoong simpe'uriana'mung tero pinka'antavuu'nung. Narunge nanninge teie Pako'pari'uu'nunge' ookara biikaang aarumo tasi'puitaa' koonto'na' simpe'uriaing, ee'noko nii' ookara tee' nkoaraa'naang tasi'antamuru' tee ee'nara Pako'pari'nii' boo'keta daa'antavura."

<sup>32</sup> Teketa tee nii'ninge tee napo' boo'keta daa'anta taaravaara benkenau', teka nii'ninge aa'pau', "Nii' napo' taara-koo piamorimang tee kara naumering."

<sup>33</sup> Teketa Paula' tenkenuu' teing-ankoita. <sup>34</sup> Teketa nii'ning nantoong tee ninka tapo'arira masika'antavau'. Teing-koo nii'nung Daionisias teke kaka'dekekoo narung pankaing ee'noko nani manikuma miring Damaris ee'noko napo' nii'ning nari' tenaanka ninka.

### Koorin-nupoong-koo Mmau' Bere'ariru'na'

**18** Teketa Aateni-namono sipura Akaia'naameensi'koo pare'arama Paula' Koorin-namono-aape beu'. <sup>2</sup> Teketa narung Ju'nupoong-koong kune'uu' miring Akuila, ba'aang ninka Pirisila ninka, teenoo' Poontusi-nameensi'koong, dama'ke Itali-nameensi'keta pou'nung tenang teie Kalodiasie dauramong' pankaing Ju'nupoong Rooma'namono-ita tenkenava'naang tampurio'. Ee'noko Paula'ke tering ee'naring oovuree'naang beu'. <sup>3</sup> Tering tering kaandesii' tua'urema baavevureko' moo'aama barenanka kanisii'aa'ko'. Ee'noko Paula' tering-pina' nari' nko-nko nkovuko'nung deemparako kaandesii' tua' tering ninka nari' pakuvurema otorou'. <sup>4</sup> Ee'noko pava dootuu'nava Ju'nupoong biikanava-koo Doong Uaana'mung kante bema teke teing ninka tata'eeko' ee'noko teka nii'ning Ju'nupoong ee'noko Ju'deeaing aroo'antavuru'.

<sup>5</sup> Tenang Sailas naanka Timoti Masedonia'naameensi'keta poriesio' Paula' daankinang narung-koo avaru' sira'puma Ju'nupoong-koo tee Pako'pari'nii' domam-

puri tarevuriainoo'koo nempaako'nung tee ee'nara Jiisuu'. <sup>6</sup> Ee'noko tenang teinge nii'ning Ju'nupoonge turampaama oraka' minkuaako tee bakaang mononopa'keta da'mong tankavuma aa'puru' teing, "Enang aa' dii'ka arisirariaing. Kumponing maro-muu'noo' nkanoo' dupeansing. Enang-eta tee ning Ju'deeaing-anko mee'naang." <sup>7</sup> Ee'noko dootuu'nava-ita tenkenura naning bakanava-koo beu' miring Sisias Taastas, Kumponing-koo dootuu'arako'nung. Bakanava pavanava dootuu'nava-ita due'ke otoko'. <sup>8</sup> Ee'noko Karisipasie teing Ju'nupoong biikanava pava dootuu'nava-koo pankaing Oving masika'antavuu' bakanava-nupoong nari' tee ninka. Ee'noko mmu'ke Koorin-nupoong Paula' taaravaara masika'antavaara ntong-koo minkiarira meeka'antavariru'.

<sup>9</sup> Ee'noko nii'na'mung muunga Ovinge Paula'koo oro'parara aa'puru', <sup>10</sup> "Aroreauka', sira'peai dooroon-tarava', ai' ning tee da' ninka nari' o'ning. Nanging da' taruauka'nung da' baikeruu'naang, ai' ning nantoong mmu' oto'memung anke amono osi pankamono-koo nanging deempariaining." <sup>11</sup> Ee'noko teke tee Paula' namare'keta nautaakaara otou' teing-koo meu'ke tee Oving bakaang kara nau-antavurima.

<sup>12</sup> Teketa tenang teie ovo'ma' miring Kaalio' te' Akaia' nameensi' tarevuko' nang Ju'nupoonge nari' tapo'eera Paula' turampaama barampaara tuutunang-koo uro'kanoo' donkong-antavau' aa'paama, <sup>13</sup> "Aunge naning tee nantoong Kumponing-koo daang dootuu'arii'naang aavavurimaatoing botoi orokovui otoina' nko-antavurima."

<sup>14</sup> Teka tenang Paula' karoo'naang nkoarako Kaalio'ke aa'puru' teing Ju'nupoong, "Ee aing Ju', aung kapoo' tuumpierimaung orara nko-nko deeko' nii'nook naning aa'na' orari-anta-koong deeko' tee ninge aroo'dampiang dii' taara-koo. <sup>15</sup> Teka aung kapoo' tee kara-koo miru'nanka-koo ee'noko mirinanka-koo tata' ee'noko dii'ka diikaang boto-koo, ninge simpe'koo pi-amoa'. Dii'ka simpe'eriaing." <sup>16</sup> Ee'noko tee' minkuvura teie bata'uru' teing teketa kara simpe'doma-ita.

<sup>17</sup> Ee'noko teketa teinge Siosienis kompau', ee'nara Ju'nupoong biikanava pava dootuu'nava-koo pankaing, ee'noko mura'au' teka kara simpe'doma uro'kanoo'ka. Teka Kaalio' aung-koo kapoo'koo tara'oaruu'.

#### Paula' Bakanoo' Toroarara Teketa Napo' Beemu'pina-mu' Nanu' Tutumparu'na'

<sup>18</sup> Teketa dama'ke Paula' mmu' doong teke otou', ee'noko teketa' ning ee'noko teing nii'ning baito-nupoong si'noora'murira Siiria-nameensi'aape toroaraa'naang danto tenkenuu' Pisisila daring Akuila nari'. Bera Siensiria-namono-koo basiaru'. Paula' tee temu' kapoo' nko-koo marakavaru'nung Kumponing-koo, ee'noko Ju' biikana' siompui tenang-eta deto dapo toto'parava' otoko'. Bera enang dupe-antavura dapo apuka'pari napu'arara aareri-koo koinaara kato berou' Eesia-nameensi'aape. <sup>19</sup> Ee'noko Epeses-namono-koo basiarara Ju'nupoong biikanava pava

dootuu'nava-aape nanura Ju'nupoong ninka tata'eeko'. <sup>20</sup> Teinge pankaroong otoo'naang nia'aio' tee kupi'ou'. <sup>21</sup> Teka si'noora'urima aa'puru', "Ning tee dii'anko toro-maravaing napo', Kumponing-nung pia deeko'." Teke-ta Akuila daring Pisisila nari' sipurima aareri-koo koinura tenkenuu' Epeses-namono-ita.

<sup>22</sup> Tenang tee Sisaria'namono-koo siarara deto Jerusalema' bera teka dootuu'nupoong karavuri doonko tankinuu' bakanoo' Antioko'. <sup>23</sup> Ee'noko teke nii'ning doong otona tenkenuu' osinanka beero'urima Kalesia ee'noko Pisisia' nameensi'kooning ookara Jiisuu' siompaako'ning puring-antavurima.

#### Apolos Tampa' Daankiaru'na' Teke Epesesie

<sup>24</sup> Paula' Kalesia-nameensi'ke tee' koroarako tee naning Ju'nung miring Apolos, Aleksandaria-namono-koong tee Epeses beu'nung maneena' minku bauko, ee'noko Daari Meekung-koong kara tampa' tasi'pui otoko'nunge. <sup>25</sup> Teenoo' tee naning Oving bakanavung-koo nii'nook basinoo' tampa' barearu'nung, ee'noko domang-eta karoma koonto'na' to'biiari Jiisuu' nau-antavuriko' ee'noko meeka'antakoo Joonie Minkinara meeka'antavuriko'nameng nameng noru'ui.

<sup>26</sup> Avoroa' kara tutumpuu' teke Ju'nupoong biikanava pava dootuu'nava-koo, teka tenang Pisisila daring Akuila taaravureta teringe bokuvureta aa'na' deto kankenkankeng-antavuretu' Kumponing bakanavung. <sup>27</sup> Ee'noko tenang Akaia' nameensi'aape pare'araa'naang piavoio' teinge ba'maikori'ke baito-nupoong puring-antavau' ee'noko Karistoo' sionukanavitu-anko karavoto~ daariau' tee tampa' onkeonke'aava'naang. Tenang tee te' tavo'arara teie aa'na' pakuvuru' teing Kumponing piaavuriko masika'antavau'ning. <sup>28</sup> Ai' teie tee karika'koo meu'ka tata'eema apoo'uri Ju'nupoong sira'pui navurima aa'puko', "Daari Meekunge tee ee' sira'pui otong tee Pako'pari'nii' domanturi tareruriainoo'koo nemperimaung tee ee'nara Jiisuu'."

#### Paula' Epeses Basiarara Tampa' Koong-antavuru'na'

**19** Tenang Apolos teke Koorin-navuntu' Akaia' nameensi'koonoo' otoko Paula' Kalesia-nameensi' sipura kansi'ke iu'po'nairue nanuu' bera Epeses-namono-koo tavo'aru'. Teka nii'ning Karistoo' sionuka kune'uru'. <sup>2</sup> Ee'noko teie aa'puru' teing, "Dii'ke ee Tanuaang Meekung nkaveru'nung tenang dii'ke masika'antaverira tee?" Ee'noko teinge aa'pau', "A, nii'ke bakei taaravampia' tee Tanuaang Meekung otong deeko'." <sup>3</sup> Ee'noko teie aa'puru' teing, "Dii' aaminamurii'ke meeka'antarariru'nung?" Teinge aa'pau', "Jooni Minkinara bakanamurii'ke meeka'antamariru'nung."

<sup>4</sup> Ee'noko Paula'ke aa'puru' teing, "Joonie tee nantoong oraka' nko-ita bere'ariko ntong-koo minkivurima meeka'antavuriko'nung navurima tee naning dama' poaing masika'antavaava'naang, ee'noko

aa'dampimang, tee masika'antavaava'naang nauvu-ru'nung tee Jiisuu'." <sup>5</sup> Tee' taaravaara teing tenang tee' meeka'antavariru' Oving Jiisuu' bakaang miring-koo. <sup>6</sup> Ee'noko tenang Paula'ke bakaang bireng pante'urio' teing tee Tanuaang Meekunge maanto'uru', ee'noko nii'na' karai kareau', napo' tarampeeariru'. <sup>7</sup> Teinoo' nantoong nanai'keta kenaanka-pina' ookara.

<sup>8</sup> Teketa beekuri kaara-koo Doong Uaana'mung kante tee pava dootuu'nava Ju'nupoong biikanava-koo kuung tumpama kara sira'puko' avoroa'. Teing ninka tata'eema nii'ning aroo'antavuriko' Kumponing bakaang muu'koo tasi'pai tung-koo. <sup>9</sup> Teka tenang nii'ning kontevoroma, masika'anta-koo kupi'oroma, nantoong-koo oosiariru'ning-koo dutakanoo'ke tee taung Karistoo'navung oraka' minkuaako'. Ee'noko Paula' teing-eta keta'paru' Karistoo' sionuka nari' tee ninka. Ee'noko doong kante tata'eeko' teke bare-antana miring Tairanus-nava-koo. <sup>10</sup> Tee aung tee kemare'ka-koo tee' nkoaru'nung. Tee'koo ookutunairue Eesia-nameensi'kooning Oving bakaang kara taaravau', Ju'nupoong ee'noko teing Ju'deeeing.

#### Ma'naange Siiva Baurukaa' Tavuru'na'

<sup>11</sup> Ee'noko Kumponing Paula'koo amutemurii' kapoo' ta'ninta'ning oro'antavuu'. <sup>12</sup> Ee'noko tee'koo Paula' bakaning ankipi'nanka ee'noko baaronanka maroita nkavai nanaako' siipa-po'nupoong-anko, ee'noko siipai tenang sipuriko' teing, ee'noko ma'nari orananka bakoariko'.

<sup>13</sup> Tenang tee Ju'koo nii'ning nankai'nupoong avitoitoi osinankai nanaako' ma'nari orananka bata'koo, ee'noko nii'ning teing-koo Jiisuu'nung miring-koo nantoong-eta ma'nari bata'koo piavoroko' aa'paava'naang, "Nii'ke Jiisuu'nung miring-koo, tee ee'nara Paula'ke daankivumaung, aa'dampimang: Da' ma'naang tenkeniai." <sup>14</sup> Teing nankai'nupoong-koo namaia'ke ~kenaan-ka-tae tee' ee'na' nko-koo paaravaako'. Temaia' narung pankaing piristi' baurukaa' miring Siiva, Ju'nupoong-koong. <sup>15</sup> Teka tee' paaravaako teie ma'naang orarai temaia' maku'urima aa'puru', "Ninge Jiisuu' noru'ansi o'nong ee'noko Paula' noru'ansi o'nong, teka dii' baata?" <sup>16</sup> Ee'noko tee naning ee'nara ma'naang orara-po'nung teing-koo dau to'di'arara ookara apoo'uri murasiavurio' teva-ita simpeng mmariau' erenge sisi'arima.

#### Paula'ke Epeses-nupoong Si'noora'uru'na'

<sup>17</sup> Ee'noko ookarai Epeses-nupoong noru'au' ookaviturai aa'noko Ju'nupoong ee'noko Ju'deeeing. Tee' taaravaara avoro' kuung kai'aru' teing-koo, ee'noko Jiisuu'nung miring daangampau'. <sup>18</sup> Ee'noko teing-koo mmau' baito-nupoong otoroko' marunu makempai. Ee'noko teinge nankai' nkonuka-koo nkoaru'na' taaravaara sira'pariru' teing kapoo' oraka' nkoaako'ning. <sup>19</sup> Ee'noko biikaning buukunanka teing marunu daariari otoko'ning oosiaara, bane moo' pankaing, nta'ke tai-antavau' ookarai ooaio'. Tee-koo moo' deeruaama

naro'ka naruaape kokorei' (50,000) nantoong na'mung doong moo'koo makosi deeruu'. <sup>20</sup> Aing ookara kapoo' doore-antavaio' Oving bakaang kara purimpari beremparu' urikung onou puru'ui.

#### Epeses-nupoong Paula'koo Naampa Pankaing Nkoau'na'

<sup>21</sup> Enang tee teketa aung ee' oro' kapoo' nkoaru'nooketa, Paula' bakaang tanuaange pia-antavuu' Masedonia'nameensi' ee'noko Akaia'nameensi' danto beero'urita' Jerusalema'aape bee'naang. Aa'puu', "Jerusalema' merai'nange teketa napo' Rooma' beero'koo aa'na' piamoi otong." <sup>22</sup> Ee'noko ke-naankara bakaning-koo pakupakunanka-koo Masedonia'aape botovuretu', Timoti naanka Erasitas. Tee ee'nara Paula' teke Eesia'ke nii'ning napo' doong otou'.

<sup>23</sup> Tee batei-koo tee turang pankaing tavo'aru' Karistoo' bakanavung too'dempaama. <sup>24</sup> Aa'nou': Epeses-nupoong teni manikuma kumponing dootuu'aako'nani miring Atimasi, ee'noko naning narung miring Demitereasie siliva'koong kapoo'nanka ta'nampuko' bakaning ninka oki'nareka' baka-oonanka Atemasi dootuu'aako'nava-pina' nari' oro'nanka teni nari' kuunge otoko. Ee'noko nantoong teni-koo dootuu'arimatoonaang moo'aako moo' mmau' nkavaako' teinge kake'iariri ta'nampaako'ninge. <sup>25</sup> Tee'koo Demitereasie ee'noko nii'ning nari' nko-nko nkoaako'ning naro' bokuvurira aa'puru', "Ee aing, dii'ke noru'eri otong nii'ke tee aung-koo amurii'koo nko-nko-koo moo' mmau' nkavampimaung. <sup>26</sup> Ooverimang dii'ke noru'eri otong teie aunge Paula'ke tee aroo'antavurima bere'antavurimang mmau' nantoong aa'puma, 'Kumponinanka teing bireng nkoaarimaing teing kumponinanka deea'. Tee' minkuvumaung, Epeses-namono-koo naro'ke deea', teka ookutunairu-koo Eesia-nameensi'kooning-koo. <sup>27</sup> Ee'noko tee oraka' bakei, ai' niikaang nko-nko poore'aako bakear-aa'naang ee'noko napo' tee dootuu'nava teni overinaang kumponing Atemasi bakanava tamunsi'nava deemparaa'naang ee'noko teni bakaang meenasi-eta dua'araa'naang pa, teni ee'nani ookara Eesia-nupoong ee'noko ookara kansi'nupoong dootuu'aa-mai."

<sup>28</sup> Ee'noko Demitereasie tee'puio' taaravaara aa'na' masika' iiravoroma bokiaama aa'pau', "Atemasi teni Epeses-nani overinaang." <sup>29</sup> Tee'koo ookara nantoong temono osi pankamono-kooning purumpurunaving karakararearima naampa ninka ookara naro'doma-aape kua'pariru' Kaiasi naanka Aristakas barantaaki-aarsi tenaanka Masedonia'nameensi'koonanka Paula' ninka nari' nanaako'naanka. <sup>30</sup> Paula' tee teing nantoong karinga kara-koo piavou', teka teinge Karistoo' siimpaako'ninge orokoau' tee karingai tavaa'neeng-koo. <sup>31</sup> Ee'noko napo' nii'ninge Eesia-nameensi'koo pankenkai ba'maikori'ke botoarima karai kompai poteau' te' ookara naro'doma be'koo kariarako.

<sup>32</sup> Enang tee te' naro'arira paapaa'arima bokiaako' avutevu'ai minkuaama nii'ninge nii'na', nii'ninge nii'na'. Daping ookarai noru'aava' aming-koo te' naro' oosiariru'nunge. <sup>33</sup> Nii'nung naning teke otoko' miring Aleksanda', ee'noko Ju'nupoonge tee karinga-koo uro'kanoo' donkong-antavau'. Karingai ooaara ee' noru'au', "Aunge pa tampa' noru'ui otong okora'noo'." Tenang tee bakaang bireng toonuu' dooroong-antavurira siraka'antavurii'naang teing. <sup>34</sup> Teka teinge tee Ju'nupoong-koong tasi'paarai'nange, Atemasi daang tampaako'ning-koong, pankaroong kenaanka aua-pina' bokiaama aa'paako', "Atemasi teni Epeses-nani ovorinaang."

<sup>35</sup> Tee' nari' nkoariri otoroko' bera tee osi tarenung pora dooroong-antavurira aa'puru' teing, "Dii' nantoong Epeses-nupoong taameriaai. Baie naning noru'ua' nii' Epeses-nupoong teni ovorinaang Atemasi bakanava dootuu'nava pankava tareampimaing ee'noko tere' kapanare' teni Atemasi bakanare' paning-eta dua'aru'nare' tareampikoo'. <sup>36</sup> Aing kapoo' daang tang-koo makosi deea' tasi'peri ka'duurariaing, kapoo' nkoveriauka' dama'ke orarunsiraripeu'nung-pina' oro'. <sup>37</sup> Ai' anaanka naninka tenaanka dii'ke po'antavererinaanka a' kapoo' meekung bakiaa'urea' ee'noko teni ovorinaang niikanani oraka' minkuvurea'. <sup>38</sup> Tee Demitereasi ee'noko teing baka-oo teka'nuka tee ninka nari' poroining naning narung tuumpi-koo piavoroang dei tee tuutunang~ nkoroma daate'ari otong ee'noko kara simpe'nuka~ pankeng otorong, teke tuumpieeang teing ninka. <sup>39</sup> Kapoo' nii'ning minku-koo piarori oting deeko' koompaara'navitu nauereriaing. Teinge makosina' kaka'dekearima tam-paavaina' nkoaravaing. <sup>40</sup> Ai' nii' oraka' nkomarimang purumpurunaving bi'mariri tavu'koo tuumpi-maaripeu'na'. Rooma'koo pankenge tee' tuumpi-maarike dei tampa' maku'arampiarupeu'." <sup>41</sup> Ee'noko tenang tee' minkuvurira teie bake-antavuru' teing te' naro'ariru'ning.

#### Paula' Eesia-nameensi'keta Teing-koo Akaia' Ee'noko Masedonia' Nanuu'na'

**20** Teketa tee naampa bakearako Paula' Karistoo'navitu-koo botoaru', ee'noko puring-antavurira si'noora'urira Epeses-navuntu'keta tenkenuu' Masedonia'aape. <sup>2</sup> Masedonia'nameensi'koo Karistoo' sionuka aa'na' puring-antavurira Akaia'nameensi'koo basiaru'. <sup>3</sup> Ee'noko teke beekuri kaara otou' napo' nii'ning Karistoo' sionuka puring-antavurima. Teketa Siiria-nameensi'koo aarerie kato bee'naang mau'arima Ju'nupoonge mumunsiaako taaravura Masedonia'nameensi'ke doonko toro-koo piavou' aam-pari'uma. <sup>4</sup> Nii'ning nantoong tee ninka nari' berou' aing aa'ning: Soopata Piirusi bauring, Beeria'nung; Aristakas naanka Sekandas, Tesalonaika'namono-konaanka; ee'noko Kaiasi, Deebi-navuntu'koong; ee'noko Timoti; ee'noko Tikikas naanka tee Toropimas, Eesia-nameensi'kooonaanka. <sup>5</sup> Pilipai-navuntu'koo basiarira ning Luuke' kune'mau'. Teketa Paula' ni'ninka

o'noreko teing nii'ning Toroasi-namono-aape aarerie kato berora teke nii' nemaaru'. <sup>6</sup> Teketa Baari'koong~ Paroro bakaang batei tankinuko aarerie meretu' Pili-pai-navuntu'keta, ee'noko pa'noko' doonge nanampikotaa' Toroasia kune'arampetu' teing, teke ee'nook'ke ~ke'munta-taa doong o'noru'.

#### Paula'ke Iutakasi Siroong-eta Dua'arako Daa'uu'na' Toroasi-navuntu'ka

<sup>7</sup> Teketa Doong Uaana'mung tankinuio' muunga naro'mariru' taamang meekung pisi'meerima nai-koo. Mme' naiampia' Paula' tee dauna'mung tenkenuu'naang piavoi kara isipo' basi minkuvuu' bera meu'namang basiaru'. <sup>8</sup> Arakananka mmou' dau-navaro-koo nii' naro'mariru'noo'ke. <sup>9</sup> Ee'noko narung nemaka miring Iutakasi burung-koo ba'nanui otokotaa' doonko teke aasi'koo dua'uu' Paula' pankaroong karoko. Ee'noko aasi'ke puru'antavuiu' dua'aru' bevarori-navaro-ita ee'noko boo' a'doonge daa'au'. <sup>10</sup> Ee'noko Paula' doonko siarara tee-koo dau kinkinura boko'ura aa'puu', "Noru' manki'doriauka' aung-koo, aung enang domamparing." <sup>11</sup> Ee'noko tenang Paula' deto koinura taamang meekung pisi'eera naiaara teing ninka minkuariko bera tane'puru', ee'noko tenang tenkenuu'. <sup>12</sup> Ee'noko aa'na' domang kuaa'oro'i teinge tee nemaka bakanoo' be'antavau' domantoo'.

#### Paula' Melita'aape Beu'na'

<sup>13</sup> Teketa tee Paula' kau'ke Aasos-aape nanu'koo piavoko' nii' aarerie urompiri meru'. <sup>14</sup> Ee'noko teie teka kune'murira nari' aarerie Mitilini-namono-aape meru'. <sup>15</sup> Dauna'mung aareri-koo aa'emarira Kaios-namui'ke deto tankinampira danto nari' nanampiru' bera te'munga dauna'mung napo' Semos-namui'koo du-umemariru'~. Teketa napo' te'munga dauna'mung Torokilian-navuntu'koo aatumpiru'noo'keta tankinampira Melita'navuntu'koo basimaru'. <sup>16</sup> Paula' tee Epeses-navuntu' divu'koo piavou' tee' Eesia-nameensi'koo baru' pankaroong otoaroo'naang, ai' tee tee iri'narumpama Jerusalema' be'koo makotuko deeko' Pentekos-na'mung nari' nkoava'naang. <sup>17</sup> Tee'koo Paula' Melita'keta Epeses-aape botoaru' dootuu'koo urantanuka porora Paula' kune'aava'naang teka Melita'ka.

<sup>18</sup> Ee'noko tenang teing poroio' teie aa'puru', "Dii'ke dii'ka noru'meri o'nong ning dii'koo meu'ke o'noko'na' ookara batei-koo tutuna'na'mung-eta aa' Eesia-nameensi' basimaru'na'mung-eta. <sup>19</sup> Ororing tampa' siompamaung boonko o'noitaa', kontevoroma paa'ari-aining-koo biromarama, ee'noko aroo'maritaa' para-paara kune'ankoo'. <sup>20</sup> Ju'nupoonge oraka' nkomaako teie kontemoa' dii'koo sira'pamaung kara sinang tampara nkavumaing nau-antarampima, sirakura', nii'noo' diikaning pava kanteama. <sup>21</sup> Ookavitura-koo Ju'nupoong ee'noko Ju'deeang daankiama teing Kumponing-aape bere'arira Ororing Jiisuu' baitoava'naang tee domamuri taremuriainoo'koo tero

Pako'pari'nii'. <sup>22</sup> Ee'noko enang ee aing Jerusalema'aape memaang Tanuaang Meekunge aa'na' boto-muio', nka noru'ampa' aming kapoo' ning-koo ta-vo'kuaiinge teka. <sup>23</sup> A'noo' tee osi kante beero'anko Tanuaang Meekunge naumumaung nantoonge ning ki-imatamaava'naang ee'noko baike kune'ampaina'.

<sup>24</sup> Teka domamari o'noaina' baru' aa'na' noru'marava', Oving Jiisuu' bakaang nko-nko nkoama deeko' dupe-antavama'naang botomuu'na' tee tampara doorenang Kumponing bakaang piaa-koong daankiama.

<sup>25</sup> "Ee'noko enang tee dii'ke ninge tee Kumponing bakaang muu'koong kara koromarama daankirampimainge napo' oing oomeriuka'nung noru'ansi o'nong. <sup>26</sup> Tee'koo ninge ee' naurampimang dii', ning tee tuumpi o'noa' dii'koo narung Kumponing bakaang muu'koo tumparavauka'nung deeko'. Dii'ka arisirai-ning. <sup>27</sup> Ai' ning tee kontemoang dii'koo sira'pama tee ookara Kumponing bakaang pia. <sup>28</sup> Tanatarariai dii'ka ee'noko ookara Kumponing bakanamanto Tanuaang Meekunge tare-koo botorurining. Pakuereriai teing dootuu'nupoong Karistoo' bakaning, baka bakaang erenge moo'uru'ning. <sup>29</sup> Ai' ninge noru'ansi o'nong ninge si'dampiko tee oreng nau-antanuka nkaunanka avorokesi'nanka-pina' dii'koo meu' poroaing opaarii'naang temanto. <sup>30</sup> Ee'noko napo' tevitua-eta dii'ke tarevererimanavitu-eta nii'ning nantoong donkonaavainge kara mare'ai minkuaavaining teing Jiisuu' bakaning barevarena barampaarii'naang. <sup>31</sup> Tee'koo tanatarariaing dii', ai' ning tee noru'meri otong beenaumo mare'koo muung ee'noko doong uatepa tautaurampiru'nung ta'du ninka, dii'koo nii'ning dua'ariaina' noru'ansi biromarama.

<sup>32</sup> "Ee'noko enang tee ninge Kumponing bakaang bireng-koo si'dampimaang bakaang kara piaae tare-rurii'naang, tee ee'nara deto dii' panka'anta-koo makosi, ee'noko tee barenku domang-anta tee dii' oko-antaruriaing ookara Karistoo' bakaning deempuru'ning ninka nari'. <sup>33</sup> Naning bakaning mooni' dovang baarong kevi'ampa'. <sup>34</sup> Dii'ke dii'ka noru'meri o'nong aing nkaning bireng taremaramaang, ee'noko teing nii'ning o'norimaing nari' pakuaramaunge. <sup>35</sup> Ookara kapoo' ninge nkoanko'ning teing ninge dii' barerampiru'ning dii'ke tee' nari' kake'iirarira teing aruaru'nuka pakuererii'naang tee Oving Jiisuu' bakaang kara ee' minkuvuu'naare noru'eri, 'Naning avu'nko biraankearavaing puru'uitaa' tee naning nkavuaing.'"

<sup>36</sup> Ee'noko tenang tee' minkuvura tee doonko kinkinura teing ninka nari' kunsiariru'. <sup>37</sup> Ee'noko teinge ookara biromparima Paula' boko'aama si'noora'au' orarunsiarima baru' ee' minkuvuu'na'koo, "Dii'ke napo' oing oomeriuka'nung." <sup>38</sup> Ee'noko teinge berora aareri-koo koing-antavaara sipau'.

**Paula' Aarerinankai Pare'arama Jerusalema'aape  
Beu'na'**

**21** Tenang teing ninka si'noora'meerira pirunge danto tenkenampira Koosi-namui'aape tankinampiru', ee'noko dauna'mung Rodes-namui'aape,

teketa napo' kato Patara'navuntu'aape. <sup>2</sup> Ee'noko teka nii'nareng aareri-nareng ooampiru' Ponisia-navaro Siiria-koonoo'aape pare'araa'naang otoko, ee'noko tereng-koo koinampira nari' meru'. <sup>3</sup> Tenang Saiparasi-namui' oro'parako mare'aanameng-koo otoi Siiria-nameensi'aape tankinampiru', ee'noko Taia'navuntu'koo daanto duumemariu' kavonanka be'antavuko'noo' terenge. <sup>4</sup> Ee'noko teka Jiisuu' bakaning barevarena daa'arampira teke o'noru' ~ke'munta-taa doong. Ee'noko Tanuaang Meekunge Paula' ki-imatavaavaina' nauvurio' teinge Paula' poteau' Jerusalema' be'koo. <sup>5</sup> Ee'noko tenang niikaning doong teke oto'kooning tankinui' nii' teketa' teing ninka nari' danto tenkenampiru'. Teing ookara bii'ankaampi ninka ee'noko biurukaa' aareri-koo si'maarii'naang porou' osi pankamono-koo dama'dua, ee'noko piisii'koo teke kinkinampira kunsimarira teke naruna' naruna' si'noora'meeru'. <sup>6</sup> Teketa nii' aareri-koo koinampiko teing osi-aape toroariru'. <sup>7</sup> Aareri-koo koinampira Taia'keta bera Tolemes basimariru' ee'noko nii'ke te'nupoong baito-nupoong oarampira tampara tampampima teke na'mung doong o'noru' teing ninka. <sup>8</sup> Teketa dauna'mung tenkenampira Sisaria'navuntu'koo duumemariu', ee'noko teka tee Pilipi', † tee doorenang tampara daankivuma nanu'bauko, bakanava-koo koinampiru'. Ee'noko tee ninka teke o'noru'. <sup>9</sup> Ee'noko, tee ee'nara Pilipi' bau-rukaa' maniku' karenaumo nampeesariaing oto'evuko' Kumponing-etaning tarampeeariko'ning.

**Akabasie Paula' Judia'nupoong-koo Koono-antavuu'na'  
Sisaria'ka**

<sup>10</sup> Tenang nii' teke nii'ning doong o'noriko narung nakaronara Kumponing-etaing Judia'naameensi'keta daampeto pou' miring Akabas. <sup>11</sup> Ee'noko tenang nii'anko poma Paula' bakaang tokonii' nkavura kau' dovang bireng dai'arama aa'puu', "Tanuaang Meekunge ee' minkuvumaang: Tee' nari' Ju'nupoonge teka Jerusalema'ka dai'aavaing naning narung aung ee'nara tokonii' okovenung, ee'noko teing-koo Ju'deeang-koo bireng-koo sipaavaing."

<sup>12</sup> Ee'noko tenang nii'ke Paula' ninka nari' nanampiko'ninge tee' taaravampira teing teke otoroko'ning nari' orokoampiru' tee Paula' daanto Jerusalema' bearoo'naang. <sup>13</sup> Teketa Paula'ke maku'urima aa'puu', "Aming-koo dii' birontarima ning domang orari-antamerimaang? Ai' ning tee maamumari o'nong kiimata narung-koo deea', teka boo'koo tee' nari' Oving Jiisuu' bakaang miring-koo teke Jerusalema'ke." <sup>14</sup> Ee'noko tenang nii' taaramuriaruio' nii'ke tamung doonko sipampiru' aa'pampira, "Makosi, Oving bakaang pia nkoaravaing."

† Tee ee'nara teing ~kenaanka-taa pakupakunuka-koong narung temu' Jerusalema' otoi naaronku-koo taamang tankaampaako'ning-koong. Ooveai Nka 6:5.



## Judia'nupoonge Paula' Dai'aara Tuutunampaara Taaravau'na' Maku'uriko

(21:15–26:32)

### Paula' Jerusalema' Basiarara Dootuu'koo Urantanuka Kune'uru'na'

<sup>15</sup> Ee'noko teketa nii' maamumarira daanto Jerusalema'aape meru'. <sup>16</sup> Ee'noko nii'ning Jiisuu' siompaako'ning Sisaria'keta nii' ninka nari' meru' Neeson bakanava-koo tavo'maarii'naang tee Saiparasi-namui'koonung, tutuna'ning Jiisuu' sionuka ninka nari' otoko'nung, tee ninka nari' o'norii'naang teke Jerusalema'ke.

<sup>17</sup> Teinge baito-nupoonge Jerusalema' otoroko'ninge oomaarira dotuarima onkeonke'maaru'. <sup>18</sup> Teketa dauna'mung Paula' nii' ninka nari' meru' Jeemisi-anko, ee'noko ookara Karistoo'navitu-koo urantanuka te' porou'. <sup>19</sup> Ee'noko teing-koo tampara tapura Paula'ke pukevui minku-antavuru' teing kapoo'nanka Kumponing nkovuu'ning taapo'nairu-koo Ju'deeaing-koo Paula' nanuma daankiarako.

### Urantanuka Piavorou'na' Paula'ke Dootuu'nava Pankava Beero'uu'naang

<sup>20</sup> Ee'noko tenang teinge urantanukai Paula' bakaang minkunaa taaravaara teinge Kumponing pankaing-antavau'. Ee'noko teinge aa'pau' tee, "Oovemaang nii'maiko' arekee'ning nantoong kokorei' otorong Ju'nupoong-koo meu'ke teing baito-nupoong, nka Moosesi-nung boto-ita keta'koo kontenuka. <sup>21</sup> Teinge ee'ninge da' daang taararau' dake Ju'nupoong Ju'deeaing ninka nari' otoromaing Moosesi bakaang boto si'koo naueriko biurukaa'koong dopa' napu'aararoo'naang nauerima ee'noko toomo siompaavaro'naang tampeko. <sup>22</sup> Enang arekee' nko-koo makosi da' tokontaa'neenga? Ai' teinge tee da' poinoo' taaravaava'naang. <sup>23</sup> Tee aa' kapoo' nii'ke naurampimatomaung nkoveaing. Nii'koo teing nantoong karenaumo otoromaang bii'ka meeka'pariri oto'koo marakavariru'ning. Bake-koo due'urimang Moosesi-nung toomo siompai kiiroraa'anta ee'noko boontunang tovang nkoaamanoo'keta. <sup>24</sup> Bokuerira teing ninka nari' nkorariai kiiroraa'antararima ee'noko tee boontunang-koong kau' karenaumo dake nara'ka moo'evuriai. Tee' pakueriko dapo apuka'pariri napu'arima taa'ni'antavariai tee biikaang maraka-anta tee dupeaing. Ee'noko tee' nkorarako ookarai da' noru'daavaing kapoo' da'koo minkuaamaung tee masikung deea', teka dake daka-koo siompei otong tee boto Moosesi-nung. <sup>25</sup> Teka teing Ju'deeaing-koo baito-nupoong teing, nii'ke karavoto daariavorompiru'ning kaka'dekemarira matauampiru'na' taamang kumponing tosisinanka-koo darinii' ee'noko ereng

naiaavaroo'naang, bio' tutung tavaama ereng dakoavaung-koong maa'aavaroo'naang, ee'noko kaukauro nkoaavaroo'naang."

<sup>26</sup> Ee'noko teing urantanuka biikaang kara tampa' taaravura Paula'ke teing nantoong karenaumo boku-vurira dauna'mung kiiroraa'antavaru' teing ninka nari'. Ee'noko pava dootuu'nava pankava-koo tumparu' piristi'nanka nauvurii'naang ~kenaanka-taa doong tankinuko kiiroraa'ariaing, naruna' naruna' kante boontuarira teing.

### Ju'nupoonge Paula' Dootuu'nava Pankava-ita Bata'au'na'

<sup>27</sup> Teing-koo ~kenaanka-taa doong-koo asi'na'mung oparaa'naang otoko teinge Ju'nupoonge Eesia-nameensi'keta porou'ninge Paula' pava dootuu'nava pankava-koo ooaara nantoong karinga irikung-antavairira tee moo'au'. <sup>28</sup> Bokiaama aa'pau', "Dii' aintaang nii'maikorori' Isireeli-nupoonge pakumereriai. Aung tee naning ookara nantoong osi ookutunairu-koo nau-antavurimaung aing aa'ning turang-antavurima niikaning nantoong ee'noko Moosesi-nung boto ee'noko ava dootuu'nava pankava. Baru'noo' Ju'deeaing ava dootuu'nava pankava-koo tung-antavuriee ava meekava orari-antavuma." <sup>29</sup> Aunoo' tee teinge tee Toropimas Ju'deeaing-koong Epeses-nung ooaara tee ninka otoreko teka temono-koo osi pankamono-koo daang ee' noru'au', "Tee aunge Paula'ke dootuu'nava pankava-koo meekava-koo tung-antavuieng."

<sup>30</sup> Tenang ookara nantoong osi pankaing-koo-nupoong donkonaara nari' kua'parira teinge Paula' moo'aara barantaakiau' dootuu'nava pankava-ita taapo', ee'noko karanaang namu'ke ku'numpau'.

### Piatooronukai~ Paula' Tatusi'au'na' Ju'nupoong-eta

<sup>31</sup> Ee'noko tenang teinge dupisi'aava'naang nkoaako tee piatooronuka-koong bore' nauau' ookara Jerusalema'nupoong avitoitoi taatoivariko". <sup>32</sup> Ee'noko teie namu'ke bakaning piatooronuka biikaning daaku'na' tarenuka ninka bokuvurira kua'pariru' doonko teing-aape. Ee'noko tenang teinge tee piatooronuka-koong bore' ooaara teing ninka bakaning piatooronuka ninka nari' Paula' tavu' bakeau'. <sup>33</sup> Ee'noko tenang teie tavu'nupoong-koong bore'ke pora Paula' moo'ura botoaru' dai'aava'naang sieenai kevintai. Ee'noko teie tana'urima aa'puu', "Aung baa? Aming nkovuinge?"

<sup>34</sup> Teinge nantoonge karingai tee bokiaama avitoitoi minkuaako'. Ee'noko tenang naampavaako teie kapoo' masikung nkoaru'nung tasi'puarura tee botoaru' tee piatooronuka biikanava'koo be'anta-koo. <sup>35</sup> Ee'noko tenang paatang-koo basiarira tee koonto' piaatooronukai intampaara siroonge nkavau' purumpurunavinge aa'na' pore'antavaariko, teinge miatarai siompaari nanaama aa'paako, "Taveriai, taveriai!"

**Paula'ke Ju'nupoong-koo Bakaang Baito Minkuvuu'na'**

<sup>37</sup> Tenang tee Paula' deto pava-koo aa'e-antavaa-va'naang due'uko te' piatooronuka biikanoo' teie Kiriki'na' karoma aa'puu' tee piatooronuka biikaang bore', "Ninge ee kapoo' naurampeu' da?" Ee'noko teie ta'ninura aa'puu', "Oi, da' ee Kiriki'nung kara noru'ei otong?" <sup>38</sup> Da' ee tee Iisipi'nupoong-koong deea' tee temu' Rooma'keta siivenke' tutumpuma nantoong karenaumo kokorei' tooreerenuka mee'bora' sirakamaa'koo be'antavuru'nung?" <sup>39</sup> Paula'ke maku'uma aa'puu', "Ning aa' Ju'nung. Nkaang osi tee pankaing, miring Taasus, Silisia-koonoo'. Teka ninge tana'damaang da' taura'meko aing nantoong karavarama'naang." <sup>40</sup> Ee'noko tenang teie taura'puio' Paula' paatang-koo donkonura birenge ka'duu-antavario' nantoong dooroompariru'. Ee'noko dooroomparirio' Ju' biikaang karai, Iiburuna', karoma aa'puu',

**22** "Dii' mmataaraang ee'noko mmarang Ju'nupoong, taameriaing nkaang kara penkemarama minkuama'naang otoing dii'koo." <sup>2</sup> Ee'noko tenang teinge biikana' karoko taaravaara aa'na' dooroompariru' teing.

<sup>3</sup> Ee'noko aa'puu', "Ning tee Ju'nung, Taasusie pontomaru'nung Silisia-koonoo'ke, teka anke Jerusalema'ke Kameliele-ankoi baremaru', niikakatauro-itaing boto to'biiri otolina' nari'; <sup>14</sup> Dii' e'mung otorina' nari' Kumponing iri'moi siompama aa'noko' avung-koo Jiisuu' sionavung-koo ning o'noinavung-koo otoroko'ning manki'antavarama nii'ning dupisi'antavarantu'. Nantoong aa'ning donkaang ee'noko maniku' dai'arama kiimata-koo siparanko'. <sup>5</sup> Teie piristi' pankaing ee'noko ookarai Ju'nupoong-kooning pankenanka-koo koompaara'navitue masikee-antamaapeu'. Teing-eta ee'ning-eta ninge karavoto' tau-ra'kooning nkavantu' nii'marang Ju'nupoong-anko Damaskas otoroko'ning-anko be'koong. Ee'noko Damaskas-aape nanantu' teing Jiisuu' sionavung-koo otoroko'ning baramparamira a' Jerusalema' kiimata-koo siparama'naang."

**Paula'ke Baka Bere'aru'nung-koong Minkunaa Nauvuru'na'**

(Nka 9:3-19; 26:12-18)

<sup>6</sup> "Ee'noko nanama Damaskas due'anko tenang du-aaki'ning araka pankaing paning-eta too'muu' ning. <sup>7</sup> Ee'noko ning te' doonko kansi'koo dua'maru' ee'noko aurong taaravantu' aa'muko ning, 'Soolo ee, Soolo, dake aming-koo ning manki'antamemaung?' <sup>8</sup> Ee'noko maku'ama aa'pantu', 'Da' baa Oving?' Ee'noko teie aa'muu' ning, 'Ning Jiisuu', Nasareti'nung, tee ee'nara dake manki'antamemaung.'

<sup>9</sup> "Enang teing nantoonge ni'ninka nanampiko'ninge araka ooau', ee'noko aurong taaravau', teka miru'noo' nkavaavaruu' tee-koong kara ning karamuko'nung-

† Kameliele tee Ju'nupoong-koo narung nau-anta aa'na' pankaing. Biikaang koompaara'navitu tampa' taaravaakoo'. Ooveai Nka 5:34.

koong. <sup>10</sup> Ee'noko ninge aa'pantu', 'Ninge aming nkoama'naang Oving?' Ee'noko Ovinge aa'muu' ning, 'Deto donkonira Damaskas tuntaravaing ee'noko teka nauraava'naang da' teing kapoo' dake nko-koo miru'nii'ning.'

<sup>11</sup> "Ee'noko tenang ning oo-koo makotumparuko arakai kaputu'antamui' ning birenge komai nanu'antamau' teinge nari' nanampiko'ninge bera Damaskas basi-antamau'. <sup>12</sup> Temono-koo naning narung miring Anaiasi otoko', tee ee'nara Kumponing-koo mee'du'piari otoko'nung Moosesi-ning botoi minkuvui otolina' ee'noko ookarai Ju'nupoonge aa'na' tampara tampaako' tee. <sup>13</sup> Tee ee'nara ning-anko pora due' donkonura aa'muu', 'Mmaiko', Soolo, duta banteai enang.' Ee'noko tenang tee-koo batei-koo ning ban-tomira tee ooantu'.

<sup>14</sup> "Ee'noko teie aa'muu', 'Teie Kumponing niikakatauro biikaange da' miru'duu'nung bakaang pia tasi'pee'naang ee'noko tee naning koonto' Jiisuu' dakaang dutai oovee'naang ee'noko bakaang kara taaravee'naang bakaang karang-eta. <sup>15</sup> Ai' da' tee bakaang kara sira' ookara nantoong-koo teing kapoo' taaraveiaining-koo ee'noko ooveiaining-koo. <sup>16</sup> Aia' deto nentarava' donkonira ntong-koo minkie meeka'antaravai, ee'noko dakaang oraka' nkonanka kuiaravai bakaang miring tampeko.' Ee'noko tee'puio' tee' meeka'antamarara Jerusalema'aape toromaru'."

**Kumponing Paula' Botovuu'na' Teing Ju'deeing-anko**

<sup>17</sup> "Ee'noko Jerusalema'aape toromarara avaka'koo dootuu'nava pankava-koo kunsimarama nii'naung-koo' bere'maru'. <sup>18</sup> Ee'noko Ovinge aa'muko ooantu', 'Iri'narung daa'darara Jerusalema'keta tenkeniai, ai' aing amono-nupoonge tee taaravaaroo'naang dake ning sira'meko anke.'

<sup>19</sup> "Ee'noko ninge aa'pantu', 'A, tee aa' tampa' noru'mai otong, ai' ninge teing pakuarama aa'noko'nung ookara pava dootuu'nanka-koo dai'arama tavaranko' teing-eta siivenke'arima da' Jiisuu' masika'antaraako'ning. <sup>20</sup> Ee'noko te'mung tee Sitiveni da' sira'duko'nung dupisi'au'na'mung ning teke due'ke donkonansi mononopa'nanka tee tavau'ning biikaning tareansi tampa' tampaako'.' <sup>21</sup> Teka Ovinge aa'muu', 'Ninge aa' botoramaang, tenkeniai isipo'aape Ju'deeing-anko.'"

**Rooma'nupoong Piatooronukai Biikanava-koo Paula' Tanatavau'na'**

<sup>22</sup> Teinge karingai barorompau' tee Paula'ke te' basinoo' kara minkuvuko, teka karoma Ju'deeing-anko beainaare-koo basivuko deto bokiaama aa'pau', "Kansi'koo domampari otoauka!" <sup>23</sup> Ee'noko tee' peusi'kaama misimisiarima da'mong ee' deto bai'au' Paula'aape. <sup>24</sup> Ee'noko tee' nkoariko tee piatooronuka biikaang bore' botoaru' piatooronuka biikanava'koo po'antavaarai' nange mura'aama okora' besi'aava'naang tee kapoo' tee turampaama bokiaako'nung. <sup>25</sup> Teka tenang

mo'ming-koo bi'aara mura'aava'naang beeto'aako Paula'ke nauvuu' tee narung daaku' piatooronuka tanata teke donkonui otoko'nung, aa'puu', "Ning tee Rooma'nung, ee'noko niikaang botoi taura'duriaung Rooma'nupoong tamung mura'koo kapoo' orara mme' ooveria'."

<sup>26</sup> Tenang teie piatooronuka daaku' tanatanarai tee' taaravura tee piatooronuka biikaang bore'anko bera aa'puu' tee, "Aung naning dake arekee' nkovee'naang, ai' aung tee Rooma'nupoong-koong." <sup>27</sup> Tee'koo teie piatooronuka biikaang bore'ke pora aa'puu' tee Paula', "Naumeai, da' ee tee Rooma'nupoong-koong?" Ee'noko teie aa'puu', "Ee'." <sup>28</sup> Ee'noko teie piatooronuka biikaang bore'ke maku'uma aa'puu', "Ninge mmou' mooni'ke moo'antu' tee' naning Rooma'nung deemaraa'naang." Paula'ke aa'puu', "Nka ninge moo'ampa', ning Rooma'nung paramau'noo'keta." <sup>29</sup> Teketa tee teing mura'aama okora' besi'aava'naang mau'aako'ning namu'ke dunka'pariru' tee-ankoita. Ee'noko tee piatooronuka-koong bore' avorou' tee Paula' Rooma'nung tasi'pura ee'noko boto toto'pui dai'uu'na' tasi'parara.

#### Paula' Ju'nupoong Biikaang Koompaara'koo Daankiaru'na'

<sup>30</sup> Teketa dauna'mung teie bore'ke Ju'nupoong tu-umpiau'noo'koo okora' masipo' noru'koo piavora, Paula' sing-antavura botoaru' teing piristi'koo ovontung ee'noko ookara koompaara'navitu kune'lea'naang. Ee'noko teie Paula' doonko be'antavura teing-koo uro'kanoo' donkong-antavuu'.

**23** Ee'noko Paula'ke dutai naapu narung oovurira teing koompaara'navitu aa'puru', "Ee mmarang Ju'nupoong, Kumponing-koo dutakanoo'ke aa'dampimang, ninge bakaang boto maroita toto'pansi o'noaung e'mung-koo basinoo'." <sup>2</sup> Ee'noko teie piristi'nanka-koo pankainge Ananiasie karang-koo tanko'paava'naang botovuru' teing tee-koo due' donkonai otoroko'ning. <sup>3</sup> Ee'noko Paula'ke aa'puu' tee, "Nna' da' Kumponing tanko'duainge, kuung-takaa'. Dake ape' ning boto ninka paamee'naang te' ba'nantaring ee'noko tee boto sipei ning tanko'koo botoraramang ee?" <sup>4</sup> Ee'noko teinge teke due'ke donkonai otoroko'ninge aa'pau', "Dake ee tee oraka' minku-koo makosi Kumponing bakaang piristi' pankaing?" <sup>5</sup> Ee'noko Paula'ke aa'puu', "Ee mmarang, ninge noru'ampa' tee Kumponing bakaang piristi' pankaing deeko'. Masika' Daari Meekunge ee' minkuvui otong, 'Dii'ke oraka' minkueriauka' tee nantoong diikaning tare-nupoong-koong narung."

(Toro 22:28)

<sup>6</sup> Teka tenang Paula'ke tasi'purira teing-koo nii'navitu Noru' Pitunavitu ee'noko nii'navitu Boto Keperuu'navitu~ tee koompaara'navitu-koo bokuma aa'puu', "Ee mmarang, ning tee Boto Keperuu'navitu-koong ee'noko mma' Boto Keperuu'navitu-koonge. Ning tee tuutunang-koo~ o'nomang dama'ke boo'keta domariaing masika'antavamaung-koo." <sup>7</sup> Ee'noko tenang

teie tee' minkuvuko teke siivenke'eu' teing Boto Keperuu'navitu~ ee'noko Noru' Pitunavitu~ ee'noko tee oosinaura' teke tankaamparu'. <sup>8</sup> Noru' Pitunavitu ee'noko aa'ning penkempaamanoo'koo tee': boo'keta daa', koosinunanka, tanuaang; teka Boto Keperuu'navitu aing ookeng masikeng tampaakoo'.

<sup>9</sup> Teketa karakarare pankaing nkoaru' ee'noko nii'ning Boto Keperuu'navitu-koong boto naunuka donkonaara deravariru' aa'paama, "Nii'ke kapoo' orara ooampia' aung-koo. Ai' pa tanuaange nii'noo' koosinunge nauvumaung deeko' turampampi'neenga." <sup>10</sup> Ee'noko tenang tee turanturang tavu' aappearako tee piatooronuka-koong bore' avorou' tee Paula' bitutu-aa'neeng-koo teinge, ee'noko piatooronuka-koo botoaru' doonko siarira tee Paula' pari'arira mmari'antavaara biikanava-koo be'antavaava'naang. <sup>11</sup> Te'mung ee'na'mung muunga Ovoring tee-anko due' donkonura aa'puu', "Noru' purintaravai, ai' dake tee ning sira'memana' anke Jerusalem'ke tee' nari' tampa' sira'mee'naang teke Rooma'ke."

#### Nii'ninge Ju'nupoong Kara Pinka'au'na' Paula' Dupisi'aava'naang

<sup>12</sup> Teketa tane'puko nii'ning Ju'nupoong mumunsiarira pinkapinka'eu' sinearima taamanaavaroo'naang bera Paula' dupisi'aavainoo'ke basi. <sup>13</sup> Donkaang karekai'pi divu'ke tee aung mumunsiang nkoau'.

<sup>14</sup> Ee'noko teketa teing aa'ning-anko berou': piristi'nanka-koo ovontung ee'noko Ju'nupoong-koong panka-anko. Berora aa'pau', "Nii' teing koonto' nii'ka pinkapinka'meerira sinemari'ning taamanampiaroo'naang bera Paula' dupisi'ampiainoo'ke basi.

<sup>15</sup> Dii'ke koompaara'navitu ninka nau-antaveriaing tee piatooronuka-koong bore' tee Paula' dii'anko depeto sing-antavaina' tuumpiaamanoo'koo tampa' tasi'perii'naang tamperima. Ee'noko nii' teing maamumariri o'noraiing tavu'koo tee taapo'ka dii'anko due'aravaruko."

<sup>16</sup> Enang tee Paula' baampuru'nunge taaravura tee maamunooru' bera piatooronuka biikanava'ke koinura nauvuu' tee Paula'. <sup>17</sup> Ee'noko Paula'ke narung piatooronuka daaku' tanatanara bokuvura aa'puu', "Aung nemaka piatooronuka-koong bore'anko be'antaveai. Kapoo' nauvuu'naang aunge tee." <sup>18</sup> Ee'noko teie tee be'antavura piatooronuka biikaang bore'anko aa'puu', "Teie Paula'ke kiimata-koo otinge bokumura naumung aung nemaka da'anko tavo'ama'naang kapoo' da' naurua'naang."

<sup>19</sup> Ee'noko teie piatooronuka-koong bore'ke bireng-koo kompura taapo' be'antavura tana'uu' tee, aa'puma, "Tee aming kapoo' dake naumee'naang ning?" <sup>20</sup> Ee'noko teie aa'puu', "Teinge Ju'nupoong-koo pankenankai kara naroompaing da' nia'daako Paula' teing-anko doonko koompaara'navitu-anko be'antavee'naang tane' aavavaama tee-koo keperuu'ai tasi'paava'naang tampaama. <sup>21</sup> Teka teing aroo'eriau-ka' tee', ai' donkaang karekai'pi divu' maamuariri otoroo'naang baku'ariri tee dupisi'koo. Teing bii'ka sin-

earirining taamanaavaroo'naang bera tee Paula' dupisi'aavainoo'ke basi. Ee'noko enang teing teing maamuariri otorong tee taura' da'keta nempaitaa'." <sup>22</sup> Teketa teie piatoronuka-koong bore'ke tee nemaka tenkeng-antavuu' teketa orokovuma aa'puu', "Naning naueauka' tee' ning naumeina'."

#### Piatoonukai Paula' Nii'namono-koo Botoau'na' Piilik-sie Simpe'uu'naang

<sup>23</sup> Tenang teie kenaanka piatoronuka daaku'na' tanatavaareko'naanka bokuvureta aa'puretu', "Maamu-antaverereriing kenaanka daaku' piatoronuka ee'noko naruaape-ita kenai'ka [70] oosie nanu'nuka ee'noko kenaanka daaku' daanko'po'nupoong, ee'noko tenang aasi'koo dua'ngang doinang muunga Sisaria'navuntu'aape beriai. <sup>24</sup> Ee'noko Paula' ba'nanu-aining oosining maamu-antaveriai, ee'noko tampa' basi-antaveriai tee-anko ovo'ma'anko Piiliks-anko."

<sup>25</sup> Ee'noko karavoto ee'pina' daarivuu', <sup>26</sup> "Ninge Kalaudias Lisiasie da' pankaing ovo'ma' Piiliks onkeonke'damaang. <sup>27</sup> Aung naning tee Ju'nupoongee moo'aara teinge tavaava'naang nkoaako ninge nkaning ninka piatoronuka ninka merira tenkeng-antavampira domampampirieng, ee' noru'ampira aung tee naning Rooma'nung. <sup>28</sup> Ee'noko tuumpiau'noo'koo noru'koo piamora ninge doonko koompaara'navitu-koo be'antavantu'. <sup>29</sup> Ee'noko biikaang boto-koo tuutunampaako ooantu', teka tuumpiau'ning-koo kapoo' boo'anta-aapenung ee'noko kiimata-aapenung oompa'. <sup>30</sup> Ee'noko ning tee Ju'nupoongee tee naning dupsi'aava'naang mumunsiaako narunge makenge nau-muing. Tee'koo ninge namu'ke da'anko botoansing. Ee'noko napo' teing tuumpiaamaing da'anko botoaransing da'koo uro'kanoo'ke sira'paava'naang teing kapoo' tuumpiaamaing. Enang bakearing."

<sup>31</sup> Teketa tee teinge piatoonukai tee boto siompai Paula' bokuaara berou' muunganang Antipatiris-aape. <sup>32</sup> Ee'noko teing piatoronuka kau'ke nanaako'ning teketa' dauna'mung toroariru' biikanava-aape, oosie nanu'nuka ninka nari' nanaako tee Paula'. <sup>33</sup> Ee'noko tenang teing Sisaria' basiarira tee karavoto~ avau' tee ovo'ma'. Ee'noko Paula' tee-anko tavo'au'. <sup>34</sup> Tenang teie tee karavoto deeruvura teie tana'uu' tee Paula', aa'puu', "Da' aremeensi'koong?" <sup>35</sup> Ee'noko tenang Paula' Silisia-ning noru'ura teie aa'puu', "Da' ninge tareamanoo'koong deentarako ninge taararerompaing dakaang kara maku'na' tenang teing tuumpiraamaing poroainang." Ee'noko botoaru' tee Daurarong~ Eeroti' bakanava-koo otoko Paula' tanatavaava'naang.

#### Ju'koo Ovontunge Paula' Koosiau'na' Piiliks-ankoa

**24** Ee'noko pa'noko' doong tankinuko tee piristi'nanka-koo pankaing Ananiasi daampeto pou' nii'ning koompaara'navitu-koo pankenanka ninka ee'noko naning narung nari' tuutunang~koo kara-tavo' miring Teetalas. Ee'noko teinge tavo'au' tee-anko

ovo'ma'anko tee biikaang kara Paula' tuumpiau'naare. <sup>2</sup> Teketa ovo'ma'ke Paula' bokuvuko Teetalasie kara tuumpi tutumpuma aa'puu', "Ee da' pankaing, Piiliks, da' otoko nii' tampa' mooa-koo o'norimaung ee'noko nii' Ju'nupoong pakumerima aarumo tampeng tavo'an-tavemaunge; <sup>3</sup> Osi ookara-koo avutevu'mariri nii'ke aroo'ampimaung ookara tampa' nari' tampampima. <sup>4</sup> Teka iirau'antarampi'neeng-koo tampa' tange bakeama enang aa'damaang ninge, tampa' noru'meri io' baroromeriaing nii' oki'noo'. <sup>5</sup> Nii'ke tee aung naning taarapiika ooampimaung, turang-anta-nko ooampimaung ookara Ju'nupoong-koo ookutunairu-koo otoroining-koo, ee'noko napo' narunge biumaree' tevi-tu-koo nerakavitu tee Nasareti'nung siompaamanavitu-koo. <sup>6</sup> Ee'noko napo' nii' Kumponing-ankoi dootuu'nava pankava-koo dootuu'mariko orari-antakoo paaramuru', teka tee' nkoarako nii'ke dai'ampiru'; <sup>7</sup> Nii'ke niikaang boto siompampiri paaravampii'naang tampampiko teie Lisiasie, teing kivora daaku' piatoronuka tanatai, aa'na' iri'oi niikaang bireng-eta pari'murira aa'muru', 'Dii' tuumpi nkonuka ovo'ma'anko berira tuumpireeriaing.' <sup>8</sup> Teka daka dake tana'era noru'eaing tee ookara kapoo'nanka nii'ke tee tuumpiampirining masikeng." <sup>9</sup> Ee'noko teinge Ju'nupoongee ookara kapoo'nanka Teetalasie tuumpivuko'ning-koo masikee-antavaako'.

#### Piilik-sie Simpe'ui otoko Paula' Sira'parama Kara Nau-vuu'na'

<sup>10</sup> Ee'noko tenang teie ovo'ma'ke kara-koo botovuu'naang tee Paula'ke maku'uma aa'puu', "Ning dotumari penkemaraa'naang teing-koo kara tuumpi-mau'ning-koo da' tasi'dansi mmau' mare'koo da' kara-simpe' deentari otomaung-koo. <sup>11</sup> Dake nia'eriko masikee-antamaavaing, baru' doong kivora-ita ke'munta divu'uaruko ning Jerusalema'aape deto dootuu'koo meu'. <sup>12</sup> Ee'noko ainge ning oomaava' tata'meeriko dootuu'nava pankava-koo. Napo' oomaava' tavutavu' tutumpanko dootuu'navananka oki'nareka'koo ee'noko osi pankamono-koo. <sup>13</sup> Teing napo' masika'pariarupeu' da' nauraama teing kapoo' enang ning tuumpimaamaatomaing-koo.

<sup>14</sup> "Teketa tee aung ning enang da'koo sira'maraa'naang: Ning tee Kumponing-koo dootuu'maramaung niikakatauro biikaang-koo tevung nerakavung daang-koonavung tampaamanavung siompansi, masika'antavansi teing ookutuning kapoo' Moosesi-ning botoi minkuvui otomaing ee'noko Kumponing-etaning nakaro-nupoongee tero daari-au'ning, <sup>15</sup> ee'noko Kumponingee maraka-anta dupeara-vainoo' nempansitaa' tee' nari' aing nkoarimana' boo'keta daa' noru'ampiri ookeng-koo aa'noko teing koonto'nuka ee'noko teing koonto'nuka deeing.

<sup>16</sup> Tee'koo ning paaramaramaung domang kiiroraa'mari o'noo'naang Kumponing-ankoi ee'noko nan-toong-ankoi.

<sup>17</sup> "Enang tee nii'ning mare' tankiniuio' toromaru' nkanavitu-anko avuavu' mooni' ata'oinku'koo tavo'ama

ee'noko boontunamaraa'naang. <sup>18</sup> Tee' nkomarako teinge ning oomau' kiiroraa'marama pava dootuu'nava pankava-koo kuunge, nantoong karinga ee'noko naampa dovang otoaruko, teka Ju'nupoong naing Eesia'keta porou'ning teke otoroko. <sup>19</sup> Teing ee'ning a' da'anko porora ning tuumpi-koo makosinuka kapoo' ning tuumpi-koo makosi oto'evoroi deeko'. <sup>20</sup> Nii'noo' ainge koompaara'navitu bii'ka tuumpimaavai kapoo' orara taaravau'nung deeko' nkaang kara simpe'aama teka Jerusalema'ka. <sup>21</sup> Teka tee kapoo' nii'nung otoa', aung narung tuumpimaamaatomaung otong tee tenang uro'kanoo'ke teing-koo donkonansi bokuma aa'pantu'nung, 'Ninge tee napo' boo'keta daa' narung masika'antavamaung-koo dii'ke e'mung tuumpimerimaang.'"

<sup>22</sup> Teka teie Piiliksie, bane tevung nerakavung taung siraka'pui tampa' tasi'puko'nunge, teka toto'pura aa'puu', "Tenang Lisias tee piatooronuka-koong bore' daampeto poainang ninge simpe'ampaing aung kara da'koong." <sup>23</sup> Teketa tenang tee piatooronuka daaku' tarena botovuu' teie tee Paula' tee ninka tareai' otoo'naang teka baru' kiimata-pina' deea'. Ee'noko ba'maikori'ke beero'koo orokoaava' piavoaining-koo pakuaama.

#### Piiliksie Paula' Kiimatanava-koo Kemare'ka-koo Pin-ka'uu'na'

<sup>24</sup> Teketa nii'ning doong tankinuko Piiliks ba'aang ninka Ju'koonani miring Darusila ninka poreta botoaru' Paula' po'antavaava'naang ee'noko taaravuu' minkuvuko Jiisuu' tero Pako'pari'nii' masika'anta-koonavung. <sup>25</sup> Ee'noko tenang Paula'ke to'biari aing aa'ning-koo minkuvuko: koonto' nkona', baka tarena', ee'noko doong asi'na'mung tuutunang nkoaravaing-koo, Piiliksie avorora aa'puu', "Io' beaing anketa. Nii'ngang batei oomira bokurampaing napo'." <sup>26</sup> Napo' ee' noru'uko', "Ning pa mooni' amuu'naang Paula'ke dama'ke napo' bokuanko." Tee'koo mmau' namu'pie bokuvuma minkuareko'. <sup>27</sup> Teketa kemare'ka tankinuko Poosias Peestasi Piiliks pari'antavuu', teka Piiliks tenkenuma Ju'nupoong dotu-anta-koo Paula' teke kiimatanava-koo pinka'ari otoko sipuu'.

#### Paula' Deravari Eentavaru'na' Siisa'ke Kara Simpe'evuu'naang

**25** Enang tee Peestasi ovo'ma' deemparara beenang doong tankinuko Jerusalema'aape daanto beu' Sisaria'keta. <sup>2</sup> Ee'noko teka tavo'arako piristi'nanka-koo ovontunge ee'noko Ju'nupoong-koo pankenankai Paula' tuumpiaako'ning nauau'. <sup>3</sup> Ee'noko aa'na' etuau' tee eentavarima tee botoarako Paula' Jerusalema'aape tavo'aava'naang, taunga tavaava'naang maroau'na' noru'ai. <sup>4</sup> Peestasi maku'urima aa'puu', "Paula' tee Sisaria'ke tareai otomaung ee'noko ning tee due'ka mee'naang noru'maramang. <sup>5</sup> Tee'koo dii'koo nii'ning pankenanka ni'ninka nari' danto meri-

aing. Kapoo' oraka' nkovuu'ning otoko tee-koo deeko' teka dii'ke tuumpieriai."

<sup>6</sup> Teketa Jerusalema'keta kivora doong divu'uaruko Peestasi danto Sisaria'aape beu'. Ee'noko dauna'mung kara simpe'doma ba'namura Paula' po'antavaava'naang botoaru'. <sup>7</sup> Ee'noko tenang Paula' kuung poio' teing Ju'nupoong Jerusalema'keta danto berou'ning tee koroai donkonaara kapoo' mmau'nanka ivekeng-koo tuumpiaara masika'antanoo' otoroaru'. <sup>8</sup> Teketa Paula'ke penkemparama aa'puu', "Ninge kapoo' teing aing ee' oro' toto'pui oting nkoampa': Ju'nupoong biikaang boto, dootuu'nava pankava ee'noko tee Rooma'nung daurarong~ Siisa'." <sup>9</sup> Teketa Peestasi Ju'nupoong dotu-anta-koo aa'puu' tee Paula', "Da' ee' Jerusalema'aape daanto be'koo aroo'dari otong teka paaraavaina' teing aing kapoo' ning-koo dutakanoo'ka tuumpiraining-koo?"

<sup>10</sup> Teketa Paula'ke aa'puu', "Ning aa' Siisa' bakanoo' kara simpe'doma donkonansi o'nong, aa' ee'noo' ning tuutunang-koo makosinoo', ai' ning Ju'nupoong-koo kapoo' orara nkoampa', tee' dake tampa' noru'ei otong. <sup>11</sup> Ning kapoo' orarananka-nko deeko' ee'noko kapoo' ning boo'koo makosi nkoantu'nung deeko' ning boo'keta mmari'koo paaramaravarupeu', teka teing kapoo' ning tuumpimaamaing boturopananka deempari otoko naning otoa' teing-anko sing-antamupeu'nung, ai' ning tee Siisa'koo aroo'mari o'nong teie paaramuaing."

<sup>12</sup> Teketa Peestasi bakaning tuutunang-koo~ norukasi'nanka ninka minkuarira aa'puu' tee Paula', "Siisa'koo aroo'daring tampeio' aa'damaang: Makosi, tee-anko Siisa'anko naniaing."

#### Peestasi Akiripa' Nia'uu'na' Paula'koo

<sup>13</sup> Enang tee, nii'ning doong divu'uiu' tee Akiripa', daurarong~, teni ninka baara'ma'naang Beenis ninka, Sisaria' tavo'kuretu' Peestasi onkeonke'uree'naang. <sup>14</sup> Ee'noko teke mmau' doong otorora Peestasi Paula' bakanai' tee daurarong nauvuma aa'puu', "Anke naning narung otomang Piiliksie kiimatanava-koo otoko sipura tenkenuu'nung. <sup>15</sup> Ee'noko tenang ning Jerusalema' o'noko teing piristi'nanka-koo ovontunge ee'noko pankenankai Ju'koo-nupoonge tee dooremaa-nia'mau' tee kara taaraevomira dupisi'koo makosi tampama'naang. <sup>16</sup> Teketa ninge aa'parantu' teing, 'Nii' Rooma'nupoong tee' nkomariaung naning nii'ninge dupisi'koo sing-antavampii'naang tutung tuumpiaamaing ninka oing ooveearuko, napo' doona penkemparavaing-koong oovuaruko.'

<sup>17</sup> "Tenang teing ninge nauaransio' a' oosiariru'ning ning namarava' dauna'mung kara simpe'doma ba'namira botomaru' tee naning po'antavaava'naang. <sup>18</sup> Teketa tenang teinge tuumpiaako'ninge donkonaara teinge kapoo'koo oreng-pina' ninge tero noru'antu'ning-koo tuumpiaava'. <sup>19</sup> Teketa nii'ning kapoo' oovuning-koo turampaako' daang masika'antavaamaing-koo, ee'noko naning narung-koo Jiisuu'koo boo'paru'nung-koo teka Paula'ke domam-

paru'nung tampukoo'.<sup>20</sup> Ning amurii' kapoo' baakee-neama simpe'koo paa'marara ninge nia'antu' aa'pama, 'Da' ee Jerusalema'aape nanipeu' ee'noko teka dii' Ju' diikaning koompaara'navitue simpe'daavai dakanai'koo?'<sup>21</sup> Teka tenang Paula' Siisa'ke simpe'uu'naang tamparako ning botomaru' pinka'ai tanatavaava'naang bera Siisa'anko botoampainoo'ke basi."

<sup>22</sup> Ee'noko Akiripa'ke Peestasi aa'puu', "Ninge ninka taara-koo piamomaang tee aung naning." Ee'noko Peestasi aa'puu', "Makosi, tane' taaraveaing tee."

<sup>23</sup> Teketa dauna'mung tee Akiripa' ee'noko baara'ma'naang Beenis, dauraronanka biikaning nepunepu'ke aa'na' nepu'aresi poreta tumparetu' te' tuutunang nkoroma ee'noko teing kivora daaku' pia-tooronuka tanatanuka nari' porou' ee'noko teing nantoong tevuntu'koo bore'nuka. Teketa tee Paula' Peestasi botovurio' asi'na'moo po'antavau'.<sup>24</sup> Ee'noko teketa Peestasi aa'puu', "Da' Daurarong Akiripa' ee'noko dii' ookara a' nii' ninka nari' porining, ooveriai aung naning Ju'nupoonge ning eentamaamaung ookeng-koo aa'noko Jerusalema'ka ee'noko anka, otoaroo'naang tampaamaung peusi'kaama."<sup>25</sup> Teketa ninge kapoo' tee boo'anta-koo makosi oampa'. Ee'noko ee'nara baka Siisa'ke simpe'uu'naang tampario' ninge Siisa'anko botoama'naang matauantu'.

<sup>26</sup> Teketa ninge kapoo' taa'ni'antavama daariampaing oto'memua' tee nkaang oving nauama tee-koo. Tee'koo ninge a' dii'anko, ee'noko baru'noo' da'anko daurarong Akiripa'anko donkong-antavansing anketa paaravampira kapoo' oreng oampiaining daaria-ma'naang.<sup>27</sup> Ai' ninge ee' oomaang, ninge naning ki-imatanung tamung boturopa botoamparupeu' tu-umpiaamaing-koong siraka'anta otoaruko."

#### Akiripa'ke Simpe'uko Paula' Daankiaru'na'

**26** Akiripa'ke aa'puu' nauvuma tee Paula', "Ninge enang taura'dang da' daka minkuraraa'naang." Ee'noko tenang Paula' tanka' toonuma penkeng-koong kara sira'paru' aa'puma,

<sup>2</sup> "Ning e'mung biraankemaring nkaang kara sira'koo da'ankoi penkemarama Daurarong~ Akiripa'ankoi teing kapoo' ookarai Ju'nupoonge tuumpimaamaing-koo,<sup>3</sup> ee' noru'amira da' tee ookara aarumonanka ee'noko turananka Ju'nupoong biikaning noru'ei otomaung dau basinoo'. Tee'koo ninge nia'damaang tampa' dooroontari ning taaramee'naang.

<sup>4</sup> "Nkaang aarumo tee temu'keta nema'noo'keta o'noi o'nou'na' ookara Ju'nupoonge noru'mai o'nong teing-koo nkaning nantoong-koo meu'ke teke Jerusalema'ke.<sup>5</sup> Teinge tee temu'keta noru'mai o'nong, sira'mapeu' piavorora deeko', tee ning tee Boto-koo Keperuu'navitu-koong aarumo koonto' siompansi o'noko'nung, niikaang dootuu'koo aa'na' mon-keena'navitu.<sup>6</sup> Enang tee ning aung a' donkonansing tuutunange paara-koo tee biraanke, boo'keta daa' ta-vo'kuaing nempamaung-koo, Kumponing niu-maraang-koo maraka-antavuu'nung.<sup>7</sup> Tee nii'namurii'

biraanke deea' nii'ke ookarai Ju'nupoonge nempampi-maung muung ee'noko doong karimarima Kumponing dootuu'ampima. Teketa tee, ee daurarong, tee ee'nara biraanke sira'pansio' ee'ninge tuumpimaa-maung Ju'nupoonge.<sup>8</sup> Aming-koo dii' Judia'nupoong Kumponing boo'nuka daa'anta masika'anta-koo makosiria'?

<sup>9</sup> "A'noo' ninge tee ninka koonto'na' ee'pina' noru'anko': Aung miring Jiisuu' Nasareti'nung onou amutemurii'ke turampamaa'noaing.<sup>10</sup> Ee'noko tee tee nkoanko' Jerusalema'ke, aa'noko' meekupoong Jiisuu' sionuka kiimatanava-koo ku'numparanko' taura' tee piristi'nanka-koo pankenkai amau'nung ninka, ee'noko tee narung deea', nii'ninge teing meekupoong dupisi'koo mau'ariko' teing irikumparanko.<sup>11</sup> Ee'noko napo' ninge mmau'namu'pie kiimatavaranko' teka pa-va dootuu'nanka-koo ookara-koo Karistoo' penkem-paavaina' paara-antavarama. Ee'noko bakei aa'na' iirang-antamarama manki'antavaranko' teing, bane osi pankeng oovuning biikaning-koo."

#### Paula'ke Baka Bere'aru'nung-koong Minkunaa Nauvuu'na' Akiripa'

<sup>12</sup> "Nii'na'mung tee' nari' nkomarama Damaskas-aape nanantu' piristi'nanka-koo pankenge taura' amaara botomaio'.<sup>13</sup> Ee'noko ee daurarong, duaa-ki'ning taunge nanama araka paning-etaing ooantu' aa'na' sisisiisi duaa' divu'ui. Ning ee'noko teing nari' nanampiko'ning koromuri arakavaru'.<sup>14</sup> Ee'noko tenang nii' ookara kansi'koo doonko dua'marira ninge auring taaravantu' Iiburuna' karoma aa'muko, 'Soolo, Soolo, dake aming-koo ning manki'antamemaang? Nkaang kara dimpa'ema daka baikeraramaung irinto' deemparako.'

<sup>15</sup> "Ee'noko ninge aa'pantu', 'Da' baa Oving?' Ee'noko Ovinge aa'puu', 'Ning tee Jiisuu', tee dake manki'antamemaung.<sup>16</sup> Teketa donkonaiing deto, ning tee da'koo oro'marinoo' aung kapoo' otoko: Da' miru'damaang botorampaina' nkovema sira'pee'naang enang oomeina' ee'noko dama'ke kapoo' napo' da'koo oro'marara naurampaina'.<sup>17</sup> Mmari'antarampaing nantoonge aa'ninge turantaako dakanavitu Ju'nupoonge ee'noko Ju'deeaing, tevitu ee'navitu da' botoramaatomano'navitu.<sup>18</sup> Duta bante-antaveriko mutaanang-eta araka-koo bere'aria'naang ee'noko Si-etani'keta Kumponing-koo bere'ariai biikaning oraka' nkonanka tonta'aravaina', ee'noko barenku-koo-navaro oto'evoroai teing ninka ning-koo baitoarira meekupoong deempariru'ning ninka.'"

#### Paula'ke Kara Tampa' Siompui Mintooparamaung Nauvuu'na' Akiripa'

<sup>19</sup> "Tee tee', ee Daurarong Akiripa', kontemoa' nko-koo tee' paning-eta oro'parara naumuu'na'koo ninge sira'pansi nau-antavarantu' Damaskasie, teketa' Jerusalema'ke ee'noko teketa ookutunairu-koo Judia'navaro-koo ee'noko napo' Ju'deeaing-koo orara

aarumo sipaara Kumponing-aape bere'arii'naang, ee'noko tampa' nkoarima bere'nii'nuka makosina' taa'ni'antavariri otoroo'naang. <sup>21</sup> Okora'noo' tee'koo Ju'nupoonge komaara pava dootuu'nava pankava-koo dupisi'maava'naang nkomau'. <sup>22</sup> Teka Kumponingepakumui' e'mung-koo basinoo' ning daankimaramaung bera e'mung a' donkonansi kapoo' ooantu'na' sira'pamaang ookara nantoong-koo ovontung-eta bera toire'koo basinoo'. Tee' Moosesi dovang teing Kumponing-etaning nakaro-nupoong urikupoonge nkoaravaing tampaama naumaaru'na' nari' minkuamaung, nii'na' deea'. <sup>23</sup> Aa'noko Kumponingepakumui' do-mang-anta-koo Pako'pari'nii'ke baike tora'puaingkoong ee'noko tee tutuna'nung boo'keta daa'aravaingkoong, ee'noko tee' nkoarama baka araka sira'paraa'naang ookavitura-koo aa'noko Ju'nupoong-koo ee'noko Ju'deeaing-koo."

#### Paula'ke Akiripa' Bere'koo Pia-antavuu'na'

<sup>24</sup> Ee'noko tenang teie tee' penkempama minkuvuko Peestasi bokuma aa'puu', "Paula', da' kanu'daring. Dakaang barevare pankaing kanu'antaruing."

<sup>25</sup> Teka Paula'ke aa'puu',

"Ning kanu'marava', da' pankaing Peestasi, teka ning koonto' to'biimari masika' karomang. <sup>26</sup> Aunge dauraronge noru'ui otong, masikee-antamupeu' aing-koo kapoo'koo, ee'noko tee-ankoi tamung danto minkuampeu' teie noru'ui', ai' ninge masika' noru'ansi o'nong kapoo' aing-koo nii'naare bakaang punkaa'koo nerakanaare deea', ai' ookarai noru'ai otong kapoo' nkoaru'na'. <sup>27</sup> Arekee' da' daurarong Akiripa', dake ee Kumponing-etaning nakaro-nupoong urikupoong masika'antaveri otong? Ee', noru'ansi o'nong, dake masika'antaveri otong."

<sup>28</sup> Ee'noko Akiripa'ke aa'puu' maku'uma, "Anaarei apukanaarei ee Karistoo'aape bere'antamee'naang?"

<sup>29</sup> Ee'noko Paula'ke aa'puu', "Kumponing-koo kunsimaramang da' narung paku-koo deea' teka aing ookara tee' nari' e'mung taaramaamatomaing dii' ning-pina' oro'darii'naang aing sieena io' doonko otoko."

<sup>30</sup> Teketa tenang daurarong deto donkonuko aa'nou' ovo'ma' donkonuu' ee'noko teni Beenis donkonuu' ee'noko ookara nantoong teke ba'naniau'ning teing ninka nari' donkonau'. <sup>31</sup> Ee'noko tenang teketa tenkenaara bii'ka kareaama aa'paako', "Aung naning kapoo' tee dupisi'koong ee'noko kiimatanava-koo pin-ka'koong makosi nkovuaung." <sup>32</sup> Ee'noko Akiripa'ke Peestasi aa'puu', "Aung naning unaa-antaveripeu'nung Siisa'ke taaravuu'naang aroo'aravaruunung dei."

## Paula' Rooma'aape Beu'na'

(27:1-28:31)

### Aareri-koo Sipau'na' Paula' Rooma'aape Be'anta-koo

**27** Teketa tee nii' Itali-aape aarerie be'koo tamaaru' Paula' ee'noko nii'ning kiimatanupoong nari'. Ee'noko tee naning miring Julias teing tanata-koo botoau', tee Siisa' bakaning mau'moni'navitukoo narung daaku' piatooronuka tarenara.

<sup>2</sup> Ee'noko danto aareri-koo A'damitiang biikanareng-koo koinampira tenkenampiru', Eesia-nameensi' kan-tevui siompuai-nareng-koo. Aristakas nii' ninka nari' meru', Tesalonaika'nara, Masedonia'nameensi'koong.

<sup>3</sup> Teketa dauna'mung Saidoni'navuntu' daanto du-umemariru', ee'noko Juliasie Paula' tampa' nkovuma ba'maikori' beero'koo taura'puu' teinge pakuaava'naang. <sup>4</sup> Ee'noko teketa danto tenkenampima Saiparasi-namui'koo nee'mariri meru' boo'ai tamuriko. <sup>5</sup> Ee'noko tenang pirung pako'ampiri merima Silisia ee'noko Pampilia' aa'namensi'kai kato tankinampira Maira-navuntu'koo tavo'mariru' Lisia-nameensi'koonoo'.

<sup>6</sup> Teka teie piatooronuka daaku' tarenarai narung aareri oovuu' Aleksandaria' biikanareng Itali-aape beko, ee'noko tereng-koo koo'muru'. <sup>7</sup> Teketa makenge terenge nanampiko mmou' doong divu'kuio' karimarikota' Naidas-navuntu' due'mariru'. Ee'noko piong doonko Eesia siong-koo koonto' bono'murio' ee' deto Kiriti'namui'koo pako'marira nee'mariri meru' Saamoni-koo siuru' koroampiri. <sup>8</sup> Aa'na' pore'mori Kiriti'namui'koo miirimariri merikota' nii'noo' miring Tampoo' Kunkumenuu' tampaamanoo' basimariru', Lasea'keta osi pankamono-ita due'.

<sup>9</sup> Tee' pore'morima mmou' batei tamung tanking-antavampiru' aa'noko Ju'nupoong unkumoarimanang ee'noko pirunge nanu'koo tapanang. Ee'noko nanu' arika'pario' pirung oraru'kumanang meu'pampira Paula'ke nauvurima aa'puru', <sup>10</sup> "Ee aing, ninge ee'pina' oamaang: Nari' nanampiang deeko' tee baike kune'ampii'naang, ee'noko kapoo' baru' paa'araa'naang otoring aing aa'ning: kavo narung deea' teka areng aareri-nareng ee'noko niikaang do-maang nari'." <sup>11</sup> Teka teie piatooronuka narung daaku' tarenarai tee tereng okovenung ee'noko tee nanu'anta-nko beekaang kara aa'na' barorompuko', Paula' baru' deea'. <sup>12</sup> Ee'noko teketa te' kunkumenuu' baku'koo makotuarui' piong kamaari ninkaing batei-koo, teing-koo mmou' nantoong teketa tenkeng-koo piavorou' ee' noru'aama, Piiniks-navuntu'koo pa tampa' tavo'kampipeu'. Te' ee'noo' napo' Kiriti'koonoo' kunkumenuu' baku'koo tampoo' kamaari bakanang.

### Piong Pankaing Pirung-koo Nkoaru'na'

<sup>13</sup> Ee'noko tenang tee piong ee'depeto tampa' poko aa'pau', "Enang Piiniks tampa' tavo'marii'naang." Ee'noko teinge aanka' doompeto barampaarai'nange Kiriti' miiringe danto meru' piisi' due'ke. <sup>14</sup> Teketa tee piong bari'uu' ee'doompeto piong ivekung pomana', pora'ka daue doompeto pora tamuru'. <sup>15</sup> Ee'noko tenang tee aareri tee' kompuio' piong-aapei be'koo makotuaruio' tamung danto bere'ampirio' bii'muru'. <sup>16</sup> Ee'noko oki'namui'koo mui'namui' miring Kauda'namui'koo nee'mariri meru', ee'noko teke karimarima tee bakaasi deto kakau barampampirai'nange kuunga aareri-koo pinka'ampiri dai'ampiru'. <sup>17</sup> Teketa tereng aareri-nareng nanampi-ko'nareng koomponge pankenge boonavete puring-antavampima dai'ampiru'. Ee'noko Aperika'koo due' daunaa'noo' pionge koing-antamuri'neeng-koo avoreaama tene' piontee'nane' miiruni-koonane' depeto siau'. Teketa mo'ming-koo bi'aara doonko pirung-koo dua'antavaio' tene'ke tee aareri teka date'date-antavuu'. Ee'noko tee'nari' o'noriko tamung bii'muriko'. <sup>18</sup> Ee'noko dauna'mung pionge avitoitoi bai'muriko teinge tee piontee'koong botunarong oko dua'koo depeto sing-antavau'. <sup>19</sup> Bera piong beenamparu'na'mung nii'ke ookarai birenge kompampiri doonko kosi'ampiru' ookara kapoo'nanka terong botunarong-koo bi'ari otoko'ning ninka nari'. <sup>20</sup> Ee'noko mmou' doong-koo duaa' dovang beento' oki'noo' oro'pariaruko', ee'noko aung piong aa'na' pankaing masikung oro'parako domamariauka'nung-pina' noru'mariru'nung.

<sup>21</sup> Ee'noko teing tee taamang nai-koo mmou' doonge datavaavaruio' Paula'ke uro'kanoo' pora teing-koo aa'puu', "Ee aing, tee' naurampiru'na' taaramerira Kiriti'keta moriaruu'nung dei tampa', aung baike kune'ampiarupeu' ee'noko aing kapoo'nanka kera'pampiarupeu'. <sup>22</sup> Enang tee naurampimang ninge, domang kuaa'doriaing aa'noaina': dii'koo narung minkiaravauka', teka aung aareri narung naka'aravai. <sup>23</sup> Ai' e'mung tee muunga ning-anko tee koosinung~ Kumponing-nung donkonuing tee ning moo'muio' mintoompvomaung bakaang. <sup>24</sup> Ee'noko teie aa'mui, 'Aroreauka', Paula'. Da' tee bakei Rooma' tampa' basirarara Siisa'koo uro'kanoo' donkoniaing. Ee'noko ooveko aing teing da' ninka nari' naniri-maatomaing Kumponing da' ninka nari' domamparii'naang tampuru'ning. <sup>25</sup> Tee'koo domang kuaa'doriaing, ee aing, ai' ninge tee Kumponing masika'antavansi otong tee' nari' naumuina' masika' nkoaraa'naang. <sup>26</sup> Teketa nii' teing nii'namui'koo piisi'koo koing-antamuriaining."

<sup>27</sup> Teketa piong kivora-ita karenamparu'na'mung tavo'kuko tee' tamung danto pirung Eeriria-aape-naru'koo bii'antamuriko meu'namang aareri-koo-nupoonge ee' noru'au': Nii' pa kansi'koo due'marimang. <sup>28</sup> Teketa paaranampaama ee' doonko daanga'noo' kenaanka kivora daanga' paaravau'. Teketa napo' danto'daanto paaranampaama kivora-ita

pa'noko' daanga' paaravau'. <sup>29</sup> Ee'noko avoreaara kapang-koo koinampi'neeng-koo karenaumo aanka' sing-ntavau' taa'o~namarang-eta doonko. Ee'noko da'deng tane'puu'naang piavoroi nempaako'. <sup>30</sup> Ee'noko teketa aareri-koo-nupoong mmariaava'naang kariarima tee bakaasi doonko sing-antavaako' pirung-koo, daang aanka' sing-antavaama koo'be~ita doonko. <sup>31</sup> Teketa Paula'ke tee daaku' tarenara ee'noko teing piatooronuka aa'puru', "Aing aareri-koo kuung otoroaruko deeko' dii' teing domantariaroo'naang." <sup>32</sup> Teketa teinge piatooronukai tee bakaasi-koong mo'ming napu'aara danto sipau'.

<sup>33</sup> Teketa tane'puma nanuko Paula'ke teing taa-manava'naang aa'na' botovurima aa'puu', "E'mung te'mung kivora-ita ~karenang doong taa-na'mung teing-koo doong dii' taamang nai dataveria' ee'noko avoro' narung-koo otorikoo'. <sup>34</sup> Tee'koo ninge taa-manirii'naang botorampimang dii' puring-antarurina'. Taaraveriai, dii'koo bore'keta dapo-koo navi' paa'aravaroo'naang."

<sup>35</sup> Ee'noko tee' minkuvura teie berete' nkavura tampa' tampura Kumponing-koo, teing-koo dutakanoo'ke teke pisi'ura nai tutumpuu'. <sup>36</sup> Tenang teing ookara tee' nkovura domang kuaa'antavurio' nii'ning taamang-koo naiau'. <sup>37</sup> Nii' ookara nantoong aareri-koo o'noriko'ning naroka' kenaanka daaku'keta naruaape-ita kenai'ka bera ~narung-taa [276]. <sup>38</sup> Ee'noko aa'nou' uite' nai-koo makosining naiampira poomuru', ee'noko naiampima sipampiru'ning ookara bakurapo' dua'aaru' pirung-koo aareri kuaa'oo'naang.

### Aareri Naka'aru'na'

<sup>39</sup> Enang tee tane'puio' teinge tevora' kansi' tasi'pava', teka teinge nii'noo' ooaako' kunkumenoo' piisi'po'noo' ee'noko te' ee'noo' piisi'koo tee aareri koing-anta-koo maroaako' makosi deeko'. <sup>40</sup> Ee'noko teinge teing aanka'nanka-koong mo'ming pirung-koo dua'aara aanka'nanka teka nari' sipaaru'. Tee' nkoaama tenang ee'nanang teing bentang aareri koong-antanging dapa'aareta bi'aresi otoreko'noo'keta doonko sing-antavaaretu' beekanoo' pirung-koo. Teketa tene' piontee'nane' uro'kanoo'nane' deto siampau', teketa piisi'aape daanto be'antavau'. <sup>41</sup> Teketa' daunaa'noo' paaku'antavaara piisi'koo koing-antavau'. Teketa koo'benoo' piisi'koo keemparara ka'nunuaruu' ee'noko taa'o-namarang boo'ai teka naka'uu'. <sup>42</sup> Teketa teinge piatooronukai teing kiimata-nupoong tavu'koo maroaariko' naampearira koo'ari'neeng-koo. <sup>43</sup> Teketa teie piatooronuka daaku' tarenarai tee Paula' domang-anta-koo piavora orokovuru' tee' maroaako'na' nko-koo. Ee'noko teie naampe-koo makosinuka botovuru' tutung doonko koo'arira naampearii'naang piisi'aape. <sup>44</sup> Ee'noko asi'ninge bentananka ee'noko aareri pute'aru'nairu kompai naampe-koo botovuru'. Aung tee tee' ee'na' domamariru'na' kansi'aape morira.



## Paula' Maalta-namui'koo Otou'na'

28 Teketa tee' domamariru'noo'keta nii'ke noru'ampiru' temui' mui'namui' miring Maalta-namui'.<sup>2</sup> Ee'noko temui'nupoonge nantoonge aa'na' bakei navumaaru', onkeonke'maarima aa'nou' nta' betu'memaaru' tenang ee'ngang apo'uma kamaari nkoarako.<sup>3</sup> Paula'ke tee koi'nanka oosivuma nta'koo betu'uko tenang tee boru' doparopa-po'nung nta'ke uipaarii'oko teketa bakoarara Paula'koo bireng-koo kakiaru'.<sup>4</sup> Tenang teinge nantoonge temui'nupoonge ooaara teu boru'nu bireng-koo bi'ari otoko teinge aa'paako' bii'ka kareaama, "Aung naning pa dupisi'nko deemparako bane aareri-eta domampari, teka teie kumponing mero'nkoi domang-koo taura'pua'."<sup>5</sup> Teketa Paula'ke tee boru' nta'koo tanka'ni'pura baike kune'ua'.<sup>6</sup> Teketa teinge tee nempaako'nung doremparara nii'noo' boo' dua'arako ooaava'naang. Teketa pankaroong nemparikotaa' tee-koo kapoo' basiar-avaruo' teinge norunoru' paariarira aa'pau', "Aung tee kumponinanka-koo narung."

<sup>7</sup> Narung ovo'ma' pankaing temui'koong miring Publias teke kansi' oto'evuko'nung simariru'noo'ke due'ke. Teie ee'narai bokumurira onkeonke'murira beenang doong-koo o'nori tampa' nkomuriko' nii' damisi-mainku.<sup>8</sup> Tenang ee'ngang Publias bauma siipavoko uipaarii' ninka kuviri'oma, ee'noko Paula'ke bera beero'uma bireng pante'ura kunsivuo' taarevou'.<sup>9</sup> Ee'noko tenang ee'ngang tee tee' taarevoio' taaravaara temui'koo-nupoong ookara siipa-po'nupoong tee-anko porora taarevorou'.<sup>10</sup> Teinge tee nii' avuavu'nanka mmau' amaaru'.

## Paula' Rooma' Basiaru'na'

<sup>11</sup> Teketa' tee beekuri kaara tankinuko teketa tenkenampiru' aarerie teke kamaari bakaang batei-koo temui'koo otou'nareng-koo koinampira. Ee'noko temui'nupoonge ookara kapoo'nanka nanu'koo apuka'mariru'ning te' aareri-koo kuung si'memaaru'. Tereng aareri-nareng Aleksandaria' biikanareng miring Pauroonka Kumponinka tampaako'nareng, uro'kanoo'ke bore' kenaanka teka'nii'nareng.<sup>12</sup> Teketa Siirakius basimarira teke beenang doong o'noru'.<sup>13</sup> Ee'noko teketa tenkenampira tee dovinge dama'du-aape bii'muri'neeng-koo kororairai' nanampikotaa' doonko Reekium basimariru'. Teke na'mung doong o'norio' dovinge toroarama ee' depeto poio' tenkenampira ke'munta-na'mung namu'ke Puteoli basimarira aareri teka sipampiru'.<sup>14</sup> Ee'noko teka nii'ke nii'ning Karistoo'koo baito-nupoong kune'arampirio' teing tasi'maarira bokumaaru' teke teing ninka nari' o'norii'naang ~ke'munta-taa doong-koo. Ee'noko temono-ita daanto kau'ke nanampiru' bera Rooma'aapenairu-koo basimariru'.

<sup>15</sup> Ee'noko teinge Karistoo'koo baito-nupoonge nii' moru'noo' taaravaara Rooma'keta porora narung osi-koo basiariru' nii' kune'maarii'naang, Aapia Bakanoo'

Baaveroma tampaako'noo'. Ee'noko teing-koo nii'nari-ongge pava beevaari baave-kooning otoko'noo'ka osia kune'maaru'. Paula' teing oovurira Kumponing-koo tampaara tampaama domang purimparu'.

<sup>16</sup> Ee'noko tenang Rooma' tavo'marira Paula' baka oovunava-koo oto' piavoio' taura'pau' teka narunge piatooronuka-koonge tanatavui otoo'naang.

## Paula' Daankiaru'na' Rooma'ke

<sup>17</sup> Ee'noko beenang doong tankinuko Paula'ke ookara Ju'nupoong pankenanka teke otoroko'ning naru' bokuvuru'. Ee'noko tenang oosiaririo' Paula'ke aa'puru' teing, "Ee dii' mmarang, Ju'nupoong, ninge tee bane kapoo' nkoampa' niikaning nantoong orarianta-koo ee'noko niikakatauro biikaning toomonanka, teka ning tamung dai'maara Jerusalema'ka Rooma'nupoong-anko tavo'mau'.<sup>18</sup> Ee'noko teinge Rooma'nupoonge nkaang kara simpe'aara tee ning kimata-ita unaa-antamaava'naang piavorou', kapoo' tenai'koo nkanai'koo ning boo'anta-koo makosi ooaavarura.<sup>19</sup> Teketa tenang Ju'nupoong tee'koo piavoroaruo' ninge nii'na' noru'amparura Siisa' narung-koo aroo' sipantu' simpe'muu'naang. Nkaning Ju'kooning pankeng tuumpi-koo moa'.<sup>20</sup> Tee'koo ning tuumpi-mau'noo'koo ninge dii' oorampira dii' kararampima naurampii'naang botomaring. Okora'noo' ning sieenai dai'mari o'noing tee aung kapoo': Tee Pako'pari'nii' Isireeli-nupoonge Nempaamaung ninge masika'antavamaung-koo."

<sup>21</sup> Ee'noko teinge aa'pau' tee, "Nii'ke karavoto Judia'keta nkavampia' da'koo minkunaa, ee'noko nii'ning nii'marang-koong otoa' nii'koo a' pora nii' naumurima oraka' minkuruu'nung da'.<sup>22</sup> Teketa nii' dake minkueko taara-koo piamorimang dake noru'ei otoina', ai' nii'ke tee ookanairu-koo tamung oraka' nari' minkuaako taaravampimaung teving nerakavung dake siompemanavung."

<sup>23</sup> Tenang teinge doong nii'na'mung miru'evaara otoko'nava-koo karinga porou'. Ee'noko teie enang teving nerakavung kankenkankeng-antavuru' teing, tane'keta bera kamunoo'ke basi. Ee' nauvuru', nantoong Kumponing-namuu'kooning arekee' oro'nuka teie daankivuru' teing-eta kara aa'noko Moosesie boto sipuma daarivuu'ning ee'noko teinge nii'ninge nakarunupoonge tenang-eta deto daariaako'ning, teing tasi'antavurii'naang tee Jiisuu' tee Kumponing temu'keta Pako'pari'nii' bakaang muu' tare-koo.

<sup>24</sup> Ee'noko nii'ninge Jiisuu' tasi'pau' bakaang kara taaravaara, teka nii'ninge masika'antavaava'.

<sup>25</sup> Teketa siivenke'eema tenkenaava'naang nkoariko Paula'ke asi'naare minkuvuma aa'puu', "Tanuaang Meekung tee masika'paru'nung teing-koo diumaraang-koo Aisaia' karantavuko' daarivuma aa'puu'noo'ka,

<sup>26</sup> Aing Ju'nupoong bera aa'periai, Dii'ke tee bakei bane nkaang kara taaraverikotaa', teka onoue komperiauka'nung; ee'noko bane taa'ni'anta ooverikotaa', teka tasi'periauka'nung.<sup>27</sup> Tee' naueriaing, ai' aing

nantoong teing maroita domang poruruorou~  
 ee'noko biikaang punkaa' kapamporou'nankai maroita  
 taaravaa'neeng-koo, ee'noko biikaang duta mutu-  
 uariru'nankai aa'no'neeng-koo: dutai tasi'paara,  
 punkaa'ke taaravaara, domange onou kompaara ning-  
 anko bere'ariko taare-antavarami'neeng-koo.'

*(Aisaia' 6:9,10)*

<sup>28</sup> "Enang tee, tee' daarivuu'noo'koo dii'ke noru'eri-  
 aing Kumponingee tee domang-anta bakaang  
 Ju'deeaing-anko bee'naang tampuu'. Teinge taar-

avaavaing tee." <sup>29</sup> Ee'noko Paula'ke tee' minkuvuio'  
 teing Ju'nupoong bii'ka deepaiko'eema tenkenau'.

<sup>30</sup> Ee'noko tee Paula' teva'koo kemare'ka ookutuning  
 otou' dai'arita' baka moo'uma teva. Nantoong tee-  
 anko poroko'ning onkeonke'uriko'. <sup>31</sup> Ee'noko makem-  
 pua' teing-koo daankivuko' tee Kumponing bakaang  
 muu' ee'noko kapoo'ke avo'uaruko nau-antavuriko' Ji-  
 isuu' tee Oving tero Pako'pari'nii' ookara nantoong  
 domamuriainoo'koo.

Basi te'.

# ROOMA'

## Kara Baavootunanka Ane'kooning

1:1 Masika'antavampiko Deeko' Kumponingee Nii' Koonto'nuka Tammuriaina'  
 5:1 Nii' Teing Karistoo' Ninka Nari' Moompira Domamariri O'norimaing  
 9:1 Kumponingee Isireeli-nupoong Miru'urimana'  
 12:1 Tampara Aarumoi Dotu-antavampiana' Karistoo' Piaamuri Moo'murio'  
 15:14 Asi'naare Kara Paula'ke Ba'maikori' Minkuvuru'naare

## Masika'antavampiko Deeko' Kumponingee Nii' Koonto'nuka Tammuriaina'

(1:1-4:25)

### Paula' Tee Naning Kumponingee Bakaang Kara Oko-antavuu'nung

<sup>1</sup> Aung karavoto~ ninge Paula'ke daariamang. Ning ee'nara Jiisuu' Karistoo' bakaang botovotonaa' Kumponingee kara-okomui-nka deemaraa'naang boku-muu'nung. Teie simpe'mui bamuu' bakaang doorenang tampara tavo'koo. <sup>2</sup> Tero urikamu' Kumponingee miru'uu' tee aung doorenang tampara teing nakaronuka~ urikupoong biikaang Daari Meekung-koo kuunge. <sup>3</sup> Tee doorenang tampara tee tee ee'nara Bauring-koonung; <sup>4</sup> Mono bakanamenge parapara-koo tee Deevita'ke bakanavinge ponto'aru'nung tang-koo makosi, nka boo'keta daa'aru'na'koo tee ee'nara naning meekung masikung ee'noko Kumponing Bauring aa'na' purinto' sira'pari otong. Tee niikaang Ovoring Jiisuu' Karistoo'. <sup>5</sup> Tee-koo e'manansi kara-okomui-nka deemaru' nantoong amutemurii' meung-antavarama'naang tee masika'antavaava'naang tee. <sup>6</sup> Dii' Rooma'nupoong teinge teing ninka nari' otoring, Jiisuu' Karistoo'ke bokururu'ning. <sup>7</sup> Tee'koo aung karavoto dii'anko daariamang, dii' nii'ning Rooma'nupoong-kooning Kumponingee piaaruri bakaning meekupoong deentarii'naang bokururu'ning ookara-anko. Biraanke ee'noko mooa dii'koo otoaing Kumponing Niuma-itaing ee'noko teieta Ovoring Jiisuu' Karistoo'.

### Paula'ke Rooma'nupoong Oo-koo Piavou'na'

<sup>8</sup> Tutung tee nkaang Kumponing-koo tampa' tang minkuama'naang dii' tee-koo baitorarimaung-koo Ji-

isuu' Karistoo'ke pakumurio'. Ookara kansike taaravaamaung. <sup>9</sup> Kumponing ee'nara ninge mintoompavomaung nkaang domang ootukununge Bauring bakaang doorenang tampara dooreama teie ee'narai masika'antamuko aa'dampimang: Ninge dii' tantampimaung nkaang kungsi-koo ookara-koo. <sup>10</sup> Mmau'namu'pie kunsimaramaung Kumponing tana'ama taura'muu'naang bakaang piatampa' tokoona' nanama beero'dampii'naang. <sup>11</sup> Aa'na' oo-koo piamoi otong dii' nii'ning avuavu' Tanuaang Meekung-etaing pare'dampii'naang puring-antaruriaining. <sup>12</sup> Aa'noaing: nii' tee Kumponing nari' masika'antavampimaing nari' kune'meerira oomeeri domang kuaa'antameeriai. <sup>13</sup> Aung dii'ke noru'erii'naang piamomaang dii'ke mmaikori'ke: Mau'maramaung dii'anko be'koo tampa' dii' ninka ning mintoomarako sinang tampa' bi'uaina' tee' nari' teing nii'ning Ju'deeeing-kooning nauaranko nkoaramana', nka e'mung doong-koo basinoo'koo dii' beero'koo avo'mari o'nong. <sup>14</sup> Ning botomuu' ookamurii' nantoong nauarama'naang, osikaiaang ee'noko biikoori, norukasi'nuka ee'noko amakoori, ookara. <sup>15</sup> Tee'koo aa'na' piamoi otong daankiama'naang tee tampara doorenang dii' ookara Rooma'nupoong-koo.

### Ookara Nantoong Teing Kumponing Dama'du Sipau'ning

<sup>16</sup> Ning maia'moa' tee doorenang tampara sira'koo. Ai' tee tee Kumponing bakaang purinto' domang-antakoo makosi ookara nantoong masika'antavaaving, tutuntoma Ju'nupoong ee'noko napo' teing Ju'deeeing. <sup>17</sup> Doorenang tamparai tee sirapo'antavuing tee' Kumponingee nantoong nari-antavuriaina' tee ninka nari'. Ee'pina': Jiisuu' masika'antavaako, tee-koo masika'anta-koo narung-koo koonto'nuka tampuriai. Tee Daari Meekung-koo aa'pumana', "Naning tee bakaang masika'anta-koo Kumponing ninka nari' nariari otoaing tee domamparavaing."

(Abakaka 2:4)

Nantoong Kumponing-koo Ampa'oroi Orara Aarumo-koo Kato Bia'orou'na'

<sup>18</sup> Kumponing bakaang iira tee paning-etaing sira-ka'pari otong teing-koo Kumponing piavoroaing ee'noko oraka' nkoarimaing-koo, teing kara masikung avo'aamaing-koo oraka' nkoaama. <sup>19</sup> Ookara kapoo' noru'koo makosi Kumponing-koong sira'pari otong teing oreng-koo. Kumponing baka siraka'an-tavuu'nung teing-koo. <sup>20</sup> Kansi' pupu'aru'noo'keta bakaang iri' o'paa' ee'noko bakaang aarumo deto basi bane oro'paravainge, otoresmaung. Noru'aapeu' kapoo'nanka nkovuu'ning ooaama. Tee tee enang maku'na' oto'evoroa' tuutunang~koo. <sup>21</sup> Noru'noo' tee temu' noru'aako' Kumponing, teka pankaing-antavaavaruko' ee'noko tampara tampaavaruko' tee-koo makosina'. Tek a biikaang noru' toosi-paa' deemparara minkuminku tutumpaako' daang-koonanka. Bera biikaang domang kanu'koo baraa'aru' koonto' mu-taanang. <sup>22</sup> Norukasi'nuka tamparima baru' kanu'nanka deeng-antavariko'. <sup>23</sup> Paariaako' Kumponing boo'paa' bakaang meenasi teinge baka-oonanka booromaing-pina' oro'nankai aa'ning-koo: nantoong, bareng, ee'noko kau' karenaumonanka-koo. <sup>24</sup> Tee'koo Kumponing sipurira † tara'baruu' oraka' karaa'arimana' tamung danto nkoveea'naang maarekusina' bakiaa'eema, mono baa'pina' noru'eitaa'nange.

<sup>25</sup> Paariaama Kumponing bakaang kara masikung tosi-tosie teing kapoo'nanka Kumponing nkovuru'ning dootuu'aakoo' meekeng-pina' tareaarima, tee ee'nara teing nkovuru'nung divu'aitaa'nange, tee biraanke-po'nung doong kante otomaung. Ee', bakei!

<sup>26</sup> Tee'koo Kumponing tamung doong-koo sipuru' aarumo orara maimaia' karaa'koo. Teing-koo maniku' nampeesi baari'au' bii'ka maniku' naing oto'ke.

<sup>27</sup> Napo' donkaang tee' nari', maniku' ninka nampeesi sipai bii'ka donkaang naing bakiaa'eeko' maimaia'na'. Tee'nko aarumo orara-koo tee kiimata makosina' tora'paamaung bii'ka-koo. <sup>28</sup> Teketa' Kumponing noru'koo kasiaavaruko Kumponing tamung doonko sipuru' biikaang noru' orara-koo oto'koo, aarumo toosi-paa' ninka. <sup>29</sup> Bakei amutemurii'ke maanto'uru', oraka'nkoi, orara aarumoi, oko'okoi, ee'noko oraka' noru'ke. Mamairoi maanto'ke ee'noko tavu'nkoi, turang, tosi-tosi, too'deng; <sup>30</sup> Teing temurii' tee ukuusi baukonuka, miring orari-antananka, Kumponing-eta kare-nupoong, bauvaupaa' nkonanka, bii'ka kirokainuka, baka daanganuka, daang mataunuka, biu-maraang-koo meuntepa'nuka, onouropanuka, maraka-anta toto'nuka, piaaropanukai, ee'noko ama'ama'nuka. <sup>32</sup> Kumponing bakaang miru' ee' oro': Teing tee' nkoariaining tee booroaining. Ee'noko bane tee tee miru' noru'ai nka tee teinge nkoaamaung, ee'noko bakei kei'oromaung nii'ning oo-koo tee' nari' napo' nkoariko.

† Kumponing bakaang iira ee' oro'antavumaung: taura'puko biikaang aarumo orara bia'ora taivurimaung. Tek a doong asi'na'mung kiimata masikung nkavaavaing, Rooma' 2:5 minkuvumana'.

Kumponing Nantoong Koonto' Simpe'urimana'

<sup>2</sup> Ee' masika', dii'koo narunge tee aa'pupeu': Teing bakei oreng dake ning naumemaing. Tek a io' noru'eai mmaiko': Da' tee' nari' oro'ke, teing-pina'. Teing dake aa'perima: Teing oreng, kiimatavariaining, tee' minkuema tee, da' nari' teing ninka minkuraramang da' tee' nari' nkoraramaung-koo. <sup>2</sup> Dake aa'pepeu': Nii'ke tee noru'ampiri otong tee Kumponing-ning kiimata makosina' tavo'aravaing teing-koo nantoong-koo temurii' kapoo' nkoaamaing-koo. <sup>3</sup> Nka ninge ee'pina' nauramaang mmaiko': Nka dake teing naing tuumpierimaang dakanoo' noru'darava' tee' nari' nkoraramanoo'? Dake ee' noru'emaung ee: "Ninge baari'ampaing Kumponing bakaang kiimata."? <sup>4</sup> Teie aa'na' piaaruma da' pankaroong kiimatarua', boimpui nentumang bere'daraa'naang dakaang oraka' nko-ita, ee'noko noru'ea' otong ee? <sup>5</sup> Tee dakaang domang ivekung bere'daravaunge mmou' deeng-antave-maung tee iirananka Kumponing-etananka, ee'noko tee oro'paravaing asirana'mung bakaang kiimata koonto'nanka sira'puaina'mung. <sup>6</sup> Teie tee moo' avuri-aing ookara nantoong biikaang nko-nkoi siompui otoi'na'. <sup>7</sup> Teing nantoong tampa' nari' nkoaamaing ee'noko besi'aakoo' tee meenasi Kumponing-etaing, pankaing-anta, ee'noko domaang boo'paa', teie teing domaang tampa' nari' oto' avuri-aing. <sup>8</sup> Tek a teing turang nkoaamaing ee'noko kara masikung siom-paavarukoo' ee'noko orara aarumo siompaakoo' teing tee Kumponing aa'na' iiravoitaa' tavuri-aing. <sup>9</sup> Kune'aavaing teinge tee pore'anta orarunsi ninka ookara nantoong oraka' nkoarimaing, tutuntoma Ju'nupoong ee'noko napo' dama'ke Ju'dee-aing tee' nari'. <sup>10</sup> Ee'noko tee meenasi, miring pankaing ee'noko mooa kompaavaing teinge tampa' nkoarimaing tutuntoma Ju'nupoong ee'noko napo' Ju'dee-aing, Kumponing nari' basinoo'ka noru'urimaung-koo. <sup>12</sup> Teing nantoong oraka' nkoarimaing Moosesi-ning botoi kuung deempuriaruko kera'anta kune'aavaing, bane tee noru'aava' nkoaamaung. Ee'noko teing teie botoi kuung deempurio' oraka' nkoarimaing tee teie botoi simpe'uri-aing. <sup>13</sup> Nanging tee, tee boto taar-avu-peu' nka tee siompuarura Kumponing-ankoi koonto' deemparavarupeu'. Teing mutero'aamaing naing koonto'nuka tampuri-aing. <sup>14</sup> Nii'ning Ju'dee-aing Moosesi-ning boto oto'evoro-aing, nka tee bii'ka matauai tampa' nkoaako tee, noru'ampipeu' teinge tasi'pai otong tampara aarumo bane Moosesi-ning boto noru'aavaing. <sup>15</sup> Tee matau biikaang tampa' oampira noru'ampipeu' kapoo'nanka botoi minkuvui otoring teing-koo biikaang domang-koo daariari otong. Ee'noko biikaang domang nari' masika' onouaakoo'. Tasi'pari otong biikaang noru'ke nii'ning namu'na' tu-umpivurikoo' ee'noko napo' namu'na' pakuvurikoo'. <sup>16</sup> Tee'koo, teie doorenang tamparai minkuvui otoi'na' ninge sira'pamaung, tee' nari' nkoaravaing te'mung asi'na'mung Kumponing Jiisuu' Karistoo'koo kuunge

koong-antavuriaing biikaang aarumo makensi'ning noru'uitaa'.

**Ju'nupoong Daang Biikaang Botoi Domaang Moo'urii'naang Noru'arimana'**

<sup>17</sup> Enang tee da' Ju'nupoong-koong tantarama Moos-esi-nung botoi pakuruio' da' Kumponing bakaang naning tantarama daangantaramaung deeko', <sup>18</sup> ee'noko tee boto-koo barerararai'nange Kumponing-nung pia noru'ei otoing deeko', <sup>19</sup> ee'noko simpe'epeu' kapoo' orara ee'noko tampara, ee'noko da' naning mutuu siong-anta deeko', ee'noko araka teing-koo mutaanang-kooning-koo, <sup>20</sup> napo' nau-antai amakoorkoo, ee'noko kake'ii-anta toire'koo deeko', ee'noko kompei otomaung noru' masakung kinkompario' tee boto-koo kuung deeko', <sup>21</sup> da' nantoong nau-antaverimaung daka ee nau-antararava' otong? Da' bakiaa'koo daankirarama poteverimaung, arekee', bakiaa'ki-aunge? <sup>22</sup> Nampeesi orari-koo poteverikoo'. Arekee', daka nampeesi orarieaunge? Kumponing tositosinanka maremaarenanka tamperikoo'. Arekee', maareroa' teing-koo pakuraramaung ee? <sup>23</sup> Bakei daangantaramaung tee boto tampa' noru'ei otoing tantarama. Arekee', Kumponing-nung miring dua'antaveaung ee tee boto toto'pema? <sup>24</sup> Daari Meekunge tee' nari' minkuvui otong, aa'pumaung,

"Dii' Ju'nupoong oraka' otoriko tee'koo Ju'deeaing Kumponing oraka' minkuaamaung."

(Aisaia' 52:5)

**Tamung Mono-koo Taa'ni'antai Napo' Domaang moo'muriarupeu'**

<sup>25</sup> Dopa' toto' tee Kumponing-nung taa'ni'anta masakung tampa' taaraveri dei tee boto. Teka toto'periaing deeko' tee boto tee, diikaang dopa' toto' tee-pina' tamunsi'nung deempari otoing. <sup>26</sup> Teka nii'nung naning Ju'deeaug dopa' toto' nkavuaruining tee boto tampa' siompui dei siraka'pari otong tee makosi, otopeu' tee-pina' naning dopa' toto' nkavuing-pina', bane dopa' toto' nkavuarupeu'nunge. <sup>27</sup> Tee ee'nara naning, dopa' toto' nkavuaunge boto tampa' tarevui dei, teie tee da' boo'koo makosi tantupeu', da' ee'nara boto toto'pemaung, bane boto daarinii' ee'noko dopa' toto' kompei otomaunge. <sup>28</sup> Nka naning tamung dama'dunung oo'ooe Ju'koong Ju' masakung deea', ee'noko dopa' toto' masakung tee mono-aapenamengkoong aarumo deea'. <sup>29</sup> Naning Ju' masakung tee, bakaang domang Ju'pina' otomaung, Tanuaang Meekunge dopa' toto'nii', tamung boto paara-koong deea'. Baa tee naning temurii' aampari' nkavuaing bakaang domang-koo tee, teie daangang nkavuaing Kumponing-eta, nantoong-aapeita deea'.

**Kumponing Bakaang Maraka-anta Tamung Noru'ampima Domaang moo'mariarupeu'**

**3** Aming nkoaravai naning Ju'koong deemparako? Dopa' toto'ke arekee', pakuvuai? <sup>2</sup> Ee', moo'

pankaing amutemurii' otong. Tutuntoma ee': Ju'nupoong-koo Kumponing kinkompuu' bakaang karakara. <sup>3</sup> Kinkompuio' nii'ninge masika'antavaava' tee kara. Enang arekee', teinge masika'antavai meumpaavaruko Kumponing koonto' masika' bampuu'na' nkovuai? Ai' tee' napo' teing-pina' nari' meuntepa'aravai? <sup>4</sup> A, tee' deea', bakei! Kumponing tee masika'pari otoing, bane nantoong ookara tosiariko. Daari Meekunge ee' minkuvui otoiina', "Dakaang kara masakung deemparaa'naang tenang da' kareko, ee'noko tuutunantaako boong deempee'naang."

(Kena 51:4; 62:9)

<sup>5</sup> Nii'ninge bii'ka matauarima tee, daang ee' minkuaamaung, "Nii'ka meuntepa'marimaung-koo Kumponing-koo oraka' otoa', ai' nii' oreng oomaarima nantoonge Kumponing bire'ario' aa'na' tampara ooaako teie nii' kiimata-koo makosi deea'." <sup>6</sup> A, tee aa' tee' deea', bakei! Ookara nantoong Kumponing kan-si'nupoong simpe'uriaing kiimatavurima.

<sup>7</sup> Nii'noo' naning aa'mupeu', "Io' noru'eai: Nkaang tosiro'ke Kumponing pankaing-antavumaung tasi'anta-koo Kumponing bakei masakung. Tee'koo ning boo'koo miru'muauka'. <sup>8</sup> Aming-koo potemerimaunge oraka' nko-koo? Tee tee tee' nkomariko kapoo' tampara basiarapeu'." Nka tee teing nantoong temurii' kara minkuaamaing teing boo'koo miru'nii'nuka te' minkunii'na'. Nii' Karistoo'navitu kara tee' oro' minkuampaing. Tamung nii'ninge tee' tuumpimaarimaung.

**Ookara Nantoong Bakei Dua'arira Tompinisinuka**

<sup>9</sup> Enang arekee', nii' ee' Ju'nupoong Ju'deeaing-koo deu basinuka? Bakei koonto' makotua'. Ninge tee, tero naurampiring nii' Ju'nupoong ee'noko Ju'deeaing ookara nari' o'noring oraka'nkoi nara'ka kuung deemuri otong. <sup>10</sup> Tee' daariari otoiina' Daari Meekung-koo,

"Naning tampara otoa', narung duukung otoa' bakei.

<sup>11</sup> Narung noru'po'nung otoa' Kumponing besiu'umaung.

<sup>12</sup> Ookara dama'du-aape bere'ariring, oroo'ke nari' beroing. Narung naning tampa' nkovua'. Narung duukung otoa' bakei.

(Kena 14:1-3; 53:1-3; Norukasi' 7:20)

<sup>13</sup> Kara orara biikaang karang-eta tavo'aramaung davoru-koong ka'mi' kuvi dako'doma-eta tavo'aramana'. Biikaang meneng tositosi-nko. Biikaang kara boru'ke-taing dopa-pina' beruu'keta tavo'arakoo'.

(Kena 5:9; 104:3)

<sup>14</sup> "Biikaang karang barakosi'ke maanto' naari-anta ninka.

(Kena 10:7)

<sup>15</sup> Teing dupisi' namu'ke nkonanka.

<sup>16</sup> 'Taung tooreere navung siompaamaing nantoong oraka' dee'antavaarima.

<sup>17</sup> 'Ee'noko mooa-koonavung taung noru'aava'.

(Aisaia' 59:7-8)

<sup>18</sup> "Kumponing noru'aavarukoo', avoreaava'."

(Kena 36:1)

<sup>19</sup> Tee'koo Kumponing baru'noo' kiimatavuriang Ju'nupoong deempariko ai' teing teing makosinuka Kumponing bakaang boto meung-koo, teka meumpaava' teinge, orenge aarumo oraka'nko nkoaama. Nii'nung teing-koo aa'maio'aravauka'nung. Ee'noko teing naing deea', ookara kansi'nupoong tee kareaavauka'nung tuumpivuriko Kumponing. <sup>20</sup> Nanging otoa' Kumponing bakaang boto siompuma koonoto' tamparavaing, ai' boto tee nantoong ookara orenge tasi'anta-koo miru'nii'.

### Teing Kumponing Masika'antavaamaing Naing Miring Koonto'nuka Tang-koong

<sup>21</sup> Nka tee enang nii'navung sira'paring nantoong koonto'nuka deemparipeu'navung Kumponing-ankoi, botoi deea'. Tevung tevung tero teie botoi ee'noko nakaro-nupoonge nari' minkuau'navung. <sup>22</sup> Ee'noko tee tevung enang sira'parinavung ee' oro'navung: Teing Jiisuu' Karistoo' masika'antavaamaing Kumponing koonto'nuka tampuriang, ookara tee' nari'. Tankatankaang otoa'. <sup>23</sup> Aming-koo, ookara nari' oraka' nkoarima kaari'arikoo' Kumponing bakaang meenasi kong-koo. <sup>24</sup> Nka tee enang nii' ookara naro'ka koonto'nuka tammurining tamung bauta'murima, Jiisuu' Karistoo'ke niikaang kiimata nkavura moo'murio' bakaang erenge. <sup>25</sup> Kumponing Jiisuu' botovuu' tee' nko-koo ookara-koo dutakanoo'ke tee masika' antavampiko tee ninka naroong-antamurii'naang, ee'noko napo' nau-antamurii'naang tee Kumponing tee aarumo koonto'koo okora', ai' tero-nupoonge oraka'nko nkoaako tee mii'kui tamung doonko oovuriko kiimatavuria' Karistoo'ke mero' kompuang noru'uitaa'. <sup>26</sup> Ee'noko nii'ke enanupoonge tasi'pampii'naang piavoing Kumponing tee aarumo koonto'koo okora' ee'noko nantoong koonto'nuka deeng-anta teing nantoong Jiisuu' masika'antavaavain- ing.

<sup>27</sup> Enang ee nii' daangamaripeu'? Makotua'. Aming-koo makotua'? Tee aa' tamung masika'antavampiko koonto'nuka tammuru', tampara nko-nko-koo deea'. <sup>28</sup> Nii'ke tee aa'pampimaung: Kumponing naning koonto' tampuma tee bakaang masika'anta oovura tee' tampuaing, bane Moosesi bakaang boto noru'ua'. <sup>29</sup> Kumponing ee Ju'nupoong naing biikaang, ee'noko Ju'deeaing ninka nari' deea', ee? A, ookara biikaang, ai' tee tee Kumponing narung masikung. <sup>30</sup> Ee'noko tee narung masikung deemparitaa' navunge taunavunge ookamurira koonto'nuka tampuriang teing domampuripeu'nung-pina' masika'antavaako dopa' toto'nii'nuka ee'noko toto'pariaing nari'. <sup>31</sup> Enang ee masika'anta-koo minkuampima boto dua'ampimang? Otoa'. Boto tee aroo'ampiri minkuampiring.

### Kumponing Eebaraami' Naning Koonto' Tampuu'na' Masika'antavuko

**4** Io' Kumponing Eebaraami' bire'uu'na' noru'eri- aing, ai' tee mono-nameng-koo tutuntomaa nii'

Ju'nupoong niuma. <sup>2</sup> Arekee', bakaang nko-nko tampara-koo Kumponing naning koonto' tampuu'nunge? Tee'koo deeko' tee daangamparapeu'nung. Nka tee' deea'. Kumponing-koo uro'kanoo'ke daangamparavarupeu'. <sup>3</sup> Ai' Daari Meekunge tee ee' minkuvui otong, "Eebaraami'ke Kumponing masika'antavuko Kumponing tamung naning koonto' tampuu'." (Pupu' 15:6)

<sup>4</sup> Nanging tee nko-nkoarakotaa' bakaang moo' nkavuaing. Tamung bauta'pina' tang-koo makosi deea', tee bakaang nko-nkoi moo'. <sup>5</sup> Nka naning tee Eebaraami'pina' bakaang nko-nko tamung doonko noru'ui Kumponing bakaang piaa masika'antavupeu'nung aa'puma: Teie orenge koonto'nuka deeng-antavurimaung bakaang duta-koo, Kumponing tee ee'nara naning koonto' tampuaing bakaang masika'anta-koo. <sup>6</sup> Tee-pina' napo' Deevita'ke minkuvuu'na'pina' naning bakaang doturoto-koo Kumponing koonto' tampuainung boto siona' otoko. Aa'puu',

<sup>7</sup> "Biraankeariaining teing biikaang boto-toto' tota'evuriaining ee'noko teing biikaang oraka'nko tamung doonko daka'pevuriaining.

<sup>8</sup> "Biraankearavaing tee naning bakaang orara nko-nko-koo Kumponing tampuauka'nung."

(Kena 32:1-2)

<sup>9</sup> Tee baa Deevita'ke biraankenung tampuu'? Ai' nii' Ju'nupoong dopa' toto'marimaing tee' minkumuru'nunge, teing Ju'deeaing ee' naro'ka deea'? Otoa', ookara naro'ka. Tero naurampiru' Eebaraami'koo Kumponing koonto' tampuu'nung bampuu'na' masika'antavuko. <sup>10</sup> Arenang koonto' tampuu', ai' dopa' toto'pario' ai' mme' toto'paravaruko? Dopa' toto'pario' deea'. Mme' toto'paravaruko Kumponing koonto' tampuu'nung. <sup>11</sup> Ee'noko tee dama'ke Kumponing nauvuio' dopa' toto'paru' taa'ni'anta-koo. Teie taa'ni'antai aa'pumaung: Aung naning Kumponing koonto' tampuu'nung teie masika'antavuko toto'paravaunge. Tee tee, Eebaraami' nantoonge biuma deemparu'nung dopa' toto'pariaing masika'antavaako Kumponing koonto'nuka tampurimaing. <sup>12</sup> Ee'noko napo' tee' nari' biuma teinge nantoong dopa' toto'paririning. Nka tamung boturopa toto'paririning deea', nka teing naing Kumponing koonto'nuka tampuru'ning Eebaraami'pina' Kumponing bampuru'na' masika'antavaako, tero dopa' toto' nkavua' masika'antavuko'na'.

### Baata Teing Baito-nupoong Teing Kumponing-nung Maraka-anta Okovurimaing

<sup>13</sup> Kumponing barevuru' Eebaraami' bakanavitu ninka depeto ookara kansi' okovoroo'naang. Kumponing barevua' Eebaraami' botonang siompuu'nung-koo, teka Kumponing masika'antavuko naning koonto' tampura barevuu'. <sup>14</sup> Nii'ke ee' minkuampiri dei: Moosesi bakaang boto siompaamaing naing oko-antavuri- aing tee barenku daamaripeu'. Tee' ee' minkunii': Masika'antai tee kapoo' basi-antavuarupeu' ee'noko

Kumponing bakaang maraka-anta tee daang-koong.  
<sup>15</sup> Teka teing boto-koo noru' sipaamaing teing tevung boto sionavung kaari'aama Kumponing bakaang iira narung ooaavaing, ai' naning otoa' tee boto kepe-ruu'ui tampa' tarevupeu'nung.

<sup>16</sup> Kumponing tee, tee biraanke nii'keta paa'arava-roo'naang piavora tee biraanke bauta' deeng-antavuu' nii'ke nka-koo masika'antavampima. Tee'koo Eebaraami' bakanarempo'kai ookenge kompaavaing tee barenku, teing tee boto siempaamaing naing deea', nka teing nii'ning napo' barenku masika'antavaamaing ninka nari' Eebaraami'pina', tee nii' ookara niuma.

<sup>17</sup> Kumponing Eebaraami' nauvuu'na', Daari Meekung-koo ee' daariari otong,

“Da' tee ninge enang amutemuu' muu'ke biuma deeng-antaransing.”

(Pupu' 17:5)

Aung kara koonto' Kumponing-koo uro'kanoo'ka taar-avuu', bakaang-koo Ovoring-koo masika'antavuko'nung-koo tee boo'nuka domang-anta ee'noko kapoo'nanka otoroaing karai tavo'anta. <sup>18</sup> Kumponing nauvuu' Eebaraami', teie narung bauring donkaani avuu'naang tampuu' ba'dompenku mmou' deeng-antavuriaing ee'noko pankavitu deempariaing. Ee'noko Eebaraami'ke masika'antavuu' Kumponing, bane tee aung kara makotuaung-pina' oro' nauvuko. <sup>19</sup> Barenku masika'antavui kara dua'ua', bane mono pankara noru'arama boo'koo makosi, bane tee bakaning mare' daaku'koo due'ari otoing ee'noko bane ba'aang Seera' bisiirai. <sup>20</sup> Nii'nung noru' konte-pina' oro' tavo'arava' Kumponing-nung barevare-koo, teka aa'na' purimpari masika'antavuko' Kumponing daangampuma. <sup>21</sup> Koon-to' tasi'pari noru'uko' kapoo' Kumponing barevumaung tee makosi nkovuiaing. <sup>22</sup> Tee'koo ee'na'koo Kumponing koonto' tampuu'. <sup>23</sup> Teka tee kara Kumponing koonto' tampuu'nung Eebaraami' baka nau-anta-koo daariarava', teka nii'koo napo'. <sup>24</sup> Kumponing napo' nii' koonto'nuka tammuriaing masika'antavampiko tee napo' domang-antavuu'nung boo'keta Jiisuu' Karistoo', niikaang Ovoring. <sup>25</sup> Tee ee'nara Kumponing taura'puio' boo'paru' niikaang boto-toto'koong kiimata nka-koo, ee'noko Kumponing napo' daa'uu', tee' masika'antavampiko Kumponing nii' konto'nuka deeng-antamurii'naang.

### Nii' Teing Karistoo' Ninka Nari' Moompira Domamariri O'norimaing

(5:1–8:39)

#### Jiisuu'ke Nii' Kumponing Ninka Navu-antamurimana'

**5** Tee barenku masika'antavampiro' Kumponing koonto'nuka tammurimaung. Tee'koo Jiisuu' Karistoo'ke pakumurio' enang mooa-koo o'noring Kumponing ninka. <sup>2</sup> Jiisuu'ke tee Kumponing tampa' oomurimanoo' basi-antamuru' ee'noko dotumari-

maung nempampirita' Kumponing-nung meenasi kong-koo. <sup>3</sup> Baru'noo' tee dotumarimaung sisikeer-amorima ee' noru'ampima: Sisikeerai tee iveka'antamurimaung orara puru'koo. <sup>4</sup> Ee'noko iveka'mariko makosi-antamurimaung. Makosi-antamuriko masika'antavampimaung kapoo' tampuu'na' nkoaravaing. <sup>5</sup> Ee'noko masika'antavampima munte'moriarupeu' nempampima, ai' teie Tanuaang Meekunge, Kumponing amuru'nunge Kumponing-nung piao nii'koo koo'uu' niikaang domang-koo.

<sup>6</sup> Tenang nii' aruaru'mori o'noriko, Karistoo' batei baumai miru'uu'nung-koo boo'paru' Kumponing noru'aavaing-koo. <sup>7</sup> Nantoong baru' booroaung nii'ning pari'anta-koo, bane tampeng-koo. A'noo' naning deema aroo'upeu' naning tampara-koo boo'koo aa'na' piaavoma deeko'. <sup>8</sup> Nka Karistoo' bakei nii' nantoong oreng o'noriko boo'paru'nung-koo Kumponing bakaang piao aa'na' deto basi naumuri-maung. <sup>9</sup> Enang aa' tee nii' bakaang erenge naroon-antamurining deemariko enang makosi moo'muriaing koonto' kiimata-ita. <sup>10</sup> Tenang napo' nii' kare-nupoong o'noriko napo' bauring boora navu-antamuru' Kumponing ninka. Enang tee nii' navunavuro'nuka deemariko makosi nii' koonto' domamuriaing bakaang domaange. <sup>11</sup> Ee'noko tee narung deea'. Napo' nii' dotumarimaung Kumponing-koo niikaang Ovoring Jiisuu' Karistoo'ke pakumurio', teie ee'narai osikoimuru'nunge.

#### Jiisuu'ke Nii' Domang-antamuru'na' Aadama-koong Barakosi' Puru'ui

<sup>12</sup> Enang noru'eriaing tee aung taa'ni'anta. Narung naning oraka' nkoario' bakaang oraka'nkoi nantoong karika' orari-antavuru' ee'noko teie orari-antai tee boo' basi-antavuu' nantoong kansi'koo-nupoong-koo. Ee'noko tee teie boo'ke ootukunung kuung deempuru' ookara oraka' nkoaririo'. <sup>13</sup> Nii'ke noru'ampiri otong Aadama bakaang oraka'nkoi tavo'antavuu' tee. Teka tee'koo nantoong oraru'kiaako' Aadama bakaang batei-eta bera Moosesi bakaang batei-koo basi. Kumponing tee boo'koo tampuriaruko' boto to-to'paako, ai' bakaang boto mme' avuria' teing. <sup>14</sup> Tenang biikaang mono booroma biikaang oraka' nko-koo booroaruko', teo Aadama bakaang-koo booroko'. Teinge toto'paava' tee boto Kumponing Aadama avuu'nung tee sinang orokonii' maa'koong. Aadama tee uu'aa'pina' tee Domang-anta Tavo'aravaing-koong.

<sup>15</sup> Nka tee, nari' oro'ka deea' Aadama bakaang oraka'nko ee'noko Kumponing bakaang piaae nantoong tampa'nko. Narung bakaang oraka'nkoi boo' tavo'antavuu' nantoong mmou'koo, nka aunge narunge Jiisuu' Karistoo'ke baru' puru'uitaa' tonta'anta bauta'pina' deto basi tavo'antavuu' mmou' nantoong-koo teie Kumponing bakaang piaae. <sup>16</sup> Kumponing bakaang bauta' tee, narung bakaang oraka' nko-nko-koong sinang-pina' deea'. Namu'ke boto toto'pui Aadama boo'koong kiimata pare'uu' nii'koo ookara-koo. Teka Kumponing bakaang bauta' tee, niikaning

oraka' nkonanka mmau' pau'ariko amuru'nung, makosi-antamurima nii' Kumponing ninka nari' nroomariri o'noriii'naang domamaririta'.<sup>17</sup> Narung naning oraka' nkoarara ookara nantoong boo'parimaung. Teka enang napo' nii'nung narung-koo teekoo Jiisuu' Karistoo'koo Kumponing deto basinoo' tampa' nkomurimaung niikaang oraka' nkonanka tamung tonta'memurima. Ee'noko tee'koo nii' koon-tonuka tammurimaung. Ee'noko teing tee bauta' nkavaavaining Kumponing-nung teing ee'ning ovontumpariri otoroang ee'nara ninka narung ninka Jiisuu' Karistoo' ninka.

<sup>18</sup> Tee tee ee' otong: Ookara nantoong kiimatavariaing oraka'nko nkovuu'nung-koo, napo' tee' nari' Kumponing nantoong koonto'nuka tampuriaing ee'noko domampariai nii'nung narunge tampara aarumo nkovuu'nung-koo.<sup>19</sup> Ee'noko tee'koo napo' nantoong karika' orara aarumo nkonuka deempariru' teie naning Kumponing siompuarura, ee'noko napo' tee' nari' nantoong karika' tampara aarumo nkonuka deempariaing Jiisuu' Karistoo'ke Kumponing tampa' siompuu'nung-koo.<sup>20</sup> Kumponing boto avuru' biikaang orara aarumo pankaing tasi'paava'naang. Ee'noko orara aarumo aa'na' sira'pario' oampima tee' nari' Kumponing bakaang piaa deto basi napo' sira'pario' oampipeu'. Ookara oraka'nko tonta'memurimaung teie.<sup>21</sup> Tutung tee oraka'nkoi kuung deempuri otoko' ookara nantoong, ee'noko boo'nameng-aape sipuru'nung, teka enang Kumponing bakaang piaae taremurimang aarumo koonto'koo kuung deemuri, bera domaang oparavaung-koo tavo'muriaing tee-koo Jiisuu' Karistoo' niikaang Oving-koo kuunge.

#### Nii' Karistoo' Ninka Moompiru'na'

**6** Nka ee' noru'ampiauka', "Orara nkoampima-toaing Kumponing bakaang piaa pankaing piaa-muriaina."<sup>2</sup> Bakei makosi deea! Ai' nii' teing Jiisuu'koo kuunge moompirining deemaririta' orara nko-koo pi-ampia', ai' arekee' napo' toromarii'naang?<sup>3</sup> Ee' noru'eriaing: Nii' teing Jiisuu' Karistoo'koo o'norintong-koo minkie meeka'antamariru' ning bakaang boo'koo kuung minkinisinuka.<sup>4</sup> Tenang ntong-koo minkimarira meeka'antamariru' tee miru'noo' tee-pina' nii' nari' moompiru' ee'noko napo' nari' dako'maaru' Karistoo' ninka. Tee tee' nkoaru' tee, Niumai domang-antavuu' bakaang iirakutai. Nii' teka nari' domamuru' nantoong nerakupoong o'norii'naang aampari'marira niikaang aarumo-koo.

#### Nii' Karistoo' Ninka Napo' Domamariri Tampa' O'norimana'

<sup>5</sup> Teka nii' Karistoo' ninka narung deeng-antamarima nari' moompiru'ning deemaririta' tee' nari' Karistoo' ninka boo'keta nerakung ootoo'koo o'noriaing.  
<sup>6</sup> Nii'ke noru'ampiri otong niikaang urikung aarumo tee ninka nari' dupisi'au' aa'barata'koo' tee niikaang

orara aarumonanka teke bakearaa'naang ee'noko enang tee orara aarumo-koo bi'mariri o'noriauka'nung napo'.<sup>7</sup> Davorue tee orara aarumo napo' nkovuarupeu'.<sup>8</sup> Teka nii' Karistoo' ninka nari' moompiru'ning deeko' nii'ke masika'antavampiri otong nii' teing tee ninka nari' domamariaing.<sup>9</sup> Nii'ke tee noru'ampiri otong Karistoo' tee domamparu'nung boo'noo'keta ee'noko napo' booauka'nunge; enang tee boo'ke kuung deempua'.<sup>10</sup> Tee boo' tee boo'paru'nung tee niikaang oraka' nko-koong iri' bake-anta-koo, boo'paru' totora'pui. Teka tee enanung ootoo' tee Kumponing-koo domampari otong.<sup>11</sup> Dii' tee' nari' noru'dariainge: Oraka' nko-koo dooru'ning ee'noko napo' domantarinig Kumponing-koo Jiisuu' Karistoo' ninka.

<sup>12</sup> Tee'koo taura'dariauka' orara aarumo kuung deeng-anta-koo diikaang mono. Teie orara aarumo baranturi'neenga mono bakaang karakaraa'ke.<sup>13</sup> Diikaang mono-koo nii'nairu taura'periauka' orara aarumo bakaang pia-siong deemparama orara nko-koo, teka dii'ka arariaing Kumponing-koo teing-pina' nantoong boo'keta domang-antanii'nuka-pina', ee'noko dii'koo ookanairu Kumponing bakanairu deeng-antaveri otoriai aarumo koonto' siong-koo.<sup>14</sup> Oraka'nkoi kuung deenturiauka' dii' boto-koo kuung otoriaung-koo Kumponing piaa-koo kuung otoriko.

#### Nii' Tampara Aarumoi Dai'nisinuka O'norimana'

<sup>15</sup> Nka tee boto-koo kuung o'noria' oraka'nko nkoampiauka' aa'pampima, "Nii' aa' boto-koo kuung o'noria', nii' Kumponing bakaang piaa-koo kuung o'nori oraka' nari' nkoampiaing." Tee' minku-koo bakei makosi deea'.<sup>16</sup> Dii'ke ee' noru'eria' baa dii'ke meumperimaung tee diikaang oving, ee'noko dii' teing bakaning botovotonaa'nuka, aa'noko oraka'nko meumperiaing deeko' boo' kune'eriaing, ee'noko Kumponing meumperiaing deeko' tampara domaang kune'eriaing.<sup>17</sup> Tenang tutung tee dai'dariri otoriko' orara aarumoi date'durio', teka enang tampara tampa-mang Kumponing-koo dii'ke tampa' meumperimaung-koo tee Oving bakaang kara naurario' masika'antaverimaung.<sup>18</sup> Teka enang Kumponing unaa-antarurira orara aarumo ninka dai'dariri otoriko'noo'keta tampara aarumoi dai'dariri oto'nuka deeng-antaruring.<sup>19</sup> Aing aarumo kementavario' minkuansing naninka botovotonaa'ka-pina' dii'koo tampa' sira-ka'paraa'naang. Nka ee' minkuamaang: Tee' tauradariru'na' aa'na' ku'mi'koo ee'noko orara-koo tee' nari' napo' aa'na' iri'dori taura'dariaing te'aape koon-to'aape ee'noko kiioraa'aape.

<sup>20</sup> Tenang dii' orara aarumo-koo dai'dariri tee tara'doria' otoriko' koonto'nameng-koo.<sup>21</sup> Nka aremurii' kapoo' dii'koo tavo'arako'nung teieta orara aarumo-ita enang maia'dorimaung-eta'? Tee aa' kapoo' boo' tavo'kumaing.<sup>22</sup> Nka enang tee Kumponing unaa-antaruring orara aarumo-ita bakaning botovotonaa'nuka deentarii'naang. Enang deto du'duriaining meeka'dariri domaang oparavaung nkaveriaina'.<sup>23</sup> Orara aarumoi tee moo' avu'koong, tee boo'. Ee'noko



Kumponingee tee bauta'muriaing teie domaang oparavaunge Jiisuu' Karistoo'koo kuunge, niikaang Ovor-ing.

### Orara Aarumo-ita Unaamorira Tanuaang Meekung Ninka Tampa' Mintoomarimana'

**7** Dii'ke mmaikori'ke boto-koo norukasi'nukai noru'eri otong teie botoi tee naning kuung deem-pui otomaung tenang tee naning domampari otoko. <sup>2</sup> Tee-pina' nani manikuma nampeesinii' botoi naro' tapo'uresi otoremana' ba'ung ninka tenang ba'ung domamparita'. Teka tenang ba'ung booko dei teni unaavo-peu' teieta boto teni dai'ui otomaung-eta ba'ung-koo. <sup>3</sup> Tee'koo teni manikuma nii'nung ninka otoresidei tenang ba'ung booaruko teni tee nampeesi oraritang-koo makosi. Teka ba'ung booko dei, siraraavi' otoi boto-ita, nii'nung ninka nampeesiarepeu', tenie nampeesi orarivua'.

<sup>4</sup> Tee' ee'na' nari' dii' tee' otoring mmaikori'. Boo'koo teie nari' dooru' tee' botoi minkuvui otolina'koo ai' dii' teing Karistoo'koo mono-koonamenuka. Enang tee dii' tee bakaning deentari' otoring tee boo'keta domamparu'nung nii'ke sinang Kumponing bakaang bi'antaevompiaina'. <sup>5</sup> Tero tee, orara aarumoi dai'murita' Kumponing-nung boto toto'koo pia-antamuriko' ee'noko tee'koo kapoo' oraka' nkonanka mmau' nkoampiko', teing kapoo' nii' boo'anta-koo makosinanka. <sup>6</sup> Teka enang nii' unaamori o'noring boto-ita moompira tee-koo kapoo'koo nii' dai'muri otoko'nung-koo. Tee'koo enang Kumponing mintoompevompiri o'noring urikung botoi Moosesie daarivuu'nunge deea' teka tee-koo nerakung otooto'koo Tanuaang Meekung-etaing-koo.

### Orara Aarumoi Orari-antamuru'na'

<sup>7</sup> Enang are'pampipeu' nii'ke? Tee boto ee orara? † A, tee aa' tee' deea'. Nka tee boto otoaruko dei orara aarumo enang ninge †† tasi'pamparupeu'. Ee'pina' deeko': Botoi ee' naumurimaung: Naning nii'nung bakaang kapoo' karaa'uauka'. Ee'noko tee' nau-muaruko dei tee' oro' karaa' orara-pina' noru'amparu-peu'. <sup>8</sup> Teka teie botoi tee orokomuio' orara aarumoi doona oovura tee boto-koo ning karaa'antamuko', nka orara aarumo tee baka boto otoaruko dei purimpararupeu'. <sup>9</sup> Ning tero domang kuaa'moi o'noko' mme' boto noru'ampa', teka tee boto noru'amira ee'namu' orara aarumo domamparako ning moontu'. <sup>10</sup> Teie ee'narai narunge botoi ning domang-antamuu'naang noru'anko'nunge ning boo'antamuu'. <sup>11</sup> Orara aarumoi doona oovura tee boto-koo tosimuko' ee'noko teie botoi tamuu'. <sup>12</sup> Tee'koo ookara Moosesi-nung boto tee meekung, ee'noko tenaare tamuu'naare tenaarei meekanaarei koompari tampa' oto'naare.

† Nii'ninge Ju'nupoonge Karistoo'navitu daang tuumpiaako' teing Moosesi bakaang boto poore'aamaing tampaarima. Ooveai Nka 6:11. †† Paula' baka-koo minkuarama teing tuumpiaako'ning biikaang domang miru'ui sira'pevuru', baka teing-koo narung otoko'na' noru'arama.

### Orara Aarumoi Dai'muri Etumuriko'na'

<sup>13</sup> Nka arekee', botoi tamparai tamuu'nung tampa-mang, ee? A, tee aa' orara aarumo okora'ario' botoi tamparai ning tamuu'nung tampa-mang. Teie botoi tamparai tee naumumaung masika' oraka' nkomaramaung. Enang napo' orara aarumoi tamuu'nung tasi'pamira masika' noru'ampeu' tee orara aarumo tee bakei orara masakung. <sup>14</sup> Nii'ke noru'ampiri otong boto tee kapoo' tanuaanavete-koong, teka ning mono boo'koong, orara aarumoi dai'nii'. <sup>15</sup> Nkaang nko-nko tampa' noru'ampaunge, tee kapoo' tampa nko-koo piamomaung tee nkoampaung, teka tee kapoo' orara tampa-maung nkoankoo'. <sup>16</sup> Teka tenang ninge nkoama tee kapoo' piamoang tee boto tampa-maung-pina' otong. <sup>17</sup> Tee' nari' tasi'pamaung ninge masakung tee nkoampa', teka tee orara aarumo ning-koo otoko ninge tee' nkoamaung. <sup>18</sup> Ninge noru'ansi otong kapoo' tampa nging-koo otoa' ninka. Kapoo' tampa maroamira nkoamparupeu'. <sup>19</sup> Tee kapoo' tampa ninge nko-koo piamomaung tee ninge nkoampa', teka tee kapoo' orara ninge nko-koo piamoang napo' tee ee'nara nkoankoo'. <sup>20</sup> Enang tee ninge kapoo' ning piamoang nkoama tasi'pamaung okora'noo' tee orara aarumo ning-koo ima'ari otong, ning masakung deea'.

<sup>21</sup> Tee tee orara aarumo-koong iri' tee' nari' oro'para-maung. Tampa' nko-koo piamoko orara aarumoi diku'mui otokoo'. <sup>22</sup> Pankaruntoonge Kumponing-nung boto karaa'amaung. <sup>23</sup> Teka nkaang mono-koo oomaramaung nii'nung kapoo' karenung otong tee ninka nkaang onou ninka. Teie dai'mui otomaung orara aarumoi ning-koo mono-koo otomaunge. <sup>24</sup> Tee tee tee' pina' nari' o'noi o'noaing noru'anko', aa'noko, ninka tee ninge Kumponing bakaang boto tamung onoue siompama ee'noko mono-namenge orara aarumo siompamaa'noaing. Bakei piaaru' ning. Baie diki'muainge teieta' aung mono boo'koong-eta? Tee'panko'na'; <sup>25</sup> Nka enang tampa tampa-mang Kumponing-koo, Jiisuu' Karistoo' niikaang Ovor-ingee boo'parama diki'memuio'.

### Karistoo'ke Orara Aarumo Nii'keta Keta'pura Tanuaang Meekung Amuru'na'

**8** Tee'koo enang Kumponingee boo'koo miru'muria' nii' Karistoo'koo o'noring. <sup>2</sup> Aming-koo, nna' Jiisuu' Karistoo' ninka o'horiko Tanuaang Meekung-koong iri'ke unaa-antamuring teieta orara aarumo bakaang iri'keta ee'noko boo'keta. <sup>3</sup> Botoi tee nii' domang-anta-koo makotua' mono aruaru'oma boto toto'pumaung-koo. Teka Kumponingee deeko' nii'nung taung nkomemuru' nii' moo'murii'naang. Tee Bauring narung masakung botovuu' tee-pina' niikaang monopina' oro'pario', nka tee nii'pina' orara aarumo-po'nung deea'. Porai'ngang tee orara aarumo-koong iri' pesi'uu' bakaang mono booma nii'koo parekavarama. <sup>4</sup> Tee boo'pario' enang nii' makosi tampa' oto'koo teie

botoi botomurimana' nko-koo Tanuaang Meekunge taremurio', ee'noko siompampiauka' tee urikung aarumo orara.

<sup>5</sup> Teing nantoong mono bakanameng siompaamaing tee biikaang noru' mono bakanameng-koo pinka'arimaung. Teka teing nantoong Tanuaang Meekung bakanameng siompaamaing tee biikaang noru' Tanuaang Meekung bakanameng-koo pinka'arimaung.

<sup>6</sup> Teing nantoong biikaang noru' mono bakanameng-koo pinka'ariaining tee booroaining. Teka teing nantoong biikaang noru' Tanuaang Meekung bakanameng-koo pinka'ariaining tee domampariaing ee'noko mooa-koo ooroaing. <sup>7</sup> Tee noru' mono bakanamenge otomaung tee Kumponing-koo too'denung, Kumponing-nung boto-koo kupi'omaung, bakei makotua' nii'na' nko-koo. <sup>8</sup> Teing mono bakanamenge oromo maingee tee Kumponing dotu-antavaavarupeu'. <sup>9</sup> Teka dii' tee mono bakanameng-koo otoa', teka Tanuaang Meekung bakanameng-kooning, tee ee'nara Tanuaang Meekung Kumponing bakaang dii'koo oting deeko'. Baa naning Tanuaang Meekung Karistoo'nung oto'evuaung tee, tee bakaang naning deea'. <sup>10</sup> Teka Karistoo' dii'koo otoko deeko' tee, bane mono booparavaing orara aarumo-koo, teka tee diikaang tanuaang domamparavaing Kumponing koonto'nuka tanturu'nung-koo. <sup>11</sup> Jiisuu' boo'keta daa'uu'nung bakaang Tanuaang dii'koo oting deeko' teie ee'nara Jiisuu' Karistoo' boo'keta daa'uu'nunge diikaang mono boo'koong domampuaing ee'nara bakaang Tanuaang dii'koo otinge.

#### Tanuaang Meekunge Nii' Kumponing Baurukaa' Deeng-antamurimana'

<sup>12</sup> Mmaikori' ee, bakei navo'ka kapoo' nii'ke Kumponing bari'evompiaing otong bakaang pia siompampira, mono bakaang pia siompampia'. <sup>13</sup> Mono bakaang pia siomperiaing deeko' tee dii' dooriaing. Teka Tanuaang Meekung bakaang pia siomperima mono-koong aarumo toto'peri domantariaing. <sup>14</sup> Teing nantoong Kumponing bakaang Tanuaang Meekunge siong-antavurimaing teing Kumponing baurukaa'. <sup>15</sup> Tee Tanuaang Kumponing aruru'nung dii' avoro'ke kai'antakoong deea' dai'nisinuka-pina'. Nka aampari'ario' Kumponing baurukaa' deenturimaung, ee'noko tee ee'nara Tanuaang Meekung bakaang iri'ke amanampia' Kumponing bokuampimaung ee'pina': Mma' ee, Mma'. <sup>16</sup> Tee'koo Kumponing bakaang Tanuaang niikaang tanuaang ninka narung deemarima nii' sira'marimaung nii' teing Kumponing baurukaa'. <sup>17</sup> Ee'noko nii' Kumponing baurukaa' deemariko barenku oko-antamuriai Jiisuu' Karistoo' ninka, a'noo' tee nari' baike kompampira tee ninka deeko' bakaang biraanke nari' kompampia'naang.

#### Kumponing Baurukaa'ke Meenasi Nkavaavaina' Paning-koo

<sup>18</sup> Ninge tee ee' noru'amaang: Tee kapoo'nanka baikenanka enanung batei-koo kompampimaatomaung tee kapoo' deea' tee-koo biraanke dama'ke nkavampiaing-koo. <sup>19</sup> Ookara kapoo'nanka Kumponing nkovuru'ning tee nemparimaung Kumponing baurukaa' biraankevurima sira'antavurina'ning-mung-koo. <sup>20</sup> Tero ookara kapoo'nanka nkovuru'ning barakosi'uru' tamunsi'nanka deemparii'naang, bii'ka biikaang noru'koo deea', tee Kumponing bakaang noru'koo, kuung otoroi nempaava'naang bera te'mung makotuai Kumponing baurukaa'ke meenasi nkavaavaina'mung. <sup>21</sup> Te'mung tee ookara kapoo'nanka Kumponing nkovuru'ning teieta kiimata dera' bakaang-eta unaa-antavurira meenasi basiantavuaing baurukaa'koo basi-antavua'na nari'. <sup>22</sup> Nii'ke noru'ampiri otong ookara kapoo'nanka kansi'kooning aa'na' sisikeera tora'paamaung baike amutemurii' kune'aama e'mung doong-koo basinoo'koo. <sup>23</sup> Ee'noko teing nkovuru'ninge naingee deea'. Bane tutuna'navaro Tanuaang Meekung-koo komariri o'noring, nii'ke tee' nari' tee sisikeera tora'pampimaung nemarima baurukaa'pina' oro'antamurii'naang, niikaang mono moo'murima boo'nameng-eta. <sup>24</sup> Tee' nari' nkoaravaing-koo masika'antavampiko Kumponing moo'muru', kapoo' tero oro'paru'nung-koo narung-koo deea', tee kapoo' mme' oro'paravaung-koo. <sup>25</sup> Teka masika'anta otoko kapoo' oompiaung-koo tee nemariri o'noriaing dooroongee. <sup>26</sup> Tanuaang Meekunge pakumurimaung niikaang aruaru'koo. Ai' nii'ke tee tampa' noru'ampia' kungsi bakaang taung koonto'navung. Teka tanuaang Meekunge baka eentamemurimaung nii' paku-koo pankaruntoong-eta baiarama karai sira'koo makotua'. <sup>27</sup> Ee'noko Kumponing ookara biikaang domang keperuu'urimaunge tee noru'ui otong tee onou Tanuaang Meekung bakaang, Kumponing-pina' nari' noru'aramaung-koo eentavevurima ookara bakaning meekupoong.

<sup>28</sup> Ee'noko nii'ke noru'ampiri otong teing ookara kapoo'nanka tavo'arimaing nii' tampa' nko-koong nii' Kumponing piaavampimaing ee'noko baremuri boku-muru'ning. <sup>29</sup> Tero urikamu' Kumponing tasi'puru' bakaning. Teing tasi'puru'ning miru'uru' bauring-pina' nari' oro'pariri otoroo'naang. Ee'noko bauring tee tutuna'nung kura'nari'koo kuunga. <sup>30</sup> Ee'noko teing miru'uru'ning tee bokuvuru'. Teing bokuvuru'ning tee koonto'nuka tampuru', ee'noko teing koonto'nuka tampuru'ning tee nerampuru'nung.

#### Kapoo' Otoa' Kumponing Bakaang Paa-eta Tonta'muripeu'nung

<sup>31</sup> Tee tee, enang are'pampipeu'? Kumponing niikaang pakupaku deemparako nii'koo karenung baa' Otoa'. <sup>32</sup> Teie bauring orokovuaruu'nunge nii'koo baike kune'uu'naang, ookara kapoo' ee' orokovu'peu' bauring

ninka nari' avu'koo? Makotua'. <sup>33</sup> Baie tuumpivuripeu' Kumponing bakaning miru'nii'nuka? Otoa'. Kumponing ee'narai koonto'nuka tampuru'nung. <sup>34</sup> Baie boo'koo-nupoong miru'muriaing? Otoa'. Jiisuu' Karistoo' nii'koo boo'paru', ee'noko masika' Kumponing boo'keta daa'ui'o' tampavine-koo Kumponing-koo otong nii' eentamemurima. <sup>35</sup> Baie te'nemuripeu'nung teieta paa Karistoo' bakaang? Turanturang makotua', orarunsi makotua', tuumpinang, peera, simpenoi', avo'avoro' ee'noko tavu', bakei ookara makosiaava'. <sup>36</sup> Ee' daariari otoa' nii'koo masika' otong,  
"Dakaang miring-koo nii' teing taaarimaing ookara doong-koo, maa'maa' tavu'kooning-pina' noru'maari-ma."

(Kena 44:22)

<sup>37</sup> Nka tee, bane aing ookara kapoo' kune'ampiaingee nii'ke tee bakei aa'na' puru'ampiaing Karistoo' ninka nii' piaamuru'nung ninka. <sup>38</sup> Ninge tee tasi'pansi otong kapoo' otoa' nii' tankaamuripeu'nung Kumponing bakaang paa-eta Jiisuu' Karistoo' niikaang Oving-koo oro'paru'nung-eta, bane aing aa'ning tavo'kuai: boo', domang-anta, koosinunanka, ovontunanka, enang otoroining, kapoo' dama' tavo'aravainang, iri'nanka, detonoo', boonkonoo'; <sup>39</sup> Ee'noko nii'nung kapoo' makosi otoa' napo' Kumponingee nkovuru'ning-koo.

### Kumponingee Isireeli-nupoong Miru'urimana'

(9:1-11:36)

#### Paula'ke Ju'nupoong Piaavuru'na' Dapi' Ookara Paa'ariko Oovurira

**9** Enang kara minkuampainung masakung, Karistoo'koo kuung o'noi, nkaang onoue pankaruntoong-eta masika'antamuraunge Tanuaang Meekunge kuung deemuo'. <sup>2</sup> Tee kara ee'pina': Ning bakei aa'na' orarunsimaramaung, nkaang domang-koo uatepa oraka' dee'moma'nomaung ee'koo: Isireeli-nupoong domamparia' otoromaung-koo. <sup>3</sup> Barakosi'marama Karistoo'keta tonta'marapeu'nung-pina' noru'maramaung teing mmarang ni'ninka narung ereng moo'ariaina' makosi deeko'. <sup>4</sup> Teing Kumponing bakaning miru'uru'ning, baurukaa' deem-puru'ning ee'noko bakaang meenasi avuru'ning. Teing amutemu'ke kara tampa' naroompevuru'ning ee'noko avuru' tee boto ee'noko tee dootuu' masakung; <sup>5</sup> Teinge nkavau' tee Kumponing bakaang maramaraka, biikaang muu' oko'bosi-nupoong biurukaa' deem-parira. Ee'noko tee Domang-anta, Karistoo' tee bi-ikanamuaang-koonge, ee'nara Kumponing, ookara-koo dau basi deempari daangang-po'nung o'paa'na'. Ee', masakung.

### Kapoo' Kumponingee Isireeli-nupoong-koo Bam-puu'nung Mme' Nkovui Otoa'na'

<sup>6</sup> Kumponing bakaang maraka-anta teing-eta Isireeli-nupoong toto'pari oting minkuampa' nii'ning Isireeli-nupoong moo'aria' otoroining-koo, ai' baru' ookara Isireeli-nupoong Kumponingee miru'nii'nuka naing deea'. <sup>7</sup> Ooveriai: Eebaraami' baurukaa' ookara miru'aria'. Teing naing Kumponingee tampuru'ning deeko', Daari Meekung-koo aa'puu'na',  
"Aisake' narung-eta doonko miru'nii'nuka tampara-mpaing."

(Pupu' 21:12)

<sup>8</sup> Miru'noo' ee': Tamung monoi para-koo Kumponing baurukaa' tampariarupeu', teka tee' nari' Kumponingee tampuu'na'koo miru'uma deeko' baurukaa' tamparipeu'. <sup>9</sup> Ai' Kumponingee marakavarama Eebaraami' Eekaa' ninka beuring bata'uma ee' tampuu',  
"Enang batei-pina' daunamare'koo tee ning toro-maravaing ee'noko Seera' ee'nani tee enang bauring-po'nani deemparavaing."

(Pupu' 18:10,14)

Teketa' tee narung-koo miru'uu'na' bera Aisake' ponto'aru'. <sup>10</sup> Ee'noko napo' dama'ke Kumponingee nii'ning naing miru'urimana' sira'puu' tenang Rebeka' kempo'kui otoko pauroonka nkavuresitaa' tee ninka ba'ung niikaaka Aisake' ninka. <sup>11</sup> Bane tee ke'de-koo otoresia' ponto'area', kapoo' orara ee'noko tampara-pina' oro' nkovurea', Kumponingee teni-koo ee' tampuu',  
"Bataata baara'ma'nung-koo boong otoaing."

(Pupu' 25:23)

<sup>13</sup> Nii'noo' napo' ee' daariari otong Kumponingee temainta minkuvuretu'na',  
"Jeekopi' tee ninge piaavansi otong, ee'noko Iiso munte'ansi otong."

(Malakai 1:2,3)

Tee' nkoaru' Kumponingee nantoong miru'urimana' tasi'anta-koo; nko-nkoi deea', bokue narunge.

<sup>14</sup> Enang ee ee' noru'ampii'naang: Kumponing koon-to' deea' ookamainta nari' nkovurearu'nung-koo? Bakei makotua'. <sup>15</sup> Moosesi nauvuma ee' minkuvuu',  
"Ninge tee naning tampa' nkoampaing deeko' tampa' nkoampaing, ee'noko tee naning piaavampaing deeko' piaavampaing."

(Toro 33:19)

<sup>16</sup> Enang tee Kumponing bakaang miru' ee' oro'pari otong: Nanging bakaang pi'ai deea', bakaang nko-nkoi deea', teka Kumponing bakaang paa-koo narung-koo deeko' makosi. <sup>17</sup> Nii'noo'ka napo' Daari Meekunge Moosesi daarivuu'nung-koo Kumponingee tee dauraring~ Peero' turampuarura ee' nauvuu',  
"Ninge tee da' donkong-antaransinung da'koo nkaang iri' oro'paraa'naang ning nkaang miring noru'aavaina' ookara kansikoo."

(Toro 9:16)

<sup>18</sup> Tee' minkuvuio' aa'pamaang: Nanging tee Kumponingee baka piaavuaing deeko' piaavuaing.

Ee'noko napo' baa naning piaavuaru-peu'nung deeko' konte-antavuma sipuaing makosi.

<sup>19</sup> Dii'koo narunge Peero'pina' noru'darama ee' tana'mepeu' dee'ma: Kumponing aming-koo turang nkovumaang piavomana' nari' nkomarako? Baie dimpa'upeu' bakaang miru'? <sup>20</sup> Nka baie da' Kumponing maku'epeu'nung kansiketa? Utaue ee tee naning ta'nampumaang karavuma aa'pupeu': Dake ning aming-koo ee' ta'namemaang? <sup>21</sup> Arekee'? Tee naning ee utau ta'nampumaang makosi deea' bakaang mataue utau ta'nang-koo? Nau-koo kansinu-koo aa'nopeu': Nameng-eta neranii'nareng ta'nampupeu' ee'noko nii'nameng-eta tamunsi'nareng ta'nampupeu'.

<sup>22</sup> Kumponing bakaang iira sira'anta-koo piavoi otong ee'noko tenang ookara nantoonge ooaavaing bakaang purinto'. Teing nantoong orara moo' nka-koo miru'nii'nuka teroita maamuariri otoromaung orari-anta-koo, teka enang Kumponing makenge nempuri otong orari-antavuria'. <sup>23</sup> Aming-koo, nna' bakaang meenasi pankaing tasi'anta-koo piavoi otong teing-koo nantoong bakaang paaa nka-koo miru'uru'ning-koo, teroita maamu-antavuru'ning bakaang meenasi nari' kong-koo. <sup>24</sup> Tee-pina' nii' bokumuru'ning, Ju'nupoong naing-eta deea', ee'noko Ju'deeaing-kooning nari' ookara-ita. <sup>25</sup> Tee-pina' Kumponing minkuvuko Osea'ke daarivuu'na' Daari Meekung-koo, "Nantoong nkaning deeaing tee nkaning tamparampaing. Ee'noko teni ninge piaavampa'nani teni ninge piaavampaing."

(Osea 2:23)

Ee'noko

<sup>26</sup> "Tekana ninge aa'pantu'noo'ka, 'Teing nkaning nantoong deeaing,' teke tee nantoong dama'ke Kumponing domantoo' baurukaa' deemparira miring kompaavaing."

(Osea 1:10)

<sup>27</sup> Napo' Aisaia'ke ee' minkuvuu' Isireeli-nupoong-koo, "Ooveriai, Isireeli-nupoong biurukaa'koong deeru tee piisi' pirung-koo makosi, nka tee teing-koo mmau' kera'pariko oki'ning naing otoroi domampariaing. <sup>28</sup> Bakei iri'narumpui Ovoringe nkovuaing kansikoo tee kapoo' nkovuu'naang tampuu'nung."

(Aisaia' 10:22,23)

<sup>29</sup> Tee' nari' Aisaia'ke minkuvuu'na' temu'navarang-koo ee'pina',

"Ovoringe paning-koonge niurukaa'koo duukung sipuarui dei nii' tee teing-pina' osi Sodom ee'noko Komora' nkomaripeu' nta'ke opuru'ning-pina'."

(Aisaia' 1:9)

### Kumponing Isireeli-nupoong Koonto'nuka Tampurarupeu'na' Baito Otoaruko

<sup>30</sup> Tee-koong miru'noo' ee' oro': Teing Isireelinupoong deeaing koonto'nuka deemparii'naang paaravariaruko'ninge miring koonto'nuka tampurainavung pe'numpaara tampa' okovorou' masika'antaninka. <sup>31</sup> Tekana Isireelinupoong bane koonto'nuka deemparii'naang paaravariko' botoi tampui otoa'na, kaari'ariru'. <sup>32</sup> Aming-koo kaari'ariru'? Nna' Kumpon-

ing-koong duta-koo koonto' oto' tee kapoo' bamuru'nung-pina' masika'antavaava' besi'aama, aa'paama, "Moosesi-nung boto tampa' tarempiko deeko' makosi;" <sup>33</sup> Tee'koo tupampariru' tere'koo Kumponing tere' minkuvuu'na' Daari Meekung-koo, ee'pina', "Ooveriaing, ninge bempampaing tere' manto-nare' dii'koo meu' Saioni-namono-koo, nantoong tere'koo tupamparira tee pu'ariaing. Nka tee naning tee masika'antavaing tee sirakura' oko-antavampaing tee biraanke."

(Aisaia' 8:14; 28:16)

### Isireeli-nupoong Papaaravariru'na' Oo-koo Kumponing Meeka'antamurimana'

**10** Mmaikori' ee, pankaruntoonge ning aa'na' pi-amo'i Kumponing-koo kunsimaramaung nkaning nantoong Isireelinupoong domamparii'naang. <sup>2</sup> Ooansi sira'pampeu' teing biikaang aarumo avari- mana' Kumponing-koo, nka tee avariaina' makosinoo' siraka'paria'. <sup>3</sup> Noru'aava' tee taung Kumponing nantoong koong-antavurimanavung. Bii'ka matauarima kaari'aamaung Kumponing bakanavung siong-koo kupi'oroma, Karistoo'koo kuunge. <sup>4</sup> Karistoo' tee Moosesi-nung boto o'anta-koong. Tee'koo teing ookara nantoong Karistoo' masika'antavaavainng teing koon- to'nuka tampuriaing.

<sup>5</sup> Moosesie boto siong-koo ee' daarivuu', "Tee naning aung boto siompuaing tee domampara- vaing."

(Boontu 18:5)

<sup>6</sup> Nka tee nii'noo'ka ee' minkuvuu' masika'antanavung- koo,

"Dii'ka ee' minkueriuka': Baa paning-aape koinu- ainge tee Kumponing Teroita Pako'pari'nii' nii' doma- muri taremuriainoo'koong depeto boku-koo teie paku- murii'naang? <sup>7</sup> Napo' ee' minkueriuka': Baa doonko kansikoo kuung tumparavai napo' tee Pako'pari'nii' boo'keta daa'antavuu'naang? <sup>8</sup> Ai' tee Kumponing bakaang kara tee teroita dii'anko due' otong, diikaang be'duu'koo ee'noko domang-koo otong."

(Boto 30:12-14)

Emu' tee tee kara teie minkuvuu'nung tee tampara dooreng daankiampimaung dii'ke masika'anta- koong. <sup>9</sup> Tee dii'ke karang-eta sira'periaing deeko' aa'perima, "Jiisuu' tee Ovoring," ee'noko masika'an- taveriaing diikaang domang-eta tee Kumponing do- mang-antavuu' nung bou'noo'keta, tee'koo enang dii' domantariaing. <sup>10</sup> Tee naning masika'antavuko bakaang domang-eta tee koonto' naning tampuaing; ee'noko sira'puaing bakaang karange tee tee moo'ara- vaing. <sup>11</sup> Nii'noo'ke Daari Meekunge ee' minkuvui otong,

"Naning tee masika'antavaing tee Kumponing sir- akura' oko-antavaing tee biraanke."

(Aisaia' 28:16)

<sup>12</sup> Enang tee norunoru' tankatankaang-koong otoa' meu'ke teing-koo Ju'nupoong ee'noko Ju'deeaing, ai' Ovoring tee Ovoring ookara biikaang, ee'noko avuri- maung bakaang biraanke teing nantoong tee-koo

kunsiarimaing. <sup>13</sup> Napo' Daari Meekunge minkuvu-  
mana' ee'ke,  
"Ookara nantoong Bakaang miring tampaama kun-  
siariaining teing domampariaing."

(*Joeli 2:32*)

<sup>14</sup> Nka arekee' kunsiaripeu' nantoong tee-koo bi-  
ikaang masika'anta otoaruko dei? Napo' arekee' masi-  
ka'antavaapeu' bakaang miring taaravaava' dei?  
Ee'noko arekee' taaravaapeu' napo' naning tee  
sira'pumaung otoaruko? <sup>15</sup> Ee'noko nantoonge arekee'  
sira'paapeu' nii'ninge botoaariaruko dei? Tee' daariari  
otoina',  
"Tee tampaara doorenang nkavai poroma ka-  
pari'kaako taaravampira doturotumarimaung."

(*Aisaia' 52:7*)

### Isireeli-nupoonge Tampara Doorenang Dimpa'au'na'

<sup>16</sup> A'noo' baru' ookarai masika'antavaavaruu' tee  
doorenang tampaara, tee-pina' Aisaia'ke minkuvuma  
aa'puu'na',  
"Ovoring, baie masika'antavuu' tee kara nii'koo taar-  
avuu'nung?"

(*Aisaia' 53:7*)

<sup>17</sup> Nka tee nii'nunge masika'antavupeu'nung deeko'  
tee taaravura masika'antavupeu' Karistoo' daankiaako.

<sup>18</sup> Isireeli-nupoonge aming-koo masika'an-  
tavaavaung, ai' mme' taaravaava'? Otoa'. Bakei taar-  
avau' biikaang minkunaa deemparako daariari otoina'  
ee',

"Biikaang kara beremparu' ootukunairu-koo. Napo'  
biikaang minkunaa berempario' taaravau' ootukunung  
kansi'kooning."

(*Kena 19:4*)

<sup>19</sup> Nka ee Isireeli-nupoonge taaravaara tasi'paava' tee  
minkunaa okora'noo'? A, tee aa' tang kupi'oroko.  
Kumponing ee' nauvuru' Moosesie  
daarivuu'nane'koo,

"Nantoong miring-po'ning deeaing tampa'  
onkeonke'aranko dii' mamairorarimatoaing. Nii'navi-  
tu onou otoroa'navitu pakuaranko iiraroriaing."

(*Boto 32:21*)

<sup>20</sup> Napo' tee Aisaia'koo iveka'antavui ee' nauvuru',

"Teinge kune'mau' nantoonge bane be-  
si'maavaruko'ninge. Ee'noko ning sira'maru' teing-koo  
ning-koo nia'kaavaru'ning-koo."

(*Aisaia' 65:1*)

<sup>21</sup> Ee'noko Isireeli-nupoong-koo karoma ee' minkuvuu',  
"Bireng takaa'mokoo' bokurampima dii' taarapiikanu-  
ka, kupi' baukonuka."

(*Aisaia' 65:2*)

### Kumponingee Isireeli-nupoong-koo Taakeng Dama'ke Tampara' Nkovuriaina'

**11** Enang arekee', Kumponingee bakaning dama'du-  
vuru' ee? Tee aa' tee' deea', bakei! Ning tee  
Isireeli-nupoong-koo narunge, Eebaraami' bakanav-  
ing-kooning-koo, Bensimani bakanamuiiang-koo-  
nung. <sup>2</sup> Kumponingee tee dama'duvuriaung Isireeli-  
nupoong. Otoroaina' noru'urita' teing bokuvuru'.

Dii'ke noru'eria' dee'ma Eliasi bakaang minkunaa Daari  
Meekung-koo otomaung Isireeli-nupoong tuumpivu-  
ru'nung-koong? Eliasie aa'puu',

<sup>3</sup> "Ovoring, teinge tavaaru' dakaning nakaro-  
nupoong, boonturoma-nairu pesi'evaarima. Teka ning  
narung enang o'nong, ee'noko ning napo' tee', nkaang  
domaang napu'koo piavoroi otong."

(*1 Dauraronanka 19:10-14*)

<sup>4</sup> Ee'noko tee'puko Kumponingee ee' bari'uu',

"Ninge aa' ~kenaanka-taa kokorei' nantoong tarear-  
ansi otong mme' kiunaava' tee-koo daang-koong  
kumponing-koo miring Baaelo-koo."

(*1 Dauraronanka 19:18*)

<sup>5</sup> Tee tee ee'nara tee' nari' enanavarang-koo teing  
ee'ning taakeng otorong Kumponingee bakaning  
miru'uru'ning bakaang piasa-koo okora'ario'. <sup>6</sup> Teing pi-  
aa narunge nantoong bakaning tampurimaing dem-  
pariko nantoong biikaang nko-nko-koo okora'ario'  
bakaning tampuriauka' ai' piasa tee nko-nko-koong  
moo' deea'. <sup>7</sup> Tee'koo Isireeli-nupoonge tamung  
kaari'aamaatoko teing oki'ning naing miru'uru' bi-  
raanke nka-koo. Teing nii'ning bakaang piasa nka-koo  
kupi'oroma bia'orou'. <sup>8</sup> Tee' nari' daariari otoina',  
aa'pumana',

"Kumponingee avuru' tanuaang kanu'aapenung, duta  
kaputu'anta-koong, ee'noko kipau-anta-koong  
e'mung-koo basinoo'koo."

(*Boto 29:4; Aisaia' 29:10*)

<sup>9</sup> Ee'noko Deevita' bakanarong-koo ee' otong:

"Biikaang paroro meekunanka tee beana deempara-  
vaing teing baanka'urii'naang, dinkung-pina' pu'an-  
tavuriaing maku'koo. <sup>10</sup> Biikaang duta kaputu'ara-  
vaingee oaaa'neeng-koo, ee'noko kopini manki'ke  
takaa'oromaatoai."

(*Kena 69:22,23*)

<sup>11</sup> Enang arekee', pu'arima koonto' ee oraru'kiaakoo'  
ee? A, otoa'. Teing pu'aririo' Isireeli-nupoong deeaingee  
domaang kompau' Isireeli-nupoong mamairoarira  
napo' dama'ke bere'arii'naang. <sup>12</sup> Tee'koo ookara kan-  
si'ke biraanke kompaing Kumponing-nung avuavu' do-  
mang-anta-koonung Isireeli-nupoonge boto to-  
to'paarai'nange Kumponing bakaang piasa kosi'aako.  
Enang noru'eriai, tee' deeko' bakei biraanke pankaing  
ookara nantoonge nkavaavaing dama'ke, Isireeli-  
nupoong napo' tapo'ariko Karistoo'koo.

### Noru' Nkavampiaina' Kumponing-nung Piasa-koo Ee'noko Kiimata-koo

<sup>13</sup> Enang tee ning dii'koo karomang Isireeli-nupoong  
deeaing-koo. Ning kara-okovui-nka Isireeli-nupoong  
deeaing-anko deemarara aa'na' mintoomaramaung  
kapoo' masakung-pina' noru'ansi mmaikori' Isireeli-  
nupoong mamairoarira moo'ariaina'. <sup>15</sup> Kumponing  
teing-eta ako' bere'arara ootukunung nantoong kan-  
si'nupoong bakaning turani'nuka-anko bere'arako tee-  
anko tapo'ariko. Ee'noko tee aa'na' dakaosi' deempara-  
vaing tenang teing Ju'nupoong Karistoo' bakaning  
deempariko dama'ke, nantoong boo'nuka napo' do-  
mampariaina' oro'paravaingee.

<sup>16</sup> Pankaraampuri meekupoong meekung deeko' makosi dama'naving napo' meekupoonge. Eebaraami' dovang teing Kumponing-nung koi'koong kaakeng makosinuka ee'noko bakanaving tevari-koong kaumpe'nanka makosinuka. <sup>17</sup> Enang tee koi' Kumponingee keenavaang-eta nii'ning kaumpe'nanka kente'uko dii' teing kaumpe'nanka pora'koong makosinuka tevari-koo be'nu'antaruru'ning kaakeng-eta iri' nari' nkaverii'naang. <sup>18</sup> Dii'ke tee irua' koi'koong keenavaang-koong nkaverima daangantariauka' teing kente'nii'nanka-ankoi. Daangantarima deeko' noru'eriaing keenavaang-koonge kaakenge dii' pinka'duri otong. Dii'ke kaakeng pinka'eria'. <sup>19</sup> Dii'ke pa ee' minkuerimang: Ee', bakei kente'aring kaumpe' nii' enang te' be'nu'marii'naang. <sup>20</sup> Ee', masika'. Teinoo' tee kente'ariring teinge masika'antavaavarura. Teka dii' iveka'dariri be'nu'dariri otong masika'anta narung nin-ka. Tee'koo baru' daangantariauka' teka tarerariri otoriai. <sup>21</sup> Teka Kumponingee kaumpe' keenavaang-koong papi'oa' kente'uu'ning deeko' dii' napo' tee' papi'oa' tooto'duriaing. <sup>22</sup> Ooveriaing Kumponing tee bakei aa'na' piaa-po'nung ee'noko napo' aa'na' kiimata-po'nunge. Kiimata teing-koo nantoong dua'arimaing-koo ee'noko piaa dii'koo bakaang piaa masika'antaveri otorining-koo otong. Nka masika'antaveriaruko deeko' tee dii' napu'duripeu'. <sup>23</sup> Nii'noo'koo tee teing Isireeli-nupoong kente'uru'ning napo' bere'arira Karistoo' masika'antavaako deeko' Kumponingee tee napo' be'nu'uripeu' te' napo' kente'ariru'noo'. Kumponing tee purinto' oto'evung teing napo' be'nu'anta-koo te' unapo'. <sup>24</sup> Dii' kaumpe'nanka pora'koong koi'keta tooto'durima otoa'na' keenavaang-koo be'nu'duru', ee'noko tee'koo bakei teing kaumpe' keenavaang-kooning kente'uu'ning napo' be'nu'koo biikanave-koo makosi.

#### Kumponing Bakaang Miru' Domang-anta-koo Ookara Nantoong Amutemurii'

<sup>25</sup> Mmaikori' ee, kapoo' tero makensi'nung nau-rampiai dii'ka daangantariauka'na'. Ai' teing Isireeli-nupoong teing ive'iveka'poroi otong ee'noko tee' nari' otoromaatoaing bera tee-koo batei-koo Isireeli-nupoong deeaing-kooning ookara miru'nii'nanka tumpariainoo'ke basi. <sup>26</sup> Tenang tumpariko ookara Isireeli-nupoong moo'ariainge, Daari Meekunge ee' naumuru'na',

“Saioni-namono-ita tee Domang-anta tavo'aravaing ee'noko teie toro-antavuriaing Jeekopi'daang biikaang oraka' nko-ita. <sup>27</sup> Tenang ee'naning ninge ton-ta'evorompang biikaang oraka' nkonanka, siompansi tee kara naroompevorontu'nung.”

(Aisaia' 59:20,21; 27:9)

<sup>28</sup> Teing Isireeli-nupoonge tampara doorenang dim-pa'aama Kumponing-koo too'de-nupoong-pina' deem-pariko tee doorenang pari'antana' dii'ke tampa' nkaveru'. Nka teroita miru'uru'noo'koo Kumponingee ee'nariong bakei aa'na' piaavuri otong biikakatauro pi-aavuriko'nung-koo. <sup>29</sup> Teing kapoo'nanka Kumponingee

avurimaing ee'noko teing nantoong avu'koo barevuri-maing tonta'koo makosi deea'. <sup>30</sup> Dii' nii'na'mung Kumponing meumperiaruko'ning enang nkavering bakaang piaa Isireeli-nupoonge tee meumpaavaruo'. <sup>31</sup> Ee'noko tee tee' nari' meuntepa'ariru'nung tasi'paa-ma teinge napo' tee piaa nkavaava'naang dii'ke nkaveru'nung ooaara. <sup>32</sup> Kumponingee tee nantoong ookara meumpaava'nameng-koo otoroko sira'puing bakaang piaa narunge ookara nari' domam-purii'naang.

#### Kumponing Daangana'

<sup>33</sup> Kumponing bakei bakaang noru' ee'noko matau aa'na' masika' ee'doonko isikung otong. Nanginge bane keperuu'ke bakaang onou tasi'puarupeu' ee'noko bakaang aarumo tasi'paa'ke. <sup>34</sup> Tee' Daari Meekunge aa'pumana',

“Baie Kumponing bakaang onou tasi'pui otong? Baie Kumponing koong-antaevung?”

(Aisaia' 40:13; Jeremaia 23:18)

<sup>35</sup> Ee'noko

“Baa ninka Kumponing komaaru' otong?”

(Jop 41:11)

<sup>36</sup> Otoa'. Tee ootukunung kapoo'nanka nkonung, tare-nara ee'noko miru'anta. Bakaang meenasi tee' nari' otomatoaing. Ee', ee'na'.

#### Tampara Aarumoi Dotu-antavampiaina' Karistoo' Piaamuri Moo'murio'

(12:1-15:13)

#### Ookutunung Mono Amariaina' Kumponing-koo

**12** Tee'koo, mmaikori' pia-antarampimang, Kumponingee piaamuri unaa-antamuru'nung-koo dii'ka diikaang mono ootukunung arariaing Kumponing-koo pareka domantoo'pina', meeka' dariri Kumponing dotu-antana' otoritaa'. Aung tee taung masikung Kumponing dootuu'numpo'. <sup>2</sup> Avutevu' aarumo paaraveriauka' teka Kumponing taura'periko paari-antaruriaing diikaang onou pankaruntoong-koo. Tenang ee'naning dii'ke noru'eriaing tee Kumponing bakaang pia dii'koo, tee kapoo' tampara, dakaosi' ee'noko dotu-antavuai.

#### Kumponingee Avuavu' Amurimaing Ninka Tampa' Mintoomariaina'

<sup>3</sup> Enang dii'ke naruna' naruna' taarameriaing Kumponingee avuavu' amuu'nung-koo dii' paku-rampii'naang. Narunge tee dakaang miru'noo' tampa' tasi'peainge daka. Tee miru' aruing kompei napo' tee-koo deto basinoo'ka noru'daravauka'. Dii'ke ookarai tee tampa' masika' noru'eriaing koong-antaveri tee miru' diikaang masika'anta-koong Kumponingee kan-teruring dii'. <sup>4</sup> Narung naning-koong mono tee anairu

tenairu-po'nung, nka nko-nko-koo nari' miru'aria'.  
<sup>5</sup> Tee' nari', nii' tee'ke, bane mmau'ke, narung mono nko-antavamping naro'ka Karistoo'koong. Teka naruna' naruna' nii' tee tankaamariri pakumeeri-maung. <sup>6</sup> Nii' amutemurii' avuavu'po'nupoong Kumponing piaamuri amuru'ning. Dakaang avuavu' tarampee-koong~ deeko' makosi, tee' nkoveaing aruu'noo' basi dakaang masika'anta ninka. <sup>7</sup> Dakaang avuavu' nantoong pakupaku-koong deeko' makosi, aroo'ei nkoveaing. Da' nau-anta deeko' tee avuavu' kompei kake'ii-antaveri naueriainge. <sup>8</sup> Naning bakaang avuavu' nantoong daa'anta-koong deeko' domang dontong-antavui tee' nkovuain. Ee'noko bakaang kapoo'nanka tankee'koong deeko' avusiro'ari tankaampuaing makosi. Ee'noko baa naning nantoong-koo pankaing, teie mataa'iari tarevurimatoaing teing. Naning napo' piasa ninka nantoong unaa-antavurimaung deeko', doturotuari tee' nari' nkovurimatoaing.

#### Nii'ke Piaavarampiaina' Ookara.

<sup>9</sup> Piasa tee koonto' domang-eta piaareeriaing. Piaroriauka' orara-koo. Kapoo' tampara-koo kato pinka'dariai.  
<sup>10</sup> Piaareerimaatoai navurariritaa' namaia'pina'. Otori deto noru'deeri otorimaatoai. <sup>11</sup> Iri' o'dariauka'. Ovor-ing meung-koo nta'pina' uruntariri otoriai Tanuaang Meekunge iri'antarurio'. <sup>12</sup> Tee barenku nemperimaung noru'eritaa' doturariri otoriai ee'noko orara doong kune'erima dooroontariri otoriai. Uatepa kunsirarimatoai. <sup>13</sup> Dii'koo nii'ning apuka'pariko pakuererai Kumponing bakaning meekupoong. Napo' nii'noo'nupoong poroko dii'anko tampa' tarevererimaatoai. <sup>14</sup> Nantoong oraka' nkoraariaining biraankei maku'evurererai, barakosi'ereria'. <sup>15</sup> Doturotuarimatoai teing ninka doturotuarimatoaining ninka nari'. Biromparimatoaining ninka nari' birontarimatoai. <sup>16</sup> Naroong-koo otorimaatoai. Beekareeria' otoai, teka navureeri otorimaatoai doonko otoromaing ninka. Kirokai-pina' noru'dariauka'. <sup>17</sup> Orara orarai maku'eriauka'. Tampa' nari' nkoverimatoai ookara. <sup>18</sup> Mataurariiri mooa-koo otoriai ookara ninka, makosiri deeko'. <sup>19</sup> Mmaikori' ee, mero' nkoveriauka'. Tamung doonko otoriai. Kumponing-nung iira otong, maku'uaing. Tee' Daari Meekunge ee' minkuvuu'na',  
 "Mero' tee nkaang. Ninge ninka mero'ampaing. Kumponingee tee'puu'."

(Boto 32:35)

<sup>20</sup> Ee', dakaang too'denung peeravoko bau'ei. Ntong nai piavoko aveaing. Tee' nkovema taung daare'ee'naang onou paariarara dama' navureereaina'.  
<sup>21</sup> Orarai puru'duriauka' dii', teka orara dii'ke puru'eriai tampara ninka.

#### Nii'ke Teing Nantoong Ovontung Meumparampiaina'.

**13** Teing doonge-taaranuka~ meumpererai dii' ookarai, ai' tanata nkonuka bii'ka daa'aririning otoroa' Kumponing miruu'uriaruko. Ookara daa'aririning teing Kumponing miru'uru'ning.

<sup>2</sup> Tee'koo tee naning biikaang kara dimpa'uaing tee tee-pina' Kumponing teing miru'uru'nung bakaang kara dimpa'umaang, ee'noko teing dimpa' nkoaavain-ing tee kiimata nkavaavain. <sup>3</sup> Tampa' siompereriaing deeko' tee dii' avoro'koo makosi deea' teing-koo dii' tareraariaining-koo, teka dii'ke oraka' nkoveriaing deeko' aroreripeu'. Dii'ke ee diikaning doongetaaranuka-koo aroreria' oto'koo piarori otong? Tampa' nari' nkoverimatoaing, tampeng tantaariaina'.  
<sup>4</sup> Doonge-taaranuka teing Kumponing botovuru'ning dii' pakuraarii'naang. Nka dii'ke kapoo' oraka' nkoverima deeko' dii' teing avoro'koo otoripeu' teing-koo iri' oto'evoromaung ninka kiimataraari'neeng-koo, ai' teing teing Kumponing botovuru'ning temurii' nkonko nko-koo. <sup>5</sup> Tee'koo dii'ke siomperiaing, Kumponing-etaing kiimata baari'koo narung-koo deea', teka tumsi unaarori oto'koo diikaang onoue diikaang nkonko tampara-pina' tasi'perima. <sup>6</sup> Tee narung onou-koo napo' dii'ke iivaa nkoverimatoaing doonge-taara bakaning moo'arimaatoaina'. Tee'koo Kumponing-nung nko-nko tampa' nkoaamatoai dii' pakuraarima. <sup>7</sup> Komaaru amutemurii' oto'deruriko maku'eriai, aremurii', iivaa deeko' iivaararai, masika'anta-koo-nupoong deeko' masika'antaverererimaatoai, deto basi-anta-koo-nupoong deeko' deto basi-antavererimaatoai.

#### Piasa Tee Niikaang Komaaru~ Oparavaung Noru'ampima Koomariri O'noriaina'

<sup>8</sup> Ee', komaaru maku'eri bakeveriaing tampamang, teka Kumponing bakaang piasa tee komaaru maku'paa' deemparako piaareeri otorimaatoai. Baa tee naning tee-koo miirinung piaavumaung Kumponing-nung boto tampa' siompumaung. <sup>9</sup> Daari Meekung-koo ee' minkuvui otoaia',  
 "Nampeesi orarieauka'.  
 "Naning dupisi'eauka'.  
 "Bakiaa' nkoveauka'.  
 "Nii'nung bakaang kapoo' karaa'eauka'."

(Toro 20:13-15,17)

Teing ee'noko nii'ning botonanka otoromaing anaare-koo bi'ariri otorong,  
 "Dake tee naning da'koo due'nung daka piaararamana' nari' tee' piaaveaing."

(Boontu 19:18)

<sup>10</sup> Baa tee naning nantoong piaavurimaung tee kapoo' orara nkovuarupeu' teing-koo. Tee' piaavurima tee boto siompumaung teie.

<sup>11</sup> Tee' nari' nko-koo ana'dariauka' doong asi'na'mung due'ui'o' tasi'peri. Tamung aasiri otoriauka'. Te'mung tutung masika'antavampima aa'pampiko', "Moo'mariaina'mung due'uing." Nka e'mung-eta baru' due' masipo' deemparing. <sup>12</sup> Muung tee enang oparama nanuko tane'ke due'uing. Enang kiru'marira dua'ampiang teing nko-nkonanka muung bakaning ee'noko nepu'mariaing aarumo tamparai araka-koonunge. <sup>13</sup> Tane'nung aarumo-pina' nkomariaing. Aa'noauka': taarapiikarariauka' naikirima,

kaukauro nkoveriauka', ee'noko nii'ning kapoo' maimaia'na' nkoveriauka', napo' mamairoreeri tata'deeriauka'. <sup>14</sup> Teka Jiisuu' Karistoo'pina' nari' otoriai. Orara aarumo nko-koo piaroria' mono bakaang pia siomperi.

### Nii'ka Simpesimpe'meeria' Otoaing

**14** Tee naning bakaang masika'anta-koo aruaru' dii'anko poko onkeonke'eriai, nka tee ninka tata'deeria'. <sup>2</sup> Teie naning masika'anta purinto'po'nunge tee kapoo' naro'keta naivumaung ee'noko teie naning masika'anta-koo baru' purimparavaunge tee taamang bire'nii'ning naivumaung. <sup>3</sup> Teie naning naro'keta naivumaunge tee kerempumaung orara tampuauka'nung. Ee'noko teie kerempumaunge tee naro'keta naivumaung orara tampuauka'. Aming-koo, nna' ookaanka Kumponing onkeonke'uresi otoreng bakanaanka botovotonaa'ka deemparesi otoree'naang. <sup>4</sup> Baie da' simpe'nko~ tantuu'nunge bataranuka nii'nung bakaning? Tee bakaang Ovoringe deeko' simpe' nko-koo makosi arera tampara ee'noko arera orara. Ee'noko tampara tampura tee Ovoringe makosi donkong-antavuaing. <sup>5</sup> Naning narunge nii'ning doong meekeng tampurimaung ee'noko nii'ning meekeng deea'. Teka nii'nunge ookara doong nari' oro'nanka tampurimaung. Makosi, ookara nantoong tee naruna' naruna' bii'ka noru'ariri otoromana' date'pariri otoroaing biikaang onou-koo. <sup>6</sup> Baie naning nii'na'mung doong tare-koo piavora tee tarevuaing te'mung ee'na'mung Ovoringe pankaing-antavui. Ee'noko tee naning naro'keta naikumaung tee Ovoringe daangampuma tee' naro'keta naikung Kumponing-koo tampa' tampuma. Kerempumaunge tee', Ovoringe daangampuma kerempumaunge, ee'noko Kumponing-koo tampa' tampuma. <sup>7</sup> Nii'koo naning baka otomaung otoa', nii' Kumponing bakaning naing, domamariri o'nori deeko' ee'noko moompima deeko'. <sup>8</sup> Nii' domamariri otoko tee Ovoringe kuung deemuri otong ee'noko moompiko napo' teie, Ovoringe kuung deemuri otong. Arekee', domamaritaa' deeko' ai' moompima deeko' nii' teing Ovoringe bakaning. <sup>9</sup> Karistoo' boo'paru' ee'noko napo' domamparu' tee ookara-koo nari' Ovoringe otoo'naang boo'nuka-koo ee'noko domantoo'nuka-koo.

<sup>10</sup> Arekee'koo dake da'maiko' orara tampemang? Napo' arekee'koo da'maiko' oovemaang? Nii' teing ookara donkonampiaining teke Kumponing simpe'muriainoo'ke. <sup>11</sup> Tee' Daari Meekung-koo daariari otoina',  
"Kumponing aa'pumaang: Masika'keta masika', ookara nantoong ning-koo kinkinaavaining ee'noko ookara menenge ning Kumponing daangamaavaining."

(Aisaia' 49:18; 45:23)

<sup>12</sup> Tee'koo noru'ampiri otong nii'ka niikaang nko-nkonanka ninka basimariaing Kumponing-anko teie nari-koo.

### Nii'ka Orara Aarumo-koo Dua'antameeria' Otoaing

<sup>13</sup> Tee'koo nii'ka simpesimpe'meeria' otoaing. Teka ee' noru'erimatoai: Kapoo' naning nii'maiko' tupamparara dua'arapeu'nung-pina' oro' nkoampiauuka'. <sup>14</sup> Nkaang otooto' Karistoo' ninka nari' o'noresi ninge tasi'pansing kapoo' baka tanuaang ku'mi'anta otoa'. Teka naning masika'antavui ku'mi'anta tampuko dei, ku'mi'anta deemparapeu' tee-koo. <sup>15</sup> Nka kapoo' nii'nunge ku'mi'anta tampui otoing dake naiera tee da'maiko' domang orari-antavepeu', ee'noko domang orari-antaverai'nange ee' noru'darapeu': Ninge enang piaanavung siompamparing. Ai' tee Karistoo' tee da'maiko' moo'uu'naang boo'paru', tee'koo dake napo' orari-antaveauka'nung naro'keta kapoo' naiema. <sup>16</sup> Tareraravai tee-koo kapoo'koo dake tampara tampei nkovemaung-koo nii'ninge oraka' minkuminku-aa'neeng. <sup>17</sup> Kumponing bakaang tare taamang-aape deea' tuaang tovang, teka koonto'nung aarumo-aape, mooa-aape ee'noko doturotu Tanuaang Meekung-etaing-aape. <sup>18</sup> Naning tee te'aapei Karistoo'koo dai'ari mintoompevumaung Kumponing dotu-antavukoo' ee'noko nantoonge tampara tampaakoo'. <sup>19</sup> Tee'koo to'bii-antamariri o'horaiing mooa-aape ee'noko pakupaku-aape nari'. <sup>20</sup> Taamang narung noru'eri Kumponing bakaang nko-nko orari-antaveriauka'. Ookara tee bakei kiiroraananka masikung, teka masika'parapeu' oraka' nii'ning dua'anta-koo tamung naro'keta na-iampiko. <sup>21</sup> Tamba'na' ee': Kerempeaing tee bio' maa'koo, purinto'naru' nai-koo ee'noko nii'ning kapoo' tee da'maiko' orari-anta-koo makosining. <sup>22</sup> Tee masika'anta temurii' da' oto'deruing tareveai, da' Kumponing ninka nari' kontui otoaing. Biraankenung tee naning tampara aarumo masika'antavumana' nari' nkoarama tuutunang~ baari'umaung. <sup>23</sup> Nka naning tee tamung naro'keta naivumaung pankaruntoonge noru' keekoo'arama, tee tuutunang-po'nung. Aming-koo? Tee aa' tee masika'anta-ita nkovuaruing. Ai' ookara kapoo' tee'ke, masika'antavua' nkovuma tee' oraka'ke.

### Nii'ka Pakumeerima Tapo'meeriaing Karistoo'koo Kungunge.

**15** Nii' ee'ning masika'anta-koo purimariri o'noringe tee teing aruaru'nanka pakuarampiing, niikaang pia siompampia'. <sup>2</sup> Nii'ke naruna' naruna' oovuning dotu-antavarampimaa-toaing tampa' purimariri otoroaina'. <sup>3</sup> Ai' Karistoo' teie, baka dotu-antavaravaru' Kumponing noru'ui, Daari Meekung-koo aa'puu'na'koo,  
"Oraka' minkuraamaing minkumaako tora'pantu'."  
(Kena 69:9)

<sup>4</sup> Ninge tenaare-koo noru'antarampimang, ai' ookara kara Daari Meekung-koo otoing teing nii' nau-anta-koo, tee Daari Meekung-koo pinka'mariri domang kuaa' ninka mii'kampiri tee barenku nempampiaiina'. <sup>5</sup> Enang tee, Kumponing domang kuaa'antamuri mii'kampiri o'norii'naang pakumurimaunge navu-an-



taruriaing Jiisuu' Karistoo' bakaang aarumo siomperi otoriko. <sup>6</sup> Tee' biraankeruriko nari' karerima Kumponing daangamperiaina', tee niikaang Ororing Jiisuu' Karistoo' Bauma. <sup>7</sup> Tee'koo onkeonke'deerimaatoaing Karistoo'ke dii' tero onkeonke'duru'na', Kumponing meena'poaina'. <sup>8</sup> Noru'eriai tee Jiisuu' Karistoo' pou' sira'antavuma Kumponing tee masika'pari otomaung bakaang maraka-anta-koo Ju'nupoong paku-koo teing tutuna'nupoong tero nauvuru'na'. <sup>9</sup> Ee'noko napo' noru'eriai tee pou' Ju'deeaing napo' moo'uriko teinge Kumponing miring pankaing-antavaava'naang bakaang paa-koo teing-koo. Tee' Deevita'ke daarivuma minkuvuu'na',

"Ninge daangantampaing Da' Ju'deeaing-koo meu'ke, ee'noko dakaang miring kenavampainge."

(Kena 18:49)

<sup>10</sup> Nii'noo'ke napo' ee' daariari otong,  
"Doturariaing dii' Ju'deeaing teing ninka bakaning Ju'nupoong ninka nari'."

(Boto 32:43)

<sup>11</sup> Napo' nii'noo'ke Daari Meekung-koo aa'pui otong,  
"Daangamperiaing Ororing dii'ke Ju'deeaing.  
Ookarai daangamperiaing tee."

(Kena 117:1)

<sup>12</sup> Napo' Aisaia' bakanoo'ke aa'pui otong,  
"Jeese' bakanaving-koo narung naning daa'araa'naang tarevuriaing teing Ju'deeaing, ee'noko tee narung-koo teinge biikaang noru' sipaavai."

(Aisaia' 11:10)

<sup>13</sup> Ai' teie Kumponing maraka-antamurio' nempampimaunge maanto'antaruriaing doturotue ee'noko mooai masika'antaveriko. Ee'noko teie purinto'ke Tanuaang Meekung bakaange aa'na' tasi'antaruriaing tee barenku mme' oro'paravaung.

### Asi'naare Kara Paula'ke Ba'maikori' Minkuvuru'naare

(15:14–16:27)

#### Paula' Dotuaru'na' Tee-koo Bakaang Mintoong-koo

<sup>14</sup> Ninge tee ninka tampa' noru'dampimaung dii' mmaikori' tampara aarumoi maanto'antararirio' ee'noko norunoru'ke, ee'noko makosirariri dii' dii'ka nau-anta-koo. <sup>15</sup> Nka tee amanampa' nii'ning kapoo' napo' noru'antarampimang, mmaikori', noru'ansi dii' tampa' otoritaa' tamung napo' minkuanko meena'poaing, ai' ning tee Kumponing mintoong maeneung amuu'nung. <sup>16</sup> Ning tee poka'mari kara-okovui-nka-koong tee doorenang Jiisuu' Karistoo'keta Ju'deeaing-aape. Ning tee pareka-nko makosi, piristi'pina' dii' parekarampiko dii' boontunang tampara deentariu'ning Kumponing-koo Tanuaang Meekunge makosi-antarurio' Kumponing dotu-anta-koo. <sup>17</sup> Nka tee makosi ning danga'daangamaravaing tee-koo ookara kapoo'nanka-koo Jiisuu' Karistoo'ke

nkovuing-koo ning-koo kuunge. <sup>18</sup> Kapoo'koo ninka nkoansing-koo daangamaravarupeu', nka tee-koo Karistoo'ke narunge nkovuing-koo ning-koo kuunge daangamaravaing Ju'deeaing pia-antavarantu'nung-koo aa'ninge: kara, tampa'nko, iirakuta-koong taa'ni'anta oro'pariko ee'noko Tanuaang Meekunge purimpari daa'uriko; <sup>19</sup> Tee' nari' daankiarantu' Karistoo'koong doorenang ookara teketa Jerusalema' kato Ilirikung-navuntu'. <sup>20</sup> Tee' nkomarama ee' to'bii-antamaramaung: Tee doorenang nauarama'naang tenairu Karistoo'koong miring nii'ninge mme' sira'paava'nairu nanama, aa'pama: Nii'nunge natuku keempuu'noo' kaniami'neenga. <sup>21</sup> Daari Meekunge minkuvumana' nari' nkoaraa'naang ee'pina',

"Teinge tero ooaavaruu'ninge nauaariaruko tee ooaavaing, ee'noko teinge tero taaravaavaruko'ninge tee tasi'paavaing."

(Aisaia' 52:15)

#### Paula'ke Bakaang Miru' Rooma' Ee'noko Sipeini Beero'koo

<sup>22</sup> Tee' nkomarama dii' tero taaraveru'ning-anko meang tamung maromarama po'koo. <sup>23</sup> Nka enang opansing ookara nkaang nko-nko ameensi'koo. Teka makotuko deeko' enang Sipeini-nameensi'aape nana-na'naang, ee'noko te' nanama beero'dampiaing pa, mmou' mare'koo dii' oo-koo piamonanoo'koo.

<sup>24</sup> Ee'noko oki'noo' navumariritaa' o'noo'norira pakumerio' napo' tampa' nanampaing nkanavunge.

<sup>25</sup> Nka enanoo' Jerusalema'aape nanama'naang avuavu' ninka Kumponing bakaning meekupoong-koo. <sup>26</sup> Teing Masedonia' ee'noko Akaia'naameensi'kooninge dotuariri avuavu' nkoau' teing meekupoong-koo ata'oi'nuka-koo Jerusalema'ka.

<sup>27</sup> Tamung dotuariri avuavu', nka tee tampara doorenang-koong komaaru maku' makosi. Ai' Ju'nupoong-eta tee tanuaang-aapening biraanke nkavaara teinge napo' pakuaariai Ju'nupoong mono-aapening paku-paku-koo. <sup>28</sup> Teka tenang tee aung avuavu' opansi avoromira oosievorompiru'ning tenang tankinampaing Sipeini-aape ee'noko tankinama beero'dampiai.

<sup>29</sup> Ee'noko noru'ansi otong ning tenang dii'anko basimaravainang tee Karistoo'ke biraanke pankaing amuaing dii' paku-koo.

<sup>30</sup> Enang naurampimang dii' mmaikori' kuunge Jiisuu' Karistoo' niikaang Ororing-koo ee'noko tee ninka paa Tanuaang Meekung bakaang, ni'ninka nari' mintoomariaing kungsi-koo pakumeriko Kumponing tonta'antamuaina' teing-eta nantoong masika'anta otoroing-eta Judia'navetei otoroing-eta, ee'noko nkaang nko-nko Jerusalema'ke tampa' aroo'aavai Kumponing bakaning meekupoonge. <sup>32</sup> Tee' nari' Kumponing piavomana' ning dii'anko meaing dotumarama dii' ninka tampa' dee'moi o'noo'naang. <sup>33</sup> Tee ee'nara Kumponing mooa-po'nung tee' dii' ookara ninka nari' otomatoaing. Tee' ee'na'.

## Paula'ke Mmau' Nantoong Tampa' Tang Nauvuru'na'

**16** Dii' ninge naurampimang ani nii'mari Piibii' tampa' noru'eriaing. Ani teni pakupakunani dootuu'nupoong-koo teke Siekuria-namono-koo. <sup>2</sup>Tampa' onkeonke'eriaing onkeonke'eemana' Kumponing bakaning meekupoong, ee'noko pakueriaing teni kapoo' piavoaining-koo, ai' teni teni ee'nani pakupaku nantoong karika'koo, ee'noko ning-koo tee' nari'. <sup>3</sup>Nauereriaing tering Pirisika'daring Akuila nkaang doturotu tering-koo, nari' Jiisuu' Karistoo'koo mintoomarimaring-koo. <sup>4</sup>Kuru toto'koo avoreora' pakumuretu' domang-antamuraema. Ning narunge tampa' tang-koo makosi deea' tering-koo teka ookara dootuu'nupoong osi kante-koo tampara tampaavaing, Ju'deeaing-kooninge. <sup>5</sup>Nauereriaing nkaang doturotu teing dootuu'nupoong tering beekanava'koo kune'eemaing. Napo' naueriai tee Epinitas nkaang doturotu, mmaiko' masikung, tee ee'nara tutuna'nung Eesia-nupoong-koo Karistoo'aape bere'aru'nung. <sup>6</sup>Napo' doturotu nkaang teni-koo Meeri'koo dii'koo aa'na' kake'iinani. <sup>7</sup>Doturotu napo' tenaanka-koo Antoronaikas naanka Junias, ning-pina' Ju'koonaanka ee'noko nari' dai'nisira. Tenaanka Kumponing-nung kara-okovuresi-nkara miring pankaing-po'naanka. Ning mme' bere'maravaruko tenaanka tutung bere'aretu'naanka Karistoo'koo. <sup>8</sup>Doturotu tee-koo Ampilietas, mmaiko' masikung Ovoring-koo. <sup>9</sup>Napo' doturotu tee-koo Ebanus nari' mintoomarimaung Karistoo'koo, ee'noko napo' tee mmaiko' masikung Sitekis. <sup>10</sup>Doturotu napo' tee-koo Apelis, Karistoo' kake'iiari siompumaung. Napo' doturotu teing-koo Aristabiulas baurukaa'koo. <sup>11</sup>Napo' doturotu tee-koo Erodion, ni'ninka nari' Ju'nung. Napo' doturotu Ovoring-koo teing-koo teni Nasisis baurukaa'koo. <sup>12</sup>Napo' doturotu tenaanka manikumaara-koo Ovoring-koo mintoomparemanaanka-koo Taraipina ee'noko Taraiposa'. Napo' tee Peesis, mmaiko', aa'na' mintoomparamaung Ovoring-koo. <sup>13</sup>Doturotu tee-koo Ruupasi, pankaing Ovoring-koo, ee'noko teni bauko, napo' ninge tee', nko'ke. <sup>14</sup>Napo' doturotu teing-koo Asinkiritas, Pilikon, Eemis, Patorobas ee'noko Eemas ee'noko teing mmaikori' nari' otoromaing. <sup>15</sup>Doturotu napo' aing-koo: Pilolokasi, teni Julia, Nerias ee'noko teni ba'mari. Napo' Olimpasi ee'noko ookara Kumponing bakaning meekupoong teing ninka nari' otoromaing. <sup>16</sup>Ookara doturotu-antareeriaing onkeonke'deerima. Karistoo' bakaning dootuu'nupoong napo' ameen-si'kooninge ookara osi kante-ita doturotu naurari-maang.

## Asi'naare Tautau

<sup>17</sup>Enang tee bakei koonto' naurampimang dii' mmaikori': Oorariri otoriaing teing-koo dii' toto'anta-koo ee'noko pore'anta-koo piavoroi otoroining-koo tee kara tero taaraveru'nung bei'bei'aama. Donta'dariri otoriai teing-eta. <sup>18</sup>Nantoong tee' oro'nukai tee ni-ikaang Ovoring Karistoo' siompaava', biikaang pia narung siompaamaung. Tampa' nari' kareaama ee'noko opampaarima tosiaarimaung teing amakoori domang-koo. <sup>19</sup>Dii' teing kara meumperimaing deentariiko ookarai tampa' noru'daari otong ee'noko ning napo' tee'koo dotumaramaunge. Nka ninge dii' tampa' mataurariri oto'koo pia-antarampimang tampa' nari' nko-koo. Oraka' nko-koo amako-pina' otoriai. <sup>20</sup>Tee' nari' nkorariko tenang Kumponing mooa-po'nunge Sietani' namu'ke dii'koo kau'koo boonavete-koo mme'uai. Tee biraanke niikaang Ovoring Jiisuu' Karistoo' bakaang dii' ninka nari' otomatoaing. Ee', masikung.

## Paula'ke Si'noora'uru'na'

<sup>21</sup>Timoti'ke ni'ninka nari' mintoomaremaunge tampa' tanterurimang, napo' Lusias dovange Jeelsoni ee'noko Sosipata, ni'ninka namuu'kooninge. <sup>22</sup>Ninge ee'narai Tesiesie aung karavoto' daariansinunge tampara tanterompimang Ovoring ninka. <sup>23</sup>Teie Gaiasie nii' ookara dootuu'nupoong anke tanatamurimaunge tampara tanturimaang. Napo' Erasitasie osi-koong mooni' tarevumaunge ee'noko tee nii'maiko' Kuotasie tenaankai tampara tantaarimaang. <sup>24</sup>Niikaang Ovoring Jiisuu' Karistoo'ke dii' ookara piaaruri tampa' pakuruaing. Tee' ee'na'.

## Paula'ke Kumponing Daangang-koo Pia-antavuru'na'

<sup>25</sup>Enang tee daangampampimaatoaing Kumponing dii' tampa' donkong-antaruri otoaing tee' nari' teie dooreng tamparai minkuvumana' nauaramaunge Jiisuu' Karistoo' sira'pama. Teie dooreng tamparai tee kapoo' makensi'nung teroita makempari otou'nung enang sirapo' po'antavuing; <sup>26</sup>Kumponing tee' nari' otoi otomaunge botovuo' sira'paring ookara amute-murii' nantoong-koo, teinge masika'antavaara siompaava'naang. Aung tee nakaro-nupoonge Daari Meekung-koo minkuau'nung. <sup>27</sup>Kumponing tee meenasi okovenung, ee'nara baka norukasi' daangampampimaatoaing Jiisuu' Karistoo'ke pakumurio'. Ee', masikung.

# 1 KOORIN

## Kara Baavootunanka Ane'kooning

1:1 Dootuu'nupoong Poka'aririo' Naroong-antanaare  
 5:1 Dootuu'nupoong-koo Meu' Orara Aarumo Koong-antanaare  
 7:1 Nampeesi-koo Nau-antanaare  
 8:1 Taamang Kumponing Tositosinanka-koo Darimpaamaung-koonare  
 11:2 Avuavu'nanka Tanuaang Meekung-etaning Ee'noko Dootuu' Tampa' Nkona'  
 15:1 Nantoong Boorou'ning Napo' Daa'ariaing-koonare  
 16:1 Asi'naare, Paura'ke Bakaang Miru', Tautau, ee'noko Si'nara'koonare

### Dootuu'nupoong Poka'aririo' Naroong-antanaare

(1:1–4:21)

**1** Aung karavoto~ tee ninge Paula'ke daariamang, ninge ee'narai Kumponing bakaang piai boku-muu'nunge Jiisuu' Karistoo' bakaang kara-okomui-nka deemaraa'naang. <sup>2</sup> Ee'noko tang pakumui teie mmaiko'ke Sostenisie nari' daairerompimang dii' Kumponing bakaning teke Koorin-namono-koo dootuu'darimaing, ee'noko ootukuning nantoong-koo ootukunairu-koo otoroining nari' eentavarimaing Jiisuu' Karistoo'koo miring tampaama, tee biikaang Oving ee'noko nii'ke niikaange. Dii' ee'ning Jiisuu' Karistoo'koo kuung otorining banturi bokururira bakaning deeng-antaruru'ning meeka'antaruri. <sup>3</sup> Biraanke ee'noko mooa dii'koo otoaing Kumponing Niu-ma-itaing ee'noko teieta Oving Jiisuu' Karistoo'.

#### Paura'ke Tampa' Tang

<sup>4</sup> Doong kante ninge tampara tampamaung nkaang Kumponing-koo dii' ee'ning-koo, teie biraankeruru'nung-koo Jiisuu' Karistoo'koo kuunge. <sup>5</sup> Dii' tee tee-koo maanto'duru'ning avaro-tevaro. Teie pakururimaung noru'koo ookara kapoo' masikananka ee'noko tampa' kareria'naang tee-koo. <sup>6</sup> Niikaang doorenang Karistoo'koong tee diikaang domang-koo date'pario' ookara avuavu' tanuaang-etaning nkaverira komperimaung nemperitaa' poainoo' tee niikaang Oving Jiisuu' Karistoo'. <sup>8</sup> Napo' teie pinka'antaruriainge o'doma basirarii'naang tuumpiraria' teroong-koo bera Karistoo' toroaravaina'mung-koo basi. <sup>9</sup> Kumponing ee'narai tee' bokururu' Bauring Jiisuu' Karistoo' ni-

ikaang Oving ninka domang nari' oto'koo. Kumponing tee bakei makosi masikung nii' tee-koo baitomariri oto'koo.

#### Urantanuka-koo Baa Deto Basi Matau Tang-koo Tata'eema Poka'ariru'na'

<sup>10</sup> Teka ee' minkurampimang mmaikori' tee-koo niikaang Oving Jiisuu' Karistoo' bakaang miring-koo: Naro' kareriai, ee'noko pokapoka'deeriauka', teka tapo'deeriai noru' narung-koo, narung miru' ninka. <sup>11</sup> Ai', mmaikori', dii' ninge doore taarampirining Koloui bakaning-koo nii'ninge naumaio', dii'koo meu'ke turanturang otong. <sup>12</sup> Aung tee ee' minkuamaung: Nii'ning dii'kooning naruna' naruna' aa'perimaung, "Ning Paula' bakanavitu-koong." "Ning Apolos bakanavitu-koong." Napo' nii'ninge aa'perimaung, "Ning Siipas bakanavitu-koong." Ee'noko nii'ninge aa'perimaunge, "Ning Karistoo' bakanavitu-koong." <sup>13</sup> Karistoo' ee' tankampari otong? Ning Paula' ee' dii'koo aa'barata'koo moontu'? Ning Paula' nkaang miring-koo ntong-koo minkirarira meeka'antararuru'ninge dii'? <sup>14</sup> Ning enang dotumaramang nanging dii'koong ntong-koo minkie meeka'antavamparuu'noo'koo, a'noo' Krispas naanka Gaias deeko'. <sup>15</sup> Nanging ee' minkuvuauka', "Paula' bakaang miring-koo ntong-koo minkivurima meeka'antavurimaung." <sup>16</sup> Oi, napo' ninge tee, Sitepanas bakanava-kooning deeko' ntong-koo minkiamira meeka'antavarantu'. Teing-koo dama'due pa napo' nii'ning ntong-koo minkie meeka' antavampa'. <sup>17</sup> Karistoo'ke ning tee nantoong ntong-koo minkie meeka'anta-koo boto-mua', teka tee doorenang tampara daanki-koo boto-muu', baru' kara tarii'ke daangamarapeu'na' deea', Karistoo' aa'barata'koo boora moo'muru'nung-koong doore paa'aravaroonaang.

### Jiisuu'ke Narunge Moo'murio' Nii'ka Daangamariri Po-ka'koo Tee Oraka'

<sup>18</sup> Tee daankinang Karistoo' bakaang boo'koong tee-koo aa'barata'koo tee kanu'anta-pina' teing-koo nantoong mosianung-aape nanaamaatomaing-koo. Teka nii'koo, Kumponing domang-antamurimatomaing-koo tee tee kara bakaang iri'po'nung nantoong domang-anta-koo. <sup>19</sup> Ai' teie Daari Meekunge tee' minkuvuu',

"Ning orari-antavampaing bii'ka norukasi'nanka tamparimaing biikaang noru', ee'noko tonta'ampaing bii'ka mataunanka tamparimaing biikaang matau."

(Aisaia' 29:14)

<sup>20</sup> Tee'koo tee, arekee' nantoong poka'arima bii'ka daangamparipeu' aa'ning tamparima: norukasi'nanka, Boto Meekung-koong Dariraari tanatanuka, ee'noko kara-koo bore'ke deerenuka Kumponing-koo dutakanoo'ke? Makotua'. Kumponing biikaang matau daang-antaevuri otong. <sup>21</sup> Aa'noio' Kumponing bakaang matau-koo makosiaavaruu' teing kansi'nupoong Kumponing noru'koo bii'ka biikaang noru'ke. Tee'koo Kumponing dotuaru' teie minkunaa daang-koong tampaamaunge nii'ke daankiampimaunge domaang moo'uriaing teing nantoong masika'antavaavaining. <sup>22</sup> Ju'nupoonge tee naning masika'antavaavaung taa'ni'anta aa'na' iri' ninka oro'paravaruko, ee'noko teing Ju'deeaing naning masika'antavaavaunge biikaang kansi'koong matau-pina' nari' oro'paravaruko. <sup>23</sup> Teka nii'ke aampari'marima Karistoo', tee Domang-anta aa'barata'koo~ taakavau'nung-koong, daankiampimaung, Ju'nupoonge maimaia'na' maremaare-pina' taaravaamaung, ee'noko Ju'deeaing kanu'pina' taaravaakoo'. <sup>24</sup> Teka teing-koo bokuvuru'ning-koo nara'ka, Ju'nupoong ee'noko Ju'deeaing tee, Kumponing tee teroita Pako'pari'nii' iri' ninka daa'uu'nung nii' domamurira tampa' taremurimatoo'naang, ee'noko tee-koo kuung o'nori Kumponing bakaang purinto' ee'noko matau deto basi tasi'pampiri dotumarimaung. <sup>25</sup> Tee Kumponing bakaang noru' bane daang-pina' oro'ke, aa'na' deto basi nantoong biikaang noru' pankaing-koo, ee'noko Kumponing bakaang iri', bane tarua'pina' oro', aa'na' deto basi nantoong biikaang iri' pankaing-koo.

<sup>26</sup> Mmaikori' ee, norunoru'dariaing Kumponing kansi'nung aarumo puru'ui bokururu'nung-koo, ai' oo'oorariai dii'ka diikanavitu dii'koo nantoong mmou' otoroa' aa'nupoong: norukasi'nuka tantaarimaing, iri'po'nupoong ee'noko ovontung biurukaa'. <sup>27</sup> Teka Kumponing bampuu' kapoo'ke kansi'nupoonge kanu' tampaamaunge biikaning noru'po'nupoong maia'antavurii'naang, ee'noko napo' bampuu' kapoo'ke teinge iri'dopa tampaamaunge biikaning iirakutananka maia'antavurii'naang. <sup>28</sup> Kumponing bampuu'nung kapoo' kansi'nupoonge doonko ooaama, oraka' noru'aama, otoaung-pina' noru'aamaunge dua'antavuaing biikaang kapoo' masikung tampaamaung, naning daangampara'neeng Kumponing-koo uro'ka-

noo'ke. <sup>30</sup> Kumponing nii' Jiisuu' Karistoo'koo kuung si'muru', ee'noko Kumponing Jiisuu' Karistoo' niikaang noru' okovenung deeng-antavuu'. Teie ee'narai nii' koonto'nuka deeng-antamuru' Kumponing-koo ee'noko Kumponing bakaning taa'ni'antansinuka deemurira Kumponing moo'muru'. <sup>31</sup> Tee'koo ee' minkuamaang, Daari Meekunge aa'pumana', "Naning daangang-koo piavora tee daangampara-vaing tee-koo Ovoring-koo."

(Jeremaia 9:24)

### Paula'ke Jiisuu' Narung Minkuvuriko Tampa Bere'ariru'na' Noru'antavuru'

<sup>2</sup> Mmaikori', ning tee'ke, daangamarava' mou' dii'anko tee-koo karakara-koo ee'noko norunoru'koo tenang sira'pama tee Kumponing-nung kara baku'nisi. <sup>2</sup> Ning ee' noru'maru': Kapoo' nii'ning noru'ampauka'nung dii'aapeita. Kapoo' naurampiaing ee': Jiisuu' tee Karistoo', tee Kumponing tero Pako'pari'nii' domamurira taremurainoo'koo, ee'noko tee aa'barata'koo boora moo'muru'nung. <sup>3</sup> Tenang dii' ninka nari' o'noko'nanang tee ning ka'duumari o'noko' naning aruaru'pina' oro'mari avoro'ke dankuranku'marapeu'na'. <sup>4</sup> Nkaang daankinang kansi'aape-nung norukasi'ke barantampia' kara menaankamoma, <sup>5</sup> teka Tanuaang Meekunge bakaang purinto'ke masikee-antamuko aroo'dariru', diikaang masika'anta e'manuaina' naning bakaang norukasi'koo deea', teka Kumponing bakaang purinto'koo.

### Tanuaang Meekunge Pakumuriko Deeko' Kumponing Bakaang Miru' Nkavampipeu'

<sup>6</sup> Nii'ke tee tee a'noo' nantoong purimparimaing-koo tee-koo Kumponing bakaang aarumo-koo teing-koo kara makosi nauarampimaung, nka tee kara kansi' bakaang noru'koo ee'noko pankainanka-koo makosipina' oro' deea', teing dua'ariaining deempariko. <sup>7</sup> Nii'ke tee Kumponing bakaang noru' makensi'nung sira'pampimang ee'nara noru' pankaing teroita maronisi ootukunung kapoo'nanka tutumparavaruko nii'ke meenasi kompampiaina' tee ninka. <sup>8</sup> Teing ovontung enang-navaro-kooning koonto' noru'aavaruu'ning. Teinge noru'ai dei tee, Tee Ovoring Meenasi Okovenung aa'barata'koo bi'aavarupeu'.

<sup>9</sup> Tee' nari' Daari Meekunge minkuvuu'na' naurampimang, aa'pua'na',

"Kumponing tero maamu-antavuu' teing-koo domange dai'aamaing-koo kapoo' tampara naning teroita dutai oovua', ee'noko punkange taarava', ee'noko bakaang onou-koo tumparava'."

(Aisaia' 64:4)

<sup>10</sup> Teka nii'koo tee Kumponing tampa' nkomuru'na' oro'antavuu' tee-koo Tanuaang Meekung-koo kuunge. Tanuaang Meekung tee ootukunung kapoo' sirapo'antanung, bane Kumponing-koo tumang masipo' otomaing. <sup>11</sup> Baie ee'narai naning bakaang onou noru'ui otong? Otoa'. Teie tee-koonge tanuaange deeko' noru'ui otong. Tee'pina' nari' Kumponing

bakaang tanuaange narunge noru'ui otong Kumponing bakaang onou. <sup>12</sup> Enang nii'ke nkavampiring tee Tanuaang, tee kansi'nung deea', teka tee Tanuaang Meekung Kumponing-etaing tee nii'ke noru'ampii'naang teing avuavu' biraankemurima Kumponing amuru'ning.

<sup>13</sup> Aing teing kapoo'nanka nii'ke minkuampimaing naning bakaang noru'ke deea', teka Tanuaang Meekunge naumuriko. Nii'ke ee'nara bakaang kara siompampiri siraka'antavampimaung teing kapoo' teitaning teing nantoong-koo ee'nara Tanuaang Meekung-po'nupoong-koo. <sup>14</sup> Tee naning Tanuaang Meekung otoaung, teie aroo'uaung Kumponing bakaang Tanuaang-etaning kanu'antaning-pina' oovuma. Teing teie tasi'puarupeu' baku'nising Tanuaang Meekunge sira'puaruko. <sup>15</sup> Teie naning Tanuaang Meekung-po'nunge tee simpe'ui otong ookara kapoo', nka tee, naning ee'nara tasi'puarupeu'. <sup>16</sup> Ai' Daari Meekunge aa'pumaung,  
"Baie baka Oving bakaang onou tasi'puitaa'  
kapoo'nanka nauvupeu? Otoa'."

(Aisaia' 40:13)

Teka nii'ke deeko', Tanuaang Meekung ninka Karistoo' bakaang onou-po'nupoonge.

### Nantoong Birevire'arima Tanuaang Meekung Bakaang Matau Bekoi'au'na'

**3** Nka ninge tee dii' mmaikori' Tanuaang Meekung-po'ning-pina' teroita kararampiaung, teka nantoong tamunsi'nupoong-pina' kararampiaung, toirekaa'pina' Karistoo'koo. <sup>2</sup> Ninge tee dii' noonoo'ke bau'dampimaung, taamang ivekunge deea'. Dii' mme' makosiria' ivekung nai-koo, ai' dii' tee mme' mono bakanavete-koo otoring. <sup>3</sup> Tenang dii' mamairo-koo otoritaa' ee'noko turanturang, arekee', dii' mono bakanavete-koo ee' otoria', tamunsi'nupoong nkoari-mana? <sup>4</sup> Tenang dii'koo narunge aa'puko, "Ning Paula'navitu-koong," ee'noko nii'nunge aa'puko, "Ning Apolos-ning," tee' karerima tamunsi'nupoong-pina' nkorarimang. <sup>5</sup> Aming-koo dii'ke nee' Apolos naanka daangamereremaatoinge? Nee'naanka tamung Kumponing-koo kara-pare'ka nanaanka, tamung dii'ke nee'koo masika'anta nkaveru'ning, Ovoringe nee' kantemureta botomuretu'na' nkoampeko. <sup>6</sup> Ninge keempantu', napo' Apolosie duu'puu', masika', nka tee Kumponing baka du'antavuu'ning tee sinang. <sup>7</sup> Tee'koo tee naning keempumaung ee'noko tee nii'nung duu'pumaung baru' noru'koo makosi deea', teka tee Kumponing baka du'antavumaung noru'koo makosi. <sup>8</sup> Tenaanka tee, keempumaung ee'noko duu'pumaung nari' basira; a'noo' tee Kumponing tee' mintooparetu'ning-koo moo'ureaing. <sup>9</sup> Nee' tee Kumponing ninka mintoong nkora, ee'noko dii' teing Kumponing bakaning keenkeenanka.

### Dootuu'nupoong Teing Pava-pina' Be'nu'be'nu'nising-itu

Ee'noko nii'noo'ke dii' teing pavanava-pina' otoring, Kumponing-nava, ee'noko ning tee pava kani-koo okote'. <sup>10</sup> Teie Kumponing biraanke-antamui' ninge matauna' konkoroompantu' ee'noko nii'nunge pora dau kanivuu'. Teka tee baa tee naning dau kanivuaing tee matauvui kanivuaing tampamang. <sup>11</sup> Nii'nunge naning ee'nave natuku keeng-koo makosi deea'. Teve nave ninge keempantu'nave otoaing. Teve ee'nave Jiisuu' Karistoo'nave. <sup>12</sup> Nii'ninge kara-naunukai dee'ma tee-koo natuku-koo dau avutevu'ke kaniaava'naang, aa'ning-pina': baa'nankai, kaveera'ke ee'noko ankaro'ke; nii'noo' koro dovange, siliva'ke ee'noko kapang pipi'daarie. <sup>13</sup> Teka tee dama'ke Jiisuu' Karistoo' bakaang doong urumpari tane'puma kaniau'na' sira'puaing, ee'noko teie nta' ninka paaravuaing tee pava navarona' bono'eema kaniau'ning, arevaro tampavaro, arevaro oravaro. Ee'noko moo'uriaing kaniau'na'koo. <sup>14</sup> Teing ee'ning kapoo' tampeng-koo kanisiiu'ning taivuriauka'nung ee'noko tampara moo' nkavaavaing. <sup>15</sup> Teka teing kapoo' orara-koo kanisiiu'ning teing taivuriaining nta'ke, ee'noko teing nantoong kaniau'ninge moo' nkavaavauka', bii'ka deeko' domamparima moo'ariaing teing-pina' nta'ke taivuriko domamparipeu'ning-pina'.

<sup>16</sup> Ai' dii'ke ee' noru'eria' dii' teing Kumponing bakanava dootuu'nava pankava ee'noko Kumponing bakaang Tanuaang Meekung dii'koo otomaung? <sup>17</sup> Ee'noko nii'nunge narunge Kumponing bakanava orarivupeu'ning dei Kumponing tee orari-antavupeu', ai' Kumponing bakanava dootuu'nava pankava teva meekava ee'noko dii' teing ee'nava deentari otoring.

<sup>18</sup> Dii'koo naning baka tosiaravauka'. Nii'nunge dii'koo narunge ee' noru'uauka': "Ning norukasi' enang-navaro-koo." Kanu' tampaavai makosi Kumponing-koo norukasi' deemparavaina'. <sup>19</sup> Ai' aung kansi' bakaang norukasi' tee kanu'aapening Kumponing-koo duta-koo. Daari Meekunge ee' minkuvui otoina'koo,

"Kumponing tee norukasi'nanka tamparimaing bii'ka biikaang norukasi'koo taavi'antavurimaung."

(Jop 5:13)

<sup>20</sup> Nii'noo'koo napo' ee',

"Ovinge tee noru'ui otong teing norukasi'nuka biikaang noru', ee'noko noru'ui otong biikaang matau katuauka'nung."

(Kena 94:11)

<sup>21</sup> Tee'koo dii'koo naning ee'ning naning miring pankaing-antavuma daangamparavauka'. <sup>22</sup> Ai' ookara dii' diikaning, aa'ning: Paula', Apolos ee'noko Siipas, ee'noko ootukunung kansi', domang ee'noko boo', tee kapoo' enang otoring ee'noko tee kapoo' dama' tavo'aravaing – ookara teing diikaning. <sup>23</sup> Teka dii' teing Karistoo' bakaning, ee'noko Karistoo' tee Kumponing-ning.

### Dootuu'koo Urantanuka Teing Kumponing Deeko' Bi- iving-koo Makosining

4 Dii'ke tee nii' tamung Karistoo' bakaning kara nkanuka-pina' noru'mereriing Kumponing makosi-antamuring-pina' bakaning kapoo' maken-si'ning nau-koo. <sup>2</sup> Kapoo' pankaing masikung botovotona'ke nkovuaing ee' oro': Kake'iari nkovuaing tee kapoo'nanka bakaang pankaing bampuing nko-koo teie. <sup>3</sup> Ning arekee'? Kake'iinunge? Tee aa' ning baru' tee-koo noru' manki'moaroo'naang dii'ke tokoona' noru'meriko deeko', napo' kapoo' nii'nunge minkuvuaing-koo. Ninka baakeenemarama masika'antamaravarupeu'. <sup>4</sup> Tee, ning kapoo' o'noa'pina' noru'maramang, nka ninka baakeenemaravarupeu'. Teie Ovoring narunge deeko' baka baakeenemui otong. <sup>5</sup> Tee'koo naurampimang, enang batei makotuaruko simpe'deeria' otomatoai bera te'mung Ovoring toroaravaina'mung basinoo'. Teie kapoo'nanka baku'nising araka-koo sipuaing mutaanang-eta, ee'noko teie ee'narai oro'antavuaing niikaang domang arekee' to'bii-antamariri otoina'. Tenang ee'nang nii' bakaning botovotona'nuka kante makosina' daangang kompampiang Kumponing-eta, nii'ning-eta deea'.

<sup>6</sup> Mmaikori' ee, aung tee tamung paara-antavansi minkuansing nee'koo Apolos naanka-koo ning, dii' pakururii'naang Daari Meekunge minkuvui otoina' divu'eri'neeng nantoong daangampererema bire'ereri, dii'ka mataunuka tantarima pokapoka'dariri. <sup>7</sup> Baie dii'koonarung pankaing-antaruinge? Aming kapoo' da' okorui otong Ovoringe arua'? Otoa'. Ee'noko teie aruio' nkavera aming-koo da' daangantaramaang nkaveaung-pina' oro'darama? <sup>8</sup> Teing ootukuning dii' piarorimaing nkavering ee, dii'ke? Dii' teing tero makosiru'ning noru'darimang? Ee'noko ovontung deentariu'ninge tero dii'ka, nii' ninka deea'? Bakei, tero ovontung masikeng deentaripeu'ning, nii' tee', ovontung deentaripeu'ning dii' ninka. <sup>9</sup> Ninge ee' oomaang: Kumponing nii' kara okomuri nkanuka ee'pina' oro'antamuring kansi'nupoong-koo: bore'koo simuru'ning-pina', taura'murira boo'koo ookarai paninaanka-kooning kansi' oomaario', nantoonge ee'noko koosinunankai. <sup>10</sup> Nii' teing Karistoo' Ju'deeaing-koo daankiampiko kanu'nanka-pina' noru'maarimaing; dii' teing nantoong tamung norukasi'nuka tantarimaing Karistoo'koo. Napo' nii' aruaru'nuka; dii' purinto'nuka. Dii' deto noru'daari-maing; nii' doonko o'norimaing. <sup>11</sup> Aung teroita depeto bera enanung batei-koo nii' peeramorimaung ee'noko nukaa'morikoo'. Ata'teempima oraka' duaanamari-maung. Dimpa'nisinanka nii'. Osi oto'memuriaingee nii'. <sup>12</sup> Birenge mintoamarima takaa'morimaung bau'marii'naang. Tenang deu'maariko kara tamparai maku'arampimaung. Oraka' nkomaariko tamung dooroomarikoo'. <sup>13</sup> Tenang oraka' minkumaariko nii'ke tampa' karavarampimaung. Nii' teing ookara kansi'nupoong-koo oreng deentariu'ning. Teroita nii' si-ikopaa'nanka deentariu' o'norimaung ookara-koo.

### Tee Kara-Okovui-Nkaevuru'nung-koo Dau Basinuka Pina' Noru'koo Oraka'

<sup>14</sup> Aung ninge dii' maia'anta-koo daariampa' teka dii' nari-anta-koo dii' nnurukaa' piaaru'nuka. <sup>15</sup> Bane nantoong dakuraaku'ke dii' Karistoo'koo tanataarimaing, nka mmau' diumatakaampi oto'deruria', teka dii' ninge parampiru'ning-pina' deentariu'ning Jiisuu' Karistoo'koo tee tampara doorenang naurampirio'. <sup>16</sup> Tee tee enang nia'dampimang ning paameri siomerii'naang. <sup>17</sup> Tee'koo ee'na'koo ninge tee Timoti dii'anko botoansing. Tee tee ee'nara piaaru' nnuring kake'iinung Ovoring-koo. Teie napo' noru'antaruriaing nkaang aarumonanka Jiisuu' Karistoo'koo tee-pina' ninge dootuu'nupoong nauaramana' ootukunairu-koo oosiarimanairu-koo. <sup>18</sup> Nii'ningee ee' noru'erimang ning pa moaroo'naang dii'anko. Tee' noru'erima bore' pankaintarimaung. <sup>19</sup> Tekaning moo'naang da'deng dii'anko, Ovoringe doona amuko deeko'. Ee'noko tenang nenke'ama'naang teing bii'ka daangananka biikaang kara, iri' masikung-po'nung deeko'. <sup>20</sup> Kumponing bakaang muu' tamunsi'nung karai ima'arava', teka iri' ninka ima'ari otong. <sup>21</sup> Arekee' dii' piarorimang? Ning dii'anko moo'naang bana' ninka ai' piaa ninka dooroomari?

### Dootuu'nupoong-koo Meu'ka Orara Aarumo Koong-antanaare

(5:1-6:20)

#### Maritoro Nkovumaung Dootuu'koo Ako' Si'koong

5 Ninge doorenang orara taaravansing dii'koo narung-koo maritoroaramaung. Tee temurii' maritoro teie nkovumaung maremaarenamurii' nantoonge taura'koo makosi deea', bane mutaanang-koonupoonge. Tee temurii' bauma ba'aang ninka oto'. <sup>2</sup> Bakei, arekee' daangantarimaunge pankaing noru'koo ee'noko aung orara tasi'peria' maia'doriaung? Orarunsiraripeu'nung-koo tampa'. Tee' nkorarima tee naning temurii' aarumo nkovumaung bata'eripeu' dii'ankoita. <sup>3</sup> Ning tee mono taapo' o'nong, teka nkaang tanuaang dii' ninka otong, ee'noko teke o'noitaa' tee simpe'ansing tee naning tee' maremaare nkovumaung. <sup>4</sup> Ninge naurampimang tee-koo niikaang Ovoring Jiisuu' bakaang miring-koo: Nari' minkunaarariai ning-koong ninka tanuaang ninka ee'noko tee purinto' niikaang Ovoring Jiisuu' bakaang ninka. <sup>5</sup> Tee' oosirarima bata'eri tavo'eriai tee aung naning Sietani'anko bakaang mono-koo naunau tora'purai'nange bere'arara bakaang tanuaang domamparavaina' te'mung Ovoring bakana'mung. <sup>6</sup> Tee' ee'na' daangantarimaatamana' tampa' deea'. Noru'eria' dii'ke ee narung naning oraka' nkoarama teie tee ootukunung naro'ka baaro'antavuring? <sup>7</sup> Dii'

Karistoo' boora moo'duru'ning tantarimaung deem-parako, makosina' tanatarariaing Taamang Baari'koong~ tanatana', tee paroro Karistoo'nung boo'koong uro'kanoo'nung taa'ni'anta Ju'nupoong-koo. Dii'ke noru'eri otong Baari'koong Taamang-koo berete' iisi-po'nung uro'ke dua'aako' taamang iisi-nin-ka baaro'arava' narung otoko, meeka'mung-koo makosining. <sup>8</sup> Tee' nari' meeka'mariri o'noriaing urikung aarumo sipampiri ookara oraka' nkonanka, too'de dovang ninka, ee'noko domang kiiroraa'mori kara masikung-narung-po'nupoong deemariri o'noriaing.

<sup>9</sup> Nkaang karavoto daariantu'nung dii'anko aa'pama, "Navurariauka' kaukauroarima otoromaing ninka." <sup>10</sup> Nka ninge tee' minkuama ookara kaukauro nkonuka aung kansi'kooning minkuarampa', kapoo'koo tata'arimaing, bakisipunanka, ee'noko kumponing tositosinanka siompaarimaing tovang ninka. Teka tee a'noo' teing-eta si'dariarupeu' kansi'keta tonta'dariarura deeko'. <sup>11</sup> Tee aa' ee'pina' miru'ansi daarirerompiru'nung: Tamung navurariauka' tee ninka naning ninka nii'maikorori'koong tamparamaung ninka aing aa'ning ee' oro' nkoarama: Kaukauroarama, tata'arama, kumponing tositosinanka siompuma, nantoong miring orari-antavurima, purinto'naru'ke kanu'arama ee'noko bakiaa' nkovuma. Aing nantoong tee' oro'nuka ninka nari' taamaniria' otoai. <sup>12</sup> Aming-koo pa-paaraririringe nkaang karavoto deeruerima? Ninge ee simpe'aramaung teing nantoong dama'du-nupoong? Otoai. <sup>13</sup> Kumponing narunge simpe'uriaing. Ee'noko dii' dii'ka tee'ke, teing nari' otorimaing naing simpe'ererimaing, ape' aing? Bata'eriai tee naning orara dii'ankoita.

#### Mutaanang-nupoong-aape Tuumpireerima Barantee-ria' Otoai

**6** Tenang dii'koo narunge narung da'maiko' minku-minkuema aming-koo maia'doa' otong tee kara dootuu'koo taapo'ke minkueko simpe'aava'naang? <sup>2</sup> Dii'ke ee noru'eria' Kumponing bakaning meekupoonge simpe'aariaing ookara kansi'nupoong biikaang aarumo. Da' ookara kansi' simpe'nko~ deeng-antaruko aming-koo noru'ea' otong da' makosi simpe'koo teing kapoo' oki'nareka? <sup>3</sup> Dii'ke ee noru'eria' nii'ke tee koosinunanka biikaang aarumo dama'ke simpe'arampiaing? Tee tee masikung. Tee tee pore' deea' simpe'koo teing kapoo'nanka anke kansi'koo nkoaramaing. <sup>4</sup> Bane teing nantoong noru' boong basi-po'nupoong dootuu'nupoong-kooning, simpe' aaripeu! Tee'koo aming-koo nanimang da' teing nantoong dootuu'koo noru' otoroiaing-anko? <sup>5</sup> Maia'doriaing. Arekee'koo dii'ke ooveria' otong naning narung noru'po'nung dii'koo baito-nupoong-koong dii' bake-antaruripeu'nung teieta' turanturang kenaanka naninka-koo meu'ka? <sup>6</sup> Tee'koo ee naning noru'po'nung dootuu'koo ureaamaing-koong ooveria' ako' be'antaverererimaung tuutunang-koo~ nantoong mutaanang-koo-nupoong-koo dutakanoo'ke? <sup>7</sup> Koon-

to' dua'daririning tee' dii'ka tuumpireerima. Tenang nantoonge dii'koo nii'ninge dii'maikorori'ke oraka' nkoraariko dii', ai' bakiaa'daariko, dii'koong kara-simpe' otoaruko makosi tampa' ee': Ampa'dori otori-aing dii'.

<sup>8</sup> Teka dii' tee' nkoraria' otong; teka baru'noo' oraka' dii' ee'ning namaia' makosinuka dii'ka oraka' nkoreerimaung bakiaa'deerima kara ave'eri tuumpireerima. <sup>9</sup> Noru'eria' otong teing nantoong nampeesi orari-aavaining teing Kumponing bakaang muu'koo tumpariauka'nung? Aavaraariko taaraverereriauka'. <sup>10</sup> Ai' aing ee'ning teing ee' oro'nuka tumpariauka'nung: Kaukauroarimaing, kumponing tositosinanka siompaamaing, nampeesi orariaamaing, nantoong bii'ka avarimaing ee'noko teing paaravaamaing oraka'nko aarumo bii'ka, bakiaa' nkonuka, mamairon-to'nuka, purinto'naru' naiaama kanu'arimaing, kapoo'koo tata'arimaing, oko'oko baukonanka, deu' baukonuka, ee'noko tavu' ninka bakiaa' nkoamaing. Tevitu avitu ee' oro'navitu tumpariauka'nung te' Kumponing bakaang muu'koo. <sup>11</sup> Nii'ning tee dii'koo tee' ee'na' nkorariko'ning, teka Tanuaang Meekunge Kumponing-etaing diikaang domang kiiroraa'antaruru', ee'noko meeka'antarurira koong-antaruru' tee Ovoring Jiisuu' Karistoo' bakaang miring-koo kuunge.

#### Kaukauroi Otoria' Otoai

<sup>12</sup> Dii'ke aa'peri otomaung, "Amutemurii' kapoo' taurapari otong nii'ke nko-koo." Teka nii'ning kapoo'nankai pakumuriaung. Amutemurii' kapoo' taurapari otong ninge nko-koo, teka ning ninka boong si'maravauka'nung kapoo' nii'ning bakaang purinto'koo. <sup>13</sup> Napo' dii'ke aa'peri otomaung, "Taamang tee pakosii'koo makosi ee'noko pakosii' tee taamang-koo makosi." Teka ampa'doriauka' asi'nooka' Kumponing tee ookaanka tamunsi'naanka deeng-antavureaung. Nka niikaang mono arekee'? Kaukauro-koo makosi deea'. Niikaang mono tee Ovoring-koo makosi ee'noko Ovoring tee'ke, niikaang mono-koo makosi. <sup>14</sup> Ee'noko asi'nooka' teie bakaang purinto'ke deto daa'muriaing nii' niikaang mononanka tee' ee'na' Ovoring daa'antavuu'na' nari'. <sup>15</sup> Dii'ke ee noru'eria' diikaang mononanka tee namarana' Karistoo' bakaang mono-koong? Arekee', makosie naning taapo' tonta'ui dei namarana' Karistoo' bakaang mono-ita ee'noko baraa'upeu' nii'nani ninka bakaang mono bakiaa'koo baavearamai ninka? Bakei katua! <sup>16</sup> Dii'ke ee noru'eria' tee naning baka be'nu'aravaing teni ninka bakiaampa ninka beekaang mono tee narung mono deempara-vaing? Tee' ee'na' Daari Meekunge minkuvumana' aa'puma, "Tenaanka tee narung mono deemparaing."

(Pupu' 2:24)

<sup>17</sup> Teka baa tee narung baka Ovoring-koo avaravaing beekaang tanuaang tee narung tanuaang deempara-vaing.

<sup>18</sup> Baari'antarariri otoriai kaukauroi oto'keta. Teing nii'ning oraka' nkonanka nkoampima tee mono-ita

taapo'ke nkoampimaung, teka naning kaukauro nkovuma tee baka bakaang mono orari-antavaramaung. <sup>19</sup> Ai' noru'ea' ee dakaang mono tee Kumponing bakaang Tanuaang bakaang pava meekava? Kumponingee te' sipuu' ee'noko te' ee'noo' otomaung. Tee ee'nara okovenung, da' deea'. <sup>20</sup> Teie tee da' pankaingee moo'ke moo'duinung napo' tororuma. Tee'koo dakaang monoi pankaing-antavei otoaing.

## Nampeesi-koo Nau-antanaare

(7:1-40)

### Paula'ke Nii'ning Niania' Nampeesi-koong Maku'uu'na'

**7** Enang ninge maku'derompini'naang tee diikaang kara daarimemuru'nung. Tampa' ee' makosi: Nanging nampeesiarava' otoaing. <sup>2</sup> Teka orara aarumo beremparimaung-koo tee, makosi, donkaani ba'aang oto'evuaingee, ee'noko manikuma ba'ung oto'evuaingee. <sup>3</sup> Ba'unge tee kapoo' nampeesi-koo bi'ari otaining pia-voko ba'aang avuaing. Tee' nari' ba'aange napo' ba'ung avuaingee. <sup>4</sup> Ba'aang baka bakaang mono tanatavarava', ba'unge deeko' makosi. Tee' nari' napo' ba'ung bakaang mono tanatavarava', teka ba'aange deeko' makosi. <sup>5</sup> Orokoraria' otoai. A'noo' oki'nung batei-koo makosi nari' karereta kunsirarema otoree'naang deeko'. Ee'noko dama'ke mono kon-teereai; dii'ka tanatarariaruko Sietani'ke paararuri'neenga. <sup>6</sup> Ninge boto siompansi minkuampa' nampeesirarii'naang, teka piarorima deeko' tee makosi. <sup>7</sup> Ninge ee' naurampimang: Nampeesirariarui dei makosi ning-pina', nka noru'ansi o'nong nii' nari' oro'nanka deea' Kumponingee naruna' naruna' nkomuru'na'koo.

<sup>8</sup> Enang ninge ee' naurampimang dii' nampeesirari-aing ee'noko naaronku: Dii' nampeesirariarui dei tampa', ning-pina' nari' otoripeu'. <sup>9</sup> Teka dii'ka tanatarariauka'nung deeko', makosi, nampeesirari-aing, karaa'ke boo' otorimaato'neenga.

<sup>10</sup> Teka ninge ee' naurampimang dii' nampeesinii'nu-ka, a'noo' Ovoringee tee' ee'na' botoruru'na' ee'pina': Ba'aang ba'ung-eta tonta'aravauka', ee'noko ba'unge ba'aang sipuauka'. <sup>11</sup> Ba'aang tonta'arara deeko' tee nampeesiarava' otoaing, nii'noo' napo' ba'ung-koo tampo'aravai.

### Nampeesi Keveura-koong: Karistoo'koong Ee'noko Karistoo' Deeaing-koong

<sup>12</sup> Nii'ning-koo Ovoringee tero boto nkoevuria', teka teing-koo ninge aa'pamaang: Nii'nung Karistoo'koo baito-nupoong-koo narung ba'aang mutaanang-koonani ee'noko teni pinka'ari otoaing deeko' tee ninka nari' otoree'naang, teie tee, teni ba'aang sipuauka'nung. <sup>13</sup> Ee'noko nii'nanie dootuu'koonanie ba'ung mutaanang-koong deeko' ee'noko tee pinka'ari otoaing deeko' teni ninka nari' otoree'naang, tenie tee,

tee ba'ung sipuauka'nung. <sup>14</sup> Donkaani mutaanang-koong teni manikuma ninka pinka'aresi tee beekaang nampeesi meeka'pari otong. Ee'noko nani manikuma mutaanang-koonani Karistoo'koonung ninka pinka'aresi tee beekaang nampeesi napo' meeka'pari otong. Ee'koo tee': Beekaang nampeesi meeka'pari otoaruko dei beurukaa' Karistoo' bakaningee biurukaa'pina' deempariarupeu'. Nka enang-pina' tee teing Kumponing bakaningee biurukaa'. <sup>15</sup> Ee'noko naring-koo naveu mutaanang-koonaveu poka'koo piavoing deeko', makosi, poka'aravaing. Poka'arako Karistoo'koonaveu tee-koo baru' noru' dai'aravauka', ai' Kumponingee tee da' mooa-koo miru'duing. <sup>16</sup> Da' ba'aang ai' da' ba'ung Karistoo' masika'antavemaung deeko', dake noru'ea' nii'nung ninka otorekotaa' tokoona' nkoarapeu'nung: Domampepeu' ai' domampearupeu'.

### Kumponing-nung Bokubokue Pe'nunturu'noo' Naro' Otoraiing.

<sup>17</sup> Nka dii' Kumponingee bokururu'ning teing nii'namurii' otooto'koo pare'dariaina' besi'eriauka', teka tee otooto' tero naruna' naruna' Karistoo'ke tankee'duri aruru'nung komperi otoriai. Aung tee boto ninge sipamaung ookara dootuu'nupoong-koo osi kante-koo.

<sup>18</sup> Nanging dopa' toto'nisi bokuvuko deeko' makosi, tee' Ju'koonung-pina' otoitaa' nanuaing. Napo' dopa' toto'paravaung bokuvuko deeko' makosi, tee' nari' Ju'deeang-pina' otoaing. <sup>19</sup> Dopa' toto' kapoo' deea', ee'noko toto'paravaung tee', kapoo' deea', teka Kumponing bakaang boto siong tee masikung. <sup>20</sup> Dii' temurii' otooto'koo otorimaatoaing naruna' naruna', Kumponingee tankee'durio' otoriko'na' te'mung Karistoo'ke bakaning deentarii'naang bokuruu'na'mung.

<sup>21</sup> Da' tero naning-koo botovotonaa' deentari otoko Kumponingee bokuruu'nung deeko' tee' otoi simpiri'anta-koong taung besi'eauka'. Teko doona simpiri'anta-koong oro'parako deeko' makosi simpiri'daravaing.

<sup>22</sup> Baa naning tee bokuvuing nii'nung bakaang botovotonaa' deempari otoko tee unaa-antavuing Kumponingee, ee'noko tee' nari' tee baa bokuvuing tenang nii'nung bakaang botovotonaa' deemparava' otoko tee Karistoo' bakaang botovotonaa' deempari otong. <sup>23</sup> Da' tee moo'duu' moo'ke. Nantoong biikaang dai'nisi deentari otoauka'. <sup>24</sup> Mmaikori' ee, Kumponing-koo ima'mariri o'noriaing te' naro' bakaang bokubokue pe'numuring-navaro-koo naruna' naruna' teke o'noritaa'.

### Nemaa' Nerai'koo Nau-anta

<sup>25</sup> Enang teing nampeesiaraiing-koo ning boto o'noa' Ovoring-eta, teka nkaang noru' arompimaang, Kumponingee piaamurai'nange naning dii'ke masika'antameriaing deeng-antamuu'nung. <sup>26</sup> Ninge tee ee' noru'amaang: Nii' enang pore' kune'ampimaung-koo o'noritaa' makosi nampeesimaria' tamung o'noripeu'nung-koo tampa'. <sup>27</sup> Arekee'? Da' da'aang



po'nunge? Teni sipeaina' besi'eauka'. Ai' da' da'aang otoaunge? Nampeainani besi'eauka'. <sup>28</sup> Da' nemaka nampee-siraravaing deeko' oraka' nkorarava'. Ee'noko nerai'na' tee', nampee-siaravaing deeko' oraka' nkoarava'. Teka teing nampeesiariaininge tee arikung kune'aavaing kansi'koo, ee'noko ninge tee' oro' kune'eri'neeng-koo tee' minkuamaang.

<sup>29</sup> Mmaikori', ninge tee naurampimang tee aung: Batei enang apuka'paring Ovoring bakana'mung-koong. Enang-eta' deto teing bii'ankaampi-po'nupoong bii'ankaampi oto'evoroaing-pina' otoroaing. <sup>30</sup> Teing biromparimatomaing birompari-aing-pina' otoroaing. Teing dotuarimatomaing dotu-aria' otomaing-pina' otoroaing. Teing moo'moo' nkoaamatomaing tee moo' nkoaava' otoromaatomaing-pina' otoroaing. <sup>31</sup> Teing nantoong kansi'koong nko-nko nkoaamatomaing teing kansi'koong nko-nko baru' aa'na' noru'ai nkoaava' otoromaing-pina' otoroaing, ai' kansi'koong avutevu' nko-nkonanka tankinuaing. <sup>32</sup> Ninge pia-antarampimang dii' baru' norunoru'koo paa'dariri otoriauka'. Tee naning nampeesiaravaing tee Ovoring bakaang mintoong-koo kake'iiari otomaing Ovoring dotu-antavuaina' pi-avoitaa'. <sup>33</sup> Tee naning nampeesiaru'nung bakaang noru' kansi'koo otomang, teni ba'aang dotu-antavuu'naang piavoma. <sup>34</sup> Tee bakaang onou tee poka'ari otong. Teni nampeesiaravai ai' nerai'na' bakaang noru' Ovoring bakaang mintoong-koo otong. Teni Ovoring bakanani oto'koo piavomaang ookavetarakoo, mono ee'noko tanuaang. Teka teni nampeesiaru'nani tee kansi' bakaang mintoong-koo noru' otong, tenie ba'ung dotu-antavumaatoo'naang piavoma. <sup>35</sup> Ninge tee aung dii' ee'ning dii'ka paku-koo naurampimang, dii' poterampii'naang deea', teka tampa' toosirariri otorii'naang, mataa'irariri Ovoring-koo, tunsi paakararia'.

<sup>36</sup> Nii'nung naninge ee' noru'ui dei: nani manikuma nampeesi-koo kariviri'ai piokang napu'nisi tamung panka'koo makosi deea' nampeesiarava', ee'noko teie nari-antavuaing nampeesi-koo pakuvitaa' tee, tee makosi, piavoaina' nkovuaing. Teie tee oraka'nko nkovua' nampeesi-koo miru'uma teni. <sup>37</sup> Nii'na' napo' ee': naninge ninge minkuamana' aroo'ui dei, ee'noko tee' nari' nko-koo piavoi dei, tee' tampa'ke, teni nerai'na' nampeesiaravai tarevuaing. <sup>38</sup> Tee tee-pina': Tee naning teni baurang nampeesiaravaing-koo pakuvumaung tee, kapoo' tampara teie nkovumaung; teka napo' tee naning teni tanatavumaung nampeesiaravaruko teie, tee kapoo' baru' tampara masikung nkovumaunge.

#### Naaronku-koo Nau-anta

<sup>39</sup> Teni ba'aang tee ba'ung-koo bi'ari otong tenang tee domampari otoko, teka tee ba'ung boo'pari dei teni tee makosi napo' nampeesi-koo piavoaing ninka Kumponing-koo kuunge. <sup>40</sup> Teka teni deto basinoo' dotuari otopeu' teni nampeesiarava' otoi dei. Aung tee nkaang noru', ee'noko baru'noo' ee' noru'ansi o'nong:

Ning-koo Kumponing bakaang Tanuaang otoko minkuamaa'nomaung.

### Taamang Kumponing Tositosinanka-koo Darimpaamaung-koonare

(8:1-10)

#### Norukasi'nukai Boonko Otoroi Teing Nii'ning Orari-aavauka' Bio' Maa'aama

**8** Enang tee kapoo'nanka kumponing tositosananka-koo darimpaamaung: Nii'ke tasi'pampiri otong tee' dii'ke aa'perimaung-koo, "Nii'ke tee-koo noru' deto basi kompampiri otong siompampipeu'nung." Teka teing noru' deto basi narung siompaamaing teing tamung bii'ka daangamparimaing. Piaae deeko' nii' nara'ka puring-antameeripeu'. <sup>2</sup> Naninge baka daangamparama ee' noru'upeu'nung: "Ninge ootukunung kapoo' noru'ansi otong." Nka tee teie noru'ua' tee' Kumponing pia-antavui otoina' teie noru'koo. <sup>3</sup> Teka naninge Kumponing domange dai'ui dei Kumponing tee bakaang naning tasi'pui noru'umaung.

<sup>4</sup> Enang tee, arekee' noru'ampii'naang tee boontunang-koo Kumponing tositosananka-koo akovitue darimpaamaung-koo? Makosie nii'ke nai-koo? Nii'ke aa' tee noru'ampiri otong kumponing tositosanankai kapoo' basi-antavaava' ookara kansi'koo, ee'noko amutemurii' kumponing otoroa', teka narung masikung Kumponing otong. <sup>5</sup> Nantoonge tee, a'noo' aa'paamaung: Kumponinanka otorong ookaanka-koo paning ee'noko kansi'koo, mmou'nanka ookeng kumponinanka ee'noko ovontunanka. <sup>6</sup> Teka nii'koo tee narung masikung Kumponing otong, tee Niuma. Ee'nara-ita ookara kapoo'nanka tavo'aramaung, ee'noko nii' tee-koo o'norimaunge. Ee'noko tee tee narung Ovoring otong, Jiisuu' Karistoo'. Tee ee'nara ookara kapoo'nanka teie pomaung ee'noko nii' teie domamariri o'noring.

<sup>7</sup> Nka tee ookarai nantoonge aung amurii' noru' noru'aava'. Nii'ning tee nantoong dii'koo-nupoong aruaru'nanka teroita, temeng-koo datavoroi otoromaung, taamang daring mme' masika'antavai otong. Ee'noko teinge temurii' naiaama pankaruntoonge tee noru'aripeu' oraka' nkoarimaung. <sup>8</sup> Taamange tee, bane aremurii'ke, Kumponing-aape be'antamuriauka'nung. Nii' naiampiarui dei doonko si'mariarupeu' Kumponing-koo. Ee'noko naiampiri dei deto si'mariarupeu' Kumponing-koo. <sup>9</sup> Tanatarariai dii' purintaririning, naierima teing dii'koo aruaru'oro'i otoroining orari-antaverereri'neeng. <sup>10</sup> Tee ee'pina': Naninge boontunang-koong taamang nai-koo oraka' noru'umaunge tee da' oorupeu' boontunang naiaamanava-koo naikiko temurii' boontunang-koong taamang daang pina' noru'ei. Ee'noko teie oorura piavora paararupeu' bane pankaruntoonge oraka'pina'

noru'uitaa'. <sup>11</sup> Tee' nkorarako dakaang noru'ke tee orari-antavupeu' tee da'maiko' aruaru', Karistoo' tee-koo bou'nung. <sup>12</sup> Nii'ning nii'maikorori'koo tunsie noru'arimana' siong-koo pore'oromaung, ee'noko bikaang tunsie noru'arimana' daang-antavariaina' nkoverima dake tee Karistoo'koo oraka'nko nkoveing. <sup>13</sup> Tee'koo tee teie taamange mmaiko' dua'antavu-peu'nung-pina' ooama ninge maa' ampauka'nung tee bio', tee ntara'ma'nung dua'antavami'neenga.

**Paula'ke Boonko Otoi Moo' Kerempuu'na' Biikaang Baito Paku-koo**

**9** Enang tee, ninka tee' orokomarako dii'koo nii'ninge tokomeriko tee aa'pamaang: Arekee', ning ee naning pankaing deea'? Ning ee kara-okomui-nka deea'? Ninge ee Jiisuu' Karistoo' ooampa'? Dii' ee sinananka deea' nkaang nko-nko-koo tee-koo Ovor-ing-koo? <sup>2</sup> Ning nii'ning-koo kara-okomui-nka deeaung deeko' ning tee dii'koo sira'mari o'nopeu'nung ning Kumponing-koo kara-okovui-nka, dii' dootuu'nupoong deentariu'nung-koo, ning taaramerira. <sup>3</sup> Nkaang karadimpa' teing ning tokomaamaing-koo aung: <sup>4</sup> Arekee'? Ning ee taura'marava' dii'ankoa taamang-koo nai-koo ntong tovang-koo? <sup>5</sup> Ning ee taura'marava' dootuu'koonani nampansira nari' nanu'koo tee' Piita, ee'noko Ovoringe baara'mainkaang ee'noko nii'ning kara okovuri nkanuka nanaamana'? <sup>6</sup> Arekee', nee' Baanabas naanka nanaankai kemurii'ka nko-nko nkoampematoainge mono bau'koonge manta'pario'? <sup>7</sup> Baa naning tee piatooronuka~koong tavu'koo nanuma taamange baka bau'aramaung? Baie tee taamang keempuma sinang nkavuaung? Baie tee naning kau'karenaumo-navontu bau'urimaung baka maa'kua'? Otoa'. <sup>8</sup> Ee'noko nantoong biikaang noru' narung tee' minkuamaang ee' A, Moosesi-nung botoi tee' nari' napo' minkuvui otomaung. <sup>9</sup> Ee'pina' daariari otong,  
 "Boromaka'koong muring dai'eriauka' uite'koong~ sinang kau'ke ke'dee'koo botoverima, tee-koo uite'koo maa'kuaina'."

(Boto 25:4)

Kumponinge ee boromaka' narung noru'uitaa' tee' minkuvuu'? <sup>10</sup> Nii' ee tee' minkumuria'? Tee aa' nii' minkumurima tee' daari-antavuu'nung. Ai' tee naning kansi'meemeng tee sinang nkavuaina' noru'uitaa' tee' meemeng-koo makosi. Ee'noko tee naning sinang-bire' tee sinang-koo nii'nariong nkavuaina' noru'uitaa' bire'koo makosi. <sup>11</sup> Tee tee enang ninge Tanuaang bakaang kara dii'koo keempansi dei, arekee', baru' ee aa'na' manki'dori noru'erimang ning pakumeripeu'na'koo? <sup>12</sup> Nii'ninge dii' ee' noru'daariko, "Nii' bakei bau'maarii'naang," ninge tee' nari' baru' deto basinoo' noru'dampipeu'. Nka tee ninge bane makotui'o' tee nkomarava'. Ninge arikananka bane tokoonamurii' doonko tamung meu'pamaung Karistoo'koong doorenang tampara arika'antavami'neeng-koo. <sup>13</sup> Dii'ke ee noru'eria' teing Kumponing bakanava-koo mintoomparimaing teing tee, tee taamang teva-

ita nkavamaung? Teing boontudomai mintoomparimaing tee, taamang-koo biikanariong napo' tevaro-ita nkavaamaunge. <sup>14</sup> Tee'koo Ovoringe botomuru' nii' bakaang kara tampara nkavampiri daankiampimaing niikanariong teka tee-koo doorenang tampara-koo nkakampiaing.

<sup>15</sup> Teka teing aing ning-koo makosining tee ninge nkavampa', ee'noko ninge aung nka-koo tampama daariampa'. Makosi, ning moompaing nkavampa'. Naninge daang-antamuauka'nung ning daangamari-na'koo. <sup>16</sup> Tee, ee': Ninge daankiama tee doorenang tampara tee, tee kapoo' ning daangamaravauka'nung tee-koo. Tee, nii'navung taung o'noa', aung tee daanki-nang nkoamaa'noaing. Tee doorenang tampara daankiamparui dei ning tee baru' oraka' tora'pampeu'. <sup>17</sup> Aung amurii' nko-nko aroo'ansi nkoampaing deeko' teie tampa' maku'muaing, teka aroo'amparuko etumuio' nkoampaing deeko' tamung nkoamaa'noaing moo'dopa. <sup>18</sup> Ai' ning aremurii' moo' kompampaing? Tee aa' nkaang moo' ee' oro': tee kapoo' ninge nka-koo makosi karakara tampara-koo tee ninge nkavamparu-ing. Tee kara tampara ninge daankiansing kapoo' otoaruung. Tee tee ee'nara nkaang moo'.

**Paula' Baka Avarako'na' Ookara Nantoong-koo**

<sup>19</sup> Ning moo' nkavama naning-koo botovotonaa' deea', teka ning ninka ootukunung biikaang botovotonaa' deeng-antamaramaung nantoong mmau' Karistoo'koo baramparama'naang. <sup>20</sup> Ju'nupoong-ankoi tee ning Ju'nung deemaramaung Ju'nupoong baramparama'naang. Teing Moosesi-nung boto-koo kuung otoromana' ning tee' nari' tee boto-koo kuunung-pina' deemaramaunge teing baramparama'naang, bane tee ning tee boto-koo kuung o'noa'. <sup>21</sup> Ju'deeeing baramparama'naang Moosesi-nung Boto-koo dama'due otoromaing ning tee tee boto-koo dama'dunung-pina' deemaramaung. A'noo' tee Karistoo' bakaang boto-koo kuung deemari o'noitaa' Kumponing-nung boto-koo dama'due o'noaung. <sup>22</sup> Aruaru'oromaing-ankoi ning tee' nari' aruaru'momaunge teing baramparama'naang. Amentemeng-koo bere'maramaung aa'pama, "Makosina' nkomarama nii'ning baramparamaina'." <sup>23</sup> Tee ookara kapoo'nanka ninge nkoa-maung tee bereng-anta-koo tee doorenang tampara, tee-koong biraanke mmau' ninka nari' kompampii'naang to'bii-antamaramaung.

**Nii' Ookara Boonko Noru'mariri Taremariai Moo' Pan-ing-koo Nka-koo**

<sup>24</sup> To'bii-anta tee kapoo' masikung, ai' dii'ke ee noru'eria' teing nantoong kua'parimaing deikoo'koo tee kua'parimaung namu', teka narunge moo' nkavumaung. Tee' nari' kua'dariaing moo'koo nkakiriaina'. <sup>25</sup> Ookara moru-nupoong tee paaravarimaung bii'ka tampa' tanatavarii'naang ootukunairu-koo. Biikaang moo' tee tamung baa'koong baakopo, da'deng mara'omaung; teka niikaang moo' tee pankaroonge

oto'. <sup>26</sup> Tee'koo to'bii-antamari ning kua'maramaung. Ning tamung auvi'au ki'bitu bai'ampaung, meu'pansi naro'. <sup>27</sup> Nkaang mono doonko si'mari meung-antama-ramaung Karistoo'ke bamuu'na' oto'koo aa'pama, "Dama'ke ninka dua'mara'neenga nii'ning daankiarankotaa'."

**Tampa' Taremaria' Domaang Dua'ampi'neeng  
Ju'nupoong-koo Nkoaru'na'**

**10** Enang tee mmaikori', ninge noru'an-tarampii'naang dii' piamoing teing niumaraang Isireeli-nupoong-koo nkoaru'na' tasi'perii'naang. Teing ookara kamo'ka boonge nanau'ning, ee'noko ookara pirung meu' toto'pai tankinau'. <sup>2</sup> Ee'noko tee kamo'naanka-koo pirung kuunge nanau'ning miru'hoo' tee ookara tee' meeka'antavariru' Moosesi-koo kuung-nupoong deemparima. <sup>3</sup> Ee'noko arikanameensi'ke nanaama taamang tovang ntong otoa'naameensi'ke ookarai taamang tee narung Tanuaang-etaing naiaako'. <sup>4</sup> Ee'noko ookarai teri nari ntonari Tanuaang-etanari naiau', teieta boia' Tanuaang-aapeita tuuvuko. Ee'noko tee enang noru'ampiri otong tee boia' tee Karistoo' ee'nara teing ninka nanaako'nung. <sup>5</sup> Nka, bane ookara biraanke-po'nupoonge, daping ookara-koo teing-koo Kumponing tee dotuaravaruko' biikaang aarumo orara-koo, ee'noko nanaama avitoitoi booroma biikaang mono dera'oroko' mee'bora' sirakamaa'koo.

<sup>6</sup> Teing ee'ning kapoo' nkoaru'ning teing taa'ni'anta nii'koo nii' koono-anta-kooning oraka'nko pi-amori'neeng-koo teing-pina'. <sup>7</sup> Tee'koo kumponing tositosinanka daangamperereria' otoaing teing-koo nii'ninge nkoaako'na'. Daari Meekunge tee naumuri-maung teinge kumponing tositosinanka siong-koo bareariko'na' aa'puma,

"Teing nantoong paroro pankaing nkoaama, taamang ntong tovang naiaama, donkonaarai'nange moruarima siong-antaveeko'."

(Toro 32:6)

<sup>8</sup> Ee'noko kaukauro nkoariauka'nung. Teing-koo nii'ning tee' otorokotaa' kenaanka kivora-ita beenaumo kokorei' [23,000] dua'arira boorou'. <sup>9</sup> Ee'noko nii' Karistoo' iirang-antana' nkomariauka'. Teing-koo nii'ning tee' nkoarikotaa' booroko' boru'ke kakiaariko. <sup>10</sup> Ee'noko ukuusirariauka' Kumponing pakururiaung-pina' tantarima. Teing-koo nii'ning tee' nkoariko'ning Orari-antai boo'antavuru'. <sup>11</sup> Aing teing kapoo' teing-koo nkoaru'ning nii'ke oo-koo taa'ni'antananka, Kumponing daari-antavuu'ning koono-antamurima nii' asi'naroong-koo o'noring naumurima tutuna'nupoong nkoarima opariru'na' biikanaroong-koo. <sup>12</sup> Tee'koo nauramaang, da' purintari donkonii otomaung-pina' noru'dari deeko' bakei tampa' masika' tanataravaing dua'dara'neeng-koo. <sup>13</sup> Teka tenang kapoo' arikung deeko' ai' orara aarumo-koong pi ai meu'duko deeko' ee' noru'eaing: da' ookara paara-anta puru'koo makosi. Mmau' da'koo uro'nupoonge nantongge temurii' paara-anta kune'au'nung.

Kumponing bakaning sipuriaung, ee'noko teie tee paara-anta taura'puauka'nung da' puru'koo, teka tenang paara-anta poko teie tee da' puring-antaruang mmari'navung nauruma.

**Ovoring Bakaang Taamang Ma'nari Biikaang Ninka  
Pitueriauka'**

<sup>14</sup> Tee tee mmaikori' ee, baari'antarariri otoriai kumponing tositosinanka siong-eta. <sup>15</sup> Ninge daaria-mang dii'koo dii' onou-po'nupoong noru'dampima. Tasi'peri pinka'erai kapoo' ninge naurampimatomaung dii'. <sup>16</sup> Tereng biraanke-nareng biraanke-antavampima-nareng ee nii' naro'kamuriaunge tee ninka ereng Karistoo' bakaang ninka? Tevio' taamanavio' pisi'meerimanavio'ke ee naro'kamuriaunge Karistoo'koo mono ninka nari'? <sup>17</sup> Tee aa' naro'kamurimaung, ai' tevio' tee navio' masakavio'. Bane mmou'ke nii', narung mono deeng-antamurimaung naro'ke tevio'ke pisi'meerima ookara. <sup>18</sup> Oovereriaing teing Isireeli-nupoong Kumponing siompaamana'. Tenang taamang naiaama Kumponing-anko boonturomai darimpaamaung, arekee', Kumponing ninka ee teing naro'kavariaung? <sup>19</sup> Enang arekee' miru'ari otong? Kumponing tositosi ee kapoo' masakung? Ai' tee kumponing tositosi-koo darimpaamaung ee kapoo'ke? <sup>20</sup> A, tee' deea'. Tee ninge minkuamaatomaung kapoo' tee teing Ju'deeeing boontuarima, Daari Meekunge minkuvui otoa'na' aa'puma,  
"Teing ma'nari-koo boontuarimaing, Kumponing-koo deea'."

(Boto 32:17)

Ee'noko piamoa' ma'nari ninka pisi'deerii'naang. <sup>21</sup> Dii' tuaantariauka' ookarenta-ita, aa'noko Ovoring bakanareng-eta ee'noko ma'nari biikanareng-eta. Tee' nari' napo' ookavaako'ka-ita nari' taamaniriauka', aa'noko Ovoring bakanavaako'keta ee'noko napo' ma'nari biikanavaako'keta. Tee' makosina' deea'. <sup>22</sup> Arekee', Ovoringe iirai uipaarii'anta-koo piamori-maunge? Arekee', nii' tee-koo ee dau basinoo' iirakutanankai?

**Piaa Siompampiri Tanatamariaing Karistoo' Bakana'  
Paaravampima**

<sup>23</sup> Dii'ke aa'perimaung, "Amutemurii' kapoo' taurapari otong nii'ke nko-koo." Nka tee, ookara kapoo' pakupaku-po'nung deea' nantoong-koo. Amutemurii' kapoo' taurapari otong nii'ke nko-koo masika', teka ookara kapoo'nankai puring-antamuraung. <sup>24</sup> Naning baka tanatavarama otoauka'. Ookara tee naruna' naruna' tanatameeriaing tampa' oto'koo. <sup>25</sup> Tee ee'pina': Kara otoaruko deeko' kapoo'nanka baaveroma baaveavaining tee makosi, naieriaing, nka nia'kiria' boontunang-koo darinii'pina' norunoru'erima. <sup>26</sup> Ai' "Ootukunung kansipo' tee Ovoring bakaang."  
<sup>27</sup> Ee'noko da' naning masika'anta oto'evuaunge bokuruko nanu'koo piarora deeko' makosi, naieaing ookara kapoo' aruaining nia'kia' boontunang-koo darinii'pina' norunoru'era. <sup>28</sup> Teka nii'ning naning

aa'duko deeko', "Aung kumponing tostitosi-koo darinii," tee, tee'puko naieauka'. Tevunge tee naning bakaang masika'anta orariearupeu' ee'noko bakaang domang mooavari otopeu'. <sup>29</sup> Ninge da' dakaang domang minkuampa', tee bakaang domang minkuamaang. Bane nia'kia' naiemaung, nii'nunge ooruma oraka' noru'du'neeng. <sup>30</sup> Ninge tee naiamira deeko' Kumponing-koo tampara tampampeu', teka naiampauka'nung. Piamoa' nii'nunge ning oraka' noru'muu'naang. <sup>31</sup> Tee'koo taamang-koo naikima ntong tovang-koo, aming kapoo' nkoveaing-koo, nkoveaing ootukunung kapoo' Kumponing pankaing-anta-koo. <sup>32</sup> Nii'nung naning dua'antaveauka', arera, Ju'nung deeko', Ju'deeaing-koong deeko' ai' Kumponing bakaning dootuu'nupoong-koong deeko', tee' nari' ookara nantoong ninge dotu-antavaramaung avuntevunge. <sup>33</sup> Ninka paku-koo besi'marava', teka ookara nantoong paku-koo moo'arii'naang.

**11** Barerariaing ning-koo ning Karistoo'koo baremaramana'.

### Dootuu' Tampa' Nkona' Ee'noko Avuavu'nanka Tanuaang Meekung-etaning

(11:2-14:40)

#### Nantoong Baarong Kuruna' Dootuu'koo

<sup>2</sup> Dii' teing tampenanka tantampimaang ning norunoru'merimaung-koo ee'noko tee naurampiru'nung aarumo tampa' ima'eri otomaung-koo. <sup>3</sup> Teko ninge dii' pia-antarampimang tee Karistoo' noru'erii'naang tee tee Bore' ookara donkaang kante-koo, ee'noko donkaani tee manikuma-koo bore', ee'noko Kumponing Karistoo'koo bore'. <sup>4</sup> Baa donkaani kunsiaravaing nii'na' tarampeearavaing~ bore' daka'paritaa' tee tee Karistoo' dore'ua' otong, bakaang Bore'. <sup>5</sup> Nii'nani manikuma oosirarimanoo'ke kunsiarapeu' nii'na' tarampeearapeu' bakaang bore'koo baarong maniku'koo makosina' kurumpara-va' tenie tee ba'ung dore'ua' otong, tee bakaang bore'. <sup>6</sup> Teni tee teni-pina' nari' dapo kaariarinani-pina' maia'po'nani. <sup>7</sup> Nii'nani manikuma bore'koo baarong kurumparavarupeu'nani makosi, dapo opui napu'arapeu', teka kaariari oto'koo maia'opeu'nung deeko' makosi maniku'koo makosina' baarong kurumpara-vaing napo', bore' daka'pui. <sup>8</sup> Donkaani tee bore'koo baarong kurung-koo makosi deea' dootuu'koo oosirarimanoo'ke, ai' teie tee tavo'antavumaung Kumponing bakaang oro'oro'na' ee'noko tee meenasi bakaang; teka manikumai donkaani bakaang meenasi tavo'antavumaung. <sup>9</sup> Tutuntoma tee donkaani manikuma-ita Kumponingee nkovua', teka manikuma donkaani-eta nkovuu'. <sup>10</sup> Donkaani tee Kumponingee manikuma nkovua', teka manikuma Kumponingee donkaani nkovuu'. <sup>11</sup> Tee'koo manii'koo bore'koo baarong kurumparimatoaing taa'ni'anta-koo donkaani deto deeng-an-

tavui, ee'noko koosinunankai ooaama dotuarimatoai. <sup>11</sup> A'noo' tee ee'koo: Manikuma donkaani-eta tonta'arava', napo' donkaani manikuma-ita tonta'arava' Kumponing bakaang aarumo-koo. <sup>12</sup> Tee' nari' manikuma donkaani-eta nkovuu'na'koo napo' tee' nari' donkaani manikuma-ita ponto'aramaung, nka aing ookara teing Kumponing-etaning. <sup>13</sup> Dii'ka-koo arekee', oosirarimanoo'ke bore'koo baarong kurumpara-va' manikuma ee' kunsiarapeu' Kumponing-koo, makosie? <sup>14</sup> Enanaroong-koo nii'ke nantoong-koo nkoaramana' ooampima dei tasi'pampipeu' makosina' ee': Narung donkaani dapo isikung otoi tampa' deea', ee'noko nani manikuma dapo isikung oto'evuitaa' tee tampa', ai' tee tee bakaang meenasi. Aming-koo, nna' Kumponingee tee dapo avuu' bore' daka'koo. <sup>16</sup> Baa nii'nung naning minkuminku-koo piavoko ee' naurama'naang, "Nii'namurii' aarumo oto'memuria', ee'noko Kumponing bakaning dootuu'nupoong osi kante-koo oto'evoroa'."

#### Ovoring-nung Taamang Siivenke'deeri Nai-koo Oraka'

<sup>17</sup> Naurampima aing botovotonanka napo' narung tuumpi oto'memung ninge minku-koo ee': Dii' nara'darima oraka' nkoverimatoininge tampanananka daka'purimatoai. <sup>18</sup> Tutung tee taaravansieeng dii'koo tankatankaang otong tenang dii' dootuu'koo nara'darima, ee'noko ninge masimasika'antavamang. <sup>19</sup> Aming-koo, nna' aarumo tankatankaang tee masika' tavo'kuaing dii'koo tasi'pampiaina' baata areing masika'pariri otong. <sup>20</sup> Tee tee taamang dii' nai-koo nara'darimaung Ovoring-nung tamperima Ovoring-nung taamang deea', <sup>21</sup> ai' tee tee nariona' dii'ka naierimaung ee'noko tee'koo nii'ning peeravorokoo' ee'noko nii'ninge naiaamatoma kanu'antavarikoo'. <sup>22</sup> Arekee', osie diikanoo'ke taamang ee'noko ntong tovang ee' naieriarupeu'? Kumponing bakaning dootuu'nupoong ee' oki'na'anta-koo piarorimaunge, ee'noko ata'oi'nuka maia'anta-koo? Are'dampii'naang ninge; daangantampii'naang? Bakei, katua' tee'koo.

#### Ovoring-nung Taamang-koo Ovoringe Paula' Nauvuu'na'

<sup>23</sup> Tee pare'naanta ninge naurampiru'nung Ovoringe baka po'antavuu'nung. Te'mung muunga Judasie tooka kompura kare-nupoong-koo sivuu'na'mung Ovoring Jiisuu'ke berete' nkavura, Kumponing-koo tampa', tampura tenang pisi'uu' ee'noko aa'puu', <sup>24</sup> "Aung tee nkaang mono makosi dii' nee'dampima boo'koo taura'maring. Ee' naierima ning noru'merimatoaing." <sup>25</sup> Taamang bakearako tee tee' nari' napo' tereng uaini-po'nareng nkavura aa'puu', "Enang-eta deto areng-koo naikirima ee' noru'merimatoaing, ninge Kumponing ninka nerakung kara naroong-anta nkaang erenge pinka'antavantu'nung dii' domantarii'naang." <sup>26</sup> Tenang naierima aung berete' ee'noko tuaantarima areng-eta' dii'ke sira'perimatoaing tee Ovoring dii'koo boo'paru'nung painoo'ke basi.

### Ovoring-nung Taamang Naning Nariarava' Naivuaing Tee Tora'puaing

<sup>27</sup> Tee tee enang naning tee berete' naivuaing tuaam-parama tereng-eta Ovoring bakanareng-eta makotua'na' nkovuma tee tee tuumpivuaing mono-koo ee'noko ereng-koo Ovoring bakaang-koo oraka'nko nkovuing-koo. <sup>28</sup> Naning tee tutung baakeenearavaing baka mme' naivua' bakanavio' berete'koo ee'noko teru' tereng-eta. <sup>29</sup> Ai' tee naning Ovoring bakaang mono tampa' tasi'pua' naivuaing tee tee baka orari-antavaravaing tee-koo naivuing-koo. <sup>30</sup> Tee'koo ee'na'koo mmou' dii'koo-nupoong aruaru'oromaung ee'noko sipavorokoo' ee'noko mmou' boo'parikoo'. <sup>31</sup> Tutung dii'ka tampa' simpesimpe'daripeu'ning deeko' teie orameng-koo simpe'duriarupeu'. <sup>32</sup> Teka Ovoringe orameng-koo simpe'durima tee, teie koong-antarurimaung baurukaa'pina' asi'noo'ke dii' kiimata-nupoong tanturi'neeng-koo kansin'upoong ninka nari'. <sup>33</sup> Tee'koo mmaikori', taamang-koo naro'darima tampa' navurariri tata'deeria' naierimatoai. <sup>34</sup> Nii'nung peeravoko osie taamang-antaverimatoai diikaang naronaro' kiimata-po'nung deempara'neenga. Dama'ke mora napo' nii'ning naurampiaing.

### Avuavu'nanka Tanuaang Meekung-etaning Avutevu'ari otoina'

**12** Enang dii' mmaikori', ninge dii' noru'koo pia-antarampimang teing kapoo'nanka Tanuaang-etaning avuavu'. <sup>2</sup> Dii'ke noru'eri otong tenang dii' mutaanang-koo otoriko'nang Kumponing tostitosinanka siompereri poorarima noru' masikung nkaveriaruko'. <sup>3</sup> Nka tee dii' enang sirapo'aaperaririo' naurampimang Kumponing bakaning nantoong masikung tasi'pererina'. Nii'nung naninge Jiisuu' barakosi'koo tampuko noru'eriaing tee naning Kumponing bakaang Tanuaang-eta karoaung. Ee'noko naninge Jiisuu' tee Ovoring tampuko noru'eriaing tee naning Tanuaang Meekung-eta karomaung, ai' naninge tamung tee' minkuvuarupeu'. <sup>4</sup> Teing mmou' Tanuaang Meekung-etaning avuavu' otorong, teka Tanuaang teing avurimaung tee narung masikung. <sup>5</sup> Teing nko-nkonanka tee amutemurii' otorong, teka narung masikung Ovoring Jiisuu' Karistoo'. <sup>6</sup> Napo' nii'ning otorong amutemurii' iri' Kumponing-etaning mintoomparimaing, teka Kumponing tee narung masikung teing kante-koo mintoomparamaung. <sup>7</sup> Tanuaang Meekung bakaning nantoong-koo ookara-koo kante avutevu'ari taa'ni'antavaramaung, pakueea'naang. <sup>8</sup> Nii'nung-koo Kumponing kara matau-po'nung makosi-antavumaung Tanuaang Meekunge. Nii'nung-koo kara noru'po'nung avumaung teie narunge Tanuaange. <sup>9</sup> Nii'nung-koo arikung kune'uko masika'anta deto basi avumaung teie narunge Tanuaange. Nii'nung-koo Tanuaang-etaing avuavu' siipa-po'nupoong taare-antakoonung avumaung teie narunge Tanuaange. <sup>10</sup> Nii'nung-koo nko-nko deto basi nko-koong avu-

maung. Nii'nung-koo tarampee-koong avumaung. Nii'nung-koo iri'nanka Kumponing-etaning ee'noko oreng simpe'koong noru' avumaung. Nii'nung-koo Kumponing kara tasi'paa' meneng-koo sipumaung minkuvuu'naang. Nii'nung-koo napo' oovunara tasi'paa' menenge kara bere'koong noru' avumaung. <sup>11</sup> Aing teing ookara narung Tanuaang bakaning nkonanka. Teie ee'narai tankaampumaung naruna' naruna' kante piavomana'.

### Dootuu'nupoong Teing Avutevu'ariri Narung Monopina' Be'nu'nii'nuka

<sup>12</sup> Tee ee'pina': Naninung mono tee avatevaropo'nung, nka teing avatevaronanka tee narung mono. Karistoo' bakaang mono tee' oro'ke. <sup>13</sup> Bane nii' Ju'nupoong nii'noo' Ju'deeaing, dai'nisinuka nii'noo' dai'ariaing, nka tee narung Tanuaang-koo kuunge meeka'antamariru'nung-koo tee nii' narung mono deemariri otong ee'noko tee ookara narung Tanuaang okomuring makosina' iri' nka-koo. <sup>14</sup> Naning-koong mono nari' oro' deea', nka tee avatevaro. <sup>15</sup> Kau'ke deeko' aa'pui dei, "Ning aa' bireng deea', tee'koo ning mono-koo-navio' deea'," teie temurii' karai tee monoitabita'aravarupeu'. <sup>16</sup> Ee'noko dome'ke deeko' aa'pui dei, "Ning aa' duta deea', tee'koo ning mono-koonavio' deea'," teie temurii' karai ee' temono-ita bita'arapeu'? Otoa'. <sup>17</sup> Ootukunung mono duta narung deempari dei, taara-nko are' otong? Napo' ootukunung mono dome' narung deempari dei nuuraa'nko arerai? <sup>18</sup> Nka tee masika'pari otoina' ee': Kumponing avitevio' be'nu'uring kantena' narung mono-koo tee' nari' nii' narung mono-pina' oto'koo bamuru'na'. <sup>19</sup> Ookara mono-koo namaranoo' naro' otoi dei, arekee' mono tampampipeu'? <sup>20</sup> Nka tee masika'pari otoina' ee': Avatevaro otong teka narung mono tee. <sup>21</sup> Dutai aa'puarupeu' bireng, "Ning da' piamoa'." Napo' bore'ke kau' tee'puarupeu'. Katua'. <sup>22</sup> Nii'nairu mono-koo aruaru'nairu tampampimanairu tee tenairu-koo makosina' nkovupeu'. <sup>23</sup> Ee', nii' dotumarimaung otoko nii'nairu mono-koo oraka' oonairu, ee'noko tee tampa' masika' nepu'mariri duanamaramaung oo-koo makosinairu deea'nairu. <sup>24</sup> Teka tee tampa' oonairu baru' tanatavampaing. Tee' nari' Kumponing mono be'nuve'nu'uu' nepu'arava'nairu nepu'ui. <sup>25</sup> Tee'koo tankatankaang otoaroo'naang mono-koo, teka navarona' mono tampa' tanataveeai nari'. <sup>26</sup> Nii'navaro mono-koo sisikeeravoko tee ootukunairu nari' tora'paavaing. Navaroi daangang nkavuko deeko' ootukunairu nari' dotuaraiing. <sup>27</sup> Enang tee dii' Karistoo'koong mono, naruna' naruna' avatevaro otoring. <sup>28</sup> Ee'noko Kumponing bakaning dootuu'nupoong-koo aing ee'ning miru'uru': tutuntoma teing kara okovuri nkanuka, kemu'kana' teing nakaroarimaing~, beemu'pina' teing kapoo' Kumponing-etaning naunuka, teketa teing iri' ninka nko-nko nkoaamaing, teketa teing Tanuaang Meekung bakaang avuavu'po'nupoong siipa-po'nupoong taare-anta-koong, teing nko-nko pakupaku-po'nung nkoa-

maing, teing nko-nko tampa' tankampaamaing nantoong-koo, ee'noko teing kara tasi'paa' oovunara menenge kareaamaing. <sup>29</sup> Arekee', ookarai kara okovuri nkanuka naing ee? Ai' ookara ee nakaronukai? Napo' ee ookara kara-naunukai? Ai' ookarai ee iri' ninka nko-nko nkoaamaing? <sup>30</sup> Ookara ee tee avuavu' taare-anta-koong oto'evorong? Ookara ee oovunara menenge kareaamaing? Ookarai ee kara bere'aa-maung? Otoa'. <sup>31</sup> Teka paaraveriaing tee Tanuaang Meekung bakaning avuavu'nanka pankeng masakeng nka-koo. Ee'noko ampa'doriauka' piaanaung navunge avuavu'nanka kong-koo makosi.

### Piaa Ninka Makosi Kumponing-etaning Avuavu'nanka Kong-koo

**13** Piaa tee kapoo' masakung ee' oro': Bane ning karompeu'nung dei teie karakarai amute-murii'nankai ookenge nantoong biikaange ee'noko koosinunanka biikaange, teka piaa o'noarui dei ning-koo, ning tamunsi'nung kareng kenkorinumaung-pina', tankeri' aako keeiinumaung-pina'. <sup>2</sup> Ning oto'memupeu' avuavu' tarampee' koong ee'noko ookara kapoo' makensi'ning noru'ampeu'nung-koong ee'noko ookara kapoo' opansi noru'koong, ee'noko tee masika'anta iu'nanka tonta'koong makosi oto'memupeu', teka piaa oto'memuarui dei tee ning kapoo' deea'. <sup>3</sup> Nii'noo' ata'oi'nuka bau'arama kapoo'nanka o'marapeu', nii'noo' nkaang mono amarapeu' arikung kune'koo daangang nka-koo, teka piaa oto'memuarui dei, kapoo' nkavampeu'nung otoa' tee-koo.

<sup>4</sup> Piaa tee oraka' nkoaako da'deng maku' deeaung; <sup>5</sup> Piaa tee nantoong tampa'nko, mamairo deea'; <sup>6</sup> Piaa tee baka daangang deea', nantoong baa'pina' noru' deea', makotua'na'nko deea', baka nii'ning puru'na' besi' deea', iirankesi' deea', orananka-koong deeru tarevua' otoo'naang, mero' noru'uaung, dotuaravaung orara-koo, teka doturotuarakoo' kara masakung siompaamaing ninka. <sup>7</sup> Nii'ning naning piaavema deeko', bane aming kapoo' tavo'kuko, dake doong kante sipeauka'nung tee, tee masika'anta-koo piaromaatoaing, tampa' nkoaravaing-pina' noru'emaatoaing, ee'noko purintari tee paku-koo otomatoaing.

<sup>8</sup> Piaa tee doong kante makotui otomaung, teka tarampee-koong karananka deeko' teing bakearavaing. Oovunara menenge karananka deeko' teke oparavaing. Kara noru'po'nung deeko' teke botu deemparavaing. <sup>9</sup> Tee avuavu' noru'koong nkavampimana' dupearavaung, ee'noko tarampeemarimana' dupearavaung. <sup>10</sup> Teka ookara kapoo' masikananka dupeariri oro'pariko, teing kapoo' dupeariaing piamoriauka'nung. <sup>11</sup> Tee ee'pina': Tenang ning tooto'mari ning tooto'pina' karonko', tooto'naunge noru'anko', ee'noko tooto'pina' taarakanko'. Enang tee pan-ka'marara tooto'pina' napo' nkomarava'. <sup>12</sup> Nii'noo' ee': Enang nii' tee' ookampimaung uu'aa' paparo-koo ookampipeu'na', teka dama' oing bari'meeri oomeeri-ang. Enang tee nkaang noru' dupearava', teka dama' tee ninge dupeansi tampa' tasi'pampaing tee-pina'

Kumponing ning o'mui noru'mui otona'. Tee'koo aa'pamaang: Piaa tee kapoo' masakung, ai' doong kante makotui otomaung. <sup>13</sup> Ee', aing beaumo kapoo' pankaroong otomatoaing aa'ning: masika'anta, Ovinge moo'muriaing-koo noru', ee'noko piaa. Teka pankaing masakung teing-koo napo' tee piaa.

### Avuavu'nanka-koo Tee Kumponing Bakaang Kara-sira'koong Aa'na' Piaroriai

**14** Tee tee enang piaanaung to'bii-antarariritaa' teing avuavu' Tanuaang-etaning kong-koo paararariaing, teing-koo deto basining aa'na' piarorima, baru'noo' tee tarampee-koong. <sup>2</sup> Baa naning tee Kumponing kara tasi'paa' meneng-koo sipui avumaung deeko' tee, karoaing Kumponing-koo teie, teka nantoong-koo deea', ai' nantoonge tasi'paavarupeu' tee tee' oovunara menenge karoko tanuaang-eta minkuvuma teing kapoo' baku'nising. <sup>3</sup> Teka tee naning tarampeearamaung tee, teie kara sira'pumaung nantoong iri'antavurima, tampara aarumo siong-koo aroo'antavuri domang kuaa'antavurima. <sup>4</sup> Tee naning oovunara menenge karomaung tee baka puring-antavaramaung, teka tee naning tarampeearamaung teie tee puring-antavurimaung teing nii'ning nari' dootuu'arimaing. <sup>5</sup> Piamoi otong ning dii' oovunara menenge kara-koo, teka baru'noo' aa'na' piamoi otong dii' tarampeerarima kara sira'koo, ai' tee naning Kumponing bakaang kara sira'pumaung tee deto basi tee-koo naning-koo oovunara menenge karomaung-koo. A'noo' naning kara-bere' otoko deeko' makosi teie pakuvuripeu' teing nii'ning nari' dootuu'arimaing puring-anta-koo. <sup>6</sup> Dii' mmaikori' ee, ning dii'anko mora oovunara menenge karompeu' ee'noko tokoona' kapoo' makensi'ning Kumponing-etaing oo-antamupeu'ning naurampia' deeko', kapoo' baku'nisi-koong noru' amupeu'nung sira'derompia' deeko', napo' karantamuko tarampeemarama puring-antampiaruko deeko', ee'noko kapoo'koo nau-antampia' deeko', arekee' dii' ninge pakurampipeu'? <sup>7</sup> Tee-pina' kapoo' boo'nanka otoromaung, aa'ning kovi, tankovani'. Tenang nii'na' karoko arekee' kena-koong aurong tasi'pampipeu'? <sup>8</sup> Ee'noko piatooronuka' biikaang tuuviri nii'na' puumpupeu', arekee' teinge piatooronukai noru'aapeu' tavu'koo bokuvurimatomaung deeko'? <sup>9</sup> Tee' nari' daka tampa' siraka'antavearuko karema dakaang menenge arekee' tasi'paapeu'? Da' aa' tamung doona-koo karemang. <sup>10</sup> Otorong karananka amutemurii' ootukunung kansi'koo, ee'noko kareaamaing kante tasi'pai otorong noru'amaang. <sup>11</sup> Teka ninge naninung kara tasi'pamparui dei tee naning ning karamumaatomaung damisimai ning-koo, ee'noko ning damisimaie tee-koo, ee'noko tee' pakumeearupeu'. <sup>12</sup> Dii' tee' nari'ke. Dii' aa'na' piarorimaung nka-koo teing avuavu'nanka Tanuaang Meekunge amurimaing. Makosi, purintariaing nka-koo temurii' dootuu'nupoong naru'ka puring-anta-koong.

### Dootuu'koo Oovunara Menenge Kareamaing Napo' Kara Bere'na' Besi'avaing

<sup>13</sup> Tee'koo tee naning avuavu' oovunara menenge kara-koong oto'evuing eentavaravaing napo' tee kara bere'koong iri' nka-koo. <sup>14</sup> Ning oovunara menenge kunsimarama nkaang tanuaang narung kungsiaramaung, teka ninge noru'ampa' tee kapoo' minkua-maung. <sup>15</sup> Enang arekee' nkomaravaing? Tee aa' kunsimaravaing nkaang tanuaang narung ninka, napo' kunsimaravaing nkaang onou ninka. Ee'noko kenamara-vaing nkaang tanuaang narung ninka, ee'noko napo' kenamaravaing nkaang onou ninka. <sup>16</sup> Tenang dake Kumponing biraankeveko tanuaang narung ninka oovunara menenge, arekee' naning da' ninka nari' tamung otomaunge masikee-antarui "Masikung" tampupeu'? <sup>17</sup> Bane dakaang eenta Kumponing-koo makosina' tampeinge, tee nii'nung naning paku-antavea' otong. <sup>18</sup> Ninge tampara tampamang Kumponing-koo, oovunara menenge karomaung-koo mmau'namu'pie, dii' divu'dampiri. <sup>19</sup> Teka dootuu'nupoong naru'arimanoo'ke namoora'noo' sirapo'ke kara-koo piamaung, baru' oovunara menenge karoma doong o'anta-koo piamaung.

<sup>20</sup> Mmaikori' ee, bakerariaing toire' biikana' noru'koo. A'noo', orara matau-koo toire'pina' amakorariri otoriaing, teka petaa'doriaing diikaang noru'koo. Aa'periauka', "Oovunara menenge kara tee taa'ni'anta pankaing Kumponing nii'anko otomaung-koong." <sup>21</sup> Ai' Kumponing naunaua-antavurii'naang mau'urima Isireeli-nupoong-koo aa'puu', "Akoing-koo karoma karavampaing nkaning, akoing biikaang karai. Teka bane tee' nkoanko taara-maavauka'nung."

(Aisaia' 23:11-12)

<sup>22</sup> Daari Meekunge tee' minkuvuio' nii'ke noru'ampiri otong tee oovunung menenge kara tee taa'ni'anta makosi, teing-koo masika'anta oto'evoroing-koo deea', teka teing-koo masika'anta-koo kontevoro-maing, teing koono-anta-koong. Ee'noko teka tee tarampee tee masika'anta-po'nupoong biikaang, masika'anta-koo kontevoro-maing biikaang deea'. <sup>23</sup> Ai' dootuu'nupoong oosiarira ookara oovunara menenge kareaako tenang nantoong tamung masika'anta oto'evoroing te' poropeu', porora aa'paapeu', "Dii' kanu'daririning!" <sup>24</sup> Teka ookarai tarampeerariko naning damisimai, nii'na' naning masika'anta oto'evuaung pora taaravuko tee ootukunung taaravupeu'ning karai too'pupeu' tee, noru' tante-antavuma. <sup>25</sup> Kapoo' bakaang makensi'nanka sirapo' po'antavupeu' ee'noko miinge keemparara Kumponing daangampupeu' aa'puma, "Kumponing masika' dii'anko otong!"

### Tampa' Toosimariri O'nori Dootuu' Nko-koo Tampa'

<sup>26</sup> Arekee', dii' mmaikori'? Tenang dootuu'koo naru'darima avutevu' nko-koo piaroriaing makosi, nii'nung kena ninka, nii'nung nau-anta ninka, nii'nung Kumponing sira'naare ninka, nii'nung oovunung

menenge kara, nii'noo' kara-bere' ninka, teka ootukunung nkoverima teing nii'ning dootuu'nupoong puring-antana' nkoveriaing. <sup>27</sup> Oovunung menenge kara otoko deeko' makosi kenaankara deeko' nii'noo' beenaumo-koo basi oovunung menenge kareapeu', ee'noko doompeitaa', ee'noko nii'nunge biikaang kara bere'evuriko. <sup>28</sup> Teka dootuu'koo naru'arimaing-koo naning kara bere'umaung otoaruko deeko', makosi kareavauka'nung teing nantoong oovunung menenge kara-koo piavoromaing. Tamung bii'ka kareavaing Kumponing ninka. <sup>29</sup> Teing-koo nakaronupoong'koo makosi, kenaanka nii'noo' beenaumo kareavaing, ee'noko ookara baroromparirio'. <sup>30</sup> Tenang nii'nung karoi otoko nii'nung-koo Kumponing kara-sira' tavo'kupeu' naning ba'nampari otomaung-anko, makosi tee tutuna'nung bakearavai. <sup>31</sup> Dii' teing ookara batei oto'deruriaing diikaang kara minku-koo Kumponing-etaning tarampeerarima naruna' naruna', ookara barerarira tampara aarumo siong-koo domang kuaa'antareeriaing. <sup>32</sup> Teing nakaro-nupoong bii'ka bake-anta-koo makosi, nii'noo' nempariai nii'nung batei-koo. <sup>33</sup> Ai' Kumponing tee toosi-paa'koong deea', teka mooa-koong.

Ookara dootuu'nupoong osi kante-koo nkoarimana' tee' nari' nkorarii'naang naurampimang. <sup>34</sup> Maniku' teie, dooroomparimatoai dootuu'koo naru'darima. Teing kara-koo taura'paria'. Teing tamung doonko otoroing tee' Moosesi-ning botoi minkuvui otona'. <sup>35</sup> Kapoo' noru'koo piavorora deeko' biumatakaampi tana'aariaing osia, ai' maniku'koo tee maimaia' dootuu'koo meu'ke kara-koo. <sup>36</sup> Arekee'? Dii' ee okora'nuka tee Kumponing bakaang kara? Ai' dii' nainge nkaveru'ninge tee Kumponing bakaang kara, nii'ninge deea' ee? <sup>37</sup> Nii'nung naning ee' noru'ari dei, "Bakei nakaronara ning," nii'noo', "Tanuaang-etaning avuavu' oto'memuing," noru'uaing teie tee kapoo' ninge daarirerompimatomaung dii'anko tee ee'nara boto Ovoring-etaing. <sup>38</sup> Baa naning tee tara'oa' taaravuaing tee napo' naning taaravuauka'ninge. <sup>39</sup> Tee'koo, mmaikori', bia'doriaing tarampeerari minku-koo, teka oovunung menenge kara poteveriauka'. <sup>40</sup> Teka oosirarimanoo'ke ookara kapoo' makosina' nkoveriaing narung mono-koo-nupoong pakureeritaa'.

### Nantoong Boorou'ning Napo' Daa'ariaing- koonare

(15:1-58)

### Karistoo'ke Boo' Puru'ui Daa'aru'ning Masika'

**15** Enang tee dii' mmaikori' ninge tee tampara doorenang tero daankirerompuru'ning napo' noru'antarampii'naang miru'noo' sira'pama. Dii'ke tero nkaverira enang ima'darimaung tee-koo. <sup>2</sup> Tee-koo tampara doorenang-koo kuunge domantariri otoria-maung, a'noo' tee tee' nari' ninge naurampiru'na' pin-

ka'eri dei ai' dii'ke daang masika'antaveriarui dei. <sup>3</sup> Tee, ninge dii'koo danto tuu'antu' tee-pina' kapoo' tutu-na'nung pankaing masikung tee kapoo' ninge nkavan-tu'nung. Aa'noko tee Karistoo' boo'paru' niikaang oraka' nkonanka-koo tee' Daari Meekung masika'paru'na'. <sup>4</sup> Aa'noo' dako'au', napo' domamparu' beenang doong deemparako tee' Daari Meekung masika'paru'na'. <sup>5</sup> Aa'noo' napo' Siipas-koo oro'paru', napo' teing nanai'keta kenaankara-koo oro'paru'. <sup>6</sup> Napo' dama'ke teing-koo pa'noko' daaku' divu' nii'maikorori'koo oro'paru', Ee'noko teing-koo dapi' ookara mme' domampariri otorong, teka nii'ning boorou'ning. <sup>7</sup> Napo' dama'ke Jeemisi-koo oro'paru', teketa ookara kara okovuri nkanuka-koo. <sup>8</sup> Asirang-koo masipo' ning-koo oro'paru' ta'nimpaarii'na' ponto'antamuma mme' iri'moaruko. <sup>9</sup> Ninoo' tee ee'nara asi'noo'nung kara okovuri nkanuka-koo, teka ning kara-okovui-nka tang-koo makotumpa', Kumponing bakaning dootuu'nupoong oraka' nkoaranko'nung-koo. <sup>10</sup> Masi-ka' kara-okovui-nka deemari o'nong, nka Kumponing bakaang piaae avusiro'ari bakaang kara-okovui-nka deeng-antamui'o'. Enang tee avusiro' ning pare'muu'nung iri' otoaung deea'. Bakei teing ookara-koo deto basimari mintoamaru', a'noo' tee ning deea', teka tee Kumponing bakaang avusiro' ning-koo oting. <sup>11</sup> Ai' tee tee bane ninge ee'noko teinge nari' daankiampimaunge tee tee ee'nung niikaang kara, ee'noko tee dii'ke masika'antaveru'.

#### Boo'keta Daa' Otoaung Deeko' Nii' Piaaru'nuka.

<sup>12</sup> Karistoo' boo'keta daa'aru'nung daankiampimaung deeko' aming-koo nii'ninge dii'koo koroarima aa'paamaung, "Boo'keta daa' otoa'?" <sup>13</sup> Boo'keta daa' otoaui dei, Karistoo' baka tee daa'aravaruu'nung deemparapeu'. <sup>14</sup> Ee'noko Karistoo' boo'keta daa'aravaruu'nung dei, tee kara nii'ke daankiampimaung tee tamunsi'nung ee'noko diikaang masika'anta tamunsi'nunge, <sup>15</sup> ee'noko napo' daang minku-nupoong deemaripeu' Kumponing-koo, aa'pampimaung-koo, "Karistoo' Kumponing boo'keta daa'antavuu'nung," ai' Kumponing daa'uarupeu' boo'keta daa' otoaui dei. <sup>16</sup> Boo'nuka daa'uriarupeu'nung deeko' Karistoo' tee'ke, bane pankaing, daa'uarupeu'. <sup>17</sup> Ee'noko Karistoo' daa'uaruu'nung dei diikaang masika'antai kaari'darima diikaning oraka' nkonanka-koo kuung otoripeu'. <sup>18</sup> Ee'noko teing napo' Karistoo' bakaning boorou'ning tee paa'ariri otopeu'. <sup>19</sup> Teketa tee nii'ke ee' noru'ampira Karistoo'ke enang-navaro navaro-koo ootoo'koo pakumuriaing ee'noko dama'navaro-koo paa'mariri, nii' teing piaaru'nuka ookara-koo dau basi-noo'ka.

#### Karistoo' Boo'keta Daa'aru'nung Nii' Ookara Napo' Boo'keta Daa'marina'

<sup>20</sup> Nka tee ee' masika': Karistoo' boo'keta daa'aru', ee'noko tee' nkoarama tasi'antamuru' teing boorou'ning daa'ariaing. <sup>21</sup> Aadamai baka ookara nan-

toong boo'ke para'uru', ee'noko Jiisuu'ke baka ookara nantoong makosi-antavuru' boo'keta daa'koo. <sup>22</sup> Tee' nari' ookara booroaing Aadama-koo kuung otoromaing, napo' tee' nari' ookara napo' domampariaing Karistoo'koo kuung otoromaing. <sup>23</sup> Teketa tee ookara kapoo' makosina' nkoaravaing Karistoo' doompaitaa'. Karistoo' mme'nung taa'ni'anta-koo boo'keta daa'aru', teka dama'ke teing bakaning daa'ariaing tee napo' poko. <sup>24</sup> Tee' nkoarako teketa botu basiaravaing tenang otoa'antavuaing teing ookara pankainanka, ovontung ee'noko iri'nanka, teketa' ookara kapoo'nanka teie tarevui tavo'uaing Bauma Kumponing-anko. <sup>25</sup> Tee Karistoo' tee ovorimpari pankaimparamaatoaing bera tenang Kumponing ookara bakaning kare-nupoong kau'ka boonavete-koo sipuriaing. <sup>26</sup> Ee'noko tee karening asi'noo'ka kune'ampimaung otoa'antavuaing, ee'nara boo'. <sup>27</sup> Ai' tee' Daari Meekunge minkuvui otoa' aa'puu'na', "Kumponing ookara kapoo'nanka Karistoo'koo bakaang kau'koo boong si'koo mimpuu'."

(Kena 8:6)

Tenang Daari Meekunge ookara kapoo'nanka boong sipuaing tampuma Kumponing nara'ka minkuvua', ai' tee tee Kumponing ee'nara teie sipuaing ookara kapoo' Karistoo'koo boong. <sup>28</sup> Teketa tenang ookara kapoo'nanka Bauring-koo boong sipuko Bauring ee'nara napo' Bauma-koo boong otoaing tee ee'nung-koo ookara kapoo'nanka Bauring-koo boong si'koo mimpuu'nung-koo, teka Kumponing nara'ka tanatavurii'naang.

#### Kapoo'nanka Boo'keta Daa' Masikee-Antavui Otoinan-ka

<sup>29</sup> Tee boo'keta daa' napo' otoaui dei aming tavo'kupeu' teing-koo nantoong ntong-koo minkie meeka'antavarimaing-koo nii'ning boorou'ning paku-koo? Koon-to' boo'nuka napo' domampariarui dei, aming-koo napo' teing-koo boorou'ning-koo ntong-koo minkirarima meeka'antarariko'? <sup>30</sup> Ee'noko aming-koo kapoo' avo'avoro'nanka kune'ampimaunge nii'ke kara okovuri nkanukai ookara batei-koo? <sup>31</sup> Ninge tasi'antarampimang dii' mmaikori' marirampima, dii' ee'ning ning dotu-antameri niikaang Oving Jiisuu' Karistoo'koo kuung otorimaing: Ning tee tavu'koo doong kante koraposi'maamaung Karistoo' daankianko ning boo'keta daa'maravaing noru'mari. <sup>32</sup> Ning boo'keta daa'maravaruu'naang deeko', aming ning-koo basiarapeu' nantoong biikoori avorokesi'nuka ninka tameeriko anke Epeses-namono-koo? Ee'noko napo' boo'keta daa' otoaung deeko', makosi, "taamang ntong tovang naiampima tamung do'dero'de'mariri o'norimaa'noaing, ai' dauna'mung moompira bakemariai." <sup>33</sup> Purintariri otorimaatoai tee' tosiraarima aavaraari'neenga. "Oreng ninka navurarima diikaang aarumo orari-antaraarapeu'." <sup>34</sup> Kanu'keta tanterariai oraka'nko siperi. Nii'ninge dii'kooning Kumponing noru'aava'. Tee'panko maia'dorii'naang.



**Arekee' Oro'mariaina' Te'mung Boo'keta Daa'mari-  
aina'mung**

<sup>35</sup> Teka nii'nung narunge aa'pupeu', "Boo'nuka are-  
kee' daa'ariaing? Mono aremurii' oto'evoroaing?"  
<sup>36</sup> Bakei kanu' tee aung niania'. Tee sinang dake keem-  
peaing tee tutung booaing domamparavaing deeko'  
dama'ke. <sup>37</sup> Ee'noko aremurii' sinang keempeaing, uite'  
deeko', teu sinanu keempeainu teu tamunsi'nu, mono  
teieta dama' dupuaina' oro'nu deea'. <sup>38</sup> Ee'noko  
Kumponing miru'uru'na' siompai ootukuning  
sinananka avitoitoi ookara kante-koo mononanka  
dupurima oro'parimaung. <sup>39</sup> Teing paning-kooning  
mononanka otorong, ee'noko teing kansi'kooning  
mononanka otorong. Ookara kansi'koong mononanka  
teing namurii' deea'. <sup>40</sup> Nantoong oovunamurii' mono  
oto'evorong, ee'noko kau' karenaumo oovunamurii'  
oto'evorong, ee'noko barennanka oovunamurii'ke,  
ee'noko tavi'nanka oovunamurii'ke. Teing kansi'koon-  
ing mononanka namurii' meenasi oto'evorong,  
ee'noko paning-kooning mononanka nii'namurii'  
meenasinanka oto'evorong. <sup>41</sup> Teing-koo paning-koon-  
ing mononanka-ita duaa' nii'namurii' meenasi  
oto'evung, tee kaara nii'namurii', teing beento'nanka  
nii'namurii'. Ee'noko beento'nanka-koo nari' basining  
deea' arakanoo'koo.

<sup>42</sup> Nantoong boo'keta daa'ariaing tee' nari' oro'ke,  
tee-pina' sinang-pina' tee mono tee dako'koong kan-  
si'koo paa'aravainung deempario', ee'noko teketa tee  
daa'aravaing paa'aravauka'nung deempari. <sup>43</sup> Tee  
mono nii'ke dako'ampimaung tee tamunsi'nung.  
Mono tee boo'keta daa'aravaing tee maneenung. Tee  
mono dako'ampimaung tee purinto' otoaung. Mono  
tee boo'keta daa'aravaing tee purinto'po'nung. <sup>44</sup> Tee  
mono dako'ampimaung tee kansi' bakaang. Mono  
napo' boo'keta daa'aravaing tee tanuaang bakaang.  
Ee', otong mono kansi' bakaang. Napo' otong tee  
mono tanuaang bakaang. <sup>45</sup> Tee'koo Daari Meekunge  
minkuvuu', aa'puma,

"Tee tutuna'nung naning Aadama naning domantoo'  
deemparu'."

(Pupu' 2:7)

Teka tee asiranung Aadama (tee Karistoo') boo'keta  
daa'ari domaang avu'koong tanuaang deemparu'.  
<sup>46</sup> Tee-koo ee' noru'koo makosi: Tanuaanavete tutung  
tavo'kuaung, teka mono-navete tutung tavo'kuko  
dama'ke tanuaanavete pokoo'. <sup>47</sup> Tee tutuna'nung nan-  
ing kansi'keta tavo'kuu'nung da'mong-koong nkonii'.  
Teka tee kenaanka-nung naning paning-eta pou'nung.  
<sup>48</sup> Teing nantoong da'mong-koo-nupoong teing tee-  
pina' naning da'mong-koong-pina' oro'nanka. Teka  
teing nantoong paning-nupoong teing tee-pina' nan-  
ing paning-koong-pina' oro'nuka. <sup>49</sup> Tee' nari' nii' tee-  
pina' naning da'mong-koong-pina' oro'marimaung-  
koo napo' tee' nari' oro'mariaing tee naning paning-  
koong-pina'.

**Arekee' Nkoaravaina' Te'mung Boo'keta Daa'mari-  
aina'mung**

<sup>50</sup> Tee kapoo' ninge naurampimatomaung dii'  
mmaikori' tee aung: Tee nii'koo tamung bio' ereng to-  
vang navaro tee okovuauka'nung tee barenku  
Kumponing bakaang muu'koo tunumpo'. Napo' teing  
kapoo'nanka paa'ariaining okovuriarupeu' tee kapoo'  
paa'aravauka' nung.

<sup>51</sup> Taaraveriai, ninge kapoo' makensi'nung nau-  
rampii'naang: Nii' tee o'mariri moompiauka'ning, teka  
tenang asi'namu' tuuviri paning-eta karoko nii' ookara  
teing paarimariaining namu'ke, piping-pina'. <sup>52</sup> Tuuviri  
karoko boo'nuka tenang daa'ariaing ee'noko tenang-  
eta booroauka'nung, ee'noko napo' nii' paarimariai.  
<sup>53</sup> Ee' makosina': Teing mononanka boo'koo makosi-  
nanka kiri'ampira teing boo'koo makosi deeaing  
si'mariai. <sup>54</sup> Tenang mono boo'koo makosinanka  
boo'koo makosi deeaung deemparako Daari  
Meekunge minkuvuu'na' masika'paravaing aa'puu'na',  
<sup>55</sup> "Kumponing boo' bakaang iri' opui puru'anta-  
muriang."

(Aisaia' 25:8)

"Ekee da' boo', dakaang iri' arera?  
Da' boo', arerai dakaang tuu'neke'?"

(Osea 13:14)

<sup>56</sup> Ai' orara aarumoi tuu'neke'pina' tupu'murimaung  
boo'koong iri' ninka, ee'noko ee'nung iri' tee ee'nara  
boto nii' boo'koo tammurimaung. <sup>57</sup> Teka tampara  
tampampiaing Kumponing-koo boo'koong iri' opura  
domang amuru'nung-koo niikaang Oving Jiisuu'  
Karistoo'koo kuunge. <sup>58</sup> Tee'koo mmaikori' ninge pi-  
aavarampimaing, ima'dariri otoriai diiri'daria'. Ookara  
batei-koo aa'na' kontariaing Oving bakaang  
mintoong-koo ee' noru'eri: Oving-koo  
mintoomarikotaa' tee niikaang moo' paa'aravau-  
ka'nung; boo'ke daka'puauka'nunge.

**Asi'naare, Paura'ke Bakaang Miru', Tautau,  
ee'noko Si'nara'koonare**

(16:1-23)

**Mooni' Oosiaavaina' Jerusalema'nupoong Paku-koo**

**16** Enang tee ee'pina' mooni' oosieriaing teing  
Kumponing bakaning meekupoong paku-koo:  
Dootuu'nupoong Kalesia-nameensi'ka osi kante-koo  
nauarantu'na' nkoveriaing, ee'pina': <sup>2</sup> Saandei kante  
dii' naruna' naruna' dii'ka taakore'ning taapo' ko-  
re'dariai. Tee tee oosi bakenii' otoko ning moaing.  
<sup>3</sup> Miru'ereriaing nii'ning dii'kooning, ee'noko tenang  
ning tavo'kamira ninge karavoto~ ninka botoaram-  
paing diikaang avuavu'nanka ninka Jerusalema'aape  
be'anta-koo. <sup>4</sup> Makosina' deeko' ning nari' meriaing.

Paula', Timoti Ee'noko Apolos Biikaang Nanunanu'  
Koorin-aape

<sup>5</sup> Ning maromaramang Masedonia' nameensi' beero'ansi nanama'naang. Masedonia' beero'ansi dii'anko moaing. <sup>6</sup> Ee'noko dii' ninka o'noo'noriaing dee'ma, ai' pa kamaari-po'naveraa'ka-koo nari' o'noriaing dii'ke pakumeriaina' nanampainairu-koo be'koo. <sup>7</sup> Enang tamung oki'noo'koo beero'dampii'naang pi-amoa', teka pankapankaroong oto'koo piamomaang dii' ninka, Ovoringe taura'muko deeko'. <sup>8</sup> Ning Epesesie o'noi o'noaing bera Pentekos-na'mung basinoo'ke. <sup>9</sup> Ai' doona pankaing oro'paring ning mintoomaravaing-navaro-koo sinampuriaining. Ee'noko teing ni'ninka turani'nuka mmau' otorong.

<sup>10</sup> Teko Timoti poaing deeko' dii'anko, tampa' ooveriaing tee avoro'neeng-koo tenang dii' ninka otoritaa', ai' teie tee Ovoring bakaang nko-nko nkovumaung ning-pina'. <sup>11</sup> Tee dii'koo narunge doonko noru'eauka'. Pakuerio' danto nanuaing mooavari tee ning-anko basiaravaina'. Nii'ke nii'maikorori' ninka nempampimaang tee.

<sup>12</sup> Napo' tee-koo mmaiko' Apolos: Ninge aa'na' pia-antavantu'nung dii'anko bee'naang nii'maikorori' ninka, nka tee enang be'koo piavo', teka tee beaing doona oovura deeko'.

Asi'ning Tautau

<sup>13</sup> Tanterariri ima'dariri donkoniriaing diikaang masika'anta ninka, naning-naunturi purinto' ninka.

<sup>14</sup> Ootukunung kapoo' nkoveriaing pias ninka nkoveriaing.

<sup>15</sup> Mmaikori' ee, dii'ke noru'eri otong Sitepanas bakanava-nupoong teing teing teva-nupoong tutuna' bere'ariru'ning Akaia' nameensi'koo ee'noko teing to'bii-antavarimaung Kumponing bakaning meekupoong paku-koo. <sup>16</sup> Ninge botorampimang dii'ke taaraveriaing kara teing-eta nantoong tee' oro'nuka-ita, ee'noko ookara-ita nii' ninka nari' aa'na' mintoompariaining-eta. <sup>17</sup> Ning dotumaring aa'ning poroio': Sitepanas, Potunatus ee'noko Akaikas dii' pari'antaraari. <sup>18</sup> Tavo'kaio' ning unaamou' ee'noko dii' tee'ke, unaaroru'. Dii'ke tee tasi'periaing teing tee' oro'nuka makosinuka tampa' noru'koo.

<sup>19</sup> Teing dootuu'nupoong osi kante-koo Eesia- nameensi'koo otoromaing tampara tantaaring. Akuila daring Pirisika' nari' teing dootuu'nupoong beekanava-koo naro'arimaing ninka pias ninka tampa' minkuraaringe Ovoring-koo. <sup>20</sup> Nii'maikorori' ookarai aa' otoroing tampara tantaaringe. Dii' ookara naruna' naruna' onkeonke'deeriaing meekupoong nkoarimana'.

<sup>21</sup> Enang tee, ninge Paula'ke napo' tampara minkurampimang anaare ninge koonto' daariama nkaang bireng miring taa'ni'antamari. <sup>22</sup> Baa naning tee Ovoring domange dai'uauka'nung barakosi' tee-koo otoaing. "Maranata" – Ovoring poaing. <sup>23</sup> Tee biraanke Ovoring Jiisuu' Karistoo' bakaang dii' ninka nari' otomatoaing. <sup>24</sup> Ninge piarampimaang dii' Jiisuu' Karistoo'koo kuunge.

Masikung.

## 2 KOORIN

### Kara Baavootunanka Ane'kooning

1:1 Kumponing Kara Okovuri Nkanuka Mintoopari Oto'koo Miru'uru'na'  
 8:1 Paula'ke Avuavu' Neri-koo Tante-antavuru'na' Judia'nupoong Paku-koong  
 10:1 Nii'ninge Paula' Daraumeempaio' Daang Noru'aako Siraka'antavuru'na'

### Kumponing Kara Okovuri Nkanuka Mintoopari Oto'koo Miru'uru'na'

(1:1-7:16)

**1** Aung karavoto~ tee ninge Paula'ke daariamaang, Jiisuu' Karistoo'koong kara-okomui-nkai Kumponing bamuio', ee'noko tee Timoti nii'maiko' nari', dii'aape Kumponing bakaning-aape teke Koorinnavuntu'koo dootuu'darimaing-aape, napo' teing ookara Kumponing bakaning meekupoong Akaia'namensi'kooning dii'anko otoromaing. <sup>2</sup> Biraanke ee'noko mooa dii'koo otoaing Kumponing Niumaitaing ee'noko teieta Ovoring Jiisuu' Karistoo'.

#### Paula'ke Tampa' Tampuu'na' Kumponing-koo Pakuvuko'nung-koo

<sup>3</sup> Kumponing tee Ovoring Jiisuu' Karistoo' Bauma tee bakei nii'ke deto biraankeampiri oto'koo makosi, tee piaa ee'noko domang kuaa'anta-koo okora'. <sup>4</sup> Teie nii' dunsirunsi~antamurimaung teing-koo niikaning arikananka-koo nii'ke napo' teing arikung-po'nupoong dunsirunsi-antavampii'naang tee' nari' nii' Kumponing dunsirunsi-antamurimana'. <sup>5</sup> Nii' teing Karistoo' ninka nari' arikung deepo' kune'ampimaing deemariri tee napo' tee' nari' Karistoo' ninka aa'na' domang kuaa'antai maanto'murima nii'ning-koo pare'ampikoo'. <sup>6</sup> Ee', kapoo'ke manki'antamuriko tee makosi, dii' Koorin-nupoong domang unaarori domantariaina' tee'. Ee'noko tenang nii'ke domang kuaa'morimanang dii' napo' domang kuaa'dorikoo', ee'noko puring nkaverikoo' ookara batei-koo teing manki'nanka puru'koong nii'ke nari' mantompampimaing. <sup>7</sup> Dii' e'maniriaina' masika' noru'darampiri otong, ai' tee' arikung kune'ampiko domang kuaa'antamurimana' Kumponing napo' dii' domang kuaa'antaruriainge.

<sup>8</sup> Ee' mmaikori', arikung Eesia-nameensi'koo kune'ampiru'nung-koo papaararariaroo'naang nau-

rampimang. Nii' teing aa'na' masika' arikunge pakusi'murio' domamariauka'ning-pina' noru'mariru'ning. <sup>9</sup> Bakei boo'koo bamuru'ning-pina' noru'mariru', teka teie Kumponing tee arikung nii'koo taura'puu'nung nii' tee narung-koo baitomarii'naang boo'nuka domang-antavurimaung-koo, ee'noko niikaang puring-koo bi'maria'. <sup>10</sup> Ee', teie Kumponing kapoo' nii' dupisi'koong-pina' oro'keta domang-antamuru'nunge tee' nari' taremuri otong. Tee'koo tee' nari' tee-koo aroo'marimaung daanto nari' moo'murimatoaing-koo. <sup>11</sup> Dii'ke teie kungsi-koo nari' pakumereriang, ai' dii'ke mmou'ke pakumereriko deeko' tee nantoong mmou'ke Kumponing-koo tampa' tampaavaing tenang Kumponing nii' pakumuriko.

#### Paula'ke Siraka'antavuru'na' Tosiaru'nung-pina' Noru'au'nung-koo

<sup>12</sup> Nii' tee dotumarimaung domang kiiroraa'mariri ee'koo: ai' nii'ke tee aarumo koonto' narung nkoampi-maung Kumponing piavomana' ookara nantoong ee'noko dii'koo meu'ke, nii'nung kapoo' makempampia', ee'noko tee' oro'noo'koo kansi' bakaang matau siompampia', Kumponing bakaang piaae kake'ii-antamuriko bakaang aarumo siompampikoo'. <sup>†13</sup> Ookara kapoo' ninge daarirerompimaing teing makensi'ning deea', deeruerima tasi'peripeu'. <sup>14</sup> Dii'koo nii'ninge nii' tampa' tasi'mereri otoiina' tasi'merii'naang ookarai piamomaang. <sup>††</sup> Ee'noko niikaang miring meena'antaveriai tee' nii'ke diikaang miring meena'antavampiaina' te'mung Ovoring Jiisuu' poaina'mung.

<sup>15</sup> Dii'ke ning masika'antamerimaung noru'ansi ning dii'ankoi tutung mee'naang tamaruru' ee'noko toromarama napo' beero'dampiri kemu'kana' paku-antampii'naang. <sup>16</sup> A'noo' tee ninge tenang Masedonia' mema dii' oorampiri be'koo noru'antu' ee'noko Mase-

† Nii'ning daang-koong nau-antanuka porora Paula' poore'aako mmou'ke Koorin-nupoonge sipaara siompaariko'. Paula'ke taaravurai'nange onou paariarara napo' beero'uria', teka Taitas teing koong-anta-koo botovuu'. <sup>††</sup> Teing-koo mmou' Taitas tampa' taaravaara bere'ariko nii'ning mme' kontevoroi otoroko'.

donia'keta napo' dii'anko meko pakumeriko Judia'aape mee'naang. <sup>17</sup> Teketa maromaru'na' dii'anko mearuko tamung akapeu'marama minkuantu'nung-pina' noru'meriauka', ai' ning akapeu'marama maromar-avaung naning kansi'koong bakana' tosiro'marama. <sup>18</sup> Kumponing masakung minku deemparako niikaang kara tee'ke dii'koo nii' tosiro'maria'. <sup>19</sup> Ai' tee Kumponing Bauring Jiisuu' Karistoo' tee Pako'pari'nii' nii'ke dii'koo daankiampimaung, aa'ninge Sivenus, Timoti ee'noko ning tee tosiro'koong deea', teka tee-koo kuunge ookara batei-koo tee nii' masakung narung minku-koo makosinuka. <sup>20</sup> Ai' ookara maraka-antananka Kumponing deining Jiisuu'koo kuunge teing masika'paravainanka. Tee'koo Kumponing daangampima Jiisuu'koo kuunge aa'pampimaung, "Ee', masakung, nkoaravaing!" <sup>21</sup> Enang tee Kumponing narunge ookeng dii' ee'noko nii' ima'antamurimaung Karistoo'koo. <sup>22</sup> Bera pako'pari'murima bakaning deeng-anta-koong taa'ni'anta tee bakaang Tanuaang Meekung niikaang domang-koo sipuu' tee kore'ngang tasi'anta tee-koo biraanke dama' oampiaing-koong.

#### Paula' Maroita Ana'aru'na' Teing Baike-antavuria-roo'naang

<sup>23</sup> Enang tee masika'anta-koo Kumponing bakaang miring tampamang aa'pama: Ning tee dii' oraka' mantong-antampineeng-koo dii'anko te' Koorin napo' toromarava'. <sup>24</sup> Tenang ning mora tee diikaang baito boonianta-koo piamoa' diikaang baito-koo tampa' donkoniri otoriko, teka ninge doturotu-aape-nameng-koo deeko' pakurampii'naang.

**2** Tee tee napo' kemu'kana' dii' orarunsi-antampima beero'koo kasiamparu'nung. <sup>2</sup> Ai' dii' orarunsi-antampiko deeko' ning baie napo' dotu-antamupeu? Otoa'. Tee tee dii'ke deeko' ninge orarunsi-antampiaruko dotu-antameripeu'. <sup>3</sup> Tee'koo ninge tee tutuna'nung karavoto dii'anko daariantu'nung dii'anko tamung mora dii' orarunsi-antampiaroo'naang, dii' ning dotu-anta-koo narung-koo makosinuka-pina' noru'dampimaing. Ai' ninge ee' noru'dampiru'nung, ookara kapoo' koomparako deeko' dotumari dii'anko meaing, ee'noko ning dotumarako dii' ookara doturariai nari'. <sup>4</sup> Koonto' sisikeera ninka domang manki'moi daarirerompiru'nung ta'due duu'marama. Dii' manki'anta-koo deea', teka dii'ke ninge piaae maanto'mui piaarampimana' noru'erii'naang.

#### Paula'ke Nauvuru'na' Naning Oraka' Nkoaru'nung Tonta'antaevaava'naang

<sup>5</sup> Teka teie naning tee orarunsi-anta basiantavuu'nunge ning narung orarunsi-antamua', teka dii' ninka nari' orarunsi-antamuru'nung, teka aa'pamaang, dii' ookara nari' orarunsi-antaruria', kara baru' manki' minkuami'neeng-koo. <sup>6</sup> Dii'koo mmou'ke kiimata averu'nung makosina' tee naning. <sup>7</sup> Tee'koo enang tee dii'ke bere'darima tonta'antaverima domang kuaa'antaveriaing, baru' manki'orai'ngang orarunsi

booni'u'neeng. <sup>8</sup> Tee'koo ning dii'koo eentamarang pi-aa nau-antaverii'naang tee. <sup>9</sup> Tee tero tautaurampiri daarirerompiru'nung tee dii' paara-anta-koo dii' ookara kara aroo'nuka masakung deeko' sira'darii'naang. <sup>10</sup> Enang tee baa naning dii'ke tonta'antavering ninge teie tee' tonta'antavansing. A'noo' tee kapoo' ninge tee tonta'antavansing tee ning-aape nkovua', tamung dii' pakurampiri tonta'antavansing Karistoo'koo uro'kanoo'ke. <sup>11</sup> Tee' nkomarima tee Si-etani' doona avompiaroo'naang nii' barang-koo, ai' nii' teing amakonanka deea' tee maroaramana' tasi'koo.

#### Kara Okovuri Nkanuka Kumponing Ninka Purimpariri Kara Berempaamana'

<sup>12</sup> Tenang ning Toroasi-navuntu'koo basimarama tee dooreng Karistoo' bakaang daankiama doona ning-koo daate'ari otoko ooantu' tee Ovoring bakaang nkonko nko-koo. <sup>13</sup> Nka nkaang noru' baru' tampa' o'noa' tee Taitas, mmaiko', teka ooamparura dii'koong dooreng ninka mme' poaruko. Tee'koo tee besi'ama Toroasi-nupoong teka siparamira Masedonia'naameensi'aape mou'.

<sup>14</sup> Teka tampara masakung tee-koo Kumponing, ai' teie tee Karistoo'koo kuunge aroo'antamurira siong-antamurimaung ookara batei-koo ookara kapoo' puru'uu'na' sirakura' oro'antavuma. Ee'noko nii'koo kuunge tee Karistoo' noru'koong noru' avitoitoi bereng-antavukoo' nuuraa' tampa' ka'mi'pina'. <sup>15</sup> Ai' nii' teing Karistoo'koong numponuponanka ookara nantoong-koo meu'ke Kumponing bamuru'na'; <sup>16</sup> Teing nantoong boo'pariaing-koo tee niikaang dooreng tee oraka' ka'mi'pina' nuu, ee'noko teing-koo domampariaining-koo tee boo'antana' nuuraa' niikaang kara. Ee'noko baa naning baka tee' tampa' nuuraa'arapeu' Kumponing-koo taapo'ke? <sup>17</sup> Ai' nii'ke tee Kumponing bakaang kara mooni' nka-koo daankiampiaung nii'ning nkoarimana', teka nii' nantoong aroo'po'nupoong masakung, Kumponing botomurio' Kumponing-koo dutakanoo'ke Karistoo'koo kuunge karompimaung.

#### Nerakung Kara Naroong-anta Berempaamaung Tee Iirakuta Nantoong Paku-koo

**3** Teing mooni' nka-koo daankiarimaing teing kara tasi'anta-koong tutung uro'ke naurariko taar-averererimaing. Ee'noko napo' tenkenaama karavoto eentaraumaung tasi'anta-koong averereriko nii'ning napo' nauarai'naang. Teka nii'ke kara nau-antarampiko namu'ke tasi'mererima taaramererimaing, Ovoring-etaing kara okomuri nkanuka deemariko. <sup>2</sup> Ee'noko nii'ninge nantoonge tee'ke taa'ni'anta-koong kara besi'aava' taaramaumaung, ai' teinge noru'ai otong dii' nii'ke pankaruntoonge noru'darampimana'. Ee'noko teing tampara aarumonanka Karistoo'ketaing nii'ke dii'koo pare'antavampiru'ning ooaama tasi'maario'. <sup>3</sup> Ai' nii'ke tamung karonge siinkirampia', ee'noko tamung dama'du

teka'darampia' tee' Moosesie Kara Kivora kapang-koo teka'puu'na', teka Kumponing taa'ni'poio' bakaang Tanuaang ninka diikaang domananka-koo Karistoo' bakaang kara pare'darampiru'. <sup>4</sup> Karistoo'ke makosi-antamurio' nii'ke aa'na' masika'antavampiri tee' minkuampimang Kumponing-koo aroo'mariri. <sup>5</sup> Nii' nii'kamai' makosinuka tammaria'. Kapoo' tavo'arako nii'keta pupu'nii' tampampiarupeu', teka Kumponing narung okovuio' deeko' nii' makosinuka. <sup>6</sup> Teie ee'narai makosi-antamuru'nung tee nerakung kara nantoong Kumponing ninka naroong-anta-koong pare'arampii'naang. Moosesi bakaang boto keperuu'ui domaang besi'na' minkuampiaung, teka Tanuaang Meekung uroio' siona' nauarampimaung. Tee boto tee nantoonge toto'paako tang boo'koo tuutunam-purikoo', teka teie Tanuaang Meekunge nantoong daa'urima domang-antavurimaung.

<sup>7</sup> Tenang tee boto Kumponing kapang-koo teka'pui daarivuu'naare avuriko tee bakaang meenasi aa'na' sisiioi oro'paru'. Moosesi bakaang oing aa'na' pipi'davou', ee'noko bane tee araka sirisiri'arako teinge Isireeli-nupoonge bakaang oing ooai oto'koo makosi-aavaruu'. <sup>8</sup> Nka tee boto, bakaang aarumo nantoong boo'anta-koong, meenasi pankaing ninka sira'paako ooampira ee' noru'ampiai: Tanuaang Meekunge domang-anta-koong kara sira'na' napo' aa'na' deto puring ninka meena'poi otong. <sup>9</sup> Aa'nomaung: tee temurii' aarumo Moosesi bakaang, boto sionge nantoong tamung kiimata-antavurimaung miring pankaim-po'nung deeko' tee, tee aarumo nii'ke tareampimaung, nantoong Kumponing-ankoi koong-anta-koong, miring bakei aa'na' deto basi. <sup>10</sup> Tee Moosesi bakaang meenasi temu' aa'na' arakavaru'nung tee enang otoa' aunge e'mununge meenasie Tanuaang Meekung bakaange nari' donkonuresi apoo'uiou'. <sup>11</sup> Ee'noko tee urikung aarumo paa'arama beu'nung meenasi-po'nung deemparako tee, ee' noru'ampiaing: aung aarumo tee' nari' tampa' otoi oto'koong aa'na' meenasi-po'nung deempari otoaing.

<sup>12</sup> Enang tee, tee kara domang-anta-koong purinto' masika'antavampiri nii'ke tee aa'na' to'biampiri daankiampimaung. <sup>13</sup> Nii' teing Moosesi pina' araka niikaang avo'ampiaung teka sira'pampimaung ookarai ooverii'naang. Moosesi tee bakaang oing da-ka'paru'nung Isireeli-nupoonge ooai siisioroko bane doonko siri'arama nanuko tee araka. <sup>14</sup> Ee'noko tee tenang biikaang onou nari' avo'ariru' koonto' tasi'pai taaravaa'neeng-koo. Ee'noko e'mung-koo basinoo' tee urikung kara nantoong Kumponing ninka naroong-anta-koong deeruaama noru' biikaang tee tee' nari' avo'ariri papaaravarimaung Kumponing domampurina' oo-koo. Siraka'paria', ai' tee Karistoo'koo kuunge deeko' makosiaapeu'. <sup>15</sup> Ee', e'mung-koo basinoo' tee Moosesi bakaang kara taaravaama biikaang domang mme' daate'aria'. <sup>16</sup> Nka tenang nantoong Ovoring-anko bere'ariko deeko' tee noru' biikaang pa-paaraniinanka siraka'antavurimaung Kumponing domampurina' tasi'koo. <sup>17</sup> Enang tee, tee Ovoring

minkuampimaung tee Tanuaang Meekung, ee'noko teing nantoong Ovoringe Tanuaang Meekunge kuung deempuriaining teing teieta boto-koong tuutunang~ eta unaavoroi otoroaining. <sup>18</sup> Ee'noko nii'ke ookarai ee'ninge niikaang onou avo'maria' o'norimainge tee Ovoring bakaang araka tampa' ooampiri oorara-pina' oro'antavampimaung, ee'noko paarimarima tee' Karistoo'pina' oro'marimaung deto bia'morima meenasiaape. Tee aung aarumo tee Ovoring-eta pomaung, tee ee'nara Tanuaang Meekung.

#### Kara Okovuri Nkanuka Teing Tamung Kansikoong Utaunanka Makosinuka

<sup>4</sup> Tee'koo Kumponing piaamurira tee araka oko-antamuri bereng-anta-koo botomurio' tee nii' iri' o'maria' sira'pampimaung. <sup>2</sup> Nii'ke nantoong dau'arampiaunge niikaang minkunaa masika'antakoo. Naning tosi-koo piamoriaunge. Kara Kumponing bakaang mare'ampiaunge. Teing maimaia'na' oro'nanka tee dama'duampiru'ning. Kumponing narung-koo uro'kanoo'ke donkonampiri kara masakung narung siraka'antavampiri nantoong nauarampimaung teinge tampa' tasi'maarira domang-eta aroo'aava'naang.

<sup>3</sup> Ee'noko tee doorenang tampara daankiampimaung aa'na' siraka'pari otong, teka teing-koo boo'aape nameng-koo otoroinging-koo deeko' tasi'parava'. <sup>4</sup> Teing ee'ning masika'anta oto'evoroaing teie dang-koong kumponing kansi'koonge siempaamaunge noru' kaputu'antavuru'ning. Tee'koo tee Karistoo' tee Kumponing siuraampi~ meenasi-po'nung bakaang doorenang tampara arakavarako ooaavarukoo'. <sup>5</sup> Ai' nii' nii'ka minkumarima daankimaria', teka Jiisuu' Karistoo' Ovoring deempari oting sira'pampimaung, ee'noko nii' teing dii' diikaning botovotonaa'nuka Jiisuu' Karistoo'koo. <sup>6</sup> Ai' teie Kumponing kansi' pupu'uma aa'puu'nunge, "Araka, arakararavai mutaanang-koo meu'ke," tee bakaang arakai niikaang domang siisi-antavuu'nung nau-antamurima tee meenasi Kumponing bakaang, Karistoo' bakaang oing-koo oro'parako tasi'pampira aa'pampii'naang tee tee Ovoring, Kumponing tero Pako'pari'nii' nii' domamuri taremuriainoo'koo.

<sup>7</sup> Nka bane tampeng meenasi nii'koo kuung otoko, nii' teing utau aaveta'nanka kansi'koo nkonii'pina' oro'nuka. Kumponing tee' miru'muru'nung iri' dau basie puring-antamuriko nantoonge tee bakaang iri' tasi'paava'naang, niikaang deea'. <sup>8</sup> Ookamenta-ita tee aa'na' iinkunumaarimaung, teka naka'mariaung. Bane papaaramariko, nka oraru'kampiaung. <sup>9</sup> Turamaarimaunge, teka Kumponing si'muriaung. Na'namaarima orari-antamaararukoo'. <sup>10</sup> Niikaang moni'ke doong kante boo' kune'umaung tee' Jiisuu'koo nkoaru'na' nari' Jiisuu' bakaang iri' tampa' oro'paraa'naang niikaang mono-koo. <sup>11</sup> Ee', nii' domamariri o'noriko teie Kumponing taura'murimaung boo' kune'koo Jiisuu'koo, Jiisuu' bakaang iri' taa'ni'poi oro'paraa'naang niikaang mono boo'dumpaa' deemparako. <sup>12</sup> Enang

tee nii'ke Karistoo' daankiampima boo' kune'ampiko dii'ke unaa-anta mantomperikoo'.

<sup>13</sup> Tee' Daari Meekung-koo narunge aa'puu'na', "Ninge masika'antavamira karontu'nung," teie narunge Tanuaange masika'anta-koonge daa'muriko masika'antavampima karompimaung. <sup>14</sup> Aming-koo, nna' ee' masika' noru'ampiri o'noring, teie narunge Oving Jiiisuu' boo'paru'nooketa domampuu'nunge domamuraing tee ninka, ee'noko dii' ninka nari' tavo'antamuraing Kumponing-anko. <sup>15</sup> Kumponing aing ookara kapoo' nkoarampimaing tee dii' paku-anta-koo miru'uu'ning ee' noru'uitaa': mmau' nantoonge tee biraanke nkavaama tee napo' teinge Kumponing daangampaavai, ee'noko Kumponing meenasi nkavuui tee-koo.

### Kara Okovuri Nkanuka Aa'na' Masika'antavai Purimpairimana'

<sup>16</sup> Tee'koo tarua'moriaung. Bane dama'du insimari-ma, nka nii'koo kuunoo' tee doong kante neraka'mariri o'norimaung. <sup>17</sup> Aing niikaning arikananka teing a'noo' kuaa'ning, pankaroong oto'numpo'ning deea', teka teinge nerimemurimaung tee moo' aa'na' manki' tee meenasi otoi oto'. <sup>18</sup> Tee'koo nii' teing-koo kapoo'nanka-koo e'mung oro'pariri otoroining-koo ookampiri o'noria', teka teing-koo oro'pariaing-koo aroo'mariri o'noring. Teing kapoo' oro'pari otoring oto'numpo'ning deea', teka teing oro'pariaing teing otoi otoring.

**5** Enang tee nii'ke noru'ampiri o'noring tee nikaang mono anke kansi'koo o'noring bare-pina' pesi'arako nii' teing tee pava Kumponing-etaing oto'memuring teing paning-koo otoi oto' aa'ning naning birenge kanivua'. <sup>2</sup> Enang nempampiri nii' teing baimarima o'noring tee mono Kumponing-etaing amurii'naang piamorima, <sup>3</sup> tee mono nkomemuru'nunge duaanamuriko simpenoi'nuka deemariaroo'naang. <sup>4</sup> Ee', enang mono kansi' bakaang-koo o'nori manki'morima baimarimaung. Mono tamung si'koo piamoria', teka niikaang mono boo'koong namu'ke mono boo'paa'ke daka'pui paari-antamurii'naang piamorimaung. <sup>5</sup> Nii' nii'ka tee' nko-koo noru'maria', teka Kumponing nii' pia-antamuru' mono boo'paa' nka-koo, ee'noko bakaang Tanuaang amuru' taa'ni'antamuri, tasi'anta-koo tee maraka-antamuru'nung tavo'kuaing-koo.

<sup>6</sup> Tee'koo ee' noru'ampiri ookara batei-koo aroo'mariri o'norimaung: Enang tee aung kansi' bakaang mono ninka o'nori Oving-eta taapo' o'noring. <sup>7</sup> O'noritaa' baitoi masika'anta ninka o'nori tee' noru'ampimaung, kapoo' dutai oo-koong deea'.

<sup>8</sup> Aa'pamaang, aa'na' purimariri o'noring, teka aa'na' deepo' aung mono sipampira Oving-anko o'norii'naang piamori otong. <sup>9</sup> Ookara-koo dau basi-noo'ka tee dotu-antavampii'naang piamori o'noring, anke mono ninka o'nori, nii'noo' aung mono sipampira deeko'. <sup>10</sup> Ai' nii' teing ookara Karistoo'koo dutakanoo'ka teie simpe'muriainig, naruna' naruna'

moo' kante nkavampiaing tenang mono-koo o'nori nkoampiru'na' siompario', tampa' deeko' ai' oraka' nkoampiru'nung deeko'.

### Tee Nko-nko Nantoong Kare-nupoong Kumponing Ninka Nari' Navu-anta-koong

<sup>11</sup> Tee'koo nii'ke Kumponing-koo amorompiri nantoong pia-antavampimaung tee-koo aroo'arii'naang. Nii' kuung o'norimana' Kumponing koonto' noru'ui otong, ee'noko bakei tampa' dii'ke tee' nari' tasi'mereri-peu' diikaang domang pankaruntoonge.

<sup>12</sup> Dii'ke baru' biivimerereri'naang etumaria', teka dii'ke nii' tasi'mereriaina'koo pakurampimaang, ee'noko tenang teinge dii' barantaarimaing bii'ka tampeng tamparima nka biikaang domang tasi'paria' kararaariko, tampa' kake'ii-eta maku'ereriai. <sup>13</sup> Nii' nii'ning-koo kanu'nuka-pina' auomarimaung deeko' tee tee kapoo' Kumponing bakaang, teka nii' tampa' taaramereriemaung deeko' makosi, dii' paku-koo tee' auomarimaung. <sup>14</sup> Ai' nii' tee Karistoo' bakaang piaae aa'na' siong-antamuri o'noring tasi'antamuri tee narung nii'koo boo'paru'nung ookara-koo, ee'noko tee'koo ookara tee moompiru'ning-pina' o'noring. <sup>15</sup> Ee'noko tee tee ookara-koo boo'paru'nung teing tee-koo napo' domampariainig bii'ka dotu-anta-koo deea', teka Karistoo' narung dotu-anta-koo, tee teing-koo boo'parara napo' domamparu'nung. <sup>16</sup> Tee' tasi'pampiru'nooketa nii'ke naning bakaang oo'oo-koo noru'ampiaung, kansi' bakaang noru'pina'. Karistoo' tee' noru'ampiko'nung deeko' enang tee' noru'ampia'. <sup>17</sup> Tee'koo tee naning Karistoo'koo otoring tee nera-ka'puing. Urikung onou otoa', teka ookutunung nera-ka'puing. <sup>18</sup> Aing teing ookara Kumponing-etaning tee ee'nara nii' baka-koo napo' navu-antamuru'nung Karistoo'koo, ee'noko navu-antamurira tee nko-nko nantoong napo' navu-anta-koong amuru' nii'ke nkoampii'naang. <sup>19</sup> Tee' aa'na' Kumponing ookara kansi'nupoong napo' navu-antavuru' baka-koo Karistoo'koo kuunge biikaang oraka' nkonanka deeruevuri-ma tuumpivuria'. Ee'noko teie baremuru' nii'ke tee minkunaa daankiampii'naang napo' Kumponing ninka navuariaina'. <sup>20</sup> Ee'noko nii' teing enang Karistoo' bakaning kara okomuri nkanuka Kumponing nii'koo kuunge karoko nantoong bokuarampimaing, ee'noko nii'ke ookara Karistoo'koo aa'na' kevi'arampiri bokuarampimaang aa'pampima: Aarumo orara siperira Kumponing ninka navurariai. <sup>21</sup> Kumponing tee Jiiisuu' oraka'nko noru'uaung oraka' nkonanka-po'nung deeng-antavuu' nii' pari'anta-koo, tee-koo kuunge nii' Kumponing bakaang aarumo koonto'po'nupoong deemarii'naang.

### Kara Okovuri Nkanukai Manki'nanka Puru'aamana'

**6** Tee'koo nii' Kumponing-koo nari' mintoomari-maung deemarima nii'ke pia-antarampimaang doona otoko dii'ke Kumponing bakaang piaa tampa'

komperimaatoaina'. <sup>2</sup> Ai' Daari Meekung-koo ee' minkuvuu'nung,

"Ninge tee nkaang piasa tenang oro'paramanang makotui'o' taarampirang, ee'noko te'mung domang-antana'mung-koo tee ninge pakurampirang."

(Aisaia' 49:8)

Tee batei Kumponing piasa oro'anta-koo minkuvuu'nung aung e'mung makotui'o' naurampimang. E'mung ee'na'mung te'mung nii' domang-antana'mung.

<sup>3</sup> Ee aing, pinaunuka taarameriaing, ai' nii'ke aarumo naning tupang-antavampipeu'nung dii'koo uro'kanoo'ke oro'antavampia' teing niikaning kara daang-antavupeu'nung. <sup>4</sup> Nka ookara nko-nkonankai niikaning tee sira'murimaung nii' teing Kumponing bakaning botovotonaanuka. Oomereriaing nii' tee aa'na' iveka'mori mintoamarimaung, bane ainge ee'oro'nankai paaramuriko: arikanankai ee'noko pore'nankai, napo' papaaranankai meumuriko teka niikaang mintoong-koo meuka. <sup>5</sup> Napo' teie aa'na' mura'maarimaunge, kiimatanava-koo si'maarikoo', totopurumaarimaung. Ee'noko napo' takaa'morikoo', aasi'koo tora'kampiarukoo', peera ninka, dii'koo ookara-koo.

<sup>6</sup> Napo' tasi'mereriai nii' teing domang kirokainku, napo' mataunukai, ee'noko napo' iira ninka mintoamariaunge, nka nantoong tampa' nari' tarear-ampimaung Tanuaang Meekung-koo kuunge piasa masakung ninka. <sup>7</sup> Nii' teing kara masakung narung minkuampimaung Kumponing bakaang purinto' kompampiri, ee'noko tampara aarumo ookanaantai kaa'ba-pina' kompampiritaa'. <sup>8</sup> Amutemurii' otooto'koo nii' Kumponing bakaning bautaranuka-pina' oro'antamarimaung: tenang tampa' nkomaariko nii'noo' poore'maariko, tenang daangamaariko nii'noo' daang-koo tuumpimaariko. Bane teie koomariri o'noriko nka tee tokomaarimaatoo'naang. <sup>9</sup> Bane ookarai noru'maaritaa', nka nii'ninge noru'maariaung-pina' nkomaarikoo'. Bane ampankeena' boo'nanka-pina' noru'maariko nka tee mme' domamariri o'noring. Tenang mura'maarima teie domang dupisi'maariaung. <sup>10</sup> Bane orarunsi-antamaarikoo', teka ookara batei-koo nii' dotumariri o'norimaung. Bane ata'kampiri, teka nantoong aa'na' biraankei maanto'antavarampimaung. Bane kapoo'navu' oto'memuria', teka kapoo' ookara okomuri otong.

<sup>11</sup> Dii' nii'maikorori' Koorin-nupoong, nii'ke tee sira'mariri naurarampimaung niikaang domang aa'na' daate'mariri. <sup>12</sup> Niikaang navunavu dii'koo avo'maria', teka dii' deeko' nii'koo avo'darimaung. <sup>13</sup> Ninge tee dii' nkaning toirekaa'pina' kararampimang. Tampa' maku'meriaing diikaang domang daate'dariri.

### Nii' Teing Kumponing Bakanava Meekava Makosinuka

<sup>14</sup> Teing ninka nantoong masika'anta oto'evoroaing ninka nari' pake'deriauka', ai' tampara aarumo orara aarumo ninka arekee' nari' meena'poresi oro'parepeu'? Ee'noko araka naanka mutaanang arekee' nari' otoresitaa' oro'parepeu'? <sup>15</sup> Ee'noko Karistoo'

naanka Sietani' arekee' marieerepeu'? Naning Karistoo'koo baito-nung ee'noko naning baitoropa aremeng-koo onou narung deemparepeu'? <sup>16</sup> Arekee' teing daang-koong kansi'koong kumponinanka Kumponing deto basi domampari otomaung bakaang pava dootuu'nava-koo makosiai teke otoropeu'? Ai' nii' teing Kumponing domaang okonara bakanava makosinuka, Kumponing aa'puu'na'koo,

"Ning tee teing ninka nari' o'noaing ee'noko teing ninka nari' meuke nanama'noai, ee'noko ning tee biikaang Kumponing deemari o'noaing ee'noko teing teing napo' nkaning nantoong deempariri otoroaing."

(Boontu 26:11-12; Esikiela' 37:27)

<sup>17</sup> Tee'koo Ovinge napo' aa'puu':

"Oravitu-eta tonta'darira taapo'ke otoriai. Kapoo' ku'mi'po'ning komperia' ee'noko dii' ninge onkeonke'dampiang.

<sup>18</sup> Ee'noko ning tee dii' Diuma deemari o'noaing ee'noko dii' teing nnurukaa' deentariri otoriaing, ookeng donkaang ee'noko maniku'. Tee' minkuvuing teie Oving Purinto'ke."

(Aisaia' 43:6; 52:11; Esikiela' 20:34,41)

**7** Ee mmaikori', teing aing maraka-antananka nkavampirinoo'keta kiiroraa'mariri o'noriaing teing-eta ookara kapoo' niikaang mono ee'noko tanuaang ku'mi'antavumaing-eta, ee'noko aa'na' paaramariai koonto' meeka'mariri oto'koo Kumponing-koo amorompiri.

### Koorin-nupoong Bere'aririo' Paula' Dotuaru'na'

<sup>2</sup> Domang daate'dariri otoriai nii'koo, ai' nii'ke naning orari-antavampia'; oraka' nkoampia'; napo' auraimaria'. <sup>3</sup> Aung tee kara ninge dii' tompintampima minkuampa', teka tee' tero naurampiru'na' naurampimang dii' teing nii'ke domange dai'darampirtaa' o'noriaininge, ee'noko moompima deeko' moompiaininge dii' ninka nari'. <sup>4</sup> Ning koonto' dii'koo aroo' pankaing o'nong. Aa'na' doturotumaramaung dii'koo. Napo' domang aa'na' kuaa'antamerimaunge. Ee'noko ookara niikaang-koo arikananka-koo tee doturotue maanto'muma piampumaung.

<sup>5</sup> Tenang ee'ngang Masedonia'naameensi'aape meru'ngang nii' tee niikaang mono uaa-koo koonto' makotuaruu'. Ookutunairu-koo meriko'noo'ka pore'anta kune'ampiko', aa'ning dama'due turang, kuunge avoro'. <sup>6</sup> Tekateie Kumponing domang manki'nuka kuaa'antavurimaunge kuaa'antamuru' Taitas tampa' nii'anko po'antavura. <sup>7</sup> Taitas pou'nung narung-koo deea', teka dii'ke domang kuaa'antaveriko'ning pora ee' oro'ning naumurio': ning piaamerimaunge ee'noko nkaang tautau taaraverima aa'na' orarunsi ninka bere'dariru'nunge. Tee' taamararai'nange dau basinoo' dotumarieeng!

<sup>8</sup> Bane tero nkaang karavoto daariantu'nunge orarunsi-antampiru'nunge, teka ninge enang baru' noru'ampa'. A'noo' tutung manki'mou'nung tee' daarirerompiru'nung-koo, teka enang tasi'pansi o'nong teie karavotoi tamung oki'noo'koo orarunsi-an-

taruru'nung. <sup>9</sup> Nka enang dotumaramaung, teka dii' orarunsi-antampiruru'noo'koo deea', teo teie diikaange orarunsi orara aarumo-ita bere'antaru'nung-koo. Ai' tee temurii' orarunsi dii'ke oro'an-taveru'nung tee Kumponing miru'uu'nung dii'koo. Tee'koo tee' oki'noo' nii'ke baike-antarampia'. <sup>10</sup> Tenang nantoong Kumponing piavomana' orarunsiarima bere'ariko tee domang-antavurimaung, ee'noko tee-koo domang manki'oroarupeu', teka kansi' bakaang aarumo siompai orarunsiarima Kumponing-koo domang-anta nkavaavaung. <sup>11</sup> Ooveriai, Kumponing piavomana' orarunsiariko kapoo' arekee' oro' basiaru' dii'koo. Bakei dii' namu'ke avoro' ninka tanterarira Kumponing-koo maia'dorira aa'na' aroo'eri kake'iirariru' tee orara aarumo naning nkovuu'nung ampankeena' ooveri otoko koomperira sim-piri'darii'naang tee' naurampiruna'. Bakei aa'na' ning dii'anko mora pakurampii'naang piaroru'. Napo' aa'na' noru'eri ee'noko motekaro'dariri tee kapoo' koonto' deeaung koomperu'. Ookutunairu-koo dii' masikeer-ariru'nung dii' koonto'nuka deentarii'naang tenai'koo tee naning bakanai'koo.

<sup>12</sup> Ninge dii'anko temu' daariantu'noo' tee dii'ke nii' aa'na' deto noru'mererimana' Ovinge sira'puu'naang. Tee naning oraka' nkoaru'nung baru' koong-anta-koo deea', napo' tee naning oraka' nkovuu'nung baru' paku-koo deea'. <sup>13</sup> Tee' deto noru'mererimana' naumererira nii' tee aa'na' domang kuaa'antamerereru'nung. Ee'noko daua napo' tee Taitas doturotuari poio' ooampira dotumariru' dii'ke ookarai teing kapoo' naurampiruru'ning siomperima domang kuaa'antaveru'noo'koo. <sup>14</sup> Temu' tee aa'na' daangantampiko'nung dii' tee-ankoi ee'noko dii' beero'durima tampa' ooruru'noo'koo dotu-antamuu'. Dii'ke masikee-antaverira maia'antameria' daangan-tampiko' noo'koo. Ookara kapoo' dii' daangantampima minkuantu'ning teing masikeng deemparu'ning tee' ookara kapoo' minkurampimaing masika'paramana'. <sup>15</sup> Ee'noko Taitasie bakei aa'na' noru'durimaung dii' aroo'keta onkeonke'eri'nung-koo amaiaa'dori dankuranku'darima. <sup>16</sup> Tee'koo ning bakei dotumaramaung dii' aroo'dariaining-pina' noru'dampima.

### Paula'ke Avuavu' Neri-koo Tante-antavuru'na' Judia'nupoong Paku-koong

(8:1-9:15)

#### Mooni' Oosiaavaina' Nauvuru'na' Paula'ke

**8** Enang tee mmaikori', nii'ke pia-antarampimaang tee' avusiro'ari oto'na' Kumponing piavurima teing Masedonia'naameensi'koo osi kante-koo dootuu'nupoong avuru'nung noru'erii'naang. <sup>2</sup> Bane aa'na' arikanankai paaravuriko ee'noko aa'na' ata'kai, teka doturotue maanto'uri avusiro'ariri avuavu' nkoaako'. <sup>3</sup> Koonto' oamira ninge sira'pamaang

makosiau'na' biikaang avuavu' nkoau'nung-koo, ee'noko bono' divu'au' avu'koo makosi-pina' oro'noo'. <sup>4</sup> Maroita bii'ka aa'na' tana'maako' nii'ke tau-ra'parampiko nii'ning ninka nari' pakuei nantoong Kumponing bakaning meekupoong teka Judia'ka pakuaarii'naang. <sup>5</sup> Nii'ke ee' noru'ampiko', "Ai' pang tang nii'ning mooni' sipaava'naang," teka teing bii'ka tutung avariru' Oving-koo ee'noko napo' nii'koo Kumponing bakaang pia-koo kuunge. <sup>6</sup> Tee'koo Taitas tana'ampiko aroo'ario' botoampiruru' teie koompaara'durii'naang temurii' pakupaku paa-koong dupeverii'naang, ai' dii' teing ee'narai tutung-antaru'ning tee' nko-koo. <sup>7</sup> Dii' bakei dau basinoo' amute-murii' aarumo Kumponing-etaning tampa' nko-koo bia'dorimaung aa'ning-koo: masika'anta-koo, kara-koo, noru'koo, ookutuari aroo'koo ee'noko nii' paa-koo. Enang napo' tanatariai nari' dau basinoo' avusiro'dariri nko-koo.

<sup>8</sup> Ninge eturampia' naurampimang diikaang paa taa'ni'poaina' oo-koo nii'ning ninka. <sup>9</sup> Ai' dii'ke tee noru'eri otong tee paa niikaang Oving Jiisuu' Karis-too' bakaang. Tee aa' bane maanto'ari otoitaa', teka dii' noru'duri boonko batari'arara ata'kuu' dii' teie bakaang ataata'ke maanto'antarii'naang. <sup>10</sup> Ee'noko ning nkaang tautau aung dii'koo, aung amurii' aarumo avuavu'koong nkoveriaina'koo: Boonamare'koo tee dii' ee'ning dootuu'nupoong ookara osi-koo avuavu'koo tutuna' tutuntaruru'ning, ee'noko tee narung-koo deea', tee avuavu' nko-koong pia tee dii'keta tutumparu'. <sup>11</sup> Enang tee tampa'na' ee': dupeveriaing temurii' nko-nko nari' dompirompi'doritaa' otori tutuntaruru'na' tee' dii'ka-koo makosina' noru'darimana'. <sup>12</sup> Kapoo' oto'deruriaung-eta deea', nka oto'derurining-eta avu'koo makosi. Arekee' basi tee avuavu' averiko tee Kumponing dotuaravaing diikaang aroaroo' oovui.

<sup>13</sup> Nii' tee dii'koo manki' pante'koo piamoria' teing pakuererimaing tamung kuaa'oro' otoroko, teka ookamenta nari' basi-koo piamori otong. <sup>14</sup> Enanung batei-koo tee mmou' oto'derurining-eta nii'ning pakuereriaing apuka'pariko tenang dii' apuka'dariko pakuraariaina'. Ee'noko ookara naru' basinoo' oto'deruriai. <sup>15</sup> Tee' Daari Meekunge maana' ukua'na' minkuvuma aa'pumana', "Bane tee naning mmou' oosivuu'nung, nka baru' deepo' oto'evua', ee'noko bane tee naning oki'ning oosivuu'nung nka apuka'parava'."

(Toro 16:18)

#### Paula'ke Taitas Dovang Botovuriko Onkeonke'arii'naang Nauvuru'na'

<sup>16</sup> Ninge tampara tampamang Kumponing-koo tee Taitas napo' Kumponing siong-antavumaung-koo dii' aa'na' pakururii'naang tee' ee'na' nari' ninge dii' noru'dampimana'. <sup>17</sup> Ai' tee Taitas tee aa'na' dotuari otong nkaang pia siompui napo' dii' beero'durii'naang, teka ee' noru'amaang, ninge nauamparuko dei baka beero'duripeu', ai' tee tee bakei dii' oo-koo aa'na' piavomaung. <sup>18</sup> Teka nii'ke Taitas ninka narung nii'maiko'



nari' botoampimang dii'anko uroresi beree'naang, tee ee'nara ookarai dootuu'nupoonge osi kante-koo tampa' noru'aamaung doorenang tampa' tampa' bereng-koo pakuvuriko. <sup>19</sup> Aung tee naning tampa, ai' ookarai dootuu'nupoonge osi kante-koo miru'au'nung nii' ninka nari' nanu'koo tee mooni' Karistoo' siompaamainge amaarimaung nari' kom-pampira dama' Jerusalema'ke tankaampampii'naang. Tee' ookara avuavu'nanka tavo'ampima tee Kumponing bakaang miring pankaing-antavampii'naang ee'noko niikaang paku-koong pia oro'an-tavampii'naang tee' pakumeeri. <sup>20</sup> Nii'ke bokuampiru'nung aung naning pakumurii'naang nantoonge tee mooni' avusiro'ariri sipau'nung oraka' tankaang-koo tuumpimaari'neeng-koo. <sup>21</sup> Nii'ke tampa' pukeampiri nkoampimaung kapoo' tampa' nari' nko-koo, Kumponing-koo dutakanoo'ke nara'ke deea', teka aa' nantoong-koo dutakanoo'ke tee' nari' nkoampimaunge.

<sup>22</sup> Napo' tenaanka ninka nari' narung nii'maiko' motekaro' dii'anko botoampimang tee ookara batei-koo kake'iiari amutemurii' manki'nanka-koo pakumuriko tampa' oampimaung, ee'noko dii' tampa' noru'duritaa' aa'na' masika' pakururii'naang noru'durimang.

<sup>23</sup> Taitas tee ni'ninka manta'maresi pakumeemaung dii' paku-koo ee'noko anaanka nii'maikorori'ka tenaanka ainge dootuu'nupoonge osi kante-kooning anke otoromainge miru'aaretu'naanka biikaang noru' sira'puree'naang. Napo' teie tee Karistoo' pankaing-antavuremanaanka. <sup>24</sup> Tee'koo dii'ke diikaang piaa oro'antaveriaing aing-koo, ai' nii'ke tee diikaang piaa pankaing-koo biivintampimaung, ee'noko ookarai dootuu'nupoonge ooaava'naang piamomaang.

### Koorin-nupoonge Judia'nupoong Pakuaariaina'

**9** Ee aing, aung a'noo' tamung dii'ke noru'eri otong daariamang teing nii'ning Kumponing bakaning meekupoong paku-koo. <sup>2</sup> Ninge noru'ansi otong dii' Koorin-nupoong aa'na' paku-koo piarori otong, ee'noko tee'koo ninge dii' Akaia'naameensi'nupoong daangantampimaung aing Masedonia'naameensi'nupoong-ankoi ee' nauarama: dii' boonamare'keta maamurariru'ning tee avuavu' nko-koo ee'noko dii' tee' dompirompi'doriko ooraarira teing-koo mmau' daa'ariru' tee' nari' nko-koo. <sup>3</sup> Tek a ninge teing aing nii'maikorori' botoaransinoo' tee nkaang kara biivintampimaung-koong tamunsi'nung deemparavaroonaang diikaang avuavu'koong ee'noko dii' maamurariri tampa' nkoveriko ooraarii'naang tee' nari' minkuamana'. <sup>4</sup> Tek a dii' daangantampimanoo'koo ning maia'mo'neenga tenang Masedonia'naameensi'nupoong ni'ninka nari' merira dii' maamurariaruko oorarampira. Ee'noko dii' teie, maia'doripeu'. <sup>5</sup> Tee'koo ninge ee' noru'ansing: ainge nii'maikorori'ke tutung beero'daarima pakuraarii' naang tampa' maamurariri dupe-anta-koo tee avuavu' avusiro'dariri nko-koo mau'dariru'nung. Bera ning moma tampa' maamuari

otoko ooampai tee diikaang avuavu' domang-eta avusiro'ari avu' deempari otoko, minkuminku-po'nung deea'.

<sup>6</sup> Aung kapoo' dii'ke noru'eriaing: Naning tee oki'ning sinang keempumaung tee oki'ning kavumaung. Ee'noko baa naning mmau' keempumaung tee mmau' kavumaung. <sup>7</sup> Narunge baka bakaang domange miru'uaina' avuai, domang manki'dori averi'neenga. Nii'narai botovuaina' avuauka', ai' Kumponing tee naning aroo'keta avu' nkovumaung piaavumaung. <sup>8</sup> Ee'noko Kumponing tee aa'na' aruripeu' apuka'darimanoo'keta deto, ee'noko bera teie teing-koo apuka'darimaing-koo ookara batei-koo makosiri oto'deruriaing, ee'noko enang tee dau basinoo' oto'deruriaing ookara tampeng nko-nkonanka-koo nii'ning paku-anta-koo makosina'. <sup>9</sup> Tee' Daari Meekung-koo aa'puu'noo'ka daariari otona', "Teie bakaang avuavu'nanka bereng-antavuu'nung teing-koo ata'oi'nuka-koo, ee'noko tee bakaang aarumo koonto' tee tee' nari' otoi otomatoaing."

(Kena 112:9)

<sup>10</sup> Kumponing tee keenkeeng nkonuka sinang avurimaung ee'noko dama'ke keenavaang tampeng avurikoo' nantoonge nai-koo, ee'noko tee' nari' teie ee'narai deepo' amutemu'ke sinananka du'antarerurimatoaing, mmau' kaverima tankaamperimaatoaina' tampa' aarumoi meena'dori. <sup>11</sup> Ee'noko dii' teing anatenairu-koo maanto'duri otoriaing tampa' avusiro'dariri otoriana' ookara batei-koo, ee'noko tee' nari' avusiro'dariri tee diikaang avuavu' niikaang bireng-koo siperiko teinge Judia'nupoonge Kumponing-koo tampa' tampaavaing. <sup>12</sup> Tee aung pakupaku dii'ke nkoveriaing tee, teing Kumponing bakaning meekupoong naing paku-koong deea' kapoo'koo apuka'pariko, teka tee Kumponing dotuaravai amutemu'ke teinge napo' Kumponing-koo tampa' tampaako. <sup>13</sup> Ee'noko teie nko-nko tamparai dii'ka tasi'antarariaing-koo nantoonge tee Kumponing pankaing-antavaavaing, dii'ke tee doorenang tampa' Karistoo' bakaang mavo'peri sira'perimaung-koo tee meumperi. Enang tee diikaang avusiro'dariri avuavu' teing-koo ee'noko nii'ning-koo averereriaing ooaara Jerusalema'nupoonge Kumponing daangampaavai. <sup>14</sup> Ee'noko biikaang kungsi-koo dii' pakuraarima pankaruntoonge noru'daariaing tee-koo Kumponing aa'na' deto basinoo' avusiro'antaruru'nung-koo.

<sup>15</sup> Tapa' masikung Kumponing-koo tee-koo bakaang avuavu' minku-paa'koo.

## Nii'ninge Paula' Daraumeempaio' Daang Noru'aako Siraka'antavuru'na'

(10:1-13:13)

### Paula'ke Teing Daviraa'au'ning Maku'uru'na'

**10** Enang tee, kontampiri ning eentamaramaang dii'koo, ning ee'nara Paula', tee naning nkaning too'de-nupoonge aa'maamaung, "Tenang nari' karompima aa'na' karoarukoo', teka tenang isipo' otoitaa' aa'na' karamurikoo'." <sup>2</sup> Tekaenang ninge daarirerompima Karistoo' doonko noru'ari navu ninka karomana' dii'koo eentamaramaang teing-eta tonta'dariaing. Tenang ning mora teing ning too'demaamaing turampama dii'koo nii'ning nari' turantampi'neenga. Ai' teinge ning tasi'maavainge ning kansinung aarumo siompamaung-pina' noru'maama aa'maamaung, "Paula'ke kiimatamuriarupeu'." <sup>3</sup> Teka tee bane kansi'koo o'noring, teka turang tovang kansinupoonge nkoaamana' nkoampiaung. <sup>4</sup> Tee iri' nii' oto'memurimaung tee kansinupoong biikaning kapatau-pina' oro' deea', teka tee Kumponing-etaing ee'noko Sietani' bakaang e'maniang pesi'koo makosie. <sup>5</sup> Tee Kumponing bakaang iri' ninka nii'ke siinka'parampimaung teing kara dairai'kooning ee'noko ookara daang minkunanka maavai'arima Kumponing tampa' noru'koo parapara'aama minkuaamaing. Ee'noko ookara biikaang mataunanka nii'ke pinka'ampiri bere'antavampimaung Karistoo' bakaang kara narung siompaava'naang. <sup>6</sup> Enang tee teing-eta tonta'dariri otoriko ning mora teing ning too'demaamaing kiimatavampaing ookara biikaning taarapiikanankakoo.

<sup>7</sup> Kapoo' diikaang duta-koo uro'kanoo'ke otoing ee ooveria' otong? Arekee'koo ning Kumponing dii' tarekoo miru'muu'nung-koo ampankeena'dorimaang nii'ninge tosiraariko? Naning Karistoo' bakaang kara-okovui-nka-pina' noru'ari otoing deeko' tee ning tee' Karistoo' bakaang kara-okovui-nka-pina' noru'muainge tee' baka noru'aramana' nari'. <sup>8</sup> Ai' Kumponing taa'ni'antamui pakumumaung, ee'noko naninge maia'antamuarupeu' bane deepo' daangamaramaung-pina' noru'mura, Kumponing makosi-antamumana' nantoong tare-koo minkuanko. <sup>9</sup> Teka aa'dampimang, tee dii' tare-koong iri' Kumponing amuu'nung tee dii' orari-anta-koong deea' nka dii' puring-anta-koong, nkaang karavoto dii' avoro'anta-koong-pina' noru'eri'neeng. <sup>10</sup> Ai' dii'koo nii'ninge aa'perikoo', "Paula'ke bakaning karavotonanka-koo aa'na' purimpari ivekung kara daarivukoo', teka nii' ninka o'nori amaiaa'omaung ee'noko bakaang kara tarii'oarukoo'." <sup>11</sup> Teinge tee' kareamainge ee' tasi'paavaing: Tee aa' kapoo' oovunamurii' otoa' teing-koo aing-koo aa'ningkoo, karavoto daariamaung tenang isipo' o'noitaa'

ee'noko tee kapoo' ninge nkoampaing tenang dii' ninka nari' o'nori.

<sup>12</sup> Ning tee makosi-pina' dooremaravaung teing-koo maavai'arima nau-antanuka tamparimaing ninka navaatang-koo oto'koo, ee'noko teing ninka naro' basi tang-koo bii'ka pankenanka tamparimaing ninka. Teka teing matauna' nkoaria' bii'ka miru'aamana' ooai paaravarima daang makosi-antavarikoo'. <sup>13</sup> Ning tee, teing-pina' deea'. Ninka doore karoma Kumponing miru'muu'noo' divu'ampauka'nung. Teka miring-koo biivimaravaing deeko' tee makosi miru'muu'noo' basiaro' biivimaravaing nantoong tare-koo miru'muu'noo'koo, ee'noko dii' teinge nkaang tanatakoo kuunge otoring. <sup>14</sup> Ning taapo' toonampa' Ovinge miru'muu'noo'keta tenang dii' tautaurampima, ai' tenang tutung ning dii'anko mera tampara dooreng Karistoo'koong naurampiru'ng Ovinge bakaang iri' oro'paravaru'nung dei ning Ovinge miru'muu'noo'keta taapo' toonamaung tammeripeu'. Teka tee' nkomarava', ai' tenang tutung mou'ng Ovinge iri' amuu'nung tee taa'ni'poi ning-koo oro'parako dii'ke ooverima domang bere'dariru'ng Ovinge-aape. <sup>15</sup> Ee'noko dii'koo mintoomaramana'koo daangamarama nii'ning biikaang nko-nko noru'ansi deepo' daangamaravaung. Nkaang pia tee diikaang masika'anta deto nari' dupui oto'koo bera niikaang mintoong dii'koo aa'na' kato panka'paravainge. <sup>16</sup> Aa'noaina', dooreng tampara napo' dankiampiai dii'ankoita kato anatenairu-koo. Ai' ning nii'nung bakaang nko-nko-koo daangang-koo piamoa' bakanoo'ke nkovuing-koo. <sup>17</sup> Teka Daari Meekunge ee' minkuvui otong,

"Naning daangang-koo piavora deeko' tee-koo Oving-koo daangamparavaing."

(Jeremaia 9:24)

<sup>18</sup> Ai' naning baka daangampama makotuarupeu', teka Ovinge daangampuko deeko' makosi.

### Paula'ke Kara Okovuri Nkanuka Daang Tampariko'ning Sirakaapuvuru'na'

**11** Io' taura'meri otoko oki'nanaare nkaang minkunaa-koo minkuampai. Bane biivimaring-pina' minkumarako teka dii'ke daangaming-pina' taaraverima domang ima'dariauka'. <sup>2</sup> Ninge dii' bakei Kumponing-koo kuunge tokontampimaing dii' orarirari'neeng-koo. Ai' ninge tee dii' narung naning-koo konteerii'naang miru'dampiru'ning tee ee'nara Karistoo'. Ee'noko tee-anko tavo'dampii'naang dii' manikuma nerai'na' kuukuma~pina' kiirora'oi otoko ba'unganko nampeesina'mung taavo'aamana'. <sup>3</sup> Teka amormaang ning tee' Iivi aavavuu'na' teie boru'ke ampirunge~ dii' tee' nari' naninge diikaang onou tokoona' kaake'antaruri'neeng Karistoo'koo pinka'dariri otorimanoo'keta. <sup>4</sup> Ai' dii' teing ou'ou'nuka-pina' oorampimaing. Naninge dii'anko pora nii'namurii' Jiisuu' minkuvuma nii'na' daankivuko teieta' ninge dii'ankoi daankiantu'nung-eta tee tamung danto siomperikoo'. Napo' tee onou Tanuaang Meekung-etaing tero

nkaveru'nung siperima oovunamurii' onou siom-perikoo'. Napo' doorenang tampara mare'ai nii'na' daankiaako tero daankianko'na'keta tee napo' domang ima'dariarukoo' tee-koo. <sup>5</sup> Ning tee bakei teing-koo boong basi-pina' noru'marava' teing-koo diikaning nau-antanuka-koo kara okovuri nkanuka pankeng tamparimaing-koo. <sup>6</sup> Ning tee bane matau-pina' karompauge, teka ning noru' o'nong. Ninge tee temu'keta avuntevunge tee' dii' tasi'antarampauge.

<sup>7</sup> Arekee'koo pa ning tee' tokomerimaunge? Tero ninge Kumponing bakaang doorenang tampara dii'koo daankiama moo' eentamarava'. Ai' tee' tompimari pankaing-antarampiko orara aarumo nkoa-maung-pina' oomerimaunge? <sup>8</sup> Ninge tee mooni' nii'ning dootuu'nupoong-eta nkavantu'nung tee dii' paku-antarampii'naang. <sup>9</sup> Tenang ning dii' ninka o'noritaang nange kapoo' piamoma nii'nung naning manki'antavampa', teka teinge nii'maikorori'ke Masedonia'keta porora pakumau' piamoko'ning-koo. Ninge dii' ookara taung-koo manki'anta avu'koo para'maramaung, ee'noko tee' nari' nkomaramatoaing. <sup>10</sup> Jiisuu' bakaang kara masikung ning-koo otona' masika' minkuamaang, naninge dii' Akaia'nameensi'nupoong-koonge napu'muauka'nung tee' daangamaramaung-koo.

<sup>11</sup> Aming-koo, ai' dii' piaarampia' ee? A, tee aa' Kumponing noru'ui otong aa'na' piaarampimana'.

<sup>12</sup> Ee'noko tee si'maravauka'nung tee' nari' nkoamana' nko-nko nko-koo. Teing nantoong ning-pina' basinuka tamparima moo' piavoroma bii'ka daangamparimaing e'mantoma oto'antavevorompauka'nung.

<sup>13</sup> Teing aing nantoong teing daang kara okovuri nkanuka tamparima, oovunung kara nau-anta-koo mintooparikoo', daang tosie Karistoo' bakaning-pina' oro'antavarima. <sup>14</sup> Ai' Sietani' tee'ke, baka nantoong tosivurima daang avitoitoi bere'aramaung maroita nantoonge koosinung~ araka-koong Kumponing-etaing-pina' noru'aara siompaava'naang. <sup>15</sup> Tee'koo kapoo' ta'nimpaarii' deea' tenang bakaning botovotonaa'nukai tee bakaang aarumo siompai nantoong tosi-aariko, tee' Kumponing bakaning-pina' oro'antavarima kara nau-antaraariko. Aing nantoong tee' oraka' nari' nkoarima botu basiaraiinoo'ke moo' makosina' kompaavaing.

#### Paula'ke Manki'nanka Bakei Mmau' Kune'uu'na' Kara Okovui Nkavuma

<sup>16</sup> Napo' unampama aa'pamaang, naninge ning baru' biivimaramaung-pina' noru'meauka', teka tokomerira deeko' tang taura'meriaing nii'ning taura'pererermana', ee'noko oki'noo' dooremaraing dii'koo.

<sup>17</sup> Aung ee' oro' aarumo ninka biivimaramana' tee Ovoringe baka nko-antavuaung ee'noko tee'koo tee' amako-pina' nkomaramang. <sup>18</sup> Tekate aing nantoong daangamparimaung deeko' tee' kansi'nupoong daangamparimana' ning teie tee' daangamaravaing.

<sup>19</sup> Makosi ape' aing? Amakonuka doturariri taura'pereremaung avutevu'daarimaato'naang dii' norukasi'nuka deentariama. <sup>20</sup> Napo' tang overi

otoriko aa'na' deto bia'oroi biikaning botovotonaa'nuka deeng-antaraariko', ee'noko opantaarimaa-too'naang. Daua'daarima miita'daarii'naang, napo' maavai'arima botoraariko'. Ee'noko oing-koo tanko'daarimaato'naang. <sup>21</sup> Aming-koo tee' tauradaririo' oraka' nkoraarimaunge? Ai' tee' tampa'pina' noru'erimaunge? Ee'noko tee' teinge taura'daririo' nkoraarimana' ninge nkorampiri dei ee doturaripeu'? Tee' ee maimaia'na' tamperiarupeu'?

Teka teing aing bii'ka biivimparimana'koo deeko' ning tee'ke, ninka biivimarapeu', teka tee' minkumarama ning makotua'na'pina' karomang. <sup>22</sup> Teing Iiburunupoong deeko' ning tee'ke teing ninka nari' Iiburukoonge. Teing Isireeli-nupoong deeko' ning tee'ke Isireeli-nunge. Teing Eebaraami' bakanaving-koonupoong deeko', ning tee'ke, Eebaraami' bakanaving-koonge. <sup>23</sup> Teing Karistoo' bakaning botovotonaa'nuka deeko' ninge noru'dopa-pina' karoma

aa'dampii'naang: Ning tee teing-koo dau basinoo' puru'aransitaa' aa'na' mintoomaramaung. Tee'koo kimatanava-koo mmau'namu'pie be'antamaakoo'; mura'maariko ninge aa'na' dau basinoo' sisikeera tora'pankoo'; dapi' moonkoo' amutemu'ke. <sup>24</sup> Nii'ning pa'noko'namu'pie Ju'nupoonge aa'na' oraka' tora'antamau', deerunoo'koo asi'namu' otoa' teing mura'mau'ning karenaumo kivora deemparaa'naang (39) te' taura'nii'noo' nantoong mura'koo. <sup>25</sup> Beemu'pie teinge Ju'deeainge bana'ke mura'mau'. Napo' nii'namung Ju'nupoonge kapange dupisi'maava'naang too'maako'. Beemu'pie aarerie~ nananko aareri naka'aru'. Teing-koo nii'namung aa'nou' muung na'mung ee'noko doong na'mung maiara'koo tamung koi'koo komari naampemarama o'nou'. <sup>26</sup> Ookara batei-koo tee diiri'mari o'nomaung. Tee' nanama aing aa'ning-koo koraposimarakoo': doua dovang-koo minki-koo, bakisipunankai tavu'koo, nkaning nantoonge ee'noko Ju'deeainge dapi' tamaakoo', osi pankeng-koo ee'noko pora'ka dapi' tamaakoo'. Pirung-koo dapi' minkimarakoo', ee'noko daang mmaikori' tamparimaing dapi' orari-antamaakoo'. <sup>27</sup> Aa'na' pore'moi mintoomaramaung. Nii'ning baru' aatumparukoo'. Peeramoma ntong-koo nukaa'mokoo'. Nii'ning taa-mang-koo ata'ankoo'. Kamaarie dupisi'mukoo' baarong nopa'maravaing oto'memuaruko. <sup>28</sup> Napo' aing baikenanka-koo daua ookara dootuu'nupoong osi kante-koo manki'moi aa'na' noru'arankoo'. <sup>29</sup> Tenang nii'ning amutemurii' parapaaranankai aruaru'oroko ning tee' aruaru' mantomarakoo'. Ee'noko nii'ninge orara aarumo-koo dua'antavaariko ning tee napo' iirang-antamaramaung.

<sup>30</sup> Ning biiving-koo etumerimatomanoo'koo makosi biivimaraing teing-koo nkaning aruaru'nairu sira'pumaing-koo Ovoringe bakaang puring ning-koo oro'paraa'naang. <sup>31</sup> Teie Kumponing tee niikaang Ovoringe Jiisuu' Karistoo' Baumai ookara batei-koo biraankeampimaatoing noru'mui otong ning tosimaava'. <sup>32</sup> Tenang ning teke Damaskasie o'noko teie ovo'ma'ke, tee daurarong~ Aretasi bakaange pia-

tooronuka~ botovuru' ning osi-koo parang-koo karanaanga tenkenanko nemaara dai'maava'naang.<sup>33</sup> Bera koo'marapeu'na' papaaravanko mmaikori'ke ning mmari'antamaama burunge doonko osi-koong parang-koo dama'due sing-antamau' ka'baraa'koo o'noko. Ee'noko tee' koo'maru' tee ovo'ma' bakaang bireng-eta.

**Paula'ke Mmau' Kapoo' Makensi'ning Nii'naung-koo~ Bere'arara Oovuu'na'**

**12** Tee' nari' daangamaramaa'noaing. Bane kapoo' basiaravauka', teka io' temurii' danga'daangang sipamira nii'naturii' danga'daangang-koo pare'maravaing aa'ning-koo nii'naung-koo bere'marama ooa-maing ee'noko teing kapoo' makensi'ning Ovoringe sira' antavumaing ning-koo.<sup>2</sup> Mare' kivora-ita karenau-mo divu'uu'ning-koo ning tee Kumponing paning-koo koonto' bakanoo' a'dei' beenaumo-navaro-koo deto bokumuu' beroveero'koo.<sup>3</sup> Tekana ning noru'marava' moni'naung meu'nung deeko' ai' pang tanuaano'ke meu'. Kumponing narunge noru'ui otong.<sup>4</sup> Tekana noru'ansi o'nong ning deto a'dei' basimaru'nung te' osi tampoo', ee'noko kapoo'nanka ta'himpaarii'nanka taaravarantu' nanging minkuvuma punkaam~ puaru-peu' aa'nanka, ee'noko minku-koo taura'parava'.<sup>5</sup> Ning tee' ookamira biivimarapeu', teka ning tee' nkomaravauka'nung, teka nkaang aruaru'nanka-koo deeko' biivimaravaing.<sup>6</sup> A'noo' tee biivimarama deeko' makotui'o' biivimarapeu' kapoo'nanka masakeng minkumarama. Tekana tee' nkomaravaung nantoonge baru' ning deto basi-pina' noru'maa'neeng-koo nii'naung-koo bere'marama oomaing-koo, teka kapoo' ninge nkoamaing ee'noko minkuamaing-koo deeko' noru'aitaa' tasi'maavaing.

<sup>7</sup> Tekana ning biivimara'neeng-koo teing kapoo' makensi'ning aa'na' pankeng ooantu'ning-koo tee teie Si-etani'ke mono-koo too'mung si'muu' teketa tora'antamumaatoo'naang Ovoringe taura'puio'.<sup>8</sup> Bera tee teketa beemu'pie eentamaru' Ovoring-koo tonta'uu'naang ning-eta.<sup>9</sup> Tekana teie aa'muu' ning maku'muma, "Ninge da' piaransi pakuramana' tee' makosina' da'koo, ai' nkaang iri' tee dupeari' oro'paramaung teing-koo aruaru'nuka-koo." Tee'koo ning aa'na' deto basinoo' dotumari daangamaravaing aruaru'momanoo'koo tee Karistoo' bakaang iri' ning-koo oro'paravaina' aroo'ansi.<sup>10</sup> Tee'koo ee'na'koo Karistoo' siompansi ning dotumaramaung aing aa'ning kune'ama: puring mantomaravaruma, deu'dovamaako, pore' kompama, turamaako ee'noko arikananka kune'ama, ai' tenang aing sisikeerananka kune'amanang tee Karistoo'ke puring-antamuraung bakaang mintoong nko-koo.

**Paula'ke Koorin-nupoong Biikaang Masika'anta Puring-anta-koo Piavou'na'**

<sup>11</sup> Tee kara ninka biiving-koong kanu'pina' karoma minkuansing tee dii'ke daangameripeu'ninge pore'an-

tameriko minkuansing. Bane ning tamunsi'nunge, teka teinge kara okovuri nkanuka pankeng tamparimaing ning koonto' puru'maava'.<sup>12</sup> Tenang teke dii' ninka o'noi ninge ookara kapoo'nanka-koo iri' o'marava' doong kante taa'ni'antamaru'nung koonto' Kumponing bakaang kara okovuri nkanuka-koong masakung-pina', tasi'antamarama aing aa'ning dii'koo meu'ke nkoarako: amutemurii' ta'ning-antananka, taa'ni'antananka ee'noko nko-nko purinto'nanka.<sup>13</sup> Ee'noko ninge dii' tampa' dootuu'koo donkong-antampiruu' nii'ning osi-koo donkong-antavarantu'na' nari', teka manki' dii'koo sipampa' nii'ning-koo sipantu'na', ai' teinge taamang tovang-koo pakumau'nung. Nkana ning dii' ninka o'noi kapoo'nanka nkaang moni' paku-anta-kooning-koo apuka'marama ninge dii' eentampia'. Tekana ninka taremaru'nung-koo oraka' noru'meriauka'!

<sup>14</sup> Enang tee ning maamumaramaang dii' beero'dampii'naang beemu'pina', teka ninge dii' manki'antampiauka'nung nkaang apuapuka'koo, ai' ning tee dii' naing-koo piamomaung, diikaang kapoo'nanka mooni' dovang-pina' oro'nanka deea'. Noru'eriaing, toirekaa'ke tee biuma kapoo' kore'aavaung, teka biu-mai baurukaa' kapoo' kore'urimaung.<sup>15</sup> Tee'koo ninge dii' dotumarama pakurampiri ookara kapoo' nkaning dua'ampaing ee'noko napo' boo'koo taura'mari otong dii' pakurampima. Ai' pa ninge dii' aa'na' piarampi-maung-koo ee' oki'noo' paa-koo maku'meriaing?

<sup>16</sup> Dii'koo nii'ninge aa'merimaung, "Masikung manki'antamuraung-pina' oro'paramaung, teka dau'amurima ooampia'na' mooni' nkavumaung."

<sup>17</sup> Arekee'koo tee'merimaunge? Ai' ninge teing botoarama mooni' eentaraarii'naang botoarampa' ee'noko teing porora mooni' dii'koo nkavaava'.

<sup>18</sup> Ninge tee Taitas botoantu'nung dii'anko bee'naang, nii'nung ninka nii'maiko' ninka. Ee'noko Taitasie mooni' nkareruria', ape' aing? Ai' nee'ke tee narung taung siompampemaung narung noru' ninka.

<sup>19</sup> Enang ning ee' minkumarako dii'ke pa ee' noru'merimang: "Aung Paula' baka pakuramanoo'koo nii'koo dutakanoo'ke maroita tampa' oro'paraa'naang ee' karomang." Tekana tee' deea', ee' mmaikori'. Kumponing narunge simpe'muaing noru'ansi Karistoo'koo kuunge tee' karomang ookara karananka taaraverima koontariri otorii'naang.<sup>20</sup> Ai' ninge avoro'antampimaang tenang dii'anko mera ning piamoa'na' otoriko oorampi'neeng-koo, ee'noko dii' doturariaru-peu' ning mora turantampiri dei aing oreng aarumonanka-koo ee' oro'ning-koo: tata'naang, mamairo, peusi'kuma iira, siivenke'nanka, deu' dovang, minkuminkuru, baka kirokaiari oto', ee'noko onou betoveeto' ninka oto'.<sup>21</sup> Ee'noko napo' ee'koo ning amoromaung: nkaang Kumponing oomui otoko maia'mo'neenga tenang dii'anko mora napo' biromarako tenang karingai oreng nko-nkonanka mme' sipaavaruko ee'noko bere'aria' teieta biikaang aarumo ku'mi'po'nanka-ita ee' oro'nanka-ita: kaukauro, ee'noko anutua maimaia'na'nko.

Koorin-nupoong Biikaang Masika'anta-koo Tareariaing  
Nauvuru'na' Paula'ke

**13** Enang tee ning maamumaramaang dii' beemu'pina' beero'dampii'naang. Ookara kapoo' simpe'kooning tavo'erii'naang nerirarira masikee-anta-nupoonge beenaumoi nii'noo' kenaankarai tavo'koo makosi. <sup>2</sup> Tenang ning dii' ninka nari' kemu'kana' o'noru'ngang tero koono-antarampiri tautaurampiru'. Enang taapo' o'noi napo' unampama naurampima aa'pamaang: Ninge tee teing temu'keta oraka' nkoari-maing ee'noko napo' nii'ning nari' nkoariaining mora ookara naro'ka turampampaing. <sup>3</sup> Dii'ke taa'ni'anta ning-koo oo-koo piarori otong tee Karistoo' ning-koo kuunge karomaung-koong. Bakei ooverii'naang tenang turampampainang, ai' tee Karistoo' tee aru-aru'oa' dii' koong-antarurima, teka tee tee iri'oi otong dii'koo meu'ke. <sup>4</sup> Nii'ke tasi'koo ee' ooampiaing, bane teie aruaru'oio' aa'barata'koo bi'aara dupisi'au'nunge, teka tee tee domampari otong Kumponing bakaang iri'ke. Ning teie tee-pina' nari' aruaru'ke tee aruaru'oi otoko'na', teka tee Kumponing bakaang iri'ke ning tee tee ninka nari' o'noremaatoaing dii' koong-anta-koo.

<sup>5</sup> Dii' dii'ka paararariai diikaang domang-eta baito-koo otorimana' masika' oo-koo dii'ka Karistoo' bakaning masika'antarariaina'. Dii'ke ee tasi'peria' tee Pako'pari'nii' Jiisuu' dii'koo otoing? Tek a'noo' para-paara-koo dua'darimaung deeko' dii'koo otoa' tee. <sup>6</sup> Ee aing, ninge tampa' tasi'meripeu'na' noru'amaung, ai' ning tee parapaara-koo dua'maravaung. <sup>7</sup> Tek a'ning tee ning kunsimaramaang Kumponing-koo dii'ke kapoo' orara nkoveriaroo'naang, nantoonge ning kara-

okomui-nka-koo makosi-pina' oomaava'naang deea', teeo dii'ke tampa' aarumo siomperii'naang piamoi. Ee'noko bane turantampiaruma aruaru'pina' oro'marako ning makosi deeaung-pina' oomaapeu', teka dotumarapeu' dii' tampa' otoriko oorampira. <sup>8</sup> Ai' ninge tampa' aarumo-koo nantoong turamparamparupeu', teka deto puring-antavarampeu' kara masikung siong-koo. <sup>9</sup> Ning dotumaramaung tenang ning aruaru'pina' oro'maramanang dii' purintariri otoriko diikaang masika'anta-koo, ee'noko nkaang kungsi tee dii' paku-koo nkoamaung dii' petaa'dori otorii'naang. <sup>10</sup> Tee'koo enang ning taapo' o'noi ane' daarirerompimang tenang ning dii'anko mera iiramoaroo'naang tee ninka iri' Ovinge amuu'nung ninka. Ai' teie iri' ning amuu'nung tee dii' deto du'anta-koong, dii' kepu'koong deea'.

**Kara-koo Asi'naare**

<sup>11</sup> Asi'namoora'koo aa'dampimang ee mmaikori': Tampang, otoriko! Petaa'doriai. Tautau taaraveri domang kuaa'doriai, ee'noko napo' narung noru' ninka mooa-koo otoriai. Bera tee Kumponing pias bauko mooa-po'nung dii' ninka nari' otoaing. <sup>12</sup> Ee'noko tampa' nari' onkeonke'deeriaing Kumponing-koo meekupoong-pina' otori. <sup>13</sup> Ookarai Kumponing bakaning meekupoonge anke otoromainge biikaang doturotukoong tampa' tang botoaamang dii'anko.

<sup>14</sup> Tee biraanke Ovinge Jiisuu' Karistoo' bakaang ee'noko napo' tee pias Kumponing bakaang ee'noko tee navunavu Tanuaang Meekung bakaang dii' ninka nari' otomatoaing. Ee', masikung.

# KALESIA

## Kara Baavootunanka Ane'kooning

1:1 Kumponingee Ee'narai Paula' Bakaang Kara Okovui Nka-koo Miru'uu'na'

2:15 Teing Jiisuu'koo Baito-nupoong Naing Kumponingee Koonto'nuka Tampurimana'

5:1 Tanuaang Meekunge Baito-nupoong Siong-antavurimana' Tampa' Nkoveea'naang

### Kumponingee Ee'narai Paula' Bakaang Kara Okovui Nka-koo Miru'uu'na'

(1:1–2:14)

**1** Ee aing dii' dootuu'nupoong Kalesia-nameensi' otorimaing osi kante-koo, nii'maikorori'ke ookarai nari' o'norimaingee tampa' tampampimaang dii'anko daarirerompima ni'ninka Paula' ninka; <sup>2</sup> Ning tee Paula' Kumponingee Baumai ee'noko Jiisuu' Karistoo' boo'keta daa'antavuu'nung, tekange ee'nakange koon-to' miru'muretu'nung beekaang kara okomui nka-koo, nii'ningee deea'.

<sup>3</sup> Biraanke ee'noko moa dii'koo otoaing Kumponing Niuma-itaing ee'noko teieta Ovoring Jiisuu' Karistoo'.

<sup>4</sup> Tee ee'nara niikaang oraka' nkonanka tonta'memuri baka avaru'nung kansi'koong orara aarumo-ita moo'murii'naang enanaroong-koo otomaung-eta Niuma Kumponing meumpui. <sup>5</sup> Tee-koo daangang otoaing ookara batei boturopa-koo. Ee', ee'na'.

#### Tokoonamuriau "Tampara Doorenang" Tampaama Siompai Poariru'na'

<sup>6</sup> Ning bakei ta'ninansi o'nong dii' da'deng bere'daririo' Kumponing-eta, tampa' bokururu'nung-eta dii' bauta'durii'naang Jiisuu' Karistoo'ke. Tee siperi-ma ta'nina' nii'namurii' kara siong-koo tutumperu' "tampara doorenang" tamperima. <sup>7</sup> Teka tee nii'namurii' tampara doorenang otoa'. Nantoonge tosiraariko siperu' tampara doorenang Karistoo'koong ave'koo piavoromaingee. <sup>8</sup> Baa tee, bane nii' ai' koosin-ung~ paning-eta deeko' daankiampipeu' oovunaare "tampara doorenang" tampampima tero daankiampiru'nung-pina' oro' deeaung, tee aa' tee barakosi'ari otoaing. <sup>9</sup> Enang napo' unaunantampiri naurampimang: Baa tee naning oovunara kara "doorenang tampara" tampuma daankirurimaung daka'pui tee tenaare tero taaraveru'naare, tee tee ee'nara barakosi'ari

otoaing. <sup>10</sup> Aung arekee', ai' nantoong dotu-antavarama'naang minkuansinunge ai' Kumponing dotu-anta-koonge? Tee aa' nantoong dotu-anta-koong deea'. Nkaang aarumo nantoong dotu-anta narung-koong deeko' ning tee Karistoo' bakaang botovotonaa' deea'.

#### Doorenang Tampara Masikung Tee Baka Karistoo'ke Paula' Oko-antavuu'na'

<sup>11</sup> Dii'ke mmaikori'ke ee' noru'erii'naang piamo-maang tee ee'nara doorenang tampara ninge daankiantu'nung tee naning kansi'koong bakaang deea'. <sup>12</sup> Ai' nantoong-koo baremarava', napo' naningee nau-antamua', nka baka Jiisuu' Karistoo'ke sir-apo'uu'nung ning-koo. <sup>13</sup> Dii'ke ning noru'meri o'nong nkaang urikung otooto' Ju'nung aarumo-koo kuunge o'noko'na'; <sup>14</sup> Ning tee nkanavarang-koo bakei dau basi Ju'nung aarumo-koo nkanavitu-koo. Kaakatauro bi-ikaang pare'naanta aa'na' purimari siompansitaa' teing dootuu'nupoong aa'na' tavarama turamparanko' pesi'arama'naang paaravama; <sup>15</sup> Aung aa' tee teketa ning-koo kapoo' nkoaru': Tee tee ning ponto'mar-avaruko Kumponingee tero miru'muu' bakaang kara-okomui-nka deemaraa'naang; <sup>16</sup> Teketa bokumuu' domaang oparavaung amuu'naang, ee'noko napo' baka bakaang pia siompuitaa' tee Bauring ning-koo sir-apo'uu' ninge daankiama'naang tee avitevitunanka-koo; <sup>17</sup> Tee' nkoarako naning baa tasi'antamuaing besia'ampa' ee'noko Jerusalema'aape mea' teing-anko ning-koo uro'kanoo'ka kara-okovuri nka-nupoong deempariru'ning-anko, teka ning Arebia-nameensi'aape tenkenantu'. Ee'noko napo' dama'ke Damaskas-namono-aape toromaru'. <sup>18</sup> Teketa beemare'pi masiraani tankinuko Jerusalema'aape napo' toromaru' Siipas, tee nii'na' Piita, beero'ama'naang, ee'noko kivora-ita pa'noko' doong o'nou' tee ninka. <sup>19</sup> Teka nii'ning kara okovuri nkanuka-koo ooarampa', Jeemisi narung deeko' Ovoring baara'ma'nung ooantu'. <sup>20</sup> (Aung kapoo' ninge dii' daarirerompimatomaung-koo Kumponing-koo uro'kanoo'ke ning tosimarava'.) <sup>21</sup> Teketa tee ning

aa'ning-aapei meu': Siiria-nameensi' ee'noko Silisia-nameensi'.<sup>22</sup> Ee'noko tee nii'ninge ning oing oomaava' Karistoo' bakaning dootuu'nupoong-kooning Ju-dia'nameensi'ka.<sup>23</sup> Teka tamung teinge ee' nari' taaramau': "Tee aung tee nii' tamuriko'nung enang tee minkunaa masika'antavampimaung daankivumang aa'nung tero turang-koo paaravuko'".<sup>24</sup> Ee'noko teinge Kumponing daangampau' ning-koo.

**Nii'ninge Kara okovuri nkanukai Paula'  
Daankiarako'na' Tampa' Tampau'na'**

**2** Teketa kivora-ita karenaumo mare' tankinuko Jerusalema'aape meu' napo' Banabas ninka, Taitas nari' bokuansi.<sup>2</sup> Kumponing botomui' nanantu' ee'noko tee doorenang tampara teing-koo Ju'deeaing-koo daankiamaung napo' teing teka nauarantu', miring-po'nupoong naing biikanairu-koo, ee' noru'ama: Aung kapoo' ning pore'momaung nii'ning porora daang deeng-antavaa'neeng.<sup>3</sup> Nka tee teinge aroo'au' bane nii'ning baka-bokunanka kontevoroio' tee-koo Taitas ni'ninka nari' moretu'nung dopa' toto'pamparu'nung-koo dootuu' aappearako. Teing tee makensi'navitu nii'maikorori' tamparima maroita ku-ung porou'ning baakenemaarii'naang tee tampara ootoo'koo Jiisuu' Karistoo'ke nii' amuru'nung Moosesi-ning botoi dai'ari oto'keta tonta'antamurima;<sup>4</sup> Teinge nii' dai'anta-koon' tee' minkumaaru' nii' un-aamori o'noring. Nka tee teinge nii' ninka nari' miring-po'nupoonge nkaang tampara doorenang aroo'aara botomaaria' Taitas dopa' toto'koo Kiriki'nung deemparako, Ju'deeaing.<sup>5</sup> Oki'noo' aroo' o'noria', bane batei oki'namu'koo. Tee kara koonto' doorenang tampara-koong orari-anta-koo taura'parampia' dii' noru'darampima.<sup>6</sup> Teing tee miring-po'nupoong deempariri kapoo' deea' ning-koo, ai' ookara teing nari' oro'nuka Kumponing-koo. Nka teinge tee miring-po'nupoonge nii' ninka nari' o'noru'ninge kapoo' nii'ning be'nu'antavai minkuaava' ninge minkuantu'ning-koo daua.<sup>7</sup> Bakei otoa'. Teinge tee ning noru'mau' Kumponing ning aroo'mui botomuu'nung tee doorenang tampara okomui bereng-antava-ma'naang teing-koo Ju'deeaing-koo tee' nari' Piita oko-antavura botovuu'na' Ju'nupoong-koo.<sup>8</sup> Ai' ning tee Kumponing iri' amui' tampa' mintoomarako teing-koo Ju'deeaing-koo tasi'mau', tee' nari' Piita kara-oko-antavui' tampa' mintoomparako'na' Ju'nupoong-koo.<sup>9</sup> Tee avuavu' Kumponing deing tasi'paama Jeemisi dovange, Siipas † ee'noko Jooni, teing ee'ning oko'bosi'nuka tampaarimaing dootuu'koo, nee' Banabas naanka Paula' bireng batu'maaretu' nee' teing ninka manta'ka taa'ni'antamaarema nee' Ju'deeaing-anko meree'naang ee'noko teing Ju'nupoong-anko beroo'naang.<sup>10</sup> Teketa tee narung kapoo' masikung nko-koo naumaaretu' nee'ke, teing ata'oinku pakuarampee'naang, tee' ee'na' aa'na' piamou'na'ke.

**Piita Dovange Tampara Doorenang Oraka' Pituaako  
Paula'ke Koompuru'na'**

<sup>11</sup> Teka tenang Siipas Antioki'navuntu'koo pou'naning ninge tee duta-koo karavama turampantu' kiimata-koo makosina' nkoario'.<sup>12</sup> Ee' otong: Nii'ning nantoong mme' poroaruko Jeemisi-ankoita Siipas Ju'deeaing ninka tampa' nari' taamanaako'. Teka te' tavo'ariko dopa'toto'navitu-pina' mantompuri dama'du-aape kai'aru' ee'noko tonta'aru' teing tero navuariko'ning-ankoita.<sup>13</sup> Ee'noko tee' nkoarako teinge nii'ninge Ju'nupoonge Karistoo' siimpaako'ninge tampara doorenang-koong aarumo nari' daka'pai siompau' tee. Ee'noko aa'nou' Banabas nari' barampau' tevunge oravunge.<sup>14</sup> Teka tenang tampa' siimpaavaruko tee aarumo tampara doorenang-koong ninge oamira Piita turampantu' ookara-koo dutakanoo'ka ee' minkuama, "Bane da' Ju'nupoong-koonge niikaang aarumo sipei Ju'deeaing-pina' nkoraramaung. Tee' nkorarakotaa' arekee' enang tororari bere'antaverimang Ju'deeaing Ju'pina' otoroo'naang?" Tee'pantu'.

**Teing Jiisuu'koo Baito-nupoong Naing  
Kumponing Koonto'nuka Tampurimana'**

(2:15–4:31)

<sup>15</sup> Aming-koo, nna' bane nii' Ju'koo meu'ke pon-to'mariru'ning Ju'deeaing oreng-koo deea', teka nii'ke noru'ampiri otong Kumponing naning koonto' tampaung Moosesi-ning boto siompumaung-koo, teka Jiisuu' Karistoo' masika'antavumaung-koo deeko'.<sup>16</sup> Ee'noko nii'ke Jiisuu' Karistoo' baitoampiru' Kumponing ninka naroomariri o'norii'naang Karistoo' masika'antavampimaung-koo, boto siompampimaung-koo deea'. Ee'koo, naning otoa' boto siompumaung-koo Kumponing koonto' tampaupung.<sup>17</sup> Enang tee Kumponing koonto'nuka tammuriana' besi'ampiri Karistoo' bakanavung siompampima nii'namurii' aarumo-koo basi-antamuriko deeko', Moosesi-ning botoi taura'puaung-koo, tee-koo aarumo-koo arekee' minkuampii'naang nii'ke? Ee' ee' minkuampii'naang, "Karistoo'ke orara aarumo-koo basi-antamuring."? A, tee' aa' deea' bakei.<sup>18</sup> Ninge oong boto aarempansing sira'marapeu' napo' daa'amira tee aarumo boto sionge domang-koong, tee tampara doorenang daankiama pesi'ankotaa' napo' sipamira tee.<sup>19</sup> Nka tee ninge daa'ampauka'nung, ai' ninge tee Moosesi-ning boto siompamaa' noko teie teka totora'muu' nkaang sionsiong-koo ning boo'koo tuumpimura. Tee' ooansirai'nange bere'maru' Karistoo'koo bi'antamari tee ninka aa'barata'koo tero moontu'nung-pina' o'noi Kumponing-ankoi domamaraa'naang.<sup>20</sup> Tee ning nari' Karistoo' ninka aa'barata'koo bi'mari moontu'nung deemaritaa' enang tee domaang ning-koo kuunge otoing koonto' ning-koong deea', teka tee-koo Karistoo' kuunge domampari otong ning-koo. Ee'noko nkaang ootoo'

† Nii'noo' miring Piita. Ooveai Jon 1:42.

enang o'nomaung anke kansi'koo Kumponing Bauring masika'antavansi domamari o'nomaung, ee'nara piaa-mura avaru'nung ning-koo boo'paraa'naang.

<sup>21</sup> Kumponing naning koonto' tampupeu'nung dei aarumo boto sionge domang-koong paaravuko deeko', Karistoo'nung boo' tamunsi'nung deempapeu'. Tee'koo temurii' aarumo napo' daa'ampauka'nung Kumponing avusiro'ari tampa' nkomuu'na' tamunsi'nung deempara'neeng-koo.

### Jiisuu' Masika'antavaara Tanuaang Meekung Nkavau'na' Kalesia-nupoong

**3** Dii' Kalesia-nupoong bakei kanukanu'nanka! Are-kee'koo dii'ke kara masikung siperi, ai' pa naning doomaruringe? Nii'ke tee dii' naurarampiru'nung Jiisuu' Karistoo' baru' aa'na' siraka'antarampima koonto' dii'ke oovering-pina' tasi'antarampiri aa'barata'koo bi'ari dii'koo boo'paru'na'. <sup>2</sup> Aung io' kapoo' narung dii'ke naumerii'naang: Dii'ke ee tee Tanuaang Meekung Moosesi-ning Boto siomperimaung-koo nkaveru'nung? A, Moosesi noru'eria' nkaveru', tee Jiisuu'koong doorenang tampara taaraverira baitorariru'nung-koo. <sup>3</sup> Aa'na' kanu'dariri ampa'doru'nunge Tanuaang Meekung nkaveru'na', ee'nara nkaverira domang neraka'dariru'nung? Tee domang neraka'dariru'na' ee tamung mono bakaang iri'ke Tanuaang Meekung-eta taapo'ke dupeverii'naang noru'erimang? <sup>4</sup> Teing kapoo' ivekeng tero mantontariru'ning enang ee tamunsi'nanka deemparing? Tee' nkoarapeu' daana'? <sup>5</sup> Tee ee'nara dii' Tanuaang Meekung avusiro'ari aruru'nung ee'noko kapoo' ta'nimpaarii' purinto'nanka tavo'antarerurikoo'. Enang naumeriaing tee ee Moosesi-ning Boto siomperimaung-koo tee' biraankerurikoo' ai' doorenang tampara taaraverira baitorariru'nung-koo? Dii' aa' baitorariru'nung-koo tee' biraankerurimaung.

### Kumponing Bakaang Maraka-anta Masika'antavura Biraankearu'na' Eebaraami'

<sup>6</sup> Eebaraami' tee'ke, Daari Meekunge aa'pumana'koo: "Kumponing bakaang maraka-anta masika'antavui'o' ee'noko Kumponing bakaang masika'anta oovura naning koonto'nung tampuu'."

(Pupu' 15:6)

<sup>7</sup> Tee'koo enang tasi'periaing Eebaraami' baurukaa' masikeng teing nantoong masika'anta-po'nupoong.

<sup>8</sup> Teroita daariari otomaung Kumponing koonto'nuka tampuriaina' teing avitevitu Ju'deeaing baitoariko. Daari Meekunge naumurimaung Kumponing Eebaraami'koo tee tampara doorenang daankivuu'na' aa'puu'noo'ka:

"Ookarai avitevitu da'koo biraanke nkavaavaing."

(Pupu' 12:3)

<sup>9</sup> Aung ee' miru'ari otong: Nantoong Kumponing-ning maraka-anta masika'antavaamaing tee, nari' biraanke nkavaamaung Eebaraami' ninka, masika'anta-po'nung ninka.

### Teing Moosesi Bakaang Boto-koo E'manaamaing Domaang Paa'ariaina'

<sup>10</sup> Teka baata teing Moosesi-ning Boto siong-koo mantomparimaing teing bakaang barakosi'koo kuung otorong, ai' Daari Meekunge ee' minkuvumaung:

"Baa tee naning Moosesi-ning boto siompui tee' nari' keperuu'aravauka'nung ookara batei-koo daariari otoina' pukevui tee barakosi'nii'."

(Boto 27:26)

<sup>11</sup> Ee'noko napo' ee' sira'pari otong tee naning Kumponing ninka naroomparavarupeu' Moosesi-ning boto siompumaung-koo Daari Meekunge napo' aa'puu'na'koo:

"Naning tee Kumponing baitovuko koonto' tampuainung domamparavaing."

(Abakaka 2:4)

<sup>12</sup> Tee'koo Moosesi-ning boto sionavung makotua'navung deempari otong baito-aapenavung deearuko ee' minkuaramana'koo:

"Nanging tee boto siompui nkovuuaing tee teing nkononanka nkovuuaing-koo domamparavaing."

(Boontu 18:5)

<sup>13</sup> Teka Karistoo'ke moo'muru' nii' tee boto-koong barakosi'keta bakaang monoi barakosi' kune'ura nii' pari'antamurima, tee' Daari Meekunge minkuvumana' aa'puma,

"Ookara barakosi'po'nupoong koi'koo bi'aariaining."

(Boto 21:23)

<sup>14</sup> Jiisuu' Karistoo'ke tee' tora'puu' tee Kumponing-ning biraanke Eebaraami'koo minkuvuu'nung Ju'deeaing-koo poo'naang, tee-koo baitomarimaung-koo nii'ke Tanuaang Meekung nkavampiaing, tee bauta' maraka-antamuru'nung.

### Moosesi-ning Botoi Toto'puarupeu' Tee Teroitaing Maraka-anta

<sup>15</sup> Mmaikori' ee, enang kara miru'po'nung naurampii'naang nii' doong kante nkomarimana'koong. Noru'eriaing, kapoo' kara naninka kenaankai naroompurepeu'nung, ee'noko marakavareko narunge toto'puarupeu' ai' be'nu'uarupeu' bane naninka kansi'koonana marakavareko, ee'noko Kumponing bakaang maraka-anta toto'koo makosi deea' bakei.

<sup>16</sup> Enang tee Daari Meekung-koo otoina' tee Kumponing Eebaraami' maraka-antavuretu' ba'dompeng ninka nari', ba'dompeng isi'isimpuaing. Daari Meekunge ee' minkuvua', "dakaning isi'isinanka ninka nari'," mmau'koo tampuma, teka narung minkuvuma ee' minkuvuu', "dakaang isi'ising ninka nari'."

(Pupu' 12:7)

Ee'noko tee isi'ising tee Karistoo' ee'nara miru'ari otong.

<sup>17</sup> Tee aung kapoo' ninge miru'ansinung: Teie botoi toto'puarupeu' dama'ke tavo'kuu'nunge mare' narung daaku'keta beaumo kivora divu'kuio'. Tee Kumponing kara naroom-antavui tero pinka'uu'nung ee'noko Moosesi-ning Botoi tee maraka-anta daang



deeng-anta-koo makotua'. <sup>18</sup> Nii'ke tevung boto sion-avung siompampikotaa' Kumponing ninka naroomaripeu'nung dei tee ee' sira'parapeu'nung; tevung nii'na' oro'navung Kumponing narooong-anta nka-koo, Eebaraami'ke siompuu'navung-pina' deea', ai' teie tee tamung Kumponing bakaang maraka-anta masika'antavuko Kumponing bauta'ui tee ninka nari naroonii' tampuu'.

<sup>19</sup> Enang aming-koo Moosesi-nung boto otong? Tee aa' tee oraka'nko otoko avuru'nung boto aarempaara oraka' nkoaamana' tasi'parii'naang. Kumponing tee' nari' oto'koo miru'uu' bera tee isi'ising, Karistoo', tavo'kuainoo'ke basi, ee'nara tero maraka-antavuu' nung. Tee boto tee koosinunankai po'antavau'nung Moosesi nauaama kara-pare' Kumponing ee'noko teing nantoong-koo meu'ke. <sup>20</sup> Teka tenang maraka-anta Kumponing Eebaraami' avuu' nang Kumponing naning otoaruko kara-pare' Eebaraami' koonto' nau-vuu'. Tee'koo napo' tee maraka-anta deu basi Moosesi-nung boto-koo, ai' boto tee tamung nantoong-koo otong.

#### Boto Tee Nantoong Jiisuu'koo Po'anta Tee-koo Kuung Otoroo'naang

<sup>21</sup> Enang ee Moosesi-nung botoi Kumponing bakaang maraka-anta toto'pui otong? A, tee' aa' deea' bakei. Boto tee kapoo' nantoong domampuripeu'nung-pina' oro' otoi dei tee koomariri o'noripeu' tee boto siompampima. <sup>22</sup> Teka Daari Meekunge tasi'antamuru' nii' ookara orara aarumokoo kuunge dai'mariri paapaa'marimaing, boto sion-avung-eta bere'marira Karistoo'koo baitomariaina' Kumponing ninka naroomarii'naang. Tee' nkomariko deeko' Kumponing dupe-antavuaing tee bakaang maraka-anta koonto'nuka tampuriaing-koong teing masika'antavaamaing.

<sup>23</sup> Tenang masika'antanavung oro'paravaruko nii' botoi nara'ka parammuri o'noriko' dai'muritaa'nange bera masika'antanavung oro'paravainoo'ke basi. <sup>24</sup> Tee boto tee niikaang nau-anta-pina' otoko' Karistoo'anko po'antamurii'naang masika'antanavunge Kumponing ninka naroomarii'naang. <sup>25</sup> Teka enang tee masika'antanavung oro'pario' nii' tee enang botoi tanatamuria'. <sup>26</sup> Enang tee Jiisuu' Karistoo'koo kuunge dii' ookara Kumponing baurukaa' deentari'ning teie diikaang masika'antai. <sup>27</sup> Dii' ookara ntong-koo minkie meeka'anta nkaverima Karistoo' bakaang tare-koo kuung poru'ning teing Karistoo'naunturi otoriaing, siivenke'deeria'. <sup>28</sup> Ai' tee Karistoo'koo siivenke' otoa' ee'pina': Ju'nung ee'noko Ju'deeang, botovotona' nuka ee'noko osikaiaang, nii'noo' donkaani napo' manikuma. Dii' teing navitu tee-koo kuung otori. <sup>29</sup> Ee'noko enang Karistoo'koo kuung poring-koo dii' tee' nari' okoruriaing tee barenku Eebaraami'ketaing isi'ising-koong Kumponing maraka-antavuu'nung.

**4** Tee ee'pina' minkuamaang, tee naning oki'nara barenku okovupeu'nung tee tenang oki'na'pari botovotona' ninka nari' basira, bane teie ookara-koo

dau basiari barenku okovuaing panka'parara. <sup>2</sup> Tenang oki'na'pari otoko tee nii'ninge tanatavai otoko otong tee kavokavoro-nanka bakaning ee'noko tee aung tooto' bera batei baumai miru'uu'noo' basi. <sup>3</sup> Nii' tee' nari'ke, tenang Kumponing oko-antamuriainang batei mme' tavo'kuaruko kapoo'nanka kanto'puaing kansi'aapening-koo bi'mariri aavu'mariko' barenku kong-koo. <sup>4</sup> Teka tenang batei dupevui makotuio' Kumponing baurung botovuu'; <sup>5</sup> Tee ponto'aru' nani-koo manikuma-koo. Moosesi-nung boto-koo kuunge ponto'aru' moo'urii'naang teing nantoong Moosesi-nung botoi kuung deempuri otoroko'ning nii' baurukaa' oko-antanii'nuka o'norii'naang. <sup>6</sup> Tee'koo dii' okovui baurukaa' deentari'ko Kumponing Baurung-koong Tanuaang botovuu' niikaang domang-koo kuunge taa'ni'poi karantamuriko' dotumarima aa'pampii'naang, Mma' ee, Mma'. <sup>7</sup> Tee tee enang Kumponing tampa' nkoruio' da' tee enang bautaraita bakeraring ee'noko tee da' baurung deentaring, ee'noko baurung deeko' tee da' barenku okoruinung.

#### Paula'ke Kalesia-nupoong Napo' Pia-antavuru'na' Tee Taaravaava'naang

<sup>8</sup> Tero tee tenang dake Kumponing noru'earuko' nang da' tee dai'dari otoko' teinge kapoo'nanka makotua'nanka kumponinanka deeng-anta-koo. <sup>9</sup> Teka enang dake Kumponing noru'eing, ai' aa' da' Kumponing noru'dui. Tee'koo enang aming-koo da' napo' tororari teing kapoo'nanka kanto'puaing ninka dai'dari otoo'naang, teing ninka toomo sitovuru'nanka, aruaru'nankai ee'noko aavu'arimaing? <sup>10</sup> Dii'ke tee temurii'koo aa'ning siompererimaung doong a'munte'mung, kaara averaa'teveraa' ee'noko mare' amatemare' Kumponing ninka narooontariaina' besierima. <sup>11</sup> Dii'ke ning ariri'antamering ee' noru'amira, "Ning dee'ma dii' paku-koo tamung pore'mou'."

<sup>12</sup> Mmaikori' ee, ning boto-ita taapo' tonta'maring tee' dii' taapo' otoriko'na'. Tee' nari' bere'darira o'noriaing. <sup>13</sup> Dii'ke noru'eri otong tenang tee siipai siipa-antamui' datemarara o'noi dii'koo tutung daankimaru', nka dii'ke ning oraka' nkomeria'. <sup>14</sup> Bane siipa-koo oraka' o'noi pore'antampiko maareroria' ning-koo, baru' oraka' noru'meria', teka bakei Kumponing-nung koosi-nung~pina' maneena' nkomeru', Jiisuu' Karistoo' nkoveripeu'na' makosina'. <sup>15</sup> Arerai tee biraanke ning-koo enang? Aa'nung dii'ke piaamerima dapi' duta banke'darima ameriko' pakumerii'naang. <sup>16</sup> Ning enang ee dii'ke munte'merimang kara masakung naurampiru'nung-koo? <sup>17</sup> A, tamung munte'meriauka'nung teinge navuraariko dii' orari-anta-koo. Ning-ankoita siivenke'antaraariko dii'ke teing daangamperereri'naang piavoromang. <sup>18</sup> A'noo' nantoonge dii' masika' paku-koo navuraariko deeko' ookara-koo tampa' ee'noko ning dii' ninka nari' o'noko nara' deea'. <sup>19</sup> Ee mmaikori', ning pareava'naang sisikeeravoro-mana' sisikeeramomang dii'koo, dii' napo' ponto'anta-koo Karistoo' napo' dii'koo domang-koo tampa' taa'ni'anta-koo bera taa'ni'poainoo'ke basi. <sup>20</sup> Piaana'

ning tee dii' ninka nari' o'noria'. Dii' makosina' kara-koo piamomaang, nka enang papaaramaring diikaang aarumo-koo isipo' otoriko.

### Tee Mirumiru' Eekaa' ee'noko Seera' aa'naanka-koong

<sup>21</sup> Naumeaing dake Moosesi-nung boto-koo kuung oto'koo piaromaung, tee boto ee taaraveaung dake?

<sup>22</sup> Daari Meekunge ee' minkuvumaung: Eebaraami' baurinketa kenaankara otoreko', narung teni Seera' bauring, teni ovarinani, Eebaraami' ba'aang. Ee'noko narung teni Eekaa' bauring, teni tamung Seera' bakaang botovotonaa', dai'nisinani. <sup>23</sup> Teka tee teni dai'nisinani bauring tee Eebaraami' mono-namenge noru'ari nampui' tee tooto' bauring paraevuu'nung tee barenku nka-koo makosi deea', ee'noko tee teni bisiira dai'arava'nani bauring tee Eebaraami' Kumponing miru'ui' nampuu'nung-koo maraka-anta siompui' tee tooto' bauring paraevuu'nung tee barenku nka-koo makosi.

<sup>24</sup> Aung tee minkunaa paara-anta-po'nung. Anaanka manikumaara tee kenaanka kara naroo'ng-anta Kumponing-etaing siong-antavaresi otong. Navung naroo'ng-antavung tee Moosesi-nung boto sion-avung, Sainai-namii-koo nauvuru'navung. Arebia-nupoonge temii Sainai-namii tee Eekaa'narii tampaa-maung. Ee'noko teni Eekaa', Eebaraami' ba'aang dai'nisinani, teni Jerusalema'navuntu' miru'ari otong, Ju'nupoong biikaang osi pankaing. <sup>25</sup> Ee'noko teing Ju'nupoonge Moosesi-nung boto siong-koo paaravaama Kumponing ninka naroompariaining-pina' noru'arimainge biukoree'ai otoromanamono temono. Ee'noko teing teing temono baurukaa' tee boto-koo dai'nisinuka deempairi otorong.

<sup>26</sup> Teka nii' niikaang osi pankaing Jerusalema' paning-koong, ee'noko temono tee Moosesi-nung botoi dai'arava'namono. <sup>27</sup> Daari Meekunge Jerusalema' paning-koong dama'ke oro'paravaing teronung-koo deto basi tampuu' manikuma-pina' kara nauvuma aa'puu'na'koo:

"Doturaravaing da' bisiira pareai. Ta'nina' duuru'kiaia bane da' tooto' mantompeai. Ai' Kumponing da' teni daka-pina' otomai maraka-antaru'ng teni kura'nari' bioko deentaraa'naang teni ba'ung-po'nani puru'ei."

(Aisaia' 54:1)

<sup>28</sup> Mmaikori' ee, nii' enang dai'arava'nani bauring pina', Aisake' pina' o'noring, maraka-antavung ponto'nii'nuka. <sup>29</sup> Ee'noko tee tee' nari' tee tooto' mono siompui ponto'aru'nung oraka' nkovuko'na' tee Aisake', Tanuaang Meekung bakaang iri'ke ponto'aru'nung, tee' nari' enang nkomaarimaung nii' teinge mono-namenge noru'ariri Kumponing ninka naroo'ng-koo paaravaamainge. <sup>30</sup> Teka teie Daari Meekunge arekee' minkuvumaung?

"Bata'eaing teni dai'nisinani ee'noko tee bauring, ai' tee dai'nisinani bauring tee barenku okovuauka'nung tee ninka teni dai'aravai bauring ninka nari'."

(Pupu' 21:10)

<sup>31</sup> Tee tee enang, ee mmaikori', nii' dai'nisinani baurukaa' deea' teka dai'aravai baurukaa' nii'.

### Tanuaang Meekunge Baito-nupoong Siong-antavurimana' Tampa' Nkoveea'naang

(5:1-6:18)

#### Nii' Simpiri'antanii'nuka Karistoo'koo Kuunge Nantoo'ng Tampa' Nko-koo

<sup>5</sup> Karistoo' tee nii' unaa-antamuru' dotu-marii'naang unaamori. Tee'koo naurampimang, ima'dariri donkoniriai, ee'noko doonko napo' kinkinirika' dai'nisinuka ninka nari' pake'deeri.

<sup>2</sup> Enang ninge Paula'ke bakei naurampimang, dii' teing Kumponing ninka naroo'ntarii'naang piarorima dopa' toto'darima boto sionavung aroo'erima deeko', Karistoo'navung siperimaang pakururipeu'navung.

<sup>3</sup> Napo' unantampiri nauramping ninge dii', ookara dopa' toto'navung aroo'erinaing dii' tee ootukunung boto Moosesi-nung pukeveri siong-koo dai'dariri otoring.

<sup>4</sup> Aa'noo'naang, Karistoo'keta tee' toto'darii'naang dii' ee'ning Kumponing-ankoi koonto'nuka deentarii'naang piarorimaing tee boto siomperima, ee'noko dua'daririning-pina' otorii'naang bakaang avusiro'ari moo'navung-eta. <sup>5</sup> Teka tee Tanuaang Meekunge pakumurio' baitomarima te'mung koon-to'nuka taa'ni'moriaina'mung-koo nemariri o'noring.

<sup>6</sup> Nii' Jiisuu' Karistoo'koo kuung o'noritaa' dopa' toto' ee'noko toto' deeaung kapoo' deea', teka teie baitoi deeko' pias ninka nkoaramaung. <sup>7</sup> Dii' tee deikoo'koo

tero tampa' kua'dariko'ning-pina' otoru'ning, enang baie napo' toto'antarurio' tee kara masikung sion-avung siperi? <sup>8</sup> Tee temurii' kara dii' daang aroo'antaruru'naare tee dii' bokururu'nung bakaang kara deea'. <sup>9</sup> Tee-pina' kapoo' oki'noo' dera'ke ootukunung dera'antavupeu'na' teie naninge dii' nko-antaruru'nung. <sup>10</sup> Masika' noru'ansi otong Oving-koo o'noi, dii'ke nkaang noru'koo taapo'ke nii'na' noru'erika'nung ee'noko baa tee naning dii' orari-antarurung tee kiimata nkavuaing aa'nung tee ninge noru'ampa'.

<sup>11</sup> Ee mmaikori', nii'ninge aa'maamaung, "Paula'ke dopa' toto'navung daankivumaung." Nka tee' deea', ai' ning aming-koo oraka' nkomaamang tevung boto sionavung-koo baukoree'nukai? Ninge tee' daankiansi dei tee daang-antavampeu' tee dooreng Jiisuu'ke nii' domaang moo'muru'nung-koong, aa'barata'koo boo'pari boto bakaang taretare bakevura, ee'noko teinge Ju'nupoonge too'dempaavarupeu'. <sup>12</sup> Maiko' teing dopa'toto' siompaama dii' pore'antaraarimaing avitoitoi-koo bii'ka biikaang mono tototo-paripeu'nung.

<sup>13</sup> Dii' mmaikori' unaarori oto'koo bokururu'ning, teka unaarori oto'koo otori diikaang mono bakaang pia narung siong-koo taura'dariauka', teka piaareerima pakureerai dii' nii'ning-koo botovotonaa'nuka

noru'dariri. <sup>14</sup> Ookara botonanka Moosesi-nung tee nanaare-koo dupeari otong ee' minkuvumanaare-koo: "Dake tee naning da'koo due'nung daka pjaararimana' nari' tee' piaaveaing."

(Boto 5:16)

<sup>15</sup> Teka oraka' nkoreerima orari-antareeri'neeng dii'ka.

### Tanuaang Meekung Siona' Tamba', Urikung Onou Siona' Oraka'

<sup>16</sup> Teka enang aa'dampimang, Tanuaang Meekunge naururiana' siomperiai ee'noko mono bakaang pia siomperiauka'. <sup>17</sup> Ai' mono bakaang piai tee Tanuaang Meekung too'dempui otong ee'noko Tanuaang Meekung bakaang piai mono too'dempui otong, ai' anaanka tee turampeere manaanka ee'noko dake kapoo' daka nkovepeu'nung otoa' tenaanka-koo narung taaravearura. <sup>18</sup> Dake Tanuaang Meekung taaravera siompeaing deeko' da' tee boto-koo kuung otoa'. <sup>19</sup> Mono bakaang nko-nko ee'pina' sira'pari otong: nampeesi orari, kaukauro-nko, noru' ku'mi', maimaia'na' nko, kumponing tositosinanka siong, dopa-nko, oraka' noru', turang-nko, orarunsi ninka munte', iira bauko, mosii', kara-koo tata', siivenke', maironto', purinto'naruke kanu', tooreere dovang; <sup>21</sup> Ninge enang tautaurampimang tero tautaurampiru'na': Teing tee' oro'nanka aarumo nkoaamaing Kumponing bakaang muu' aarenaavauka'nung barenku oko-koo. <sup>22</sup> Teka tee sinang Tanuaang Meekung-etaing aung ee' oro': paa, doturotu, mooa, da'deng iira deeaung, tampa' nko, avusiro', masika'anta, banainge oto', ee'noko baka pinka'ari oto'; <sup>23</sup> Aing pote-koong boto otoa' bakei. <sup>24</sup> Ee'noko teinge nantoonng Jiisuu' Karistoo' bakaninge tee biikaang mono-aapena' noru' aa'barata'koo taakavau' teing bakaning karakaraa'nanka domange etuvurimaing ninka. <sup>25</sup> Tanuaang Meekung-koo kuunge domamariri o'norimaung deeko', tee' nari' Tanuaang Meekung ninka nari' nanampimaatoaing siompampiri. <sup>26</sup> Nii' kirokainkupina' o'noriauka', ereanameereauka' ee'noko maimairomeeriauka'.

### Naninge sinang kavuaing tee-koo kapoo'koo keempumaung-koo

**6** Mmaikori' ee, dii'ke nii'nung narung oraka' nkoarako ooverira deeko' dii' Tanuaang Meekung siomperimaing tampa' pakueri koong-antaveriaing dooroomperi, tarerariri dii' tee' nari' napo' dua'dari'neenga. <sup>2</sup> Naruna' naruna' pakureerai manki'koo. Tee' nkorarima dii'ke dupe-antaveriaina' tee Karistoo'nung boto. <sup>3</sup> Nii'nung narunge aa'pumaato'neeng, "Ning narung kapoo'," nka tee kapoo'pina' oro'parava'. Tee' nkoarama tee ee'nara baka tosi-antavarapeu'. <sup>4</sup> Nii'nung naning ninka mintarama doturarama daangantaravauka', teka tutung norunoru'daravaing dakaang nko-nko-koo, tampa' otoing deeko'

ee'na'koo doturoturaravai makosi. <sup>5</sup> Kumponing kantomuri manki' nka-koo bamuru'. Tee'koo daangan-taria' piaareeri pakureerimaatoai. <sup>6</sup> Aa'noaing tee naning dii' Kumponing bakaang kara nau-antarurimaung pakueri moo'eriainge. <sup>7</sup> Nii'namurii' onoue tosiruriauka', ai' Kumponing tee daang-pina' oro'anta deea'. Tee-koo kapoo'koo naninge keempuaing-koo tee tee-koo ee'nung-koo sinang kavuaing. <sup>8</sup> Dake dakaang mono narung dotu-anta-koo noru'ei keenkiaing deeko' dake teieta mono-ita orari-anta kaveaing simpe'muriana'nung. Ee'noko dake Tanuaang Meekung dotu-anta-koo noru'ei keenkiaing deeko' dake teieta Tanuaang Meekung-eta domaang oparavaung kaveaing. <sup>9</sup> Tee tee enang kakarua'moriauka'nung tampa' nko-koo dama'ke makosinaveraa'koo tampa' kavampiaina' kontemoriauka'nung deeko'. <sup>10</sup> Tee'koo enang batei oto'memuri tampa' nkoarampiai ookara nantoonng, baru'noo' teing nii'maia'kooning masika'antanava-koo kuung otoromaing.

### Paula' Dotuaru'na' Karistoo'ke Aa'barata'koo Boora Simpiri'antamurio'

<sup>11</sup> Ooveriko enang daari-nko pari'amira daari pankaveroveroi' narunge daarirerompimang nkaang birenge taa'ni'antamari. <sup>12</sup> Nantoonng Kumponing ninka naroomparii'naang Karistoo' aa'barata'koo boo'paru' baitoara daankiampiko teing Ju'nupoong iiravoromaung dopa'toto' minkuampiaruko, Moosesi-ning boto dovang ninka. Tee'koo nii'ninge eturaarimaung dopa' toto'koo tampa' oro'parii' naang Ju'nupoong-koo. Maroita, Ju'nupoong turampaararoo'naang teing. <sup>13</sup> Teinge ee'ninge dopa' toto'parira boto bii'ka siompaavaunge, tamung dii' ee'ning dopa' toto'koo piavoromaung dii' tee' nkorariko miring pankaing nkavaava'naang. <sup>14</sup> Nka ning temurii' aarumo piamaoang bakei, Karistoo' aa'barata'koo boo'navung masika'antavamaung-koo deeko', miring pankaing nka-koo makosi. Tevunge kansinung aarumo ninka siivenke'meeresi aa'nong kansinung aarumo taakavaring-pina' otong ning-koo ee'noko ning taakamaring-pina' o'nong tee-koo. <sup>15</sup> Tenaankai aa'noko dopa' toto' ee'noko dopa' toto' deeaung kapoo' basi-antavureaung, teka napo' neraka'pari nkonii'ke deeko' makosi. <sup>16</sup> Mooa ee'noko paa dii'koo otoaing aung ee'nara aarumo minkuansinung siomperimaing-koo, teing Isireeli masikeng-koo Kumponing bakanavitu-koo.

<sup>17</sup> Enang-eta deto ning naninge pore'antamuauka'nung, ai' ninge tee nkaang mono-koo Karistoo'koong taa'menanka taa'ni'anta-pina' kompansi o'nong.

<sup>18</sup> Dii' mmaikori', tee biraanke niikaang Oving Jiisuu' Karistoo' bakaang diikaang tanuaang ninka nari' otomatoaing.

Masikung.

# EPESES

## Kara Baavootunanka Ane'kooning

1:1 Kumponing Nii' Neraka'antamuru'na' Karistoo'koo kuunge

4:1 Nii' Karistoo'nung Mono O'nori Kumponing Bakaang Aarumo Oro'antavampiaing

### Kumponing Nii' Neraka'antamuru'na' Karistoo'koo kuunge

(1:1-3:21)

**1** Aung ane' karavoto~ ninge Paula'ke Jiisuu' Karistoo' bakaang kara-okomui-nkai Kumponing miru'muio' dii' bakaning meekupoong Epesesia otori-maing daarirerompimang, dii' ee'ning Karistoo'koo baitorarimaatomaing. <sup>2</sup> Biraanke ee'noko mooa dii'koo otoaing Kumponing Niuma-itaing ee'noko teieta Ovor-ing Jiisuu' Karistoo'.

#### Kumponing Biraankemuru'na' Karistoo'koo kuunge

<sup>3</sup> Tampara tampampiaing tee-koo tee Kumponing ee'noko Bauma teie niikaang Ovor-ing Jiisuu' Karistoo'ke, tee ee'nara Karistoo'koo kuunge biraankemuru' ookara biraankenankai Tanuaang Meekung-etaning paning-koo otoromaing. <sup>4</sup> Aa'nong teroita kansi' mme' pupu'aravaruko-ita miru'muru' Karistoo'koo ku-ung o'noritaa' meeka'mariri o'norii'naang tuumpi-maria' tee-koo dutakanoo'ke. <sup>5</sup> Tee tee piaamuritaa' miru'muru' baurukaa' deemarii'naang Jiisuu' Karistoo'ke makosi-antamurio' baka bakaang piai, maroita. <sup>6</sup> Teie tee' nkomuru' daangampampiana' tee-koo avuavu' maneenung-koo Bauring Piaaru'koo kuunge avusiro'ari amuru'nung-koo. <sup>7</sup> Karistoo'ke bakaang erenge moo'murira makosi-antamuriko Kumponing niikaang oraka' nkonanka tonta'memurira unaa-antamuru'nung; <sup>8</sup> Tee'koo bakei aa'na' maanto' bakaang piaae nii'koo piampuu'nunge, <sup>9</sup> tee ee'nara bakaang mataue tavo'antavuu' bakaang noru' ninka Kumponing sirapo'antamemurima kapoo' maken-si'nung teie tavo'anta-koo piavoko' Karistoo'koo ku-unge. <sup>10</sup> Tee aung ee'nara: Uripo'keta teie marovuko' tee Karistoo'koo ookara naru'urii'naang bateinang makotuko aa'ning paning-nupoong ee'noko kansi'nupoong, ookara-koo bore' deempari. <sup>11</sup> Ookara kapoo' tee Kumponing matauvuma miru'umana'

nkoaramaung, ee'noko nii' tee'ke Kumponing bakaning deemarii'naang miru'muru' Karistoo'ankoi tutun-tomaa tampuu'na'. <sup>12</sup> Bakaang matau ee': Nii' urompiri Karistoo' nempampimaing nantoong daangang-antavampiaing bakaang meenasi-koo. <sup>13</sup> Ee'noko dii' ee'ning nari'ke, Karistoo'ankoi baitorariru'ning kara masikung taaraverira tee doorenang tampara dii' domanturiaing-koong. Ee'noko bakaning deentarike date'antaruri Tanuaang Meekung aruru' bakaning avurii'naang maraka-antavuu'nung. <sup>14</sup> Tee Tanuaang Meekung nii' amuru'nung tee tasi'anta-koo nii'ke nkavampiaing ootukunung barenku tero naumuru'na'. Tee kompampirio' Kumponing asi'na'mung dupe-antavui oko-antamuriaing, nii'ke tee daangampampiana' meenasi-po'nung.

#### Nii' Tee Biraanke-koo Tantemariaing-koong Kungsi

<sup>15</sup> Tee'koo ninge taaravamira dii' masika'anta oto'deruring Ovor-ing Jiisuu'koo ee'noko diikaang piaa ookara Kumponing bakaning meekupoong-koo, <sup>16</sup> tenang-eta deto taararampira dotumaramaung kungsi-koo tantampima. <sup>17</sup> Ee' eentamaramaung: Teie Kumponing niikaang Ovor-ing Jiisuu' Karistoo' bakaange, Baumai Meenasi Okovenunge aruriaing tee Tanuaang matau dii'koo siraka'antavuaing bakaang kara-koo miru'noo' dii'ke tasi'peria'naang tee Kumponing. <sup>18</sup> Ning eentamaramaung diikaang domang-koong dutai siraka'antaruriko dii'ke tasi'perii'naang tee barenku bokumurira bamuru'nung, ee'noko bakei aa'na' maanto' meenasi-po'ning otoromana' teing biraankenanka bakaning-koo meekupoong-koo maraka-antavuru'ning tankee'eeaining. <sup>19</sup> Ee'noko napo' eentamaramaung tasi'perii'naang iri' aa'na' pankaing nii'koo baitomarimaing-koo sipuing, paaranang-koo makosi deeaung. <sup>20</sup> Tee aa'nung iri' baukoni'ke kompui Karistoo' boo'keta daa'antavura tampavine-koo Kumponing-koo ba'ngang-antavuu' paning-koo Ovor-ing-antavui. <sup>21</sup> Teenoo' Ovorinoo' tee deu basi anantenaung-koo: ookara tare-nupoong, pankainuka, purinto'po'nupoong, ovontung ee'noko ootukunung amute-murii' miring-po'nupoong, enanariong ee'noko

dama'nariong napo' nari'. <sup>22</sup> Tee tee Kumponingee ookara kapoo'nanka Karistoo'koong kau'koo boong sipuma Karistoo' tee bore' deeng-antavuu' ookara kapoo'nanka-koo dootuu'nupoong tampa' pakuvurina', teing tee bakaang mono makosinuka. <sup>23</sup> Ee'noko tee-pina' bore' mono ninka be'nu'ura dupearapeu'na' tee' nari' Karistoo' dupe-anta baka dupearavaing ootukuarara.

### Kumponingee Domamuru'na' Karistoo'koo Kuunge

**2** Nii' nang tee dii' doori otoriko' boto-toto' ee'noko oraka'nko nkoverima. Tee' nkoverima kansi'kooning biikaang aarumo narung siomperiko'. <sup>2</sup> Sietani' siomperiko', ovonturi biikaang bore' auvi'au-eta bakaang muu' tareaamaing, tee ee'nara Kumponing siomeevanuka-koo meu'ke mintoompamaung. <sup>3</sup> Nii' ookara tee'ke tero niikaang orara aarumo-koo amari-ma karaa' dovange boo'koo niikaang mono ee'noko onou piavoko'na' nari' siompampiko'ning. Tee tee nii' domang oraka' o'norikotaa' Kumponing-nung kiimata kompampiaining akoing-pina' nari'. <sup>4</sup> Teka teie Kumponingee piaae maanto'ke aa'na' piaamurikotaa' bane nii' boto toto'ke moompiri o'noriko domang-antamuru' Karistoo' ninka nari'; <sup>5</sup> Tee tee Kumponing bakaang avusiro'ke tee' domamuru'. <sup>6</sup> Ee'noko domamurira Karistoo' ninka nari' napo' daa'muru' nari' tare-nupoong o'norii'naang tee ninka paninaumariri. <sup>7</sup> Aing ookara kapoo'nanka tampa' nkomurima tavo'antavuu' tee-koo Jiisuu' Karistoo'koo dama'navarang nau-antakoo bakaang avusiro'ke maanto'ari otomana' paaranang-koo makosi deeaung. <sup>8</sup> Ai' Kumponingee avusiro'ari domang-anta masika'antaveru'noo' deeko' domantariru'ning, dii'ka deea', bauta'durima. <sup>9</sup> Kapoo' nkoveriko tee' domanturia' maku'koo. Maroita, naning daangampara'neeng-koo. <sup>10</sup> Kumponingee tee nii' o'norina' nari' nkomuru'. Teie Jiisuu' Karistoo' bakaning deemuri nkomuru' tampara nko-nko nkoevompimaa'noo'naang o'nori tero miru'muru'na'.

### Kumponingee Nii' Avitevitu Tapo'muru'na' Karistoo'koo

<sup>11</sup> Tee'koo tero oraka' otoriko'noo'koo ampa'doriauka'nung. Dii' teroita Ju'deea', dopa' toto'dariaruko'ning, tamunsi'nupoong tantaariko'ning, a'noo' teing tamung dau naro' dopa' toto'ke meeka'antavarima. <sup>12</sup> Ampa'doriauka'nung tero tee dii' Karistoo'koong noru' otoriaruko', Isireeli-nupoong-eta taapo' otoriko'ninge, Kumponingee kara maraka-antavui naroompuu'na'koo damisimainkue, kansi'koo naro' bi'dariri domaang isikung nkana' noru' otoa', Kumponing pakurupou'nung otoa'. <sup>13</sup> Teka enang dii' tee teroita Pako'pari'nii' domanturira tareruriaing-koong ninka tapo'darira Kumponing-anko po'antarurining bakaang erenge tero taapo' isipo' otoriko'noo'keta. <sup>14</sup> Tee tee Karistoo' tee niikaang mooa-nko. Teie tee naro'ka tapo'muring aa'ning Ju'nupoong ee'noko Ju' deeaing. <sup>15</sup> Bakaang mono boo'koo avaru'noo'ke teie tee tete-va'uu' tee ku'nung turanturang-koong siivenke'muri

otoko'nung nii'. Moosesi-nung boto teka bakevui, mono etu-koong. Aing ookara kapoo' ee' oro' nkovuu'ning nerakariong nkovurii'naang aa'ning-eta Ju'nupoong ee'noko Ju'deeaing teie baka naro'kavurira pinau-anta-koo. <sup>16</sup> Aa'barata'koo boo'paru'noo' tee turanturang bake-antavuu'naang naro'kamurira ookavitura Kumponing-koo navitu-pina'. <sup>17</sup> Teketa' pora teie karantavurima~ daankivuu' tee doorenang tampara mooa-po'nung ookavitura-koo aa'noko Ju'deeaing ee'noko Ju'nupoong, dii' isipo'ke taapo'ke otoriko'ning-koo ee'noko teing Ju'nupoong tee-anko due'nupoong-koo. <sup>18</sup> Ai' tee tee teie taung nkomemurio' nii' ookavitura Bauma-anko be'koo makotumpiri otong tee narung Tanuaang Meekung-koo kuunge.

<sup>19</sup> Enang tee dii' akoing damisimainku otona', teka dii' osikaiaang deentari' otoring teing ninka nii'ning bakaning meekupoong ninka nari', ee'noko Kumponingee tarevurimaing-kooning dii'. <sup>20</sup> Dii' Kumponing-nava kani-nupoong tee' pau'deeri otoring teing-koo kara okovuri nkanuka ee'noko nakaronuka~koo dau, Jiisuu' Karistoo' tee ee'nara ookara-koo e'manianare' makosi, tumanung. <sup>21</sup> Tee-koo ootukunung nari' be'nu'ariri otoi kaniari otomaung dootuu'nava pankava deempari Oving-koo. <sup>22</sup> Ee'noko dii' nari' tee-koo otoritaa' tee-koo kanirari otoring Kumponing oto'doma deentari' Tanuaang Meekung-koo kuunge.

### Paula' Ju'deeaing-anko Kara-okovui-nka

**3** Tee'koo eentamaramaung dii'koo, ning ee'nara Paula', dii' pakurampimaung-koo dai'nisi Jiisuu' Karistoo' bakaang. <sup>2</sup> Dii'ke taameru' dee'ma tee kapoo' makensi'nung daarireromping-koonare ning-koo sira'pura Kumponingee makosi-antamuu'na' bakaang paa dii' nau-anta-koo. <sup>4</sup> Anka deeruerima ooveriaing tampa' tasi'pamana' tee kapoo' makensi'nung Karistoo'koong. <sup>5</sup> Urikavarang pankaraamuriko tee sira'paravaruko' tee aung tee' enang Tanuaang Meekunge sira'antavui'na' teing-koo bakaning-koo kara okovuri nkanuka-koo ee'noko nakaronuka-koo. <sup>6</sup> Tee ee'nara makensi'nung tee aung kapoo' teing ee'ning Ju' deeaing nii' ninka tapo'meering Ju'nupoong ninka nari' barenku nkavampii'naang narung monokooning deemariri ee'noko narung maraka-anta-kooning Kumponingee deing, tee ee'nara Jiisuu' Karistoo'ke dupe-antavuu'nung tampara doorenang tavo'ura. <sup>7</sup> Kumponingee tee maneenung taura' amuu' aung ee'nara doorenang tampara ookara nantoong nau-koong, makosi-antamui bakaang iri'ke. <sup>8</sup> Ning-koo ee'nung-koo bakaning meekupoong ootukunung-eta asiranung masikung-koo Kumponingee tampa' tauramui amuu'nung daankiama'naang teing-koo Ju'deeaing-koo tee doorenang tampara Karistoo'nung avuavu'koong bono'dopa. <sup>9</sup> Ee'noko naumuu' sira-ka'antavama'naang ookara-koo tee Kumponing bakaang miru' makensi'nung. <sup>10</sup> Uripo'keta tee teie ee'nara ootukunung kapoo' nkovuu'nunge tee baka noru'ui otoko' enang bakaning dootuu'nupoong

donkompurinamu' sira'paraa'naang avatevaro matau-nanka aa'ning-koo ovontung ee'noko iri'po'nupoong paning-nairu-kooning-koo. <sup>11</sup> Tee ookara nkoaru'ning tee dupe-anta-koo tee Kumponing bakaang onou pupu'doma dopa-ita marovuu' tee-koo Jiisuu' Karistoo' niikaang Oving-koo teke taavoarara oparaa'naang. <sup>12</sup> Ee'noko tee ninka narung deemariri masika'an-tavampima tasi'pampiri Kumponing-anko due'marira karavampiang amaiaa'moria'. <sup>13</sup> Tee tee enang kontampiri si'damping aa'dampima, tarua'doriauka' teing arikananka ninge dii' pakurampima kune'amaing-koo dii' meenasi-koo basi-anta-koong onoueri.

### Karistoo' Kenkumpampaing-koong Kungsi

<sup>14</sup> Tee tee tee tutumpama naurampirina' Kumponing tampa' nkoruru'ning-koo tee'koo ning kinkinama eentamaramaung Niuma-koo aa'nung-koo ootukuna'kantu paning-kooning ee'noko kansi'kooning miring tampariri otong. <sup>16</sup> Kunsimarama ee' eentamaramaung: Teie bakaang avuavu' maanto'ui oto'keta aruriaing tee purinto' ee'noko iri' tanuaang Meekung-etaing diikaang pankaruntoong-koo otoaing, ee'noko Karistoo' diikaang domang-koo unaavoi otoi otoaing baitoverio'. <sup>17</sup> Napo' eentamaramaang piasa-koo daue du'durira ari'arurita' iveka'darii'naang, <sup>18</sup> ee'noko tee' nari' makosirariri otorita' tampa' tasi'perii'naang ookara ninka Kumponing bakaning meekupoong ninka ookanairu-eta paaranang-koo makotua' tee piasa Karistoo'nung. <sup>19</sup> Tee dii'ke mantomperi noru'erii'naang tee piasa punkaang~paa' dii' maanto'duri otoriaina' Kumponing-pina' nari' nariari oto'ke ookarai.

<sup>20</sup> Daangang otoaing Kumponing-koo deekorono' basiropa nkovumaung-koo eenta ee'noko noru'marimanoo'keta dau basino' tee ninka bakaang iri' nii'koo mintoompamaung ninka. <sup>21</sup> Ee'nara daangampampimaatoaing dootuu'koo naru'marima Jiisuu' Karistoo'ke pakumurio', ookavarantue doomeerita' botu kong paa'na'. Ee', tee' ee'na'.

### Nii' Karistoo'nung Mono O'nori Bakaang Aarumo Oro'antavampiang

(4:1-6:24)

#### Narung Onou Ninka O'noriaing Meeka'mariri

**4** Tee tee ninge Oving bakaang dai'nisie kontampiri botoramping makosina' bokururu'na' otorii'naang. <sup>2</sup> Boonko noru'dariaing, banainge otori da'deng ijaroria'. Piasa oro'antaveri otorimaatoai tokoona' noru'deeria'. <sup>3</sup> Tanuaang Meekunge tee dii' narung deeng-antarurining, teka aa'na' paaranarimaatoai narung deentari' oto'koo mooreeri otorima. <sup>4</sup> Mono tee narung otong nii'ke nko-antavampimaung Karistoo'nung, ee'noko Tanuaang Meekunge tee

narunge tee' nari' narung noru'koo oto'koo bokuru-ru'nung. <sup>5</sup> Oving narung otong, kapoo' masika'an-tavampimaung narunge, ntong-koo minkie meeka'an-ta narunge; <sup>6</sup> Kumponing narunge tee Niuma nii' ookarai, nii' ookara taremuri niikaang birenge mintoompama nii'koo kuung otomaung.

### Pakumeeriaina' Avuavu'nanka Ninka

<sup>7</sup> Teka teieta bakaang maanto'ui oto'keta Karistoo'ke nii' kantemuru' namarana' teing avuavu'nanka tee' Daari Meekunge minkuvuu'na' aa'puma:

<sup>8</sup> "Tenang paning-koo deto koinura barampuri dai'nisinuka teie Ovinge tankampuru' tee avuavu'nanka teing nantoong."

(Kena 68:18)

<sup>9</sup> Tee "deto koinuu'"-naare miru' aming? Tee aa' miru' ee': Tee tero napo' siaru'nung depeto kansi'koo boon-avaro-koo. <sup>10</sup> Tee ee'nara narung siaru'nung tee ee'nara napo' deto koinuu'ning paning-koo dau-navaro-koo isipo' masipo' ootukunairu-koo maanto'an-tavaraa'naang. <sup>11</sup> Ee'noko tee "avuavu' tankampuru'"-naare miru' aming? Miru' aa' ee' oro': Nii'ning kara okovuri nkanuka deempuru', napo' nii'ning nakaronuka deempuru', nii'ning doorenang tampara daankivuma nanu'nuka deempuru' ee'noko nii'ning tanata nkonanka nau-antavaarima. <sup>12</sup> Biikaang nko-nko Kumponing bakaning meekupoong bare-anta-koong dootuu'nupoong kake'iariaina' ee'noko Karistoo' bakaang mono makosinuka panka'antavaavaina'. <sup>13</sup> Bera tee nii' ookara narung deemariaing masika'anta-koo ee'noko Kumponing Bauring noru'na'koo, ee'noko naning-naummariri petaa'moriaing nari' basina' Karistoo' dakaosi'na' dupeari petaa'omana'. <sup>14</sup> Teke ta tee nantoong onou tasi'paa'nukai daang ampimpinumparima~ aavamaariko toire' oki'nareka'pina' o'noriauka'nung amutemurii' daang-koong nau-anta siompampiritaa', aa'na' boo'ai nankara avitoitoi bii'urimana' doveing uupuvuriko. <sup>15</sup> Otoa', masikung narung minkuampima piaameerita' ootukumariri panka'mariaing Karistoo'naummariri, tee-koo kuung o'nori, niikaang bore' deeparako. <sup>16</sup> Teie taremuriko nii' teing bakaang mono-koo-navio'nanka-pina' matauna' be'nu'mariri o'noring ee'noko naruna' makotumpiri pakumeeriaing nii' ookara tee ee'nara mono panka'antavampiri ee'noko purimariri piaae.

### Urikung Aarumo Sipampira Nerakung-koo Baremariaina'

<sup>17</sup> Aung tee nkaang naunau dii' naurampimang Oving bakaang miringe dii' date'antampima: Akoing tamunsi'nanka-pina' nkorariauka' kapoo' masikung deeaung siompaamaing-pina'. <sup>18</sup> Teing biikaang noru' tee mutaanang, damisimainku teing tee-koo domaang Kumponing amurimaung-koo. Aming-koo, nna' paaranuka koonto', bore'ke deerenuka otorokotaa'. <sup>19</sup> Anutua nkoarima maimaia'na' nko-koo avariri oto'nuka, naru'keta oko'okovurima aarumo ku'mi' nkoaamaing. <sup>20</sup> Teka tee Karistoo'koo barerariru'na'

tee' deea'. <sup>21</sup> Dii'ke tee koonto' tampa' taaraveru' tee, ee'noko dii' tee-koo kuung otoritaa' bakaang kara masikung naurariko barorontariru'. <sup>22</sup> Urikanaung enang bakei kiru'dariaing teronung aarumo-koo otoriko'na'koong, mono narung bakaang noru' karaa'ke boo' tositosi-koong siompui otomaung dii' orari-anta-koon'. <sup>23</sup> Diikaang onou ee'noko tanuaang neraka'antarariaing. <sup>24</sup> Nerakanaung kuruntariai Kumponing nkonii'naung, tee-pina' oro'naung, koon-to'nuka, meeka'dariri otoriana' masikung siomperi. <sup>25</sup> Tee'koo enang bakerariaing tosi minku-eta. Masikung narung minkuerimatoaing tapo'deeri otori-maing ninka, ai' dii' teing narung mono-koo man-ta'deeri otong. <sup>26</sup> Dii' iirarorima deeko' tee iira oramuri-au deeng-antaveriauka'. Bointuriai duaa' mme' tumparavaruko. <sup>27</sup> Sietani' doona aveauka' tee'. <sup>28</sup> Tee bakisipung bakiaa' nko-ita bakearara bakaang bireng mintoong tampara kake'iari nkovuai apuka'paravaing ninka tankaampuaina'. <sup>29</sup> Kara orarananka minkueria' otoai, teka tampara to'biari kara narung, pakueeri navureerima. Tee'koo taararaariaing tee tampa' taararaariaing biraankeario'. <sup>30</sup> Tee' nari' Tanuaang Meekung Kumponing bakaang oraransi-antaveria' otoai, ai' tee Tanuaang Meekung tee Kumponing bakaang taa'ni'anta nii' moo'muriaing-koong asi'na'mung. <sup>31</sup> Donta'dariri otorimaatoai aing aa'ning-eta', domang oraka' noru', iira, ioo', peusi', minku-minku ee'noko napo' too'de. <sup>32</sup> Teka navureeri otori-maatoai dunsirunsi~ antareerima, tonta'antareerima dii'ka Kumponing Karistoo'koo kuunge tonta'antare-ruru'na'.

#### Arakamariri O'noriaing Kumponing-nung Arakai

**5** Tee'koo dii' Kumponing baurukaa', teie piaaruri-maing, paararariaing tee-pina' nari' oto'koo. <sup>2</sup> Piaareeri otomatoai tee' Karistoo'ke piaamuru'na' ee'noko tee baka nii'koo avaru' tee boontunang tampa' nuuraa' Kumponing-koo. <sup>3</sup> Kaukauro-nko, ee'noko noru' ku'mi' siong, nii'noo' makosi deea'na' karaa' bakei dii'koo otoauka'nung; minkueria' otoai Kumponing meeka'antansinuka deentariri. <sup>4</sup> Napo' kara sikuri'ke si', kara kanu' ee'noko deu' makotua' dii'ke minku-koo. Tampa' tang narung dii'ke minku-koo makosi. <sup>5</sup> Koonto' tasi'peri noru'eriaing naning tee kaukauro-nko, naning kiiroraa' deeaung, nii'noo' maironto' tee oto'evuauka'nung barenku-koo Karistoo'ke ee'noko Kumponing tareaaremaing ninka. Temurii' karaa' siong kumponing daang-koong boontuvuma-nko. <sup>6</sup> Ee'namurii'koo Kumponing iira basiantavumaung teing-koo bakaang kara siompaavaing-koo. Taaraveriauka' nii'ninge nii'na' naurariko kara menaankavoroma. <sup>7</sup> Tee tee teing ninka nari' man-ta'deeri otoriauka'. <sup>8</sup> Tero tee dii' mutaanange maanto'duri otoriko'ning, teka enang arakai Ovoring-etaing maanto'duri otong. Tee tee enang araka siraka'antaveri nanirimaatoaing. <sup>9</sup> Noru'eriaing tee ee'nara arakai aing aa'ning tavo'antavumaung: tampara aarumo, aarumo koonto'

ee'noko kara masikung amutemurii'ari. <sup>10</sup> Ee'noko io' paaraverira ooveriaing aming-koo Ovoring dotuara-maunge. <sup>11</sup> Temurii' mintoong mutaanang-koong kapoo' basiaravaing-koo kanto'daria' otoaing, teka sira'periai temurii' aarumo orara. <sup>12</sup> Kapoo' makempario' nkoaamaing bakei maremaare, maimaia'na' taara minku-koo. <sup>13</sup> Teka tenang sira'pevurereriko teie arakai tee biikaang oraka'nko orara-pina' tasi'pario' sira'puaing. Ee'noko daamparimana' tasi'parira nii'ning tee arakavariaing napo'. <sup>14</sup> Tee' ee'na' kenai minkuvu-mana' aa'puma, "Tanteraravai da' aasi' bauko. Boo'keta daa'darako Karistoo'ke da' araka-antaruaing."

(Aisaia' 26:19; 60:1)

#### Aampari'marima Tanuaang Meekunge Maanto'mariri O'noriaina'

<sup>15</sup> Enang tee araka-koo otoritaa' tarerariri otoriaing dii' otoriaina'koo, tampa' mataurariri, kanu'aapena' deea'. <sup>16</sup> Tee' nkorarima doona siperiauka', ai' enang batei orara, doong arikung. <sup>17</sup> Tee'koo kanu'dariauka', teka paaraveria' noru'koo Ovoring bakaang pia. <sup>18</sup> Purinto'naru'ke baru' naikirima kanu'anta-koo bakerariai diikaang domang ootukunavaro orari-antarari'neeng, teka Tanuaang Meekunge maanto'duri otoaing. <sup>19</sup> Tee' otoritaa' kenanankai karareerimaatoai aa'ninge Daari Meekung-koo darinii'ninge, Ovoring daangang-koo nantoonge toroaamaing ee'noko Tanuaang Meekunge karantavuko~ kenanankai. Diikaang domang-eta kenararima amutemurii' ninka kovirariaing Ovoringe taararuiaina'. <sup>20</sup> Ookara batei-koo tampara tamperimaatoai tee-koo Kumponing tee Niuma, niikaang Ovoring Jiisuu' Karistoo' bakaang miring-koo. <sup>21</sup> Ee'noko aroo'antareeri otorimaatoaing Karistoo'koo mee'du'pirariri.

#### Nii'darintu

<sup>22</sup> Dii' bii'ankaar' dii'unkaampi-koo aroo'dariri otori-maatoai Ovoring bakaang kara aroo'erimana', <sup>23</sup> ai' donkaani tee manikuma bakaang bore' tee'pina' nari' Karistoo' dootuu'nupoong-koo bore' deempari otomana', bakaang mono, ee'noko tee tee baka domang-anta tee mono-koo. <sup>24</sup> Tee tee tee' nari' dootuu'nupoong Karistoo'koo aroo'ariri otoromana' tee' nari' dii' bii'ankaar' dii'unkaampi-koo aroo'dariri otoriaing.

<sup>25</sup> Dii'ke bii'unkaampie dii'ankaampi piaaverereri otomatoai tee' nari' Karistoo'ke dootuu'nupoong piaavuri bakaang mono avaru'na'. <sup>26</sup> Tee' nkovuu' teing naru'ka ba'aang makosinavitu deempariko tevitu kiiroraa'antavui meeka'antavuu'naang aa'noma ntonge duu' kara meeka'anta-koong ninka. <sup>27</sup> Karistoo'ke tee' nkovuu' tevitu bakanavitu tee-anko pipiraari donkonuu'naang nerampari, ku'mi' dovang dopai, naankuviraa', meeka'nisi, dakaosi'. <sup>28</sup> Tee' nari' bii'unkaampie bii'ankaampi piaavarimatoaing, tee' biikaang mono bii'ka piaavarimana' nari'. Baa tee naning ba'aang piaavumaung tee baka piaavaramaung

teni piaavui. <sup>29</sup> Naning bakaang mono munte'aramaung otoa', teka tee mono bau'aramaung piaavari tanatavarama, tee' nari' Karistoo'ke bakanavitu dootuu'nupoong tanatavurimana'. <sup>30</sup> Tee' nkorariaing dii' bakaang mono-koo manta'deeri bi'dariri otorining deentariko. <sup>31</sup> Tee' Daari Meekunge minkuvumana' aa'puma,

"Tee'koo naninge baumararing sipureta tee ba'aang ninka dai'arara tenaanka narung deempareaing."

<sup>32</sup> Kapoo' pankaing masikung aung-koo baku'ari miru'ari otong, nka ninge ee' ooamaang: Aung kapoo' Karistoo' ninka bakanavitu dootuu'nupoong miru'uri oting. <sup>33</sup> Tek a sira'pari otoina'koo ee' otong: Dii'ke naruna' naruna' dii'ankaampi piaavereremaatoai tee' diikaang mono dii'ka piaararimana' nari'. Ee'noko ba'aang ba'ung-koo mee'du'piari otomatoai.

### Nii' Biurukaa' Ee'noko Nii' Biumaraang

**6** Toire'ke tee diumaraang Oving-koo tampa' taaravereremaatoaing, ai' aung tee dii' diikaang nko-nko. <sup>2</sup> Daari Meekung-koo ee' otong, "Daumararing deto noru'eresi pakuereaing. Tee' nkorarama tee anke kansi'koo pankaroong tampa' otoaing."

(Boto 5:16)

<sup>3</sup> Aung tee tutuna'nung boto Kumponing-etaing maraka-anta ninka mavo'pari oting. <sup>4</sup> Dii'ke biumaraange diurukaa' iirang-antana' nkoovereria' otoai, teka tampa' tanataverereriai Karistoo' bakana' kake'ii-antavereri, bakaang kara bare-antavererima.

### Botovotonaa'nuka Ee'noko Teing Tare-nupoong

<sup>5</sup> Dii' dai'nisinukai teing dii' tanataarimaing anke kansi'koo makosina' ankampereri mataa'irariri siompereremaatoai tumsi paakararia', tee' Karistoo' dotu-antana' noru'eri. <sup>6</sup> Nantoonge ooraarii'naang tampa' nari' mintoontaria' otoai ako' dotu-anta-koo, teka dii' Karistoo' bakaning botovotonaa'nuka deentariko domange tampa' noru'eri mintoontariaing Kumponing-koo.

<sup>7</sup> Doturoturariri pakuereiaing kara siomperi - Kumponing noru'eri, nantoong noru' ereria'. <sup>8</sup> Noru'eri otong Ovinge tee nantoong ookara kapoo' tampa' nkoaamana'koo tampa' maku'uriaing aa'ning dai'nisinuka ee'noko dai'ariaing nari'. <sup>9</sup> Dii' oko-nupoonge tee tampa' tarevereriaing teing diikaning tee' nari', mau'mau'ereria' ee' noru'erima: "Nii' ookara taremuri-maung otong teke paning-koo nari' noru'muri, duukung sipuaunge."

### Nopa'mariri O'noriaing Kare-koo Makotumpiri

<sup>10</sup> Asirang-koo ee' naurampii'naang: Purintariri otoriaing Oving-koo bakaang iri' iirakuta ninka.

<sup>11</sup> Nopa'dariaing ootukununge Kumponing bakaang mononopa' tavu'koonge tee ninka nari' Sietani'ke aavaruriko dimpa'eriaina'. <sup>12</sup> Aming-koo, nna' nii' tee nantoong tumuusnanka ninka tameeria', teka aa'ning ninka: ma'nari-koo ovontung avatevaatang-koo neriariri otoroi Sietani'koo kuunge, paning-nairu-kooning-koo oravitu bakei maare ninka tameering, mutaanang-aapei ootukunung kansi' booni'antanuka enanaroong-koo. <sup>13</sup> Tee'koo nopa'dariaing teie Kumponing bakaang mononopa'ke ootukununge dii' dimpa'dariaina' doong ora'mung basiarako, ee'noko kare oparako dii' tee tee' nari' tampa' donkoniri otoriaing. <sup>14</sup> Tee tee tampa' pin-ka'dariri donkoniriaing. Kara masikunge tokoni'pina' tokorariai. Koompari oto' si'daravai muruke-nee'pina'. <sup>15</sup> Maamurariri otoriai tee tampa dooreng mooa-koong nkavui nanu'koo tee' piatooronuka~koo tutung kau'koo boonamante~ baraa'arimana' maamurariri. <sup>16</sup> Napo' teing ookara ninka baito komperiai kapatau kompaamana' tumpari' nta'po'ning siri-vaa'uko taamparavaing teie orarai, Sietani'ke, bai'uko. <sup>17</sup> Ee'noko deto komperiaing tee domang-anta Kumponing aruru'nung tee-pina' diikaang baikopo. Napo' komperiai tee Kumponing bakaang kara tee-pina' bainatu tavu'koong Tanuaang Meekung-etaing. <sup>18</sup> Tee' Tanuaang Meekunge pakururimana'koo ookara batei-koo kunsirarimatoai amutemurii' paku nka-koo baitorarima. Ee'noko tee' nkorarima muung ee'noko doong mantontariri eentaevurerereriai Kumponing bakaning meekupoong ootukunairu-koo. <sup>19</sup> Ning tee'ke kungsi-koo pakumeriai tenang ninge kara daankiama'naang nkomarako naumuaining-koo, tampa dooreng makempari otoko'nung noru'antavaramaina' amaiaa'moa'. <sup>20</sup> Temurii' kara nka-koo botomuu'nung deemarako entamemuriaing amorompa' daankiampaina' makosina' bane dai'mari o'noitaa'.

### Asi'naare

<sup>21</sup> Enang tee ninge Tikikas dii'anko botoamaang tee mmaiko' masikung ee'noko Oving-koo mintoomparama mutekaro'arakoo'. <sup>22</sup> Teie naururiaing nii' o'norina' ee'noko ninge nkoamaing kapoo', ee'noko diikaang domang kuaa'antaruriaing.

<sup>23</sup> Mooa ee'noko paa tee ninka masika'anta tee dii'koo ntara'mainkaang-koo otoaing Kumponing Niu-ma-ita ee'noko tee Oving Jiisuu' Karistoo'keta. <sup>24</sup> Biraanke otoaing dii'koo niikaang Oving Jiisuu' Karistoo' paa o'paa'ke piaaverimaing-koo ookara-koo. Tee' nari'.



# PILIPAI

## Pilipai-nupoonge Paula' Tampa' Navuaio' Dotuaru'na'

(1:1-4:23)

**1** Aung ane' karavoto~ ninge Paula'ke minkuanko Timoti'ke daarivuma nee' Karistoo' bakanaanka botovotonaa'kai dii'anko botoampemang nantoong Kumponing bakaning meekupoong Pilipai-navuntu'ke Jiisuu' Karistoo'koo kuunge otorimaing-anko, tanatanuka ee'noko pakupakunuka-anko nari'. <sup>2</sup> Bi-raanke ee'noko mooa dii'koo otoaing Kumponing Niu-ma-itaing ee'noko teieta Oving Jiisuu' Karistoo'.

### Tampa' Tang Ee'noko Napo' Tee Kungsi

<sup>3</sup> Ninge tee dii' noru'dampima tee-koo nkaang Kumponing-koo tampa' tampamaung ookara batei-koo. <sup>4</sup> Ee'noko nkaang kungsi-koo dii' ookara pakurampima tee ning ookara batei-koo doturotu ninka kunsimaramaung, dii'ke tampa' pakumerimaung-koo tee doorenang tampara bereng-anta-koo, teketa tutung komperu'noo'keta bera e'munung doong-koo basinoo'koo. <sup>6</sup> Ninge masika' tasi'pansi o'nong teie Kumponingee tee nko-nko tampara dii'koo tutung-antavuu'nunge be'nu'antavui otoaing tee, bera te'mung tee Jiisuu' Karistoo' toroaravaina'mung-koo basi.

<sup>7</sup> Bakei makosi ninge dii' ookara tee' noru'koo, ai' dii' teing ning-koo domang-koo otoring, dii' ni'ninka narung-pina' o'norimaing. Bane tenang ning ki-imatanava-koo o'noi ee'noko napo' tenang ninge doorenang tampara pakuansi puring-antavamanang, dii' teing ni'ninka nari' tampa'nko Kumponing-etaing kompampimaing. <sup>8</sup> Kumponingee masika'antamupeu' naurampiko tee' ninge dii' piaarampimana' teie piaae Jiisuu' Karistoo'koo pankaruntoong-koong-eta po-maunge. <sup>9</sup> Ee' pina' kunsimaramaung dii'koo: tee di-ikaang piaa tee' nari' deto aa'na' dupui otoaing, tee ninka norunoru' masikung ee'noko tee matau tampara. <sup>10</sup> Aa'noaina', dii'ke ookara aarumonanka tampa' simpe'eri kiiroraa'dariri tuumpiropanuka otoriaing bera Karistoo' poainoo'ke basi. <sup>11</sup> Ee'noko teinge aarumo koonto' bakaningee sinanankai maanto'duri otoriaing Jiisuu' Karistoo'keta pomaingee Kumponing pankaing-antavui daangang-kooningee.

## Paula' Kiimata-koo Otoko Tampara Doorenang Berem-paru'na'

<sup>12</sup> Ee mmaikori', enang kiimatamainoo'koo dii'ke aung noru'erii'naang piamoing, teie kapoo'ke ning-koo nkoarinunge tee doorenang tampara tampa' aa'na' masika' beremparu'nung. <sup>13</sup> Bera tee ookarai amono-koo otoroiningee aa'noko teing kiimatanuka ee'noko tanatanuka nari' tee ee' noru'aing: Ning tee tamung boturopa kiimatamaava', teka ning Karistoo'koo botovotonaa' deemarako kiimatamaing. <sup>14</sup> Ee'noko ning tee ee' dai'mari o'noko daping ookara nantoong mmaikori' Oving-koo purimpariri bia'oramaung bakaang kara aroo'keta sira'paama avoreaava'.

<sup>15</sup> Masika' nii'ningee tee doorenang tampara mamairo ninka daankiaamaung ning Karistoo'ke siong-antamu-mana'koo mamairoarima. <sup>16</sup> Teka nii'ning tampara onou ee'noko piaa ninka daankiarimaung tee' tasi'mai a' kiimatanoo' si'mau'nung tee doorenang tampara puring-antavanko. <sup>17</sup> Teinge mamairo ninka daankiaamaingee tee Karistoo' onou kiiroraa'keta daankiaava', teka aing aa'ning onou-koo otoko daankiaakoo': baka-noru', baka daangang, maroita ning aa'na' manki'antamaava'naang kiimata-koo o'noko. <sup>18</sup> Teka tee makosi, kapoo' otoa'. Tee kapoo' pankaing tee Karistoo' daankiaamaung bane teie teinge ookenge taunge, aa'noko daang noru'ariri ee'noko aarumo masikung ninka. Teka ning tee dotumari o'nomaung teinge Karistoo' daankiaamaung-koo.

## Paula' Domampari Otoo'naang Noru'aru'na' Pilipai-nupoong Paku-koo

<sup>19</sup> Ee'noko tee' nari' dotumari o'noaing, ai' ninge tee noru'ansi o'nong dii'ke kungsi-koo ning pakumerimaung-koo ee'noko napo' Jiisuu' Karistoo' bakaang tanuaange pakumumaung-koo botue tee unaa-anta kompampaing. <sup>20</sup> Ee'noko ning aa'na' dotumari nemari o'nong tee kapoo' tavo'kuaing-koo, maia'moauka'na' noru'mari, teka amanampa' monoi ookutununge Karistoo' pankaing-antavampaing tee' nari' uripo'keta nkomaramana', bane aa'noaingee: domang o'noi o'noaing deeko', ee'noko dupisi'maavaing deeko'. <sup>21</sup> Ai' domamari o'noi Karistoo' tee ning nkaang domaang, ee'noko moomira deeko' tee dupeari otoko kompampaing. <sup>22</sup> Teka ning nkaang mono tee' nari' domamari o'noaing deeko' tee ee' oro'pari otong, nko-nko doma ninge tampara sinang-po'nung nkoampaing, teka tee ning meu' ke'me'mari o'nong kenaanka noru'koo.

<sup>23</sup> Boo'koo pia o'nong Karistoo' ninka nari' o'nore-aina'koo, tee' tee' bakei aa'na' tampa' masika'. <sup>24</sup> Teka kapoo' pankaing dau basi tee domamari anke kansi'koo oto'koong dii' iri'antarampima. <sup>25</sup> Ee'noko ninge enang to'biimari tee ee' tasi'pansing: ning doma dii' ninka nari' o'noi pakurampiri puring-antarampima-toaing diikaang masika'anta-koo ee'noko napo' tee-koo diikaang doturotu. <sup>26</sup> Tee'koo ning napo' dii'anko basimarako dii' ning-koo doturarima dii'ke tee Karistoo' daangamperiaing.

#### Pilipai-nupoong Arikung-koo Kuunge Tampa' Otoroo'naang Nauvuru'na'

<sup>27</sup> Otori tee' teie doorenang tamparai Karistoo' bakaange tampui otolina' nari' otorimaatoai, bane ninge moma beero'dampiko ee'noko beero'dampia' dii'keta taapo'ke o'noko deeko', ai' ninge dii' teing narung onou-koo purintariri otoriko taara-koo piamoi o'nong, ee'noko narung noru' ninka pakureeri iveka'doriai tee doorenang tampara masika'antaveri. <sup>28</sup> Diikaning kare-nupoonge bane arekee' tokoona' nkoraariko aroreria' otorimaatoai. Tee' taa'ni'antarariri otoriko teinge tasi'paavaing doong asi'na'mung kera'pariaing-koo dii' domantariko, Kumponing ee'nunge pakururio'. <sup>29</sup> Ai' Kumponing tampara ootoo'koo bokururima Karistoo' masika'anta narung-koo miru'duria', teka ookeng-koo masika'anta ninka arikananka nari' kune'koo Jiisuu' bakaang miring-koo. <sup>30</sup> Ai' dii' ninge tasi'dampiri otong dii' teing arikananka kune'erima pore'dorimaing tee' ninge arikananka-koo pore' kompanko oomeriko'na' ee'noko enang napo' tee' nari' pore'moko taaramerimaang.

#### Tampa' Pakumeeri Daangamaria' O'noriai

**2** Ee aing, ning dotumari o'nong dii' aing aa'ning oto'derurimaung-koo: tee domang kuaa'anta Karistoo' ninka narung deentarira nkaveru'nung, ee'noko napo' tee bakaang piaae dunsirunsi~antakoong, ee'noko tee bakaang Tanuaang-koo kuunge navunavu, ee'noko napo' dii'ka pankaruntoong-eta pi-aareeri otorimaung-koo; <sup>2</sup> makosi, dii'ke nkaang doturotu dupe-antaveriaing narung noru'koo otori, nari' pi-aareeri, napo' nari' onourariri kapoo'nanka nari' nkoverima. <sup>3</sup> Deikoo'na' ee'noko baka daangana' nkorrariauka', teka dii'ka boonko noru'dariri deto pankaing-antareerimatoai. <sup>4</sup> Dii' naruna' naruna' mintoontarima nii'ning nari' paku-koo mintoontariaing dii'ka dii' naing noru'daria'.

#### Tee Karistoo' Boonko Noru'ari Otoko Kumponing i'ampuu'na'

<sup>5</sup> Diikaang aarumo tee' nari' Jiisuu' Karistoo' bakaang-pina' noru'dariri otorimaatoai. <sup>6</sup> Bane Kumponing-pina' nari' oro'ke, teka baka etuarava' Kumponing-pina' nari' basi otoo'naang. <sup>7</sup> Baka naning tamunsi'nung deeng-antavaru', tee naning botovoton-aa'pina' oto'antavarara. <sup>8</sup> Ee'noko bakei naning-pina'

masika' oro'paru'nooketa baka boonko noru'ari Kumponing meumpuitaa' boo'koo taura'paru', bane aa'barata'koo oroo'ke boo'koo. <sup>9</sup> Tee'koo Kumponing kansi'keta deto a'dei' ookara-koo dau i'ampura teka tee miring pankaing deto basi ookara-koo mirinanka-koo avuu'. <sup>10</sup> Ee'noko ookara nantoong aa'noko paning-koo-nupoong ee'noko kansi'koo-nupoong, napo' kansi'koo boong-nameng-nupoong, teing tee-koo Jiisuu' bakaang miring-koo kinkinaavaing. <sup>11</sup> Ee'noko napo' teinge ookarai Jiisuu' Karistoo' tee Ovoring sirakura' tampaavaing, Bauma Kumponing meenasi oko-antavai.

#### Aa'na' Arakamariaina' Mutaananoo'ke

<sup>12</sup> Tee'koo, ee mmaikori', tee' nari' ookara batei-koo Karistoo' bakaang kara meumperiko'na' enang napo' tee' nari' meumperimaatoaing, tenang ning dii'ankoi o'noko naro' deea', teka baru'noo' tenang ning dii'ankoi o'noaruko tee' nkorariaing, monkeena'dariri tee diikaang domanturiaing tampa' dupe-antasiiriaina' aroo'eri mintoontarima. <sup>13</sup> Ai' tee dii'koo mintoompari otomaung tee Kumponing, dii' paku-antaruri tee aroo'erira bakaang pia siomperii'naang.

<sup>14</sup> Ookara kapoo'nanka nkoverima minkuminkunanka nii'noo' tata'deerima nkoveriauka' tuumpiropanuka otoriaina' ee'noko kiiroraanuka, Kumponing bau-rukaa' kararopanuka anke kansi'koo oroo'ke koomparia'navitu ninka otorimaing. <sup>15</sup> Teing-koo ee'ning-koo meu'ke arakarariri otoriaing beento'nanka paning-kooning-pina' tee kara domantoo' deto komperi ookarai ooaavaina'. <sup>16</sup> Tee' nkoveriko dii'koo aa'na' dotumaravaing Karistoo' poaina'mung ee' noru'ama: dii'koo amari mintoomarokotaa' tamung pore'moaru'nung. <sup>17</sup> Diikaang baito tee boontunang tampara makosi Kumponing-koo, ee'noko ning dupisi'maavaing deeko' nkaang ereng tee-koo boontunang-koo dau dakoaravainang ning tee dotumara-vaing dii' ninka nari' dotumariaina' noru'ansitaa'. <sup>18</sup> Ee'noko napo' dii' teinge ni'ninka nari' doturariaing.

#### Paula'ke Timoti Naanka Eparodaitas Botovuretu'na'

<sup>19</sup> Ovoringe Jiisuu'ke taura'puko tee Timoti dii' Pilipai-nupoong-anko namu'ke botoama'naang, ning-koo dooreruriko doturarii'naang ee'noko toroarako diikaang doorenang taaravamira dotumaravaina' nari'. <sup>20</sup> Nii'nung naning noru'ampa' Timoti-pina' mantong, napo' dii'koo onou aa'na' otoing. <sup>21</sup> Nii'ning nantoong teing kapoo'nanka biikaning naing tanata-koo otormaing, Karistoo' bakaning sipai. <sup>22</sup> Teka dii'ke Timoti bakaang aarumo tampa' noru'eri otoring tee teing pina' deea', ai' naning bauma pakuvumaatopeu'na' nari' teie ning aa'na' pakumumaung tee doorenang tampaara bereng-anta-koo. <sup>23</sup> Enang tee dii'anko namu'ke botoama'naang piamomaang, tokoona' ning o'noaina' baakeenemarara. <sup>24</sup> Ee'noko ning tee'ke

Ovoring-koo aroo'mari aa'pamaang, "Ning da'deng simpiri'antamaako dii'anko dama'ke moo'naang."

<sup>25</sup> Teka io' tutung tee Epaparodaitas dii'anko napo' botoama'naang tee ninge mmaiko', nari' mintoomaremaung ee'noko nari' ni'ninka nee' piatoorora~ baito-koo kuunge. Teenoo' tee diikaang naning, kapoo'koo ning apuka'maramaing-koo pakumuu'naang botoveru'nung. <sup>26</sup> Ee'noko tee dii' aa'na' oo-koo piavoi otong. Ai' tee tee enang manki'antavari otong si-ipavou'na' taaraverira mi'miinki'doriko noru'durima. <sup>27</sup> Ee', masika', tee tee dapi' boo'paru'nung, teka tee Kumponing piaavura domang-antavuu'nung. Teka tee narung deea', tee aa'noko ning piaamura Epaparodaitas domampuu', orarunsi ning-koo pau'eere'neeng-koo. <sup>28</sup> Tee'koo dau basina' dii'anko boto-koo piamoi o'nong dii'ke napo' ooverira doturoturariaina', ee'noko nasaang orarunsi birimpuai. <sup>29</sup> Emu' tee te' dii'anko basiarako bakei aa'na' onkeonke'eriaing Ovoring bakaang miring-koo aa'na' doturariri. Ee'noko nantoong tee-pina' oro'nuka pankaing-antavererimaa-toai. <sup>30</sup> Ai' tee tee dapi' boo'paru'nung tee-koo Karistoo' bakaang-koo nko-nko-koo kuunge; boo'koo tau-ra'paru' ning pakumuma dii' isipo' otori makosiriaruko.

#### Paula' Tee Karistoo'koo Kuung Masipo' Oto'koo To'bi-iarako'na'

**3** Asi'noo'ka ee mmaikori' aadampimang, Ovoring-koo doturoturarimatoaing.

Aung tee kara anaare napo' unampama daariam-atomaung ninge daari-koo pore' deea' ee'noko dii' tampa' koono-koonge. <sup>2</sup> Tee' ee': Tarerariri otorimaa-toai teing-koo nantoong-koo Ju' biikana' dootuu' koong taa'ni'anta kong-koo eturaarimaing-koo, ai' teing nkaunanka makosinanka, kapoo' oreng nkoama mono-nameng-koong taa'ni'antai daang mee-ka'parimaing dopa' napu' dovang nkoarima. <sup>3</sup> Teka nii' ee'ning Kumponing bakaning masakeng-pina' taa'ni'antaniinuka, bakaang Tanuaang ninka dootuu'marimaing Jiisuu' Karistoo' baitoampiri daangampampima, mono bakanameng-koo aroo' o'noria'. <sup>4</sup> Mono bakanameng-koo aroo' o'noi dei ning makosi avitoitoi-koo biivimarapeu', ee'noko napo' nii'nung naning mono-aapenameng-koo biivimparamaung deeko' ning puru'muarupeu'. <sup>5</sup> Ai' ning tee naning meekung taa'ni'antani' dopa' toto'mau'nung-koo ~beenang-taa doong tankinuio' pon-to'maru'noo'keta. Ee'noko ning bakei Isireeli-nupoong-koo narung, Kumponing bakaning-koo, teing Bensimani bakanaving-koo kuunge ponto'marara. Napo' biikaang kara ee'noko aarumo kompansi o'nong, Iiburuna'. Ee'noko boto sionameng-koo ning tee Boto Keperuu'navitu-koo narung aa'nung. <sup>6</sup> Napo' toomonameng donkompansi ning tee iri'moi dootuu'nupoong manki'antavaranko'nunge. Ee'noko koompari oto'nairu-koo ning naning tuumpimu-peu'noo' otoa'.

<sup>7</sup> Teka teing aing kapoo'nanka tero ning puring-antananka-pina' noru'anko'ning enang teing tamunsi'ning noru'ansira dua'arantu'ning ookara, Karistoo' narung-koo noru' sipamira. <sup>8</sup> Ee'noko teing naing deea', ookara kapoo'nanka daang-antavaramira opansi dua'arantu' nung tee kapoo' pankaing masakung kompama'naang. Tee nkaang Ovoring Jiisuu' Karistoo' noru'koo piamora tee bakaang miring-koo ookara kapoo'nanka dama'duarantu' tamunsi'ning tampamira, tee Karistoo' nkateema'naang. <sup>9</sup> Ee'noko ning teekoo kuung o'noi pinka'maravai Kumponing ning naning koonto' tammuu'naang, boto siompama ninka koomario' deea', teka Karistoo' masika'antavansio'. Ai' Kumponing ninka koompari oto' tee Kumponing-etanaka-koo miru'nii', ee'na baito narunge nka-koo makosi. <sup>10</sup> Ning tee Karistoo' bakei aa'na' noru'koo piamoi o'nong ee'noko tee bakaang iri' tee domang-antavuu'nung; napo' tee baika teie kompuu'nung tee' nari' kompampaing; <sup>11</sup> Ee'noko boo'koo tee' moompai tee-pina', dama'ke boo'keta daa'maravaina' piamora tee' naumuru'na'.

#### Paula' Bono'aape Aa'na' Kua'paru'na' Nii'ke Tee Siong-koo Makosina'

<sup>12</sup> Ning aa'maravaroo'naang, "Ning tee' Karistoo'pina' dupeario' kompansing ookara aarumo." Otoa'. Ning mme' makotumpa'. Teka ning aa'na' kevi'maramatoaing temurii' aarumo okomuu'naang Jiisuu'ke ning okovui miru'muu'na'. <sup>13</sup> Ee mmaikori', ninge tee tero nkavantu'nung-pina' noru'ampa', teka aung kapoo' narung ninge nkoampaing: Teing kapoo'nanka dama'duaransining ampa'mora kapoo' uro'kanoo'ke oting kevi'ama mintoomari o'noaing bera boo'ke basi, nkavama'naang tee moo'. <sup>14</sup> Tee moo' tee aung ee' oro': Kumponing Jiisuu' Karistoo' karantavuko~ a'dei' be'koo bokumuaing ning.

<sup>15</sup> Enang tee nii' ookara tanuaang nameng-koo petaa'nuka tee tee' nari' noru'mariaing. <sup>16</sup> Ee'noko dii'koo nii'ninge oovuna' noru'eriko deeko', tee Kumponing dii'koo siraka'antavuaing bakaang karakoo noru'erimanoo' tampa' nari' siomperimatoaing deeko'. <sup>17</sup> Ee mmaikori', tee' nari' otoritaa' ning o'nomana' otoriaing ee'noko napo' teing ninge nauarantu'na' otoromaing-koo barerariri otorimaatoai. <sup>18</sup> Ai' aung tee mmau'namu'pie teroita naurampiko'na' ee'noko enang tee' nari' piaarampima ta'du ninka unampansi aadampimang: Mmau' nantoong dootuu'nupoong teing turani'nuka-pina' otorong tee' Karistoo' aa'barata'koo bou'na' siong-koo. <sup>19</sup> Ai' teing teing biikaang kumponing-pina' noru' tee biikaang mono bakaang pia narung, kapoo'nanka maimaia'arimaing, ee'noko biikaang noru' kapoo'nanka kansikooning-koo otokoo'. Tee' nkoarima mosianungaape otorong. <sup>20</sup> Teka nii' niikanoo' osi te' paning. Ee'noko nii' teing tee niikaang Domang-anta tee Jiisuu' Karistoo' teketa poaing domange etuvuko nempampiri o'noring. <sup>21</sup> Ee'noko pora teie tee aung niikaang kansikoong mononanka aruaru' paari-antamuraing

† Tee' teie taa'ni'antai dopa'toto'koonge miru'ui otoa'.

bakaang mono meenasi-po'nung-pina' oro'antamuri-ma teie iri'ke ookara kapoo'nanka bakaang tanata-koo kuung si'koo makosi-antavuu'nunge.

#### Navumariri Dotumariaina' Tampa' Noru' Ninka

**4** Tee'koo bakei tee' nari' Ovoring-koo masika'antarariri otoriaing, ee mmaikori', ai' dii' teing ninge aa'na' piaarampimaing, ee'noko aa'na' oo-koo pi-amokoo' dii' nkaning doturotunuka ee'noko nkaang nko-nko-koo moo' makosinanka deentariro'.

<sup>2</sup> Dee' Iuodia naanka ee'noko da' Sintiki aa'dampemang, dee' tee-koo Ovoring-koo kuunge napo' navuraraing. <sup>3</sup> Napo' dake Sisikusie pakueresio' tenaanka manikumaara nari-antaveerei beekaang mankimanki'keta, ai' tenaanka tenaanka ni'ninka nari' manta'marimanaanka doorenang tampara bereng-anta-koo ee'noko tee Kelemen nari' teing ninka nii'ning nari' mintoomarimaing, aa'ning niikaang miring tee tene'koo buukunane' domamariaining o'norinane'koo daariariri otong.

<sup>4</sup> Doong kante Ovoring-koo doturoturariri otorimaatoai, napo' unampama aa'pamaang, Doturariri otorimaatoai! <sup>5</sup> Ookara kapoo' nkoveriaining-koo nantoong-koo dutakanoo'ke onou tampara oro'antaverimatoai, ee' noru'eri, Ovoring poainoo' tee due'ui otong. <sup>6</sup> Kapoo'nanka-koo baru' noru' otoriauka', teka ookara kapoo'nanka-koo tee Kumponing eentaveriai kunsirarima tampa' tamperima diikaang domang-eta. <sup>7</sup> Ee'noko teie Kumponing-nung mooai pankaing nantoong biikaang matau-koo dau basie mankimanki'keta unaa-anta aruriaing tee diikaang domang ee'noko diikaang onou Jiisuu' Karistoo'koo kuunge.

<sup>8</sup> Ee mmaikori', asi'namoora'koo aa'dampimang, "Aing ee' oro'ning minkuama'naang dii'ke norunoru'eriaing aa'ning: tee kapoo' masikung, tee kapoo' pankaing-anta-koo makosi, tee koonto', tee ki-iroraa', kapoo' paa-koo makosi, tee miring tamparapo'nung. Nii'ning kapoo' tampeng daangang-koo makosining otoko deeko' makosie dii'ke teing norunoru'koo. <sup>9</sup> Ee'noko teing teing kapoo'nanka ninge naurampiko taaraverira noru'ke pinka'eru'ning ee'noko teing ning-koo ooverira barerariru'ning teing tee' nari' napo' dii'ke nko-koo paaraveriaining. Tee' nkoveriko tee Kumponing mooa-po'nung tee dii' ninka nari' otoaing."

#### Paula' Biikaang Avuavu'koo Dotuaru'na'

<sup>10</sup> Bakei aa'na' dotumaring tee-koo Ovoring-koo diikaang paa ning-koo napo' daa'antaverieeng-koo mmau' batei tamung tankinui'. A'noo'koo tee dii'ke

piaameri paararariko' diikaang avuavu' boto-koo, teka taung otoaruko ning-koo da'deng tavo'aravaruu'.

<sup>11</sup> Teka aa'peri'neenga, "Tee pa bakei aa'na' papovura tee' minkuvuing." A, ning aa' tee bakei datamoi o'no-maung bane aremurii' batei-koo. <sup>12</sup> Ai' ning tee kapoo'koo apuka'mari oto'na'koo datamou'nung ee'noko napo' mmau' oto'memui oto'na'koo. Ning baremaru'nung tee kapoo' makensi'nung amutemurii' batei-koo tampa' nari' datavoi oto'na'koong, aa'noko poomui deeko' nii'noo' peeramoi deeko', nii'na' mmau' oto'memui deeko' nii'noo' apuapuka'koo o'noi deeko'. <sup>13</sup> Ninge tee ookara kapoo'nanka Karistoo' bakaang purinto'koo kuunge nko-koo makosi.

<sup>14</sup> Teka tee makosi tampara dii'ke nkaang arikananka-koo ning pakumerimaung-koo. <sup>15</sup> Napo' dii'ke Pili-pai-nupoongee tee tampa' noru'eri otong, tenang urikamu' tutuna' ninge tee doorenang tampara daankianko'ning, Masedonia'keta tenkenansio' dii' nainge avuavu'nanka tankaamperima ning makosi-antameru'. <sup>16</sup> Napo' teie, bane osi pankamono Tesalonai-ka'namono-koo basimarako, mmau'namu'pie diikaang pakupaku be'antaveru' papoansi o'noko. <sup>17</sup> Teka ninge avuavu'nanka nkavampaina' besi'ampaung. Tee kapoo' pankaing ninge oo-koo piamotoi o'noing tee sinang tampara, Kumponing diikaang tampara nko-nkonanka-koo deeru-koo dau be'nu'umaung. <sup>18</sup> Tee diikaang avuavu' tee Eparodaitas averio' nkavui pou'nung tee enang nkavansing. Tee bakei mmau' masikeng bono' divu'ui otong. Aa'na' maanto'muing. Tee avuavu' tee boontunang makosi tampa' nuuraa' Kumponing-koo, ai' Kumponing tee boontunang temurii'koo dotuara-maung. <sup>19</sup> Ee'noko teie nkaang Kumponingee teing ookara kapoo'nanka dii' apuka'dariaining aruriaing, mmau' aa'na' makotui otoko teieta bakaang paning-koong o'meeva-ita Jiisuu' Karistoo'koo kuunge. <sup>20</sup> Bakei daangang Niuma Kumponing-koo otoi otoaing ookara batei-koo. Ee'.

#### Paula'ke Si'nara'uru'na'

<sup>21</sup> Nkaang tampa' tang nauereriai teing ookara meekupoong Jiisuu' Karistoo'koo kuunge. Ainge mmaikori'ke ni'ninka nari' o'norimaingee dii'anko biikaang tampa' tang botoaamang. <sup>22</sup> Ookarai Kumponing bakaning meekupoongee anke Rooma'ke otoromaingee tampara tampaamaang dii'koo, baru'noo' teingee botovotonaa'nukai tee daurarong~ Siisa' bakanava'kooningee.

<sup>23</sup> Tee biraanke tee Ovoring Jiisuu' Karistoo' bakaang diikaang tanuaang ninka nari' otomatoaing.

Masikung.

# KOLOSI

## Kara Baavootunanka Ane'kooning

1:1 Karistoo'ke Ookara Kapoo' Kumponing Bakaang Maneenanka Okovui Otomaung

3:5 Karistoo' Nii'koo Domang-koo Otoko Nii' Neraka'mariri O'norimana'

### Karistoo'ke Ookara Kapoo' Kumponing Bakaang Maneenanka Okovui Otomaung

(1:1-3:4)

**1** Ning tee Paula' Jiisuu' Karistoo'ke kara okomui nkavama'naang miru'muu'nung Kumponing pivou'na'. Aung Timoti mmaiko' nari' pakumui daarirerompimang dii' nee'maikorori' teke Kolosinavuntu'koo otorining, dii' Karistoo'koo mutekaro'dariri baitorarimaing, Kumponing bakaning meekupoong; <sup>2</sup> Biraanke ee'noko mooa dii'koo otoaing Kumponing Niuma-itaing.

#### Paula' Dotuaru'na' Biikaang Baito-koo

<sup>3</sup> Eparasie naumuresio' taaravampetu' tee diikaang masika'anta Jiisuu' Karistoo'koo ee'noko napo' tee diikaang piala nari' teing-koo nii'ning Kumponing bakaning meekupoong-koo ookara-koo. Tee'koo nee'ke tee neekaang kungsi-koo ookara batei-koo tampara tampampemaung tee-koo Kumponing tee nikaang Oving Jiisuu' Karistoo' Bauma-koo. <sup>5</sup> Dii'ke nemperimaung nooruupieri tee biraanke Kumponing te' paning-koo kinkonteruru'nung dama'ke komperiaing, ee'noko tee nooruupi te' okora'ario' dii' tee' baitorariri piaareerimaung tenang tee doorenang masikung ee'noko tampara tutung nauraario' taaraveru'ng-eta. <sup>6</sup> Ookara kansii'koo teie doorenang tamparai mmau' nantoong bere'antavurima biikaang aarumo paari-antavurimaung tee' nari' dii'koo mintooparamaatomana' te'mung-eta doompeto tee Kumponing-ning piala otoa' masika' punkaamperitaa' tutung taaraveru'na'mung-eta. <sup>7</sup> Tee tee aung doorenang tampara dii'ke teie Eparasie, nii' ninka nari' narung botovotonaake aa'na' piaavampimaunge, naururio' taaraveru'nung, tee nkaang noru' siompui dii'ankoi kake'iiari mintooparamaung Karistoo'koo kuunge. <sup>8</sup> Teie napo' nee' naumuretu' tee' piaareerimana' Tanuaang Meekung-koo kuunge.

### Paula' Kunsiaru'na' Kumponing Puring-antavurii'naang

<sup>9</sup> Tee'koo nee'ke dii'koo tutung taaravampetu'noo'keta kungsi-koo uaamoreaung dii'ke noru'erii'naang tee bakaang pia dii'ke dupe-anta-koo, ee'noko maanto'antararii'naang teie Tanuaang-aapening noru'ke ee'noko mataue. <sup>10</sup> Tee' kunsimarekoo' dii'ke aa'noo'naang: tampa' Oving-koo makosina' otoriai ookamentai tee dotu-antaveriaina', sinang tampara nkaveriai tee-koo ookara nko-nko tampara-koo, ee'noko Kumponing aa'na' punkaamperi~ noru'eriai. <sup>11</sup> Napo' tee'ke nee' kunsimaremaunge dii' puring-antarurii'naang teie iri'ke deto basie Kumponing-etaing meenasi-po'nungee tee kapoo' ivekeng tavo'kuaining-koo tampa' nari' purintariri dotu ninka mii'kiri otorii'naang. <sup>12</sup> Ee'noko doturariri Niuma-koo tampa' tamperimaatoai nii' ookara makosi-antamuru'nung-koo tee barenku nka-koo, teing ninka nii'ning Kumponing bakaning meekupoong ninka nari' araka-kooning ninka. <sup>13</sup> Ai' Kumponing tee nii' Sietani' bakaang muu' mutaanang-eta moo'muru'nung ee'noko teie Bauring aa'na' piaavumaung bakaang muu'aape kuung po'antamuru'. <sup>14</sup> Teie bakaang erenge boorimurima orara aarumo bakaang iri'keta unaa-antamuru'.

#### Karistoo' Bakaang Aarumo Tee Ninka Bakaang Nkoko

<sup>15</sup> Tee tee Karistoo' tee Kumponing oro'paravaungkoong siuraampi~ tee Kumponing masika' otoa' oro'antavumaung, Karistoo', tee Oving, uro'mara' makosi, ookara kapoo'nanka Kumponing nkovuru'ning-koo dau basi. <sup>16</sup> Ai' Karistoo'ke tee Kumponing-koo kuunge ookara kapoo'nanka nkovuru'nung kansii' kooning ee'noko paning-kooning, oarampimaing ee'noko oo-paa'ning, teing tanuaananka ee'noko biikaang ovontunanka nari', piatooronuka~ pina' avatevaatang-koo otoroining. Teing Karistoo'ke nkovuru'ning, ee'noko Kumponing Karistoo'koo boong oto'koo miru'uru'ning. <sup>17</sup> Tee tee ookara kapoo'nanka

nkoaravaruko otoko', ee'noko ookara kapoo'nanka teie kompuri otoko deeko' otoromaung. <sup>18</sup> Ee'noko tee tee bore' bakanavitu dootuu'nupoong-koo. Ee'noko bakanavitu teing tee-koong mono makosinuka. Ee'noko tee tee ookara-koo okora'. Tee tutuna'nung boo'keta daa'koo. Tee'koo tee tee ookara-koo bore' deempari otomaung. <sup>19</sup> Ai' Kumponingee tee bakaang tampara aarumo ookara Bauring-koo miru'ura tee-koo dupeario' oto'antavuu'. <sup>20</sup> Ee'noko tee-koo Jiisuu'koo kuunge Kumponingee ookara kapoo'nanka osikoimpuru', aa'noko kansi'kooning ee'noko paning-kooning, moa tavo'ura bakaang erenge aa'barata'koo booma. <sup>21</sup> Ee'noko dii' tee'ke nari' osikointuru'ninge, tero tee Kumponing-eta isipo' otoriko'ning tee-koo kare-nupoong deentariri, diikaning norunoru'nanka siomperima ee'noko nko-nko oreng. <sup>22</sup> Ee' dii' teing enang Kumponing ninka napo' navu-antaniinuka bauring bakaang monoi naning-naumpario' boo'koo tau-ra'puu'nung-koo, dii' kiiroraa'daririo' meeka'nisinuka baka-koo uro'kanoo' po'antarurii'naang. <sup>23</sup> Teka dii' teing enang be'nu'antarariri otoriaing diikaang masika'anta ninka, tampa' e'maniri pinka'dariri. Teieta nempampimaung-koong noorupi-eta diiri'dariauka' tenang tee doorenang tampara taaraveru'hang nkaveru'nung-eta. Ai' tee tee doorenang tampara ookara-koo nantoong Kumponingee paninga boonamenge nkovuru'ning-koo daankiampimaung. Ning Paula' teie tee doorenang nkavui nanu' deemaru'nung.

#### Paula'ke Kolosi-nupoong Pakuvuru'na'

<sup>24</sup> Ning tee enang dotumaramang teing manki'nanka kune'amaing-koo dii' pakurampima, ai' tee' nkomarama nkaang monoi dupe-antavamaung teing sisikeerananka Karistoo'ke miru'muu'ning tora'koo bakanavitu dootuu'nupoong pakuarama, bakaang mono makosinavitu. <sup>25</sup> Ning tee Kumponingee baka botomuio' dootuu'nupoong biikaang kara-pare' deemaru'nung dii' paku-koo, tee Kumponing bakaang kara opansi sira'panko dii'ke noru'erii'naang. <sup>26</sup> Tee kapoo' maken-si'nung otomaung mare' mmau'koo ee'noko napo' teing-koo nantoong kansi'koo-nupoong-koo, teka enang asi'namu' sira'paring teing-koo bakaning meekupoong. <sup>27</sup> Kumponing bakaang pia tee teing ookara nantoong amutemurii' noru'anta-koo tee kapoo' makensi'nung tampara masikung, Ju' naing deea'. Tee kapoo' makensi'nung tee aung ee' oro', Karistoo' tee dii'koo kuung otong ee'noko dii'ke tee enang nemperi otong bokururira paning-koo be'antarurii'naang. <sup>28</sup> Nii'ke tee tee doorenang Karistoo'koong ookara nantoong sirakura' nau-antavarampimaung amutemurii' noru'nanka-koo pakuarampima, teing ookara Karistoo'koo petaa'oroaina' tautauarampima. <sup>29</sup> Tee'koo ning pore' kompamaung aa'na' mintoomarama Oving bakaang iri'koo e'manansi tukomuko mintoomaramaung-koo.

#### Masika'anta-koo E'manampiri Daang Minkunanka Dimpa'ampiaina'

<sup>2</sup> Ninge tee dii'ke noru'koo piamoing tee dii'koo ning pore'momana' dii' pakurampima ee'noko napo' teing-koo Leodesia'nupoong-koo nari', ee'noko napo' teing-koo nkaang oing mme' oomaavaing-koo. <sup>2</sup> Dii' diikaang domang kuaa'dori otorii'naang pore'momaung, teie piaae naro'ka dai'durii'naang ee'noko noru' dupenii' nkaverii'naang dii'ke Karistoo' kenkumperiaina' tero Kumponingee makempuko'nung pako'pari'uu'noo'keta. <sup>3</sup> Ai' tee ookara noru' ee'noko mataunanka aa'na' tamparananka Karistoo'koo kuunge otoko nkaveru'nung. <sup>4</sup> Ee'noko ninge tee' naurampimang naningee dii'ningee kara menaankai kanu'antarurira tosiruri'neeng-koo. <sup>5</sup> Ai' ning tee bane isipo' o'ngong nkaang mono, teka tee nkaang domange punkaantampiri otong. Ee'noko bakei aa'na' dotumaramaung diikaang ootoo' tampa' otori mintoontarimaung-koo, Karistoo'koo e'maniri baitorariritaa'. <sup>6</sup> Tee tee, dii'ke tee Jiisuu' Karistoo' diikaang Oving masika'antaveru'na'koo, tee' nari' tee-koo kuung otoriaing. <sup>7</sup> Ee'noko napo' tee-koo kuunge pinka'dariri ari'arurira du'duriai, ee'noko tee masika'antaveri pinka'dariri otoriai tee' ee'na' bare-antaraaru'na', ee'noko aa'na' dotu-eta tampa' tamperimaatoai Kumponing-koo.

#### Kansi' Bakaang Norukasi' Tee Tamunsi'nung

<sup>8</sup> Dii' tarerariri otoriai, nantoong-etaing daang-koong matau ninka aavaraarima kanu'antaraari'neenga, aa'ning ninka toomo ee'noko norunoru'nanka kanto'puaing kansi'aapening, Karistoo' bakana' nauraaria'. <sup>9</sup> Ai' Karistoo' tee nii'koo narung deempari otoi ookara aarumo Kumponing bakaang tee-koo dupeario' otoi otomaung, ee'noko tee tee ookara tanuaananka-koo ovontung-koo dau basi biikaning piatooronuka ninka nari'; <sup>10</sup> Tee'koo dii' tee-koo Karistoo'koo kuung porimaing teing kapoo'koo apuka'daria' otorimaing Kumponingee dii' ba'maikori' tanturiaina'koong. <sup>11</sup> Aa'noko tenang dii' Karistoo'koo poru'hang teie tee dii' dopa' toto'nii'nuka pina' makosinuka deeng-antaruru' urikung onou orara mono-aapening toto'antarurima, Ju'pina' birenge nkona' deea', teka teie Tanuaang-aapening nko-nkoi. <sup>12</sup> Ee'noko tenang dii' teie ntong-koo minkie meeka'antaraaru'hang dii' teing Karistoo' ninka nari' Kumponingee dako'duru'ning tee urikung aarumo onoue komperiko'ning ninka. Ee'noko napo' tee Karistoo' ninka nari' daa'duru', Kumponing bakaang iri' tasi'peri masika'antaveriko, Jiisuu' boo'keta daa'uu'nung-koong. <sup>13</sup> Aa'noko tero mme' bere'daria' dii' teing tanuaang boo'nuka otoriko' urikung onou toto'daria' otoriko'nung-koo, diikaning oraka' nkonanka ninka dai'dariri, teka enang Kumponingee dii' teing Karistoo' ninka nari' doman-turing ee'noko diikaning oraka' nkonanka ton-deruri ookara. <sup>14</sup> Ee', Moosesi bakaang botoi nii'

orara aarumo-po'ning boo'numpo'nuka tammuriko, Kumponing piaamurira niikaang oraka' nkonanka-koong deeru kuivuu' kara tumpituumpi-koong ninka nari'. Bakei, taapo' tonta'ura aa'barata'koo taakavuu'.<sup>15</sup> Napo' teie teka ma'nari-koong ovontung biikaning piatooronuka ninka nari' orari-antavuru' ookara-koo dutakanoo'ka sira'antavui, ai' Karistoo'ke biikaang iri' kiru'urira tamunsi'nuka deeng-antavuru' aa'barata'koo boo'paru'noo'ke.

<sup>16</sup> Tee'koo teinge aava nkonukai Ju' biikana'koo tumpirariko taaraverereriauka' taamang tovang ntong nai dovang-koo, nii'noo' doong pankeng-koo aa'ning-koo: dootuu'kooning doong pankeng, kaara neraku dupumanang, ee'noko Doong Uaana'mung. <sup>17</sup> Ai' aing teing tamunsi'ning uu'aa' makosining urikupoong nau-antavuriko'ning kapoo' tavo'kuaining-koong, teka enang teing ookara Karistoo'koo kuunge dupeni'nan-ka deemparirio' Karistoo' narung tee mono masikung nii'ke noru'koo makosi.

<sup>18</sup> Napo' teinge aava nkonukai dii' dootuu'nupoong makosinuka deeaing tantaariko taaraverereriauka', aa'paako, "Dii' oki'nareka' Kumponing taara-koo makosinuka deea', bakaning koosinunanka-anko kunsirariko deeko' makosi." Teing tee' nauraarimaing daang noone-koo ooaamaing-koo e'manaama deravarimaung, ee'noko biikaang monoi noru' oraka' siong-antavurio' tamung boturopa daangampariko'.<sup>19</sup> Ee'noko teing nantoong tee' oro'nuka teing Karistoo'koo be'nu'aria', tee Bore' nii'koo ee'noko nii' bakaang mono makosinuka. Teie narunge bau'uma tanatavui' bakaang mono panka'paramaung anairu-tenairu karu dovang be'nu'antavari tee Kumponing bakaang miru' siompario'.

#### **Karistoo' Ninka Nari' Moompirio' Boto Amutemurii'ke Pakumuriarupeu'na'**

<sup>20</sup> Dii' teing Karistoo' ninka nari' dooru'ning deentariitaa' norunoru'nanka kanto'puaing kansiaapening-koo enang dai'daria' oting. <sup>21</sup> Tee'koo biikaning dootuu'koong botonanka-koo noru' kato siperiauka' taamang tovang bio' kereng-koong. <sup>22</sup> Teing aing kapoo'nanka teing tamung namu'ke paa'numpo' kompampiko, temurii' boto nantoong-etaning tamunsi'ning nau-antananka deemparako. <sup>23</sup> Masika', oo-koo tee matauna' oro'pari otong boto tampeng-pina', teka teinge nii' mono bakaang pia-ita unaa-anta-koo pakumaariarupeu'. Tamung daang dootuu' avutevu'antakooning, ee'noko baru' boonko noru'arama baka mono sisikeera-anta-kooning.

#### **Nii' Teing Kumponing Karistoo' ninka Nari' Daa'antamuring**

**3** Dii' teing Kumponing Karistoo' ninka nari' daa'antarurining nerakung domaang-koo. Tee'koo dii'ke kapoo'ning paning-aapening naing piarori otoriai te' ee'noo' Karistoo' otoinoo'ning, Kumponing-koo tampavine-koo daurarompari

ba'nanui. <sup>2</sup> Diikaang noru'ke deto basina' kapoo' paning-kooning noru'eri otomatoai, kapoo' kansikooning noru'eria'. <sup>3</sup> Ai' dii' teing kansinameng-koo dooru'ning pina' oro'nuka, ee'noko diikaang domaang tee Karistoo' ninka baku'ari otong Kumponing-koo. <sup>4</sup> Karistoo' tee diikaang domaang okovenung, ee'noko tenang Karistoo' napo' oro'paravainang dii' tee' nari'ke tee ninka nari' oro'dariainge teke sirapo'ke Kumponing bakaang meenasi komperi.

#### **Karistoo' Nii'koo Domang-koo Otoko Nii' Neraka'mariri O'norimana'**

(3:5-4:18)

#### **Tee Urikung Aarumo Orara Nii'keta Tonta'ampiai**

<sup>5</sup> Tee'koo kapoo' kansiaapening dii'koo oting boo'antaveriai aa'ning: kaukauro nko, noru' ku'mi', karakaraa', mamairo, ee'noko onou oko'oko-koong, tee' tee' kumponing daang-koong siona'. <sup>6</sup> Tee temurii' kapoo' nkoaamaung-koo tee Kumponing teing taarapiikanuka kiimata-koo iira ninka poaing te'mung. <sup>7</sup> Aing teing aarumonanka dii'ke tero nkoveriko'ning tenang dii' temurii' aarumo-koo kuung otori. <sup>8</sup> Teka enang aing aarumo ee' oro' dii'keta tonta'eriai: iira, turang, oraka' mantong, poore' ee'noko deu'. <sup>9</sup> Tosireeria' otoai, ai' dii'ke tee, tee urikung onou tero tonta'eru'nung teing ninka bakaning aarumonanka ninka. <sup>10</sup> Enang tee dii' onou nerakung deentariirining Kumponing nkovuing, ee'noko teie doong kante paari-antavumaung tee-pina' oro'paraa'naang tee masika' kenkumperiaina'. <sup>11</sup> Enang tee neraka'darira tankatankaang dii'koo meu'ke otoa'. Kiriki'nupoong, Ju'nupoong-eta tankaamparia', dopa' toto'nii'nuka toto'pariaing-eta tankaamparia'. Ee'noko nantoong amutemuu' namuu'pina' otorong. Botovotonaanuka ee'noko osikaiaang nari' otorong - ai' Karistoo' tee ookara-koo nari' otong ee'noko teie narunge nii' bakaning ookara komuri otomaung.

#### **Otori Pias Oro'antaveri otoriai.**

<sup>12</sup> Dii' teing piaarurira Kumponing bakaning meekupoong deentariiri otorii'naang miru'during. Tee'koo aing aa'ning aarumo kuruntariri otoriaing: domang-eta pias bauko, tampa'nko, boonko oto', dooroonto', ee'noko mii'kui oto'. <sup>13</sup> Naruna' naruna' oraka' noru'deeria' otorimaatoai. Nii'nung ninka minkuminku otoko deeko' tonta'antareereai tee' Ovinge tonta'antaruru'na', ee'noko dii'ka tee' nari' tonta'antareerimaatoai. <sup>14</sup> Ee'noko ookara-koo daua pias oto'deruriai, dii' ookara naru'ka dupeari narung onou deeng-antarurina'. <sup>15</sup> Ee'noko tee Karistoo'ke taing mooa taura'periaing teie tanatarurina' tee diikaang domang, dii' ee'ning Kumponing bokuru'ning tee-koo mooa-koo kuunge narung mono

makosinuka deentariri, ee'noko ookara batei-koo tampa' tamperimaatoai.

<sup>16</sup> Napo' tee' Karistoo' bakaang karai maanto'duri otoriai, aa'noko dii' tee matauna' nau-antareeriai ee'noko tautaureeriai pakureerima, ee'noko kenarimatoai teinge aa'ninge: Daari Meekung-koo daarinii'nankai, nantoonge toroamainge ee'noko Tanuaang Meekunge karantavuko~ kenanankai tampara tamperima Kumponing-koo diikaang domange. <sup>17</sup> Ee'noko aming kapoo'nanka dii'ke nkoveriaining, karai ee'noko nko-nkoi, Ovoring Jiisuu' Karistoo' bakaang miring-koo nkoverima Kumponing tee bauma-koo tampa' tamperimaatoaing Jiisuu'koo kuunge.

#### Nampeesinii'nuka Otoroaina', Biurukaa' Nari'

<sup>18</sup> Dii' manii' nampeesinii'nuka, dii'unkaampi biikaang kara aroo'erimaatoai tee' Ovoringe pia-antaruri otoina'. <sup>19</sup> Napo' dii' donkaang nampeesinii'nuka dii'anakaampi piaavereremaatoai booni' antavereria'. <sup>20</sup> Napo' dii' biurukaa'ke diumaraang taaravereremaatoai ookara kapoo'nanka-koo, ai' tee'koo tee Ovoring dotuaramaung. <sup>21</sup> Dii'ke biumaraange diurukaa' iirang-antaverereria' otoai konte-antavereri'neenga.

#### Mintoong-nupoong Ee'noko Tanata Nkonuka

<sup>22</sup> Napo' dii' botovotonaanuka diikaning kansi'kooning ovontung taaravereremaatoai ookara kapoo'nanka-koo, tenang dutai ooraario' naro' deea' tampa' ooraariaina' noru'eri, teka aroo'dariri mintoontarimaatoai Ovoring-koo mintoona' nari', naning-koo deea'. <sup>23</sup> Kapoo' nko-nko nkoveriaining tampa' diikaang domang-eta nkoverimatoai Ovoring-koo mintoompévuri-maung-pina' noru'eri, naning-koo deea', Ovoring-eta barenku nkaveriaina' noru'eri tee diikaang moo'; <sup>24</sup> Ai' dii' teing tee-koo Ovoring Karistoo'koo dai'dariri mintoontarimaing. <sup>25</sup> Teie naninge kapoo' orara nkovumaatoaing tee maku'noo'koo tee orara nkavuaing, tee moo' tee kapoo' orara nkovumaung-koo ee'noko naninge baari'uauka'nung.

**4** Dii' tanata nkonuka, teing diikaning dii'koo mintoomparimaing makosina' tampa' nkovereremaatoai, ee' noru'eri, "Nii' tee'ke niikaang Tanata-nko paning-koo oto'memuring."

#### Kunsiarama Matauari Oto'na'

<sup>2</sup> Kunsi-koo uaaroria' otoai onou tanterariri Kumponing-koo tampa' tamperima. <sup>3</sup> Ee'noko nii' kunsi-koo pakumereremaatoai, Kumponingee nii' karanaang daate'memurii'naang tee dooreng tampara Karistoo' bakaang tero baku'ari otoko'nung daanki-ampiana', tee tenaare aa'naare ning anke kiimatamari o'nong. <sup>4</sup> Napo' ning kunsi-koo pakumeriai ninge tee kara tampa' siraka'antavampaina' tee' ninge minkukoo makosina' minkuama.

<sup>5</sup> Teing ninka mutaanang-nupoong ninka otori mataurariri nanirimaatoai batei tamung kera'peria'.

<sup>6</sup> Kara-koo mataurariri nari' karerima aroo'antana'

karerimaatoai, ee'noko maku'erima to'biirariri karerimaatoaina'.

#### Tikikas Naanka Onesimas Karavoto~ Nkara

<sup>7</sup> Tikikasie tampa' naururiaing dii' teing ookara kapoo' ninge nkoamaing. Tee aung Tikikas tee nii'maiko' masikung, tee nii' ninka nari' Ovoring bakaang botovotonaa' kake'iiari mintoomparamaung Ovoring-koo. <sup>8</sup> Ninge dii'anko botoamaang dii'ke nii' o'norina' noru'erii'naang ee'noko teie dii' napo' kuaa'antaruriai diikaang domang. <sup>9</sup> Napo' Onesimas nari' Tikikas ninka botoamaang, tee napo' tee'ke tee narung nii'maiko' kake'iinung, tee diikanavuntu'nung narung. Tenaankai naurariaing kapoo' ookara anke nkoaramaing.

#### Si'noora'naare

<sup>10</sup> Aristakasie tampa' tang botovumaang dii'anko teie ni'ninka kiimatanava-koo nari' o'noremaunge, napo' teie Maaka'ke, Baanabas baara'ma'nunge, tampara tampumang dii'koo. Tee aung Maaka' tee dii'anko beko tee tampa' onkeonke'eriaing tee' naurampiru'na'.

<sup>11</sup> Narung napo' teie Jiisuu' Jasitasie tampa' tang dii'anko botovumaang. Anaanka nanaanka Ju'koon-aanka masikaanka teing-koo mintoong-koo pakumaarimaing-koo Kumponing bakaang muu' kani-antakoo. Tenaanka mmarang-konaanka deempareko nari' o'noritaa' tampa' mantomaramaung. <sup>12</sup> Napo' diikanavuntu'nunge Eparasie dii'anko tampa' tang botovumaang, teie Jiisuu' Karistoo' bakaang botovotonaa'ke. Teie tee dii' kungsi-koo aa'na' iri'oi pakururimaung, dii' purintariri otorii'naang petaa'dori, ee'noko Kumponing bakaang pia koonto' tasi'periai dii'ke.

<sup>13</sup> Ninge tee tampa' masika' noru'ansi o'nong tee, tee'koo ninge ee' naurampimang: Tee tee bakei pore'omaung dii' Kolosi-nupoong tovang paku-koo, Leodesia'nupoong ee'noko Aiaapolis-nupoong.

<sup>14</sup> Napo' teie Luuke'ke niikaang dokutai domang-eta aa'na' piaavampimaunge Dimas ninka nari' tampa' tampuremaang dii'koo. <sup>15</sup> Enang tee dii'ke nkaang tampa' tang teing nii'maikorori' Leodesia'ke otoromaing nauereriaing ee'noko teni Nimpa teing ninka nari' bakanava-koo dootuu'arimaing ninka.

<sup>16</sup> Aung ane' karavoto deeruaako taareverirai'nange dii'ke napo' dootuu'nupoong Leodesia'ke otoromaing-aape botoveriai teinge napo' deeruaavaina', ee'noko napo' tene' Leodesia'aape botoantu'nane' tee'ke, dii'ke napo' deerueriai. <sup>17</sup> Ee'noko Akipas nauerima aa'periai, "Dake tee nko-nko Ovoringe aruu'nung tampa' dupeantaveaing."

<sup>18</sup> Aung tee anairu karavoto-koo basinairu ninge ninka ane' kompansi nkaang bireng daariamang tampa' tang botoanko nkaang taa'ni'anta ooverira tasi'memurii'naang. Kunsi-koo norunoru'merimatoai, ai' ning tee kiimata-koo sieenai dai'mari o'nong.

Tee biraanke tee dii' ninka nari' otoaing. Ee', tee' nari'.



# 1 TESALONAIKA'

Kara Baavootunanka Ane'kooning

1:1 Paula' Norunoru'arako'na' Tesalonaika'nupoong-koo

4:1 Paula'ke Tesalonaika'nupoong Tampara Aarumo-koo Bia'oroaing Nauvuru'na'

## Paula' Norunoru'arako'na' Tesalonai- ka'nupoong-koo

(1:1-3:13)

**1** Tee ning Paula'. Sailas naankai Timoti pakumuresitaa' daarirerompimang dii' Niuma Kumponing ee'noko Oving Jiisuu' Karistoo' beekaning dootuu'nupoong Tesalonaika'ke otorimaing. Biraanke ee'noko mooa dii'koo otoaing.

### Paula' Dotuaru'na' Tampa' Kumponing Masika'an- tavau'nung-koo

**2** Kumponing tampara tampampimaung doong kante dii'koo ookara-koo ee'noko tantarampimaunge dii' niikaang kungsi-koo ookara-koo. **3** Tenang kungsi-marima niikaang Kumponing-koo, tee Niuma-koo, nii' ampa'moriaung aa'nong: Kumponing masika'antana' otorii'naang pore' komperimaung-koo, nantoong pi-aaverererii'naang tu'dorimaung-koo, ee'noko niikaang Oving Jiisuu' Karistoo' toroaravaina'mung bateinang-koo doong kante aa'na' noru'erimaung-koo. **4** Nii'maikorori' Kumponing piaarurimaing, nii'ke noru'ampiri otong Kumponing dii' miru'duru' bakaning deentarii'naang. **5** Aming-koo tee' noru'ampiri otong? Nna' tee doorenang tampara tampa' tavo'ario' ooampira dii'koo. Tee minkunaa dii'koo tavo'ampiru'nung tamunsi'nung deea', Tanuaang Meekung bakaang purinto' ninka tavo'aru'. Teie tee minkunaa masikung iri'oi tasi'antaruru'. Ee'noko tee dii'ke tasi'peri niikaang aarumo tampara, napo' tee minkunaa masikung tasi'peru'. **6** Tee'koo dii' nii'koo bi'antarariri siomperimang tee Oving, aa'nong bane pore'anta kune'erima niikaang minkunaa taaraveru' Tanuaang Meekunge doturotu-antaruriko. **7** Dii' aa' enang tee aa'na' masika'antaverimaung-koo nantoonge siontaariaining deentariining ookavora'kakooning masika'antavarimaing, aa'ninge diikanoo' Masedonia'nupoong ee'noko Akaia'nupoong napo'.

**8** Ee'noko baru' Masedonia' naanka Akaia'kooning nainge taaravaava' tee Oving bakaang kara dii'keta, teka tee dii'ke Kumponing masika'antaverimana' doonaanka-koo beremparing-koo nii' kara o'noria'. **9** Teing bii'ka minkuarimaung kapoo'nanka tavo'aru'ning ooaama dii' beero'darampiko. Ee' minkuarimaung: Dii'ke siperereru' teing diikaning ovontung tosisinanka; **10** ee'noko bere'dariru' tee Kumponing masikung-anko, tee-koo dai'dariri siomperii'naang, tee ee'nara domaang okovenung; ee'noko enang neng-antarimaung tee Kumponing Bauring paning-eta toroaravainoo'koo. Tee ee'nara boo'keta daa'antavuu'nung, Jiisuu', nii' domang-anta tee-koo Kumponing bakaang iira dama' tavo'aravaing-koo.

### Paula' Tampa' Ooi Otoroko'na' Temu' Tutung Doore- vuriko

**2** Dii' nii'maikorori' ooveriko, tee beroveero' nii'ke beero'darampiko'nung tamunsi'nung deea', teka teie tee sinang nkavuu'nung. **2** Dii'ke noru'eri otong nii' tee Pilipai-namono-koo bakei oraka' nkomaariko'; turamaaru' dii'anko mme' tavo'kampiaruko; aa'na' masika' tora'antamaaru' teka. Nka Kumponing puring-antamurio' nanampira napo' dii' dankirampiru' tee tampara doorenang, bane napo' aa'na' turamaariko. **3** Niikaang tautau tee boturopa deea'; napo' bakiaa' nko-koo minkuampira'; ee'noko aava nkoampira' nii'ke. **4** Teo, Kumponing tee makosinuka tammurira aroo'muri botomuru' tee doorenang tampara bereng-antavampii'naang. Tee'koo nii'ke enang sira'pampimang Kumponing niikaang noru' paaramurimaung dotu-anta-koo, nii'nung naning dotu-anta-koo deea'. **5** Dii'ke tampa' noru'mereri otong nii'. Dii'koo kara menaanka minkuampira'. Ee'noko Kumponing noru'ui otong dii' nii'ke diikaang kapoo' okomurii'naang navurampira' niikaang minkunaa daka'puio'. **6** Ee'noko napo' nii'nung naning daangamuriaroo'naang dii'koo, aing-koonge ee'noko nii'ning-koonge. Aunoo' masika' nii' Karistoo' bakaning kara okovuri nkanuka. Nii' pia-koo dei tee dii'ke nii' daangamereripeu'. Nka nii'ke daangang besi'ampira'. **7** Tamung ka'duumariri

o'noriko' dii' ninka, nani toire' tanatavurimai-pina'.  
<sup>8</sup> Tee'koo nii'ke dii' piaarampiri dii' tee doorenang  
 tampara Kumponing-etaing arorompuru', ee'noko tee  
 narung deea', nii' nii'ka napo' avu'koo makosi-anta-  
 mariko', dii' bakei nii'maikorori' masikeng deen-  
 tariru'nung-koo.

<sup>9</sup> Ee mmaikori', dii'ke masikee-antameripeu', ai'  
 noru'eri otong nii' tee bakei aa'na' pore'moriko' iri'  
 o'marima, birenge mintoomarima doong ee'noko  
 muung nii'ka bau'marii'naang dii' pore'antarampia-  
 roo'naang taamang tovang-koo, tee doorenang tam-  
 para Kumponing-nung daankiampima. <sup>10</sup> Dii' teing nii'  
 niikaning sirasira' nkonuka, Kumponing napo' tee'ke,  
 niikaang tare dii'koo baito-nupoong-koo kiiroraa'  
 ee'noko koonto', tuumpi otoa'. <sup>11</sup> Noru'eri otong dii'ke,  
 nii'ke tee dii' nari' tarerampiko' tee' biumai toire'  
 tarevurimana', tautau ninka domang kuaa'antararam-  
 piri, dunsirunsi' antarampiri, ee'noko to'bii-an-  
 tarampiri dii' Kumponing dotu-antana' otorii'naang,  
 tee ee'nara dii' bokururu'nung bakaang muu'koo  
 ee'noko meenasi-koo kuunge otorii'naang.

#### Tesalonaika'nupoonge Masika'anta Date'pau'na'

<sup>13</sup> Ee'noko nii'nung kapoo'koo Kumponing tampara  
 minkuampimaung: Tenang dii'koo daankiampiko dii'ke  
 tee kara niikaang-pina' noru'eri aruko'nung, teka tam-  
 pa' taaraveriko' tee kapoo' minkuampiko Kumponing  
 bakaang kara-pina', teie ee'nunge diikaang domang  
 bere'antaruru' tenang dii'ke masika'antaveriko.

<sup>14</sup> Ee'noko enang dii' teing nii'maikorori' masikeng  
 otorimaing Kumponing bakaning dootuu'nupoong Ju-  
 dia'naeensi'koo otoromaing-pina' nari' Jiisuu' Karis-  
 too'koo kuunge, ai' diikanoo'nupoonge pore'antaraari-  
 maunge Ju'nupoonge pore'antavaariko'na' bi-  
 ikanoo'nupoong. <sup>15</sup> Teing ee'ning tavau'ning tee Ovor-  
 ing Jiisuu' ee'noko nakaronuka, ee'noko nii' ba-  
 ta'maarua'. <sup>16</sup> Tee'koo Kumponing iira-antavau' ee'noko  
 nantoong ookara too'dempaaru' nii' avo'avo'maarima  
 kara nau-koo teing Ju' deeaing domamparipeu'nung.  
 Tee' nari' nkoaakotaa' oraka'nkoi maanto'nuka deem-  
 paruru'. Tee tee enang asi'namu' Kumponing bakaang  
 iira kune'aavaing.

#### Paula' Tesalonaika'nupoong Beero'koo Piavou'na'

<sup>17</sup> Nii'maikorori' ee, nii'ke tee oki'noo' si'darampira  
 birontarampi-kotaa' taung besi'ampiru'  
 oomeerii'naang, aa'na' piamorira. A'noo'koo tee  
 noru'ke si'darampia', mono narunge. <sup>18</sup> Nii' tee dii'anko  
 toro-koo piamori otong. Baru' ning Paula' aa'na'  
 mmau'namu'pie dii' oo-koo paaravantu', nka Sietani'ke  
 avo'avo'uko'. <sup>19</sup> Dii' beero'koo piamorimang dii'  
 dua'dari'neeng-koo noru'ampiri, ai' dama'ke tee ni-  
 ikaang Oving Jiisuu' Karistoo' toroarara aming-koo  
 tampa' noru'muriaing? Aming-koo moo'murira dotu-  
 antamuraing-pina' noru'ampimaung nempampiri?  
 Tee aa' dii'koo ee'ning-koo oorurira masika'antaveriko.  
<sup>20</sup> Dii'koo ee'ning-koo dotumariri o'norimaung.

#### Paula' Dotuaru'na' Timoti Toroarara Teing-koo Tampa' Doorevuko

<sup>3</sup> Ee'noko tee'koo nii' baru' nemariaroonaang;  
 tee'koo nee'ke Sailas naankai aroo'ampesieeng  
 teka Aateni-namono-koo si'muree'naang nee' nee'ka,  
 ee'noko nee'ke botoampetu' tee Timoti dii'anko. <sup>2</sup> Tim-  
 oti tee nee'maiko'pina', nee' ninka Kumponing-nung  
 botovotonaa', tampara doorenang Jiisuu' Karis-  
 too'koong nau-anta. <sup>3</sup> Tee botoampetu' puring-an-  
 tarurii'naang, ee'noko unaunturii'naang dii'koo narung  
 paapaa'ara'neeng-koo pore'anta kune'uma. Dii'ke  
 dii'ka noru'eri otong tee' nari' pore'anta  
 kune'ampii'naang Jiisuu'ke tero tampuu'na'. <sup>4</sup> Tenang  
 dii' nii' ninka o'nori tee napo' nii'ke naurarampiko'  
 mme' nkoaravaruko dama'ke tee nii' turamaarianing,  
 enang ooveriko ee'na' nkomaarimaang. <sup>5</sup> Tee'koo, ne-  
 maravarui, nka namu'ke botoansieeng tee Timoti di-  
 ikaang ootoo' noru'koo piamora, aa'pamira, "Teing  
 arekee' otorong: Sietani'ke paaravuriko mme' masi-  
 ka'antavai otong Karistoo'? Ai' dua'aruru'nunge?" – ni-  
 ikaang nko-nko daang deempara'neenga. <sup>6</sup> Tekaa tee  
 Timoti toroarara nee'anko dii'ankoita. Ee'noko  
 toroarara tampara minkunaa naumuresieeng diikaang  
 baito-koo ee'noko diikaang paaa. Aa'muresieeng dii'ke  
 nii' tampa' noru'mererima nee' napo' oo-koo aa'na' pi-  
 arorimaung, tee' nari' nee' dii' oo-koo aa'na' piamore-  
 mana'. <sup>7</sup> Ee'noko ee' nii'maikorori', tee' taaravampeta  
 tee pore'anta ee'noko turang kune'ampimaung am-  
 pa'morema domang kuaa'moretu', diikaang baito  
 purimpari otoko tasi'pampeta. <sup>8</sup> Dii' purintariri  
 Kumponing-koo bi'dariri otoriko nii' Sailas dovang Tim-  
 oti enang domamariri o'noring. <sup>9</sup> Enang tee nii'ke  
 aa'na' tampara minkuampimaung Kumponing-koo  
 dii'ke Kumponing tampa' siomperiko dotumarimaung-  
 koo. <sup>10</sup> Aa'na' kunsimarimaung muung ee'noko doong  
 dii' ninka ee'ning ninka oing oomeerii'naang. Ee'noko  
 pakurarampia dii' apuka'dariri otoing-koo diikaang  
 baito-koo.

<sup>11</sup> Enang tee Niuma Kumponing ee'narai ee'noko  
 Oving Jiisuu'ke koong-antavureaing niikaang taung  
 dii' beero'koo nanampiainavung. <sup>12</sup> Ee'noko Ovinge  
 diikaang aarumo paaa-koong panka'antaruruaing be-  
 ra aa'na' tampa' piaareeriaina' dii' dii'ka ee'noko  
 ookara nantoong piaavereriaina', tee' nari' nii'ke dii'  
 piaararampimana'. <sup>13</sup> Ee'noko tee'koo puring-antaruri-  
 ai tuumpi otoriaing deentari' otoriaina' meeka'dariri  
 niikaang Kumponing ee'noko Niuma-koo uro'kanoo'ke  
 tenang Oving Jiisuu' Toroaravainang teing ninka  
 ookara bakaning meekupoong ninka.

## Paula'ke Tesalonaika'nupoong Tampara Aarumo-koo Bia'oroaing Nauvuru'na'

(4:1-5:28)

Domang-koong Aarumo Aa'ning: Kiiroraa', Piaa, Kake'ii

**4** Enang aa' dii' nii'maikorori' nii'ke dii' pia-an-tarampimaang unampampiri tee-koo Ovoring Jiisuu' napo' dii' nii'koo barerariaing tee' dii' tampa' otoriaina' Kumponing dotu-antaveri tee' ee'na' enang nkoverimang, nka baru' aa'na' nkoveriaing. <sup>2</sup> A'noo' tee noru'eri otong tee botonanka naurampiru'nung tee-koong Ovoring Jiisuu'koo kuunge. <sup>3</sup> Tee tee ee'nara pia Ovoring bakaang, dii' poterariri meeka'antararii'naang tee-koo aarumo kaukauro nko-koong. <sup>4</sup> Tee'koo dii'ke tampa' noru'eriaing koonto' narunge baka ba'aang masikani nampuaina' meeka'antarariri toosirariri otoriaina'. <sup>5</sup> Tamung karaa'deerima siong-antareeriauka' Kumponing noru'aavaing-pina'. <sup>6</sup> Nii'nung naninge ba'maiko' pari'uauka'nunge aung kapoo'koo. Ovoringe tee temurii' kapoo' ootukunung maku'antavumaung, tee' tero koono-antarampiri naurampiru'na'. <sup>7</sup> Ai' Kumponinge dii' ku'mi'koo miru'duria', teka kiiroraa'dariri oto'koo miru'duru'nung. <sup>8</sup> Tee'koo tee naning aung kara masikung dimpa'uaing deeko', naning dimpa'ua', Kumponing ee'nara dimpa'uing, tee Tanuaang Meekung arurimaung.

<sup>9</sup> Tee-koo piaa, namaia' piaareerimaung-koo, Kumponinge tero bareruru'nung piaareerii'naang kapoo' daari-koo makosi otoa'. <sup>10</sup> Ee'na' ootukuning dii'maikori' Masedonia'naang nupoong piaaverererimaung, masika'. Nka enang nii'ke iri'mori unantarampimaang ee': Diikaang aarumo piaa-koong panaka'antaveriaing. <sup>11</sup> Ee'noko to'bii-antarariri ka'duuro'nu-ka otorii'naang nii'ning biikaang nko-nkonanka-koo papuraanka'antaverereriauka', teka dii'ka diikaang, kake'iirariri mintoontariai dii'ka diikaning birenge, botorampiru'na'. <sup>12</sup> Tee' nari' akoviturie tee-koo masika'antaraariaing. Nii'nung-koo aroo'dari ata' nani-uka'.

### Arekee' Nkomuriaina' Tenang Jiisuu' Toroarara

<sup>13</sup> Enang tee dii' nii'maikorori' teing Karistoo' bakaning boorou'ning-koo tampa' naurampii'naang pi-amorimang dii' orarun-sirariauka'na', tee' nii'ning nkoarimana' Karistoo'koo nemparia' otoromaing. <sup>14</sup> Nii'ke masika'antavampiri otong Jiisuu' tee boo'parara napo' daa'aru'. Tee'koo tee' noru'ampiri otong Kumponinge Jiisuu' bakaning boorou'ning napo' tee ninka nari' tavo'antavuriaing. <sup>15</sup> Ovoringe tutung naumuriko dii' nari' naurampimaang: Nii' teing booroma si'maaru'ning Ovoring poaina'mung-koo dama'due bi'mariaing boorou'ning-koo. <sup>16</sup> Ai' Ovoring ee'nara paning-eta siarama aa'na' bokumuriaing koos-

inung pankaing-pina' bokuma, Kumponing-etaing tuu-viri karoi otoko. Ee'noko Karistoo' bakaning boorou'ning ee'namu' daa'ariaing tutung. <sup>17</sup> Teka tenang nii' booroma si'maaru'ning deto baramuriaing teing ninka kamo'koo kune'koo tee Ovoring auvi'aua. Tee' nari' tapo'meerira Ovoring ninka o'noriaing. <sup>18</sup> Enang tee dunsirunsi' antareeriaing aunge karai.

## Nerimariri O'norimaatoaing, Ta'ning-antana' Pora Tampa' Oomuriaina'

**5** Nii'maikorori' ee, baru' bateinang poaina'mung naurampii'naang nia'meriauka'nung dii'ke. <sup>2</sup> Ai' dii'ke tee tampa' noru'eri otong Ovoring poaina'mung makensi'na'mung, bakispunuka biikaang bateinang-pina' tenang muunga. <sup>3</sup> Tenang nantoonge aa'pai otoko, "Nii' tampa' o'norimaang mooa-koo," ee'namu' ta'ning-antana' biikaang ootoo' mooa-po'nung turari-aravaing. Tee' tee-pina' maniku' pareaava'naang ta'ning-antana' sisikeeravoromana'; baari'aavau-ka'nung. <sup>4</sup> Nka dii' nii'maikorori' mutaanang-kooning deea'. Te'mung doong basiarama ta'ning-antaruriauka'nung bakispung-pina'. <sup>5</sup> Dii' ookara tee araka baurukaa' ee'noko doong baurukaa'ke. Nii' tee mutaanang ee'noko muung-kooning deea'. <sup>6</sup> Tee'koo enang aatumpiri otoauka' teing nii'ning-pina', teka tantemariri o'noriai taremariri. <sup>7</sup> Muung tee aasi' bakanang, tenang nantoong naikaama kanu'arimanang. <sup>8</sup> Teka nii' nantoong doong-kooning deemariritaa' tee taremariri o'noriaing. Ookara pi-aavarampisi, Kumponing-etaing kara masika'antavampiri, ee'noko moo'muriaina' aa'na' noru'ampiri, oraraita nee'mariri o'noriaing naning tavutavu' nko-pina' bakaang mono nee'arapeu'na' mononopa' baakopo dovang ivekeng kurumparama. <sup>9</sup> Ai' Kumponinge tee nii' miru'muria' teie kiimatamurii'naang iiravoma, teka domamurii'naang niikaang Ovoringe, Jiisuu' Karistoo'ke, teie ee'narai nii'koo boo'paru'nunge nii' naru'murii'naang tee ninka toroaravaina'mung-koo, moompiaining ee'noko domamariaining. <sup>11</sup> Tasi'peri? Makosi, tampara aarumo nko-koo domang kuaa'antareerima otoriaing, ee'noko puring-antareerima tee'pina' nkorarimatomana'.

### Kumponinge Pakumuriaing Tapo'meerira Navumariri O'noriaina'

<sup>12</sup> Nii'maikorori' ee, nii'ke enang ee' minkurampimaang: Masika'antavereriaing teing nantoong Ovoring-koo kuunge dii' pakuraarimaing taung nau-antararima koong-antaraari. <sup>13</sup> Piaaverereriai, pankaing-antaverereri tee-koo ee'nung-koo mintoong-koo nkoaamatomaung-koo. Mooa-koo otoriaing. <sup>14</sup> Nii'maikorori', ee' nkoverii'naang botorampimaang: Koono-antavereriaing teing kontevoroma ata' nanu'nuka, ee'noko teing avoro'keta orarunsiarimaing dunsirunsi-antavereriaing. Pakuereriaing teing iri' oparimaing. Bointuri otoriaing ookara ninka. <sup>15</sup> Tauraperiauka' orara orarai maku'koo, teka paku

baukonuka deentariri otoriaing dii' dii'ka ee'noko ookara-koo. <sup>16</sup> Doturotutariri otorimaatoai. <sup>17</sup> Kungsi-koo uaroriauka'. <sup>18</sup> Bane arekee' nkoarako tampara tamperiaing Kumponing-koo. Tee' ee'na' nko-rarii'naang Kumponing maroruri otong dii' Jiisuu' Karistoo'koo otoriko. <sup>19</sup> Tanuaang Meekung siri'eriauka'. <sup>20</sup> Daang tamperiauka' tee kara Tanuaang Meekunge karanta~, <sup>21</sup> nka paaraveriaing ookara kapoo'nanka tasi'periainoo'ke basi, ee'noko tenang komperiaing kapoo'nanka masakeng.

#### Asi'nanaare

<sup>22</sup> Pote-antarariri otoriaing teing-eta kapoo' orarananka-ita. <sup>23</sup> Teie ee'narai Kumponing mooa

okovosi'ke meeka'antaruriaing, tampa' konturiaing dii' ootukunairue – tanuaang, tungsi, mono – bera Jiisuu' Karistoo' poaina'mung-koo, koonto' tuumpi otoriaing deentariaina'. <sup>24</sup> Kumponing bokururu'nunge koonto' si'duriauka'nung. Tee' minkuansina' nari' nkoruriaing. <sup>25</sup> Nii'maikorori' ee, kungsi-koo pakumereriai.

<sup>26</sup> Dii'ke teing nii'ning nii'maikorori' niikaang doturo-tu nauereriaing bireng batu'deeri Oving-koo ku-unge.

<sup>27</sup> Ninge aa'na' botorampimang, Oving bakaang miring-koo kuunge: Deerueriaing aung karavoto~ ootukunung nii'maikorori'ankoi. <sup>28</sup> Tee biraanke niikaang Oving Jiisuu' Karistoo' bakaang dii' ninka nari' otomatoaing. Ee', tee' nari'.

## 2 TESALONAIKA'

Kara Baavootunanka Ane'kooning

1:1 Paula'ke Doong Asi-koo Nau-antavuru'na'

3:1 Paula'ke Botovuru'na' Teing Mintoong-koo Kontevoromaing Daa'aarii'naang

### Paula'ke Doong Asi-koo Nau-antavuru'na'

(1:1-2:17)

**1** Tee ning Paula'. Sailas naankai Timoti pakumuresitaa' daarirerompimang dii' Kumponing ee'noko Oving Jiiisuu' Karistoo' beekaning dootuu'nupoong Tesalonaika'ke otorimaing. Maikori' Kumponing bi-raankeruri mooa ninka otorii'naang. <sup>2</sup> Biraanke ee'noko mooa dii'koo otoaing Kumponing Niumaitaing ee'noko teieta Oving Jiiisuu' Karistoo'.

### Paula'ke Tampara Tampuu'na' Kumponing-koo Tampa' Donkonoio' Oovurira

<sup>3</sup> Mmaikori' ee, nii'ke tee nau'ka tampara tampampimaung Kumponing dii'koo. Tee' nari' makosina' noko-koo, ai' diikaang masika'anta tampa' dupui otomaung-koo, ee'noko tee diikaang paa dii'ka bereng-antaverimaung-koo. <sup>4</sup> Tee'koo nii' doturotumarimaung sira'anta-koo Kumponing bakaning dootuu'nupoong-koo osi kantena'. Nauarampimaung dii' purintariri ee'noko baitorariri otorimaung-koo tenang nantoonge turantaarima pore'antaraariko.

### Kumponing Nii' Simpe'murimaung Aarumo Koon-to'koo

<sup>5</sup> Aung ee'nara taa'ni'anta Kumponing aarumo koon-to'koo simpe'anta-koong, aa'noko teie nerirurimang makosi-antarurii'naang tee-koo bakaang muu'koo kuung be'koo baike ninka kavi'erimaung-koo. <sup>6</sup> Teka teie enang kiimata makosina' maamu-antavui otong teing-koo nantoong dii' oraka' nkoraarimaing-koo, mero'anta-koo. <sup>7</sup> Tee taa'ni'anta napo' ee' oro': Teie aa' nii' oraka' nko-nko-ita unaa-anta amurima dii' napo' unaa-antaruriainge pore'anta tora'perimaing, te'mung Oving Jiiisuu' tavo'aravaina'mung; <sup>8</sup> Teka tee tavo'aravaing paning-eta teing ninka bakaning koosinung~ purinto'nanka ninka nta' aa'na' urumpari mero-anta-koo teing Kumponing noru'avaing ee'noko teing Oving

Jiiisuu' bakaang kara tampara siompaavaing. <sup>9</sup> Kiimata avuriaing ee' oro': Ovinge bakaang dutakanoo'keta bata'uriai, bakaang iirakuta-koong meenasi ooaavauka'nung ee'noko orari-anta kompaavaing oparavauka'nung. <sup>10</sup> Tee' nkoaravaing te'mung poaina'mung meenasi nkavuu'naang teing-eta' bakaning meekupoong-eta, deto basi-antavai masika'antavaing-eta. Dii' tee-pina' teing-koo meu' otoriainge ai' dii'ke tee masika'antaveru'nung tee, kara bakaang dii' naurarampirio' nii'ke.

<sup>11</sup> Poaina'mung noru'ampima nii'ke niikaang Kumponing-koo kunsirerorompimaung dii' teie dupe-antarurii'naang miru'duru'na' ee'noko napo' dupe-antaruruaing bakaang iri'ke teing tampara aarumonanka ee'noko nko-nkonanka Kumponing masika'anta-itaning daruerimaing. <sup>12</sup> Tee' nari' tee miring niikaang Oving Jiiisuu' bakaang pankaimparaa'naang dii'koo kuunge, ee'noko dii' tee' nari' tee-koo, bakaang piaae makosina' niikaang Kumponing ee'noko Oving Jiiisuu' Karistoo'.

### Jiiisuu' Poaina'mung Due'uko Naning Orara Tavo'aravaina'

**2** Enang napo' dii' nii'maikorori' naurampimang niikaang Oving Jiiisuu' Karistoo' napo' toroara-vaing-koo ee'noko tee niikaang naronaro' tee, kune'ampiang-koong. <sup>2</sup> Aa'na' pia-antararampimaung dii' nii'maikorori' paapaa'darima domang puraaniriau-ka' nii'namurii' kara tavo'arako, Oving bakaang doong tavo'kuung, poing, tampaako, bane Tanuaang Meekunge karantanuka~ tamparima ai' daankiarima minkuaako dootuu'koo ai' karavoto-koo~ minkuaako ning-etaing tampaama. <sup>3</sup> Tee' avutevu'ai' tosiraariko masika'antavereriauka'. Ee' noru'eriai, kenaanka kapoo' nkoaravaruko Oving bakaang doong tavo'kuauka'nung, aa'noko tutung mmau'ke Kumponing-eta bere'arima too'dempaavai ee'noko tee naning Kumponing-nung Boto Meekung daang-anta-koo pivoainung oro'paravaing, teenoo' tee mosianung kuntu'uaing. <sup>4</sup> Tee ee'nara naning taarapiika deto basi tamparavaing ookara ovontung-koo nantoonge boon-

tuaarimaing-koo. Ovontung turampuriaine bera dootuu'nava pankava Kumponing-nava koinu-rai'nange ba'namparara ee' minkuvuaing: "Ning tee Kumponing." <sup>5</sup> Aung kara tero naurampiru' dii' ninka o'noritaa', ai' ampa'doru'nunge? <sup>6</sup> Dii'ke tee noru'eri otong tee doomo'ui otomaung. Teie doomo'ui otoo'naang bera tee bateinang Kumponing tau-ra'puko oro'paravaina'mung. <sup>7</sup> A'noo' tee taarapiika aarumo enang makensi'na' nko-nkoaramang doomo'ui' bera Kumponing tee doomo'ui otomaung daate'uaina'mung. <sup>8</sup> Karistoo' ee'nara aa'na' araka-po'nung tavo'kura paro'uu'naang bakaang domaange karang-eta, ee'noko teka bake-antavuui bakaang aarumo.

<sup>9</sup> Enang napo' naurampiang tee-koo naning taarapiika Kumponing-nung Boto Meekung daang-anta-koo piavoainung-koo; <sup>10</sup> Sietani'ke ee'narai tee taarapiika tavo'antavuu'naang tee ninka bakaang iri' amutemurii' taa'ni'anta tositosi-koong, ta'nimpaarii', ee'noko amutemurii' aarumo orarananka tosi-koong dua'anta-koo teing paa'arimaing kasiaavaruma tee kara masikung domampuripeu'nung. <sup>11</sup> Tee'koo, kasi-aavaruko Kumponing taura'puaing tositosi pankaing teing-koo tavo'araa'naang, daang-koong masika'antavaako ookara kiimata-kooning tampuriaina', orara aarumo piavoroma kara masikung masika'an-tavaavaruko.

#### Kumponing Dii' Miru'duru'nung Domang-anta-koo

<sup>13</sup> Nii'maikorori' ee, Ovoring piaaruri otorining, teka nii'ke tampa' tampampiang Kumponing-koo dii' ee'ning-koo. Ai' dii' teing Kumponing tanturu'ning tutuna'noo'keta domantarii'naang Tanuaang Meekunge meeka'antarurio' ee'noko dii'ke kara masikung masika'antaverima. <sup>14</sup> Kumponing temurii' ootoo'koo bokururu' tee doorenang tampara daankiampiko dii'koo. Dii' bokururu'nung nkaverii'naang tee meenasi nikaang Ovoring Jiisuu' Karistoo' bakaang. <sup>15</sup> Tee'koo dii' nii'maikorori' purintariri tampa' donkoniri otoriai, komperi otoriaing tee kara masikung nii'ke naurampiru' ookenge daankimarima ee'noko karavoto-koo daariampima.

<sup>16</sup> Tee niikaang Ovoring Jiisuu' Karistoo' ee'noko Niu-ma Kumponing piaamaarimanakang ee'noko biraanke-antamaari domang kuaa'anta boturopa amaarinakang, kapoo' tampara-koo neng-antamaari-ma – enang tee tekange ee'nakange domang kuaa'antaraariai. <sup>17</sup> Dii'ke ookara kapoo' tapanananka minku-koo ee'noko nko-koo iri'antaraariaing.

### Paula'ke Botovuru'na' Teing Mintoong-koo Kontevoromaing Daa'aarii'naang

(3:1-18)

#### Paula'ke Nia'uru'na' Kunsievaarii'naang Bakaning Pakupaku-nupoong Nari'

**3** Nii'maikorori' ee, asi'nanaare anaare: Dii'ke kunsikoo pakumereriai Ovoring bakaang kara iri'narung beremparara kuung deempuriaina' tee'pina' dii'koo meu'ke nkoaru'na'. <sup>2</sup> Ee'noko napo' kunsikoo pakumereriai Kumponing pakumuriaina' teing nantoonge oravoonge tamaari'neeng. Ai' ookarai tee masika'antavaavaung. <sup>3</sup> Ovoring tee dii' si'duriauka'nung, puring-antaruriaing ee'noko ueeng-antaruriaing tee orara-koo. <sup>4</sup> Ee'noko tee nii'ke noru'darampiri otong dii'ke tampa' nkoverimaung ee'noko tee' nari' nkoverimatoang tee' nari' naurampiru'na', dii' Ovoring-koo kuung otorimaung-koo. <sup>5</sup> Ovoring koonturiaing diikaang domang Kumponing bakaang piasasi'perira oro'antaveriaina' ee'noko Karistoo' bakaang pinkapinka' napo' tasi'perima nari' nkoverii'naang toroaravaina'mung nemperi.

#### Paula'ke Ookara Nantoong Tampa' Mintoong-koo Botovuru'na'

<sup>6</sup> Nii'maikorori' ee, enang nii'ke naurampimaang dii' tee-koo Ovoring Jiisuu' Karistoo' bakaang miring-koo kuunge: Tonta'dariri otoriai teing-eta nii'ning dii'maikorori' kakapotonuka, kake'iirariri mintoontariaina' naurampiru'nung-koo kanto'pariaing-eta. <sup>7</sup> Dii'ke tee noru'eri otong nii'koo bi'antarariaina'. Nii' teing kakapotonuka deea' dii' ninka o'noritaa' <sup>8</sup> Nii' teing nii'nunge tamung bau'muriaruko'ning moo'dopai, teka nii' aa'na' mintoomariko' doong ee'noko muung nii'ke dii' manki'antarampiaroo'naang. <sup>9</sup> Tee makosi dii'ke nii' tamung bau'koo, nka niikaang mintoong nii'ke nkoampiko'nung tee dii'ke ooveri nii'koo bi'antarii'naang. <sup>10</sup> Tenang dii' nii' ninka nari' o'noritaa' nii'ke tee tee' nari' napo' tautaurampiru' ee'pina': Naning kakarua'oaing tee taamang-koo do'de'eriauka'. <sup>11</sup> Tee' naurampimaang taararampira dii'koo nii'ning teing kakapotonuka tamung nii'ning biikaning mintoong-koo papuraanka'antavereremaing, diikaning mintoong nkosiiria'. <sup>12</sup> Enang tee temurii' nantoong nii'ke botorampima tautaurampimaang Ovoring Jiisuu' Karistoo'koo kuunge mintoontarii'naang dooroontariri. Diikaang iri'keta' taamaniriaing. <sup>13</sup> Dii' nii'maikorori' iri' o'dariauka' tee-koo nko-nko tampara-koo. <sup>14</sup> Naning tee kupi'oko taara-koo aung kara nii'ke minkuampiring ane' karavotonane'koo noru'erira tonta'dariaing tee-ankoita, ee'noko maia'baing tee. <sup>15</sup> Karenung pina'

noru'eriauka'nung tee, teka tautaueriaing tee-pina' dii'maiko'.

**Si'noora'naare**

<sup>16</sup> Enang tee Oving mooa okovenung ee'harai mooa aruriaing uatepa ootukunung taung-koo. Tee dii' ookara ninka otonaing.

<sup>17</sup> Enang tee, ninge Paula'ke napo' tampara minku-rampimang anaare ninge koonto' daariama nkaang bireng miring taa'ni'antamari. Tee taa'ni'anta ookara karavotonane'pi-koo taa'ni'antamaramaung nkana' daaramaramana'.

<sup>18</sup> Tee biraanke niikaang Oving Jiisuu' Karistoo' bakaang dii' ninka nari' otomatoaing. Ee', tee' nari'.

# 1 TIMOTI

## Paula'ke Timoti Tampara Tarenara Otoaing Nau-antavuu'na'

(1:1-6:21)

**1** Ning aung karavoto~ daariamaung tee Paula', Jiisuu' Karistoo'koo kara-okomui-nka. Ning kara-okomui-nka deemaru' Kumponing domamuru'nunge botomuio' ee'noko Jiisuu' Karistoo'ke botomuio' pankaruntoonge noru'ampimaunge ookara kapoo' nempampimaung basi-antamemuriainunge. <sup>2</sup> Da' Timoti daarireromaang; da' nnuring masakung-pina' noru'damaung Karistoo' masika'antavemaung-koo. Biraanke, piaa, ee'noko mooa da'koo otoaing Kumponing Neuma-itaing ee'noko teieta Ovoring Jiisuu' Karistoo'.

### Koono-anta Boto-koo Daang Nau-antanuka-ita

<sup>3</sup> Enang ninge ee' botoramaang tero pia-antaran-tu'na' Masedonia'nameensi'aape mema: Da' teke Epeses-namonoi otomatoaing, ee'noko teke otoi teing nantoong miring naurantu'ning siisieri ee' naueriaing: Nii'namurii' kara koonto' deeaung nauaariauka'.

<sup>4</sup> Ee'noko noru'aavauka' kumponaang-koong minkunaa ee'noko boorou'ning biikaang mirinanka depeto parapara boturopa noru'ui oto'koo. Ai' temurii' kara tamunung minkuminku basi-antavumaung, ee'noko tee' minkuaama Kumponing bakanamuiaang tampa' tanatavaariarupeu' ee'narai nauvuru'na'. <sup>5</sup> Teka nee' kake'iinaanka deemarema tee, tee' nauransina' botoveriaing nantoong piaavaariaina'. Ai' piaa masakung basi-antana' ee': Tampara narung nko-koo piavoroiaing; domang kiiroraa'ariri otoaina' nari' nkoariaing; ee'noko tumsi naroompariri tee kara koon-to' Kumponing-aapenung masika'antavaavaing.

<sup>6</sup> Teing nantoong teing amurii' aarumo baari'au'ning. Tee'koo teing tamung pooarimaung daang-koong minkuminku-koo. <sup>7</sup> Bane Moosesi-nung boto nau-antanuka deemparii'naang piavoromaunge, nka tee minkuaamaing-koo kara-koo miru'noo' noru'aava' ee'noko teing botonanka nau-antavarimaing-koong miru' noru'aava'.

<sup>8</sup> Enang tee nii'ke noru'ampiri otong tee Moosesi-nung boto tee tampara, naninge tampa' miru'ari otoina' kompui dei. <sup>9</sup> Naninge tampa' kompuaing deeko' ee' noru'uaing: Boto tee Kumponing koon-

to'nanka-koo miru'ua', teka aing aa'ning-koo miru'uu': teing kara toto'paamaing kupi'oroma, Kumponing sipai orara aarumo nkonuka, dootuu' sipai Kumponing dotu-anta-koo makosi deeaing, biumaraang, biukorovoori ee'noko nantoong dupisi'aarimaing, nantoong maniku' ninka bakiaa'eemaing ee'noko nii'ning ninka nantoong ninka, nantoong tamung bakiaa'arima baaveaarimaing, tosi baukonuka, ee'noko maraka toto'nuka; <sup>10</sup> Ee'noko Moosesi-nung botoi napo' teing nii'ning kapoo'nanka tee' nari' oro'ning Kumponing-etaing kara koonto' ninka naroompariaing ookara avo'uri otong. <sup>11</sup> Ee'noko tee kara koonto' Kumponing-etaing tee ee'nung tee doorenang tampara Kumponing biraanke o'meevai araka-po'nunge sira'puma ning aroo'mui botomuu' bereng-antavama'naang.

### Kumponing-nung Piaa Paula'koo Oro'paru'na'

<sup>12</sup> Ninge tampara tampamang tee-koo Jiisuu' Karistoo' niikaang Ovoring ning kake'iinung noru'mura bakaang mintoong-koo bare-antamuu'nung-koo. Tee ee'nara ning puring-antamuraung tee-koo bakaang nko-nko nko-koo. <sup>13</sup> Bane ning tutung tee bakana-muiaang oraka' nkoaranko', barakosi'ama, poore'ama, nka tee Jiisuu' Karistoo'ke piaamuu'. Aming-koo? Nna' noru'ampa' nkoanko'nung tee, masika'antavamparuitaa'; <sup>14</sup> Tee tee, niikaang Ovoring bakaang piaae nkaning oraka'nko daka'memura biraanke-antamuio', tee ee'nara bakei masika'antavansi domange dai'amaung ninge. <sup>15</sup> Aung kara masakung, masika'anta-koo makosi, aa'noko, "Jiisuu' Karistoo' kansi'koo pou' nantoong orarananka domampurii'naang." Ninge masikee-antavampeu', ai' ning tee baru' aa'na' orara teing-koo nantoong-koo boonga. <sup>16</sup> Teka Kumponing ning piaamuu' paara-anta deeng-antamuu'naang bakaang aarumo boinare-koong ninka, dama'nupoonge tampa' ooaava'naang, masika'antavaavaiaininge domaang isikung nka-koo. <sup>17</sup> Tee Kumponing tee' nari' otomaung Ovoring, boo'paa', naninge oovuarupeu' ee'noko tee narung masakung. Deto basi-antavampiaing, nepu'ampiaing tee' nari' boto otoa'. Ee', tee' nari'.

### Timoti'ke Kumponing Daang-antavauka'

<sup>18</sup> Timoti, da' nnuring-pina' noru'dansi manki' aronsing kara nauransina' botoverii'naang. Tero Tanuaang Meekunge karantavurimaing~ minkurau'na' nkovema bakaang tavutavu' tampara orara aarumo-aape



nkoveai. <sup>19</sup> Ee'noko tee nkoveama kara koonto' masikung narung kompei Kumponing masika'antaveai, nko-nko tampara narung nkoveama tunsie tasi'antarumana'. Nii'ninge nantoonge tee biikaang tumsi karomana' dimpa'arai'nange tee enang kara tostitosi masika'antavaamaung. Biikaang masika'antaturari-antavaako'. <sup>20</sup> Teing-koo nii'naanka Aimeneas naanka ee'noko Aleksanda' ninge be'antavampetu'naanka Sietani' bakaang bireng-koo nau-nauavareta siparee'naang napo' orara kara minku-koo Kumponing-aape.

### Tautau Dootuu'koo Nkona'koong

**2** Enang arekee' Kumponing bakanamuaiaang tampa' oto'koo? Tee aa' tutuna'noo' tee aung nko-nko masikung nkoaava'naang deto aa'na' iri'moi nauaramaung ee': Apuka'arimainge eentavaavai Kumponing. Kunsiariai. Ookara nantoong pakuvurii'naang nia'aavaing Kumponing tampara tampaama. <sup>2</sup> Baru'noo' tee aa'ning koong-antavuriaing: ovontung ee'noko ookara deto basinuka nii' tampa' mooa-koo oto'antamaariaina' dooroong-antamaari Kumponing tampa' makosina' meumpampiko. <sup>3</sup> Temurii' nko-nko tee tampara; <sup>4</sup> Kumponingee nii' domamuru'nunge tampa' oovumaung, ee'narai nantoong ookara domamparii'naang piavomaunge kara masikung tasi'paava'naang. <sup>5</sup> Ookara masikeng miru'ari otong, ai' Kumponing tee narung masikung otong ookara nantoong-koo, ee'noko napo' narung masikung meu'nung naning otong Kumponing ee'noko ookara nantoong-koo meu', tee ee'nara naning Jiisuu' Karistoo'. <sup>6</sup> Teie ee'narai ookara nantoong orarai kuung deempuru'noo'keta moo'uru' bakaang mono tauraparama, ee'noko tee-koo bakaang batei masikung-koo taa'ni'pou'. Tee' nkoarama Kumponingee sira'puu' tee tee ookara nantoong domang-anta-koo piavomaung. <sup>7</sup> Ee'noko ning bakaang kara-okomui-nka miru'muu'nung bakaang minkunaa daankiama' naang. (Ning tosimarava'. Masika' minkuamaang.) Ning bamuu'nung teing Ju'deeeing biikaang nau-anta deemaraa'naang teinge aung kara masikung masika'antavaava'naang.

<sup>8</sup> Tee'koo ookara donkaang ookara osi-kooning bireng deto tooniaitaa'nange kunsiariri otoromaa-too'naang piamomaang, aa'noma biikaang domang kiiroraa'ariri avariritaa' Kumponing-koo, nii'ning nantoong-aape orara mantomantong otoroa', iiarovang ee'noko turang.

<sup>9</sup> Manii' tee teing tampa' naroompariri mononopa' makosining kurumpariaina'koo piamomaang. Avutevu'na' dapo tape'arima, biiri dovang kooro pamparima ee'noko baarong moo' maare-kooning duaanavarima ampirinumpariaka'. <sup>10</sup> Teka ee' otoroaing Kumponing baurukaa' tampa'arimaing: tampara nko-nko avutevu' nkoaamatoaung. Tee bakei koonto' biikaang nerang. <sup>11</sup> Nani manikuma tee tampa' barearavaing dooroomparitaa' koonto' taaravuma. <sup>12</sup> Ninge taura'pampa' nani manikumai donkaang nau-antavurii'naang nii'na'

donkaang-koo deto basi oto'koo. Teni dooroompari otoaing. <sup>13</sup> Okora'noo' ee': Aadama tutuna' nkonii' ee'noko Iivi dama'ke. <sup>14</sup> Ee'noko Aadama tosini'deeea', tee teni manikuma Sietani'ke tosvuio' Kumponing-nung boto aarempuu'nani deemparu'. <sup>15</sup> Nka tee maniku' pareaama otoroita' domampariaing aa'noi deeko': Kumponing-koo masika'antavariri, nantoong piaavaari, ee'noko meeka'pariri ampirinumparia'.

### Dootuu' Tanatanuka Otoroaing

**3** Enang Kumponing bakanamuaiaang oto'na' nau-rama aung kara masikung naurama'naang: Tee naning dootuu'nupoong tanata-koo piavora tee, tampara nko-nko nkovuu'naang tee piavoi otong. <sup>2</sup> Naning tee' nko-koo piavoko deeko' tutung aung tanatanung aarumo paaraverira taura'periaing aa'nomaung deeko': <sup>3</sup> Tuumpiaa-peu'na' otoa', nani ba'ung-pina' otomaung, naikuma deeko' naikuma basiamanoo'ka bakearamaung, onou siraka'pari otomaung, ovontung-pina' ka'duuro', naning navunavuro', siraka'pui nau-anta-nko, purinto'naru'ke kanu'aravaung, da'deng iira deeaung teka banainge oto', ee'noko tata'arava' oko'oko deeaung. <sup>4</sup> Baurukaa' bautaranuka tampa' toosi-antavuri otomaung, toire' tampa' tarevuriko tampa' meumpaamaung, tampa' noru'ai ookara kapoo'koo. <sup>5</sup> Ai' naning tee baurukaa' tampa' tarevuri-arura dei Kumponing bakaning dootuu' nupoong arekee' tarevuripeu'? <sup>6</sup> Ee'noko tee naning a'mung bere'arieenung makosi deea' dootuu'nupoong tarekoo. Baka daangamparara dua'ara'neenga, Sietani' kiimata-numpo' deempari dua'aru'na' baka daangamparakotaa'. <sup>7</sup> Ee'noko napo' tee, tee naning ookarai tampa' noru'aamaung makosi, Ju'deeeing. Tampa' noru'aavaruko maia'oi Sietani'nung baanka'koo taavi'arara dua'ara'neeng.

### Dootuu'koo Pakupakunuka Otoroaing

<sup>8</sup> Enang napo' tee Kumponing bakanamuaiaang pakupaku-nupoong tee' nari'ke, paaraverima taura'periaing temurii' nko-nko nko-koo, aa'nomaing deeko': <sup>9</sup> Biikaang nko-nko masika'antavaamaing, meneng paakanuka deea', purinto'naru'koo baru' kei'oroaung, oko'okonuka deeaing, ee'noko tee masikung kara Kumponingee sira'memuru'nung masika'antavaamaing domang kiiroraa'oroi. <sup>10</sup> Tutung baakeeneverereria' taura'perereriauka'. Tuumpi otoroaing-pina' oovererima deeko', pakupaku-nupoong deemparii'naang makosi-antaverereriaing. <sup>11</sup> Maniku', bii'ankaampi deeko' ai' pakupaku nkonuka deeko', napo' tee'ke, biikaang nko-nko masika'antavai otoroaing, miring orari-antananka deea', naiaama deekoro-antavariaing, kake'ii-nupoong ookara kapoo'koo. <sup>12</sup> Pakupaku nkonuka kemaimpariaka'. Biurukaa' tampa' tareaari-maatoai ee'noko biikaning bautarananka nara'ka. <sup>13</sup> Ai' pakupaku-nupoong biikaang nko-nko tampa' dupeaavaining teing nantoonge masika'antavaariain-

ing, ee'noko maia'oroa' nantoong nauaripeu'ning tee kara Jiisuu' Karistoo'koong masika'antavaamana'.

### Okora'nung Kara Kumponing-nung Aarumo-koo

<sup>14</sup> Due'ka dii'anko moo'naang noru'amaang, nka aing botonanka daariamang da'deng moaruko deeko' tee aung noru'eriaina' arekee' otoripeu'na' makosina' Kumponing-namuaang-kooning deentariri.

<sup>15</sup> Kumponing bakanamuaang dootuu'nupoong teing ee'ning Kumponing Domantoo' bakanavitu. Ee'noko ee'navitue tee kara masikung Kumponing-etaing deto kompai otomaung natukue bakatutai pava kompui otopeu'na'. <sup>16</sup> Ee', masika' tee minkunaa Kumponing dooremuru'nung bakanamuaang o'noriaina' naumuri-ma, pankaing doorenang masikung, naninge daang-antavuarupeu'. Okora'noo' tee Karistoo',

Ee'nara nii'koong naning deempari  
mono ninka tavo'arama sira'paru';  
Nantoonge tuumpiaako Tanuaang Meekunge tee  
naning koonto' masikee-antavuko';  
Koosinunankai ooaako';  
Bakaning daankiaako'  
ookara nantoong-koo;  
Nantoonge kansi'koo otoroi  
masika'antavaako'nunge;  
Ee'noko Kumponing meenasi-koo  
deto nkavuu'.

### Timoti Koonto' Minkuna'koong Tautau

**4** Enang tee Tanuaang Meekunge ee' koonto' nau-murimaung: Asi'na'mung due'uko nii'ning tee bere'ariaing akovetei teieta kara masikung siompampimaung-eta teing ma'nari tositosinanka taar-avaari-kotaa', ee'noko teing minkunaa Sietani' bakaning-koo bi'arikotaa'. <sup>2</sup> Aing minkunaananka tositosinanka nantoong-eta ampirinung-nupoong-eta tavo'aravaining. Teing nantoong tositosi-koo datavoroi bikaang domang-koo kuunga biikaang daang minku tasi'pariarupeu'. <sup>3</sup> Aa'paripeu'na': "Nanteeriauka' ee'noko taamang kerempierai tanuaang ku'mi'antarari'neeng." Nka tee'paama daang minkuaamaung, ai' Kumponing tee taamang tampa' nkomemuru' ee'nara tampara minkuampima nkavampii'naang nii'ke, tee kara masikung noru'ampiri otoning, ee'noko masika'antavampimaing. <sup>4</sup> Ookara kapoo' Kumponing nkovuru'nung tampara, kapoo' otoa' dimpa'ampiaing Kumponing tampara tampampima nkavampiaing deeko', <sup>5</sup> ai' temurii' taamang Kumponing makosi-pina' oovumaung bakaang kara ee'noko niikaang kungsi siompui.

<sup>6</sup> Dake aing nko-nkona' nau-antananka naueriaing-koo nii'maikorori' da' tee tampara pakupakunung Jiisuu' Karistoo' bakaang deentaravaing maanto'antararara teinge karakarananka masikeng siompampimaing ee'noko tampara minkunaa tee ee'nara dake siompemaung. <sup>7</sup> Donta'dari otoai teing-eta kumponaang daang-koonanka Kumponing-etaning deeaing-

eta. Nka daka tampa' bareraravai Kumponing bakaang naning makosina'pina' nkoraravaina'. <sup>8</sup> Ai' amurii' mirumiru' minkuaamaung masikung: "Mono bare-anta-koo tampa'ke, nka tanuaang bare-anta-koo baru' tampa' masika', enanung ee'noko dama'nung otooto'koo paku-antana'koo." <sup>9</sup> Tee' masika'anta-koo makosi. <sup>10</sup> Tee'koo bakei pore'morimaung, iri' o'marikoo', niikaang noru' Kumponing domantoo'koo sipampiri otomaung-koo, ee'nara ookara-koo Domang-anta masika'antavaamaing-koo.

<sup>11</sup> Aing kapoo'nanka aa'na' tuutuu'antaveri nau-antaveriai, ee'noko botoveriaing siompaavaina'. <sup>12</sup> Tauradaravauka' naninge da' oki'naa-anta-koo da' pankara deeaung deentarako, teka Kumponing baitonupoong ooraara dakaang kara-koo bi'antavariaing deentari otoai, ee'noko nko-nko-koo, piaa-koo, baito-koo ee'noko kiiroraa' aarumo-koo. <sup>13</sup> Moainoo'ke basi mataa'irari deeruevuriai tee Kumponing bakaang dari-raari, daankierima ee'noko kara nau-antaverima.

<sup>14</sup> Dakaang avuavu' da'koo oting Tanuaang Meekung-etaing sipeauka', ee'nara karai tarampee'koonge minkuvuko nkaveu'nung tenang teing dootuu'koo urantankai bireng pante'daako. <sup>15</sup> Aing kapoo' botoransing nkoemaatoai. Avu'antararavai teing-koo, da' panka'daramatomana' tasi'paavaina'. <sup>16</sup> Tareraravai dakaang nko-nko ee'noko nau-anta, tampa' nari' otoaina', ee'noko tee' nkovekotaa' ookara taararaamaing ninka nari' domantariaing.

### Timoti'ke Dootuu'nupoong Baumaraang-pina' Nkovuriaina'

**5** Enang teing dootuu'nupoong ninka ee' tampa' otoriai: Pankareu' ioo'eria' otoai, teka tamung bainaing tampa' nauerimatoai daumaraang-pina' noru'eri. Ee'noko nemea' daara'mainkaang-pina' nkoverimatoai. <sup>2</sup> Napo' manii' pankareu' daukorovo-pina' nkoveriai, ee'noko nerai' da'marikaampi-pina' noru'eri pakueriai, oraka' noru'darava'.

### Naaronku Tanatavaarii'naang Nau-antavuriaina' Timoti'ke

<sup>3</sup> Naaronku ata'oinku masikeng piaaru'nuka-pina' noru'erimatoai. <sup>4</sup> Teing naaronku biurukaa'po'nupoong, nii'noo' bii'dompenku, teing ninka siperiko pakuaariaing dootuu'nung aarumo bareariaina' nakantu paku-koong, biumaraang maku'aarima tampa' tarearu'nung-koo. Kumponing temurii' aarumo tampa' oovumaung. <sup>5</sup> Teni naaro masikani tampampimai teni baka otomai, sipuinani bakaang noru' Kumponing-koo narung-koo ee'noko baitoari otomai kungsiarama muunga ee'noko doonga. <sup>6</sup> Teka teni nii'nani mono baka noru'aramai teni boo', bane teie mono domantoo' otong. <sup>7</sup> Botoverima naueriai aing kapoo'nanka nii'ninge oraka' minkuaari'neenga. <sup>8</sup> Tee naning bakanamuaang tarevuriaung ee'noko baru'noo' bakanava pava, tee ee'nara penkemparing

bakaang masika'anta-koo, oraka' nkoaring Kumponing noru'aavaing-eta boong basinoo'ka.

<sup>9</sup> Taura'periauka' naning naaro miring si'koo naaronku biikanavitu-koong deeru-koo mare' ~narung-taa kivora divu'uai, nii'noo' amutemu'ke nampeesiaramai. <sup>10</sup> Ee'noko miring si'koo makosi teni tampani, tampa' nkoaramai tampaamai, teni-pina' toire' panka'antavurimai-pina', onkeonke' bauko-pina', Kumponing bakaning meekupoong kau' duu'pevuriko'nani-pina' isipo'keta poroko, unaa-antavurimai-pina', tampa'nko narung-koo matauari otomai-pina'. <sup>11</sup> Teka taura'perereriauka' nara'ka deeru-koo teing naaronku mare' makosiaavaing, nerai'ariri noru' nampeesi-koo oto'neeng Karistoo' sipai. <sup>12</sup> Tee' nkoarima maraka-anta-ita toto'parima kiimata-koo-nupoong deem-pari'neeng. <sup>13</sup> Temurii' naaronku tee kakarua'nuka deemparimaing, pava kantenuka; ee'noko kakarua' narung deea', tee aa'nong: ukuusi baukonukai, papuraanka'anta nkonuka, ee'noko minku-koo makosi deeaing minkuaamaing. <sup>14</sup> Tee'koo naaronku mme' nerai'ariri otoroing napo' nampeesiarimaing maroamaing, toire' paravaariaina', biikanava pava tareavai, ee'noko doona avompiauka' too'denunge barakosi'muri'neenga. <sup>15</sup> Nii'ninge Sietani' siompai tee pooariru'nung-koo tee' naurampimang. <sup>16</sup> Nanie manikumi Karistoo' masika'antavumaie teemuiaang-koo nani manikuma naaro otoi dei tee, tenie tare-koo makosi teni naaro. Tee' nkovaing deeko' tee teing-koo nii'ning dootuu'nupoong-koo baru' manki'oroauka' naaronku masikeng tareaarima.

#### Dootuu'koo Urantanuka Pakuaava'naang Nau-antavuriaina' Timoti'ke

<sup>17</sup> Teing dootuu'koo urantanuka dootuu' tampa' tareaarimaing nantoonge napo' moo'ke deto moo'aariaing makosi, baru'noo' teing pore'oromaing daankiaarima ee'noko nau-antavaariko'. <sup>18</sup> Daari Meekunge tee' nari' minkuvui otong, aa'pui otong, "Boromaka'koong muring dai'eriauka' uite'koong~ sinang kau'ke ke'dee'koo botoverima, tee-koo uite'koo maa'kuaina'."

(Boto 25:4)

Napo' aa'pui otong,  
"Naning mintoomparavaingee mooni' nau'ka nkavuaing."

(Boontu 19:13; Boto 24:14-15)

<sup>19</sup> Naninge nii'nung dootuu'koo urantanung tu-umpivuko taaraveauka' baka, teka kenaankai deeko', nii'noo' beenaumoi koonto' ooaara makosi. <sup>20</sup> Ee'noko tee tautaueriko tee' nari' nkoariri otoroing deeko' sirapo'ke naueriaing napo' tee' nkoaavauka'nung ookarai ooaara avoreaavaina'. <sup>21</sup> Kumponing oomuresio', Jisuu' Karistoo' naankai ee'noko koosinunanka miru'nii'nankai ninge da' koonto' nauramaang; Pankaing tuumpiaamana' minkunaa tampa' tasi'pea' deeko' da'deng maku'eauka', ee'noko oraka'nko da'marang-aapea daka'peauka'.

#### Timoti Baka-koo Tanatavaravaina' Minkunaa

<sup>22</sup> Ee'noko napo' tee naning dootuu'koo uranta deeng-anta-koo ta'nina' meeka'antaveauka' tanka' pante'ema. Tutung tasi'peaing arekee' oro' aung naning, orara deeko' da'koo pare'ara'neeng. Daka tanatararavai domang kiiroraa'dari otoaina'.

<sup>23</sup> (Ee'noko daka tanata-koo minkuama aa'dama'naang: Baru' ntong narung naieauka', uaini-naru' oki'naru'na' naikimaatoainge, ke'de pakuruaina' amutemu'ke siiparomaung-koo.) <sup>24</sup> Teka aa'dansina' naning masika' tampa' tasi'pera deeko' meeka'antakoo makosi, nka tampa' baakeenevera. Nii'ning biikaang oraka'nko a'noo' aa'na' oro'paramaung teing kimata-kooning tasi'antamurima, teka nii'ning biikaang oraka'nko dama'ke oro'paramaung-koo tee'. <sup>25</sup> Ee'noko tampa' nkoning tee'ke, nii'ning aa'na' oro'ning ee'noko nii'ning baku'nii'ning, teka baku'ariri otorokotaa' teing napo' koonto' sira'pariaing dama'ke.

#### Botovotonaa'nuka Dai'nisinanka Tampara Aarumo Oro'antavaavaina'

**6** Teing ookara botovotonaa'nuka dai'nisinankai biikaning teing okovoroi otomaing tampa' nari' noru'aariai. Tee' naueriaing nii'ninge Kumponing oraka' minkuaa'neeng bakaang kara nau-antavarampimaing ninka. <sup>2</sup> Teinge botovotonaa'nukai okovoromaing Karistoo' masika'antavaamaing deeko' ee' noru'aavauka': "Nii'ke kara dimpa'evorompimatoai, ai' nii' tamung nara'ka namaia'." Tee' noru'aavauka', teka teing mintoompevurimaing Karistoo' masika'antavaamaing, Kumponing piaavurimaing deempariko bakei tampa' masika' biikaang kara siompaavaing. Aing ee' oro' nau-antaveriaing iri'narumperi.

#### Orara Aarumo Amutemurii'koong Okora' Tee Mooni' Karaa'

<sup>3</sup> Nii'nung naninge nii'namuau kara nauvuriaing deeko', ee'noko naroomparavaung tee ninka kara masikung niikaang Oving Jisuu' Karistoo'ketaing deeko' ee'noko naroomparavaung Kumponing siona' aarumo-koong nau-anta ninka deeko' tee baka daang-gange poo-antavaramaung, kapoo' noru'uaung, tamung tata' tutung-koo oraka' piavomaung ee'noko minkuminku tamung karananka-koo; <sup>4</sup> Temurii' aarumoi mamairo tavo'umaung, pokaka, daang-koong tu-umpi, oraka' noru' ee'noko oko'oko nantoong-koo. <sup>5</sup> Teing taaravarimaing tee' nkoarimaing. Aming-koo, nna' tumsi muunanka deempariri nii'ninge kara masikung nau-antavaariaruko. Daang ee' noru'aa-maung, "Dootuu'mariaing kapoo'nanka mooni' dovang narung nkavampiaina'."

<sup>6</sup> Nka masika' a'noo' naning kapoo' avutevu' piavoaruko dei Kumponing-nung koonto' aarumo kom-pui tampa' ootoo' oovupeu'. <sup>7</sup> Nka ee' noru'ampiai: "Nii' aa' ponto'marima kapoo' kansi'koo nkavampiri moria', ee'noko moompima kapoo' nii'nung nkavam-

piring meriauka' kansi'keta. <sup>8</sup> Tee'koo enang taamang oto'memuri ee'noko baaronanka, teing ninka dotumariri o'noriaing." <sup>9</sup> Teka teing nantoong kavu mmau' oto'evoroo'naang piavoromaing paara-anta meu'paako baanka'ke taavi'urimaung. Kanu'arima amutemurii' baike-antananka piavoromaung nantoong orari-anta-koo ee'noko kera'anta-koo basi-antavaarimaing. <sup>10</sup> Ai' orara aarumo amutemurii'koong okora' tee mooni' karaa'. Mooni' karaa'aama nii'ning nantoong tee kara masika'antavampimaung-eta kentaamparira domang-koo baike aa'na' tora'paamaung.

#### Domaang Oparavaung Nka-koo To'biirari Aa'na' Paararavaing

<sup>11</sup> Nka da' tee Kumponing bakaang naning avo'daravaing tevete-ita; koong-antararavaing koonto'aape, Kumponing-nung masikung aarumo-aape, masika'anta-aape, piaa-aape, e'maniang-aape, dooroonto'aape. <sup>12</sup> Da' bakei iveka'doai Kumponing-aape masika'anta ninka deikoo'koo kua'daramatomaung-pina' tee domaang oparavauka'nung nkaveaina', ee'nara domaang kompee'naang miru'duu'nung Kumponingee, ee'na' tampa' sira'daru'na' nantoonge taararaio'. <sup>13</sup> Ninge ee' botoramaang Kumponingee oomuresio', teie ee'narai Domaang Okovenunge, ee'noko Jiisuu' Karistoo'ke napo' oomuresio' aa'nunge Poontiasi Pailati'ankoi avoroa' tampa' sira'paru' bakaang miru': <sup>14</sup> Nkoveaing ookara kapoo' Kumponingee nauruu'ning dake nko-koo botoramaang, domang ku'mi'doa'. Naninge da' tuumpiruarupeu'na' otoaing Ovoring Jiisuu' Karistoo' tavo'aravainoo'ke basi. <sup>15</sup> Tee ee'nara sira'paravaing bakaang batei masikung-koo, Kumponingee tampuainoo'ka. Tee biraankenung,

ookara-koo iirakuta, ankaankanuka biikaang ankaakang, ovontunanka-koo Ovoring. <sup>16</sup> Tee narung boo'paa' ootoo' okovosi', aa'na' araka sisisiisi'po'nung ninka nari' otomaung, teroita naning otoa' oovuu'nung ai' oovupeu'nung. Ee'nara ookarai domange tampa' noru'aamatoai ee'noko bakaang tare oparavauka'nung otomatoai. Ee', tee' nari'.

#### Teinge Mmau' Oto'evoromaing Baitoarima Nii'ning Pakuaariaing

<sup>17</sup> Enang tee kansi'koo kavokavoro-po'nupoong tee ee' botoveriaing: Bii'ka daangampariauka'. Masika'antavariauka'nung biikaang kapoo'nanka oraru'kuaining-koo, teka Kumponing-koo masika'antavariri otoroaing ookara kapoo' mmau'antavui makosina' amurimaung-koo dotumarimana'. <sup>18</sup> Naueriaing tampara nko-nko nkoaavaing, tampara nko-nko-koo maneeoroaing, avusiro'ariai, biikaang kapoo'nanka tankee'eeaing nii'ning ninka. <sup>19</sup> Tee' nari' nkoarima tee oosisiiaamaung dama'ke opo' kompaavaining koonto' noru'aapeu'. Naueriaing tee' nkoariaing domaang ima'ai kompaavaina' temurii' domaang masikung.

#### Timoti Tampa' Mintoomparavaing

<sup>20</sup> Timoti ee, tareveai tee kapoo' Kumponingee masika'antarui aruu'nung tare-koo. Donta'dari otoai naampa Kumponing-nung deeaung-eta, avutevu'ui minku-eta, daang noru' pankaing tampaamaung-eta. <sup>21</sup> Ai' tee' minkuaama nii'ningee bekoi'aamaung tee minkunaa masikung siompampimaung.

Tee biraanke tee da'koo otomatoaing. Masikung.

## 2 TIMOTI

### Timoti Paaravarama Mataa'i Deemparavaing Kumponing Bakaang Mintoong-koo

(1:1-4:22)

**1** Ninge Paula'ke aung karavoto~ daariamang, Jiisuu' Karistoo'koong kara-okomui-nkai Kumponing maromuu'na' nantoong nauarama'naang maraka-antamuru'na' bakaang domaang amurii'naang Jiisuu' Karistoo'koo kuung o'noriko. <sup>2</sup> Da'anko, Timoti-anko daariamang, da' nnuring-pina' piaaramaung-anko. Biraanke ee'noko mooa da'koo otoaing Kumponing Neuma-itaing ee'noko teieta Ovoring Jiisuu' Karistoo'.

#### Paula' Bakana' Siompei Maia'doauka' Tampara Doore-nang Sira'pema

<sup>3</sup> Ninge kunsimarama amutemu'koo noru'dama Kumponing-koo tampara tampamaung, tee ee'nara tampa' domange noru'marama ninge mintoomepevomaung, tee' mmataaraange nkoau'na'. <sup>4</sup> Bakei napo' aa'na' da' oo-koo piamomaung, ooramira dei tampa' dee'mopeu', ai' ninge tee norunoru'amaung dakaang ta'du tuuruu'nung tenang si'meeretu'ng. <sup>5</sup> Napo' noru'dankoo' da' koonto' baitorarako'na', tee ee'namuraii' baito teni daite Lois oto'evuko' ee'noko teni dauko Iunes. Enang tasi'pansi o'nong da'koo ee'nung-koo otong tee temurii' baito. <sup>6</sup> Tee'koo enang ninge noru'antaramaang maia' sipei dakaang nko-nko aa'na' nkoveaing tee avuavu' Kumponing aruu'nung kompei, ee'narai aruu'nung te'mung ninge tanka' pante'dantu'na'mung. <sup>7</sup> Ai' Kumponing tee tanuaang avorompe'koong amuria', teka tee tanuaang purinto'koong amuru'nung, paaa-koong ee'noko toomoosiari oto'koong.

<sup>8</sup> Tee tee maia'doauka'nung niikaang Ovoring sira'koo; ning-koo tee', bane ning bakaang dai'nisi o'noko. Makosi Kumponing tee' nari' puring-antamureko da' tee' nari' ni'ninka sisikeera kompampeaing tee tampara dooreng-koo. <sup>9</sup> Teie ee'narai domamuru' ee'noko bokumuru' meeka'mariri oto'koo, kapoo' tampara nkoampiru'nung-koo deea', teka tamung biraankemurii'naang baka marovuu'nung-koo. Tero aung kansii' mme' nkoaravaruko-ita Kumponing biraankemurii'naang bamuru' tee-koo Jiisuu' Karistoo'koo. <sup>10</sup> Ee'noko enang tee biraankemuri-

aina' sira'puing Jiisuu' Karistoo' niikaang domang-anta oro'antavura. Teie ee'narai boo' bakaang iri' opurainange boo' puru'navung ee'noko domaang nkanavung taung siraka'antamemuring tee dooreng tampara dooremurima. <sup>11</sup> Ee'noko teie napo' ning aung ee'nara dooreng tampara berempa-ma'naang bamuu', ning kara-daanki, kara-okomui-nka ee'noko kara-nau deeng-antamui. <sup>12</sup> Tee'koo bamuu'na' tampa' nkomaramaung-koo ninge sisikeera kune'amaang. Nka tee maia'moaung, ai' bakei tampa' noru'ansi o'nong tee naning ninge masika'antava-maung, ee'noko napo' tampa' noru'ansi otong tee tee makosi ookaanka tare-koo bera doong asirana'mung, aa'ning: teing manki'nanka avontu'ning ee'noko napo' tee manki' ee'narai ning bamui amuu', tampara kara nau-anta-koo. <sup>13</sup> Enang dake tee tee kara nau-antavaramana' paaravei nari' nau-antaveriai, ee'noko Jiisuu' Karistoo'koo kuung otomatoai ee'nara masika'antavema ee'noko nantoong piaaverima. <sup>14</sup> Tareveaing tee kara masikung tee Tanuaang Meekunge nii'koo otomatomaunge masika'antaruma aruu'nung.

#### Onesiporas Tampa' E'manuu'na'

<sup>15</sup> Dake noru'ei otong teing teing ookara Eesia-nameensi'nupoong ning-eta mmariau'ning. Teing-koo nii'nung Pisilas ee'noko nii'nung Emosenis. <sup>16</sup> Kumponing piaavuriaing Onesiporas bakanava-kooning, teie amutemu'pie boira-antamuko' ning. <sup>17</sup> Tee tee maia'oa' ning io'mai dai'mario', teka tenang Rooma' porai'nange teie bakei aa'na' ning oo-koo pia-vora besi'mura pe'numuu'. <sup>18</sup> Ovoringe kong-antavuaing tee paaa bakaang te'mung doong asi'na'mung. Dake tampa' noru'ei otong avutevu'ari tampa' pakumuu'na' Epeses-namono-koo.

#### Arikung Kune'ema Naning Piikonung-pina' Iri' O'dar-avauka'

**2** Aung ee da' nnuring, purintaravaing iri' nkavei, tee iri' Jiisuu' Karistoo'koo kuung otoko biraankerui arumaung. <sup>2</sup> Ee'noko tee minkunaa ning-koo taaraveru'nung mmau' ninka tee ee'nara masika'antaveri pare'eriai nantoong-koo kara tare baukonuka-koo botoverima napo' nii'ning nau-antavaarii'naang. <sup>3</sup> Kune'eaing nari' tee sisikeera ninge kune'amana' iri' o'darava' da' naning tampara kare-koo tavu'koo piikonung-pina' Jiisuu' Karistoo'nung deentari. <sup>4</sup> Naning piikonung noru' paakavaravaung, teka bakaang ovoring dotu-antavuaina' nari' otomaung. <sup>5</sup> Naning deikoo'koo

kua'paramaung tee siompumaung tee deikoo' bakaang aarumo narung. Siompuarui dei makotuarupeu' moo' nka-koo. <sup>6</sup> Ee'noko napo' tee ee'nara naning mintoong bauko tee tutuna'ning-koo naikumaung pore'omaatoma. <sup>7</sup> Norunoru'eaing teing kapoo' ninge nauransining. Ovinge tee tasi'antaruang miru'noo' teing ookara-koo.

<sup>8</sup> Ee'noko napo' norunoru'eaing tee Jiisuu' Karistoo' daa'aru'nung bou'noo'keta tee ee'nara Deevita' bakanamuaiaang-koong pou'nung tee-pina' doorenang ninge sira'pamaunge minkuvui otona'. <sup>9</sup> Tee ee'nara doorenang ninge sisikeera kune'ankoo' sira'pama, kakuu' dovang kaki-antamaakoo' bakiaa' nko-pina'. Nka tee karakara Ovinge bakaang kakuu' kaki-antavaavaung, berempamaung. <sup>10</sup> Tee'koo amutemurii' sisikeera tora'koo taura'marama iri' o'maravaung teinge nantoonge Kumponing miru'nii'nankai taaravaavaina' teing napo' Jiisuu' Karistoo'koo kuung otoroi domang-anta kompaava'naang meenasi otoi otoi manta'pai. <sup>11</sup> Aung kara kenavampimaung masikung:

Nii' tee ninka nari' moompira

Napo' tee ninka nari' domamariaing.

<sup>12</sup> E'manampiri sisikeera tora'pampira

Tee ninka nari' nantoong tarearampiaing.

Nka nii' tee-koo penkemariko

Napo' tee nii'koo penkemparavaing.

<sup>13</sup> Nka nii' e'manampiaruko tee-koo

Tee bakaang kara-koo e'manui otoaing,

Ai' bakaang aarumo tampara-koo

penkemparavarupeu'.

### Kara Masikung Narung Pakupakupo'nung; Nii'namurii'koo Konteroaing

<sup>14</sup> Dake noru'antaveriaing tee kara nauransina'. Ovinge oorurio' botoveriaing ee': Donta'dariri otoriai kara-koo tata'nanka-ita. Tee' tata'koo tampa' deea'. Nantoonge taaravaama tee orari-antavaripeu'. <sup>15</sup> Paarararavai daka matauari oto'koo Kumponing makosi-antaruaina', naning matau-pina', dakaang nko-nko-koo maia'koo makosi deeaung-pina'. Tee' kompeaing tee minkunaa Kumponing-etaing kara masikung makosina' miru' koonto' sira'pei. <sup>16</sup> Donta'dari otoaing temurii' Kumponing-nung deeaung naampa-ita. Teie tee nantoong barampuriaing tee-koo taung oovunavung-koo Kumponing-ankoita. <sup>17</sup> Teie biikaang kara tee dera'pina' maa'uriaing dera'ke naning domantoo' otoko maa'umana'. Teing tee' oro'ning-koonaanka nii'naanka Haimenias ee'noko Pailitas. <sup>18</sup> Tenaanka taung masikavung bekoi'uretu'naanka aa'purema, "Kumponing ookara nantoong boo'keta daa'uru' tero." Tee' minkuvurema nii'ning biikaang masika'anta orari-antavuretu'. <sup>19</sup> Nka tee aung kara masikung teing-koo nantoong-koo Kumponing masika'antavaamaing-koo aa'na' date'pari otomaung natuku tankanung-pina' ivekung teka'paama ee' daari-aapeu'nung-pina', "Ovinge noru'ui otong teing bakaning, ee'noko ookara Kumponing bakaang miring

tampaama masika'antavaamaing koonto' bere'ariaing orara aarumo-ita."

<sup>20</sup> Tee tee aarumonanka tee ee'pina' otong: Naning bakanava-koo aretereng otorong, nii'ning kapang-koo aa'na' sisisiisi-koo nkonii', ee'noko nii'ning koi'koo ee'noko kansi'koo nkonii'. Teing-koo nii'ning kapoo' tampara masikung banto'ning ee'noko nii'ning tamunsi'ning. <sup>21</sup> Ee'pina': Naning tee tampareng-pina' baka kiiroraa'ari dei tamunsi'nung aarumo-ita enang tee kapoo' tampara banto'nareng-pina' deemparapeu'; napo' meeka'pari otopeu', bakaang pankaing pakuvupeu'na' maamuari otopeu' tampamuriau nko-nko nko-koo. <sup>22</sup> Tee tee enang donta'dari otoi nemea' biikaang karakaraa'keta. To'bii-antarari otoi te'aape: nariari oto', masika'anta, pias ee'noko mooa, teing Ovinge-koo baitoarimaing ninka nari' otoritaa' tampa' nari' nko-koo piavoromaing ninka. <sup>23</sup> Nau'ka pakuraravauka' tee-koo minkuminku-koo daang-koonanka-koo kanu'aapening-koo. Noru'ei otong temurii' aarumoi turang-anta basi-antavumaung. <sup>24</sup> Ovinge bakaning botovotonaa'nuka turang nkonuka deeauka'. Teing nau'ka navunavuro'nuka otoroaing ootukunung-koo, tampa' siraka'antanuka, iira noru'aavaing, napo' biikaning kare-nupoong koong-antavaarimaatoai domang boimporoi. <sup>25</sup> Ai' pa Kumponing napo' toro-antavurii' ee'noko noru'aavai tee kara masikung. <sup>26</sup> Ee'noko tee'koo mmariaavaing teieta Sietani' bakaang baanka'keta bi'antavurimaung-eta bakaang noru' siong-koo.

### Avo'avoro' Doong Asi'na'mung-aapena'mung-koong

**3** Nka enang tasi'peai aung: Doong asiraning-koo tavo'kuaing batei arikananka. <sup>2</sup> A'noo' ee' oro'nanka otoroaing: nantoong bii'ka piaavarimaing, mooni' piaavaamaing, bii'ka daangamparimaing, daang pankaing-pina' noru'nanka, kara oreng minkunuka, taarapii-kananka biumaraang-koo, kapoo'koo tampara minkuaavaing, meeka'pariaing, <sup>3</sup> nantoong baa'pina' noru'aarimaing, pinau noru'aavaing, miring orari-antananka, tooreerenuka, irinsianuka, tampara aarumo tavaamaing, <sup>4</sup> too'de-nupoong, tutung tampara noru'uraantavaavaing, kirokainuka-pina' noru'arimaing, bii'ka tampa' dee'anta-koo nari' piavoroma Kumponing tampa' dee'anta-koo piavoroaing, tang dootuu'arimaing nka Kumponing daang-antavaakoo'; <sup>5</sup> Temurii' nantoong-eta tonta'dari otoaing. <sup>6</sup> Teing-koo nii'nari-ong tee pavanankai tamung koinaamaung maniku' aruaru'nanka biikaang kara-koo bi'antavaarii'naang, maniku' orara aarumo ninka manki'oromaing, noru' avitoitoei earimaing kapoo'nanka amutemurii' karaa'aama. <sup>7</sup> Bane arera naning arekee' oro' poko tee taaravaapeu', nka tasi'paavarupeu' kapoo' masikung. <sup>8</sup> Tero tee Janis naankai Jampiris turampureko' tee Moosesi, ee'noko tee' nari' teinge too'dempaamaung ookara kapoo' masikananka. Teing donkaang tumsi dera'nukai ee'noko baito tosiro'koong oto'evoroining. <sup>9</sup> Ee'noko Janis naanka Jampiris namu'ke dua'aretu'na'

tee' nari' napo' teing tamung apupo' basiarira dua'ari-  
aing nantoong ookarai ooaario'.

### Kara Masikunge Kumponing-etainge Tampa' Noru'eko Tarerui Otoaing.

<sup>10</sup> Enang tee dake ning noru'meing ape': kara nauaranko'na', nkomaramana', nkaang domang to'bii-  
antamaramana', nkaang masika'anta, kapuumari o'no-  
mana', nkaang piasa, e'manansi o'nomana', arikananka  
kune'amana', sisikeera kune'amana', napo' oraka' nko-  
mau'na' teka Antioki'ka ee'noko napo' Aikoniami'ka  
ee'noko Liisira'ka, aremuriau turanturang e'manansi  
tora'pantu'na'; <sup>11</sup> Ee'noko noru'ei otong ookara teing-  
eta Ovinge moo'muu' domamuu'naang. <sup>12</sup> Tee' nari'  
masika' ookara Kumponing marovurimana' oto'koo  
piavoromaing nantoonge oraka'nko kune'aavaing,  
teing Jiisuu' Karistoo'koo otoromaing. <sup>13</sup> Tenang  
ee'nanang oreng nantoong daang Kumponing botonis-  
inuka tamparimaing aa'na' baru'noo' oraru'kiaavaing  
nantoong tosiaarima ee'noko bii'ka tositosi masika'an-  
tavaama. <sup>14</sup> Teka dake siompeaing tee kapoo' da' bar-  
eraru'nung ee'noko iveka'doi masika'antaveu'nung.  
Dake nii' tampa' noru'meri otong kara nauram-  
piru'ning. <sup>15</sup> Ee'noko da' tooto'noo'keta noru'eu' Dari-  
raari Meekananka teing da' tampa' nau-anta-kooning  
noru'antarupeu'ning Jiisuu' Karistoo'ke domantuaina'  
baitorarako. <sup>16</sup> Ootukunung Daari Meekung  
Kumponing amuru'nung, Kumponing uaampuriko  
daariau'nung, ee'noko tee makosi nau-anta-koo, orara  
aarumo tasi'anta-koo, domang koong-anta-koo,  
ee'noko tampara aarumo siong-koo kake'liari.  
<sup>17</sup> Kumponing tee' karantavuriko' aa'noo'naang:  
Bakaning meekupoong makosininge maanto'antavari-  
ra amutemurii' nko-nko tamparananka tavo'antavaa-  
va'naang.

### Timoti'ke Paula' Pari'antavura Doorenang Tampara Iri'oi Daankivuai

**4** Kumponing oomuresio' ee'noko Jiisuu' Karis-  
too'ke, teie ookara nantoong simpe'uriainge, do-  
mantoo'nuka ee'noko boorou'ning, ninge ee' botoram-  
aang da', noru'ampirita' Karistoo' tee napo' ovorim-  
pari oro'paravaing: <sup>2</sup> Iri'antavei sira'peaing tee kara  
ootukunung batei-koo, oranang ee'noko tampanang.  
Aroo'antaveriai, tautaueriai ee'noko tampa' mantom-  
peritaa' nau-antaveriai. <sup>3</sup> Tee' nari' bointui uaroauka'  
ee' noru'ei: Bateinang tee due'umaang nantoong kon-  
tekontevoroainoo' kara masikung taara-koo. Nii'na-  
murii' kara taara-koo tarii'orama mmau' kara-naunuka  
bokuaarii'naang teing ninka nari' kara'eemaing.  
<sup>4</sup> Tee'koo kara masikung-eta akovetei bere'arii'naang  
ee'noko pooarii'naang kumponaananka-koo bi'ariri.  
<sup>5</sup> Nka tee da' pinka'dari otoaing, baike noru'eauka',  
kara nkavei nanu'koo purintaravai, tampa' dupeveai  
dakaang nko-nko pakupaku-koong, ninge nkaang  
dupeansina'.

<sup>6</sup> Ai' ninge dupeamira tee makosi tamaavaing due'ka,  
nka tee Oving-koo pareka-pina' noru'mari otong.  
Tee doong ning tenkenampaina'mung due'umaang.  
<sup>7</sup> Ning piikonung deeko' orara aarumo ninka tameere-  
ma puru'muaru'. Deikoo'koo kua'maru'nung-pina'  
iri'moi tampa' botu basimaring, kara masikung masi-  
ka'antavampimaung pinka'ansi. <sup>8</sup> Enang-eta deto  
nkaang moo' nerang-koong tee maamuari otoma-  
toaing, ee'noko tee taa'ni'anta Kumponing koon-  
to'nuka tammurimaing-koong. Tee ee'nara tee teie  
Ovinge koonto'ke bire'urimaunge kong-antamuain-  
ung te'mung ee'na'mung makosina'mung, ee'noko  
ning narung deea', teka napo' tee avuriaing teing  
ookara kara'ai ooaava'naang nempaamaing.

### Paula'ke Timoti Tee-anko Da'deng Po'koo Bokuvuu'na'

<sup>9</sup> Paaraveaing ning-anko po'koo da'deng. <sup>10</sup> Aming-  
koo, nna' Deemasie tee aung kapoo'nanka kan-  
si'koong aa'na' karaa'ura si'muieeng; si'murai'ngang  
Tesalonaika' beieenung. Napo' Keresen Kalesia-  
nameensi'aape beiee; Taitas napo' Damesia-nameen-  
si'aape beiee; <sup>11</sup> Tikikas Epeses-aape botoansinung;  
Luuke' narung ni'ninka o'noreng; <sup>12</sup> Tee'koo Maaka'  
bokuera da'ninka poreai; tee ee'nara nkaang paku-  
paku tampara. <sup>13</sup> Mononopa' nkavei poai nkaang, Kaa-  
pas-anko sipantu' Toroasi-navuntu'ka, ee'noko buuku-  
nanka, nka baru'noo' teing ivekeng boromaka'koong  
dopa'kooning. <sup>14</sup> Aleksanda'ke, teie koopa' ta'nam-  
pumaunge, orari-antamuu'. Ovinge maku'evuaing  
tee bakaang nko-nko orara-koong. <sup>15</sup> Nka tee-koo da'  
tareraravaing, ai' teie aa'na' too'devumang niikaang  
minkunaa kara simpe'nupoong~ anko. <sup>16</sup> Tero tuumpi-  
maako tutuna'ngang kara dimpa'anko naning paku-  
mua' ning. Ookarai si'mau'. Oraka' nkomau'na'koo  
Kumponing piaavuri tonta'evuriaing ninge ton-  
ta'evoronsina'. <sup>17</sup> Nka bane si'maio' Oving tee ning-  
koo due' otou', ee'noko puring-antamuu' tampa'  
sira'pama'naang tee kara ookara, ootukununge  
avotevora'nupoonge taaravaava'naang. Tee'koo doma-  
muu' tee-pina' laioni-koo karang-eta pasi'mupeu'nung-  
pina'. <sup>18</sup> Ovinge tee ning moo'muaing teieta ootuku-  
nung orarananka-ita, ning tampa' domang-anta-  
muaina' paning-koo o'noo'naang teie tarevumanoo'.  
Bakaang meenasi tee' nari' otoaing ootukunung  
doong-koo. Ee, tee' nari'.

### Si'noora'naare

<sup>19</sup> Tampa' tamperiaing Pirisika'daring-koo ee'noko  
Akuila ba'ung, ee'noko Onesiporas bakanava-kooning.  
<sup>20</sup> Irasitas Koorin-navuntu' otoko sipantu'. Ee'noko  
Toropimas siipavoko Mailitas-navuntu'ka sipantu'.  
<sup>21</sup> Paaraveaing ning-anko po'koo da'deng narung, dov-  
ing orara bakaang batei tavo'kuma avo'du'neeng. Iubi-  
ulas dovange Piudenis, Lainas ee'noko Kolodia  
ee'noko ookara niira'mainkaange tampara tampaing  
da'koo.

<sup>22</sup> Tee Oving Jiisuu' Karistoo' dakaang tanuaang ninka otoremaatoaing. Tee biraanke tee da'koo otomatoaing.

Masikung.



# TAITAS

## Baito Puring-antaveri Biikaang Aarumo Koong-antaveriai Kiriti'namui'koo

(1:1–3:15)

**1** Ning Paula' tee Kumponing bakaang botovoton-aa' ee'noko kara-okomui-nka Jiisuu' Karistoo' bakaang. Kumponing botomuu'nung bakaning teie miru'uru'ning tampa' masika'anta-koo pakuarama'naang ee'noko tee kara masikung koompari otoko kato nau-antavaranko tampa' tasi'pai siompaama Kumponing dotu-antana' otoroang, domampariri ookara batei-koo otoroaina' nooruupiaraina';  
<sup>2</sup> Aa'noko teie Kumponing tosiaravaunge tee do-maang oparavaung amurii'naang maraka-antavuu' tero urikamu', kansi' pupu'aravaruko. <sup>3</sup> Ee'noko bakaang bateinang miru'uu'nung masikung-koo teie Kumponing niikaang Domang-antai tee-koong do-maang oparavaung amuriaing-koong kara sira'puu' bakaang doorenang tampara-koo, ee'noko ning tee aroo'mui botomuu'nung tee daankiama'naang.

<sup>4</sup> Da' Taitas nnuring masikung tee-koo kara-koo nari' masika'antavampimaung-koo daarireromaang. Bi-raanke ee'noko mooa da'koo otoang Kumponing Niu-ma-itaing ee'noko teieta Oving Jiisuu' Karistoo', ni-ikaang Domang-anta.

### Urantanuka Ee' Miru'eriaing

<sup>5</sup> Ninge da' Kiriti'namui'keta tenkenama ee' nkovee'naang si'dantu'nung: Dake koong-antavee'naang teing kapoo'nanka koonto' deeaing teka, ee'noko napo' dootuu'koo urantanuka miru'eriai ookara osinanka-koo tee' naurantu'na'. <sup>6</sup> Teing urantanuka tuumpi otoroauka'na' otoroai. Nampeesi-koo narunge nani nampui otoai. Napo' biurukaa' Karistoo'koo baito-nupoong otoroai, ee'noko nii'ninge tu-umpiaaripeu'noo' otoroauka' aa'ning-koo: tooreere ee'noko meumeeva. <sup>7</sup> Tee naning Kumponing bakanavitu tanatavurimaung tee tuumpinoo' dopa, ai' tee tee Kumponing bakaang tarenara. Aing aa'ning nkovua' otoai: bore'ke deere, da'deng iira, nainai purinto' nai-koo kei', tavu' bauko, ee'noko oko'oko. <sup>8</sup> Teka aing ee' oro'nanka oro'antavumaatoai: Damisimainku bakaang pava-koo bokuvurimatoai, tampenanka-koo dotuaramaung, matauari oto', koompari oto', ee'noko baka meeka'pari oto' tareari otomatoai. <sup>9</sup> Napo' teie

tee kara tosinoo'dopa pinka'ui otomatoai tee' nari' barearu'na'. Tee' otoi minkunaa koonto' nau-antavuri-ma nantoong puring-antavurimatoai, ee'noko teing tee kara penkempaamaing okora' nenke'ui daang tam-paamanoo' sira'pumaatoai.

### Kiriti'namui'koo Daang minkunukai Mmau'ke Baito-koo Orari-antavaariko'na'

<sup>10</sup> Ai' teke Kiriti'ke dootuu'koo kuunge nantoong karinga taarapiikanuka otorong, daang minkunuka ee'noko tosi baukonukai, baru'noo' teing Ju'nupoong dopa' toto'navitu tee' oro'nuka. <sup>11</sup> Bake-antaveriai, ai' teinge tee akatekang karika'daantu nara'ka orari-antavaarimaung kapoo' makosi deeaing nau-antavaarima mooni' tamung barang-koo makotua'na'. <sup>12</sup> Tee' nari' Kiriti'namui'koong nakaronunge~ nii'nung nauvu-ma aa'puu'na', "Kiriti'namui'nupoong doong kante tosi baukonuka, biikoori oreng, taamang-koo oko'okonuka kavuroonku." <sup>13</sup> Tee aung kara teie sira'puu'nung teing daang minkunuka otoromana' masikung. Tee'koo teing tee daang minku siompaamaing karai aa'na' naaramperiaing tee minkunaa masika'antavampimaung siong-koo purimpariaina'. <sup>14</sup> Ju'nupoong bi-ikaang kumponaang sipaavai! Teing biikaang botonan-ka tamung nantoong-etaning siompaama kara masikung-eta bere'ariauka'. <sup>15</sup> Baa naning Karistoo'koo kuunge domang kiiroraa'ari otoi tee ookara kapoo' teie makosina' nko-koo noru'umaing teing makosin-ing. Teka baa-koo naning domang orara-koo, masika'anta otoaung-koo, tee kansi'koo kapoo' otoa' bakaang domang kiiroraa'antavupeu'nung, bane are-kee' oro' toomo siompuma. Kumponing tee bakaang domang ee'noko noru' nara'ka oraka' nari' oovui otoo'naang. <sup>16</sup> Tee' oro'nuka teing bii'ka Kumponing noru'ai otoining sirakura' tampaarimaing, teka teinge oraka' nkoaama penkempaakoo' tee. Bakei Kumponing-koo maremaare nkonuka, meumeevanuka, ee'noko kapoo' tampara nko-koo makosinuka deea'.

### Tautau Pankareu'aape-naare

**2** Teka dake deeko' ootoo'koo makosina' Karistoo' bakana' masika' nau-antaveriai. <sup>2</sup> Aa'noko teing donkaang pankareu' kapoo'koo baru' kei'oro' kanu'ariauka', teka to'biivui noru' ninka matauariri otoroai, tu-umpiaariarupeu'na' biikaang masika'anta-koo, piaa-koo ee'noko kato purimpari oto'koo. <sup>3</sup> Napo' maniku' pankareu' tee' nari' Kumponing bakaning-pina' neri-ariri otoromaatoai, ukuusiarai' ee'noko nainai purin-

to'koo bi'aria'. <sup>4</sup> Napo' teinge maniku' pankareu'ke teing nerai' nampeesinii'nuka tampeng naing nau-antavaarimaatoai, aing aa'ning: Bii'unkaampi biurukaa' ninka nari' piaa, matauariri oto'koo, meeka'pariri, kake'ii-nupoong tampa'nko, ee'noko bii'unkaampi-koo boong deempariri otoromaatoai, Kumponing bakaang kara oovuninge dimpa'aavauka'na'.

#### Tautau Nema'aape-naare

<sup>6</sup> Napo' tee' nari' naueriai teing nema' matauariri otoroaina'. <sup>7</sup> Ee'noko mintoontarama ookara batei-koo kapoo' tampeng naing nkovemaatoaing teinge sion-taavaina', ee'noko dakaang naunau-koo aing ee' oro' oro'antavemaatoai: kara pitumeeva, aarumo aa'na' aroo'dari minkuna', ee'noko noru' to'biivui otomaung nantoonge poore'koo makosi deeaung. <sup>8</sup> Ee'noko dake tee' nari' nkoveko nii' minkuminkurumaarimaing ma-ia'oroaing, kapoo' orara nii' minkumaaripeu'nung otoaruko.

#### Tautau Botovotonaa'nuka-aape-naare

<sup>9</sup> Napo' teing botovotonaa'nuka tee' nari' naueriai bi-ikening ovontunanka-koo boong deempariri otoroaina', ee'noko dotu-antavaarimaatoai ookara kapoo'nanka nkoaavaining-koo, kara bari'aava' ee'noko bakiaa' nkoaava'. <sup>10</sup> Ee' naueriaing, "Tampa' nari' nkorarimatoai diikening ovontunge tampa' noru'daarira aroo'daariaina' ookara kapoo' nko-koo." Tee' naueriaing, ai' teing botovotonaa' koonto'na' otoroko deeko' ookara nantoonge tampa' taar-avaavaing tee kara nauarampimaung Kumponing nikaang domang-anta-koong. <sup>11</sup> Ai' Kumponing bakaang piaa nantoong domang-anta-koong tee tero oro'antavuu'nung ookara nantoong-koo. <sup>12</sup> Ee'noko teie bakaang piaae nii' kake'ii-antamurimaung a' kansi'koo o'noritaa' aa'noo'naang: Kumponing piavoana' aarumo dimpa'koo, kansi'aapening karakaraa' nari', ee'noko mataumariri oto'koo, koomariri, Kumponing dotu-antana'. <sup>13</sup> Ee'noko tee' nari' o'norimaatoai tee biraanke nempampimaung noru'ampima aa'noaing: tee Jiisuu' Karistoo' niikaang Kumponing ee'noko Domang-anta nerampari tenang oro'paravai. <sup>14</sup> Tee baka nii'koo avaru'nung nii' boorimurira teing-eta orara aarumonanka-ita unaa-antamurii'naang ee'noko kiiroraa'antamurira bakaning nantoong meekupoong deemuriai tampa'nko narung-koo dompirompi'nuka.

<sup>15</sup> Tee' nari' koonto' botoveri nau-antaverimatoaing aing kapoo'nanka, tautauerima kontevoroa' siompaa'naang. Naninge nii'nunge daang-antaruauka'.

#### Tampara Aarumo-koo Ima'mariri O'noriaina' Kumponing Tampa' Nkomurio'

**3** Nau-antaveriaing teing dakaning nantoong ovontung-koo boong otoroaina', siompaa'ima teing, amutemurii' tampeng nko-nko nko-koo maamariri. <sup>2</sup> Naning oraka' minkuaava' otoroai, turanturang baari'ai, banainge otoroai, ee'noko nantoong ookara-

koo navurariri otorimaatoai. <sup>3</sup> Ai' nii' Karistoo' bakaning teing tero o'noriko'na' sipampiru'ning aa'ning-eta: kanu'marima taarapiikamariko' ako'ke nii'ning ninka poo-antamaariko, amutemurii' karakaraa'koo bi'mariri doturotu besi'ampima. Niikaang batei tamung kera'pampiko' aa'ning-koo: oraka' noru' ee'noko maimairo, nantoonge munte'maariko napo' nii'ka munte'meerima. <sup>4</sup> Teka tenang bakaang piaa ee'noko avusiro'ari oto' aarumo sira'puu'naang tee-koo batei-koo Kumponing domamuru'. <sup>5</sup> Teie domamuru'noo' nii' tee koonto'nuka o'nori kapoo' tampara nii'ka nkoampiru'nung-koo deea', teka baka bakaang piaa-eta duu'muri meeka'antamurima domamuru'nung, aa'noma napo' ponto'antamurima tee ninka Tanuaang Meekung neraka'antamuru'. <sup>6</sup> Ee', tee Tanuaang Meekung nii'koo dau mmav'antavui piampuu'nung tee-koo niikaang domang-anta Jiisuu' Karistoo'koo kuunge nii' Kumponing ninka naroong-antamurii'naang teie piaamurira, ee'noko barenku domaang oparavauka'nung-koong nempampimaung okomurii'naang.

<sup>8</sup> Tee-koo kapoo'koo nauansing-koo aroo'daravaing makosi da' Taitas. Da' tee teing-koo aing-koo kapoo'koo derarari otoo'naang piamaamaang, dakaning nantoong Kumponing masika'antavaamaing kake'iiariri otoroo'naang tampara nko-nko-koo. Aing teing kapoo' boo'anta, nantoong ookara paku-antaning. <sup>9</sup> Teka aing aa'ning-eta donta'dariri otoriai: niania' maku'paa'koo, pokapoka', boorou'ning biikening mirinanka depeto parapara-koong minkunaa, ee'noko karakarai turang, Ju' biikaang toomonanka tata'eema. Ai' aing teing tamunsi'ning ee'noko naning pakuvuarupeu'. <sup>10</sup> Naning tee nantoong-koo pokapoka' nkovuaing deeko' tautaeai ee'noko kemu'kai nkovuko deeko' napo' tautaeai; <sup>11</sup> Teketa beemu'pinamu'koo tamung doonko sipeai tee, ee' noru'ei: Aung tee naning koompaa', oreng aarumoi maanto', baka tuutu-namparing.

#### Paula'ke Taitas Tee-anko Po'koo Bokuvuu'na'

<sup>12</sup> Tenang ninge tenaanka Atemasi naanka ee'noko Tikikas da'anko botoampeko tampa' aa'na' paarararavaing ning kune'koo teka Nikopolisia, ai' ning tee tenang kamaari bakanang teke oto'koo darumari o'nong.

<sup>13</sup> Napo' aa'na' pia-antaveriaing dakanavitu teinge tampa' neriareaing tenaanka aa'noko tee boto nau-anta Siinasi ee'noko Apolos paku-koo beekaang nanunanu'koo. Ee'noko kokoiravererima beekaang nanunanu'koo makosining mooni' averereriaing.

<sup>14</sup> Ee'noko tee' pakuaarema noru' nkavaava kake'iiariaina' tampara nko-nko nko-koo, baata teing aa'na' pi-aaru'nuka pakuaarimaatoaina', ee'noko biikaang ootoo' sinampo'nung deempari otoaing.

<sup>15</sup> Aing ookara nii' ninka nari' o'norimaingee biikaang tampa' tang dii'anko botoaamang. Niikaang tampa' tang nauereriaing teing nii'marang baito-koo kuunge. Tee biraanke tee dii' ookara ninka otomatoaing. Ee', tee' nari'.

# PILEMONI

## Paula'ke Pilemoni Pia-antavuu'na' Onesimas Tonta'anta-koo

(1:1-25)

**1** Aung ane' karavoto~ ninge Paula'ke daariamang anke Karistoo' bakaang doorenang sira'pamaunge kiimatamau'noo'ke o'noi. <sup>2</sup> Napo' Timoti'ke tee nee'maiko'ke daari-koo pakumui dii'anko daari-ampemaang, aa'noko Pilemoni, nee'maiko' piaavam-pemaung ee'noko Karistoo'koo kuunge nari' mintoomarimaung; Apia, teni nii'mari Karistoo'koo kuunge; napo' tee Akipas nii' ninka manta' Ovorinung piikonara; napo' teing Karistoo'navitu da' Pilemoni dakanava-koo dootuu'arii'naang oosiarimaing-anko. <sup>3</sup> Biraanke ee'noko mooa dii'koo otoaing Kumponing Niума-itaing ee'noko teieta Ovoring Jiisuu' Karistoo'.

### Pilemoni Bakaang Aarumo Tampara Noru'ura Paula' Dotuaru'na'

<sup>4</sup> Tampa' tampamaung tee-koo nkaang Kumponing-koo ookara batei-koo kunsimarama da' pakuransi, taararama dake Ovoring Jiisuu' masika'antavemaung-koo ee'noko teing bakanavitu piaaverikoo' ookara. <sup>6</sup> Ee'noko tee kunsimaramaung tee dakaang masika'anta minkuei tankaampeko ookara kapoo' tampeng nii'ke Jiisuu' Karistoo' koo kompampimaing sira'paraa'naang. <sup>7</sup> Ai' ninge tee doturotu pankaing ee'noko dunsirunsi~anta nkavamaung dake mmaiko'ke teing Karistoo'navitu piaaveri biikaang domang kuaa'antaveriko.

### Pilemonie Onesimas Tampa' Onkeonke'uaing Baara'ma'nung Masikung-pina'

<sup>8</sup> Temeng-koo noru'ama, bane Karistoo' bakaang kara-okomui-nkanara deemari ning makosi da' etu-koo aarumo koonto'namuriau nko-koo; <sup>9</sup> Teka piaae dai'muresio' tamung eentaramang dake Onesimas tonta'antavee'naang oraka' nkoruu'nung-koo; <sup>10</sup> Ninge Paula'ke pankarai ee'noko enang Jiisuu' Karistoo'koo kiimatamari o'nong, bauma deemari o'noi anke ki-imatanoo'ke da' baitoramang tee Onesimas da'anko poko oovera tavea' onkeonke'eaing, nnuring makosi deempario' Karistoo'koo kuunge. <sup>11</sup> Tero tee dakaang botovotonaa' deempari teie da' tampa' pakuarukotaa' mmaruu' da'ankoita, teka Karistoo' nau-antavan-

sio' bere'arara tampara pakupakunara deemparieeng neekaang. <sup>12</sup> Ninge tee enang da'anko botoamaang nkaang domange aa'na' dai'ansi. <sup>13</sup> Anke ning-ankoi oto'koo aa'na' piamoi otong ning tampara doorenang-koo kiimatamau' noo'ke o'noko pakumuu'naang dake pakumepeu'noo' makosinoo'. <sup>14</sup> Teka makosi ninge pinka'ampauka'nung dake taura'pearuko deeko'. Ninge da' eturamparoo'naang ning aunge pakumuu'naang, daka dakaang aroo'keta tee' nko-koo makosi.

<sup>15</sup> Ee'koo da'ankoita oki'naa batei-koo tenkenuu'noo'koo Kumponing dama'ke da' ninka ookara batei-koo otoree'naang miru' uu'nung, tamung botovotonaa'pina' kato noru'ea', teka botovotonaa' puru'ui' nee'maiko' noru'ea', neera'ma'nung makosi deempario'. <sup>16</sup> Ee', ninge tee aa'na' tampa' noru'amaung deemparako dake napo' deto basinoo' noru'eaing, ai' tee tee dakaang naning, dakaang botovotonaa' deempari otoko. <sup>17</sup> Tee'koo dake ning da'maiko'pina' noru'memaung deeko', aung ki-imatavea' tee ning onkeonke'mepeu'na' onkeonke'eaing. <sup>18</sup> Ee'noko da' oraka' nkoruu'nung deeko' nii'noo' bakiaa'deruu'nung deeko' ning nkaang komaaru~ deeng-antaveko moo'ampaing. <sup>19</sup> Aung avaro kara ninge Paula'ke nkaang birenge daariama aa'pamaang, "Dama'ke moo'ampaing," teka ninge napo' minkuampauka'nung da' Pilemoni pakuransio' domaang isikung nkaveu'nung-koong komaaru ning-aape otoing. <sup>20</sup> Ee', ee mmaiko', tampa' onkeonke'eaing tee dakaang botovotonaa' dake ning dotu-antameaina' Ovoring-koo nkaang domang kuaa'antamea Karistoo'koo.

### Si'noora'aape-naare

<sup>21</sup> Aung kara ee' noru'ansi daarireromaang dake koonto' meumee'naang minkuansina' divu'ui otoko dau basinoo'. <sup>22</sup> Napo' aa'damaang, "Pava-koo-navaro maamu-antamemuai mora aatumpainoo', ai' tee ninge ee' noru'amaang kiimatanoo'keta bake-antamaava'naang kungsi-koo pakumerimaung-koo.

<sup>23</sup> Teie napo' Epaparasi ni'ninka nari' Karistoo'koo ki-imatamarsi o'noremaunge tampa' tang botorerurimaang, napo' ainge ni'ninka nari' mintoomarimaing aa'ninge nee' kiimatanoo'ka pakumaarekoo': Maaka', Aristakas, Dimas, ee'noko Luuke'.

<sup>25</sup> Tee biraanke tee niikaang Ovoring Jiisuu' Karistoo' bakaang dii' diikaang tanuaang ninka nari' otomaotoaing. Ee', Masikung.

# IIBURU

## Kara Baavootunanka Ane'kooning

1:1 Jiisuu' Tee Koosinunanka-koo Dau Basi  
 3:1 Jiisuu' Tee Moosesi-koo Dau Basi  
 4:14 Jiisuu' Tee Piristi' Pankaing Deemparing Nerakung Naroong-anta Tarevui  
 11:1 Nii'ke Kumponing Masika'antavampiri Bauring-koo Ima'mariai

### Jiisuu' Tee Koosinunanka-koo Dau Basi

(1:1-2:18)

#### Kumponing Bauring-koo kuunge karamuru'na'

**1** Tero urikamu' tee Kumponing niumaraang-koo oki'noo'na' taung avuntevunge karoko' amute-mu'ke bakaning nakaro-nupoong~ karantavurima~.  
<sup>2</sup> Teka aing-koo asi'ning doong-koo tee Bauring-koo karoma karamurimatoieeng nii', tee ee'nung ookara kapoo'nanka nkovuu'nung Kumponing nauvuko, ee'noko tee tee ee'nung ookara kapoo' barenkunanka okovuu'naang miru'uu'nung. <sup>3</sup> Bauringee tee Kumponing bakaang meenasi aa'na' arakavari sira'pukoo' ee'noko tee tee Kumponing siuraampi~, ee'noko ookara kapoo' tee bakaang karai purinto'ke kompui otong. Tenang teie niikaning oraka' nkonanka-ita kiiroraa'anta-koong nko-nko nkovurai' nange Kumponing-koo Tee Aa'na' Pankaing-koo tampanaang-koo ba'namparu' a'dei'ke ovorimpari otoo'naang.

#### Kumponing Bauring Koosinunanka-koo Tee Dau Basi

<sup>4</sup> Tee tee aa'na' pankaing masakung deemparu' koosinunanka-koo dau basie. Ee'noko Bauring deempari otoko teie bakaang miringee pankaingee nari' sira'pui otong, aa'na' tampara masakung teing koosinunanka biikaang-koo. <sup>5</sup> Ai' urikamu' Kumponingee tee Bauring tampuma aa'puu' Daari Meekung-koo, "Da' tee nnuring, e'mung tee ninge daa'dansing."  
 (2 Samuela' 7:14)

Nii'hang ee Kumponingee koosinunanka-koo narung tee' minkuvuu'? Otoa'. <sup>6</sup> Napo' tee'ke tenang teie tee Bauring kirokai a' kansi'koo botovuu'hang nauvurima aa'puu',  
 "Ookarai koosinunankai Kumponing bakaningee tee ee'nung dootuu'aavaing."

(Boto 32:43)

<sup>7</sup> Teka koosinunanka-koo Kumponing bakaang kara ee' daariari otong,  
 "Teie koosinunanka, bakaning botovotonaananka doving ee'noko urung-pina' aampari'antavurimaung."  
 (Kena 104:4)

<sup>8</sup> Teka Bauring-koo napo' ee' daariari otong,  
 "Dakanoo' ovorintari ba'nani'doma tee tee' nari' otomatoainoo' da' Kumponing, ee'noko dake tee dakanamuu' koonto'na' taa'ni'antarari tanataveri otoaingee.

<sup>9</sup> Dake tee aarumo koonto' piaavemaung ee'noko aarumo boto-toto' munte'ekoo', tee'koo da' Kumponing dakaang Kumponingee duunie dotu-anta-koongee sisi'duu' pako'pari'duma da'maikori'koo dau basi otoo'naang."

(Kena 45:6,7)

<sup>10</sup> Ee'noko napo' Bauring-koo ee' daariari otong,  
 "Da' tee Oving aung kansi' ookutunung tutuntomaita nkoveu'nung, ee'noko paning dakaang birengee nkoveu'nunge.

<sup>11</sup> Teing teing paa'areaining, teka da' tee' nari' otoko.

<sup>12</sup> 'Napo' urika'pareai baarong-pina' ee'noko tee-pina' mononopa'pina' kai'aamana' kai'era paarieai, teka da' tee' nari' otoi otoaing, ee'noko dakaning mare'nanka botu basiaravauka'nunge."

(Kena 102:25-27)

<sup>13</sup> Ee'noko napo' Bauring-koo miru'uma aa'puu',  
 "Ning-koo tampavine-koo ba'naniai bera dakaning kare-nupoong da'koo kau'koo boonavete-koo siparampainoo'ke basi."

(Kena 110:1)

Teka koosinunanka-koo tee' minkuvua'. <sup>14</sup> Ai' teing teing koosinunanka tamung pakupaku-nupoong tanuaananka teing barenku okovuri domampariaining paku-koo.

#### Kumponingee Nii' Domaang moo'muru'nung Tee Kapoo' Pankaing Masikung

**2** Enang tee Bauring aa'na' pankaing deempari otoko ooampima tee' nari' aa'na' baroromariai

bakaang kara-koo ampankeena'mori sipampi'neenga.  
<sup>2</sup> Ooveriko tee doorenang koosinunankai Moosesi nauau'naare tee purinto'po'naare ee'noko ookara boto toto'paamainge tee moo' nkavaavaing maku'koo.  
<sup>3</sup> Enang Ovoring Bauringe ee'narai bakei tampa' do-mamuriaina' dooremuriko arekee' nii'ke tee mosianung baari'ampipeu' bakaang kara sipampiri? Bakei makotua! Teie ee'narai tutung nantoong daankivuriko';  
<sup>4</sup> Ee'noko teketa teie daankivuriko koon-to' taaravau'ninge dama'ke napo' tampa' tasi'antamaaru' Kumponinge masikee-antavuiu' aing aa'ning ninka: taa'ni'antananka, ta'nimpaarii'nanka, amute-murii' nko-nko purinto'nanka, ee'noko Tanuaang Meekung-etaing avuavu'nanka tankaampuu'ning teie piavou'na'. Tee tee Jiisuu'nung doorenang tampara ookara-koo dau basinoo'ka baroromperiaing.

### Jiisuu' Tee Nii' Moo'muru'ning Niikaang Urantanara

<sup>5</sup> Napo' nii'nung kapoo' otong tasi'antamuraing Jiisuu' tampa' taaravampii'naang, ai' Kumponinge tee ootoo' dama'nung nii'ke minkuampimaung koosin-unankai tare-koo barevuria'.  
<sup>6</sup> Tee' nari' Daari Meekunge nii'nooka sira'pui otong, naninge aa'puu'nooka,

"Bakei tokoona'koo dake teing nantoong tamung kansi'nupoong noru'eri tanataverimaung!

<sup>7</sup> Dake teing tamung oki'naa batei-koo depeto koosin-unanka-ita boong sipering, teketa dake napo' teing deto pankaing-antaveru' araka ninka neramperi, ookara kapoo'nanka teing-koo kau'koo boonavete-koo sipera teinge tareaava'naang."

(Kena 8:4-6)

<sup>8</sup> Enang tee ookara kapoo'nanka nii'ke tareampii'naang tampura nii'nung kapoo' nii'nook' tonta'ua' nii' niikaang tare-ita. A'nook' tee enang otoina' ookara kapoo' niikaang tare-koo kuunge mme' baru' ooampia'.  
<sup>9</sup> Teka nii'ke Jiisuu' ooampiri otong tee ee'nara oki'naa batei-koo depeto sipuu'nung koosin-unanka-koo boong, teketa enang teie boo' tora'puio' Kumponinge tee deto pankaing-antavura araka ninka nerampuu'. Ee', Kumponinge aa'na' avusiro'ari Jiisuu' boo' mantong-antavuu' nii'koo ookara-koo kansi'koonupoong-koo.

<sup>10</sup> Kumponinge tee baurukaa' kura'nari' doompeto paning-koo tampa' otoroainoo' tavo'urii'naang miru'urima teie Jiisuu' tutung baike kune'antavura makosi-antavuu' teing moo'uriaining biikaang urantanara deempari otoo'naang. Tee tee tee' makosina' teie Jiisuu'ke dupe-anta-koo ai' Kumponinge tero ookara kapoo' nkovuu'nunge miru'uu'na'.  
<sup>11</sup> Enang tee ee'nara tee meeka'anta-nko ee'noko teing teie meeka'antanii'nuka tee narung oko'bosi' oto'evorong. Tee'koo tee maia'ba' teie teing baara'mainkaang tang-koo, daari meekunge minkuvuma aa'pumanoo'koo,

<sup>12</sup> "Ninge daankiampaing dakaang miring teing-koo mmaikori'koo, ee'noko teing dootuu'koo nara'arimaing-koo meu'ke ninge daangantampaing da'."

(Kena 22:22)

<sup>13</sup> Ee'noko nii'nook'ke napo' aa'puu',  
 "Ning Kumponing-koo noru' e'manansi o'noaing."  
 (Aisaia' 8:17)

Ee'noko nii'nook'ke napo' ee' minkuvui otong,  
 "Ning aung ee'nara, ee'noko teing toirekaa' ainge ning Kumponinge amuu'ning."

(Aisaia' 8:18)

### Jiisuu' Naning Deemparu'nung Nii' Tampa' Paku-murii'naang

<sup>14</sup> Aa'noko nii' teing baurukaa' ookara bio' dovang ereng-po'nupoong deemariko tee tee' nari' nii'pina' oro' deemparu' bakaang boo'ke Sietani' bake-antavui pesi'uu'naang, tee ee'nara boo'anta-koong iri' kompui otomaung,  
<sup>15</sup> ee'noko nii' domaang isikung amurima unaa-antamurii'naang boo'koo amorompima temu'keta dai'mariri o'noriko'ning.  
<sup>16</sup> Tasi'pari otong koosin-unanka paku-koo tee' nkoarava' teka teing Eebaraami' ba'dompenku paku-koo tee' nkoaru'nung.  
<sup>17</sup> Tee'koo nii'na' makotua', teka tee teing-pina' baara'mainkaang-pina' masika' Kumponinge nkovuu' tee piristi' tampara deto basi otoo'naang. Aa'nung piaa-po'nunge ee'noko mataa'i Kumponing bakaang pia siompario', ee'noko napo' Kumponing bakaang iira o'anta-koonge nantoong biikaang oraka' nkonanka-koo.

<sup>18</sup> Aa'nou'nook'koo teie baike ee'noko paara-anta mantompuu', tee'koo teie nii'ning pakuvuripeu' paara-anta kune'aavaining.

### Jiisuu' Tee Moosesi-koo Dau Basi

(3:1-4:13)

### Jiisuu'nung Miringe Tee Moosesi Bakaang Miring Aa'na' Puru'uu'na'

**3** Ee mmaikori', paning-eta miru'murio' nari' meeka'marimaing, deto noru'ampiaing tee Jiisuu', ee'nara Kumponinge kara oko-antavura botovuiu' pou'nung ee'noko tee tee piristi' pankaing, tee ee'nara nii'ke sirakura' masikee-antavampimaung.  
<sup>2</sup> Tee tee Jiisuu' mataa'iari otoko' tee-koo tee botovuu'nung-koo tee' ee'na' nari' Moosesi mataa'iari otoko' Kumponing bakanarempo' ookutunarempo' tanatavurima.  
<sup>3</sup> Teka Jiisuu' baru' aa'na' makosi tampuu' miring pankaing nka-koo, nerang-po'nung, Moosesi bakaang miring puru'ui. Tee' nari' aa'nomana' narung narempo' okovui otomaung tereempo'koo pankainge.  
<sup>4</sup> Muu' kante tee', namuu'na' nii'ning nantoong okovoroi otorong, teka teing ookeng okovenung tee Kumponing narung.  
<sup>5</sup> Teka Moosesi tee Kumponing bakana-muiaang-koo botovotona' deempari kara-nau-koo mataa'iari nauvuriko' tee naning dama'ke Kumponinge sira'puainung domampuriaing teing minkuvuma.  
<sup>6</sup> Teka tee Karistoo' tee Kumponing bakanamuiang-koo mataa'iaru' Kumponing bauring deempari okovui, ee'noko nii' ee'ning teing bakana-

muaiaang-kooning deemariri o'noring nemariri pin-ka'mariri o'noriaing deeko', dotumariri amaiaa'moria' o'noriaing toroarara domamuriainoo'koo.

**Nii'ke Kumponing Bakaang Kara Nimpa'ampiauka'  
Temu'nupoong-pina'**

<sup>7</sup> Tee'koo Tanuaang Meekunge minkuvumana' nari' aa'dampimang,

<sup>8</sup> "E'mung bakaang aorong taaraverira domang ka-pantoriauka' teinge diikakatauroi nkoarima ereana-maako'na'. Tenang Iisipi'keta teke mee'bora' sirakamaa'ke baramparanko'nang Keenang-navora'koo un-aavoroaina' noru'ama, bane ninge nkaang nko-nko purinto'po'ninge pakuaranko ooaitea', teka masika'antamaavaruko';

<sup>9</sup> Teinge bakei ereanamaako' karenaumo kivora mare'koo teke pooariri.

<sup>10</sup> Tee' nkoarima iirang-antamaio' aa'pantu', 'Teing ookara doong-koo biikaang domang tee pooaramaung. Nkaang aarumo noru'aavarukoo'.'

<sup>11</sup> Tee' noru'ama aa'na' iiramorai'nange marakamarama aa'pantu', 'Teing teing nkanoo' uaroma tumpari- auka'ning.'"

(Kena 95:7-11)

<sup>12</sup> Tee'koo dii' mmaikori' aa'dampimang, tanatarari- aing dii' dii'ka oraka' nkorari'neeng, tee Domang-anta Kumponing Tero Pako'pari'nii' nii' taremuriainoo'koo masika'antaveriaruma dua'dari'neeng teieta Kumpon- ing domantoo' iri'po'nung-eta. <sup>13</sup> Teka doona mme' otoko tautaureeriaing ookara doong-koo "e'mung" tang-koo makosining-koo, dii'koo narung orara- koonge noru'ke tosvuma domang kapang-an- tavu'neenga. <sup>14</sup> Ai' nii' Karistoo'koo, Tee Pako'pari'nii'koo, nari' tampa' noru'mariri o'noriaining deeko' bera botu basinoo'ke, nii' teing tee ninka nari' biraankemariri manta'nuka o'noriaing.

Teka enang batei aung nii' pinka'mariri o'noriainang. Ampa'moriauka'nung Kumponing tautaurima ee' daarivuu'na',

<sup>15</sup> "E'mung bakaang aorong taaraverira domang ka- pantoriauka' teinge diikakatauroi nkoarima bei'bei'maako'na'."

(Kena 95:7,8)

<sup>16</sup> Ee'noko teing baata nantoong ninge minkuaram- atomaing Kumponing bakaang aorong taaravau'ning teie teing karavuriko teketa tee teinge ereanavaako'? Tee aa' teinge ee'ninge Iisipi'keta tenkenau'ninge Moosesi siompai. <sup>17</sup> Ee'noko teing baata Kumponing iirang-antavaako'ning teing-koo ookara mare' kare- naumo kivora-koo kuunge? Tee aa' teinge ee'ninge oraka'nko nkoau'nung ee'noko maku'koo boo'pariru' teka mee'bora' sirakamaa'koo. <sup>18</sup> Ee'noko teing baatai Kumponing marakavarama bakanoo' uaroma tumpariaroo' naang tampuru'ning? Tee aa' teing ee'ning tee meumpaavaruko'ning nauvurima tee' minkuvuu'nung. <sup>19</sup> Tee'koo enang nii'ke tasi'pampiring teing bakanoo' uaroma tung-koo taura'puriaruu'ning masika'antavaavaruo'.

**Tee Ua'uaa Tampara Kumponing-ankoi Nii' Bakaning  
Uaamoriaing**

<sup>4</sup> Tee'koo amorompiri pinka'mariaing dii'koo nii'ning asiranoo'ke Kumponing aa'puri'neenga, "Dii' bekoi'daririning, nkanoo' uaroma tuntariau- ka'ning." Ai' teie maraka-antavari nii' naumurimaung bakanoo' uaroma tung-koo tero urikupoong nauvu- ru'na' nari'. <sup>2</sup> Aa'hoko tee tampara doorenang uaro- ma tumariaing-koong tee nii'koo pou' tee' teing-koo pou'na', teka teie doorenange teinge taaravau'nunge teing pakuvuria' masika'antavaavarura pinka'aavaruo' domang-koo. <sup>3</sup> Nii' ee'ning tee masika'antavampi- maing teing te' uaroma tung-koo makotumpirining, ai' nii' bekoi'maria' teing-pina' daari meekung-koo aa'puru'ning-pina',

"Iiramora marakamarama aa'pantu', 'Teing nkanoo' uaroma bakei tumpariauka'ning.'"

(Kena 95:11)

Enang anaarei tee te' uaroma masika' nari' otomatomana' tasi'antamuri otong ai' otoaruko-pina' tee' minkuvua', teka otoko, temu'keta, kansi' pupu'ura bakevuu'na'mung-eta nari' tung-antavuripeu'.

<sup>4</sup> Noru'ampiri otong, ai' te'mung uaana'mung tutu- na'na'mung ~ke'munta-taa-na'mung daari meekunge naumurimana'mung aa'puma,

"Kumponing tee ~ke'munta-taa-na'mung uaavou'nung ookara nkovuu'ning-eta."

(Pupu' 2:2)

<sup>5</sup> Ee'noko tenaare tutung minkuansinaare anka masi- kee-antavui otong daari meekung-koo aa'pumanoo'ke, "Teing nkanoo' uaroma bakei tumpariauka'ning."

(Kena 95:11)

<sup>6</sup> Teing temu'navarang doorenang tampara tamung taaravau'ning teing te' uaroma tumpariaruu'ning masika'antavaavarura. Teka te' uaroma mme' mako- tui otong nii'ning tung-koo. <sup>7</sup> Ai' dama'ke Deevita' karantavuma~ Kumponing nii'na'mung bateina'mung uaana' mung miru'uu' "e'mung" tampuma, Moosesi tero nauvuu'na' siompui. Anaare ee'naare tero minkuansinaare daari meekung-koo ee' otoinoo'ka, "E'mung bakaang aorong taaraverira domang kapan- toriauka'."

(Kena 95:7-8)

<sup>8</sup> Te' ee'noo' uaroma okora' masipo' teie minku- vuu'noo' te' kansi' Keenani-navora' deea', Josiua'ke be'antavuru'noo'. Tee' miru'ari dei dama'ke pankaroompuio' Kumponing napo' tee' nari' minkuvuaru- peu' "e'mung" tovang minkuvuma.

<sup>9</sup> Tee tee enang sira'pari otong Kumponing bakaning teing makosi uaavoroainng tee' Kumponing te'mung ~ke'munta-taa-na'mung uaavou'na'. <sup>10</sup> Ai' baa tee Kumponing bakanoo' uaroma tumparapeu'nung tee baka bakaang nko-nko nko-koo bakearapeu'nung- pina' otong tee' nari' Kumponing ookara kapoo' nkovura bakearu'na'.

<sup>11</sup> Aia', tee'koo niikaang domang-eta paaramariaing te' uaroma tung-koo nii'koo narunge teing urikupoong taarapiikavariko'na' siompurira tee' nari'

dua'ara'neeng. <sup>12</sup> Ai' tee Kumponing bakaang kara tee domaang-po'nung, tanteari oto', aa'na' irinto' tee bainatu ookamenta irinii' divu'ui. Naning tupu'ui meu' ke'me'ura sira'pupeu' aa'ning: tanuaanoo', uraanoo', koo' be'nu'nairu ee'noko ma'ma'nairu. Nantoong bi-ikening onounanka-koo kuunge otoina' masika' tasi'antaevurikoo' maroaamana' nari'. <sup>13</sup> Ee'noko Kumponing oo-koo kapoo' baku'arapeu'nung otoa', teka ookara kapoo'nanka nkovuru'ning sira'pariri tavempari otorong bakaang duta-koo, tee-koo simpe'muriko maku'ampiaing-koo.

## Jiisuu' Tee Piristi' Pankaing Deemparing Nerakung Naroong-anta Tarevui

(4:14–10:38)

### Jiisuu' Tee Dau Basi Pankaing Piristi' Nii' Domaang Moo'koo Makosi

<sup>14</sup> Tee'koo niikaang domang danto nari' pinka'mariri o'noriaing niikaang masika'anta-koo sira'marimaung-koo, ai' nii' teing pankaing piristi' oto'memuring paninanka aarempui beu'nung Kumponing-koo due', tee ee'nara Jiisuu', tee Kumponing Bauring. <sup>15</sup> Tee tee napo' nii' niikaning aruaru'nanka-koo nari' dee'omaung bakei, ai' tee ee'nara nii'pina' nari' ooku-tunairu-koo paaranii', teka dua'arava'. <sup>16</sup> Enang tee tampara piristi' pankaing otoko to'biimariri kunsimari-ma due'mariaing te' Kumponing bakanoo' ovorimpari ba'nani'doma, pakupaku tamung nkaroma deempario' piaamurira avusiro'ari pakumuriaina' makotumpiaruko.

**5** Ookara piristi'nanka pankainanka Moosesi-nung botoi miru'urimana' ee': Doompetaa' nantoong-eta miru'urimaung nantoong biikaang avuavu'nanka ee'noko boontunananka Kumponing-koo ta-vo'evaarii'naang, biikaang oraka' nkonanka tonta'antakoo. <sup>2</sup> Teing teing ee'ning piristi' pankenanka kansi'kooning deempariritaa' makenge mantompai koong-antavaaripeu' noru'kaavaing ee'noko teing akovung sionuka, ai' teing teing nari' teing-pina' aruaru'ke kuung deempuri otong. <sup>3</sup> Ee'noko tee'koo teing ee'ning dai'ariri otorong bii'ka-koo boontunang nko-koo nantoong biikaning nkoevaarimana' nari'. <sup>4</sup> Ee'noko nii'nung kapoo' piristi' pankainanka-koo ee' otong: Biikaang nko-nkoi tee miring pankaing-antavurimaung. Naning baka piristi' pankaing deemparaa'naang miru'aravarupeu' baka piavoma, teka Kumponing tampuko deeko' Eeroni tee tutuna'nung miru'uu'na' nari'.

<sup>5</sup> Karistoo' tee' nari'ke baka deto siparava' piristi' pankaing deemparaa'naang, teka teie Baumai tero miru'ura pako'pari'uu'. Ai' teie Daari Meekung-koo Tee Pako'pari'nii' nauvuma tee aa'puu'nung,

"Da' tee nnuring, e'mung tee ninge daa'dansing."

(Kena 2:7)

<sup>6</sup> Napo' nii'noo'ka ee' nari' minkuvuu',  
"Da' tee piristi' deto basi tee' nari' otomatoaing  
Melkesedek bakana' siompei."

(Kena 3:7)

<sup>7</sup> Tenang tee naning deempari otoko'nang Karistoo' tee kunsiaru' baitoarama tee-aape boo'keta domang-antanung-aape aa'na' bokuma biromparama ta'du tu-uvuma. Ee'noko Kumponing taaravuu' doonkoari kunsiaro'. <sup>8</sup> Bane tee Jiisuu' Kumponing Bauring, teka piristi'koo miru'ari turetureron'navung mantompuu'nung amutemurii' sisikeera kune'uma. <sup>9</sup> Ee'noko tee' mantompui' Kumponing makosi tampuu' tee domaang oparavaung oko-anta deemparaa'naang teing-koo nantoong tee aroo'aavaining-koo. <sup>10</sup> Tee tee ee'nara Kumponing piristi' pankaing tampuu'nung Melkesedek bakana' siong-antavui.

### Niikaang Masika'anta-koo Tamung Tooto'pina' O'noriauka'

<sup>11</sup> Kapoo'nanka mmau' ninge tenaanka siraka'antarampima minku-koo makosi otong, Melkesedek ee'noko Jiisuu', teka tee dii' kankenkankeng-anta-koo pore'mo'neenga, dii'ke namu'ke kara ivekung tasi'periaung-koo. <sup>12</sup> Bane temu'keta taaraveru' tee Jiisuu', teka dii' mme' makosiria' nii'ning nau-anta-koo. Dii' naning napo' nau-antaruripeu'na' oro'darimang te' okora'noo' Kumponing bakaang kara-koo. Noonoo' pe-te' nai-koo makosiri otong, taamang ivekung nai-koo makosiria'. <sup>13</sup> Ookara nantoong noonoo' narung naiaamaing teing matauropanuka Kumponing bakaang kara tasi'koo koong-antamurimaung. Toire' teing tee' oro'nuka. <sup>14</sup> Tee taamang ivekung tee nantoong pankareu'koo makosi, teing ee'ning biikaang onou toosinii'nuka, paaravaama bareariru'ning tee tampara orara-ita simpe'koo.

### Kumponing Neng-koo Kontemoriauka' Biraanke Dupearavainoo' Noru'ampima

**6** Enang tee Kumponing bakaang kara-koo okora'noo' Karistoo' tero Pako'pari'nii' noru'koong tee' nari' putu'ampiauka', teka napo' nauaue kato meriaing Karistoo'koo panka'maririning-pina'. Pava-koo natuku narung amutemu'ke unampampima keempampiauka' temurii' narung kara minkuampima. Temu'keta noru'eri' tee temurii' kara dii' oraka' nkonanka-ita boo'aapening-eta orarunsiraira bere'darimang-koong. Napo' dii'ke noru'eri' tee Kumponing masika'antaveriaina'. <sup>2</sup> Nii'ke tee temu'keta amutemurii' aarumo meeka'anta-koong nau-antarampiru', ee'noko bireng pante'. Dii'ke napo' noru'eri otong tee boo'keta daa' ee'noko tee simpe'murira miru'muriko doong kante tee' nari' o'norimaatoaina'. <sup>3</sup> Tee' ee'na' tee Kumponing taura'muriko kato nenke'ansitaa' nau-antarampiaing.

<sup>4</sup> Enang napo' tee berevere' unaunampampima minkuampiaroo'naang, ai' teing nantoong tutung araka-koo otorokotaa' dama'du toroariko napo' naning bere'anta-koo makotua', aa'ning paning-etaing

avuavu' mantompau' Tanuaang Meekung nari' kompaara. <sup>5</sup> Ee'noko teinge mantompau' tee Kumponing bakaang kara-koo tarii'noo' ee'noko napo' mantompau' teing iri'nanka Kumponing bakaning avurimaung ovorimpariri otoroaina'. <sup>6</sup> Teing ee'ning napo' bei'bei'ariko naning napo' bere'anta-koo makotua' teing. Tee' nkoarima Kumponing bauring aa'barata'koo napo' bii'ka taakavaamaung-pina' nkoaamaung sirapo'ka nantoonge poore'koo.

<sup>7</sup> Kansi'ke tee apo'uko ntong kompura keenkeenanka nantoonge keempaamaing piavoromana' tampa' du'antavuko Kumponing manee-antavukoo'. <sup>8</sup> Teka teie kansi'ke too'murintaa' dovang tonto du'antavuko tee binaa'omaung, ee'noko barakosi'koo makosi. Botue nta'koo tai-anta-koong tee.

### Kumponing Bakaang Maraka-anta Masika'antavampiri O'noriai

<sup>9</sup> Teka ee maikori', bane tee' karoma nau-antaramping ninge dii' ee'ning masika'antavampiri otong tee dii' teing-pina' deea', teka domaang-aape-navung-koo otoring. <sup>10</sup> Kumponing tee koonto'na' nari' nko, ee'noko diikaang nko-nko ee'noko piaa tamung doonko oovuauka'nung, tee ee'nung piaa Kumponing-koo oro'antaverimaung bakaning pakuererima temu'keta e'mung doong-koo basinoo'koo. <sup>11</sup> Ee'noko dii' tee' nari' aa'na' nkorarii'naang piamorimang bera tee kapoo' dii'ke nemperimaung asi'noo'ka dii'koo dupeari' taa'ni'poainoo'ke basi. <sup>12</sup> Tee' nau-antaramping dii' konteroriauka'na', teka siompereriai teing biikaang baito ninka iri' o'paa' ninka barenku maraka-antavuru'nanka okovurimaing.

<sup>13</sup> Tee' Kumponing Eebaraami' maraka-antavuu'na' ee'noko siompui'na' ooveriaing tee' daari meekung-koo naumurimana' ee',

"Bakei biraankeransio' da' berentaramatoaing."

(Pupu' 22:17)

<sup>14</sup> Tenang tee maraka-anta Eebaraami'koo nkovuu'hang, baka-koo masika' deto tamparu'nung naning tee masika' deto tamparapeu'nung otoaruko tee-koo dau basi. <sup>15</sup> Ee'noko Eebaraami' tenaare-koo e'manui iri' oparava' teka mii'kuitaa' nemparu', ee'noko tee maraka-antavuu'nung biraanke nkavuu'.

<sup>16</sup> Nantoong tee tee-koo pankaing-koo teing-koo dau basi-koo masika' deto tamparimaung, ee'noko tenang-eta deto kapoo' minkuaavarupeu' tee kara pinka'nii' noru'aitaa'. <sup>17</sup> Tee'koo masika' deto tampuma Kumponing bakaang maraka-anta pinka'uu'nung nii'ke tee biraanke okomuriaining ee' tasi'pampii'naang: bakaang kara maraka-antamuru'na' paariaravauka'nung. <sup>18</sup> Tee tee Kumponing kapoo' ke-naanka aampari'koo makosi deeaing ninka bakaang kara pinka'uu'nung aa'ning ninka maraka-anta ee'noko masika' deto, teing ee'ning minkuvuma tosiaravarupeu'ning. Teing ee'ning-koo nii' Kumponing-koo nee'mariri o'norimaing aa'na' domang dontomuri pinka'mariri o'noring tee kapoo' naumurio' nempampimaung noru'ampiri. <sup>19</sup> Tee niikaang nooruupi dama'

domang-antamuraing-koong tee tankanung-pina' ivepo' masipo' i'ma'ari otomaung, diiri'koo makotua', ai' narunge tee koonto' paning-koo kuunavaro-koo meepo' masipo' tumparara tee maraka-anta teka pinka'uu'nung; <sup>20</sup> Tee ee'nara Jiisuu' nii'koo uro'ke beu'nung pakumirii'naang piristi' deto basi deemparara Melkesedek bakana' siompui ookara batei-koo tee' nari' otoo'naang.

### Jiisuu' Tee Piristi' Melkesedek-pina' Miring Pankaing-po'nung

<sup>7</sup> Enang Melkesedek-koo napo' noru'antampii'naang. Tee ee'nara tee Saalema'navuntu'koong daurong~, ee'noko piristi'ke Kumponing deto basi bakaang. Teie ee'nara tee Eebaraami' dauraronanka tavuru'noo'keta toroarako kune'ura Kumponing-koo marakavari biraankevuu' tee. <sup>2</sup> Ee'noko tee Eebaraami'ke kivora-koo narung avuu' ookara kapoo'nanka-koo tavurira nkavuu'ning-koo. Teenoo' tee Melkesedek kenaanka kapoo'koo dauraring, aa'ning-koo koonto'koo ee'noko mooa-koo. Ee'nara bakaang miring bere'arama miru'noo' tee "Dauraring Koonto'koong", ee'noko temono osinamono-koong miring Saalema' bere'arama miru'noo' "Mooa" tampari otong. Tee'koo napo' tee tee ee'nara dauraring mooa-koong. <sup>3</sup> Ee'noko tee-koong minkunaa-koo tee ee'nara bauma ee'noko bauko Daari Meekung-koo miring otoa' ee'noko bakanaving-koong parapara-koong minkunaa otoa', ee'noko bakaang ootoo'koo tutumparu'noo' ee'noko bakeroma otoa', teka bakaang ootoo' tee tee-pina' Kumponing Bauring tee piristi' tee' nari' otoi oto'.

<sup>4</sup> Ooveriko, Melkesedek ee'nara naning pankaing. Aa'noko Eebaraami'ke, bane Ju'nupoong ookara biikaang pankau'moi, tee ee'nara aa'na' pankaing tasi'pui kivora-koo narung avuu' ookara kapoo'nanka tavurima nkavuu'ning-koo. <sup>5</sup> Teka teing Liivai' bakanaving-kooning Ju'nupoong-koo piristi'nanka deempariko'ning teing Moosesi-ning botoi tampui'o' bii'marange narung kivora-koo narung avaariko', teinge ee'ninge ookarai naro'ka Eebaraami' ba'dompenkue. <sup>6</sup> Teka tee aung Melkesedek Eebaraami'keta narung kivora-koo narung nkavuu'nung tee deto basi teing ookara-koo, teing-koong deea' paraparai.

Ee'noko napo' Melkesedek-ke pankaing-tee Eebaraami', bane maraka-anta-po'nung, biraankevuu'. <sup>7</sup> Aung-koo kapoo'koo paapaa' otoa', naning tee biraankevumaung pankaing tee-koo biraanke nkavumaung-koo.

<sup>8</sup> Napo' teing piristi'nuka Ju'nupoong-koo, narung kivora-koo narung nkavaako'ning teing boo'koonupoong, teka tee Melkesedek tee domampari otong, tee' naumurimana'.

<sup>9</sup> Napo' tenang Melkesedek-ke Eebaraami' kune'uu'hang minkuampima nii'ke aa'pampipeu': Eebaraami' ba'dompenku Liivai' bakanaving-kooning piristi'nanka mme' tavo'ariaruko Eebaraami' ninka



nari' kivora-koo narung Melkesedek avau'nung-pina' otong.

### Nerakung Pristi'ke Teing Urikaving-kooning Puru'uri Pari'antavuru'na'

<sup>11</sup> Napo' ee'koo Melkesedek Liivai'nariong-koong piristi'nanka-koo naning pankaing deto basi tasi'pampimaunge: Kumponingee tee Ju'nupoong boto avurima piristi'nanka miru'uru' Liivai' bakanariong-kooning teing okora'ariri tee boto tanatavaava'naang. Teka teinge nantoong makosina' naroonng-antavaariko dei teie Kumponingee oovunoo'ka piristi' daa'uarupeu' Melkesedek-namurii', temurii' Liivai', Eeroni dovang bi-ikanamurii' deeaung.

<sup>12</sup> Enang tee piristi'nung aarumo paariarako deeko' napo' tee kara naroonng-anta boto tee'ke paariarapeu' bakaning botonanka ninka nari', ee'noko tee' nkoarama paariaru'. <sup>13</sup> Ai' tee naning paariaru'nung nau-murii'naang otong tee oovunaving-koong boonturo-mai kapoo' nkoavaruko'ning-koong. <sup>14</sup> Ai' tee tee sira'pari otong tee niikaang Oving tee Juda bakanaving-koong ee'noko teving-koo ee'naving-koo Moosesie piristi'aapenung kapoo' minkuvua'.

<sup>15</sup> Tee boto paariaru'na' napo' aung-koo aa'na' sira'pari otong: oovunara piristi' donkonuu'nung-koo Melkesedek bakana' siompui. <sup>16</sup> Aa'nou'na': Botoi ee'noko mono-aapenung paraparai minkuvui otona' tee' otoko tee Jiisuu' domaang o'paa'koong iri' ninka piristi' deempari donkonuu'. <sup>17</sup> Ee'noko Daari Meekunge tee' nari' sira'pui otong aa'pumanoo'ke, "Da' tee piristi' deto basi tee' nari' otomatoaing Melkesedek bakana' siompei."

(Kena 110:4)

<sup>18</sup> Tee boto temu'nung tee tonta'nii', aruaru' ee'noko makotuaung deemparako, ai' teie botoi koonto' naning naroonng-antavua'. Teka nii'na' biraanke-aapena' tasi'antamuru' Kumponing-koo due'mariaina'.

<sup>20</sup> Ee'noko tee' biraanke-aapena' tamung nkovua', teka tee' masika' deto minkuvuma tee kara naroompui pinka'uu'. <sup>21</sup> Teinge tero uro'ke piristi' deempari-iko'ningee tee' nkoama meeka'pariko' masika' deto otoaruko'ngang, teka tee aung Karistoo' tee masika' deto minkuvuma pako'pari'uu' aa'puu'noo'ka, "Ovingee tee masika' deto tamping ee'noko bakaang noru' paariaravauka'nungee. Teie aa'puing: Da' tee piristi' deto basi tee' nari' otomatoaing."

(Kena 110:4)

<sup>22</sup> Kumponingee tee' pinka'antavura nii' bakei tampa' biraankenana' kara naroonng-antamemuru' temu'na'pina' deea', ee'noko tee tee teie Jiisuu'ke okonara deemparara bakei dupe-antavuaing.

<sup>23</sup> Urukupoong piristi'nanka teing mmau'nanka deerunoo'koo, ai' biikaang nko-nko-ita boo'ke si'antavuriko biurukaa'ke paari-antavaariko'. <sup>24</sup> Teka Jiisuu'ke tee tee' nari' piristi'nung nko-nko kompui otomaung doong kante tee' nari' domampari otomaung-koo. <sup>25</sup> Tee'koo ookara batei-koo nantoong tee-koo kuunge Kumponing-koo poroainng Jiisuu'ke

tee teing domang-anta-koo makosi, ai' teie tee' nari' domampari otoi eentavarama pakuvurimaung.

<sup>26</sup> Ai' tee tee' makosina' nii' narung piristi' pankaing oto'memurii'naang, tee meekung, tuumpiaravaunge, ku'mi'dopai, nantoong orananka-ita poka'ari otong, ee'noko pankaing-antanii' ookara kapoo'nanka-koo dau basi, paning-kooning-koo ee'noko kansi'kooning-koo. <sup>27</sup> Tee tee teing-pina' nii'ning piristi' pankeng-pina' deea' kanto'puriaruma a'munte'munge boontunang nkoaako'ning-pina' tutuna' bii'ka biikaang oraka' nko-nanka-koo ee'noko dama'ke ookara nantoong biikaning-koo. Teie Jiisuu'ke tee tee-koo orara aarumo otoaruko boontunang nara'ka bakevui nkovuu' tenang baka avari boontunamparu'ngang. <sup>28</sup> Tee tee Moosesie-ning botoi nantoong aruaru'nanka deempariko piristi'nanka pankainanka otoroo'naang miru'uriko', teka tee-koo dama'nung karai Kumponingee masika' detoarama aa'na' pinka'uu'nungee tee Bauring piristi' pankaing deemparaa'naang miru'uu', tee ookara batei-koo makosi-antanii' deemparako.

### Jiisuu'ke Piristi' Bakaang Nko-nko Nkovumana' Paning-koo

**8** Enang minkuampirina'koong okora'noo' aung: Nii' tee tee' oro' piristi' pankaing oto'memuring, tee tampavine-koo ba'nanui otomaung teke Oving Pankaing ba'nanui tarearamanoo'ke paning-koo. <sup>2</sup> Tee teke piristi' deempari tanatavaramaung teke meepo'ke dootuu'doma masipo'ke, naningee birenge donkong-antavua', Ovingee baka nkovuu'noo' te'.

<sup>3</sup> Ookara piristi'nanka pankeng teing tee avuavu'nanka ee'noko boontunang nko-koo miru'ariko'ning, tee'koo bakei kapoo' nii'nung avuavu' otong teie Karistoo'ke piristi' pankaing deempari boontunampuaing.

<sup>4</sup> Aung-koo kansi'koo anke oto'koo dei tee piristi' deempari otoarupeu' bakei, nii'ning nii'namuu'kooning temu'keta otoromaing otoroko botoi miru'urio' avuavu' tavo'aamaing. <sup>5</sup> Teing tee tamung uu'aa'noo'koo tanatavari dootuu'arimaung, paning-koo otoinoo' meepo' paara-antanoo'koo. Ai' tenang teie Moosesie teva meekava kaandesie-koonava kani-koo daruvuu'ngang tee Kumponingee nau-antavuu' nkovuinana' aa'puma,

"Ooveko dake ookara kapoo'nanka tee biikaang paaranang siompei nkoveaing tero naurantu'na' teka miinani-koo."

(Toro 25:40)

### Nerakung Kara Naroonng-anta Tee Tampara Masikung, Urikung Puru'ui Otong

<sup>6</sup> Teka masika'pari otona'koo ee' otong, Kumponingee dama'nung kara naroonng-anta bakei tampa' nkovuu' maraka-anta aa'na' tampenge dai'ura temu'nung boto ee'noko bakaning maraka-anta puru'ui', ee'noko Karistoo' tee kara naroonng-anta-koong meu'nung deemparita' bakaang nko-nko paku-koong tee' nari' dau basinoo' aa'na' tampara temu'ning piristi' pankaing kansi'kooning biikaang nko-nko puru'uitaa'.

<sup>7</sup> Tee tutuna'nung kara naroong-anta koonto' makosi dei tee kenaanka-nung oto'koong doona otoarupeu'.

<sup>8</sup> Teka teie makosi deeaung tampuu' Daari Meekung-koo aa'puu'noo'ka,

“Ovinge aa'pumaung: Nii'na'mung doong tavo'kuko ninge nerakung kara naroong-anta sipevorompaing Isireeli-nupoong-koo ee'noko Judia'nupoong-koo. <sup>9</sup> Tee kara naroong-anta nerakung tee-pina' kara naroong-anta biikakatauro-koo nkoantu'nung-pina' deea' tenang ninge nkaang birenge baramparantu' nang Iisipi'na'ensi'keta, ai' teinge tee kara sipevorontu'nung danto nari' siempaavaruu'nung-koo ning noru' o'noaruu' teing-koo.

<sup>10</sup> Aung tee kara naroong-anta ninge donkompa-ma'naang otomaung teing-koo ookara Isireeli ba'dompenkuri-koo, Isireeli-nupoong-koo ee'noko Judia'nupoong-koo, doong urikeng tankinuko, aa'noaing, nkaang botonanka biikaang onou-koo sipampai biikaang domang-koo daariamira, ee'noko ning tee biikaang Kumponing o'noaing ee'noko teing nkaning nantoong otoroi. <sup>11</sup> Ee'noko teinge napo' bii'maikorori' ee'noko biira'mainkaang nau-antavaari- auka' ning-koo aa'paama, 'Ovinge-koo barerariai,' ai' ookarai tee ning noru'mai otoroiing oki'nareka'keta bera pankenanka-koo basie. <sup>12</sup> Ai' ninge tee teing pi-aavaramira biikaang oraka' nkonanka-koo ampa'mora norunoru'arampaing napo'. Ovinge tee'pumaang.”

(Jeremaia 31:31-34)

<sup>13</sup> Teie nerakung kara naroong-anta minkuvuma tee tee tutuna'nung urika'antavuu'. Ee'noko tee urikung iri' otoarura due'ka paa'araa'naang.

#### Urikupoong Pareka Nkonukai Tamung Kau'karenau- mo-nanka Parekavaako'na'

**9** Enang tee tutuna'nung kara naroong-anta tee' nari' teing bakaning aarumonanka uu'aa'nanka otorong dootuu'koo sionumpo', ee'noko bakanava meekava a'nava kansi'koonava tee' otong, paara-anta-koonava. <sup>2</sup> Teva ee'nava kaandesi-koo kaniau'nava kevarora-po'nava. Aivitunavaro-koo aing aa'ning otoroko': araka-pante', ee'noko batanang, ee'noko berete' tee batanang-koo dau otoko. Tevaro ee'navaro Meekavaro tampaako'navaro. <sup>3</sup> Napo' kenaanka-nung ku'nung kuunavaro-koong otoko' kaandesi-koong da'nava, te' Meepo'keta Aa'na' Meepo' tampaako'noo'. <sup>4</sup> Tevaro-koo batanang kooroi nkonii' ii tampa' nuuraa' paro'antaroma otoko' ee'noko tee bokita meekung kara naroong-anta-koong otoko' kooroi daka'nii' ooka-menta-ita. Ee'noko tee bokita meekung-koo kuung aing aa'ning otoroko: utau kooro-koo ta'nanii', kuunge tee taamang maana' paning-etaing otoing; ee'noko napo' teruung Eeroni bakanaruung donsi'naruung puaravura sinampuu'naruung, ee'noko teing bentan- ing kapang-kooning kara naroong-anta daarinii' nari' otoko. <sup>5</sup> Ee'noko tee-koo bokita-koong-koo da'nava- koo daue ereng sinki'di'aako' nantoong biikaang ora- ka' nkonanka kui-koo. Ee'noko seraping-ka kenaanka ta'nanii'ka teke daue donkonuresi otoreko', kupa'ke

toompeeresi Kumponing bakaang meenasi oro'an- tavurema. Aing-koo nii'ke kapoo' ookara pukeampiri enang minkuampiarupeu'.

<sup>6</sup> Teva meekava tee' neriau'noo'keta teing piristi'nan- ka tee aivitunavaro-koo doong kante tumpariko' bi- ikaang nko-nko dootuu'koong nkoaava'naang. <sup>7</sup> Teka te' kuunavaro tamung tung-koo bakei meepo', piristi' pankaing narung deeko' tumparapeu', namare'koo na- mu'ke, napo' ereng nkavui deeko' tumparapeu' aa'ning-koo boontunamparaa'naang: teie baka ee'noko nantoong noru'aava' oraka' nkoaako'ning- koo. <sup>8</sup> Tee-koo aarumo-koo Tanuaang Meekunge nau- murimaung tee taung kunsimariko Kumponing tam- pa' noru'murira taaramuripeu'navung mme' sira'para- va' tutuna'nung dootuu' donkonui otoko. <sup>9</sup> Tevaro aivi- tunavaro tevaro taa'ni'anta-navaro teing aing doong- koo aung tutuna'nung kara naroong-antai kuung deempui oting-koo aa'ning nkoaako'ning-koo avuavu' ee'noko boontunang; <sup>10</sup> Teie temurii' botoi tee naning dootuu'aramaung bakaang pankaruntoong dupevui kiiroraa'antavuarupeu', aa'ning narunge taa- mang ee'noko ntong nai, amutemurii' aarumo ntonge meeka'anta, ee'noko nii'ning napo' mono-aapening aarumonanka kompui otoko' bera tenang teie ner- akung kara naroong-antai urikung paari-an- tavuu'noo'ke basi.

#### Karistoo' Baka Bakaang Ereng Ninka Boontuarara Pareka Nkovuu'nung

<sup>11</sup> Teka tee Karistoo', tee Pako'pari'nii', tee tero pou' piristi' pankaing deempari kapoo'nanka tampenanka Kumponing maraka-antavuru'ning nii' oko-anta-koo. Teketa tee dootuu'nava pankava masakava-koo dupe- antanii'nava paning-koo otoinava-koo koinuu' naninge birenge kanivuaruu'nava-koo, aa'nava aung kansi' nkovuu'na'keta oovuna' masika' nkonii'navai.

<sup>12</sup> Ee'noko koinuma nara'ka bakevui Meepo'keta Aa'na' Meepo' tumparu' ereng mee'mee'koong ee'noko boro- maka'koong ninka deea', teka baka bakaang ereng nkavui bera teie moo'muru' o'paa'na'. <sup>13</sup> Urikung dootuu'koo tee aing aa'ning nkoaama nantoong kiiroraa'antavaarima mono-aapening boto toto'paako'ning- koo: mee'mee'koong ee'noko boromaka'koong erenge ee'noko boromaka' kampionu-koo bio' tai-an- tavaako'nu-koonge sipunge teinge piarau'aariko' nan- toong. <sup>14</sup> Teka tee ereng Karistoo'koong tee bakei dau basinoo' purinto'. Tee Tanuaang Meekung ookara batei-koo otomaung bakaang iri' ninka Karistoo' tee baka avaru' Kumponing-koo, ee'noko kapoo' orara tee- koo otoa'. Tee'koo teie bakaang erenge tee deto basi- noo' niikaang pankaruntoong kiiroraa'antamurimaung ee'noko boo'aapening nko-nko-ita unaa-antamurikoo' Kumponing domantoo' makosina' dootuu'ampii'naang.

<sup>15</sup> Tee'koo Karistoo' tee meu'nung tee nerakung kara naroong-anta pinka'anta-koong, ee'noko tee temurii' naning deempario' nantoong teing Kumponing miru'uru'ninge tee barenku maraka-antavuru'nung

otooto' oparavauka'nung nkavaavaing, ai' tenang Karistoo' boo'paru' nang teie moo'uru'nung oraka' nkonanka-ita tutuna'nung kara naroong-anta siompai nkoariko'ning-eta.

### Karistoo'koonge Erenge Nerakung Kara Naroong-anta Puring-antavumana'

<sup>16</sup> Tenang naning narunge bakaang kapoo'nanka nii'nung oko-antavuu'naang tampura tee booko, teie tee kara naroong-anta minkuvupeu', teka tee kara purinto' otoa' tee naning boaruko. <sup>17</sup> Ai' temurii' kara nare'uarupeu' tenang tee naning karou'nung domampari otoko. Teko tee kara minkuvuu'nung boo'parako deeko' makotupeu'. <sup>18</sup> Tee-pina' napo' tutuna'nung kara naroong-anta nare'ui otoaruko' ereng otoaruko. <sup>19</sup> Tenang ookara botonanka Moosesie siraka'antavuu' nang ookara nantoong-koo teie tee boromaka' kampa-nanka-koong ee'noko mee'mee'nanka-koong ereng nkavuu' ee'noko ntong nari'; <sup>20</sup> Ee'noko sipisipi'koong dapo urung koi'nave-koo marununave-koo dai'ura duu'pura mira'uu' ookeng-koo, boto-koong kara daarinii'nane' ee'noko nantoong-koo dau, aa'puma,  
"Aung tee ereng kara nare'anta-koong Kumponing botorurima dii' naroong-antavuing."

(Toro 24:8)

<sup>21</sup> Ee'noko napo' tee' nari' mira'uu' teie erenge ookara kapoo'nanka teva kaandesinava ee'noko teing dootuu'arima kompaako'ning nari'. <sup>22</sup> Ee', masika', boto-koo kuunge daping ookara kapoo'nanka tee kiiroraa'antavaako' erenge, ee'noko tee' nari' ereng tuu'vuuruko deeko' tee boto toto'nanka tonta'uarupeu'.

### Karistoo' Baka Boontunamparu'na' Oraka' Nkonanka Tonta'uma

<sup>23</sup> Tenang teva meekava kaandesi-koonava daate'au' nang tee teing kapoo'nanka dootuu'kooning tee' makosina' kiiroraa'antavai meeka'antavaaru'ning tamung uu'aa'pina' otoroi teing-koo kapoo' masikeng-koo paning-kooning-koo. Teko Karistoo'ke te' masipo' Kumponing ninka naro'mariainoo' paning-koo daate'uma tee bakaang erenge meeka'anta-koo makosi teie deto basina' aa'na' tamparai. <sup>24</sup> Ai' Karistoo' tee pava meekava nantoonge kaninii'nava-koo tumparava' tamung uu'aa' makosinava, teka paning masipo' tumparu', teke ee'noo'ke enang donkonui otong Kumponing-koo uro'kanoo'ke nii' pakumurima.

<sup>25</sup> Teke tee amutemu'ke boontunamparaa'naang tumparava' tee' piristi'nanka pankenanka mare' kante meekava-koo tumpariko'na' ereng oovunara bii'ka-koong deeaung avaava'naang. <sup>26</sup> Tee' ee'na' boontunamparapeu'nung dei amutemu'ke sisikeera kune'umaatopeu' kansi' pupu'aru'noo'keta, teka enang bateinang-nanka-koo asiranoo'ke namu'ke oro'paru' ookutunung bateinang daka'pui tee oraka' nkonanka tonta'uu'naang baka boontunamparara.

<sup>27</sup> Kumponing toomo aung: Nantoong tee namu'ke booroaung ee'noko tee-koo dama'due koosinampari-

aing. <sup>28</sup> Tee'koo napo' Karistoo' teie, namu'ke boontunamparu' nantoong karinga biikaang oraka' nkonanka nkavuu'naang, ee'noko kemu'kana' poaing nantoong biikaang oraka' nkonanka napo' nka-koo deea', teka dupe-antavui domampurii'naang teing nantoong tee batei nempai otoroainig.

### Urikung Boontunange Oraka' Nkonanka Tonta'uarupeu'

**10** Moosesi-ning boto tee teing kapoo' tampeng dama'ke tavo'kumaing-koo tamung uu'aa' tee. Teing kapoo' masikeng taa'ni'poi otoromaing deea'. Tee'koo teie botoi nantoong dootuu'arimaing dupe-antavuri biikaang pankaruntoong kiiroraa'antavuriarupeu' amutemu'ke tee' nari' boontunampariko mare' kante-koo. <sup>2</sup> Tee' makosina' dei tee napo' boontunamparia' otoropeu' teing tee' dootuu'arimaing namu'ke pankaruntoong kiiroraa'ariri opariko, aa'hoko oraka'nkoi ku'mi'nuka mantompariarupeu'. <sup>3</sup> Teko temurii' boontunanankai tee tasi'antavuri otong nantoong bikaning oraka' nkonanka tee tee' nari' otomaung mare' kante. <sup>4</sup> Ai' teie erenge boromaka'koong ee'noko mee'mee' aa'ning-koonge pankaruntoong kiiroraa'antavui oraka' nkonanka tonta'koo makosi deea'.

<sup>5</sup> Tee'koo tee Pako'pari'nii', tee Karistoo' a' kansi'koo pou' nang due'uko teie Kumponing minkuvuu', Daari Meekunge tero minkuvuu'na' siompui aa'puu'na',  
"Teing boontunananka ee'noko avuavu'nanka-koo da' tee baru' piaroa', teka dake nkaang mono maamu-antameing dakaang pia nko-koo makosina'. <sup>6</sup> Da' boontunang-koo ee'noko oraka' nkonanka-koo amutemurii' darimpaamaing-koo doturarava' otong. <sup>7</sup> Ee'noko tee' oamira aa'dansing, 'Ee aung Kumponing, maamumari moing da' piaroina' nko-koo tee' Daari Meekunge ning miru'mui botoaramana'koo.'"

(Kena 40:6-8)

<sup>8</sup> Tenaare tutuna'naare Jiisuu'ke minkuvuu'naare tee teing kapoo'nanka botoi boontunang nko-koo miru'uu'ning. Tompimpura aa'puu',

"Da' baru' piaroaung ee'noko doturarava' teing boontunananka-koo, avuavu'nanka, tainii'nanka ee'noko oraka' nkonanka-koo amutemurii'koo darinii'nanka-koo."

(Kena 40:6,7)

<sup>9</sup> Teketa napo' aa'puu',

"Ee aung, maamumari moing da' piaroina' nko-koo."

(Kena 40:8)

Tee' minkuvura teie tutuna'nung aarumo boontunang-koong bake-antavuu' kenaanka-ning aarumo Karistoo'ke moo'muriaing-koong donkong-antavuu'naang.

<sup>10</sup> Tee tee teie Jiisuu' Karistoo'ke Kumponing piavou'na' nkovuu'nung-koo meeka'mariri o'noring bakaang nkonko nko-koo, namu'ke ookara batei-koo bakevui baka bakaang mono boontunamparu'nung-koo.

### Tee Karistoo' Bakaang Boontunang Deeko' Makosi Oraka' Nkonanka Tonta'koo

<sup>11</sup> Tee-koo tee tutuna'nung aarumo boontunang-koong-koo ookara piristi'nanka tee doong kante tee' nari' unampaama donkonai boontunampariko' oraka' nkonanka tonta'koo makotua'na'. <sup>12</sup> Teka tenang Karistoo' oraka' nkonanka-koo boontunamparu' nang ooku-tunung batei daka'pui namu'ke boontunamparara ba'namparu' Kumponing-koo tampavine-aape.

<sup>13</sup> Ee'noko enang teke ba'nani nempamaung bera tee batei Kumponing bakaning kare-nupoong kau'ka boonameng-koo sipuriainoo'ke basi. <sup>14</sup> Ai' tee tee namu'ke boontunamparara tee ookutunung batei-koo tampa' makosi-antavuru' teing nantoong meeka'pariri otoroainig.

<sup>15</sup> Tanuaang Meekunge tee'ke, sira'puma naumuru' nii' Daari Meekung-koo. Tutung ee' minkuvuu',

<sup>16</sup> "Ovoringe aa'pumaang: Aung tee nerakung kara narooong-anta teing doong tankinuko nko-avorompainig: Ninge nkaang boto domange siong-antavarampaing. Biikaang onou-koo tee daariampaing." *(Jeremaia 31:33)*

Ee'noko napo' daua to'biari ee' minkuvuu',

<sup>17</sup> "Teketa napo' noru'ampauka' tee biikaang oraka' nkonanka ee'noko boto toto'nanka tonta'evoromira." *(Jeremaia 31:34)*

<sup>18</sup> Tee tee are' tokoo tonta'anta otainoo' enang okora' otoa' napo' oraka' nkonanka-koong boontunang nko-koo.

### Enang Koonto' Kumponing-anko Due' Meriaing

<sup>19</sup> Tee'koo, mmaikori', nii' teing koonto' avoro'keta unaamorining enang, Jiisuu' bakaang erenge eentamarima kuunavaro-koo Meepo'keta Aa'na' Meepo' tung-koo makotumpirining. <sup>20</sup> Bakaang mono tee baarong meekava-koo bi'ari otoko'nung makosi, Meepo'keta Meekavaro ku'numpuu'nara'pina'. Mono tupu'ai dupisi'koo taura'purima baarong tee da'nava tee' nari' tupu'ui ke'me'uu' Jiisuu'ke. Teie boo'parara nii' taung nerakung domang-po'navung daate'memuru'nung bera enang kapoo' otoa' nii' Kumponing-anko due' be'koo bono'muripeu'nung. <sup>21</sup> Enang tee nii' bakei piristi' pankaing oto'memuring nii' Kumponing bakanarempo' tanatamuri oto'koong. <sup>22</sup> Tee'koo Kumponing-koo due'mariaing Jiisuu'nung erenge duu'muriko onou tuumpimaria' unaamori, ee'noko niikaang mono teie ntong kiiroraa'ke duu'murio', domang-eta aa'na' masika'antavampiri tee. <sup>23</sup> Napo' tee pinka'mariri sira'mariri o'noriaing tee-koo biraanke okomuriaing-koo, noru' paarimaria', ai' teie tee maraka-antamemuru'nung tee koonto' nkovuaing minkuvuu'na'. <sup>24</sup> Ee'noko norunoru'eriaing tantetante-antareeriaina' paa ee'noko tampa'nko bereng-anta-koo. <sup>25</sup> Naro' kune' siperiauka' nii'ning biikaang aarumo siomperi, teka iri'antareerimaatoai baru'noo' doong asi'na'mung due'uko noru'eritaa'.

### Tee Kumponing Bauring Dama'duampiauka'

<sup>26</sup> Ai' tee aung kara masikung tutung tampa' nkavampirai'nange napo' maroita sipampira oraka' nkomarima o'noriaing deeko' Jiisuu' bakaang boontunang nari' sipampiaing, ee'noko tee'koo tee nii'nung boontunang napo' oraka'nko tonta'memuripeu'nung otoa'. <sup>27</sup> Ee'noko tee bakei amorompiaing nemariri tora'antamuriainoo'koo simpe'murira kiimatamuriko, aa'noko tee nta' iirankesi'ke too'de-nupoong opo' dunkumpurima nii' nari' taimuriai. <sup>28</sup> Urikung kara narooong-anta-koo ee' otong: baa tee naning Moosesi-ning boto toto'puko'nung tee boo'numpo', paa otoa', kenaankai nii'noo' beenaumoi ooaara sira'paako deeko'. <sup>29</sup> Enang kara narooong-anta masikung-koo o'nori kiimata aa'na' pankaing tee-koo dau basinoo' kong-koo makosi teie naning tee Kumponing Bauring mme'upeu'nung, aa'nunge Jiisuu' bakaang ereng daang-antavukoo', bane teie erenge tee kara narooong-anta pinka'ui tee naning meeka'antavuu'; ee'noko Tanuaang Meekung daviraa'ukoo' teie piaae biraanke-antavumaung tee. <sup>30</sup> Ai' nii'ke tee noru'ampiri otong tee Kumponing aa'puu'nung, "Mero'koo tee ninge ninka mero'ampaing."

*(Boto 32:35)*

Ee'noko napo' nii'noo'ke Daari Meekunge aa'puu', "Ovoringe tee nantoong bakaning simpe'uriaing."

*(Boto 32:36; Kena 135:14)*

<sup>31</sup> Bakei avo'avoro' Kumponing Domantoo' bakaang bireng-koo nii' dua'maripeu'na'koo teie kiimata-koo teka.

### Niikaang Masika'anta-koo E'manampiai

<sup>32</sup> Tutung norunoru'eriaing teing doong dii'ke kara masikung taaraverio' araka-antaruru'ning. Aa'ning dii' pore'dorima iri' o'daria', arikananka tora'perima. <sup>33</sup> Nii'ning batei-koo sirakura' poore'daarima oraka' nkoraariko taura'dariko' ee'noko pakuereriko' teing dii'pina' nari' oraka' nkoariko'ning dii' teing ninka nari' mantantarima. <sup>34</sup> Aa'noko teing kiimatanava-koo otoroko'ning piaaverereriko', ee'noko doturariri tamung oovereriko' karika'ke diikaning kavonanka bakiaa'deraariko. Aming-koo, nna' ee' tasi'peri tee': Nii' kapoo' deto basi tampara oto'memuring paa'koo makosi deeaung.

<sup>35</sup> Tee'koo tee' nari' danto piikuura-nupoong otori-maatoaig ee' noru'erima, "Moo' pankaing maamuari otong nii'koo." <sup>36</sup> Ai' dii' bakei barerariaing e'manui oto'na'koo, dii'ke Kumponing bakaang pia siomperikotaa' tee kapoo' maraka-antaruru'nung nkaveriaina' Karistoo' poainig. <sup>37</sup> Kumponing tee-koo minkuvuma Daari Meekung-koo ee' minkuvuu',

"Batei oki'namu'koo tee naning dii'ke nemperimaung masika' tavo'araa'naang. Ana'aravauka'. <sup>38</sup> Teka teing nkaning koonto'nuka teing masika'antai puring-antavurio' domampariri otoroainig, teka dama'du dun-ka'pariko deeko' dotumaravauka'nung teing-koo."

*(Abakaka 2:3,4)*

<sup>39</sup> Teka nii' teing dama'du dunka'pariko orari-antavuri-aining deea', ai' nii' teing kake'iimariri masika'antamariko tanuaange domang-antamuring.

## Nii'ke Kumponing Masika'antavampiri Bauring-koo Ima'mariai

(11:1-13:25)

### A' Te' Masika'anta-koo Okora'noo'

**11** Enang tee tee masika'anta tee ee'nung tee biraanke nempampimaung-koo okora'noo' deempari otong, tee ee'nung noru' purinto' tasi'anta-koong tee kapoo' oro'paravaung. <sup>2</sup> Teing urikupoong koon-to'nuka Kumponing tampeng tampuru' tee-koo masika'antavau'nung-koo.

<sup>3</sup> Tee ninka masika'anta ninka Kumponing nau-muriko tasi'pamping ee'narai paning ee'noko kansii' ee'noko ookara bateinananka nari' bakaang kara ninka pupu'uu', bera aa'nou' teing kapoo' oompimaing tavo'aru' kapoo' oompiaing-eta.

### Eebelo' Dovange Inoke Ee'noko Nooa' Masika'antavaako'na'

<sup>4</sup> Eebelo'ke tee ninka masika'anta ninka boontunang tampara avuu' Kumponing, Keeni bakaang puru'ui. Ee'noko Kumponing bakaang masika'anta-koo oovura makosi-antavuu' naning koonto' tang-koo, bakaang boontunang makotui'o' taa'ni'antavuma. Bane boo'paru', nka teie bakaang masika'antai tee mme' karoi otong.

<sup>5</sup> Iinokei tampa' masika'antavui'o' Kumponing deto paning-koo nkavuu' boo' tora'puaru'na'. Besi'aama ooaava' Kumponing nkavui'o' tee. Tenang tutung nkavua' Kumponing tee sira'puu' Iinokei tee dotu-antavuu'nung. <sup>6</sup> Ee'noko naning masika'anta otoa' Kumponing dotu-antavuarupeu'. Baa tee naning Kumponing-koo due'aravaing teie tee aing aa'ning tutung masika'antavuaing: Kumponing tee otong, ee'noko teie tee tampa' moo'uriaing teing nantoong tee besi'aamaing kake'iiariri.

<sup>7</sup> Napo' Nooa' tee'ke, Kumponing-koo mee'du'piari teie kara masika'antavura aaka'nareng ta'nampuu' tee baurukaa' ninka domamparii'naang, Kumponing siingoravui'o' kapoo'koo mme' oro'paravaung-koo. Nooa'ke tee' nkoarama ookara nantoong kansii'koonupoong kiimata-koo-nupoong sira'puru'. Ee'noko Kumponing tee naning koonto' tampuu', barenkupina' miru'ui masika'antavuko oovura.

### Eebaraami'daringe Seera' Kumponing Masika'antavureko'na'

<sup>8</sup> Eebaraami' tee' nari'ke, masika'anta-po'nung. Tee'koo Kumponing bokuvura nii'noo'aape te' tokoo maraka-antavuu'noo' tee avuu'naang botovui'o'

meumpura tenkenuu' tamung noru'ua' tokoo beainoo'. <sup>9</sup> Teketa tee ninka masika'anta narung ninka damisimaiari otou' temeensi'koo maraka-antavuu'naameensi'koo, akokameensi'pina' noru'uma, kaandesi-koo kaniarama nanuko'. Ee'noko bauring Aisake' tee'ke, napo' tee Jeekopi' ba'dompeng nari' barenku okonakang Eebaraami' ninka maraka-antavuru'nakang deempariri. <sup>10</sup> Ai' teie tee uro'kanoo'ka oovuko' temono osi pankamono e'manui oto'namono Kumponing kanivuu'namono.

<sup>11</sup> Ee'noko napo' Seera'ke tee ninka masika'anta ninka iri' nkavuu' tooto' ke'de-koo poontoaraa'naang bane teni ee'nani pareaamanoo' divu'ke, ee'noko tenie tee maraka Kumponing daamparavaunge avuu'nung-koo aroo'ari bauring tampa' paravuu'.

<sup>12</sup> Tee tee naning narung-eta baru' aa'na' pankara-ita nantoong karinga berempariru' mmau'noo' been-to'nanka paning-kooning-pina', ee'noko napo' piisi'nanka pirung tapirue otoromaing-pina' deerupaa'nanka, tee' nari' Kumponing napo' maraka-antavuu'na'.

<sup>13</sup> Teka teing aing ookara mme' masika'antavai boorou' kapoo' tee maraka-antavuru'nung ooaava', teka tamung isipo'keta nuuruupiaama aa'na' dotu-ari'kansii'koo damisimainku sira'pariri kiimatanupoong-pina' otoroi, osikaaampuripeu'na' paaravaria'. <sup>14</sup> Ai' teing temurii' nantoong tee' sira'paari-maing tee teing tasi'pariri otorong osi nii'noo' data-voroi otoroainoo' besi'aama. <sup>15</sup> Te' osi porou'noo' norunoru'aava'. Norunoru'ai dei tee napo' doona ooaapeu' toro-koong. <sup>16</sup> Teka tee te'noo' osi tampoo' oto'koo piavoromaing, te' ee'noo' paning-koonoo'. Tee' masika' noru'ampiri otong teie osi pankaing maamu-antaevuru'nung-koo.

<sup>17</sup> Napo' tee'ke tee Eebaraami' bakaang masika'anta ninka boontunampuu' tee bauring narung masakung kirokai Aisake' Kumponing paaravui'o'; <sup>18</sup> Tero tee Kumponing Eebaraami' maraka-antavuma aa'puu', "Aisake' baurukaa' teing da' okoruining tamparampaining."

(Pupu' 21:12)

<sup>19</sup> Ee'noko dama'ke Kumponing paaravuko tee Eebaraami' aroo'aru' tee baka bauring boontuvuu'naang, ee'pina' noru'uma, "Kumponing tee nantoong napo' domang-anta-koo makosi, bane boo'nuka." Ee'noko masika' Eebaraami'ke bauring boo'keta nkavuu'nung-pina' otong.

### Aisake' Dovange Jeekopi' Ee'noko Josepa' Masika'antavaako'na'

<sup>20</sup> Napo' tee'ke teie Aisake'ke Kumponing nauvui'o' masika'antavura baurinketa Kumponing biraankevureaina' nauvuretu', temainta Jeekopi' namainta Iiso.

<sup>21</sup> Napo' tee'ke teie Jeekopi'ke boo'ke due'ura Kumponing maraka-antavuu'na' masika'antavui Josepa' baurinketa kante Kumponing biraankevureaina' nauvuretu', donsi'koo doonsinu'ari doonko kinkinura dootuu'arama.

<sup>22</sup> Napo' tee'ke teie Josepa'ke masika'antavuu' tee Kumponing bakaang maraka-anta Isireeli-nupoong tenkenaavaina' Iisipi'keta te' maraka-antavuru'noo' osi, ee'noko tenang boo'ke due'ura tee maraka-anta masika'antavui minkuarama botoaru' dako'aava'naang te' Kumponing be'antavuriainoo'.

### Moosesi Ee'noko Baumararing Ninka Nari' Masika'antavaako'na'

<sup>23</sup> Moosesi baumararing tee'ke, bane dauraronge~ toire' donkaang tavu'koo botovuriko'nang teringe avoroora' baku'uresi otoko' beekuri kaara-koo tee tooto' kirokai oovureta ponto'ario' Kumponing bakaang biraanke masika'antavuresi.

<sup>24</sup> Napo' Moosesie tee' nari'ke, Ju'nupoong biikaang biraanke dama'nung masika'antavui tee bane Peero' baurange bauring deempuko, teka tenang pan-ka'parara orokoarako'. <sup>25</sup> Kumponing bakaning ninka nari' arikung tora'koo piavora tee-koo orara aarumokoo kuunge batei oki'namu'koo otoi dotuaraa'naang piavoaruko', <sup>26</sup> ee' noru'uma: baru' Kumponing bakaang Pako'pari'nii' nempui baike kune'koo tampa' masika' tee barenku nkavupeu'nung Iisipi'nunge dauraronge deing puru'ui otong moo' dama'ke nkavuaing noru'ui.

<sup>27</sup> Napo' tee'ke tee biraanke masika'antavui Moosesi Iisipi'keta tenkenuu' avoroa' tee-koo daurarong bakaang iira-koo, ee'noko teke tee' nari' masikeevui otoko' Kumponing oo-paa' dutai oovuing-pina' otoi. <sup>28</sup> Ee'noko dama'ke napo' Kumponing tenkeng-antavuriaina' nauvuio' Moosesie masika'antavura tee Paroro Baari'koong~ nkovuu' erenge karanaang siinki-aama tee koosinung~ boo'koonge biurukaa' donkaang tutuna'nupoong kompuriaroo'naang Iisipi'nupoong biurukaa' besi'urima.

### Isireeli-nupoonge Mmau'ke Masika'antavaako'na'

<sup>29</sup> Napo' teing Isireeli-nupoonge naro'ke Kumponing barampurio' masika'antavai tee pirung miring Urung pako'au' kansi'pina' koverenoo'ke kato, teka teing Iisipi'kooning kare-nupoong bata'arima tee' nari' pako'koo paaravaama teke ke'nuru'ariru'.

<sup>30</sup> Napo' tee' nari' Kumponing botovuru'na' masika'antavai Jerikoo'nung parang~ ke'munta-taa doonge koroaio' pesi'aru'.

<sup>31</sup> Ee'noko tenie oranie Reeapi'ke tee', masika'antavura booaruu' teing ninka bakanariong Jerikoo'nupoong ninka taarapiikanuka ninka nari', teni domang-anta piavora tenaanka tapoka nkora Isireeli-koonaanka onkeonke'ureta pakuvuretu'noo'koo.

<sup>32</sup> Ee'noko aming kapoo' nii'nung minkuama'naang? Ai' bateinang baru' makotua' aing aa'ning minku-koong: Kidion, Barak, Samson, Jepta', Deevita' naanka ee'noko Samuela', ee'noko teing nii'ning nakaronupoong~ Kumponing bakaning. <sup>33</sup> Teinge Kumponing masika'antavaama dauraronanka mmau' de-petoaaru'nung, nantoong orenanka etuaarima koong-

antavaaru'. Kapoo' Kumponing teing-koo maraka-antavuu'ning kompau'. Laioni-nanka-koo karang avo'aaru'. <sup>34</sup> Teinge nta' karauviaana sirivaa'au'. Bainatu-koo i'ang-eta tampa' mmariau'. Bane aru-aru'nukai teka paaravaama teinge apoo'aariko'. Tavu'koo iirakutavariko' ee'noko damisimainku pia-tooronuka~ mmari'antavaariko'. <sup>35</sup> Nii'ning maniku' dotuariko' biikaning boorou'ning domampariko.

Ee'noko napo' nii'ning-koo teinge too'de-nupoonge oraka' nari' oto'koo etuaariko teing koonto' aroo'aria', teka baike tora'koo taura'pariko' boo'keta daa'arima tampa' ootoo'koo otoroaina' noru'ariri. <sup>36</sup> Teing-koo nii'ninge aing aa'ning tora'paako': akapeu', mura', dai'dovampaarima kiimatavaariko'. <sup>37</sup> Kapange too'paarima dupisi'aariko', soo'ke meu' ke'me'aariko', bainatu dovange dupisi'arima. Ata'aama sipisipi' dovang-koong mee'mee' dopa' kurumpariri nanaako'ning oraka' nkoaarima pore'antavaariko'. <sup>38</sup> Teing baru' aa'na' tampeng anke kansi'koo osika-iaang ninka nari' oto'koo, makotua'. Tee'koo avitoitoi nanaama aa'ning-koo otoroko': mee'bora' sirakamaa'koo, miinairu-koo, kumpenairu-koo ee'noko kuvinairu-koo anke kansi'koo.

<sup>39</sup> Teka bane teing baito-koo miring-po'nupoong, teka teinge tee nkavaava' ookara kapoo' Kumponing maraka-antavuu'nung. <sup>40</sup> Teka tee Kumponing tampa' masika' o'noriaina' uro'kanoo'ka noru'ui teinge tutung opai nka-koo taura'puriaruu' nii' ninka nari' nkavampiang deemparako.

### Iri' O'maria' O'noriaing Jiisuu' Narung-koo Noru' Sipampiri

**12** Bakei teing iri' oparia' Kumponing masika'antavaako'ning aa'na' karinga deemparirita' teing kamo' pankaing koromurimaung-pina' otorong. Tee'koo enang teing nii' iri'antamaarima tee' oomaari otomaung-pina' noru'ampira nii'ke tee ookara man-ki'nanka ee'noko oraka' nkonanka nii'koo na'nampari dai'muri otomaing sipampira danto nari' iri' o'maria' kua'mariaing tee-koo deikoo'koo Kumponing nii'koo uro'kanoo'ka miru'uu'nung-koo. <sup>2</sup> Otori Jiisuu' narung-koo ookiri otorimaatoai, ee'nara niikaang masika'anta okovenung ee'noko dupe-antai. Ai' tee tee dotuara-vaina' noru'ui avaru' tee sisikeera kune'koo aa'barata'koo; tee-koo maia'koo ampa'ou'; ee'noko enang tee Kumponing-koo tampavine-koo ba'nampari otong te' tanata nkoroma.

### Kumponing Manki' Amurimana' Nii' Koong-anta-koo

<sup>3</sup> Ee'nara ee' noru'eriaing: nantoonge orange tee oraka' nkoaako tee baka avaru' tee tora'koo, dii' tee' oraka' nkoraariko domang aruaru'doriaroo'naang. <sup>4</sup> Dii' orara aarumo dimpa'koo karirariko dupisi'daariainoo' mme' basiraria'. <sup>5</sup> Ee'noko dii' ampa'doru'ning tee' Kumponing puring-antaruri tautaururu'na' baurukaa' tanturi, Daari Meekunge aa'pumanoo'ka,

“Ee nnuring, Ovinge koong-antaruma kake'ii-antaruko tee tamunsi'nung-pina' noru'ema domang manki'doauka'. <sup>6</sup> Ai' Ovinge tee koong-antavuri-maung teing piaavurimaing, ee'noko kiimatavurikoo' ookara baurukaa' tampurimaing.”

(Mirumiru' 3:11,12)

<sup>7</sup> Tee'koo koong-anta-koo bakei taura'darimaatoai. Kumponingee tee baurukaa'pina' nkorurimaung, ai' baa tee tooto' baumai koong-antavuaung otong? <sup>8</sup> Dii' teie tee' koong-antaruraru' dei ookutuning koong-antavurimana' dii' teie baurukaa' masakeng deentariarupeu', tamung auning-kooning-pina' otoripeu'. <sup>9</sup> Napo' ee' noru'eriai, niunatakaampi paramaaru'ning otorong koong-antamaariko teing-koo aroo'marimaing, tee-koo Niuma-koo tanuaang-aapening-koo ee nii' deto basinoo' aroo'mariarupeu' domamura'naang? <sup>10</sup> Ai' teinge niunatakaampie tee batei oki'namu'koo oki'nareka' demariko koong-antamaarimaung teing-koo makosina', teka teie Kumponingee deto basinoo' tampa' o'noriaina' koong-antamurimaung baka makosi-antamurimana' nari' meekupoong o'norii'naang. <sup>11</sup> E'munung bateinang-koo ookara koong-antananka tee sisikeera-po'ning-pina' oro'paramang, tampa' dee'anta-pina' deea'. Teketa dama'ke koonto'nuka demarira unaamori o'noriaing nii' baremarimaung-koo.

#### Aa'na' Purimariri O'noriai Kumponing Bakaang Piaa Bei'bei'ampi'neenga

<sup>12</sup> Tee'koo Deto purintariai diikaang bireng aru-aru'nanka ee'noko miing tarua'nanka iveka'dariai. <sup>13</sup> Ee'noko tampa' koonto'navunge nanirimaatoai nii'ning dii'koo miing tarua'nuka apa'dekoari'neenga, teka unaavoroi otoroi.

<sup>14</sup> Ookara nantoong ninka mooa-koo oto'koo paararimaatoai ee'noko meeka'dariri oto'koo. Naning meeka'paravaunge tee Ovinge oovuarupeu'.

<sup>15</sup> Tarerariaing nii'nunge Kumponing bakaang piaa bekoi'u'neenga, nii'namurii' ovinge siompui. Tee' oro' naning tonto doparopa-po'nung-pina' dii'koo dupura orari-antaruri'neenga.

<sup>16</sup> Tarerariaing nii'nung naning maniku' ninka bakiaa' nkovu'neenga nii'noo' Kumponing noru'uaruu'neenga Iiso-pina', tee-pina' bakaang barenku meekung miru'nii' baavevuu'nuung-pina' duu-koo daang-koo.

<sup>17</sup> Ee'noko dii'ke noru'eri otong dama'ke nkoaru'na' tee biraanke barenku okovenung-pina' nka-koo piavoko Kumponingee tompimpui'. Taung paari-anta-koonaa' otoaruu' bane ta'due duu'paru' aa'na' besi'uma.

#### Nii' Teing Te' Jerusalema' Paning-koonoo' Tampoo' Morining

<sup>18</sup> Dii' teing miinani-koo kong-koo makosinoo' deea'noo' otoring tee' Isireeli-nupoong Sainai-namii-koo berou'na' aing aa'ning mantompaama: <sup>19</sup> nta' aa'na' urung, mutaanang tunumparavaung, doroviru, tuuviri-koong aurong, ee'noko Kumponing-nung kara-

koong aurong, ee'nung kara taaravaara avoreaama Moosesi nauau' bakearaa'naang, aa'puko,

<sup>20</sup> “Baa tee naning amii kompuko deeko' nantoonge kapange too'paama dupisi'aavaing, bane aremurii', kau' karenaumo deeko' dupisi'aavaing.”

(Toro 19:12,13)

<sup>21</sup> Aa'na' avo'avoro' oro'parako Moosesie aa'puu', “Ning aa'na' dankuranku'marama amoromaang.”

(Boto 9:19)

<sup>22</sup> Ee', dii' teing-pina' deea' kansi'koong-koo miinani-koo berou'ning-pina'; <sup>23</sup> Teka dii' meepo' masipo' Saioni-namii-koo po'na' porining, osi pankamono-koo Kumponing Domantoo' bakanamono-koo, te' Jerusalema' paning-koonamono-koo, aing aa'ning otoromana-mono-koo: <sup>24</sup> koosinunanka mmou' deeru-paa'nanka naro' uumunuariri~ aa'na' neranii'nanka; Kumponing baurukaa' kirokainku naro'ariri dootuu'arimaing, paning-koo miring daarinii'nuka; Kumponing Ee'nara Karasimpe' ookara biikaang; ee'noko teing nantoong tampeng dupe-antanii'nuka biikaning tanuaananka; ee'noko Jiisuu', tee Meu'nung nerakung kara naroong-anta-koong; ee'noko tee ereng meeka'anta-koo miranii'naru' nii' Kumponingee piaa-koong, Eebelo' bakaang ereng-pina' deea' mero' piavoma karou'naru'.

#### Teka Tamba' Taremariri O'noriai

<sup>25</sup> Ooveri kupi'doria' otoriaing taara-koo tee karo-matomaung. Tenang Kumponingee kansi'koonamii-eta' tautauvuriko kupi'orora kiimata-ita mmariaavaruna' ooverira noru'eraiing dii' bakei aa'na' mmari'koo makosinuka deea' tenang paning-eta' tautaururiko bei'bei'dariaing deeko'. <sup>26</sup> Bakaang auronge tee temu'nung batei-koo kansi' biru'uko', teka enang tee maraka-antavari otong ee' minkuvuma, “Napo' asi'namu'ke ninge dankampampaing kansi' narung deea', napo' paning tee' nari'ke, ookeng.”

(Aakai 2:6)

<sup>27</sup> Anaare karanaare aa'puinaare “Napo' asi'namu'ke” tenaare ee' miru'ari otong: Teie tee kapoo' dankampuaing tee paa'aravaing, teing tamung nkovuu'ning teie, teing kapoo' dankang-koo makosi deeaing bii'ka bire'ariri otoroaina'.

<sup>28</sup> Tee'koo nii'ke tampa' tampampimaatoaing tee paning muu' nkavampiru'nung-koo dankang-koo makosi deeaung; <sup>29</sup> Tee' nari' Kumponing-koo makosina' dootuu'marimatoaing mee'du'pimariri aa'na' amaa'mori, ai' niikaang Kumponing tee nta', ookara urusivumaung.

#### Nantoong Tamba' Nkoarampima Kumponing Dotu-antavampiai

<sup>13</sup> Dii' Karistoo'koo namaia' deentari' tee' nari' pi-aareeri otorimaatoai. <sup>2</sup> Nantoong damisimainku diikanairu-koo poroko bau'ererima teke aasi'anta-koo ampa'doriauka' ee' noru'erima nii'ninge tee tee' nkoarima koosinunanka bau'ariko' noru'aava'. <sup>3</sup> Teing kiimataroma otoroining domang dontong-anta-koo norunoru'ererimaatoai, dii' teing ninka nari' kiimatana-

va'koo otorining-pina' noru'darima. Ee'noko napo' teing nii'ninge oraka' nkoarimaing norunoru'ererimaatoai, dii' teing ninka narung mono-kooning tasi'dariri.

<sup>4</sup> Nampeesi tee tampa, oraka' minku-koong deea'. Tee' nari' tampa' tanatavampiang toto'pampia', ai' Kumponingee tee kiimatavuriaing teing bakiaa'ke otoromaing ee'noko nampeesi orariaakoo'.

<sup>5</sup> Oko'oko-koong aarumo dimpa'eri otomatoai ee'noko teing kapoo' ee'ning komperimaing dii'koo makosining-pina' noru'erimatoai, ai' Kumponingee tee aa'puu'nung,

"Ningee tee bakei si'dampiauka'. Ookara batei-koo pakurampiri tee' nari' o'nomatoaing."

(Boto 36:1)

<sup>6</sup> Tee'koo tasi'pampiri naruna' naruna' aa'pampimaung,

"Ovoring tee nkaang pakupaku, ning amorompauka', bane baie arekee' nkomuko."

(Kena 118:6,7)

### Maia'doria' Otoriaing Jiisuu' Siong-koo

<sup>7</sup> Teing diikaning urantananka Kumponing bakaang kara dii' naurariko'ning napo' noru'ereriai. Jiisuu'koo ima'ariri biikaang domang tampa' botu basiariru'na' norunoru'erira tee' nari' teinge masika'antavaako'na' paaraveri otoriai.

<sup>8</sup> Jiisuu' Karistoo' bakaang aarumo tee tee' nari' otomatoaing, aa'noko ke'maaki', e'mung, ee'noko ookara doong-koo. <sup>9</sup> Tee'koo amutemurii' dootuu'koong karai masikeng deeaingee avitoitoi baranturiauka', taamang tovang-kooningee. Dii' Kumponing bakaang piaae diikaang domang puring-anta-koo makosi, teinge taamang-koong botonankai nantoongee minkuaamaingee deea'. Nantoong teing siempaamaing pakuvuriarukoo'.

<sup>10</sup> Nii' teing paning-koo meepo' oto'memuring Kumponingee piaamuri otoko pakupaku nkavampimanoo' ee'noko teing teva dootuu'nava kaandesikoonava tarenuikai teka pakupaku nka-koo makosiaava'. <sup>11</sup> Biikaningee piristi' pankainankai Meepo'keta Aa'na' Meepo' ereng po'antavaako' orara aarumo tonta'koo, teka teinge kau' karenaumonanka biikaning mononanka ereng dakoarima tee-koo osi-koo taapo'ke tai-antavaariko'. <sup>12</sup> Ee'noko tee' nari' Jiisuu' osi pankamono-koo taapo'ka baike kune'uu' nantoong meeka'antavurii'naang baka bakaang erenge.

<sup>13</sup> Tee'koo nii' pankavitu-eta urikung aarumo tareamaing-eta taapo' tee-anko merira tee porepoore' tora'pampiang teie tora'puu'na'. <sup>14</sup> Ai' anke tee osi

pankamono tee' nari' dootuu' okora'ario' otoainamono oto'memuria' tero Jerusalema' noru'ampiko'na', teka nii'ke besi'ampiang temono osi pankamono dama'tavo'aravainamono. <sup>15</sup> Tee boontunang niikaang karange e'mung nkoampimatomaung tee sipampiau-ka'nung nii'ke, tee Kumponing-koo tampa' tang-koong bakaang Pako'pari'nii'ke, Karistoo'ke, tampa' nkomuru'nung-koo nii', bakaang miring sira'pampima.

<sup>16</sup> Teing kapoo' dii' oto'derurining tankaamperima kapoo' tampeng nko-koo si'dariauka'. Tee ee'nung temurii' boontunang Kumponing dotuaramaung.

### Kumponingee Taremurio' Tampa' O'norimaatoaing

<sup>17</sup> Teing urantananka biikaning kara siomperimatoai ee'noko teing-koo boong otorimaatoai, ai' dii' diikaang domang tee teinge tanatavai otong dama'ke Ovoringe simpe'uriko maku'aavaina' noru'ai. Teing taura'per-ereriko teinge dotuariri nkoaavaing, orarunsiaria'. Teing orarunsi-antavereriaing deeko' pakupaku-koo nkakiriauka'nung.

<sup>18</sup> Kungsi-koo pakumererimaatoaing, ai' nii'ke tee noru'ampiri otong domang kuaa'mori o'norina' ookara kapoo'koo tampaara aarumo narung nko-koo piamori.

<sup>19</sup> Ningee baru' aa'na' kontampiri si'damping tee' nari' kungsi-koo pakumerimatoo'naang dii'anko da'deng meaina'. <sup>20</sup> Teie Kumponingee niikaang Ovoring Jiisuu' boo'keta daa'uu' sipisipi'nanka tarenaa pankaing deemparaa'naang bakaang erenge kara naroong-anta o'paa' pinka'ura moo'muru'nung-koo; <sup>21</sup> Teie ee'narai Kumponingee mooa-po'nunge ookara kapoo'nanka tampeng bakaang pia siomperi nkoveriaing-koo aruriaing. Ee'noko tee ninka Jiisuu' Karistoo' ninka nii'koo mintoompama kapoo' dotu-antavaaing nkovuu'naang piamomaang meenasie araka ninka doong kante Jiisuu' okovui otomatoaina'. Tee' nari'.

### Kara Asiraning Si'noora'kooning

<sup>22</sup> Dii' mmaikori', ning enang dii'koo eentamara-maang dii'ke tampa' taaraverii'naang tee aung nkaang kara dii' daarireromping pakururiaing te' basinoo' baru' isipo' deea'. <sup>23</sup> Dii'ke noru'eriaing tee nii'maiko' Timoti tee bakearing kiimata-doma-ita. Ning-anko due'ka pora deeko' beero'darampee'naang nee'ke.

<sup>24</sup> Tampaara tamperiaing teing-koo diikaning urantanuka-koo, ee'noko teing ookara Kumponing bakaning. Teing Itali-nameensi'keta porou'ningee dii'koo tampaara tampaamaang. <sup>25</sup> Tee biraanke tee dii' ninka nari' otomatoaing. Ee', masikung.



# JEEMISI

## Kara Baavootunanka Ane'kooning

1:1 Parapaarananka Kune'ampira Kumponing-koo Ima'mariri Tampa' O'noriaina'  
 1:19 Nii'ke Kumponing-koo Aroo'marimainge Nantoong Tampa' Nkoarampiaing  
 5:7 Purimariri Kunsimariaing Ovoring Toroaravaina'mung Nempampima

### Parapaarananka Kune'ampira Kumponing-koo Ima'mariri Tampa' O'noriaina'

(1:1-18)

**1** Aung ane' karavoto~ ninge Jeemisie daariamang tee Kumponing ee'noko tee Jiisuu' Karistoo'daang beekaang botovotonaake. Tampa' tampamang dii'koo kivora-ita kenaanka muu' Isireeli-nupoong-koo avitoitoi purarenka'dariri otorimaing-koo.

#### Parapaarai Baito Purimarimaung Noru'ampima Keekoo'mariauka'

<sup>2</sup> Ee mmaikori', ni'ninka nari' Jiisuu'koo baitorari-maing, doturotutariri otorimaatoaing tenang kapoo' avutevu' parapaarananka kune'erima. <sup>3</sup> Ai' dii'ke tee noru'eri otong tenang diikaang masika'anta teie parapaarai paararuriko tee, da'deng apukaruu'kiria' otorimaatoai. <sup>4</sup> Ee'noko tee' pinka'dariri otorikotaa' koonto' ima'dariai Kumponing bakaang pia narung tampa' siomperima ookusii'eri, nii'noo' siperia'.

#### Naning Matau-koo Apuka'parara Deeko' Kunsiaravaing

<sup>5</sup> Dii'koo naning narung matau-koo apuka'parara tee Kumponing nia'uaing, tee ookara nantoong-koo avusiro', domang manki'oa', ee'noko teie avuaing tee. <sup>6</sup> Teka tee baito ninka eentavaravaing noru' keekoo'arava', ai' tee keeko'aramaung tee tee-pina' boo'a dovinge avitoitoi bereravumaung. <sup>7</sup> Teie naninge ee' noru'uai: Naning noru' kenaankai tee kapoo' nkavuarupeu' Ovoring-eta, bakaang aarumo ookara naro'ke pinka'aravaung deemparako.

#### Tautau Aa'ning-koo Kapoo'koo Apuka'parimaing Ee'noko Manearimaing

<sup>9</sup> Teing ata'oinku nii'maikorori' teing dotuariai Kumponing deto kompurimaung-koo. <sup>10</sup> Ee'noko teing nantoong mmou'po'nupoong tee dotuariai

Kumponingee doonko otoromanoo' tasi'antavuru'nung-koo, ai' teing tee-pina' kaakaa' napo' namu'ke boomaung. <sup>11</sup> Duaa' tee uipaarii' naapu ninka daa'aramaung ee'noko baa'nanka mara'antavukoo', napo' kaakaa'nanka dua'arikoo' ee'noko tampa' oro'noo' tenang paa'arakoo'. Tee' nari' napo' teing nantoong mmou' kavopo'nupoong paa'ariaing teing biikaning nko-nkonanka nkoaamaing.

#### Kumponingee Nii' Tampa' Nkomurimaung, Oraka' Nko-koo Baramuriaung

<sup>12</sup> Biraanke-nupoong teing nantoong parapaaranankai apukaruu'antavuriaung-koo, ai' te'mung ookara parapaarananka puru'aara teing tee biikaang moo' nkasiiaavaing, tee domang-anta Kumponingee maraka-antavuru'nung teing-koo tee pankaruntoom-paamaing-koo. <sup>13</sup> Tenang naninge parapaara kune'uma tosiarama aa'puauka', "Kumponingee orara nko-koo paaramumaang," ai' naninge Kumponing orara nko-koo paaravuarupeu' ee'noko teie baka naning tee' paaravuarupeu'. <sup>14</sup> Teka tee nantoonge kante-na' parapaara kune'aako teie biikaang karaa' orarai narunge teing tosivurima barampurikoo' orara aarumo nko-koo. <sup>15</sup> Teka tee karaa' domang-koo nare'ukotaa' oraka'nko basi-antavuu'naang, ee'noko teketa otokotaa' orara aarumo panka'parara boo' basiaraa'naang. <sup>16</sup> Ee mmaikori' piaarampimaing, tarerariai dii'ka tosiararima nii'na' noru'eri'neeng, ai' Kumponing tee orara nko-koo paaramuriaung. <sup>17</sup> Ookara kapoo' paning-eta pomaing teing tampeng naing, ee'noko ookara avuavu'nanka tampeng masakeng teing Kumponingee nii'koo depeto po'antavumaing tee Ookara Araka Okonara deempario'. Tee aampari'arava' araka narung naumurimaung. Mu-taananameng tee-koo otoa'. <sup>18</sup> Teie nii' baurukaa' deeng-antamuru' bakaang kara masakeng taara-antamurira. Baka piavora tee' nkomuru' nii' tutuna'nupoong o'norii'naang ookara bakaning nkoveru'nanka-koo.

## Nii'ke Kumponing-koo Aroo'marimainge Nantoong Tampa' Nkoarampiaing

(1:19-5:6)

### Kara Taaravampira Meumpampiaing

<sup>19</sup> Ee mmaikori' piaarampimaing, tee aung noru'eriaing: Ookara naruna' naruna' namu'ke kara taaraverimaatoai, teka maku'koo ee'noko iira-koo iri'naruntaria' otoai, <sup>20</sup> ai' naning bakaang iirai aarumo koonto' Kumponing bakaang narung tavo'antavuaung.

<sup>21</sup> Tee'koo teing aing aa'ning enang siperiai: aarumo ku'mi' ee'noko domang orarai maanto'ui oto'; ee'noko tee kara Kumponing bakaang dii'koo keempuko baroromperira aroo'eriai, tee tenaarei dii' domang-antakoo makosinaare.

<sup>22</sup> Tee kara tamung taaraverima tosirariauka', teka taaraverima nkoverimatoai. <sup>23</sup> Ai' dii'ke ampa'dori siomperiaung deeko' dii' teing tee-pina' naning bakaang oing oorara-koo oarama tenkenura namu'ke ampa'opeu' bakaang oing oro'oro'na'. <sup>25</sup> Teka tee Kumponing bakaang kara koonto' unaa-antakoong, ee'noko baa tee naning tee kara kuung oovumatoaing kapoo' nauvumaung nko-koo ampa'oa', teie tee bakaang nko-nko-koo kuunge biraanke nkavuaing.

<sup>26</sup> Naning dootuu'nung tamparama bakaang karang makosina' minkuvuaung tee, bakaang domang tosi-antavarapeu' ee'noko bakaang dootuu' daange. <sup>27</sup> Tee dootuu'koong aarumo kiiroraa' masikung ee'noko pituaravaung Niuma Kumponing-koo uro'kanoo'ke tee aung: Naning maantuaara' ee'noko teing naaroonku beero'urima pakuvurimatoai ee'noko naning baka tanatavari otoai kansii' bakaang aarumo orari-antavu'neeng-koo.

### Amutemurii'koo Tampa' Nari' Nkoarampima Siivenke'meeriauka'

**2** Ee mmaikori', niikaang Ovoring Jiisuu' tee ee'nara urikamu'keta Kumponing Pako'pari'nii' domamurira taremurainoo'koong, tee daurarong~ meenasi okora'. Tee' masika'antaveri otori nantoong daunaro' oovererima siivenke'eriai' otoriaing. <sup>2</sup> Aa'noko deeko', naning tampa' nepunepu'nii' diing tovang kooro-kooning kurunii' dootuu'nava-koo kuung poko, napo' naning ata'oi' nari' porepeu' te', mononopa' dere' kurunii'. <sup>3</sup> Ee'noko tenaanka-koo tee tampa' nepunepu'nii'koo doororaripeu' ee'noko mooni' mmau' dua'upeu'na noru'erima aa'peripeu', "Pinau, aa' pora tampa' ba'naniai," tee ata'oi' aa'perima, "A, duuku'darava' basi ba'naniai." <sup>4</sup> Tee' nkoverima nantoong tankaamperima makotua'na' simpe' nkonuka~ deeng-antararimaung daang matau oraka' siomperi siivenke'ererima. <sup>5</sup> Ee mmaikori', taameriai, nantoong kansii'nupoong ata'oi'nuka tampaarimaing bii'ka duuku'nuka deea', ai'

Kumponing teing miru'uru'nung tee-koo aa'na' baito-nii'nuka otoroo'naang ee'noko tee'koo bakaang muu' okovuriaing tee' maraka-antavuru'na' teing-koo tee pankaruntoompaamaing-koo. <sup>6</sup> Teka dii'ke tamunsi'nupoong tampereririkoo' teing ata'oi'nuka. Teka io' noru'eriai, teing mmau' kavopo'nupoong teing iki'antaraarimaing ee'noko diikaang komaaru~ namu'ke maku'eriaruko tuutunang~koo donkong-antaraarikoo'. <sup>7</sup> Ee'noko Jiisuu' bakaang miring pankaing akapeu'aakoo', tee miring dii' biraankerariru'nung.

<sup>8</sup> Daari Meekung-koo narung boto pankaing otong aa'pumaung,

"Dake tee naning da'koo due'nung daka piaararimana' nari' tee' piaaveaing."

(Boontu 19:18)

Tee tenaare makosina' dupe-antaverira deeko' tampa'.

<sup>9</sup> Teka siivenke' nkoveriaing deeko' tee dii' oraka' nkoraririning ee'noko teie botoi tompinturi otong tee toto'perining deentariko. <sup>10</sup> Ai' baa tee naning ootukunung boto tampa' siompuma nii'navu' toto'pura deeko' teie tee ootukunung boto nara'ka toto'puinung. <sup>11</sup> Tee ee'pina', Kumponing bakaang boto-koo nampeesi orarieauka'naare nanaare minkuvua', napo' naning tavema dupisi'eauka'naare minkuvuu'. Teka dake teing-koo aa'nopeu' nampeesi orariea' naning tavema dupisi'epeu', tee'koo da' tee boto toto' deentaring.

<sup>12</sup> Dii' teing Karistoo' bakaang boto-koo kuunge unaarori otorimaing, tee'koo tampa' karerima unaa-antareerimatoaing, ai' dii' teing teie botoi Karistoo' bakaange simpe'ruriaining. <sup>13</sup> Kumponing tee pi-aavuria' kiimatavuriaing teing nantoong paa oro'antavaavauka'ning. Teka paa oro'antavaako deeko' teie napo' piaavurira baari'antavuriaing kiimata-ita.

### Baito Nko-nko Ninkaing

<sup>14</sup> Ee mmaikori', naning aa'pui dei, "Ning masika'anta oto'memung," teka nko-nko otoa', tee-koong sinang aming? Temurii' masika'antai ee domang-antavupeu'?

<sup>15</sup> Nii'noo' naning narung Karistoo'koo nii'maiko' aa'ning-koo apuka'parako duaana-koo ee'noko taamang-koo, ee'noko dii'koo narunge tamung aa'pupeu' tee, "Pinau, bera duaanararavai ee'noko pooruai," teka kapoo' avua' tee mono-nameng-koo apuka'pari otoiing-koo, tee-koo aming basiarapeu'? <sup>17</sup> Tee'koo tee masika'anta nko-nko oto'evuaung tee boo'. <sup>18</sup> Naning aa'muko "Tamung masika'antavanko Kumponing domang-antamuaing," ninge aa'pampeu', "Aia' io' dakaang masika'anta nko-nkoropa baito masikung deeko' naumeai, ee'noko ninge nkaang masika'anta naurampai nkaang nko-nko-koo sira'pario'." <sup>19</sup> Dake tamung masika'antavei aa'pemaung, "Kumponing tee narung," teka temurii' masika'anta makosi deea'. Teinge ma'narie tee' nari' masika'antavai otorong, ee'noko Kumponing meumeevanuka tasi'pariri dankusi'kaamaunge kera'pariaina' noru'ai.

<sup>20</sup> Da' tee naning masika'anta-koo daunaa'anta oto'derung arekee', nau-antarama'naang piaromaang

tee temurii' masika'anta manta'paravaung tamung sinangropa? <sup>21</sup> Noru'ea' ee tee niuma Eebaraami' nko-nko-koo Kumponing naning koonto' tampuu'nung tenang tee bauring Aisake' boontunampuu'naang nkoaru' nang? <sup>22</sup> Ooveko teie nko-nkoi masika'anta dupe-antavura makosi-antavuu'. <sup>23</sup> Tee' meumpuio' tee Daari Meekung-koong kara dupearu' aa'pumaung, "Eebaraami'ke Kumponing masika'antavuiu' Kumponing naning koonto' tampuu'."

(Pupu' 15:6)

Ee'noko tee Kumponing bakaang navumai tampari otomaung. <sup>24</sup> Ooveko, naning tee nko-nko ninka nari' masika'antavuko deeko' Kumponing naning koonto' tampupeu', masika'anta narung-koo deea'. <sup>25</sup> Ee'noko napo' teni Reeapi, orani, tee' nari'ke, nko-nko ninka nari' masika'antavui tenaanka Kumponing bakanaan-ka botovotonaa'ka bokuvureta napo' beekaning kare-nupoong-koo koono-antavuresi mo'minge sivuresio' Kumponing koonto'nani tampuu'. <sup>26</sup> To'biiario' aa'pamaang, tee' nari' tee mono domaangropa tee boo' tee-pina' masika'anta tee'ke, nko-nkoropa tee boo'.

### Karang Tampa' Taremariaing

**3** Ee mmaikori', nantoong mmau' nau-antananka deeng-antarariauka', ai' dii'ke tee noru'eri otong nii' nau-antanuka teing deepo' simpe'muriaining. <sup>2</sup> Nii'ke ookarai amutemurii'ke beko'i'ampimaung kara sikuri'ke minkuampima, ee'noko nanginge karoma kapoo' orara minkuvuauka'nung deeko' tee tee naning koonto' masikung, bakaang mono ootukunung tampa' tareamaung. <sup>3</sup> Napo' tevoro' oosinavoro' deeko', nii'ke aini oki'navu' karang-koo dusi'ampiko tevoro'koo koinampira tee ootukunavoro' nii' piamorimana' nanukoo' tevu' beeto'ampima botoampipeu'nairue. <sup>4</sup> Napo' aarerinanka~ ooveriai, aa'na' pankenanka, pi-ong purinto'ke bii'urimaing, teing tee'ke, oki'naven-to'koo boo'e-navento'koo kaputeninukai koong-antavaario' nanaamaunge piavoromanoo'ke. <sup>5</sup> Napo' meneng tee'ke, tee oki'naa kapoo', teka kapoo' pankeng nkovuma daangamparapeu'. Pora' pankaing tee oki'namo'keta nta'ke taivumaung. <sup>6</sup> Tee meneng teie nta'ke. Kapoo' orarai maanto' mono-koo meu'ke otomaung. Teke otoi toko-ita doompeto ookara mono orari-antavukoo' paro'uma mosianung okora'ario'. <sup>7</sup> Ookara kapoo'nanka amutemurii' kau' karenaumo ee'noko barennanka napo' kakanaamaunanka ee'noko pirung-koonanka teing data-anta-koo makosi; data-antavaarimaung nantoonge. <sup>8</sup> Teka naning otoa' meneng data-antavupeu'nung, tee dooroompari oto' deeaung, orara, ee'noko boo'kooning doparopai maanto'ke. <sup>9</sup> Teie narunge menenge nii'ke Kumponing tee Niuma tampara tampampimaung ee'noko napo' teie narunge menenge nantoong barakosi'arampikoo', teing Kumponing-pina' oro'antavuri nkovuru'ning. <sup>10</sup> Teka tee narung karang-eta tampa' minkuampikoo'; napo' barakosi' minkuampikoo'. Ee mmaikori', tee' makosina' deea'. <sup>11</sup> Arekee' tee pu'anta, dinkung narinkung-eta ntong tarii' ee'noko ntong tokaa'

naro'ke bakoarepeu'? <sup>12</sup> Arekee', mmaikori', tuare-navari-koo ee mou-koong sinang bi'upeu'? Napo' mo'ming-naving-koo ee bia-namoni' teke bi'upeu'? Makotua'. Napo' pirung-eta ntong tarii' nke'koo makosi deea'.

### Mataumariri O'noriaing Boonko Noru'mariri Nantoong Pakuarampima

<sup>13</sup> Baa naning matau ee'noko norukasi' dii'koo? Makosi, tampa' otoi tee bakaang matau oro'an-tavuaing matauna' dooroompari tampa' nkovuma. <sup>14</sup> Teka diikaang domang-koo mamairo ee'noko pankaing-pina' noru' otoko deeko', dii' matau-po'nupoong-pina' daangantarima kara masikung daka'periauka'. <sup>15</sup> Tee' oro' noru'nanka teing paning-eta poa', teka teing aing kansi'kooning noru'; Tanuaang Meekung-etaning deea', Sietani'ketaning. <sup>16</sup> Ai' are' tokoo mamairo, baka-noru', ee'noko pankaing-pina' noru' oro'paravainoo'ke teke turang otong ee'noko amutemurii' oraka'nko otong. <sup>17</sup> Teka tee temurii' noru' matau paning-etaing tutuna' tee pituari oto' deeaung, teketa mooa-anta, banainge oto', noru' barorompari oto', piaae maanto', ee'noko nii'ning sinang tampeng, siivenke'ari noru' otoaruko, ampirinung dovang nari'. <sup>18</sup> Ee'noko teinge mooa nkonukai tee mooa-koong sinang keempaakotaa' tee koompari oto' sinang kavaavaing.

### Kansi'koong Aarumo Piamoriauka' O'oring-koo Turanii'nuka O'nori'neenga

**4** Aminankai tee tata' dovang turanturang, kare tavo'antavumaung dii'koo meu'ke? Tee aa' tee teinge diikaning karaa'ke naruna' naruna' domang manki'antaruriko kare basiaramaung. <sup>2</sup> Dii'ke karaa'eri-maing nka-koo makosiriaruma nii'ning mamairorari-ma dupisi'erererimaung. Napo' dii'ke nii'ning oto'evoromaing kong-koo kevi'erima tavu' tutumperi-maung pari'ererii'naang teing. Teka dii'ke nkaveriaung aa'noma: nii'ning Kumponing-koo eentarariaruma. <sup>3</sup> Ee'noko nii'ning bane nia'eriko Kumponing arurimaung tamung karakaraa'koo oto'derurii'naang piarorimaung-koo, Kumponing dotu-antana' noru'eriaruma. <sup>4</sup> Dii' bakei nampeesi orariaamaing-pina' makosinuka, ai' dii'ke Kumponing bakaning miru'nii'nukai kansi' bakaang aarumo karaa'erima Kumponing ninka aa'na' munte'nupoong deeng-antararimaung. Ee', baa tee naning kansi'aapening piaavuaing tee baka Kumponing ninka turani' deemparing. <sup>5</sup> Arekee' noru'erimang? Daari Meekunge ee daang minkuvuu' aa'puma, "Tee Tanuaang Meekung Kumponingee nii'koo otoo'naang amuru'nunge tee nii' karaa'muri pia-antamurimaung Kumponing-koo narung-koo aroo'mariri o'norii'naang." <sup>6</sup> Ee'noko Kumponingee tee' tampa' nkomurima teie napo' piaamuri bakanavung siong-koo pakumurimaung bakaning tampa' nkonanka-koo dau pau'ui. Tee'koo Daari Meekunge aa'pumaung,

“Kumponing turampurimaung teing baka daan-ganuka, ee'noko piaavuri pakuvurikoo' teing boonko noru'ariri otoromaing.”

(*Mirumiru' 3:34*)

<sup>7</sup> Tee'koo Kumponing-koo boonko otori tee Sietani' turamperimatoai dii'ankoita mmaruaina'. <sup>8</sup> Kumponing-koo due'antararai ee'noko tee Kumponing due'aravai dii'koo. Dii' oraka' nkorarimaing bere'darira tampa' nari' nkorarimatoaing, ee'noko dii' tumsi paakanuka noru' narung deentariri domang kiiroraa'po'nupoong otorimaatoai. <sup>9</sup> Orarunsirarima birontarimatoai diikaang oraka' nkonanka tasi'perima. Teing-koo benkeng siperi maia'doriai. Doturotu siperima napo' mi'miinkirorimatoai. <sup>10</sup> Ee'noko Ororing-koo tee' amaiaa'doriko teie deto i'anturiai.

#### Oraka' Minkumeeriauka'

<sup>11</sup> Ee mmaikori', dii'ka oraka' minkureeria' otoai. Baa tee naning ba'maiko' oraka' minkuvuma simpe'umaunge tee boto oraka' minkuvuma simpe'umaung. Teka dake tee boto simpe'eaing deeko' da' boto siong deea', da' makotua'na' boto simpe' deeng-antararamang. <sup>12</sup> Nii' narung daurarong~ boto amurimaung oto'memuring, ee'noko teie deeko' simpe'muriaing. Napo' teie deeko' makosi nantoong domang-anta-koo nii'noo' orari-anta-koo. Ai' da' Kumponing-pina' basi noru'darama ee tee' simpe'erimaunge nantoong?

#### Nii'ka Daangamariauka'

<sup>13</sup> Arerai da' aa'pemaatomaung, “E'mung nii'noo' tane' deeko' temono-ita temono-koo mee'naang ee'noko namare' teke o'noai baavenang-koo mooni' barampama.” <sup>14</sup> Dake aa' tane' noru'ea' dakaang ootoo'koo otoaina', ai' da' tee tee-pina' kamo' batei oki'namu'koo oro'parama namu'ke paa'aramaung-pina'. <sup>15</sup> Teka dake aa'pei dei makosi, “Ororing bakaang pia-koo deeko' nii' domamariri aunanka nkoarampiaing.” <sup>16</sup> Teka dii' ee' nkorarimaung, miring pankaintarima daangantarimaung. Tee tee' oro' baka daangang tee orara. <sup>17</sup> Tee'koo tee naning aarumo koonto' noru'ui, teka nkovua' otong, tee tee oraka' nkoaramang.

#### Kavo Mmau'po'nupoonge Moo' Orara Nkavaavaina'

<sup>5</sup> Enang ooveriko dii' kavo mmau'po'nupoong, enang bairarima birontariaing arikananka kune'eriaining-koo. <sup>2</sup> Ookara kapoo' diikaning teing dera'oroaining ee'noko diikaning mononopa'nanka pumpu'ke taiaavaininge. <sup>3</sup> Ee'noko diikaang koro ee'noko siliva'nanka takarau'oroaing, ee'noko teie takarau'noo'ke tee diikaang mosii' sira'duriko tora'kiri-aing nta'ke kate'during-pina'. Dii'ke tamung oosierimaung-koo teinankai tuumpiruriaing asi'namung Ovinge simpe' nkovuko. <sup>4</sup> Ooveriko, teing dii'koo mintooparimaing mintoong daaka'deraariko tosiererima moo' pinka'evurererikoo', ee'noko tee

ee'nara mooni' baku'erimaung Ovinge Iirakuta-koo punkang-koo biromparamang, teing kavu'nupoong biikaang biroving ninka. <sup>5</sup> Ee'noko dii' teing nantoong koonto'nuka tuutunampererima dupisi'erererimaing bii'ka avo'avo'daariaruko; <sup>6</sup> Anke kansi'koo otoritaa' tee dii' ookara kapoo'nanka piarorimaing oto'derurimaung, ee'noko teing-koo doturarima otorikoo' Ovinge tuutunaturima mosianung-aape botorurina'mung nemperi, pooro' pina' tamung doreng-antavarima te'mung domang tampe'aariaina'mung nempamana'.

#### Purimariri Kunsimariaing Ovinge Toroaravaina'mung Nempampima

(*5:7-20*)

#### Manki' Puru'ampiri Purimariai Ovinge Nempampima

<sup>7</sup> Tee'koo, ee mmaikori', teinge tee' oraka' nkoraariko mii'kiri otoriai poaina'mung nemperi. Ooverimang tee naning mintoong bauko sinang petaa'oainoo' nempui ka'duuri otomaung tee taamang tampara kansi'keta nkavuaina'mung noru'ui. Tutuntoma-ita bera o'domai basi tampa' tarevumaung. <sup>8</sup> Dii' tee'ke, ima'dariri ka'duurariri otorimaatoai, ai' Ovinge poaina'mung tee doong due'uing. <sup>9</sup> Minkuminkureeria' otoai, ee mmaikori', tuumpiruri'neenga. Ooveriko, tee Simpe'nko~ tee karanaang-koo donkonui otong. <sup>10</sup> Ee mmaikori', teing urikupoong nakaro-nupoong~ io' oovereriaing, tee Ovinge bakaang miring ninka kareaako'ning. Teinge arikung kune'aama ka'duuariri otoroko'na' tampa' tasi'perira siomperiaing. <sup>11</sup> Enang noru'ereriaing, teing turampaariko domang tampa' nari' otoroko'ning biraankenuka tamparampiaing. Narung tee Jop, bakaang domang maamuari otoko'na' taaraverimaunge amutemurii' manki'anta ninka, ee'noko tee' Ovinge tampa' botu basi-antavuu'na' tasi'peri otong. Teie Ovinge nii' napo' tee' nkomurimaung piaae maanto' deemparitaa'.

#### Marakamariauka'

<sup>12</sup> Ee mmaikori', ookara-koo dua ee' noru'eriai, o'nori marakamaria' otoai paning-aape ee'noko kansi'aape nii'noo' nii'ning kapoo' tampampima, teka masikung deeko' tamung “ee” tamperiai, ee'noko masikung deeaung deeko' tamung “a” tamperiai, tuumpi kune'eri'neenga.

#### Naning Koompari Otomaung Bakaang Kungsi Tee Purinto'

<sup>13</sup> Dii'koo nii'nung manki' kune'umaung deeko' kunsiaravaing. Napo' nii'nung domang kuaa'oi oto' otomaung deeko' Ovinge kenavuma daangampuaing. <sup>14</sup> Napo' dii'koo nii'nung siipavomaung deeko' dootuu'koo urantanuka-koo botoaravaing, ee'noko

teinge tee kunsiaavaing duunie sisi'aama Oving bakaang miring-koo. <sup>15</sup> Ee'noko baitoariri kunsiariko Ovinge domapura deto i'ampuai tee. Ee'noko orara nko-nko nkovuu'nung deeko' tonta'antavevuai. <sup>16</sup> Tee'koo diikaang oraka' nkonanka sirasira'darima-toai nii'ning dii'maikorori'koo. Ee'noko napo' kungsi-koo pakureerimaatoai taarevoroina'. Ai' tee kungsi naning koonto' bakaang tee aa'na' purinto'po'nung kapoo' nko-koo. <sup>17</sup> Eliasi tee naning tee' oro' nii'pina' bakaang aarumo, nii'na'mung tee aa'na' kunsiaru' apo'ua-roo'naang beenaumo mare'koo bera ~nau-taa kaara, ee'noko tee' nari' apo'uaruu' kansu'. <sup>18</sup> Teketa napo'

dama'ke kunsiaro' paning-eta apo' pou', ee'noko kansu'ke bakaning sinananka tavo'antavuru'.

#### Baa Tee Kumponing Bakanavung Sipupeu'nung Tee Napo' Bere'antavampiai

<sup>19</sup> Ee mmaikori', dii'koo narung tampara aarumo sipui poarako deeko', narunge koong-antavuaing tee. <sup>20</sup> Noru'eriaing, baa tee naning tee poaru'nung koong-antavuaing teie tee bakaang tanuaang boo'parapeu'noo'keta domampung. Bakaning mmau' orananka tonta'aravaing deeng-antavuing. Basi te'.

# 1 PIITA

## Kara Baavootunanka Ane'kooning

1:1 Nii' Kumponing Bakaning Deemarira Tampa' O'nori Nempampiaing

2:11 Nii'ka Koomariri O'noriaing Sirakura'

4:1 Purimariai Parapaara Pankaing Manki'antamuriko

### Nii' Kumponing Bakaning Deemarira Tampa' O'nori Nempampiaing

(1:1-2:10)

**1** Ninge Piitai teie Jiisuu' Karistoo'koong kara-okomui-nkai daarirerompimang dii' Kumponing bakaning miru'nisinuka-anko, damisimainku deentari rotorimaing anke kansikoo, Jerusalema'keta bata'daariko aa'nairu-koo otori: Poontusi, Kalesia, Kapadosia', Eesia ee'noko Bitinia. <sup>2</sup> Dii' teing Kumponing Niumai temu'keta tasi'durira miru'ruru'ning, ee'noko teie Tanuaang Meekunge meeka'antaruru', Jiisuu' Karistoo' meumperii'naang, ee'noko bakaang erenge kiiroraa' antarurii'naang. Biraanke ee'noko mooa dii'koo beremparavaing.

#### Paning-koo Maneena' O'noriaina'

<sup>3</sup> Biraankeampiai tee Kumponing, Bauma teie nikaang Oving Jiisuu' Karistoo'. Teie aa'na' piaamurira baurukaa' deeng-antamuri ponto'antamuru' nerakung domaang-koo domang purimariri nooruupiampii'naang maneena' o'noriaina'. <sup>4</sup> Teie tee, Jiisuu' boo'keta daa'antavuu'nooka tee' nkomuru', baurukaa'koong barenku kompampiaina' tasi'antamurima, tee ee'nung dera'paa', orariavaung ee'noko paa'aravaunge. Kumponing tee tampa' tarerururi otokoo' teka paning-koo. <sup>5</sup> Ee'noko masika'antaveriko teie bakaang iri'ke dii' napo' tarerurimatoo'naang bera tee domaang otoi-oto' oko-antaruriainoo'ke basi. Aa'nung neriar otomaung Kumponing sira'koo te'mung asi'na'mung sirakura' oko-antamurira. <sup>6</sup> Tee'koo doturotaririri otoriaing tee doturotu pankaing dama'nung noru'eri bane parapaara arikananka kune'erima anke kansikoo. <sup>7</sup> Teing arikananka teing diikaang masika'anta paara-kooning, dii' diikaang baito taa'ni'poi otoaing deeko'. Koro tee paa'koo makosi bane nta'ke ivai'uma paara-antavaa-

maunge tee taa'ni'anta-koo, teka diikaang masika'anta koro-koo dau basinoo' tampara Kumponing-koo, ee'noko tee'koo teie parapaarai nta'pina' paararuriko diikaang baito taa'ni'poi otoaing deeko' tee aa'noaing: daangang, meenasi ee'noko miring pankaing aruriaing Jiisuu' Karistoo' toroaravaina'mung.

<sup>8</sup> Dii'ke tee, bane ooveriaruko'nunge, nka pankaruntomperimaung tee. Napo' tee'ke enang ooveria' otoring tee, teka masika'antaveri otong ee'noko karange minku-paa'na' deto doturarima doturotarimaung.

<sup>9</sup> Ai' dii' teing tee kapoo' Jiisuu'koo baitorarima piarorimaung nkaverimaing, tee tee diikaang uraang~koong domang-anta.

<sup>10</sup> Tee domang-anta tee, teinge nakaro-nupoonge~ urikupoonge Kumponing avusiro'ari biraankemuriana' naumaariko'ninge tampa' tasi'koo eentavarima besi'aako'. <sup>11</sup> Tanuaang Meekunge Karistoo'ketaing ee'nara baikearara ee'noko dama'ke meenasi nkavuaina' sira'puma karantavuriko~ bateingang ee'noko naninoo' noru'koo piavoroko'. <sup>12</sup> Teka Kumponing nauvuru' tavo'kuaroo'naang tenang teing otoroko, teka dama'ke, enang-pina' dii' otorimaatomanang makosinang. Ee'noko enang Kumponing tee Tanuaang Meekung paning-eta botovuo' pakuvuriko nii'ninge tee doorenang tampara sira'paama naurarieeng, teing nakaro-nupoong bikaang minkunaa ninka manta'pai. Aing teing, bakei, koosinunankai aa'na' tampa' oo-koo piavorokoo'.

#### Kumponing Bokumuri Miru'muru'na' Bakaning Meekupoong O'norii'naang

<sup>13</sup> Tee'koo diikaang onou maamurariri otoriaing Kumponing dotu-antaveriaina' besi'eri, tareriritaa', te'mung Jiisuu' Karistoo' sira'pari poaina'mung Kumponing avusiro'ari biraankemuriaing tee narung nooruupieri. <sup>14</sup> Ee'noko Kumponing baurukaa' kara sionuka deentari tee aarumo mono bakaang pia siong tero amakoririri nkorariko'nung nkoveriauka'. <sup>15</sup> Teka tee' ee'na' tee ee'nara dii' bokururu'nung meeka'pari otomana' nari' dii' meeka'dariri otoriaing

ookara nkoveriaining-koo. <sup>16</sup> Tee' Daari Meekung-koo Kumponing aa'pumana'koo,  
"Dii' meeka'dariri otoriaing, ai' ning tee meekung."

(Boontu 11:44)

### Moo' Bakei Pankainge Moo'muru'na' Kumponing

<sup>17</sup> Kumponing Diuna tamperima tee tanatarariaing, ai' tee tee ee'nara Kumponing Simpe'nko~ ookara-koo biikaang nko-nkonanka-koo makosina', bane aremurii' naning. Aing batei-koo ootukuning-koo damisimain-oo'ke otorimaing-koo diikaang aarumo koontariri otoriaing tee-koo meerupirari. <sup>18</sup> Dii'ke noru'eriaing dii' teing napo' moo'duru'ning tevung-eta tampoo' be'koo kaari'dariko'navung-eta diikakatauro biikaang minkunaa sintokosintoi-koong siomperiko, ee'noko tamung moo'duria' kapoo'ke orariamaing-pina' oro'ke, aa'noko koro ee'noko siliva'. <sup>19</sup> Teka teie erenge maku'paa' Jiisuu' Karistoo'koonge moo'duru' teu kampilanu oroo'dopanuu kiiroraa'nu ereng parekavaako'nu-pina' nari' miru'ari. <sup>20</sup> Tee tee temu'keta miru'nii' kansi' pupu'aravaruko-ita, teka teie Kumponing oro'antavuu' tenang tee-koo batei-koo asi'noo'ke dii' paku-koo. <sup>21</sup> Tee-koo ee'nung-koo dii'ke Kumponing masika'antaverimaung, tee aa'nung tee Jiisuu' boo'keta daa'antavura meenasi avuu'. Tee'koo diikaang masika'anta ee'noko nenneng Kumponing-koo otoaing.

### Nii'maikorori' Aa'na' Masika' Piaavarampia

<sup>22</sup> Enang tee dii' tee kara masikung siomperira diikaang domang tee kiiroraa'dariring ee'noko dii' piaa masikung ninka piaareeri otoring. Tee'koo naruna' naruna' aa'na' piaareeriai diikaang domang-eta namaia'pina'. <sup>23</sup> Dii' teing neraka'daririning, tee booaunka'nung-eta ponto'dariru'ning, booaing-eta deea', teka teieta Kumponing bakaang kara-ita domampari oto'keta. <sup>24</sup> Daari Meekunge aa'pumana',  
"Ookara nantoong biikaang domaang tee baa' pina' namu'ke boo', ee'noko biikaang meenasi tee iioo' pina' namu'ke mara'oma tankavarakoo', teka tee Kumponing bakaang kara tee tee' nari' otomatoaing."

(Aisaia' 40:6-8)

<sup>25</sup> Tee aung kara tee ee'nung doorenang tampara dii'koo daankiampimaung.

### Ovoring Tee Boia' Domantoo' Makosi

**2** Tee'koo dii'ke taapo' tonta'eriaing teing aing aa'ning: too'deng, tostitosi, kara narunge navu, mamairo ee'noko amutemurii' miring orari-anta. <sup>2</sup> Teka dii' aa'na' peera-antarariaing tee-koo kara-koo pituaravaung-koo nerakau'nuka noonoo'koo narung-koo peeravoromana', tee dii' panka'antaruriaing diikaang nerakung domaang-koo makosina'. <sup>3</sup> Ai' teie domang-antaruriko dii'ke tee Ovoring tampa' mantomperu'nung. <sup>4</sup> Tee-anko pori otomatoaing tee ee'nara boia' domantoo'anko nantoonge tompimpau'nung-anko, teka Kumponing-koo dutakanoo'ka

tee miru'nisi ee'noko domange dai'. <sup>5</sup> Ee'noko dii' tee'ke tee-pina' kapang domantoo'nuka otoriaing tanuaang-aapenava pava-koo tee ninka nari' kanirariri meeka'nisinuka piristi'navitu deentariri tee' tanuaang-aapena' boontunantarima Kumponing dotu-antaveri-aina' Jiisuu' Karistoo'koo kuunge. <sup>6</sup> Ai' Daari Meekunge ee' minkuvui otong,

"Ee aing, Saioni-namono-koo tee boia' domantoo' e'maniang tumanung bempansing, tere' ee'nare' kunku'doi'koo miru'nisi-nare' ee'noko maku'paa'nare'ke, ee'noko baa tee naning tee masika'antavaing tee maia'anta-koong deea'."

(Aisaia' 28:16)

<sup>7</sup> Dii'koo ee'ning-koo tee, Jiisuu' Karistoo', masika'antaverimaing-koo tee ee'nara domange dai' ee'noko maku'paa', teka teing-koo tee masika'antavaing-koo tee tee maia'anta, tee' Daari Meekunge aa'pumana',

"Tere' ee'nare' kapanare' pava kaninukai poore'aama dua'au'nare' ookutunava-koo e'manianare' tumanare' deempario' tasi'pau' dama'ke."

(Kena 118:22)

<sup>8</sup> Ee'noko

"Tere' tere' ee'nare' nantoong tupang-antavurira dua'antavuriainare' teing."

(Aisaia' 8:14)

Teing tupampariainoo' tee teinge kara meumpaavaung-koo tee', teing tee' oro'nuka dua'koo miru'uru'na'. <sup>9</sup> Teka dii' teing ee'ning Dauraronge~ miru'nii'nuka piristi'koo, meekavitu, Kumponing baka bakanupoong, dii'ke kapoo' bakaang nko-nkonanka tampeng sira'antaevurimatoaining, tee ee'nara dii' mutaanang-eta bokururira bakaang araka ta'nimpaarii'aape si'duru'. <sup>10</sup> Tero tee dii' nantoong deeaing, teka enang tee dii' teing Kumponing bakaning nantoong deentaririning. Tenang ee'hang tee Kumponing bakaang piaa komperiaruko'ning, teka enang komperi otong tee piaa.

### Koomariri O'noriaing Sirakura'

(2:11-3:22)

### Kumponing Bakaang Botovotonaa'nuka Makosina' O'noriaing

<sup>11</sup> Ee mmaikori', dii' teing tavora-nupoong ee'noko damisimainku-pina' anke kansi'koo otoriko ninge eturampiri aa'dampimang: Donta'dariri otoriai mono-aapening piananka-ita teing dii' domang turanturi otorimaing-eta. <sup>12</sup> Mutaanang-nupoong-ankoi tampa' mataurariri otorimaatoai ee'noko oraka' nkonuka tantaariaing deeko' tenang Kumponing kansi' beero'uainang diikaang nko-nko tampara tasi'paara Kumponing daangampaavaing teinge.

<sup>13</sup> Ookara-koo teing-koo nantoong-koo pankenanka-koo boong otorimaatoai Kumponing dotu-an-

taverii'naang, aa'noko tee daurarong, ee'noko teing ovo'ma'nuka, <sup>14</sup> ai' teing teing Kumponing botovuru'ning oreng mero'arima ee'noko tampeng daangampaarii'naang. <sup>15</sup> Ai' Kumponing bakaang pia tee ee' otong': Dii'ke tampa'nkoi dooroong-antaveriaing teing mutaanang-nupoong kara tamunsi'nung minkuaamaing. <sup>16</sup> Masika' dii' Moosesi bakaang botoi dai'daria' otong, teka ninge aa'dampimang dii'ke kapoo' orara nkoveriauka' dakaraka'peri aa'perima, "Karistoo'ke Moosesi bakaang boto-ita unaa-antamui'ning taura'mari o'nong." A, tee' deea'. Karistoo'ke unaa-antamuru'nung nii'ke kapoo' tampeng naing nkoampii'naang. Kumponing bakaning botovoton-aa'nuka makosina' otorimaatoaing. <sup>17</sup> Nantoong ookara makosina' deto basi-antavererimaatoai. Teing Karistoo'koo dii'marang piaaverererimaatoai. Kumponing-koo aa'na' amaiaa'dori otoriai, ee'noko kansi'koong daurarong deto basi-antaverimatoai.

### Sisikeera Tora'koo Taura'mariaing Karistoo' Bakaang Aarumo Siompampiri

<sup>18</sup> Dii' bautaranuka diikaning pankeng tanataraari-maing-ankoi boong-koo otorimaatoai teing pankaing-antaverereri, tampa' nkoraarimaing naing-koo deea', teka teing oraka' nkoraarimaing-koo nari'. <sup>19</sup> Naning tamung sisikeera-antavaako taura'paravaing deeko' Kumponing dotu-anta-koo noru'ui, Kumponing tee biraankevuaing tee. <sup>20</sup> Moo' aming nkaveriaing kapoo' orara nkoveriko mura'daariko taura'dariaing deeko'? Tek a kapoo' tampara nkoverima baike kune'erii'naang dooroontariri otoriaing deeko' Kumponing bi-raankeruriaing tee-koo. <sup>21</sup> Ai' dii' teing tee'koo Kumponing bokururu'ning. Karistoo' tee dii'koo baike kune'uu'nung dii' tee' nari' tee siomperi nkorarii'naang nau-antarurima. <sup>22</sup> Teie tee oraka'nko nkovua', bakaang be'duu'koo tosi minkuvuko taaravaava'. <sup>23</sup> Tenang teinge tee poore'aako teie tee teing poore'uria' maku'koo. Sisikeera napo' tora'pura mau'uria' teing, teka tee Kumponing-koo baka aroo'aru' koonto'na' simpe'nko~ noru'ui. <sup>24</sup> Teie tee baka bakaang monoi ookara oraka' nkonanka nkavuu' teka aa'barata'koo, nii' tee-koo oraka' nko-koo moom-pira tee-koo aarumo koonto' narung-koo domamariri o'norii'naang. Dii' teing teie dato'nankai tee-koonge unaa-antarurining. <sup>25</sup> Ai' dii' teing poorariru'ning sipisipi'pina', teka enang tororaririning tee-anko diikaang tanuaang sipisipi'pina' tanatarurimaung-anko.

### Nii' Nampeesinii'nuka Tampara Aarumo Ninka O'nori-aina'

**3** Dii' maniku' tee'ke, dii'unkaampi-koo boong otorimaatoaing ee'noko teing-koo nii'ning Kumponing bakaang kara siompaavaing deeko' teie tampara aarumoi dii' bii'anakaampi diikaange Kumponing-aape barampereriaing, karai deea'. <sup>2</sup> Tenang teinge ooaama tee diikaang mee'du'piari nari' oto' teing bere'ariaing. <sup>3</sup> Diikaang tampa' oro'na' mono-koo

dama'dunoo' deemparavauka' tampa' simpidovantari-ma diikaning dapoo ee'noko kapoo' tampeng kooro dovang-kooning si'darima napo' mononopa' tampa' oro' kuruntarima. <sup>4</sup> Tek a nepunepu' diikaang tee tee-koo naning-koo domang-koo kuung otoai teing ninka kapoo' aarumo tampeng paa'koo makosi deeaing ninka aa'ning ninka: banainge oto' ee'noko domang dooroonto'. Aing teing ee'ning Kumponing-koo dutakanoo'ke bakei dakausi' masikeng. <sup>5</sup> Tee' nari' otorimaatoaing teing temu'nupoong maniku' meekupoong Kumponing-koo baitoariko'ning nepu'ariko'na' bii'un-kaampi-koo boong otoroi. <sup>6</sup> Tee' ee'na' Seera'ke Ee-baraaami' kara taaravuma siompuko'na' ovoring tampa'na tee. Ee'noko dii' teing ee'ning teni baurukaa' dii'ke tampa' nkorarimatoaing deeko' baru' aroreria' otoroi.

<sup>7</sup> Napo' tee' nari' dii' bii'unkaampi teing ninka dii'anakaampi ninka mataurariri otorimaatoai makosina' deto deeng-antavereri teing baru' iri'oroaing deempariko, ai' teing teinge dii' ninka nari' tee barenku okovuriaining biraankerurira domang-antaruriaing-koo. Tee' nkorariaing diikaang kungsi avo'ar-avaroo'naang.

### Doong Kante Teing Nii'ning Nantoong Tamba' Nkoarampimaatoaing

<sup>8</sup> Tee-koo asi'noo'ke aa'dampimang: Dii' ookara nari' marireeri otorimaatoaing, nari' mantonteeri nama-ia'pina' mantontariri tampa' domang piaareerima ee'noko doonko noru'dariri. <sup>9</sup> Orara orarai maku'eriauka', barakosi' barakosi'ke maku'eriauka', teka aampari'eri biraanke-antareerimaatoai, ai' dii' teing tee' nko-koo bokururu'ning dii'ke bakaang biraanke nkaverii'naang. <sup>10</sup> Tee' Daari Meekunge aa'pumana', "Baa tee naning domampari oto'koo piavoi oting doong tampeng oovuu'naang piavora, tee oraka' karoauka' ee'noko teie tee daang minkuvuauka'. <sup>11</sup> Ee'noko oraka' nko-eta bere'arara tampa'nko nkovuaing, ee'noko teie tee mooa besi'uma siompui otoaing. <sup>12</sup> Ai' teie Ovoringe teing koonto'nuka tampa' oovuri tarevurimaung ee'noko bakaang punkaa' tee daate'ari otomaung teing biikaang kungsi tampa' taara-koo. Tek a Ovoring bakaang oing tee teing-eta kapoo' orara nkoaamaing-eta munte'uri ako' toroari otong."

(Kena 34:12-16)

### Tampa' Nkoarampiko Sisikeera Tora'antamaariko Deeko' Makosi

<sup>13</sup> Dii' enang baie baikerurii'naang dii' kapoo' tampara narung siomperimaing deeko'? <sup>14</sup> Tek a bane kapoo' tampara nkoverima baike kune'eriaing deeko' dii' teing Kumponing tee-koo biraankeruriaing. Tee' Daari Meekunge aa'pumana', "Nantoonge mau'daariko arorerima domang man-ki'doriauka'."

(Aisaia' 8:12)

<sup>15</sup> Tek a diikaang domange Karistoo' pankaing-antaveri otorimaatoai diikaang Ovoring deeng-antaveri.



Ookara batei-koo maamurariri otorimaatoai nantoong nia'daariaining nauereriaina' okora'noo' dii'ke tee Oving bokururiaing nemperi otorimaung-koo, teka dooroontariri doonko noru'dariri tee' nauereriai.

<sup>16</sup> Ee'noko tareririri otoriai diikaang domang kiiroraari oto'koo teing diikaang tampara aarumo Karistoo'koo kuunge nkoverimaung oraka' minkuaamaing maia'oroaina' tee' nkoraarimaung-koo. <sup>17</sup> Kapoo' tampara nkoverima baike Kumponing taura'puing kune'koo tee tampa', teka kapoo' orara nkoverima deeko' oraka'. <sup>18</sup> Ai' Karistoo' tee tee' nari' bou' nantoong biikaang oraka' nkonanka-koo. Terong-koo ookara daka'pui namu'ke pareka bakevuu', tee ee'nara koonto' deemparitaa' nii' koonto'nuka deeaing Kumponing-koo tavo'murii'naang teie. Mono nameng dupisi'ao' tee' boo'paru', teka Kumponing bakaang Tanuaange daa'uo' domampari otong.

<sup>19</sup> Tenang bakaang mono boo'pari otoko tanuaang-naung tee boo'nuka-koo daankiaru' kiimatanoo'ke. <sup>20</sup> Aing teing ee'ning tanuaananka nantoong urikupoong-kooning Kumponing taaravaavarukoning, teing bere'arii'naang Kumponing pankaroong nempuriko'ning tenang Nooa'ke tee aaka'nareng ta'nampuko'ning. Teka oki'ning nantoong ~beenau-mo-taa naing aareri'koo ntong-koo daue otorou'ning domampariru'. <sup>21</sup> Ntonge aareri-koo kuung otoroko tampoo'aape domampariainoo' taa'bakavuru'na' nii' tee' nari' kompampima Karistoo'koo kuung o'nori domampariainoo' basimarii'naang bakaang iri'ke boo'keta daa'antavuu'nunge pakumuriko. Tee tee ntong-koo minkie meeka'anta nkavampimaung ku'mi' mono-ita kui-anta-koong deea' Kumponing tampeng-pina' oomurii'naang, teka tee domang kiirora'keta maraka-anta Kumponing-koo Karistoo' baitoampiri nari' oto'koong teie domang-antamurii'naang. <sup>22</sup> Tee tee ee'nara boo'keta daa'arara paning-koo deto bera Kumponing-koo tampavine-koo otomaung, ookara kapoo'koo dau, aa'ning-koo: koosinunanka, arekee' oro'ning ovontung ee'noko iri'po'nupoong.

### Purimariai Parapaara Pankaing Manki'antamuriko

#### Urikung Onou Sipampiaing Orara Aarumo Nari'

<sup>4</sup> Enang tee, Karistoo'ke bakaang monoi baike tora'puu'nung-koo dii' tee' nari' uro'kanoo'ka purintariri aroo'dariaing temurii' baike kune'koo, ai' baa tee naning baike kune'uma tee tee enang oraka' nko-ita bakearing. <sup>2</sup> Tee tee enang bakaang mono ninka domampari otoi emu'keta deto mono bakaang pia siompuauka', teka Kumponing bakaang pia siompuaing. <sup>3</sup> Tee tee dii'ke teing-pina' nari' mutaanang-nupoong piavoromana' aing aa'ning nkoveriauka' temu' nkoveriko'na': maimaia'na' oto', mono bakaang pia siong, purinto' naru'ke kanu'anta, taamang tovang nainai nai-koo deikoo', ee'noko daang-koong dootuu', tee maarekusi'. Batei temurii' nko-koo tero tankinuing

botu te'. <sup>4</sup> Teing teing enang ta'nimparirining dii' teing ninka nari' tapo'dariaruio' tamung iri' o'anta-koo, ee'noko oraka' minkuraarikoo'. <sup>5</sup> Teka teinge tee teka dama' toosiaavaing Kumponing ninka ookara nantoong simpe'koo maamuari oting ninka: boo'nuka ee'noko domantoo'nuka nari'. <sup>6</sup> Ai' teie Kumponing teing temu' boorou'ning tee' nari' tampara doorenang taara-antavuru' teing teing biikaang tanuaang domampariri otoroo'naang Kumponing domampari otomana' nari'. Ookara nantoong ninka nari' biikaang mono boo'koo barakosi'nii'nuka deempariko teie tee daankinang taara-antavuru'nung.

### Teing Avuavu' Kumponing-etaing Kompampiri Tampa' Mintoomariaing

<sup>7</sup> Ookara kapoo'nanka aung kansi'koonanka o'doma due'umaang. Tee'koo mataurariri tareririri otoriaing tampa' kunsirariaina'. <sup>8</sup> Ookara-koo daua naruna' naruna' diikaang domang-eta tampa' piaareeri otorimaatoai, ai' nii'ke nantoong piaavarampima deeko' biikaang oraka' nkonanka mmou' daka'pampipeu'. <sup>9</sup> Diikaning pavananka-koo tampa' onkeonke'deerimaatoaing baru' pore'pina' noru'erima munkumunkureeria'. <sup>10</sup> Kumponing avuavu' naruna' naruna' aruru'na' makosina' komperi pakureerimaatoai. Tee'koo dii' teing kapoo' amutemurii' Kumponing aruru'ning tampeng tare-nupoong deentariaing. <sup>11</sup> Kara sira'perima deeko' tee' Kumponing naururiaina' masika' sira'periai. Nantoong pakuererima deeko' Kumponing iri' arurimana' siomperi pakuereriai, ookara-koo kapoo' nanka-koo Kumponing pankaimparavaina' Jiisuu' Karistoo'koo kuunge. Miring ee'noko meenasi pankaing okovui otomatoaing ookutunung batei-koo o'domaropa-koo. Ee', masikung.

<sup>12</sup> Ee maikori', ta'niniriauka' dii' tee-koo nta'pina' mantong-koo parapaara-koo dii'koo poing-koo paararurima. Tee kapoo' ta'nimpaarii'pina' noru'eriau-ka'. <sup>13</sup> Teka baru'noo' doturariaing dii'ke Karistoo' siomperima arikung kune'uu'na' nari', ee' noru'erima tee' nkomarimaung-koo dotumariaing tenang tee bakaang meenasi oro'paravainang.

### Nii' Dotumariaing Makosi Sisikeera Tora'pampira Karistoo'ke Tora'puu'na'

<sup>14</sup> Karistoo'nung miring komperimaung-koo oraka' minkuraariko tee doturariaing, ai' tee' minkuraarima sira'paamaung tee Tanuaang Meekung Kumponing bakaang meenasi-po'nung dii'koo otomaung. <sup>15</sup> Teka dii' orara aarumo siomperi sisikeerang-antarariko taara-koo bakei piamaa' aing ee' oro' nkoverima: dupisi'anta, bakiaa'nko, oraka'nko, nii'noo' kakarua'dorima. <sup>16</sup> Teka Karistoo'koo kuung otoritaa' baike kune'erima maia'doria' Kumponing pankaing-antaveriaing Karistoo' bakaang miring komperimaung-koo. <sup>17</sup> Ai' batei tee poi otong teie bakanava'kooning paara-anta-koong. Ee'noko nii'keta tutumparavaing deeko' teing Kumponing bakaang doorenang tampara

siompaava' otomaing are'ke botu deempariaing?

<sup>18</sup> Tee' Daari Meekunge aa'pumana',

“Teing koonto'nuka kakaue domampariaing deeko', teing nantoong oreng Kumponing piavoroing are'ke oro'pariaing?”

(*Mirumiru' 11:21*)

<sup>19</sup> Tee'koo teing nantoong Kumponing bakaang pia-koo otoroi baike kune'aavaining, makosi tampa' nari' nkoaamatoaing bii'ka avariri tee-koo teing nkovuru'nung bakaang tare-koo, biikaang tarenara mutekaro' masika'antavai.

#### Teinge Dootuu'koo Pankenge Tampa' Tanatavaariai Kumponing Bakanaving

**5** Tee'koo dii' dootuu'koo urantanuka tasi'antampimang nkorariaina' ninge dii' ninka nari' oro'ke dootuu'koo urantai, ninge ee'nara Karistoo' bakaang baike koonto' ooamira sira'pamaunge, ee'noko napo' tee' nari' dii' ninka kompampainge tee meenasi Karistoo' bakaang oro'antavuainang.

<sup>2</sup> Aa'dampimang; Kumponing bakanavitu tampa' tanatavereremaatoai teing dii'ke tanata-koo si'duru'ning, tamung konteroritaa' deea', teka pia-ita nkoveriai Kumponing piavomana'. Moo' narung noru'eri tanataverereriauka', teka aroo'keta tanataverereriai. <sup>3</sup> Apoapoo'erereriauka' teing tanatavereremaing teka tampa' ooraari siontaariaina' nkorariai.

<sup>4</sup> Ee'noko tenang tee Tanatanara Pankaing oro'paravainang dii'ke moo' tee meenasi-po'nung paa'aravauka'nung nkaveriaing. <sup>5</sup> Ee'noko dii' napo' nemiaa' teie diikaning urantanuka-koo boong otorimaatoai amaa'dori dii'ka-koo meu'ke, ai' Daari Meekunge ee' minkuvui otong:

Kumponing tee teing bii'ka daangamparimaing too'dempurima teing boonko noru'arimaing avusiro'ari pakuvurikoo'.

(*Mirumiru' 3:34*)

#### Boonkomariri o'norimaatoai Kumponing Bakaang Tankakoo O'nori

<sup>6</sup> Boonkorariri otorimaatoai dii'ka-koo tee-koo Kumponing-koo tanka' purinto'koo kuung otori, tee batei makotuko tee deto si'duriaing dii'. <sup>7</sup> Diikaang ookara manki'nanka tee narung-koo siperimaatoai, ai' dii' teing teie piaruri tanataruri otong. <sup>8</sup> Teka tanatarariri ee'noko tarerariri otorimaatoai. Tee diikaang karenung Sietani' tee laioni-pina' kururu'kuma avitoitoi nanumaung besi'uma naning avoro'antavura dunkumpuaing. <sup>9</sup> Tanka'ni'periai tee diikaang masika'anta-koo e'maniri, ee' noru'erima Karistoo'koo nii'maikorori' tee' nari' sisikeera kune'aama Sietani' bakaang avoro'anta dimpa'aakoo'. <sup>10</sup> A'noo' oki'ning batei-koo sisikeera tora'periaing. Teketa teie Kumponing paa baukoi baka unaa-antarurira ee'noko e'mang-antarurira puring-antaruriaing dii', ai' teie tero bokururu'nung dii'ke domaang oparavaung meenasi-po'nung nkaverii'naang Karistoo'koo kuunge. <sup>11</sup> Tee tee tee' nari' tanatavari otoaing ootukunung batei-koo o'domaropa-koo. Masikung.

#### Si'nara'naare

<sup>12</sup> Aung ane' karavoto~ apukane' ninge minkuanko Sivanusie pakumui daarivuing, teie mmaiko'ke ninge masika'antavamaunge, dii' puring-anta-koo ee'noko aung tee Kumponing bakaang paa dii'koo sira'anta-koo. Ee'nung-koo purintariri otoriaing.

<sup>13</sup> Aing dootuu'nupoong Karistoo'navitu anke Babiloni'ke o'norimanavitue, Kumponing dii'pina' nari' miru'muru'navitue tampara tampampimaang dii'koo, tee ninka nnuring tampamaung ninka Maaka' ninka nari'. Onkeonke'deeriai dii' naruna' naruna' paa taa'ni'antaveri. <sup>14</sup> Mooa tee dii'koo ookara-koo tee' nari' otoaing dii'koo Karistoo'koo otorining-koo. Tee' nari'.

## 2 PIITA

### Tampara Aarumo-koo Bia'antamarira Orenge Biikaang Kara Sirakaapuampiai

(1:1–3:18)

#### Baito-koo Kani-antarariaing

**1** Aung tee ane' karavoto~ ninge Saimoni' Piitai daariamang Jiisuu' Karistoo' bakaang botovoton-aa'ke, ee'noko tee bakaang kara-okomui-nka ning. Dii' ee'ning daarirerompimang tee aung amurii' masika'anta nii'pina' nari' oto'derurining Jiisuu' Karistoo' bakaang aarumo koonto'koo kuunge oko-antamuru'nung, ee'nara niikaang Kumponing ee'noko Domang-anta. <sup>2</sup> Tee biraanke ee'noko moa dii'koo beremparavaing Kumponing tampa' kenkumperi otoriko ee'noko tee niikaang oving Jiisuu'. <sup>3</sup> Ai' tee tee nii'ke tee tampa' kenkumpampiko teie tee teieta bakaang iri' pankaing-eta ookara kapoo'nanka makosina' amuriaing tampa' domamariri siompampiaing-koo. Ai' teie bakaang meenasi ee'noko bakaang tampara aarumo nii' ninka nari' oro'anta-koo bokumuru'. <sup>4</sup> Ee'noko tee' nkomurima teing bakei pankeng avuavu'nanka moodopa amuru' tero maraka-antamuru'ning. Kansii' bakaang dera'keta mmarmupia'naang amuru', tero karaa'ampiko doomamuriko'nung-eta bera Kumponing-pina' nari' datamori o'norai. <sup>5</sup> Tee'koo ee'na'koo dii' aa'na' paararariaing diikaang masika'anta ninka tampa' oto'koo, ee'noko tee' tampa' otorii' Kumponing tampa' kenkumperi otoriaing. <sup>6</sup> Ee'noko tee' noru'eritaa' diikaang mono bakaang pia daka'peri tanatarariai. Ee'noko teieta napo' tee' nari' nko-koo pinka'dariri otorimaatoai, ee'noko pinka'darima Kumponing-koo arariri otoriaing. <sup>7</sup> Ee'noko Kumponing-koo arariri otorii' teing dii'maikorori'koo napo' navurariri otoriai, ee'noko tee' navurariri otoritaa' piaa oro'antaverimatoai. <sup>8</sup> Ee'koo, teing aing aarumo oro'antaveri otoaing deeko' ee'noko dii'koo berempari otoi, teinge tee dii' tanatarariaing tamung sinangropanuka iri' o'dari'neeng-koo tee Oving Jiisuu' Karistoo' noru'eri. <sup>9</sup> Ai' tee naning aing ee'ning oto'evuauka'nung tee kaputu', noru' apukung, ee'noko noru'ua' otong teie tee urikeng orenge aarumonanka-ita kiioraa'antavuu'na'. <sup>10</sup> Tee'koo, dii' mmaikori', oko'okoruriaing tee Kumponing miru'duri bokuru'nung taa'ni'antarariri. Tee' ee'na' nkorariaing

deeko' dii' teing dua'dariauka'ning. <sup>11</sup> Ee'noko dii' teing maneena' onkeonke'duriaing teka ee'noo'ka paning-koo niikaang Oving Domang-antai Jiisuu' Karistoo'ke tee' nari' taremurimato-ainoo'ka.

#### Tampara Doorenang Masikeeri Otoina'

<sup>12</sup> Tee'koo ninge maroita uatepa noru'antarampimatoaing dii' teing aing ookara kapoo'nanka naurampimaing, bane dii'ke noru'erio' ee'noko tee kara masikung oto'derurimaung-koo ima'dariri otorikoo'. <sup>13</sup> Ee' noru'amaang, makosi ninge dii' enang ning aung mono ninka o'noitaa' tee ninge dii' tante-antarampimatoai napo' noru'antarampima. <sup>14</sup> Ninge ee' noru'ansitaa': Batei tee nkaang mono tonta'uaina'mung due'ari otong tee' nari' niikaange Oving Jiisuu' Karistoo'ke naumuu'na'. <sup>15</sup> Tee'koo ninge aa'na' tautaurampimang ning tenkenanko tee dii' makosiri otoriaina' aing kapoo'nanka napo' noru'koo batei piarorinaing-koo. <sup>16</sup> Niikaang Oving Jiisuu' Karistoo' iri' ninka pou'na'koong minkunaa naurampiru'nung kumponaang-koo bi'arava', nantoonge aavamaari minkuaapeu'ning-koo, teka nii'ke tee niikaange dutai oampiru'nung minkuampimaung tee' meenasi ninka daurarong~ otomanoo'keta neramparu'na'. <sup>17</sup> Ai' tenang teie tee pankaing-anta ee'noko meenasi Bauma Kumponing-eta nkavuko teie auronge narunge karavuu' teketa paning-eta daurarompari bakaang meenasi oro'antavumanoo'keta ee' minkuvuma, "Aung tee nnuring ninge piaavamaung. Ee'nara-koo ning tampa' dotumaramaung."

(Mat 17:5)

<sup>18</sup> Aung kara anaare nii'ke paning-eta poko taaravampiru', ai' nii' teing tee ninka nari' o'noru'ning teke meekamii-koo. <sup>19</sup> Ee'noko nakaro-nupoong~ urikupoong biikaang kara Jiisuu'ke dupe-antavuo' aa'na' masikung oro'pario' kompampiri otong niikaang kara puring-anta-koo. Dii' tee noru' e'maniri otoriaing tee-koo biikaang kara-koo tee-pina' araka mutaanoo'ke arakavaramaung-pina' noru'eritaa' bera tane'puko tee maataraa daa'aravainoo'ke basi diikaang domang-koo. <sup>20</sup> Tutuna' tee aung tasi'perira e'maniriaing Daari Meekung-koo: Ookara kara Daari Meekung-koo nakaro-nupoonge tarampeeaako'ning~ teing nantoonge bii'ka sira'koo makosi deeaing. <sup>21</sup> Ai' nanaare otoa' naninung pia-ita tavo'kuu'naare Daari Meekung-koo, teka Tanuaang Meekunge karantavuriko~ Kumponing-eta nantoonge minkuaama daariaako'.

## Tositosinuka Nakaro-nupoong~ Kera'pariaina'

(Jud 1:4-13)

2 Teka nii'ning nakaro-nupoong daang Kumponing-etaining tamparima daa'ariko' Ju'nupoong-koo meu'ke, ee'noko napo' tee' nari' daang-koonanka nau-antanuka daa'ariainge dii'koo meu'ke. Tee' nkoarima nantoong makenge orari-antavaariaing biikaning noru'keta daang nau-antavaarima, biikaang Ovoring teing moo'uru'nung sipai. Tee'koo bii'ka namu'ke orari-anta kune'aavaing. <sup>2</sup> A'noo' tee mmau'ke siompaariaing biikaang aarumo amutemurii' maimaia'nankapo'nung. Teketa' teing tee' nkoariko tevung Karistoo'nung kara masakung sionavung nii'ninge oraka' minkuaavaing. <sup>3</sup> Ee'noko tee' nkoarima mooni' barang-koo okovuriai kara menaankavarima. Nka tee teie Simpe'nkoi' tuutunang~ miru'evuru'nung nempari otong. Teing orari-antavuriainge keeroorovuri otong.

<sup>4</sup> Nii'ke noru'ampiri otong tee' nkoaravainoo' aa'nung-koo: Nii'ning koosinunanka oraka' nkoariko tamung oovuriaruu', teka kansi'koo tumang dua'uru' isipo' masipo' mutaananoo' doonko teke dai'ariri otoroo'naang bera simpe'uriaina'mung-koo basi. <sup>5</sup> Napo' urikavarang orara aarumo ninka nari' kansi' maanto'aako'ning tamung oovuriaruu', teka doua-koo minki-antavurira opuru', Nooa' narung deeko' aarumo koonto' daankivuko'nung domampuu', nii'ning nantoong ~kenaanka-taa ninka nari'. <sup>6</sup> Napo' osi pankeng kevuntu'ka Sodom ee'noko Komora' sipung deeng-antavuretu' otorearoo'naang tatureta dama'navarange Kumponing siompaavauka'ninge nkovuriaina' ooaava'naang. <sup>7</sup> Ee'noko teka napo' naning koonto', Loote', domang-antavuu', tee ee'nara oraka' dee'oko'nung teing oreng Sodom-nupoong maimaia'na' nkoariko. <sup>8</sup> Tee ee'nara naning koonto' deempari domang maki'oko'nung teing tee ninka otoroko'ning boto-koo kuung otoroa'pina' noru'ai nkoariko'ning ninka doong kante oovurima ee'noko teing-koo taaravuma. <sup>9</sup> Tee' nkovuru'na'koo tee sira'pari otong tee Ovoring noru'kui otong nantoong tee siompaamaing para-paara arikung-eta domang-antana'koo ee'noko napo' teing siompaavauka'ning kiimatavurii'naang pinka'uri oto'na'koo bera te'mung simpe'uriaina'mung-koo basi. <sup>10</sup> Deepo' masipo' bakei kiimatavuriainge teing nau-antanuka daang Kumponing-etaining tamparimaing. Mono bakaang pia orara dera' siompaamaing Ovoring tompimpai.

<sup>11</sup> Aing amurii' nantoong derareranuka, bore' kapanuka, anutua avoreaava' avutevu'ari dauraronanka oraka' minkuaarimaing, teka teing ookara noru'po'nupoong, bane koosinunanka deeko', tee' nkoariaung. Bane teing koosinunanka nantoong-koo dau basina' iri' ee'noko iirakutapo'nupoonge oraka' minkuaarima tuumpiaariaung biikaning kare-nupoong Ovoring-koo uro'kanoo'ke. <sup>12</sup> Teka aing tosi nkonuka kau' karenaumonanka-pina' oro'nuka, noru' papaaravari oto'nuka, matauropanuka, tamung doonko tavu'koo makosinanka-pina' oro'nuka. Noru'aava'

poore' nkoaamaing. Biikaang dera'ke boo'antavuriko kera'pariainig. <sup>13</sup> Tee tee ee'nara biikaang moo' orara oraka' nkoariko'nung-koo, aa'noma: doong ookutuna'mung maia'oroa' tamung sirakura' mono bakaang pia orara siong-koo kei'orokoo'. Teing teing dii' ninka nari' otori diikaang miring orari-antavaariaung ee'noko diikaang navunavu daang deeng-antavaakoo'. Dii' ninka nari' Ovoring bakaang taamang naierima aavaariko' moru-pina' noru'ai. <sup>14</sup> Biikaang duta tee karakaraa'ke maanto'nuka maniku'koo, orara aarumo besi'ui oto'nuka, aruaru'nuka da'deng dua'antavaariaing, ee'noko biikaang domang aarumo oko'oko-koo bareari oto'nukai. Kumponing barakosi'nii'nuka teing. <sup>15</sup> Koonto'navung sipaara pooariru'ning. Tee nakaronara Baalamu, Beeo bauring, bakanavung siompaamaing, mooni' nka-koo piavora oraka' nkoaru'nung. <sup>16</sup> Teka tee bakaang doonkii'ke amakoi naning-pina' karoma orokovuu'nung danto nari' oraka' nkoara'neeng-koo, tee nakaronara bakaang aarumo kanukanu' potevui.

<sup>17</sup> Teing daang-koong nau-antanuka tee tee-pina' nting dakau-pina' oro'nuka, ee'noko napo' tee kamo' divinge avitoitoi nkavui nanumaung-pina' oro'nukai, Kumponing mutaananoo' tumang masipo' miru'evuru'ning teke oto'koo. <sup>18</sup> Ai' teing daang pankang-antavarima buia'arimaing maimaia'na' nkoarima, ee'noko baanka' nempaama mono bakaang piabi beana-antavaakoo' nii'ning nantoong teing-eta oraru'kiai otoromanavitu-eta koo'ariko bi'anta-koo. <sup>19</sup> Opampaarima tuumpi-eta unaavoroi otoroainig tampaarimaing, teka teing bii'ka dera'antanameng-koo dai'ariri otoroi, ai' aming kapoo' tee naning kuung deempui otoing-koo, tee tee, tee-koo ee'nung-koo dai'ari otong. <sup>20</sup> Ee'noko enang teing aa'na' dai'ariri otorong, io' teieta kansi' bakaang aarumo orara-ita mmariaara, tee niikaang Ovoring ee'noko Domang-anta Jiisuu' Karistoo' siompaakotaa', teketa napo' enang kuung dua'arira dai'arirnamu' oramu'. Tutuna'namu' divu'ui otong. <sup>21</sup> Baru' tampa'na' deea' tee teing koon-tonavung-koo noru'kaavarupeu'nung-koo, ee'noko bakei oraka' tutung noru'aara napo' bere'ariring-koo teieta doorenang aa'na' tampara, Karistoo'ketaing boto meekung tutung taaravau'nung-eta. <sup>22</sup> Tee tee' teing-koo nkoaramaung tee niikaang mirumiru' tampui otoina', aa'pumana', "Mosi'ke tee napo' bakaang kurina'koo toroarama maa'umaung," nii'na' ee', "Pooro' duu'paako napo' meto'koo novuaramaung."

## Ovoring Poaina'mung-koo Keekoo'dariauka'

3 Aung ane' karavoto kene'ka-nane' dii' mmaikori' masakupoong daarirerompimang. Ee'noko aing-koo ookane'ka-koo ninge diikaang noru' tante-antarampimang nari' pituraria' otorii'naang. <sup>2</sup> Tee'koo aing kapoo' unampansi naurampimang teinge urikupoonge nakaro-nupoonge Kumponing-etaining miru'ai minkuau'ning napo' norunoru'eriai ee'noko niikaang Ovoring Domang-anta bakaang boto nari' tero nii'ke kara okomuri nkanukai naurampiru'na'. <sup>3</sup> Am-

ing-koo tee' naurampimang? Nna' doong asi' due'uko teing nantoonge tee bakei benkentaariaining dii', bi-ikaang mono-koong pia siompai. <sup>4</sup> Aa'paavaing, "Tee napo' toroaravaing tamparu'nung arerai? Ai' teing nikakatauro tee' nari' naumaariko'ning boorou'noo'keta ookara kapoo' nari' otong kansi' pupu'aru'noo'keta otomana'." <sup>5</sup> Teka tee' minkuaama narung kapoo' maroita bei'bei'aamaung aa'nou'nung: Kumponing karoko paning tavo'aru' tero, ee'noko kansi' pirung-eta bakoarara ta'namparu'. <sup>6</sup> Napo' Kumponing karoko tee kansi' tero otoko'nung douai pirung-pina' dunkumpura orarivuu' Nooa' bakaang batei-koo. <sup>7</sup> Ee'noko tenaarei ee'naarei napo' paning ee'noko kansi' enang otomatomaing nta'ke paro'koo miru'ura sipuu', ee'noko teka pinka'ui otong bera te'mung doong nantoong oreng simpe'urira kera'antavuriaina'mung-koo basi.

<sup>8</sup> Teka ee' mmaikori', bei'bei'eriauka' aung kapoo': Oving-koo tee mare' kivora daaku' na'mung doong-pina' otong, ee'noko na'mung doong tee mare' kivora daaku'pina' otong. <sup>9</sup> Ovingee tee bakaang maraka-anta dupe-koo tamung ana'aravaung nii'ninge tampaa-mana'. Teka teie piaavuri nempuri otong teing bei'bei'arimaing-koo naning narung kera'para'neeng-koo, teka ookara bere'arii'naang piavorora batei makosinoo' avurii'naang.

#### Kansi' Ee'noko Paning Paa'aravaina' Oving Toroarako

<sup>10</sup> Ai' te'mung Oving bakana'mung bateinana'mung te'mung bakiaa' nko-pina' poaina'mung, ee'noko tenang paning kurunkurunkaanang paa'aravai ee'noko ookara kapoo' paning-koonanka nta'ke taivurira ta'da'purira ntong deeng-antavuriaining, ee'noko kansi' teing ninka bakaning nkononka naro'ka parosinampurira opuriaining.

<sup>11</sup> Enang tee dii' aing-koo ookara kapoo'nanka-koo

bakei oki'noo' bi'dariauka' taivurira tara'puriaining noru'eritaa', ee'noko meeka'dariri Kumponing-koo arariri otoriai. <sup>12</sup> Tee' nari' nemperi Kumponing poaina'mung duerue'antaveri otoriai, te'mung ee'na'mung Kumponing paning paro'uko tara'pura tuuvuaina'mung, teing ookara kapoo'nanka teke otoromaing nari'. <sup>13</sup> Teka tee kapoo' masikung nempampiri o'norimaung tee paning ee'noko kansi' nerakeng tavo'kureaung maraka-antamuru'na', te' aarumo koonto' narung otoainoo'.

#### Taremariri Oving Nempampimaatoaing

<sup>14</sup> Tee'koo dii' mmaikori' masikupoong, te'mung nemperimaing deentariko ee' naurampimang, purintariri otoriaing ku'mi'dopanuka, nii'noo' tuumpi otoriaing, Kumponing tee ninka mooa-koo oto'nuka meu'duriaina'. <sup>15</sup> Ee'noko noru'eriaing aming-koo tee' pankaroong nemurimaunge. Tee aa' batei amurima bakaang doorenang domang-anta-koong noru'antakoo tee' nemurimaung. Tee' ee'na' nii'maiko' pi-aavampimaunge, Paula'ke daarirerurima naururu'na' Kumponing onou avuio'. <sup>16</sup> Ookara karavoto bakaning-koo tee' nari' daarivukoo'. A'noo' tee nii'ning kapoo' teing-koo karavotonanka-koo ivekeng otong noru'koo, ee'noko teinge noru'dopanukai teing mare'aama bii'ka orari-antavarimaung tee' napo' nii'ning Daari Meekung-kooning kara mare'aamana' nari'. <sup>17</sup> Tee'koo dii'ke mmaikori' masikupoonge tutung aing ee' oro' kapoo'nanka tasi'perira tarerariri otoriaing boto siompaavaininge taapo'ke barantaari'neenga kara koonto' deeaung naurarima e'mantoma dekopi'antaraari. <sup>18</sup> Teka deto du'duriaing Karistoo' noru'koo, tee niikaang Oving Domang-anta, ee'noko bakaang paa' nka-koo. Tee ee'nara meenasi ookara okovui otoaing enang-eta deto bera te'mung doong oparavauka'na'mung. Ee', tee' nari'.

# 1 JOONI

## Kara Baavootunanka Ane'kooning

1:1 Araka-koo O'noriaing Ee'noko Mutaanang-nupoong Taaravarampiauka'  
3:11 Nii' Naruna' Naruna' Piaameeriaing

### Araka-koo O'noriaing Ee'noko Mutaanang-nupoong Taaravarampiauka'

(1:1-3:10)

#### Karistoo' Tee Kara Domaang-po'nung Okovenung Sira'pari Otong

**1** Nii' teing kara sira'nuka tee-koo kapoo' tutuna' masipo'keta otoi otomaung-koo, ee'nung naning-naumpura poko ooampiring, tee Kumponing Bakaang Kara Domang-anta-koong Okovenung. <sup>2</sup> Ee', tee Domaang Otoi-oto' tampa' sira'pario' niikaang dutai ooampima taaravampiko', ee'noko birenge kompampiri keerooroampiru'. Tee'koo dii' naurarampima daankiampimaung tee Karistoo' Domang-anta tee' nari' otoi otomaung. Bauma ninka otoko' ee'noko depeto nii'anko siarara sira'paru'. <sup>3</sup> Tee nii'ke ooampira ee'noko taaravampiru'nung daankiampimaung dii'koo, dii' nii' ninka nari' tapo'meerira tampa' masika' onkeonke'meerii'naang, ee'noko Niuma ninka ee'noko Bauring Jiisuu' Karistoo'daang ninka nari'. <sup>4</sup> Tee aung ane' karavoto~ ninge daariansing nii' ookara tee' nari' minkuamaatomana' nkomarira doturotue maan-to'murii'naang.

#### Tee Araka-koo O'noriaing

<sup>5</sup> Aung tee doorenang nii'ke taaravampiru'nung tei-eta Bauring-eta dii' naurarampimaung: Kumponing tee araka ee'noko tee tee-koo oki'noo' mutaanang otoa' bakei. <sup>6</sup> Nii'koo baata aa'parimaing, "Nii' tee ninka miirunanka," nka mutaanang-koo otoroita' teing teing tosiarimaing ee'noko kapoo' masakung narung siona' otoroa'. <sup>7</sup> Teka baata teing araka-koo otoromaing tee Jiisuu' araka-koo otona' nari' teing teing oovuning ninka miirumpei otoromaung, ee'noko teie erenge Kumponing Bauring Jiisuu' Karistoo'koonge tee tonta'urima biikaning oraka' nkonanka-ita kiirora'antavuripeu'.

<sup>8</sup> Tee'koo aa'mariri dei, "Nii' oraka' nkonanka oto'memuria'," nii' nii'ka tosimaripeu' ee'noko kara masakung nii'koo otoarupeu'. <sup>9</sup> Nii' niikaning oraka' nkonanka sira'mariko deeko' teie tee bakaang marakanta siompui tampa' makosina' nkomuriaing ee'noko oraka' nkonanka tonta'memurira kiirora'antamuriai ookara kapoo'nanka koonto' deeaing-eta. <sup>10</sup> Nii' oraka' nkonanka oto'memuriaung tamariri dei nii' teing tosimaripeu' ee'noko Kumponing tosi-bauko tampampipeu', ee'noko bakaang kara nii'koo otoarupeu'.

#### Karistoo' Tee Niikaang Pakupaku

**2** Ee aing nkaning toirekaa', aung kara tee ninge dii' daarirerompimang dii'ke oraka'nko nkoveri-aroo'naang, teka dii'koo narunge orara nkovuko deeko', nii' teing tee meeroo'nara oto'memuring Bauma-anko tampo-antamurimaung, tee naning koonto' tee Jiisuu' Karistoo'. <sup>2</sup> Tee ee'nara niikaning oraka' nkonanka-koo Kumponing-nung iira o'antavuu'naang tonta'memurima boo'paru'nung. Ee'noko nii' naing deea' tee' o'antamemuru', teeo ookara kansinupoong tee'ke.

#### Baa Tee Kumponing Masika' Noru'ui Otomaung Bakaang Aarumo Siompumaung

<sup>3</sup> Nii'ke teing bakaning botonanka siompampima nii' teing ee' noru'ampimatoaing: Nii'ke doma tee Kumponing noru'ampiri otong. <sup>4</sup> Baie teie naninge aa'pumaung, "Ninge tee noru'ansi o'nong," teka teie tee bakaang botonanka siompua', tee tee tosi-bauko ee'noko tee kara masakung tee-koo otoa'. <sup>5</sup> Teka tee naning bakaang kara pinka'umaung, teie tee tee-koo tee Kumponing bakaang piasa dupearamaung. Ee'noko tee'koo nii' Kumponing-koo o'noring noru'mari-maung. <sup>6</sup> Baa tee naning aa'puaing, "Ning Kumponing-koo o'nomaung," tee' ee'na' nari' Jiisuu'pina' koonto' otoaing.

<sup>7</sup> Ee dii' mmaikori', ninge tee dii'anko nerakung boto naurampima daariampa', teka tee urikung boto narung tee dii'ke Karistoo' komperira tutuntoma-ita oto'derurimaung, tee urikung botonoo' tero

tareveru'nung. <sup>8</sup> Teka tee aung boto ninge enang daarirerompimatomaung tee deeka'pari nerakung boto bakaang masikeenoo' tee tee tee-koo Karistoo'koo ooampiru'nung ee'noko napo' dii'koo ooampimaunge. Ai' tee mutaanang tee tankinumaang ee'noko tee araka masikung tero arakavaring. <sup>9</sup> Baa tee naning aa'puaing, "Ning araka-koo o'nong," ee'noko ba'maiko' munte'uma, tee tee mme' mutaanang-koo otong. <sup>10</sup> Teka tee naning ba'maiko' pi-aavumaung tee araka-koo otong, ee'noko tee tee te' araka-koo otoko kapoo'ke dua'antavuarupeu'. <sup>11</sup> Teka tee naning ba'maiko' munte'uaing tee tee mutaanang-koo otong, ee'noko teie mutaanange nanumang tokoo nanumatomanoo' noru'ua', teie mutaanange kaputu'antavuiio' tee bakaang duta.

<sup>12</sup> Ee aing nkaning toire', Kumponingee tee diikaang oraka' nkonanka tonta'deruring-koo Karistoo' bakaang miring-koo; tee'koo ninge tee aung kara dii'anko daariamang. <sup>13</sup> Dii'ke biumatakaampie noru'eri otong tee ee'nara naning uripo'keta otomaung. Tee'koo ninge tee aung kara dii'anko daariamang. Napo' dii'anko nemea'anko daariamang dii'ke tee orara naning puru'eru'nung-koo.

Napo' dii'anko toirekaa'anko daariamang, dii'ke Niuma Kumponing noru'eri otomaung-koo. <sup>14</sup> Dii'ke biumatakaampie noru'eri otong tee ee'nara naning uripo'keta otomaung; tee'koo ninge dii'anko daariamang. Ee'noko napo' dii'anko nemea'anko daariamang, ai' dii' teing purintariri otoring, ee'noko Kumponing bakaang kara tee dii'koo otomaunge ee'noko dii'ke puru'eru' tee naning orara.

#### Kansi'koong Aarumo Karaa'ampiauka'

<sup>15</sup> Aung kansi' teing ninka bakaning kapoo'nanka ninka karaa'eriauka'. Baa tee naning aung kansi' karaa'uainge tee Niuma Kumponing piaavua' otong ee'noko Kumponing bakaang piaa tee-koo otoa'.

<sup>16</sup> Aing teing ookara aarumonanka kansi'kooning aa'ning; mono bakaang pia siong ee'noko dutai karaa' ee'noko naning baka daangang. Aing teing Kumponing-etaining deea', teka tee tee kansi' bakaang.

<sup>17</sup> Ee'noko tee kansi' teing ninka bakaning karakaraa'nanka tee paa'aravaing, teka tee naning Kumponing bakaang pia siompuaing tee, tee' nari' domampari otoaing ookara batei-koo.

#### Karistoo' Bakaang Karenara Tavo'ari Otoina'

<sup>18</sup> Ee aing nkaning toire', batei due'umaang tee Karistoo' bakaang karenung pankaing poo'naang tee' ee'na' taaraveru'na'. Enang tee'ke mmou' Karistoo' bakaning kare-nupoong porora otorong. Tee'koo nii'ke noru'ampimaung aung tee asi'nung batei. <sup>19</sup> Aing teing nantoong nii'kooning deemparia' tero si'maaru'ning. Nii'kooning dei teing nii' ninka nari' otoropeu', teka teing tero tenkenau'noo'koo tasi'parampiri otong teing nii'kooning deeaing. <sup>20</sup> Teka dii' Tanuaang Meekung nkaveru'ning ee'noko dii'ke tee kara

masikung noru'eri otong. <sup>21</sup> Dii'ke tee kara masikung noru'eriaung tampama daariampa', teeo dii'ke noru'eri otomaung-koo tee', dii' pinka'antarampima, ai' tee kapoo' tostitosi tee ninka kara masikung ninka nari' otoreaung noru'eri otong dii'ke.

<sup>22</sup> Tee tosi-nko baie? Tee ee'nara naning aa'pumaung, "Jiisuu' tee Kumponingee Tero Pako'pari'nii' deea' nii' domamurira taremurianoo'koo." Tee tee ee'nara naning Karistoo'koo karenung. Teie tee tekang ookakang Bauma ee'noko Bauring daang-antavuremaung.

<sup>23</sup> Naning otoa' Jiisuu' Kumponingee Baurinoo' penkempuma Kumponing baurukaa'koong deempari otopeu'nung, teka baa tee naning aa'pumaung, "Jiisuu' tee Kumponing Bauring," tee ee'nara Kumponing baurukaa'koong deempari otomaung.

#### Tanuaang Meekunge Nau-antamurimaung Kara Masikung

<sup>24</sup> Tee tampara doorenang dii'ke tutuntoma-ita taaraveru'nung tee Jiisuu' tee teroita Kumponingee Pako'pari'nii'koong tee tampa' pinka'eriaing ee'noko tee'koo dii' teing Bauring-koo ee'noko Bauma tekang-koo otori otoroiaing. <sup>25</sup> Ee'noko tee tee kapoo' nii'koo maraka-antavuu'nung kompampiaing, tee ee'nara domaang oparavaung.

<sup>26</sup> Aung tee dii'anko daariatomaung teing ee'ning dii' tosiraarimaing biikaning aarumo nau-antarampima tee'. <sup>27</sup> Teka tee Tanuaang Meekung Karistoo'ke aruru'nung tee dii' ninka nari' otomatoaing, ee'noko dii' teing nii'nung naninge kapoo' nau-anta-koo kevi'dariaung. Tee Tanuaang Meekung narung makosi dii' nau-anta-koo ookara kapoo'nanka ee'noko tee bakaang kara masikung, daang deea'. Tee' ee'na' Tanuaang Meekunge nau-antaruru'na' Karistoo'koo pinka'dariri otoroiaing.

#### Nii' Teing Enang Kumponing Baurukaa' O'noring

<sup>28</sup> Ee'noko enang tee dii' nkaning toire' tee ninka nari' otoroiaing, tenang tee oro'paravainang dotumariaina' ee'noko maia'ke daka'muriauka' tee poko. <sup>29</sup> Dii'ke noru'eri otong Karistoo' tee koonto' ee'noko tee'koo ee' masika' noru'eriaing ookara tampa' koonto'na' otoromaing teing Kumponingee paravuru'ning.

**3** Ooveriko arekee' Niumai Kumponingee aa'na' masika' piaamurira baurukaa' marimuru'nung. Nka tee nii' tamung baurukaa' deeaing, teka baurukaa' masikeng. Nantoonge kansi'koo-nupoonge tee' tasi'maaria', ai' teinge tee Karistoo' noru'aava'. <sup>2</sup> Ee mmaikori', nii' teing enang Kumponing baurukaa', ee'noko tee dama'ke nii' o'noriaina' mme' sira'paravaruko noru'ampia'. Teka ee' noru'ampiri otong nii'ke: Tee toroarako nii' teing tee-pina' nari' oro'mariainge, ai' meena'poi otoina' ooampira paarimariaing. <sup>3</sup> Ee'noko teing ookara nantoong aing kapoo'nanka nkoaravaina' nooruupiai nempaamaing teing domang kiirora'antavarimaing tee Karistoo' tee' kiirora'ari otomana' nari' otoroo'naang.

<sup>4</sup>Teing nantoong oraka'nko nkoaamainge tee boto toto'paamaung, ai' oraka'nko tee boto-toto'. <sup>5</sup>Teka dii'ke noru'eri otong tee Karistoo' tee sira'paru' niikaning oraka' nkonanka tonta'ua'naang, ee'noko tee-koo tee oraka'nko otoaung. <sup>6</sup>Naning tee Karistoo'koo kuung otomaung tee oraka'nko danto nari' nkovui otoaung, ee'noko teie naning oraka' nko-koo bakearavaunge tee Karistoo' tasi'puaung ee'noko noru'ua' tee. <sup>7</sup>Ee aing dii' nkaning toire' oki'nareka', naning dii' aava-koo taura'dariauka'. Baa tee naning aarumo koonto' nkovumaung tee koonto' tee-pina' Karistoo' koonto' otomana'. <sup>8</sup>Ee'noko baa tee naning orara aarumo nkovumaung tee Sietani' bakaang, ai' tee tee ee'nara Sietani' tutuntoma-ita oraka'nko nkovui otomaung. Tee Kumponing Bauring sira'paru'noo' tee tee-koo nko-nko Sietani' bakaang orari-anta-koo. <sup>9</sup>Baa tee naning Kumponing-koo neraka'pari ponto'aravainge tee orara nko-nko nkovua' otoaing, ai' tee-koo tee Kumponing bakaang domaang otong. Tee'koo teie orara nko-nko nko-koo makosi deea' Kumponing neraka'antavui ponto'antavuu'nung-koo, bakaang aarumo tee-koo kuung sipuma. <sup>10</sup>Enang tee, ee' nii'ke tasi'pampiang baata teing Kumponing baurukaa' ee'noko baata teing Sietani' baurukaa': baa tee naning koonto'na' nkovuaung ee'noko ba'maiko' piaavuaung, tee tee Kumponing bakaang naning deea'.

### Nii' Naruna' Naruna' Piaameeriaing

(3:11-5:21)

#### Jiisuu'ke Piaa Masikung Naumuru'na' Nii'ke Tee' Nari' Nkomeerii'naang

<sup>11</sup>Aung tee naunau dii'ke tutuntoma-ita taaraveru'nung, nii' naruna' naruna' piaameerimatoaung. <sup>12</sup>Ee'noko nii' tee-pina' Keini' nkomariauka' Sietani' bakaang naning-pina', tee baara'ma'nung dupisi'uu'nung. Aming-koo dupisi'uu' tee? Tee aa' bakaang nko-nko orara deempario', tee baara'ma'nung munte'uu' bakaang nko-nko tampara deemparako. <sup>13</sup>Ta'niniriauka' dii' mmaikori' nantoonge kansi'koo-nupoonge munte'daariko. <sup>14</sup>Nii'ke tee nii'maikorori' piaavarampimaung-koo ee' tasi'marimaung: nii' tanuaang boo'nameng-eta domamaririning. Baa tee naning ba'maiko' piaavuaung tee boo'aapenameng-koo mme' otong. <sup>15</sup>Tee naning ba'maiko' munte'umaung tee ee'nara dupisi'nko ee'noko tee dii'ke noru'eri otong teing nantoong dupisi' nkonuka teing ookara domaang oparavaung okovuria'.

<sup>16</sup>Ee'noko piaa masikung nii'ke tasi'pampimaung Karistoo'ke nii'koo boo'parara naumurio', ee'noko napo' nii' tee'ke nii'maikorori' paku-koo moompiainge. <sup>17</sup>Teka naning narung kapoo'nanka aung kansi'koong oto'evui deeko', ee'noko ba'maiko' ata'kuko teie tamung dutai oovumatopeu', arekee' Kumponing

bakaang piaa tee-koo kuung oting tamparapeu'? Makotua'. <sup>18</sup>Ee aing dii' nkaning toire' oki'nareka', kara narunge karompima piaavarampiauka', teka nko-nko ninka nari' masika' piaavarampiaing.

#### Piaa Oro'antavampima Nii' Kumponing Baurukaa' Taa'ni'antamaripeu'na'

<sup>19</sup>Nii' masika' piaameerima nii'ka tasi'mariri o'nori-aing nii' teing kara masikung okonara bakaning, ee'noko bane teie niikaang domange tokoona' tuutunamuriko deeko', niikaang domang kuaa'moriaing Kumponing-koo uro'kanoo'ke. <sup>20</sup>Ai' bakaang kara † tee niikaang domang karomana'koo dau basi, ee'noko teie tee ookara kapoo'nanka noru'ui otong. <sup>21</sup>Ee mmaikori', enang niikaang domange tuutunamuriaruko nii' teing avoro' o'noria' Kumponing-koo dutakanoo'ke. <sup>22</sup>Ee'noko tee nii'ke teing kapoo'nanka, aremurii' eentavampimaatopeu'ning teing nkavampimatopeu' tee bakaang boto siompampimaung-koo, tee dotu-antaning kapoo'nanka nkoampima. <sup>23</sup>Ee'noko bakaang boto tee aung: Nii'ke tee Bauring Jiisuu' Karistoo' bakaang miring tasi'pampira masika'antavampiang tee tee Kumponing teroita Pako'pari'nii' domamuri taremuriainoo'koo, ee'noko naruna' naruna' piaameerimatoai tee' ee'na' botomuru'na' nko-koo. <sup>24</sup>Ookara teing bakaang boto siompaamatomaing teing tee-koo kuung otoromaing ee'noko tee teing-koo kuung otomaunge. Ee'noko nii'ke tee noru'ampiri otong tee nii'koo kuung otomaung teie Tanuaang Meekunge amuru'nunge noru'antamuriko.

#### Tanuaang Kumponing-etaing Ee'noko Tanuaananka Oreng Simpe'arampiaina'

<sup>4</sup>Ee aing mmaikori' piaarampimaing, ookara tanuaananka naro'keta masika'antaverereria' otoai, teka io' nantoong karantavaariko~ paaraverererimaa-toai teing tanuaananka tasi'koo teing Kumponing-etaning deeko', ai' aung-koo kansi'koo tee mmau' oreng tanuaananka otorong nakaro-nupoong~ karantavurimaing, ee'noko teing nakaro-nupoong tosiarima Kumponing-etaining tamparimaung. <sup>2</sup>Tee ee'pina' tasi'periaing tee tanuaang kara okora' Kumponing bakaang deeko': ookara tanuaananka Kumponing-etaining teing tana'eriko aroo'aara sira'pariri aa'paavaining, "Ee', tee Jiisuu', tee Kumponing teroita Pako'pari'nii' nantoong domampurira tarevuriainoo' koo masika' pou'nung koonto' naning-naumpui." <sup>3</sup>Teka ookara tanuaananka Jiisuu'koo tee' minku-koo makosi deeaing teing Kumponing-etaning deea'. Teing tee Karistoo'koo karenung pankaing bakaning, tee ee'nara tero dii'ke poaing taaraveru'nung, ee'noko tee bakaang tanuaang tee enang anke kansi'koo tero pora otong. <sup>4</sup>Ee aing mmaikori', toirekaa', dii' teing Kumponing bakaning ee'noko dii'ke tee teing nakaro-nupoong tositosinanka boong deempereru', ai' tee

† Ooveai Jooni 13:35, "Dii'ke dii'ka tee' piaaeriko ookara nantoong tasi'daaripeu' dii' nkaning barevare-nupoong."



Kumponing dii'koo otoing tee aa'na' purinto' tee-koo teing kansi'nupoong-koo otomaung-koo. <sup>5</sup> Teing nakaro-nupoong tostitosinanka teing kansi'koo-nupoong, tee'koo kapoo' teinge minkuaamaing teing kansi'aapening ee'noko ookarai kansi'koo-nupoong teing taaravaarima siompaarimaung. <sup>6</sup> Nii' teing Kumponing bakaning. Baa tee naning Kumponing noru'ui otomaung teie tee nii' taaramurimaung ee'noko teie naninge Kumponing bakaang deeaunge tee nii' taaramuriaung, ee'noko tee'koo nii'ke tasi'pampimaung tee Tanuaang kara masikung minkuvumaung ee'noko tee tanuaang tosi minkuvumaung.

#### Kumponing Piaavampima Tee Nii'ke Naning Nii'maiko' Naro'ka Piaavampiaing

<sup>7</sup> Ee mmaikori' piaarampimaing, naruna' naruna' pi-aameeri o'norimaatoai, ai' tee aarumo paa-koong tee Kumponing-etaing, ee'noko tee naning paa bauko tee Kumponing-koo neraka'pari ponto'aru'nung, ee'noko teie Kumponing noru'ui otong. <sup>8</sup> Teie naninge paa noru'uaunge tee Kumponing noru'ua', ai' Kumponing tee paa okonara. <sup>9</sup> Kumponing tee bakaang paa nii'koo ee'pina' nau-antamuru': Teie tee Bauring narung masikung kirokai botovuu' a' nii'anko kansi'koo nii' tee-koo domamarii'naang. <sup>10</sup> Tee'koo ee'na'koo paa masikung nii'ke oo-koo makosi, nii'ke Kumponing piaavampiru'nung-koo deea', teka teie nii' tutung piaamurira Bauring botovuu'nung-koo tee iira Kumponing-etaing niikaning oraka' nkonanka-koo o'antamemurii'naang. <sup>11</sup> Ee mmaikori', tee' nari' Kumponing piaamuru'nung deemparako nii' tee'ke naruna' naruna' piameeriaing. <sup>12</sup> Naninge tee Kumponing nii'na'mung oovua'; teka nii' naruna' naruna' piameerimaing deemarima nii'ka tasi'mariai Kumponing tee nii'koo otomaung ee'noko bakaang paa tee nii'koo dupeari otong. <sup>13</sup> Ai' teie tee bakaang Tanuaang Meekung nii' tankaang-antamurio' nii'ke tasi'pampimaung nii' tee ninka nari' o'norimaung ee'noko tee nii'koo otokoo'. <sup>14</sup> Ee'noko nii'ke tee oam-piru' ee'noko sira'pampima daankiampima ee' nauarampikoo', "Baumai tee Bauring botovuu' nantoong kansi'nupoong ootukuning moo'urii'naang." <sup>15</sup> Baa tee naning Jiisuu' sira'pui Kumponing Bauring tampumaung, Kumponing tee tee-koo kuung otomaung ee'noko tee Kumponing-koo kuung otokoo'. <sup>16</sup> Tee'koo nii' bakaang paa naumuriko nii'ke tasi'pampima aroo'ampimaung, ai' Kumponing tee paa okora', ee'noko baa tee paa-koo otomaung tee tee' nari' Kumponing-koo otomaung ee'noko Kumponing tee-koo otokoo'.

#### Kumponing Bakaang Paa Tee Iri'po'nung Avoro'naan-ka-koo Muntemunte'

<sup>17</sup> Kumponing bakaang paa tee nii'koo dupeara-maung nii' maia'moria' ee'noko papaaramaria' o'noria'naang te'mung tuutunan-na'mung tee-koo uro'kanoo'ke donkonampira, Karistoo'pina' oro'mariri-

taa' anke kansi'koo o'noru'nung-koo. <sup>18</sup> Paa-koo tee avoro' otoa', teka teie paa dupe-antanii'ke tee avoro' bata'umaung. Ai' avoro' tee nantoonge kiimata noru'ai avoreaamaung. Ee'noko baa-koo tee-koo avoromaung-koo paa tee dupe-antanii' otoa'. <sup>19</sup> Nii'ke tee Kumponing piaavampimaung nii' tutung teie piaamuru'nung-koo. <sup>20</sup> Naning narunge aa'pupeu', "Ninge tee Kumponing piaavansi o'nong," teka ba'maiko' munte'uma tee tee tosi bauko. Baa tee naning tee ba'maiko' oovui nari' otoremaung piaavuaung teie tee Kumponing piaavuarupeu' tee teie dutai oovuaung. <sup>21</sup> Ee'noko aung tee boto nii' teie amuru'nung, "Baie tee Kumponing piaavuaingee tee ba'maiko' tee' nari' piaavuaingee."

#### Jiisuu' Baitoampima Kansi'koong Aava Puru'ampiana'

<sup>5</sup> Baata teing ookara nantoong tee Jiisuu' tee ee'nara Kumponing uripo'keta Pako'pari'nii' nii' domamuri taremurianoo'koo masika'antavaamaing teing ee'ning Kumponing baurukaa', ee'noko baa tee naning tee Bauma piaavuaingee teie teing baurukaa' nari' piaavuriaingee. <sup>2</sup> Nii'ke tee Kumponing piaavampima ee'noko bakaang boto siompampima ee' noru'ampipeu', nii'ke teing baurukaa' nari' piaavaram-piri otong. <sup>3</sup> Ai' tee Kumponing paa tee miru'noo' tee nii'ke Kumponing bakaning boto siompampimatoaing. Ee'noko teing bakaning boto teing pore' deeaing nii'koo. <sup>4</sup> Ai' baata teing Kumponing baurukaa' teing tee tee siong-koo makosinuka bakaang aarumo kom-paamaung-koo, ee'noko teing tee kansi' bakaang aarumo tee puru'ai otorong. Tee-koo ee'nung-koo Karistoo'koo baitomariri puru'ampimaung tee kansi' bakaang aarumo.

#### Kumponing Tampa' Sira'puu'na' Jiisuu' Tee Bauring

<sup>5</sup> Baie aung kansi' bakaang aarumo puru'upeu'? Tee aa' teie naninge deeko' Jiisuu' tee Kumponing Bauring masika'antavaingee puru'koo makosi.

<sup>6</sup> Tee ee'nara Jiisuu' tee Pako'pari'nii' Kumponing Bauring taa'ni'antavari pou'nung, aa'noko: auronge paning-eta kemu'kana' karoma taa'ni'antavuu' † aa'nou'noo'koo: ntong-koo minkiaru' ee'noko boo'aa-pearama ereng tuuvuu'. Nka ntong-koo minkiaru'noo'ke nara'ke deea', teka ookenge aa'nou'noo'ka ntong-koo minkiaru'noo'ke ee'noko ereng tuuvuu'noo'ke tee' nari' auronge paning-eta karoma taa'ni'antavuu'. <sup>7</sup> Ee'noko teie Tanuaang Meekunge tee' nari' masika'antavui taa'ni'antavumaunge, †† ee'nara Tanuaang Meekung kara masikung oko'bosi' deemparitaa'. <sup>8</sup> Ee', teinge ee'ningee beenaumoi sira'paamaung aa'ningee tee Tanuaang Meekung, tee aurong ntong-koo karou'nung, ee'noko tee aurong ereng tuuvuu'noo'ke karou'nung. Aing teing beenaumoi biikaang noru' narung ee' oro' minkuai otong Ji-

† Ooveai Mat 3:17; Luk 9:35; Jon 12:28 †† Tanuaang Meekunge Jiisuu' maanto'antavuu' (Luk 4:1), boo'keta daa'antavuu' (Rom 8:11; Nka 17:31), ee'noko bakaning kara nkanuka taa'ni'antana'ka avuru' kara masikee-anta-koo (Nka 4:29-31).

isuu' tee Kumponing bauring. <sup>9</sup> Nantoonge kapoo' sira'paako masika'antavampimaung, teka Kumponing bakaang kara sira' tee deto basina' masika'anta-koo makosi, ee'noko aung kapoo' ninge naurampimatomaung Kumponing ee'narai sira'puu'nung Jiisuu' Bauring tampuma. <sup>10</sup> Baa tee naning Kumponing Bauring masika'antavumaunge tee ee' noru'ui otong bakaang domange, Jiisuu' tee Kumponing Bauring Kumponing naumuru'na'. Ee'noko teie masika'antavuaunge tee Kumponing tee daang minku tampumaung, ai' teie tee daang-antavumaung masika'antavuaruma tee kara Kumponing sira'puu'nung bauring-koong. <sup>11</sup> Ee'noko tee kara Kumponing sira'puu'nung tee aung: Kumponing tee nii' domaang oparavauka'nung amuru', ee'noko tee domaang tee Bauring-koo otong. <sup>12</sup> Baa tee naning Bauring oto'evumaung tee-koo tee domaang otong, ee'noko baa tee naning Bauring oto'evuaung tee-koo tee domaang otoa'.

#### Koonto' Noru'ampipeu' Nii' Domaang Oparavaung Okomuri Otong

<sup>13</sup> Aung tee ninge dii'koo daariamang tee Kumponing Bauring bakaang miring masika'antaverimaung-koo dii'ke noru'erii'naang dii' teing tee domaang oparavaung oto'deruring. <sup>14</sup> Ee'noko nii' ee' noru'ampima to'biimariri o'noring: Nii'ke kapoo' eentavampiko bakaang pia siompampiri deeko' teie tee taaramuring. <sup>15</sup> Ee'noko nii'ke ee' noru'ampira deeko', "Teie tee taaramurimaung tenang eentamariko," nii'ke tee

napo' ee' noru'ampiaing, "Nii'ke masika' nkavampiaing teing eentavampimananka tee." <sup>16</sup> Dii'koo narunge ba'maiko' tee oraka'nko koonto' boo'koo makosinamurii' deeaung nkovuko oovura deeko' teie tee kunsikoo pakuvuaing, ee'noko Kumponing tee domampuai. Aung tee teing nantoong oraka'nko, koonto' boo'koo makosinamurii' deeaung-nko nkoaavaining-koo nkoaravaing. Namurii' oraka'nko koonto' boo'koo makosi masika' otomang, ee'noko ninge aa'pampa' temurii'koo kunsirariai. <sup>17</sup> Ookara amutemurii' nkononanka koonto' deeaing teing oreng, teka temurii'koo oraka'nko koonto' boo'koo makosinamurii' deeaung-koo kunsirarii'naang tampamang.

<sup>18</sup> Nii'ke tee noru'ampiri o'noring teie naning Kumponing-koo ponto'nii'ke tee orara aarumo danto nari' nkovuaung teie Kumponing Bauring tampa' tarevuio'. Ee'noko teie Sietani'ke tee tee kompuuang. <sup>19</sup> Nii' nii'ka tee noru'mariri o'noring, nii' teing Kumponing Baurukaa', ee'noko ootukunung kansi'koo-nupoong teing tee naning orara bakaang iri'koo kuung otorong. <sup>20</sup> Ee'noko nii'ke tee noru'ampiri o'noring teie Kumponing Bauring tee tero porai'nange noru' amuru', nii'ke tee Kumponing Masikung tasi'pampii'naang ee'noko nii' teing enang tee-koo masikung-koo kuung o'norimaung Bauring-koo Jiisuu' Karistoo'koo kuung o'nori, tee aung tee ee'nara Masikung Kumponing, domaang oparavaung okora'. <sup>21</sup> Dii' ee'ning toirekaa' oki'nareka' teieta kumponinanka daang-koong-eta tonta'dariri otoriai. Ee', ee'na'.

## 2 JOONI

### Kumponing Bakaang Kara Pinka'ampiri Oovuna' Kareamaing Bei'bei'arampiai

(1:1-13)

**1** Aung ane' karavoto~ ninge dootuu'koo urantai daariamang da' ee'nani ovorinaang Kumponing miru'duu'nani-anko ee'noko teing daurukaa'. <sup>12</sup> Dii'dovo tevo ninge aa'na' masika' piaarampimanavo ee'noko ning narunge deea', teka teing nari' tee kara masikung noru'aining, ai' tee kara masikung nii' ookara-koo dupui otomaung ee'noko tee' nari' nii' ninka otomatoai ookara doong-koo.

<sup>3</sup> Teie Kumponing Niumai tee ninka Bauring Jiisuu' Karistoo' ninka aa'ning oko-antamaariaing: biraanke moo'dopa, piasa unaa-anta, ee'noko mooa, tee ninka kara masikung ee'noko tee aarumo piasa.

#### Piasa Masikung Siompampimatoai

<sup>4</sup> Ning tee bakei dotumaramang ninge ooramira nii'ning teing-koo daurukaa'koo tampa' siompaako tee kara masikung, tee' ee'na' nari' Niumai botomuru'na'.

<sup>5</sup> Ee'noko enang tee aa'damaang da' ee'nani, nii' ookara naruna' naruna' piaameerimatoai. Aung tee nerakung boto deea' da' daarireromaatomaung, teka tee aung tee boto tutuntoma-ita oto'memurimaung: Naruna' naruna' piaameeriaing. <sup>6</sup> Kumponing-koo piasa

† *Ani ovorinaang nani masakani deea' pa. Navitu dootuu'navitu miru'ui tee' daarivuu' dee'ma, baurukaa' teing dootuu'nupoong miru'ui.*

ee' sira'koo makosi: Nii'ke tee' nkoampiaing tee kapoo' naumurimaung. Ee'noko teie tee nii' tutuntoma-ita naruna' naruna' piaameerimatoonaang naumuru'.

#### Karistoo' Bakaang Kara Tampa' Pinka'ampiaing

<sup>7</sup> Bakei, mmou' nantoong tosi nkonuka aunge kansi'ke avitoitoi nanaamaung, teing tana'eriko penkemparima aa'paamaing, "A, tee Jiisuu' Karistoo' naning-naumpui poaruu'nung." Teing teing ee'ning tosi nkonuka ee'noko Karistoo'koo too'de-nupoong teing. <sup>8</sup> Tarerariri otoriai tee kapoo' pore'dorimaung nkaveriaru'neenga, aa'na' teka ootukuario' tee moo' nkaveriai. <sup>9</sup> Baa tee naning Karistoo' bakaang naunau divu'ui nii'nung siompumaung tee Kumponing bakaning-koo narung deea', teka baa tee naning tee kara pinka'ui otoing tee, tee tekang ookakang beekaning-koo narung deempari otong aa'noko Bauma ee'noko tee Bauring. <sup>10</sup> Nii'nung naning oovunamurii' naunau ninka dii'anko poko deeko' diikanoo' pava-koo bokueriaka', ee'noko onkeonke'eriauka'. <sup>11</sup> Baa tee naning tee onkeonke'uaing tee, tee bakaang oraka' nko-koo kanto'paramaung.

#### Jooni Teing Oo-koo Piavou'na'

<sup>12</sup> Ning tee kapoo'nanka mmou' dii' daarirerompipeu'ning oto'memung, teka ninge teing ookara ane'koo daari-koo piamoa'. Tekaa ee' noru'amaang dii'anko pa due'ka mora oing oomeeri karompiaing doturotue maanto'muriaina'. <sup>13</sup> Teinge toire'ke teni da'maiko' Kumponing miru'uu'nani baurukaa'ke tampa' tang da'anko botoaamang. Otoko, ee.

# 3 JOONI

## Nii'ke Pakuarampiaing Teing Kumponing Bakaang Mintoong-koo Pore'oromaing

(1:1-15)

**1** Aung ane' karavoto~ ninge dootuu'koo urantai daarireromaang da' mmaiko' Kaiasi, ninge aa'na' masika' piaaramaung. <sup>2</sup> Ee mmaiko', kunsimaramaung ning teing ookara kapoo'nanka dake nkovemaing tampa' nkovemaatoo'naang ee'noko da' tampa' domantari otoai, da' tee' Tanuaang-aapei tampa' otomana'. <sup>3</sup> Ning bakei aa'na' dotumarunung tenang nii'ning nii'maikorori' poroma naumaama minkuraako tee dake kara masikung tampa' siompemaung temu'keta siompemana' nari'. <sup>4</sup> Tenang ninge taaravama, nkaning toire'ke tee kara masikung tampa' siompaamaung-koo ning tee bakei aa'na' dotumaramaung dau basinoo'.

### Kaiasie Tampara Nko-nko Nkovuu'na'

<sup>5</sup> Ee mmaiko', dake bakei tampa' nari' nkovemaung tenang dake teing nii'ning Karistoo'koonavitu pakuerima, baru'noo' teing damisimainku tampara doore-nang osi kanteai berempaamaing dake pakuerimaung-koo. <sup>6</sup> Teinge tee dakaang pias teing piaaverimaung tee sira'pau' ookara Karistoo' bakanavitu-koo anke o'norimaing-koo. Teka tenang temurii' nantoong dii'ankoita tenkenaako nii'noo'ke daankiarri'naang, tenang napo' dake pakueriai nanu'koo Kumponing dotuaravaina'. <sup>7</sup> Ai' teing teing osi sipau'nung Karistoo'koong miring berempaava'naang mutaanang-nupoong-eta paku piavoroa'. <sup>8</sup> Ee'noko nii'ke teing ee'ning tee' oro'nuka nantoong pakuarampiaing teing ninka nari' pakumeeriaina' tee kara masikung nau-anta-koo.

### Dioterepisi Oraka' Nkoarako'na'

<sup>9</sup> Ninge tee karavotonane' temu' daariantu'nung nii'ning kara minkuama dii' Karistoo' bakanavitu teke

otorimaing-koo. Teka tee naning Dioterepisi tevituu-koo baka pankaing-koo piavomaunge teing-koo, tee nkaang kara minkuantu'nung taaramuaruu'. <sup>10</sup> Tee'koo ning dii'anko meaing deeko' mera tee sira'pampaing tee temurii' aarumo teie nkovumaung nii' oraka' minkumurima daang-koong tuumpimurima. Ee'noko tee narung deea', nii'nung tee teie teing nii'maikorori' daankiaama nanaamaing diikanoo' basiariko bakana-va-koo bokuvuriaung, ee'noko dii' dootuu'nupoong-koo nii'ning orokovurikoo' teing damisimainku pava-koo kuung boku-koo piavoroko, ee'noko orokovurima kato bata'urikoo' Karistoo'navitu-eta.

### Demitereasi Tampa' Nkoarako'na'

<sup>11</sup> Ee mmaiko', Kaiasi, naning oraka' nkoarako tee bakaang aarumo siong-koo paaraveauka', tampa' nkoarako deeko' siong-koo paaraveai. Baa tee naning kapoo' tampara nkovumaung tee tee naning Kumponing-etaing ee'noko baa tee naning orara aarumo nkovumaung tee Kumponing tasi'pua'. <sup>12</sup> Ookarai nantoonge tee Demitereasi tee tampa' minkuaamaung ee'noko Ovoring bakaang kara masikung siompuko nari' sira'pamaung. Napo' nii'ke tee' nari' minkuampimaunge ee'noko tee dake noru'ei otong tee nii' niikaang kara tee masikung.

### Joonie Kaiasi Oo-koo Piavou'na'

<sup>13</sup> Ning tee kapoo'nanka mmou' otomemung da' daarirerompeu'ning, teka ninge teing ookara ane'koo daari-koo piamoa'. <sup>14</sup> Teka ee' noru'amaang, ning pa due'ka da'anko moo'naang, ee'noko nari' oing oomeeresi karompeaing.

<sup>15</sup> Mooa tee da'koo otoaing. Ainge da'maikori'ke tampara tampaamaung da'koo. Dake napo' tee' tampara tampema naueriai teing ookara mmaikori' miring tamperima.

Basi te'.

# JUUDE'

## Diikaang Baito Tareveriai Kara Masikung Too'dempaamaing Sirakaapuverima

(1:1-25)

**1** Ning tee Juude', tee Jiisuu' Karistoo' bakaang botovotonaa' ee'noko Jeemisi baara'ma'nung. Ninge aung karavoto~ daariamang dii'anko dii' Kumponing piaarurira bokururu'ning, teie Jiisuu' Karistoo'ke tarerurimaing. <sup>2</sup> Tee piasa unaa-anta, mooa, ee'noko piasa Kumponing-etaing maneena' okoruraining.

### Doorenang Tampara Too'dempaako'ning Dootuu'koo Tumpariru'na'

(2Pit 2:1-18)

<sup>3</sup> Ee mmaikori', tero tee ninge Jiisuu'ke nii' ookara nari' domamuru'na' daarirerompilinaang noru'anko', teka enang noru' paarimarara nii'nung kapoo'koo daarirerompimang dii' puring-antarampilinaang Kumponing bakaang kara nii'ninge pituaa'neeng-koo orokoverererii'naang, ai' nara'ka bakevui amuru'nung nii'ke tare-koo, ee'noko paari-koo makotua'. <sup>4</sup> Ninge tee' naurampimang nii'ning nau-antanuka Kumponing noru'aavaing dii'koo makenge tumpariko, aa'paama, "Tenang nii' Karistoo'navitu deemarira nii' makosi tamung kato piamoriaina' nko-koo, Kumponing kimata-koo amorompia', teie piaamurimaung-koo." Teing tee' minkuaama Karistoo' penkempaamaung tee ee'nara daurarong~ masikung, niikaang Oving makosi, nii'nung otoa'. Kumponing tero sira'puu'nung Daari Meekung-koo kuunge tee' teinge temurii' nantoonge barakosi' kompaavaina' botu basiarima. <sup>5</sup> Teie Kumponing naumurimaung aa'nou'nung: Iisipi'keta nantoong domang-antavurira napo' teing-koo nii'ning tee masika'antavaavaruu'ning dama'ke boo'antavuru'. Tee' ee'na' tero tampa' noru'eruna' napo' nauramping tasi'perii'naang. <sup>6</sup> Napo' teing koosinunanka naumurimaunge. Tero bono' Kumponing sipevuru'noo' dintu'aara bii'ka tau-ra'paririo' Kumponing te' biikanoo' otodoma masipo'keta bata'uru'. Ee'noko Kumponing taavi'urio' doong kante-koo tunumparava'noo'ke doonko otoromaung bera te'mung panka'mung simpe'urina'ning-koo basiarinaing. <sup>7</sup> Napo' tee' nari' teing osi pankeng Sodom, Komora', ee'noko nii'ning teke due'ke otoroko'ning oraka' nkoarikotaa' kera'pariru'.

Kaukauro nkoaama bakiaa'eema donkaang donkaang ninka nari' oraka' nkoariko'. Tee'koo Kumponing kimata-koo nta'ke tai-antavurira o'antavuru' nii'ke noru'koo.

<sup>8</sup> Teka bane temurii'koong kiimata sira'pari otoko, teing aing nantoong tamung noone narung nau-antavurima tee' nari' bii'ka biikaang mono orari-antavurima teing Sodom-nupoong nkoariko'na'. Teinge dimpa'aamaung tee Oving, ee'noko poore'aarikoo' teing koosinunanka~ Kumponing nerampurima nkovuru'ning. <sup>9</sup> Teka tee tero koosinung pankaing Maikol tee' nkoarava'. Tenang Sietani' ninka Moosesi bakaang mono boo'pario' nka-koo tata'eereema, bane pankaing, teka boonkoaritaa' teie Sietani' poore'uma kiimata-koo tampua' tee, teka aa'puu', "Ovinge orokorui bake-antaruaing da'." <sup>10</sup> Teka teinge aing nau-antanukai aming kapoo' noru'aavaung tamung kato poore'aakoo'. Ee'noko teing kau' karenaumonanka matauropananka-pina' onouaamana' onouaakoo'. Ee'noko kapoo' mono aapenung onoue narunge noru'aamaing tamung kato nkoaama orariarikoo'. <sup>11</sup> Piaaru'nuka teing, ai' teing teing Keini' bakanavung siempaamaing baara'ma'nung dupisi'ura barakosi' nkavuu'nung. Napo' Beelamu mooni' nka-koo daanameng-koo baka avario' dupisi'au'na' avarikoo'. Ee'noko Kooraa bakaning-pina' nari' Kumponing-koo bei'beiarikoo', ee'noko nari' orari-anta kune'aakoo' tee' urikamu' Kooraa dovang doonko tumpariru'na' kansi' kamaankuio'.

<sup>12</sup> Ookara batei-koo Oving bakaang taamang dii'ke navurariri nkoverimaung-koo domang orara ninka poroma tee orari-antavaamaung tee diikaang navu-navu. Dii' ninka nari' taamanirima amaiaa'oroa' bii'ka toonaakoo' duuku'arima. Teing aa'ning-pina' oro'nuka: kamo' kovere-pina', piong avitoitoi nkavuko apo'uarukoo'. Napo' tee koi' sinang bi'uaruio' bita'au'nung bakei boo'. <sup>13</sup> Napo' boo'a pirung-koong ta'da'parama koikoiri nkavuma avitoitoi sipuko oraka' oro'paramana' biikaang orara aarumo ninka tee' oro'nuka. Napo' teu-pina' beento'nu-pina' koon-tonavunge nanuau-pina' oro'nuka tero miru'uru'ning tunumparava'noo'ke doong kante oto'koo.

<sup>14</sup> Napo' tee' nari' Iinokei tarampeearama~ teing aing minkuvuru' tenang Aadama-ita depeto parapara~ ke-naanka-taa navarang-koo basiarako aa'puu'noo'ka, "Ooveriko, Oving tee bakaning koosinunanka karinga ninka nari' poroaing. <sup>15</sup> Teie nantoong ookara simpe'urii'naang ee'noko teing Kumponing-koo kupi'nuka oreng tampurira tora'antavuriai tee-koo bi-

ikaang ookara oraka' nkonanka-koo bakei Kumponing too'dena' nkoaamaing-koo, napo' ookara kara ari'ariri'nanka Kumponing-koo minkuaakoo' ee'ninge bakaning kare-nupoonge."

<sup>16</sup> Aing teing minkuminkuru ee'noko naro'keta tuumpi nkonuka, biikaang noru' karakaraa'koong pia narung sionuka, ampirinumpariri kareaamaing, ee'noko aurarima bauta' tamung eentanuka.

#### Taura'periai Teie Diikaang Baitoi Domang Puring-antarurii'naang

<sup>17</sup> Teka ee mmaikori', dii'ke norunoru'eriaing tee kapoo'nanka niikaang Oving Jisuu' Karistoo' bakaninge kara okovuri nkanukai dama'ke nkoaravaing sira'pau'na'. <sup>18</sup> Aa'daaru',

"Dama'ke asi'namu' poroaing teing Kumponing daang-antavai benkempaavaining Kumponing-koo kupi'oroitaa' biikaang noru' karakaraa'koong pia narung siompai."

<sup>19</sup> Teing aing ee'ning tankatankaang nkoaamaing, kansi' bakaang onou-koo otoromaing, Tanuaang Meekung otoroaing. <sup>20</sup> Teka dii', mmaikori', dii'ka deto kanirariaing diikaang masika'anta aa'na' meekung-koo. Kunsirariri tee ninka iri' ninka Tanuaang Meekung-etaing ninka. <sup>21</sup> Otori te' otoriai Kumponing

bakaang piaae kuung deempui otonoo'ke, banainge nemperi tee Domang-anta niikaang Oving Jisuu' Karistoo' piarurira domaang oparavauka'noo' basi-antaruriana'. <sup>22</sup> Teing daang-koong nau-antanuka taaravaarima papaaravarimaing piaaverereri onou koong-antavererimaatoai. <sup>23</sup> Nii'ning tampa' taararaaiaining namu'ke mosianung-koong nta'keta batusi'erererima domang-antaverereri. Ee'noko napo' nii'ning Oving-anko bokuerereri tampa' nkoverereri, teka biikaang aarumo mono bakaang pia siona'koo maarerori pinka'dariaing, baaro'duriko teing pina' nari' dua'dari'neenga.

#### Kumponing Daangampampiai

<sup>24</sup> Enang si'noora'dampima tee Piikonara bakaang tanata-koo napo' si'damping dii' dua'dariaroo'naang. Ee'noko teie dii' kiioraa'antarurira bakanoo' osi meenasi-po'noo' basi-antarurii' doturotu ninka. <sup>25</sup> Tee tee narung Kumponing masikung, niikaang domang-anta, tee ninka niikaang Oving Jisuu' Karistoo' ninka. Otoang tee meenasi tee Kumponing-koo, tee dauraring anka-ankang deempai, teing ookara kapoo' tanata tee, iri' okora' - urikamu', enang, ee'noko dama'ke ookara batei-koo. Ee', tee' nari'.

# MAKENSI'NUNG OO

## Kara Baavootunanka Ane'kooning

1:1 Jiisuu' Karistoo'ke Kara Botovuu'na' ~Kenaanka-taa Dootuu'anko  
 4:1 Sipisipi'ke Buuku Paninga Bere'uiio' Kansinupoong Manki'oroko Oona'  
 12:1 Sietani' Bakanaving Nari' Oraru'kiaako Oovuu'na' Joonie  
 21:1 Kumponing Ookara Kapoo' Neraka'antavuko Oovuu'na' Joonie

### Jiisuu' Karistoo'ke Kara Botovuu'na' ~Kenaanka-taa Dootuu'anko

(1:1–3:22)

**1** Aung tee Jiisuu' Karistoo'ke sira'puu'nung Kumponing nauvuio' kapoo' da'deng ta-vo'kuaing-koong bakaning botovotonaa'nuka nau-anta-koo. Ee'noko bakaang koosinung~ botovuiio' sira-ka'antamuu'naang ning-koo Jooni-koo bakaang botovotonaa' deemarako. <sup>2</sup> Ee'noko teing kapoo'nanka ning-koo siraka'antavuiio' oamira tee Kumponing bakaang kara masika'antavantu'. Tee'koo sira'pamaang ninge, tee kara masikung Jiisuu' Karistoo'ke siraka'antavuu'nanka. <sup>3</sup> Baa tee naning aung kara tarampee-koong~ deeruvuaing dootuu'domai tee biraanke nkavuaing, ee'noko teing taaravaara pinka'aavaining teing biraankeariainge teing kapoo' daariari otoning pinka'aara, ai' batei tee due'umaang.

#### Joonie Karavoto~ Daarivuu'na' ~Kenaanka-taa Dootuu'anko

<sup>4</sup> Aung kara ninge Joonie daariamang dii'koo ~kevuntu'ka-taa osi-koo dootuu'nupoong otorimaing Eesia-nameensi'kooning-koo. Kumponing teie aa'nunge, teroita otou'nunge, e'mung tee' otong, ee'noko dama'ke tee' nari' otoi poainge, teie piaaruri moaruriaing. Napo' teinge ~kenaanka-taa Tanuaange Kumponing ba'nanumanoo' uro'kanoo'ke otoromainge piaaraari moaraariainge. <sup>5</sup> Napo' Karistoo'ke tee' nari' piaaruri moaruriai. Teie ee'narai motekaro'ari kara masikung sira'puu'nunge bera boo'paru'noo'ke basi. Tee tutuna'nung boo'keta daa'aru'na'koo, napo' Ooringe dauraronuka tanatavurimaung kansinupoong. Tee Jiisuu' Karistoo' tee ee'nara nii' piaamurira bakaang erenge simpiri'antamuru' niikaning oraka' nkonanka-ita. <sup>6</sup> Ee'noko nii'

bakanamuaang deeng-antamurira napo' Bauma Kumponing bakanavitu pirisiti'nuka deeng-antamuru' tee-koo ookara meenasi ee'noko purinto' doong kante okovui otoi otoaing. Ee', masikung. <sup>7</sup> Ooveriaing tee tee poo'naang ka'mo' ninka nari' ookarai tee ooaava'naang. Teing tee too'pau'ning ee'noko ookara nantoong kansinupoong teing biromparii'naang tee poko ooaara. Ee', tee' ee'na'.

<sup>8</sup> "Ning tee tutuna'naare ee'noko napo' asiranaare, napo' uro'nunge ee'noko dama'nunge." Tee'pumaung teie Ooring Kumponing. "Teroita o'nou'nung, e'mung tee' o'nong, ee'noko dama'ke tee' nari' o'noi moainge. Ning tee Piikonara, ookara kapoo' nko-koo makosi."

#### Karistoo' Jooni-koo Oro'parako Oovuu'na'

<sup>9</sup> Ning tee Jooni dii'maiko' dii' ninka nari' baike kompampiru'nung mii'kampiritaa' Karistoo' bakaang muu'koo. Ee'noko mui' miring Patimos-koo si'mau' tee kara Kumponing bakaang daankianko Jiisuu' sira'pama. <sup>10</sup> Tee-koo doong Ooring bakaang-koo ning tee teie Tanuaang Meekunge korimuiio' ning-koo dama'dua aorong pankaing taaravantu' tuuviri-pina' karoma aa'puko, <sup>11</sup> "Kapoo' dake ooveing buuku-koo daariera teing dootuu'nupoong-anko botoveai, teing ~kevuntu'ka-taa osi-koo otoromaing aa'ning-anko: Epeses, Simeena, Peekamami', Taiataira, Saadis, Piladelepi', ee'noko Leodesia'."

<sup>12</sup> Tenang tee aorong ning karamuko'nung ooa'naang tee-aape bere'maru', ee'noko bere'marama ~kenaanka-taa daamu ba'nanang-kooning kooro-koo nkonii' ooantu'. <sup>13</sup> Ee'noko teenanka daamu ba'nananka-koo meeroo'ke narung naning-naumpo' teke otoko, mononopa' isikung kau'koo basi kurumpari, ee'noko tokonii'koo kooronanka na'nanii' murukeue kapeto keemoomparitaa'. <sup>14</sup> Bakaang bore' ee'noko dapo aa'na' kakaara sipisipi'koong dapo-pina' ee'noko ka'mo'koo tu'betu'be-pina' oro'. Bakaang duta nta'pina' urung. <sup>15</sup> Bakaang kau' baraasi' nta'ke

ivai'nii'pina' oro', ee'noko bakaang aurong ntonanka uutuaramana' taara. <sup>16</sup> Bakaang bireng tampangaange beento' ~keura-taa kompuri otoko', ee'noko karang-eta bainatu ookamenta irinto' basiaru', ee'noko bakaang oing duaa'pina' aa'na' sisisiisi.

<sup>17</sup> Tenang ninge oamira tee, ning tee-koo kau'kanoo' dua'maru' boo'pina' mantomari. Teka teie ning-koo bireng tampangaang pante'mura, aa'muu', "Aroreauka'. Ning tee tutuntoma ee'noko napo' o'do-mai. <sup>18</sup> Ee'noko ning tee napo' Domantoo'. Ning tee moomira napo' daa'maru'nung. Ee'noko tee' nari' do-mamari o'noi o'nomaa'noaing ookara batei-koo. Ee'noko ninge tee kii'nanka kompansi o'nong aa'noko: boo'koong ee'noko tutueu-aapening. <sup>19</sup> Enang tee kapoo'nanka dake ooveining daarieaing enang otoi-ning ee'noko dama'ke tavo'kuaining nari'. <sup>20</sup> Aung tee mirumiru' aing aa'ning oovemaatomaing-koong: ~keura-taa beento' ning-koo tampangaang-koo otoi-ning ee'noko napo' ~kenaanka-taa daamu ba'nananka kooro-koo nkonii' otoi-ning. Aing ~keura-taa beento' teing teing koosinunanka makosining, teing dootuu'nupoong ~kevuntu'ka-taa osi-koo otoromaing tanatanuka. Ee'noko teing napo' ~kenaanka-taa daamu ba'nananka kooro-koo nkonii' oovemaatomaing teing nkaning ~kevitura-taa dootuu'nupoong."

#### Tee Epeses-aapening Minkunaa

**2** Ee'noko aa'muu' ning Jooni, "Narung karavoto daarieai tee-anko koosinung Epesesie dootuu'nupoong tanatavurimaung-anko. Aa'peaing, 'Aung kara tee ~keura-taa beento' tampangaange kompuri otomaung bakaang ee'noko teing-koo ~kenaanka-taa araka ba'nanang kooro-kooning-koo meu'ke nanukoo'. Teie aa'puing, <sup>2</sup> "Ninge tee dakaang nko-nkonanka noru'ansi o'nong pore' kompemana' aa'na' mintoontarama iirau'darava'. Ee'noko orenanka ninka otori domang aa'na' manki'doma dake baakeeneveri sira'perikoo' teing bii'ka daang kara okovuri nkanuka tamparimaing. <sup>3</sup> Ninge noru'ansi o'nong pankaroong banainge manki' kompeu'na' mintoontarama iirau'darava' pore' kompema nkaang miring-koo, ee'noko tee' nkorarama tee konteroang. <sup>4</sup> Teka da' narung kapoo' ning-koo oraka' apuka'dari otong, dake ning tee pi-aameko'na' enang piaamea' otong. <sup>5</sup> Norunoru'eai tee' tero otoko'na' enang dua'darara otoinoo'keta ee'noko enang napo' bere'darara teing nko-nko tero nkoveko'ning nkoveai. Tee tee bere'daravaruko ning mera tee dakaang daamu ba'nanang tonta'ampaing otomanoo'keta. <sup>6</sup> Aung tampara aarumo da'koo otong, dake tee munte'emaung teing nko-nko oreng Nikolas-nupoonge nkoaamaing, tee aarumo tee ninge munte'emaunge. <sup>7</sup> Baa tee naning punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo. Baata teing parapaara puru'aavaining tee taura' avorompaigning tee koi' domang-anta-koong sinang maa'aava'naang teke Kumponing bakana-mono-koo meeroo'ke otomaung-koong." ""

#### Tee Simeena-aapening Minkunaa

<sup>8</sup> "Napo' narung karavoto daarieai tee-anko koosinung Simeenai dootuu'nupoong tanatavurimaung-anko. Aa'peaing, 'Teie ookara kapoo'koo tutuntoma ee'noko o'doma otomaunge, ee'noko boora napo' do-mamparu' aa'nunge aa'puing, <sup>9</sup> "Ninge tee dakaang nko-nkonanka, arikananka ee'noko ata'oi'dari otomana' noru'ansi o'nong, teka da' tee tanuaang-aape maneenara. Napo' teinge Ju'nupoong tamparimainge oraka' minkuraamana' noru'ansi o'nong, teka teinoo' Ju'nupoong masikeng deea'. Teing teing Sietani' bakanavitu-kooning. <sup>10</sup> Aroreauka' teing-koo kapoo' arikananka dake kune'eaining-koo. Ee aung, Sietani'ke tee paara-anta-koo dii'koo nii'ning kiimatana-va-koo sipurii'naang, kivora doong-koo arikung-koo otorii'naang, teka tee aroo'dariri motekaro'nuka otoriaing bane boo' dovang-koo, ee'noko maku'koo ninge tee dii' piiko-nupoong avuavu' tampara arompima tee baakopo domampari oto'koong kuruntampiaing. <sup>11</sup> Baa tee naning punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo. Baata teing parapaara puru'aavaining teinge tee kemu'kantung boo'pari oto' tora'paavauka'nung." ""

#### Tee Peekamami'aapening Minkunaa

<sup>12</sup> "Napo' narung karavoto daarieai tee-anko koosinung Peekamami'ke dootuu'nupoong tanatavurimaung-anko. Aa'peaing, 'Teie bainatu ookamenta irinto' kompui otomaunge aa'puing, <sup>13</sup> "Ninge dakaang nko-nkonanka ee'noko te' da' otoinoo' noru'ansi o'nong, te' ee'noo' Sietani' daurarong~ deempari otomanoo'. Teka dake tee nkaang miring pinka'ei otomaung ee'noko dakaang masika'anta ning-koo tee' nari' pinka'ari otomaunge, bane tee Antipas ning-koo aroo'ari motekaro'ari kara tampa' sira'puko'nung dii'koo meu'ka tavaio' teka ee'noo'ka Sietani' otomanoo'ka. <sup>14</sup> Teka da'koo kapoo' ninge nii'ning oki'ning aarumo oreng otoko ooamaang, aa'noko dii'koo nii'ning tee Beelamu bakaang nau-anta kompai otorong, teie ee'narai Baalaka' Isireeli-nupoong dua'antana' nau-antavuu'nung. Aa'noko tee taamang kumponing daang-koong-koo darinii' naiaava'naang aavavuru', ee'noko napo' kaukauro-koong aarumo nkoaava'naang siong-antavuru'. <sup>15</sup> Napo' nii'ning dii'koo Nikolas-nupoong biikaang nau-anta kompai otorong, tee ninge munte'amaung. <sup>16</sup> Temurii'keta bere'dariai. Bere'dariaruko deeko' tee ning namu'ke dii'anko mora turamparama'naang teing teie bainatue nkaang karang-etainge. <sup>17</sup> Baa tee naning punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo. Baata teing parapaara puru'aavaining ninge tee taamang kore'naning paninung avorompaigning kansi'nupoong-eta baku'nii', napo' tee kapang kakaara avorompaigning naruna' naruna', nkanoo' kuung tung-



koo taura'nii' taa'ni'anta, tee miring nerakung biikaang daarinii' tere'koo. Naninge noru'ua' tee miring, teka teie tere' nkavuainge baka noru'ui otong." ""

### Tee Taiataira-aapenung Minkunaa

<sup>18</sup> "Napo' narung karavoto daarieai tee-anko koosinung Taiatairai dootuu'nupoong tanatavurimaung-anko. Aa'peaing, 'Teie Kumponing Bauringe duta nta'pina' urung naning tupu'ui ooe, ee'noko bakaang kau' baraasi~pina' nta'ke iivai'nii' pina' oro'na' aa'pumaang, <sup>19</sup> "Ninge tee dakaang nko-nkonanka noru'ansi o'nong, napo' tee dakaang paa ee'noko tee masika'anta ee'noko napo' teing nantoong pakuerimana'. Ee'noko parapaara-koo iirau'daravarukoo', ee'noko enang noru'ansi o'nong aa'na' masika' mintoontaramaang tutuna'noo' divu'antavei. <sup>20</sup> Teka aung kapoo' ninge da'koo oomaang, dake teni manikuma Jesabel baka nakaronani' tamparamai tau-ra'peio' nau-antavarama nkaning botovotonaa'nuka ako'ke be'antavurimaung. Ee'noko aa'ning-koo barevurikoo': kaukauro nko ee'noko kumponing daangkoong-koo darimpaamaung taamang nai-koo. <sup>21</sup> Ninge tee teni batei avonsing bere'araa'naang, teka teni pivoaruing bere'koo, teieta bakaang aarumo kaukauro nko-ita. <sup>22</sup> Ee aung, teni teni ninge enang sisikeera pankaing-koo sipama'naang ee'noko teing teni ninka nari' nampeesi orariaamaing kiimata pankaing-koo siparama'naang, teing biikaang orara nko-nko-ita bere'ariaruko deeko'. <sup>23</sup> Ee'noko tenie baurukaa' dupisi'arampainge, ookara dootuu'nupoonge osi kante-koo noru'maavaina' ning tee ee'nara nantoong biikaang onou domang-koo noru'ansi o'noing. Ee'noko ninge ee'narai nantoong naruna' naruna' kante nkoverimana'koo bari'dampiaing. <sup>24</sup> Teka dii' nii'ning Taiataira-nupoong tee temurii' nau-anta siomperiaung, napo' barerariarukoo' tee-koo nii'ninge Sietani' bakaang makensi'nung tampaamaung-koo. Ninge aa'dampimang dii'koo tee nii'ning kapoo' manki' pante'ampauka'nung. <sup>25</sup> Teka tee kapoo' enang komperi oting tee tampa' pinka'eri otoaing bera ning moainoo'ke basi. <sup>26</sup> Baata teing parapaara puru'aama nkaang nko-nko kompai otoroainig bera botu basinoo'ke, ninge tee teing iri'po'nupoong deeng-antavarampaing ookara nantoong-koo amutemuu'koo daua teing tanata-koo. <sup>27</sup> Ning tee Mma'ke temurii' iri' amuu'nung Daari Meekunge aa'pumana', 'Teie tanatavuriaing aini-koong ninka donsi' ninka. Ee'noko teie kansi'koong utau-pina' putura'uriaing.'

(Kena 2:9)

<sup>28</sup> Napo' tee ninge avorompainge teing tee maatara.

<sup>29</sup> Baa tee naning punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo." ""

### Tee Saadis-aapenung Minkunaa

**3** Ee'noko aa'muu' ning Jooni, "Napo' narung karavoto daarieai tee-anko koosinung Saadisie dootuu'nupoong tanatavurimaung-anko. Aa'peaing,

'Aung tee kara teie ~kenaanka-taa Kumponing bakaning tanuaang-po'nunge ee'noko napo' ~keura-taa beento' tampanaange kompui otomaunge aa'pumaang, "Ninge tee dakaang nko-nkonanka noru'ansi o'nong ee'noko nantoonge domantoo' tantaamana' noru'ansi o'nong, teka da' boo'pina' oora-maang. <sup>2</sup> Deto tanteraravai! Teing kapoo' oting puring-antaveai mme' boo'paravaruko, ai' dakaang nko-nko koomparavaung ooreronsing nkaang Kumponing-koo dutakanoo'ke. <sup>3</sup> Norunoru'ei dake tee kapoo' taaravera nkaveu'nung, ee'noko pinka'ei tee. Bere'daravai dakaning orarananka-ita. Da' tanterari otoauka'nung deeko' tee ning da'anko tee bakiaa' nko-pina' tavo'kampaing dake noru'eauka'nung batei-koo. <sup>4</sup> Dii'koo nii'ning Saadisie otorining-koo biikaning mononopa'nanka ku'mi'antavaava' otoroinig. Ee'noko teing ee'ning teing makosinuka ni'ninka nari' nanampiainig mononopa' kakaara kurumpariri. <sup>5</sup> Baata teing parapaara puru'aavainig teing teing-pina' nari' kurumpariainig mononopa' kakaara, ee'noko ninge biikaang miring tee piu'ampauka'nung teieta buuku domantoo' domampariainig biikaang miring daarinii'keta. Ee'noko ninge tee biikaang miring Mma'koo ee'noko koosinunanka-koo dutaka-noo'ke sira'pampaing nkaning tamparama. <sup>6</sup> Baa tee naning punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo." ""

### Tee Piladelepia-aapenung Minkunaa

<sup>7</sup> "Napo' narung karavoto daarieai tee-anko koosinung Piladelepia'ke dootuu'nupoong tanatavurimaung-anko. Aa'peaing, 'Aung kara tee tee Naning Meekung ee'noko Paariaravaung bakaang, tee Deevita' bakaang kii' kompui otomaung teri'ke daate'uko nii'nung naninge napo' da'puarupeu', napo' da'puko deeko' nii'nung naninge daate'uarupeu'. <sup>8</sup> Teie aa'pumaang, "Ninge tee dakaang nko-nkonanka noru'ansi o'nong da' iri'navu oto'deruko nkaang kara pinka'ei siompe-maung. Ee'noko nkaang miring penkempeaunge. Tee'koo ninge karanaang daate'deromira sipansing da' tung-koo nii'nung naninge kumpi'koo makotua'. <sup>9</sup> Ee aung, nii'ning teke Sietani' bakanavitu otorong daang Ju'nupoong tamparimaing nka Ju'nupoong deea', tosi baukonuka. Ee aung, teing teing ee'ning da'anko botoaranko da'koo kau'kanoo' kinkinaara pankaing-antaraava'naang, ee'noko da' ninge piaaramana' noru'aavai. <sup>10</sup> Ee'noko dake tee nkaang kara boonko mii'kii pinka'emanoo'koo da' tee ninge tampa' tarerampaing tee-koo batei parapaara arikung-koo ookara nantoong kansinupoong-koo tavo'kuaing-koo, paaravurima ookara. <sup>11</sup> Ning tee da'deng moo'naang, tee kapoo' kompei oting tee pinka'ei otoko, naninge pari'du'neenga tee dakaang baakopo. <sup>12</sup> Baata teing parapaara puru'aavainig tee ninge pava pankava-koo natuku pina' keeng-antavarampaing nkaang Kumponing bakanava-koo. Ee'noko teketa tee tee tenkenuau-

† Ooveai Mkn 2:10.

ka'nung, ee'noko ninge tee tee-koo nkaang Kumponing-koong miring daariampaing. Napo' tee nkaang Kumponing bakaang osi pankamono-koong miring tee-koo daariampai, tee nerakung Jerusalem' paning-eta depeto poaing ee'noko nkaang Kumponing-eta poaing. Ee'noko napo' koonto' nkaang miring nerakung tee-koo daariampaing. <sup>13</sup> Baa tee naninge punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo." ""

#### Tee Leodesia'aapenung Minkunaa

<sup>14</sup> "Napo' narung karavoto daarieai tee-anko koosinung Leodesia'ke dootuu'nupoong tanatavurimaung-anko. Aa'peaing, 'Teie Miru' Paariaravaunge, Motekaro'ari Kara Masikung Tampa' Sira'ke Kumponing nkovuru'ning-koo okonarai aa'pumaang, <sup>15</sup> "Ninge tee dakaang nko-nkonanka noru'ansi o'nong, da' tee baru' ka'matoong deea' ee'noko baru' uipaarii' deea'. Tee'koo ning piamomaang da' tokoona' nari' deentari oto'koo, aa'noko uipaarii' deeko' nii'noo' ka'matoong. <sup>16</sup> Teka da' mantong-koo meu' basi, baru' uipaarii' deea' ee'noko baru' ka'matoong deea', tee'koo ninge da' nkaang karang-eta kuripiorampaing. <sup>17</sup> Dake enang aa'pemaang, 'Ning tee enang ookarakoo kavo-koo makotunsi o'nong; enang kapoo'koo pia o'noa'. Teka dake noru'ea' tanuaang-aape da' tee pi-aaru' papovuru', ata'oi', kaputu', ee'noko simpenoi'. <sup>18</sup> Ninge koonto' nauramaang da', ning-koo tee kooro nta'ke simpe'ura kiiroraa'antavuu'nung moo'siiaing, tanuaang kavo-po'nung deentaraa'naang. Napo' mononopa' kakaara ning-koo moo'eai simpenoi' ooraamaung nopa'daravaina'. Ee'noko napo' marasini moo'eainge ning-koo, duta-koo si'darara tampa' oomeaina'. <sup>19</sup> Ninge tee teing nantoong piaavaramaing teing oraka' nkoaako aka'paransi koong-antavaramaung. Tee'koo nkaning meekupoong deentari' otorii'naang kevi'darima bere'dariai! <sup>20</sup> Ooveriko, ning tee aung karanaange donkonansi karomang. Baie naninge nkaang aorong taaravura karanaang daate'uko deeko' ning tee tee-anko tumarara tee ninka nari' taamanampeaing. <sup>21</sup> Baata teing parapaara puru'aavaining ninge tee makosi-antavarampaing nkanoo' ba'nava'nani'domai miirinkanoo'ke nari' ba'nanui oto'koo, tee' nari' ninge puru'amira Mma' bakanoo' ba'nani'domai miirinkanoo'ke nari' ba'nanunsi o'noremana'. <sup>22</sup> Baa tee naninge punkang-po'nunge tee tampa' taaravuaing tee kapoo' Tanuaang Meekunge minkuvumaung dootuu'nupoong-koo osi kante-koo." ""

#### Sipisipi'ke Buuku Paninga Bere'uiio' Kansi'nupoong Manki'oroko Oona'

(4:1-11:19)

#### Tee Daurarong~ Pankaing-antavaamana' Bakanoo'ka Paning-koo

**4** Teketa napo' ooama narung karanaang daate'ari otoko paning-koo ooantu', ee'noko teketa tee narung aorong tutuna' taaravantu' aa'nunge tuuviripina' karoma aa'muu', "Doompeto a' poai. Kapoo' aung-koo dama'ke basiaraa'naang otoing naurama'naang." <sup>2</sup> Teketa tenang namu'ke Tanuaang Meekunge kurunkemuio' teka paning-koo narung Daurarong bakaang ovorimpari ba'nava'nani' ooantu' teke narung naning ba'nanui' tee-koo. <sup>3</sup> Tee teke ba'nanui otoko'nung bakaang oing oo-koo tee-pina' kapang jasipa'pina' pipi'daari, ee'noko konilian aa'ning-pina' arakavari otoko', ee'noko te' ee'noo' ba'nani'doma eeravoi korovui otoko', kapikapia'umaunge tee-pina' kapang eemarioli-pina' oro'. <sup>4</sup> Te' napo' tee daurarong ba'nanui otoko'noo' ke-naanka kivora-ita karenaumo ovontumpariri ba'nava'nani'nankai koroai otoroko'. Teing-koo ba'nava'nani'nanka-koo kenai'ka-ita karenaumo nii'ning ovontung ba'naniai otoroko', mononopa' kakaara kurunii'nuka ee'noko bore'koo kooro-koong baakopo kurunii'nuka. <sup>5</sup> Teketa tee daurarong ba'nanui otoko'noo'keta pipirakai ninka nininimpuma kurungkurung tompoo'kuko'. Ee'noko teke ovorimpari ba'nava'nani'koo uro'kanoo'ke napo' puu ~kevuura-taa urumpariko', teing teing ee'ning ~kevuura-taa Kumponing bakaning Tanuaang. <sup>6</sup> Ee'noko Daurarong ba'nani'domai uro'kanoo'ke narung kapoo' otoko' pirung-pina' oro', aa'na' neenkiroo' oorara pina' oro'. Ee'noko te' Daurarong ba'nani'doma kapoo'ke karenaumoi domantoiai koroai otoroko' dutai mmou'ke maanto' ookamenta-koo, uro'kanoo' ee'noko dama'ukanoo'. <sup>7</sup> Tutuna'nung teing-koo kapoo'koo domantoia-koo laioni-pina' oro'. Kenaanka-nung napo' boromaka'koo baarinung-pina' oro'. Beenaumo-nung napo' oinoo' naning-pina' oro', ee'noko karenaumoning kapoo' mareoi' purerenui otoing-pina' oro'. <sup>8</sup> Ee'noko teing-koo ookara kapoo' domantoia-koo naruna' naruna' biikaang kupa' ~narung-taa. Ee'noko napo' duta mmou'ke maanto'ke bera kupa'ka boonge, aa'noko uro'kanoo'nairu ee'noko dama'dukanoo'nairu nari'. Ee'noko muung ee'noko doong kenavariri otorokoo' aa'paama, "Meekung, meekung, meekung tee Ovoring Kumponing, ookara-koo dau basie pi-ikonara. Teroita otou'nung, e'mung tee' otong, ee'noko dama'ke tee' nari' otoi poaing."

<sup>9</sup> Ee'noko teing kapoo'nanka domantoia tee' nari' kenavarima Kumponing meena'antavaakoo' biivimpaa-ma ee'noko dotuarima ee'nara-koo teke ovorimpari

ba'nani'domai ba'nanui otomaung-koo tee tee' nari' otoi otomaung ookara doong-koo. <sup>10</sup> Ee'noko tenang tee' nkoariko teing kenai'ka-ita karenaumo ovontung te' tee-anko teke ovorimpari ba'nani'domai ba'nanui otomaung-anko uro'kanoo' miinge keemparima daangampaakoo', tee tee' nari' otoi otomaung. Bi-ikaang baakopo te' tee-koo ba'nava'nani'koo uro'kanoo' sipaarima kenavarima aa'paakoo', <sup>11</sup> "Ovoring ee, Kumponing, da' bakei makosi nka-koo tee meenasi ee'noko tee biiving ee'noko tee purinto', ai' da' tee ookara kapoo'nanka nkoveu'nung. Teing teing dakaang pia-koo dake nkoverio' domampariri otoromaing."

#### Joonie Narung Buuku Pinka'nii' Oovuu'na'

**5** Ee'noko tee-koo daurarong~ bakaang ba'nava'nani'koo teke ba'nanui otou'nung-koo tampanaang-koo ninge narung buuku ooantu' ookamanta-koo daarinii', kuunge ee'noko dama'due, teketa dau-eta ~kemu'ka-tae pinka'nii' teie pinkapinka'ke, aa'na' meekunge. <sup>2</sup> Teketa narung koosinung~ purinto' ooantu' teie aa'na' bokuma aa'puko, "Baa miring-po'nung ane' buuku bere'koo makosi? Baa kansi' okonara taa'ni'antavari aing pinkapinka'nanka kaape'upeu'?" <sup>3</sup> Bakei makotua' naning miring otoaunge tee aung ane' buuku dapa'uma kuung oookoo, ee'noko tee' oro' naning miring-po'nung otoaruu' aa'noko paning-koo otoromaing-koo napo' kansi'koo o'norimaing ee'noko kansi'ka kuunge otoromaing-koo. <sup>4</sup> Ee'noko ning bakei aa'na' biromaru' naning tene' buukunane' bere'ura kuung oovuaing otoarui'. <sup>5</sup> Teketa tenang teing-koong ovontung-koonge narunge aa'muu', "Birontaravauka', ee aung. Tee Laioni Juda bakanamuaang-koong bore', napo' Deevita' bakanaving-koonge, teie tee parapaara puru'uing. Teie ee'narai tee pinka'nisi kaape'ura tee aung ane' buuku bere'uu'naang."

#### Joonie Teu Sipisipi' Kampianu Oovuu'na'

<sup>6</sup> Teketa napo' ookama sipisipi'nu Kampianu ooantu'nung teke tee ovorimpari ba'nani'domai, ee'noko teing karenaumo kapoo' domantoia otoroko'noo'ke donkonuio' teing-koo ovontung-koo meu'ke. Teu ee'nu dupisi'au'nu-pina' oro'nu. Ee'noko kaintananka ee'noko dutananka ~kenaanka-taa otoinu, teing teing ~kenaan-ka-taa teing Kumponing-etaning tanuaang ookara kansi'koo botovuru'ning. <sup>7</sup> Teketa tenang teue Kampianue bera tee buuku nkavuu' tee-koo ovorimpari ba'nava'nani'domai ba'nampari otomaung-koo bireng-koo tampanaang-koo. <sup>8</sup> Ee'noko tenang teie tee buuku nkavuko teing kapoo' karenaumo domantoia ee'noko napo' teing kenai'ka-ita karenaumo ovontung te' teu-anko Kampianu-anko kau'kanoo' dapuu'kai dua'ariru'. Ee'noko teing ovontung aing aa'ninge kanteariri kompai: kapoo' kiita-pina' oro'ning ee'noko napo' utau kooro-kooning kanteng paro'nii' tampa' nu-uraa'ke maanto'. Teing teing kunsinanka nantoong

meekupoong biikaning. <sup>9</sup> Teketa kena nerakung kenavaama aa'paako', "Bakei da' tee makosi tee aung ane' buuku nka-koo ee'noko tee pinkapinka' kaape'era bere'epeu', ai' da' tee dupisi'dau'nung ee'noko dakaang erenge Kumponing-aape nantoong mmou' moo'eru' avi-tevitu-eta ee'noko ookara kara amute-murii'keta ee'noko ookara nantoong amutemurii'keta, ee'noko ookara nantoong kansi'nupoong amute-muu'keta. <sup>10</sup> Dake narung muu' deeng-antaverining napo' piristi'nanka miru'eri niikaang Kumponing bakaning kansi'koo tanatavarii'naang."

#### Teu Sipisipi' Kampianu Biivimpau'na'

<sup>11</sup> Teketa napo' ooama kena-koong aurong taaravantu' koosinunanka bakei dakuraaku' deeru-paa'ke koroi kenavariko teke ee'noo'ke Daurarong~ ba'nanui otoko'noo'ke teing ninka ovontung ee'noko teing kapoo' domantoia ninka nari' otoroko'noo'ke. <sup>12</sup> Aa'paako' aa'na' bokiaama kenavarima, "Makosi tee Kampia dupisi'au'nung teing aing aa'ning nka-koo: purinto', kavokavoro, matau, iri', biiving, meenasi, ee'noko tee biraanke." <sup>13</sup> Teketa napo' auronanka taaravantu' ookara kapoo' domantoia-ita aa'noko paning-kooning, kansi'kooning, kansi'ka kuunge otoromaing ee'noko pirung-kooning. Teing ookara tenairu-koo otoromaingee kenavarima aa'paako', "Biraanke ee'noko biiving napo' meenasi ee'noko tee purinto' tee tee-koo Daurarong deempari ba'nanui otomaung-koo otoi otoaing ookara batei-koo, ee'noko napo' tee-koo Kampia-koo otoaingee." <sup>14</sup> Ee'noko teinge kapoo' domantoia karenaumoi aa'paako', "Ee', masikung." Ee'noko teing ovontung doonko dapuu'kai dua'arima dootuu'ariko' tee-koo.

#### Teue Kampianue ~Narung-taa Pinkapinka' Kaape'uu'na'

**6** Teketa tenang ooansio' teue sipisipi' kampianue tutuna'nung pinkapinka' kaape'uu' teing-koo ~kenaanka-taa pinkapinka'nanka-koo, ee'noko taaravansi o'noko teing-koo karenaumo kapoo' domantoia-koo narunge kurunkurung-pina' karoma aa'puu', "Poai." <sup>2</sup> Ee'noko ooama navoro' oosinavoro' kakaaranavoro' ooantu', naning tevorokoo ba'nanui otou'nunge mpaang kompui otoko. Ee'noko piikonara deemparako baakopo tee-koo kurumpaio' bera napo' dau basinoo' pinivurima boong deempuru'. <sup>3</sup> Teketa napo' kenanka-nung pinkapinka' kaape'uu', ee'noko napo' taaravansio' kenaanka-nung kapoo' domantoia-koonge aa'puu', "Poai." <sup>4</sup> Teketa napo' kevorokana-avoro' oosi-koo urumpuma navoro' bakoaru', tevorokoo daue naning ba'nanui otoko. Bainatu isikung kong-antavau' ee'noko taura' nantoong kansi'nupoong-eta mooa pari'uriko turampeema dupisi'eeing-koong avau'. <sup>5</sup> Teketa napo' beenaumo-nung pinkapinka' kaake'uko beenaumo-nunge kapoo' domantoia-koonge aa'puko taaravantu', "Poai." Tee'puko oosina-

voru' mutaanu'navoro' poko ooantu', tevoru'koo naning ba'nani otoko birenge sikeere kompui. <sup>6</sup> Ee'noko narung aurong taaravantu' teing-koo kapoo' karenaumo domantoi-ankoiita karoma aa'puko, "Taamang apuka'parako nau' bau'nu' na'mung doong-koong moo' siompei sikeereveai, ee'noko beekuri aane tee' nari' siompei sikeereveaing, teka mou dovang koi' sinampo'ning orarieauka'."

<sup>7</sup> Teketa napo' tee karenaumo-nung pinkapinka' kaape'uko napo' tee karenaumo-nung kapoo' domantoo' karoma aa'puko taaravantu', "Poai." <sup>8</sup> Teketa ooma oosinavoro' booruraa'navoro' ooantu'. Naning tevoru'koo dau ba'nani otou'ning bakaang miring Boo'. Ee'noko dama'keta tutueue siompui nanuko'. Ee'noko iri' tenaanka avaaretu' nantoong kansi'nupoong karevituri-koo tankampaareta teing-koo navitu dupisi'koo aa'ninge: bainatue dupisi'koo, peerai boo'koo, doovanikainge siipai dupisi'koo ee'noko kau'karenaumo-nankai dupisi'aariai.

<sup>9</sup> Teketa napo' tenang teie Sipisipi' Kampiai pa'noko'ning pinkapinka' kaape'uko teka boonturo-ma-koo boonga nantoong Kumponing bakaang kara pinka'ai sira'paako dupisi'aaru'ning biikaang tanuaang ooantu'. <sup>10</sup> Teinge aa'na' bokiaama aa'paako', "Ovoring purinto', meekung ee'noko paariravaung, batei are-nang dake ookara nantoong kansi'nupoong simpe'eri-ra teing nii' dupisi'maaru'ning maku'eriaing?" <sup>11</sup> Teketa teing mononopa' kakaarai kantevurira nii'naroong napo' uavoroi otoroo'naang tampuru' bera napo' nii'ning bii'maikorori' teing-pina' tavaarima dupisi'aari-aininge deerunoo' makotuainoo'ke basi.

<sup>12</sup> Teketa napo' ~narung-taa-nung pinkapinka' kaape'uko ooma u'mi' pankaing nkoarako ooantu', ee'noko duaa' mutaanampura baarong mutaanu'pina' oro'paru', ee'noko kaara pankaveraa'ou'noo'ka koonto'ereng-pina' oro'paru'. <sup>13</sup> Ee'noko beento'nanka paning-kooning kavariima kansi'koo dua'ariru', karikau'koong sinananka pionge darampuriko kavariima dua'arimana'. <sup>14</sup> Ee'noko paning tamung tani'pina' kai'aru', ee'noko ookara iu'nanka napo' mui'nanka diiri'ariru' otomanairu-eta. <sup>15</sup> Teketa aing aa'ning dauraronanka ookara kansi'koo-nupoong, nantoong pankenanka, tavu'koo urantanuka, nantoong kavo-po'nupoong, ee'noko iri'po'nupoong, ee'noko napo' nii'ning nantoong, botovotonaanuka ee'noko osikaiaang, iu'nanka-koo meu'nairu-aape koo'arima kuvinanka-koo kung ee'noko boia'nanka-koo boong baku'arima aa'paako', <sup>16</sup> "Nii'koo dau dua'darara nee'meriai teie Ovoringe ba'nava'nani'koo ba'nani otinge oomuri'neeng. Napo' teieta Sipisipi' Kampia bakaang iira-ita baku'meriai. <sup>17</sup> Te'mung beekaang iira orara aarumo-koo oro'antavureaina'mung e'mung basiarang. Bakei naning tekang doompuresi donkonui otoaing otoa!"

### Isireeli-nupoonge Kumponing Bakaang Taa'ni'anta Oing-koo Nkavau'na'

- <sup>7</sup> Teketa napo' tee tankinuko koosinung karenaumo oarantu' aung-koo kansi'koo karenaumo kunku'doi'koo donkonai otoroko dovang avo'ai aing aa'ning uupuvuriaroo'naang: kansi', pirung, ee'noko koi'nanka. <sup>2</sup> Teketa napo' narung koosinung duaa' pomanoo'keta deto beko ooantu' tee Kumponing Domantoo' bakaang taa'ni'anta kompui, ee'noko teie aa'na' bokuma teing karenaumo koosinung kansi' ee'noko pirung orari-koo purinto' avuru'ning aa'puru', <sup>3</sup> "Kansi' dovang pirung ee'noko koi'nanka mme'ka orari-antaveriaruko io' niikaang Kumponing bakaning botovotonaanuka oing-koo taa'ni'antavarampiko deeko'." <sup>4</sup> Teketa taaravantu' deerunoo' teing taa'ni'antavuru'ning nara'ka: narung daaku'keta karenaumo kivora-eta karenaumo kokorei' [144,000], ainoo' teing ookara Isireeli baurukaa'keta muu' kante-ita: <sup>5</sup> Juda bakanaving-eta taa'ni'antavuru' kivora-ita kenaanka kokorei'. Ruben bakanaving-eta taa'ni'antavuru' kivora-ita kenaanka kokorei'. Kaata' bakanaving-eta taa'ni'antavuru' kivora-ita kenaanka kokorei'. <sup>6</sup> Asa bakanaving-eta taa'ni'antavuru' kivora-ita kenaanka kokorei'. Napitalai bakanaving-eta taa'ni'antavuru' kivora-ita kenaanka kokorei'. Manase bakanaving-eta taa'ni'antavuru' kivora-ita kenaanka kokorei'. <sup>7</sup> Simioni' bakanaving-eta taa'ni'antavuru' kivora-ita kenaanka kokorei'. Liivai' bakanaving-eta taa'ni'antavuru' kivora-ita kenaanka kokorei'. Iisakaa bakanaving-eta taa'ni'antavuru' kivora-ita kenaanka kokorei'. <sup>8</sup> Sebulon bakanaving-eta taa'ni'antavuru' kivora-ita kenaanka kokorei'. Josepa' bakanaving-eta taa'ni'antavuru' kivora-ita kenaanka kokorei'. Bensimani bakanaving-eta taa'ni'antavuru' kivora-ita kenaanka kokorei'.

### Nantoong Karika'ke Kumponing Daangampau'na'

<sup>9</sup> Teketa napo' tee-koo dama'due ooma bakei nantoong miatara oarantu' naninge deeru-koo makotua', aa'ning-eta porou'ning: ookara kansi'nanka-ita, muu'keta, nantoong amutemurii'keta, kara amutemurii'keta, teke Ovoring ba'nani'domai ee'noko napo' tee-koo Kampia-koo uro'kanoo'ke donkonai otoroko mononopa' kakaara kurunii'nuka ee'noko birenge moupaa-koong para' kompai. <sup>10</sup> Ee'noko aa'na' kareaama aa'paako', "Domang-anta tee niikaang Kumponing-eta ba'nava'nani'domai ba'nani otomaung-eta poaing ee'noko napo' teieta Sipisipi' Kampia-ita." <sup>11</sup> Teketa teinge koosinunankai koroai

otoroko teing ovontung ee'noko teing kapoo' karenau-mo domantoi'a te' overimpari ba'nava'nani'doma uro'kanoo' dapuu'kai dua'arima daangampaako' tee Kumponing, aa'paama, <sup>12</sup> "Ee', tee-koo niikaang Kumponing-koo otoaing teing aing aa'ning: biraanke, meenasi, matau, tampa' tang, biiving, iri', ee'noko puring-anta ookara batei-koo. Masikung."

### Biikaang Sisikeera Tee Enang Oparing

<sup>13</sup> Teketa narunge teing-koo ovontung-koonge ning nia'muma aa'muu', "Aing baata mononopa' kakaarai nopa'nii'nuka? Napo' areketa poroining?" <sup>14</sup> Ee'noko ninge aa'pantu', "Aung ee, ning aa' noru'ampa'. Dake pa noru'ei otong."

Teketa teie aa'muu' ning, "Aing teing nantoong tee batei aa'na' arikung puru'aara porou'ning. Ee'noko tee biikaang mononopa' tee tee-koo ereng-koo tee Sipisipi' Kampia bakaang-koo duu'paio' aa'na' kakaaravou'. <sup>15</sup> Tee'koo teing Kumponing bakanoo' ba'nava'nani'doma uro'kanoo' donkonai tee dootuu'aa-maung doong ee'noko muung bakanava meekavakoo, ee'noko teie teke overimpari ba'nani'domai ba'nanui otomaunge kuung koo'uri nari' otoromaung. <sup>16</sup> Teke tee teing peeravoroa' otoroaing, napo' ntong-koo nukaa'oroa' otoroi, duaa'ke ui'urima baikevuriauka' ee'noko napo' naa'eeravoroauka'. <sup>17</sup> Ai' tee Sipisipi' Kampia teke overimpari ba'nava'nani'domai meu'ke otomaung tee biikaang tanata-nko, ee'noko teie teing te' ntong pu'anta domantoo'aape be'antavurima-toaing, ee'noko Kumponing tee biikaang ta'du dutaita piu'evuriaing."

### Teie Sipisipi' Kampiai ~Kenaanka-taa-nung Pinkapinka' Kaape'uu'na'

**8** Teketa napo' teie Kampiai ~kenaanka-taa-nung pinkapinka' kaape'uko ookara kapoo' paning-koo oki'noo' ka'duuariru' namarang aua-pina'. <sup>2</sup> Teketa ~kenaanka-taa koosinung oarantu' Kumponing-koo uro'kanoo'ke donkonai otoromaing, ee'noko teinge tuuviri ~kerenta-taa nkavau'. <sup>3</sup> Ee'noko napo' nii'nung koosinung kooro-koong tapeng kompui pora boontur-oma donkonuu'. Ee'noko tee kanteng tampa' nuuraa' mmau' avau' pitu-koo teing ninka kunsinanka ookara nantoong meekupoong biikaang ninka nari' boontunamparaa'naang teke kooro-koo nkonii'noo'ke boonturomai, overimpari ba'nava'nani'doma-koo uro'kanoo'ke. <sup>4</sup> Ee'noko tee kanteng paro'ui'o' te' ninka ii-noo' kunsinanka ninka kompeereta teing meekupoong biikaang ninka deto daa'aru' Kumponing-anko koosinung-koong bireng-eta. <sup>5</sup> Teketa teie koosinunge tee tapeng nkavura nta'ke maanto'antavuu' boonturoma-ita nkavuu'nunge, ee'noko terempo' kansi'aape bai'uu', teketa aa'nou' pipirakai kurungkurung ninininimpuma u'mi' nkoaru'.

### Karenaumo Koosinunankai Tuuviri Doompeitaa' Puumpau'na'

<sup>6</sup> Teketa tenang teing ~kenaanka-taa koosinung teing tuuviri puumpaava'naang maamaruru'. <sup>7</sup> Ee'noko tutuna'nunge bakanareng tuuviri puumpuko apo' kamaarie moomparama kapang kaa'omana' kaa'ora kansi'koo doonko tumputumpurung dua'aru' ee'noko napo' nta' erenge mavo' tee' nari' kansi'koo dua'aru'. Ee'noko kansi'koo beevorai navora' taivuu', koi'nankakoo beevorai-koo navora'kooning taivuu', napo' ookara baa' oki'nareka' taivuru'.

<sup>8</sup> Teketa napo' kenaanka-nung koosinunge bakanareng tuuviri puumpuu', ee'noko kapoo' iu' pankaing-pina' oro' nta'ke taivuko pirung-koo dua'aru'. Ee'noko pirung-koo beeru'pi naru' ereng narung deemparu'. <sup>9</sup> Ee'noko kapoo' pirung-koo domampariri otoromaing-koo beemantori-koo namanto boorou', ee'noko aarerinanka-koo beemantori namanto nta'ke taivurira opuru'.

<sup>10</sup> Teketa napo' beenaumo-nunge koosinunge bakanareng tuuviri puumpuu', ee'noko narung beento' pankaing paning-eta dua'aru', puu-pina' arakavari nta'ke taivuko, ee'noko aa'ning-koo dau dua'aru': ntong-koo beeriiru-nari-koo ee'noko pu'antanairu-koo tee' nari'. <sup>11</sup> Tee-koong beento'koong miring Dopa Tokaa'. Teketa teing ntonanka beento' dua'aru'ning tokaa' doparopa-po'nung deempario' nantoong mmau'ke naiaama boo'pariru'.

<sup>12</sup> Teketa napo' karenaumo-nunge koosinunge bakanareng tuuviri puumpuu' ee'noko aa'nou': du-aa'koo oki'nameng paparovuu', napo' kaara-koo oki'nameng paparovuu', ee'noko beento'nanka-koo nii'namanto † paparovuru'. Ee'noko aa'nou': te'mung doong apuka'paru'. Napo' te'mung muunga tee', beento'nanka-ita kaara oki'nameng-koo araka otoaruu'.

<sup>13</sup> Teketa napo' ooama narung mareoi' aa'na' karoma auvi'aue puraanuma aa'puko taaravantu', "Oi, oi, baka', baka' piaaru'nuka kansi'koo otoromaatomaing. Teinge asi'ninge beenaumoi koosinunankai biikaning tuuviri puumpaako teing-koo bakei sisikeera pankaing tavo'araa'naang."

### Pa'noko'nung Koosinunge Tuuviri Puumpuu'na'

**9** Teketa napo' pa'noko'nunge koosinunge bakanareng tuuviri puumpuu'. Teketa ninge narung beento' ooantu' paning-eta kansi'koo dua'aru'nung. Ee'noko kii' kong-antavau' tee te'nung dinkung tumangropa-koong. <sup>2</sup> Ee'noko teie tee dinkung tumangropa daate'uko teieta ii kutekuteivuu' nta' pankaing-eta popeu'na'. Ee'noko teie iie teketa dinkung-eta kutekuteivuma aa'nou': duaa' mutaanampura aanaroo' deto tunumparavaruu'. <sup>3</sup> Ee'noko teieta ii-eta ntaa'nanka bakoarira kansi'koo kato bereravaruru' purinto'nanka kaki-koo bakei orovei'pina' naapunanka teing; ee'noko munkeita-koong iri' kong-

† Beemantori-koo namanto-kooning, (1/3).

antavaaru'. <sup>4</sup> Ee'noko tee baa'nanka kansi'koong napo' teing koi'kooning para'nanka orari-koo taura'paaria', teka nantoong naing deeko' ookara kaki-koo makosi teing Kumponing bakaang taa'ni'anta otoroaing biikaang oing-koo. <sup>5</sup> Tee-noo' pa'noko' kaara-koo kuunge sisikeera-antavaarii'naang taura'paaru', teka dupisi'koo deea', tee tamung naapuaarima sisikeera-anta-koo. Naapunoo'koo tee' orovei' pina' mantong tenang naning taivuko. <sup>6</sup> Teketa teing-koo pa'noko' kaara-koo kuunge tee nantoonge booroaing taung besiaama pore'oroaing, teka taung ooaavauka'nung bakei. Boo'koo aa'na' piavoroko boo'ke tee teing meumpuria' tokoi mmaruaing.

<sup>7</sup> Tee ntaa'nanka tee oo-koo oosi-pina' oro'nanka tavutavu'koo maamuariri otoroining-pina', ee'noko biikaang bore'koo kapoo' baakopo kooro-koong-pina' oro' otong. Ee'noko oinoo' naning-koong-pina' oro'nanka. <sup>8</sup> Ee'noko biikaang dapo manikuma-koong-pina' isikananka, napo' si'da'noo' laioni-koong-pina' kepe'nii'nuka. <sup>9</sup> Ee'noko biikaang murukeu-nee' aini-koong-pina'oro', ee'noko tenang puraanaako kupa'koong aurong kaarisinanka mmau' oosinankai tavutavu'koo kua'parima kurunkurunkaanaamana' taara. <sup>10</sup> Teing ee'ning teing baring tairo'nukai munkeita-pina', ee'noko te' biikaang baring-koo purinto' otong nantoong baike-koong teing-koo pa'noko' kaara-koo kuunge. <sup>11</sup> Ee'noko teing tee narung dauraronge~ tanatavurimaing. Tee daurorong tee narung koosinung tee dinkung tumangropa tanatavumaung. Bakaang miring iiburu-na'koo tee Abadon, ee'noko Kiriki'na'koo Apolion, miru'noo' Tooreere. <sup>12</sup> Narung kapoo' arikung tee tankinuing. Ee aing, enang tee ke-naanka kapoo' arikeng mme' otomang dama'ke tavo'kuree'naang otoining.

### ~Narung-taa-nung Koosinunge Tuuviri Puumpuu'na'

<sup>13</sup> Teketa napo' ~narung-taa-nung koosinunge bakanareng tuuviri puumpuu', ee'noko narung aurong karoko taaravantu' teketa boonturoma-ita Kumponing-koo uro'kanoo' kooro-koo nkonii'noo'keta, ookamenta karenaumo kunku'doi'keta. <sup>14</sup> Ee'noko teie aurongee tee ~narung-taa-nung koosinung tuuviri kompui otoko'nung nauvuma aa'puu', "Karenaumo-taa koosinung dai'ariri otorong teke tee ntong pankarei Iuperetisi-ankoi. Teinge tee batei Kumponing miru'uu'nung nempaamaang maamuariri nantoong-koo beenaumo nariong dupisi'aarii'naang; <sup>15</sup> Aia', tee batei tee amare', au kaaranu ee'noko e'mung ee'na'mung deempario' dipi'eriko berora Kumponing miru'uru'na' nkoaavai." Teketa teie koosinunge taaravura teing karenaumo koosinunanka dipi'uru'. <sup>16</sup> Teketa tavu'nupoong oosinanka-koo ba'naniau'ning-koong deerunoo' taaravantu' kenaanka daaku' kokokokorei' [200,000,000]. <sup>17</sup> Ee'noko napo' noone-koo oosinanka-koo nantoong ba'nani'aio' oarantu' biikaang murukeu-nee' nii'noo' nta'pina' urung, nii'noo' iinau-pina' oro', ee'noko nii'noo' piiko-pina' meraa'. Ee'noko oosinanka-koong bore'noo' laioni-pina' oro',

ee'noko biikaang karang-eta aa'ning kuripioaako': nta', ii, ee'noko tee piiko karauviaana. <sup>18</sup> Ee'noko ookara nantoong-koo beenaumo-nariong aing beenaumo doovaange dupisi'aaru'nung, aa'ninge: nta', ii, napo' tee piiko karauviaana, karang-eta kuripioau'nunge. <sup>19</sup> Ai' tee purinto' oosinanka-koong aa'ning-koo otong: karang ee'noko baring. Ee'noko teing biikaang bari-nanka tee boru'pina' oro', napo' botu bore'po'nunge, ee'noko temarange nantoong taiaarima baikearu'. <sup>20</sup> Teketa teing nantoong beenaumo doovaange dupisi'uriaru'ning teing tee' nari' bere'ariaru' teing-eta biikaning oraka' nkonanka-ita, aa'noko ma'nari dovang-koo boontu, ee'noko daang-koong kumponinanka biika'ka ta'nampau'ning-koo dootuu' nko aa'ning-koo: kooro, siliva', boronsi~, kapang, ee'noko koi'; teing ee'ning kapoo' oo noru'aava', taarakaavarupeu', nanu'koo makosiaava'. <sup>21</sup> Napo' aing ee' oro' nko-nko-ita bere'ariaru': naning dupisi', doparopa, kaukauro-nko, ee'noko kapoo' avutevu'nanka bakiaa'.

### Koosinunge Oki'nane' Buukunane' Avuko Joonie Maa'uu'na'

**10** Teketa narung koosinung bakei purinto' paning-eta siarako ooantu' kamo'ke mononopa'pina' nopa'ari, ee'noko bore'koo daue eera-vo otoing, ee'noko bakaang oing duaa'pina' oro', ee'noko bakaning kau' ookanau'ka nta'pina' urumpario'. <sup>2</sup> Ee'noko birenge oki'naa buuku bere'ario' kompui pou'. Ee'noko pora aa'nou' bakaang kau' tampanau' pirung-koo donkonuu' ee'noko mare'anau' kansi'koo donkonuu'. <sup>3</sup> Teketa aa'na' bokuvu' laioni-koong aurong-pina' karoma, teketa tee karoko kurunkurung ~kenaanka-taa tompoo'kaama kareaako ninge daaria-ma'naang nkomarako narunge aurongee paning-eta karoma aa'puko taaravantu', "Sira'peauka' tee kapoo'nanka teinge ~kenaanka-taa kurunkurunge minkuainanka, ee'noko daarieauka'!" <sup>5</sup> Ee'noko tee ee'nara koosinung pirung naanka-koo kansi' donkonuu' ooantu'nung deto paning-aape toonuu' bireng tampanaang. <sup>6</sup> Ee'noko teie maraka-anta nkovuu' tee-koo Kumponing tee' nari' otoi otomaung bakaang miring-koo, aa'nung paning, kansi', pirung ee'noko teing ookara kapoo'nanka tenairu-koo otoromananka nkovuu'nung-koo; aa'puu', "Batei neng-koo makotua'. <sup>7</sup> Aing-koo doonanka-koo tee ~kenaanka-taa-nara koosinung maamuarama otoko bakanareng tuuviri puung-koo, Kumponingee tee bakaang maken-si'ning maromaro oro'antavuu'naang, tee' ee'na' teing bakaning nakaro-nupoong~ tero nauvuru'na'." <sup>8</sup> Teketa napo' teie aurongee paning-eta karoko taaravantu'nunge karoma aa'puu', "Bera tee buuku nkaveai bere'ari otoing koosinung-koo bireng-koo, tee-koo pirung naanka-koo kansi' donkonui otoing-koo." <sup>9</sup> Teketa ninge mera tee koosinung eentavantu' amuu'naang tee oki'naa buuku. Ee'noko teie aa'muu'ning, "Nkavera maa'eai. Karang-koo davainta-pina' tarii'doo'naang, teka dama'ke maa'era tee dakaang pakosii'koo tee tokaa'doo'naang." <sup>10</sup> Teketa ninge tee

oki'naa buuku koosinung-koo bireng-koo nkavamira maa'antu'. Maa'amira karang davainta-pina' tarii'mou', teka dunkumpamira pakosii' tokaa'mou'. <sup>11</sup> Teketa aa'muu', "Bera napo' tarampeerarama~ sira'peaing kapoo' dama'ke tavo'kuaining teing-koo nantoong mmau'koo osi kante-nupoong-koo, napo' kara amutemurii'koo ee'noko napo' ookara dauraronanka-koo."

### Kenaanka Naninka Kumponing Bakaang Kara Sira' Nkora

**11** Teketa teie koosinunge purinto'ke ning Jooni narung donsi'pina' oro' paaranang-nko amuu', ee'noko amuma aa'muu', "Deto donkonira Kumponing bakanava pankava dootuu'nava oovei ooinava paaranampeai ee'noko boonturoma nari'. Ee'noko napo' teing teke dootuu'arimaing deerueriai. <sup>2</sup> Teketa dama'du-navaro pava dootuu'nava pankava-koo paaranampeauka'. Tamung sipeai tevaro, ai' tevaro tevaro Ju'deeaing biikanavaro. Teinge mmemme'aa-va'naang † te' osi meekamono, Jerusalema'namono karenaumo kivora-ita keura kaara-koo. †† Ee'noko ninge napo' kenaanka nakaronaanka~ nkanaanka kara-sira'ka iri' avompeta botoampeko tarampeearma daankiareaing narung kokorei'keta kenaanka daaku' ee'noko ~narung-taa kivora [1260] doong-koo, ‡ baarong mutaange duaanavaresi. ††† Tenaanka ee'naanka temu' Daari Meekung-koo kevarira olive'ke miru'uretu'naanka, ee'noko napo' kenaanka daamba'nange miru'uretu' teke Ovoring ookara kansii' tarevumaung-koo uro'kanoo'ke donkonuresi otoremanaanka. <sup>5</sup> Ee'noko nii'ninge tenaanka tavaaree'naang nkoaareko deeko' tenaanka-koo karang-eta nta' bakoarara taivuriaing teing. Tee' ee'na' nari' booroaing teing tenaanka oraka' nko-koo piavoroaining. <sup>6</sup> Napo' tee tenaanka iri'po'naanka aa'ning nko-koong: paning avo'koong apo'uaroo'naang tenang tee doorening Ovoring bakaang sira'purema nanureko, ntonanka ereng deeng-anta-koong, ee'noko ookara kansii'nupoong-koo amutemurii' doovaang tavo'anta-koong bee'ka piavoreaina'.

<sup>7</sup> Ee'noko tenang tenaankai nakaronaanka bakevureko tee beekaang kara sira', tee biiko teieta dinkung tumangropa-ita bakoaravainge tee tavu' tumpuaing tenaanka-koo, ee'noko tavurema puru'ureta bakei dupisi'uree'naang tenaanka. <sup>8</sup> Ee'noko beekaang mono ta'monko' teke taung-koo pankamono-koo miring Jerusalema' tampaamanamono-koo bemparesi otoreaing, temono ee'namono-koo beekaang Ovoring aa'barata'koo taakavaara boo'antavau'namono-koo, nii'na' miru'aama Sodom ee'noko Iisipi' tampaakoo'. <sup>9</sup> Doong beenang ee'noko namaranoo' aa'ning-koo nantoonge tenaanka teka

ooaareaing aa'ning-eta: nantoong amutemuu'keta, nantoong avitevitu-eta, kara amutemurii'keta ee'noko napo' nantoong ookara kansii'nanka-ita. Ee'noko tau-ra'paariauka' dako'koo. <sup>10</sup> Ee'noko teing nantoong kansii'koo otoromaing dotuarima baravaraeariai~ tenaanka boo'pareaing-koo, asiara aveema, tenaankai ee'naankai nakaronaankai pore'antavaarimanoo'koo."

<sup>11</sup> Ee'noko teie koosinunge tee kapoo' nkoaravaing kato naumuko ooansio' tee domaang Kumponing-eta pora tumparu' tenaanka-koo, teing beenang doong-eta namarang tankinuko. Ee'noko tenaanka deto donkonuretu', ee'noko ookara nantoong ooaareko'ning bakei aa'na' avoreau'. <sup>12</sup> Ee'noko teketa teinge nantoonge auronge paning-eta aa'na' bokuma karavureko taaravau' aa'puko, "Doompeto poreai." Ee'noko teinge beekaning kare-nupoonge tee ooaarsio' teketa deto paning-aape koinuretu' kamo'koo meu'ke. <sup>13</sup> Teketa tee-koo batei-koo pankaing u'mi' nkoarara osi pankamono-koo narung kivora-koo pavananka pesi'arako ooantu', ee'noko nantoong ~kenaanka-taa kokorei' tauririra dupisi'uru', ee'noko sipariru'ninge avoreara Kumponing paning-koong daangampau'. <sup>14</sup> Tee kenaanka-nung arikung tee' bakearavaing, ee'noko teketa due'ka beenaumo-nung arikung tavo'kuaiing.

### ~Kenaanka-taa-nung Koosinunge Tuuviri Puumpuu'na'

<sup>15</sup> Teketa ~kenaanka-taa-nunge koosinunge bakaang tuuviri puumpuko ooantu', ee'noko paning-eta nii'ning auronankai bokiaama aa'pau', "Teing ookara muu'nanka kansii'kooning teing enang tenaanka tee niikaang Ovoring Kumponing ee'noko tee bakaang Pako'pari'nii' beekaning deempariring, ee'noko ookara batei-koo o'meeva-koo tarevurematoaining."

<sup>16</sup> Ee'noko teinge kenai'ka-ita karenaumo ovontunge biikaning ba'nava'nani'nairu-koo ba'nani'ai otormainge Kumponing-koo uro'kanoo'ke dapuu'kai dua'arima tee Kumponing daangampau', aa'paama, <sup>17</sup> "Ovoring, da' tee Kumponing ookara purinto'po'nung, tee tee' nari' otomaung-teroit otou'nunge, e'mung tee' otong, ee'noko dama'ke tee' nari' otoi poaing. Dakaang iri' pankaing kompei dauraring~ deentari otomaung. Tee'koo nii'ke tampara tampampimaang da'koo. <sup>18</sup> Teing nantoong ookara mutaanang-nupoonge tee da' aa'na' iirareraamaung, teka enang dakaang iira mantompaava'naang teinge, ee'noko batei tee emu' makotuing teing boo'nuka teing enang da'koo uro'kanoo' donkonaako simpe'erii'naang. Ee'noko enang tee teinge dakaninge botovotonaanukai moo' nkavaava'naang, aa'ninge: nakaro-nupoong, ee'noko teing koonto'nuka, ee'noko napo' teing da'koo amaiaa'orama da' siontaamainge nkavaava'naang, ookenge aa'noko teing miringpo'nupoong ee'noko miringropanuka nari'. Ee'noko teing kansii' orari-antavaamaing teing enang orari-antaverii'naang."

<sup>19</sup> Teketa Kumponing bakaang pava meekung paning-koo daate'arako ooantu', ee'noko tee Kumponing

† Maare piatooronuka~ Jerusalema'namono berora meekamono-pina' noru'aava' anutua kankosi'aavaing-pina' tampumang.

†† Beenaumo masiraani bera nau-taa kaara-koo. ‡ Beenaumo masiraani bera nau-taa kaara-koo. †† Nantoong kiimata kompaavaing-koo piaavorema taa'ni'antavaresi tee' mutaange duaanavareaing.

bakaang kara naroong-anta koong bokita sirapo'ke otou' teke pava meekava-koo kuunge, ee'noko te' otoko pipirakaie arakavuko kurunkurung ninka ninininimpuma u'mi' nkoaru' ee'noko apo' kamaarie moomparama kapang kaa'omana' kaa'ora kansi'koo doonko tumputumpurunang dua'aru'.

### Sietani' Bakanaving Nari' Oraru'kiaako Oovuu'na' Joonie

(12:1-20:15)

#### Teni Manikuma Ee'noko Tee Pakia Teni-koo Kare Nkuvuunung

**12** Teketa tee paning-koo kapoo' pankaing ta'nim-paarii' taa'ni'anta oro'paru', nani manikuma du-aa'ke mononopa'pina' nopa'nii', kaara-koo dau donkonuio', ee'noko kivora-ita keura beento'ke bore' koroaio' baakopo-pina'. <sup>2</sup> Teni teni tooto'po'nani ee'noko paroo'ngang due'uma sisikeeravoma baiarako'. <sup>3</sup> Ee'noko teketa napo' nii'nung taa'ni'anta oro'paru' teke paning-koo, narung kapoo' pakia-pina'oro' aa'na' pankaing urumpumaung, bore' ~kenaanka-taa ee'noko kaintang kivora otoing, ee'noko napo' baakopo ~kenaanka-taa kurunii' bore'koo. <sup>4</sup> Ee'noko bakaang baringe beento'nanka paning-kooning-koo beenaumo-nariong-koo nariong kii'ni'puru' depeto kansi'aape. Teketa tee pakia teni-anko manikuma-anko uro'kanoo' donkonuu' tee bauring tooto' teka paravuko maa'uu'naang. <sup>5</sup> Teketa tenie tee bauring tooto' donkaani paravuu' ookara nantoong kansi'koo-nupoong tanatavuriaing tee ninka donsi' aini-koo nkonii' kompui, ee'noko tee tooto' tee Kumponing-anko koo'antavau' te' bakanoo' ba'nava'nani'doma. <sup>6</sup> Teni manikuma mee'bora' sirakamaa'aape koo'aru' te' Kumponingee teni maamu-antaevuu'noo' teka tareaava'naang doong narung kokorei'keta kenaanka daaku' bera ~narung-taa kivora-koo [1260].

<sup>7</sup> Teketa paning-koo kare pankaing tavo'kuu'. Tee Maikol bakaning koosinunanka ninka ee'noko napo' tee pakia bakaning koosinunanka ninka nari' taveu'. <sup>8</sup> Teka tee pakia boong deempaara teing-ninka bakaning koosinunanka-ninka napo' paning-koo oto'koo tau-ra'paava'. <sup>9</sup> Teketa tee pakia pankaing kansi'aape doonko dua'au', tee tee boru' tee uripo'keta otomaung miring ma'naang Sietani' tampaakoo', tee ookara nantoong kansi'nupoong poo-antavurimaung. Tee kansi'koo doonko dua'aaru' bakaning koosinunanka tee ninka nari'.

<sup>10</sup> Teketa narung aurong aa'na' karoko teke paning-koo taaravantu' aa'puko, "Enang tee niikaang domang-anta poing tee ninka iri' ee'noko tee muu' tee niikaang Kumponing bakaang, ee'noko teie tero Pako'pari'uu'nunge~ bakaang purinto' sira'paring. Ai' tee nii'maikorori' too'dempurimaung teke niikaang Kumponing-koo uro'kanoo'ke aa'ning-koo doong

ee'noko muung tee doonko dua'aing. <sup>11</sup> Teinge tee Sietani' puru'au'noo' tee tee ninka ereng Kampia bakaang ee'noko napo' karai sira'paama tee kapoo' koonto' teie teing-koo nkovuu'nung koonto' boo'koo aa'na' taura'pariri. <sup>12</sup> Tee'koo doturaravaing da' paning, ee'noko dii' teke otorining. Teka piaaru' da' kansi' ee'noko teke otorining ee'noko da' pirung teing ookara kapoo'nanka da'koo otoroining ninka, ai' Sietani' tee doonko dii'anko siaring koonto' iiravoi otong, bakaang batei apukung noru'ui."

<sup>13</sup> Teketa tenang teie pakiai kansi'koo doonko dua'aio' oarara teie tee teni manikuma tee tooto' donkaani paravuu'nani manki'anta tutumpuu'. <sup>14</sup> Teke-ta tee teni manikuma mareoi' pankaing-kooning kupa' kenaanka avau' purerenuu'naang. Ee'noko purerenura te' teni oto'koo miru'nii'noo' mee'bora' sirakamaa'koo beu' teka tareaava'naang mare' beemareu-koo ee'noko namaranoo' teie pakiai kompu'neeng-koo. <sup>15</sup> Teketa teie pakiai karang-eta ntong pankarei kurimpuu' teni manikuma siompuma nkavuu'naang teie douai. <sup>16</sup> Teka kansi'ke teni manikuma pakuvuma kamaankura tee ntong teie pakiai karang-eta kurimpuko teka dunkumpuu'. <sup>17</sup> Teketa tee pakia aa'na' iiravora kare tutumpuu' teing nii'ning teni ee'nani baurukaa' tavu'koo, teing ee'ning Kumponing bakaang boto siompaamaing, teing aa'ning Jiisuu' bakaang kara sira'puu'nung pinka'ai otoromaing.

#### Biiko Kenaankara Daa'aretu'na'

**13** Teketa napo' pirung due'ke piisi'koo donkonansi o'noi narung kapoo' kau' karenaumo biiko pirung-eta bakoarako ooantu', bore' ~kenaanka-taa ee'noko kainta kivora otoing, ee'noko baakopo kivora kainta kante otoing ee'noko bore'nanka-koo mirinanka otorong Kumponing poore'kooning. <sup>2</sup> Tee ee'nara kapoo' biiko ooantu'nung leepati'pina'oro', teka kau'noo' beea'pina'oro', ee'noko karannoo' laioni-pina'oro'. Teie pakiai iri' avura napo' bakanoo' overim-pari ba'nava'nani'doma ba'ngang-antavuu'. Ee'noko nantoong boto-koo makosi-antavuu'. <sup>3</sup> Naveu teing-koo biiko-kooning-koo bore'nanka-koo tee tokoona'pina' oro'pari otoko ooantu', temu' tavaara boo'antavaako napo' domamparu'naveu-pina' oro'. Ee'noko ookara nantoonge kansi'nupoonge teveu-koo teu pentanu tempa'ou'nu ooaara ta'nimparima siompau' tee biiko. <sup>4</sup> Nantoonge tee tee pakia dootuu'au' teie pakiai tee biiko makosi-antavuiu' nantoong boto-koo, ee'noko teinge tee biiko napo' dootuu'aakoo' aa'paama, "Baa nii'nung naning aung biiko-pina' oro' otong, ee'noko baie pa tavuma aung boong deempupeu'? Naning otoa', bakei!"

<sup>5</sup> Teketa teie pakiai makosi-antavuiu' teie biikoi baka biivimparama Kumponing aa'na' poore'uko'. Ee'noko Kumponingee kaara karenaumo kivora-ita keura-koo † basinoo' naro' taura'puu' tee' nkoaraa'naang. <sup>6</sup> Ee'noko karoma Kumponing poore'uko'. Napo' Kumponing bakaang miring poore'uko', te' otomanoo' nari',

† Beenaumo masiraani bera nau-taa kaara-koo.



ee'noko napo' teing paning-koo otoromaing. <sup>7</sup> Ee'noko teie pakiai makosi-antavuiu' teie biikoi Kumponing bakaning meekupoong ninka kare naka'ura puru'uru' teing. Ee'noko napo' teie pakiai makosi-antavuiu' nantoong ookara muu' tarevuriko' aa'ning naro'ka: muu'nanka, nantoong ookara kansi'koo-nupoong, kara amutemurii', ee'noko ookara dopa' amutemurii'.

<sup>8</sup> Ookarai nantoonge kansi'nupoonge tee biiko dootuu'avaing, aa'ninge teing Kumponing biikaang miring daarievuriaruu'ning tee-koo Buuku Doman-too'nuka-koong-koo, tee Kampia bakanane'koo, tee kansi' pupu'aravaruko-ita Kumponing miru'uiu' dupisi'au'nung. <sup>9</sup> Baa naning punkang-po'nunge tee bakei taaravaing. <sup>10</sup> Baa naning dai'koo miru'nii' tee dai'avaing, ee'noko baa naning bainatue dupisi'koo miru'nii' teie, bainatue dupisi'avaing. <sup>†</sup> Teka tee aung manki' ee' oro' tavo'kuko dii' teing Kumponing bakaning meekupoong mii'kiritaa' aroo'dariri otoriaing.

<sup>11</sup> Teketa napo' nii'nung biiko kansi'keta doompeto bakoaraka ooantu' kainta kenaanka oting sipisipi'koo kampianu-pina' basi, ee'noko kara-koo tee-pina' pakia-pina' karoko'. <sup>12</sup> Tee tutuna'nung biiko-pina' iri' oro'antavuko' tutuna'nung biiko bakaang miring-koo, ee'noko teie kenaanka-nung biikoi ookara nantoong kansi'koo ootukunairu-koo otoromaing etuvuru' tutuna'nung biiko dootuu'ava'naang, tero penta orara tempa'ou'nung aa'nung. <sup>13</sup> Ee'noko teie kenaanka-nung biikoi taa'ni'antananka ta'nimpaarii' nkovuko' nta' dovang paning-eta depeto kansi'koo bokuvuma nantoong-koo dutakanoo'ke. <sup>14</sup> Ee'noko teing ninka taa'ni'antananka ta'nimpaarii' ninka tee tutuna'nung biiko bakaang miring-koo nkovuu'ning ninka teie kansi'nupoong tosivurima siong-antavuru'. Ee'noko botovuriko baka-oo ta'nampau' tee biiko tutuna'nung paara-antavai, aa'nung tee too'pau'nung teka mme' domampari otong. <sup>15</sup> Ee'noko napo' tee' nari' taura' nkavura tee biiko tutuna'nung-koong baka-oo domang-antavuu' tee baka-oo karoo'naang. Ee'noko nantoonge dootuu'avaruko deeko' tee baka-oo tee biiko-koong teie kenaanka-nung biikoi teing dupisi'antavuriko'. <sup>16</sup> Ee'noko teie ookara nantoong etuvuriko' moo'do'anta nkavaava'naang aa'nairu-koo: bireng-koo tampanaang-koo deeko' nii'na' oing-koo. Aing aa'ninge nkavaava'naang etuvuru': nantoong panke-nankai ee'noko oki'nareka'ke, kavo-po'nupoonge, ee'noko ata'oinkue, napo' botovotonaa'nukai ee'noko osikaiaange. <sup>17</sup> Teketa deto tee naning kapoo' tamung moo'uauka'nunge nii'noo' baavevuauka' tee moo'do'anta oto'evua'. Teenoo' tee moo'do'anta tee tee biiko tutuna'nung-koong miring daarinii' nii'noo' bakaang taa'ni'anta mirumiru'po'nung. <sup>18</sup> Ee mmaikori', tampa' matau ninka norunoru'eriaing tee aung: baa tee naning noru'po'nunge tee tasi'puaing tee taa'ni'anta, ai' tee tee deerunoo' tee biiko bakaang miring-koo kuunge baku'ari otomaung tee aung: ~Narung-taa daaku' bera ~narung-taa kivora-ita

<sup>†</sup> Nii'na' ee': Ee'noko baa naning bainatu kompuang teie bainatue dupisi'numpo'.

~narung-taa [666]. Tee deerunoo' tee naning-naung-koo taa'ni'anta makosi.

### Tee Sipisipi' Kampia Donkonuio' Nerakavu Kenavau'na' Nantoonge

**14** Teketa tee napo' ooama ning-koo dutakanoo'ka tee Kampia Saioni-namii-koo donkonuio' ooantu' tee ninka nari' teing narung daaku'keta karenaumo kivora-eta karenaumo kokorei' [144,000] donkonaiio'. Ee'noko tee bakaang miring ee'noko Bauma-koong miring daarinii'nuka biikaang oing-koo. <sup>2</sup> Ee'noko teke-ta napo' aorong paning-eta karoko taaravantu' ntananka-pina' aa'na' uutuarako napo' kurunkurung-pina' aa'na' karoko, ee'noko tee auronanka nepu'na' tampa' taaravanko' nantoonge kiitananka kopi'aako karopeu'na' karoko. <sup>3</sup> Ee'noko tee teinge kena nerakung kenavaako' aa'ning-koo uro'kanoo'ke Kumponing bakanoo' ba'nani'domai, teing kapoo' karenaumo kupa'po'ning domantoia ee'noko teing ovontung. Nii'nung naning noru'uarupeu' tee tevu kena, teinge narung daaku'keta karenaumo kivora-eta karenaumo kokorei' [144,000] naing deeko' noru'ai otorong kansi'keta moo'uru'ninge. <sup>4</sup> Teing aing teing nantoong maniku' ninka bakiaa'koo domang oraria' otomaing. Oototo'koo ootukunung-koo tampa' tanatavaritaa' kiiroraa'ariri otoromaing. Tee Kampia tee teinge siompai nanaamaung are' tokoo tee be-manoo'. Ainoo' teing tutuna'ning ookara nantoong-koo Kumponing moo'uru'ning-koo. Teing aa'na' meekupoong Kumponing-koo, ee'noko tee Kampia-koo. <sup>5</sup> Biikaang karang-koo naning tosi minkuaako taaravuarupeu', napo' kiiroraa'nukai.

### Beenaumo Koosinunankai Kara Daankiau'na'

<sup>6</sup> Teketa napo' narung koosinung aanaroo'ke purenuko ooantu', tee doorenang tampara otoi oto' kompu daankivuu'naang kansi'koo otoromaing-koo aa'ning-koo: ookara dopa' amutemurii', muu'nanka, kara amutemurii' ee'noko ookara nantoong kansi'nupoong. <sup>7</sup> Teke aa'na' bokuma aa'puu', "Kumponing-koo amaiaa'roriai ee'noko meenasie mee'na'oi oto' deeng-antaveriai, ai' batei teie nantoong bire'koong due'umaang. Ee'noko tee-koo dootuu'dariai aing aa'ning ookara nkovuru'nung-koo: paning ee'noko kansi', pirung ee'noko ntong oki'nareka'."

<sup>8</sup> Teketa kenaanka-nung koosinunge napo' siompui pou' aa'puma, "Dua'aring, dua'aring Babiloni'namono, osi pankamono, nantoong ookara kansi'koo-nupoong teru' oraru' uaininaru' nai-antavuru'namono. Tee uaini tee bakaang orara aarumo kaukauro nko-koong."

<sup>9</sup> Teketa napo' beenaumo-nung koosinunge siompuesi dama'ke poma bokuma aa'puu', "Baa tee naning tee biiko-koo dootuu'aravaing, ee'noko napo' tee-koong bakaang baka-oo-koo, tee tora'puaing, ee'noko napo' tee tee-koong moo'do'anta nkavaing bakaang oing-koo nii'noo' bireng-koo. <sup>10</sup> Tee tee Kumponing bakaang uaini naivuaing, tee uaini tee Kumponing

bakaang iira tora'anta-koong, ntong ninka bere'nii' deea', tamung tee' otoko purinto' koo'nii' tee-koo iira-koong kaapu-koo teie tora'anta-koong-koo. Ee'noko tee tee sisikeeravomatoaing tee-koo nta' kauoori pi-iko-koong-koo teing-koo koosinunanka meekupoong-koo uro'kanoo'ka ee'noko tee napo' Kambia. <sup>11</sup> Ee'noko tee ii teing kiimatanuka taivuriaing-koong tee deto tee' nari' kutekuteivui tuuvui otomatoaing uaa otoa', doong kante, muung ee'noko doong, tee' nari'. Teing ee'ning tee-koo biiko-koo ee'noko tee bakaang baka-oo-koo dootuu'arimaing ee'noko napo' baata teing bakaang miring-koo moo'do'anta nkavau'ning. <sup>12</sup> Enang tee noru'eriaing dii'ke Kumponing bakaning meekupoonge, kapoo' arikananka dii' paararurima ta-vo'kuko tee dii' purintariri mii'kiri otoriaing, Kumponing bakaang boto siomperi ee'noko Jiisuu' masika'an-taveri." <sup>13</sup> Teketa napo' narung aurong paning-eta karoko taaravantu', aa'puko, "Aung kara daarieai, 'Enang-eta deto tee teing boo'nuka Oving bakaning otoroitaa' boo'pariru'ning teing biraankeariaining.'" Ee'noko Tanuaang Meekunge maku'uma aa'pumaung, "Ee', bakei masikung. Uaavoroaina' teing-eta biikaning iri'o'nanka. Ookarai aarumoi tampenge nkoau'ninge tee teing meena'pariri otoroiaing."

#### Batei Sinang Kavukoo'ng Kansi'koo Tavo'aru'na'

<sup>14</sup> Teketa napo' ooama ning-koo uro'kanoo'ka kamo' kakaara ooantu', ee'noko tee-koo kamo'koo daue naning narung naning-naumpui ba'nanui otoko bore'koo baakopo kooro-koong kurunii' ee'noko birenge narung naipe' irinto' kai'nii' uite' napu' kompui. <sup>15</sup> Teketa narung koosinunge dootuu'nava pankava-ita siarara bokuma tee kamo'koo ba'nanui otoko'nung aa'puu', "Teie dakaang naipe'ke nkavera ookara sinananka napura'ema kaveai, ai' batei kavukoo'ng enang makotuing. Ookara sinananka kansi'koo'ng enang petaa'oroing." <sup>16</sup> Teketa tee teie kamo'koo ba'nanui otoko'nunge tee bakaang naipe' kansi'koo toong-antavura namu'ke ookara sinananka kansi'koo-nanka kavuru'. <sup>17</sup> Teketa napo' nii'nung koosinung dootuu'nava pankava paning-koonava-ita siaru', teie napo' naipe'nari' irinto'nari' kompui. <sup>18</sup> Ee'noko napo' nii'nung koosinung teke boonturoma-ita, nta' tarevumanoo'keta pou'. Pora tee naipe' irinto' kompui otoko'nung bokuma aa'puu', "Teie dakaange naipe'ke ookara uaini-koong sinananka kansi'koo'ng napura'eri-ma kaverira oosieriai, ai' tee sinananka tee enang neetovuring." <sup>19</sup> Teketa teie koosinunge tee bakaang naipe' kansi'koo toong-antavura ookara uaini-koong sinananka kavurima oosivuru' uaini mii'doma pankaing-koo doonko dua'urima Kumponing iiravoi kankosi'urainoo'. <sup>20</sup> Ee'noko osia dama'dua teka mii'domaa doonko kankosi'uru', ee'noko ereng taapo' tuuvuu' teketa uainimii'doma-ita doua-pina' aa'na'. Ee'noko naning tankimpuko ukaamau'koo basiarapeu'na' basiaru'. Ee'noko naning nanuma doong ~ke'munta-taae nanura basiarapeu'na' basiaru'.

#### ~Kenaanka-taa Koosinunanka Arikung Tavo'antananka Daa'ariru'na'

<sup>15</sup> Teketa napo' kapoo' pankaing taa'ni'anta paning-koo ooantu' ~kenaanka-taa koosinunankai tee'ning nari' napo' ~kenaanka-taa arikananka kompaio'. Teing ee'ning asi'ning ee'noko teing arikananka ninka Kumponing bakaang iira nari' bakearavaing. <sup>2</sup> Napo' tanoonoo' naankuviraa'noo' ooantu' pirung-pina' neenkiroo'noo', nta' kuunge aramo'arakoo' aa'noo'. Ee'noko teka ee'noo'ka nantoong donkonai otoroko oarantu', aing aa'ning puru'au'ning: biikonavoro', tee baka-oo, bakaang moo'do'anta ee'noko bakaang miring-koo deerunoo'; kiitananka ninka Kumponing daangang-koonanka ninka otoroko. <sup>3</sup> Kena-koo Moosesi, tee Kumponing-nung botovotonaa', ee'noko tee Kambia beekaning kenavaako', ee' kena: "Dakaang nko-nko tee pankaing ta'nimpaarii'. Da' tee bakei dau basina' aa'na' purinto'po'nung Oving Kumponing, Ookara-koo nkoveamaing-koo tee masika' koonto'na' oro'daramaung. Da' avatevarang-koong daurarong~. <sup>4</sup> Naning baa masikung da'koo amaa'ooarupeu' ee Oving? Ee'noko baie da'koo meenasi be'antavuarupeu' miring pankaing-antaruma? Naning otoa', ai' meekung tee da' narung. Ookarai nantoonge amutemuu'ke tee poroma da' narung dootuu'daavaing, tee dakaang nko-nko koonto' ookarai sira'pario' ooaara."

<sup>5</sup> Aung-koo dama'ke napo' paning-koo dootuu'nava-koo kuunga tevaro meekavaro daate'ario' ooantu', tevaro Kumponing bakaang kara kapang-koo moo'do'nii' otoing-navaro. <sup>6</sup> Teketa dootuu'nava-ita ~kenaanka-taa koosinunanka siariko oarantu' tee'ning arikananka napo' kompui. Mononopa' aa'na' kiirora', pipiraarie nopa'nii'nuka ee'noko murukeue kapeto tokonii' kooro-koo nkonii'ke keemounii'nuka. <sup>7</sup> Ee'noko teketa teing-koo domantoia karenaumo kupa'po'ning-koo narunge utaunankai kooro-koo nkonii'ke kantevuru' ~kerenta-taae teing ~kenaanka-taa koosinung, teing utaunanka iirai maanto'nanka tee Kumponing Otoi-oto' bakaange. <sup>8</sup> Ee'noko tee dootuu'nava iie aa'na' maanto'uu' Kumponing bakaang meenasi-eta ee'noko napo' bakaang iri'keta, naning tung-koo makotuaruu' teva dootuu'nava-koo, bera teing ~kenaanka-taa arikananka teinge ~kenaanka-taa koosinunge tavo'aara bakeariainoo'ke basi.

#### Utaunanka Iirai Kumponing-nunge Maanto'ning Kansi'koo Piampau'na'

<sup>16</sup> Teketa narung aurong dootuu'nava-ita aa'na' karoko taaravantu' aa'puriko teing ~kenaanka-taa koosinunanka, "Berira teing utaunanka ~kerenta-taa Kumponing bakaang iirai maanto'ning kansi'koo piampierai." <sup>2</sup> Teketa tutuna'nunge koosinunge bera bakanareng utaunareng piampuu' kansi'koo, ee'noko pentananka oraka' oro'nanka sisikeera-po'nanka nantoong-eta ta'da'puu', teing tee biiko-koong moo'do'an-

ta otoroining-koo ee'noko bakaang baka-oo-koo dootuu'arikoo' aa'ning-koo. <sup>3</sup> Teketa napo' kenaankanung koosinunge bakanareng utaunareng pirung-koo dau piampuu', ee'noko tee pirung ereng koonku'umaung narung deemparu' naning boo'koong-pina', ee'noko ookara kapoo' pirung-koo domampariri otoromaing boorou'. <sup>4</sup> Ee'noko napo' beenaumo-nunge koosinunge bakanareng utaunareng ntonanka-koo dau piampuu' ee'noko pu'antananka aa'ning-koo, ee'noko teing ntonanka ereng narunanka deempariru'. <sup>5</sup> Teketa teie koosinunge ntonanka tanatavumaunge aa'puko taaravantu', "Ee Oving, dake tee koonto'na' teing maku'eri nkovering. Ai' da' tee Meekung, teroita otou'nung, e'mung tee' otong, ee'noko dama'ke tee' nari' otoi poaing. Dake tee koonto' makosina' teing tee' nkoverima maku'ering. <sup>6</sup> Ai' teing teinge ee'ninge dakaning meekupoong ee'noko teing nakarounupoong ~ dupisi'aario' biikaang ereng dakoaru'nung. Tee'koo teing nantoong oreng tee ereng nai-antaveriko biikaang moo' koonto' makosina' nkavaavaing."

<sup>7</sup> Ee'noko teketa boonturoma-ita narunge maku'uko taaravantu', aa'puko, "Ee', Oving, Kumponing Purinto', masakung ee'noko koonto' tee dakaang simpesimpe'."

<sup>8</sup> Teketa karenaumo-nunge koosinunge bakanareng utaunareng duaa'koo piampuu', ee'noko teie duaa' aa'na' deekorono' bia'antavuu' nantoong nta'pina' taivurii'naang. <sup>9</sup> Ee'noko nantoonanka uipaarii'ke iirakutai taivuriko Kumponing bakaang miring barakosi'aako' tee teing ee'ning arikananka okora', napo' bere'arira Kumponing pankaing-anta-koo pivoroaru'.

<sup>10</sup> Teketa napo' pa'noko'nunge koosinunge bakanareng utau piampuu' te' masipo' tee biiko bakanoo' oovorimpari ba'nava'nani'doma, ee'noko bakaning otoromanairu mutaanampuu' ee'noko nantoonanka meneng si'daie taiariko' aa'na' sisikeeravoroma. <sup>11</sup> Ee'noko Kumponing paning-koong barakosi'aako' sisikeera dovang-eta ee'noko pentanankai oraka' mantomparima. Ee'noko tee' nkoarima napo' bere'aria' biikaang orara aarumo-ita. <sup>12</sup> Teketa napo' ~ narung-taa-nunge koosinunge bakanareng utaunareng piampuu' tee-koo ntong pankarei Iuperetisi ee'noko tee ntong teri ootukunari siri'aru' maamu-anta-koo tee taung teing dauraronanka duaa' poma-noo'keta teke poroo'naang. <sup>13</sup> Ee'noko teketa ooansio' ma'nari beenaumo oreng dokoroko'pina' oro'nuka bakoariru' aing aa'ning beenaumo biikaang karang-eta: tee pakia, tee biiko, ee'noko tee nakaronung daang minku. <sup>14</sup> Aing teing ma'nari Sietani'ke botovurio' kapoo' ta'nimpaarii'nanka ninka taa'ni'antavarima porou'ning teing dauraronanka ookara kansinupoong-kooning aavavaarima oosiaarima maamu-antavaarii'naang kare tutung-koo Kumponing bakainging ninka, teka te'mung kare tutumpaavaina'mung

te'mung Oving Kumponing Dau Basi Purinto' bakana'mung pinidaaku'uriaina'mung.

<sup>15</sup> "Ee aing, te'mung ee'na'mung bakiaa'nko-pina' ta'nina' moaing. Baa naning tanteari maamuari oting tee biraankearavaing ee'noko bakaang baarong du-aampari nari' oting simpeno' otoi nanuko ooaako maia'o'neeng." <sup>16</sup> Ee'noko teinge ma'nari oreng teing dauraronanka Iiburu-nupoong Amakedon tampamaanoo' nara'aru', miru'noo' Mekido-namii.

<sup>17</sup> Teketa tee teie ~ kenaanka-taa-nunge koosinunge bakanareng utaunareng bikiavuu' aanaroo'ke danto, ee'noko dootuu'nava-ita ba'nava'nani'doma-ita auringe aa'na' bokuma aa'puu', "Enang bakearing."

<sup>18</sup> Teketa aing aa'ning nkoaru': pipimpuma kurunkurung tompoo'kuko', ee'noko ninininimpuma u'mi' pankaing nkoaru', tee u'mi' tee bakei teroita kansikoo nantoong tavo'ariru'noo'keta nkoarava'na' nkoaru', aa'na' dau basi masakung tee aing. <sup>19</sup> Tee osi pankaing Babiloni' beenaumo-koo ke'me'aru'. Napo' nii'ning osi pankeng nantoong amutemuu' biikaning doonko turampariru'. Baru'noo' tee osi pankaing, Babiloni' bakaang orara aarumo Kumponing noru'ui tee' turampuu' bakaang iirai maanto'uiu' tora'antavurima uainie tora'antavurimana'. <sup>20</sup> Ookara mui'nanka paa'ariru' ee'noko iu'nanka otoroaru'. <sup>21</sup> Ee'noko apo' kamaarie moomparama kapang kaa'omana' kaa'ora paning-eta nantoong-koo dau kapang-pina' tumpu-tumpurunang dua'ariru', nare'na'koo manki'noo' naning kakau nkavu'peu'noo' basi. Ee'noko teinge Kumponing bakaang miring barakosi'aako' apo'ke kapang-pina' nare'na' nare'na' aa'na' baikeviriko, tee tee arikananka-koo dau basi arikunge.

Tenie Ovorinanie Auning-nkoi Moo' Orara Nkavuu'na'

**17** Narunge koosinunge teing-koo ~ kenaanka-taa-koong utau kompui otou'nunge ning-anko pora aa'muu', "Poko io' ninge naurampai temono osi pankamono ntonanka ariteri-koo dau otonamono, teni auning-nko doore karomai makosinamono, ee'noko kiimatavaavaina' naurampai. <sup>2</sup> Teni teni dauraronanka ninka kansikoo-nupoong ninka aunimpeema otomai ee'noko ookara nantoong kansinupoong kanu'antavurikoo' tee bakaang uaini auning-koong aarumo nai-antavurima." <sup>3</sup> Teketa tee Tanuaang Meekunge korimui' teie koosinunge nkamura mee'bora' sirakamaa'koo be'antamuu', ee'noko teka teni manikuma kapoo'koo biiko-koo urumpumaung-koo dau ba'nanuio' oantu'. Ee'noko tee tee biiko mirinankai maanto' ookara mono Kumponing akapeu'koonankai ee'noko bore' tee biiko-koo ~ kenaanka-taa ee'noko kaintananka kivora oting. <sup>4</sup> Teni manikuma ovorinaang masakani taa'ni'antavari otou' baarong urumpumaing ee'noko iiraampumaing kurumpari. Ee'noko napo' aa'ninge baunii': biiri kooro-koong ee'noko duku' moo' aa'na' pankeng-kooning. Ee'noko bireng kaapu kooro-koo nkonii' kompui otoko', kung kapoo'ke maarekusi'nankai maanto' teni auning-koonankai. <sup>5</sup> Ee'noko miring ee' oro' mirumiru' teni-

koo oing-koo daariari otong: TEE OSI PANKAMONO BABILONI'NAMONO, TEING AUNING NKONUKA BIAKO MAKOSINAMONO, EE'NOKO OOKARA AARUMO MAAREKUSI' KANSI'KOONING-KOO OKORA'NAMONO.

<sup>6</sup> Ee'noko teni ee'nanie manikumai ereng naivura kanu'ario' ooantu' teing-koong mmaw'koong Kumponing bakaning meekupoong dupisi'uru'ning-koong, teing ee'ning Jiisuu'koo miring sira'paamaing. Ee'noko tenang ninge oamira teni, ning bakei aa'na' ta'ninantu'. <sup>7</sup> Teketa teie koosinunge aa'muu' ning, "Da' aming-koo ta'ninimaang? Io' siraka'antavama'naang da'koo tee mirumiru' makensi'nung teni-koong ee'noko napo' tee biiko teni dau ba'nanui oting-koong, bore' ~kenaanka-taa ee'noko kainta kivora aa'nung. <sup>8</sup> Tee biiko oovemaatomaung tee tero otoko', teka enang otoa'. Ee'noko napo' teieta dinkung tumangropa-ita bakoarara dama'ke koonto' kera'parara otoauka'nunge. Ee'noko teinge nantoonge ookarai kansinupoong aung kansii' mme' pupu'aravaruko-ita biikaang miring daariariaru'ninge tee-koo buuku domantoo' domampariaining biikaang miring daariariri otoroing-koo, tee biiko ooaara tee ta'ninaavaing. Tee aa'nung tero domampari otoko', teka enang otoa', teka napo' dama'ke oro'paravaing.

<sup>9</sup> Aung naninge noru'po'nunge tanpa' keperuu'ui noru'koo makosi. Teing ~kenaanka-taa bore' teing ~kenaanka-taa iu'nanka teni ee'nani manikuma dau ba'nanui oting. <sup>10</sup> Napo' nii'na'koo teing teing ~kenaanka-taa bore'nanka teing dauraronanka. Teing-koo pa'noko' tero dua'ariru', narung enang otong, napo' narung mme' tavo'kua', teka tavo'kura tee tee oki'naa batei-koo otoaing. <sup>11</sup> Teketa tee biiko tero otoko'nung, ee'noko enang otoa' aa'nung tee ~beenaumo-taa-nung daurorong ~deemparavaing. Teketa teenoo' tee teing-koong narung. Nka tee teie, napo' tee' kera'paravaing.

<sup>12</sup> "Teing kaintananka oovemaatomaing teing kivora dauraronanka, teka mme' dauraronanka deemparia' batei makotuaruko, teka narung doong-koo oki'ning batei naing-koo, dauraronanka deempariaing tee ninka biiko ninka nari' otoroi. <sup>13</sup> Teing aing dauraronanka noru' narung ookara oto'evorong. Teinge tee biikaang iri' ee'noko taura' tee biiko avaavaing. <sup>14</sup> Teinge aing ee'ninge dauraronankai tee kare naka'avaing Kampia-aape, teka teie Kampiai teing ninka bakaning miru'urira bokuvurio' kake'iiariri tee siompaamaing ninka teing tee boong deempuriaing, ai' tee tee Kampia ovontung biikaang Ovoring ee'noko napo' dauraronanka biikaang Dauraronge." <sup>15</sup> Teketa teie koosinunge aa'muu'nung, "Teing ntong-nanka ariteri teni auning nkovumai dau ba'nanuio' oovemaatomaing tee teing ookara kansii' kante-koonupoong miru'ari otong, ee'noko nantoong karinga, napo' teing dopa' amutemurii' ee'noko ookara kara amutemurii'nanka. <sup>16</sup> Ee'noko tee biiko-kooninge kaintai kivorai oovemaatomaingee tee teni auning-koo baka avaramai munte'avaing. Ee'noko napo' teinge tee teni oraka' nkoaavaing bera simpenoi' deeng-antavaara

sipaavai. Ee'noko bio' teni-koong tee maa'aama kato nta'koo tai-antavaavaing. <sup>17</sup> Aung tee noru' Kumponingee biikaang domang-koo sipuko tee' nkoaavaing bakaang pia nkoaraa'naang, ee'noko narung noru' ninka taura'paako teie biiko tanatavuria'naang bera tee Kumponing bakaang kara masika'puainoo'ke basi. <sup>18</sup> Ee'noko teni manikuma oovemaatomaing teni tee osi pankamono miru'ari otong, dauraronanka ookara kansii'nupoong tarevurima-namono."

### Babiloni'namono Oraru'kuu'na'

**18** Teketa temono auning-nko makosinamono dua'arako oansi o'noko napo' narung koosinung paning-eta depeto siaru'. Tee tee aa'na' purinto', ee'noko aung kansii' aa'na' arakavuu' bakaang sisisisie. <sup>2</sup> Ee'noko aung tee bakei aa'na' purinto'ke boku-ma aa'puu', "Dua'aring, dua'aring, temono Babiloni'namono, osi pankamono. Enang tee ma'nari biikaang osi deemparing. Ookara tanuaang orananka ee'noko bareng orananka oto'doma deemparing. <sup>3</sup> Ai' temono temono ookara kansii' kante-koonupoong kara masikung oovunaare ninka pituvui uaini pitunii'pina' nai-antavuru'namono maroita iri' nka-koo. Tee aarumo auning-koong-pina'. Ee'noko ookara dauraronankai kansii'koo-nupoongee tee' nari' auning-koong aarumo nkoaako'nung temono ninka nari', ee'noko nantoong kansii'nupoong bavevaave nkoaako'nung deepo' kavonankai maanto'antavarikoo' temono bakaang aarumo karakaraa'koong-koo."

<sup>4</sup> Teketa napo' narung aung paning-eta karoma aa'puko taaravantu', "Temono-ita tonta'dariai dii' nkaning nantoong, tee-koo temono-koong-koo aarumo orara-koo tapo'dariauka'na', ee'noko napo' teie bakananka kiimatanankai konturiauka' aa'na'. <sup>5</sup> Ai' temono-koo nko-nko orarananka aa'na' dau basinoo' i'numparako Kumponingee tasi'puring. <sup>6</sup> Tee' masika' Kumponing bakaning oraka' nkovurimana' maku'koo nkoveriaing-namono, kapoo'nanka nkovuning-koo kemu'kai maku'erai. Nkovurimana'keta dau basinoo' nkoveriai-namono. <sup>7</sup> Tee-koo baka deto basi-antavaramaung-koo tamung kavonanka barampuma ka'numparava' otoi temono maukoverima tora'antaveriaing bakaang taarapiika-koo makosina'. Baka ee' noru'arakoo' biivimpama, aa'pukoo', 'Ning bakei overinaang, naaro deea', orarunsimarava' o'noainani.' <sup>8</sup> Tee'koo nii'na'mung arikanankai kuung deempara tora'antavuinani, aa'ninge: boo'boo', orarunsi, ee'noko peera. Ee'noko nta'ke taivura opuai, ai' tee Ovoring Kumponing tee purinto' teni kiimatavuaing.

<sup>9</sup> "Tenang teinge dauraronankai ookara kansii'koonupoongee teni ninka nari' aunimpeema kavo tankampeemaingee ooaara tee ii teni taivuko teing teing orarunsarima birompariaing teni-koo. <sup>10</sup> Teinge isipo' donkonai aa'na' avoreai teni tora'antavuko aa'paavaing, 'Piaaru', piaaru', bakei, osi pankaing, Babiloni' purinto'. Bakei na'mung doong-koo oki'ning batei-koo kiimata ninka kera'dari.' <sup>11</sup> Ookara kan-

si'nupoong kavonanka teka moo'aama baaveamaing teinge birompariaininge, orarunsiarima temono-koo napo' biikaning kavonanka nanging teka moo'evuriauka'nung noru'aama. <sup>12</sup> Teing aing aa'ning kavonanka: kooro, siliva', kapananka tampeng moo' aa'na' pankeng-kooning, ee'noko duku', napo' baarong amutemurii' aa'ning: mootu'nanka, naankuviraa', napo' dauraronuka biikaning duaana-pina' iiraampumaing; ee'noko ookara koi'nanka tampa' nuuraa'nanka, ee'noko ookara kapoo'nanka kau' karenamonanka-koo kainta-koo nkonii'nanka, napo' koi'nanka-koo nkonii'nanka moo' pankeng-kooning, ee'noko boronsi'nanka, aininanka, napo' kapang miring maabolo. <sup>13</sup> Napo' nariong kavonanka aing ee' oro': tampa' nuuraa' kapa'nung sinamong-koong, napo' mono-sisi'kooning, ee'noko amutemurii' kanteng parankensisi dovang betu'koo ii tampa' nuuraa'nanka, napo' nii'namurii' duuni miring meea, napo' uaini, ee'noko olive'koong duuni, ee'noko napo' palaua, uite', boromaka'nanka, ee'noko sipisipi', oosinanka, napo' kaarisinanka, ee'noko nantoong botovotonaa'nuka biikananka tanuaananka ninka baavearimaing.

<sup>14</sup> Teinge bavevaave-nupoonge temono aa'paavaing, 'Teinge sinanankai dake domange aa'na' karaa'emaingee tee enang si'daing. Ookara kavokavoronanka dakaosi'nanka teinge enang doomo'uringe, napo' dake kompeauka'nung.' <sup>15</sup> Ee'noko teing kavonanka moo'aama ee'noko baaveama kavonansiiaamaing temono-koo enang tee isipo' donkonai avoro' ninka otoroo'naang temono tora'kuko ooai, orarunsiarima birompaama. <sup>16</sup> Ee'noko bokiaama aa'paavaing, 'Piaaru', piaaru'namono! Bakei osi pankamono, baarong tampenge moo' pankeng-kooningee nopa'daramai iiraampumaingee ee'noko urunankai, ee'noko aa'ningee bauntarakoo': kooro, kapananka moo' aa'na' pankeng-kooningee ee'noko duku'nankai. <sup>17</sup> Ookara kavonanka teing bakei batei oki'namu'koo orariaring.'

"Teing aarerinanka oko-nupoong, ee'noko nanu'antavaamaing, ee'noko nari' nanaamaing, ee'noko teing pirung-koo avutevu' akaravarimaing, teing isipo' donkonaavaing. <sup>18</sup> Tenang tee ii ooai temono taievuko teinge aa'paavaing, 'Aremono pa osi pankamono amono-pina' basinamono otong?' <sup>19</sup> Sipung tovange poo'arima ee'noko biromparima orarunsiariri bokiaama aa'paavaing, 'Piaaru', piaaru', baka'e osi pankaing. Nantoong pirung-nupoong aareri-po'nupoong kavonanka-po'nupoong deeng-antaveru'namono dakananka kavonankai. Enang tee, batei oki'namu'koo orariari.'

<sup>20</sup> "Teketa Kumponing bakaningee aa'paavai, 'Doturara-vai da' paning, amono ee' nkoaring-koo. Ee' dii' meekupoong, kara okovuri nkanuka ee'noko nakaronupoong doturariai. Kumponingee tee enang ki-imatavuing puing temonoi dii' oraka' nkoruru'nung-koo.'"

<sup>21</sup> Teketa narung koosinunge bakei iirakutai kapang pankaing uite' putu'aamaing-pina' basi deto itaa'ura

pirung-koo dua'uma aa'puu', "Ee', aung-pina' Babiloni' biururu'ning doonko dua'koong, napo' nanging oovuauka'nungee. <sup>22</sup> Tee auronanka kiita-koonanka, teing nantoong kena nkonuka, kovi puunanka ee'noko teing kururung puunuka, napo' nanging taarareruriauka'nungee. Nanging napo' amutemurii' nko-nko nkovuko da'koo ooaavauka'nungee. Kaku-koong aurong karoko napo' taaravaavauka'nungee da'koo.

<sup>23</sup> Daamu-koong araka da'koo napo' arakavaravauka'nungee. Napo' nampeesiariko doturotu-koong aurong taaravaavauka'nungee da'koo. Teing dakaning bavevaave nkonuka teing ookara-koo kansi'koo aa'na' purinto'nuka. Dake ee'nanie kono'erima akovetei siong-antaveru' mmou' nantoong kansi' kante-kooning. <sup>24</sup> Babiloni' tee kiimatavaravaing aa'ning-koo: tee ereng Kumponing bakaning nakaronupoong-koong ee'noko teing nii'ning bakaning meekupoong-koong ee'noko napo' teing teroita kansi'koo tavaarima dupisi'ariko'ning-koong, teing biikaang ereng teka temono-koo Kumponingee oovuu'nung-koo."

#### Paning-nupoong Doturotuariru'na' Babiloni' Oraru'kuio'

**19** Teketa napo' dama'ke paning-koo nantoong mmou'koong aurong pankava'arima bokiaama kareaako taaravantu' aa'paako, "Euravampima Kumponing daangampampiai tee Domang-anta meenasi-po'nung, iirakuta. <sup>2</sup> Nantoong makosina' masika' simpe'urimaung. Teie ee'narai teni ee'nani auning bauko tora'antavuma dupisi'ui aa'nara. Teni teni nantoong ookara kansi'nupoong orari-antavuru'nani teni ninka aunimpeema. Napo' Kumponing bakaning botovotonaa'nuka dupisi'uru'nung-koo tee' maku'uing." <sup>3</sup> Napo' bokiaama aa'paako, "Euraverima Kumponing daangamperiai. Tee ii teni taivuma tee' nari' kutekutei otomatoaing doong kante." <sup>4</sup> Teketa teing kenai'ka-ita karenaumo ovontung ee'noko napo' teing kapoo' karenaumo domantoia kupa'po'ning, Kumponing-koo uro'kanoo' miinge keemparima Kumponing daangampau' tee teke ovorimpari ba'nava'nani'domai ba'nanui otomaung, aa'paama, "Euravampiaing. Ee', tee' ee'na'." <sup>5</sup> Teketa napo' auronge ba'nava'nani'doma-ita aa'puu', "Tee niikaang Kumponing daangamperiai, dii'ke bakaning botovotonaa'nukai, dii'ke ee'ningee tee-koo amaiaa'dorimaingee, ookaviturai aa'noko oki'nareka'nankai ee'noko panke-nankai."

#### Kampia Bakaang Nampeesi-koong Paroro

<sup>6</sup> Teketa napo' aurong taaravantu' nantoong karinga-koong-pina' karoko, nii'noo'ke pupu' pankaing koo'uma karomana' karoko, nii'noo'ke kurunkurung-pina' karoma aa'puko' teie auronge, "Euraveriai, ai' tee niikaang Kumponing Ovoring purinto' tee Daurarong' masikung. <sup>7</sup> Aia', dotumarima tampa' tampampiai bakaang meenasi daangampevompima, ai' batei tee Kampia nampeesiaravainoo' tee makotuing, ee'noko

ba'aang tenie tero maamuari-nanie. <sup>8</sup> Teni teni baarong kiiroraa' kakaara pipi'daari avui-nani mono nopa'araa'naang." Tee baarong kiiroraa' tee nko-nko koonto' teinge Kumponing bakaning meekupoonge nkoau'nung miru'ari oting. <sup>9</sup> Teketa teie koosinunge ning aa'muu', "Ee' daarieai, 'Biraankeariaing teing tee-koo Kampia bakaang nampeesi-koong-koo taamang-koo para' avaariaining." Daa napo' aa'puu' teie koosinunge, "Aing teing Kumponing bakaning kara masikeng."

<sup>10</sup> Tee'puio' ning tee-koo kau'kanoo' miinge keemarara pankaing-antavama'naang nkomarako teie aa'muu', "Al Tee' nkoraravauka', ai' ning tee narung botovotonaa' da'pina' nari', ee'noko napo' teing da'maikori'pina' oro'ke Jiisuu'koong kara tampa' kompai sira'paamaing-pina'. Kumponing narung dootuu'eaing, ai' tee doorenang masikung Jiisuu'ke sira'puu'nung tee ee'nung kara Tanuaang Meekunge miru'ui minkuvuko'nung bakaning nakaro-nupoong~ karantavurima~."

#### Naning Oosi Kakaara-koo Ba'nanuio' Oro'paru'na'

<sup>11</sup> Teketa napo' paning daate'ario' ooantu' ee'noko teke ning-koo uro'kanoo'ke oosi kakaara donkonuio' ooantu', tee naning teu-koo bananui otoko'nung miring Motekaro' ee'noko Masikung tampaamaung. Tee naning koonto'na' simpe'urimaung ee'noko kare nkovukoo'. <sup>12</sup> Bakaang duta nta'pina' urung ee'noko bore'koo baakoponanka mmau' kurunii'. Ee'noko bakaang miring baka-koo daariari otong, tee-koong miru'noo' baka teie noru'ui otong. <sup>13</sup> Ee'noko mononopa' tee-koo kurumpari otoko'nung ereng-koo du'munii', ee'noko bakaang miring "Tee Kumponing Bakaang Kara Okonara." <sup>14</sup> Teinge paning-nupoong tavu'nupoonge siompai nanaako' oosinanka kakaarananka-koo ba'naniai, ee'noko mononopa' kakaarai pipiraarie nopa'nii'nukai. <sup>15</sup> Ee'noko bakaang karang-eta bainatu irinto' bakoaru' teri' teri' ee'nari' ookara kansinupoong boong deempuriainari'. Ee'noko napo' teing ookara tanatavuriai aini-koonavana' donsi'navana' kompui. Ee'noko Kumponing Purinto' bakaang iira oro'antavui bakei aa'na' tora'antavuriaing tamung uaini-koong sinang-pina' kankosi'urima. <sup>16</sup> Bakaang-koo mononopa'koo ee'noko napo' kau'koo miring aung ee' oro' kara daariari otong, "Dauraronanka Biikaang Daurarong ee'noko Ovontung Biikaang Oving." <sup>17</sup> Ee'noko napo' narung koosinung duaa'koo donkonuio' ooantu'. Teketa ookara barennanka-koo auvi'aue purerenaamaing-koo bokuma aa'puu', <sup>18</sup> "Ookara porira naro'dariai Kumponing bakaang paroro-koo, aing aa'ning-koong-koo bio'koo maa'kiriaina': dauraronanka, tavu'nupoong-koo bore'nuka, nantoong kare-nupoong, oosinanka, napo' oosi-koo ba'naniaamaing-koo, ee'noko napo' ookara nantoong, bane botovotona'na' ee'noko napo' osikaiaang, ovontung ee'noko tamunsi'nupoong."

<sup>19</sup> Teketa tee tee biiko dauraronanka ninka ookara kansinupoong ninka nari' ooarantu' ee'noko biikaning tavu'nupoong nari' naro'ariko kare naka'aava'naang tee ninka oosi-koo ba'nanui nanuko'nung ninka, ee'noko teing bakaning tavu'nupoong ninka.

<sup>20</sup> Ee'noko tee oansio' biiko moo'aara dai'au', tee ninka nakaronara daang minku ninka nari', tee biiko bakaang miring-koo taa'ni'antananka ta'nimpaarii' nkovuko' aa'nung ninka. Ai' teie tee teinge ee'ninge taa'ni'antanankai tosido'uriko' teing nantoong tee biiko bakaang moo'do'anta oto'evoroining ee'noko dootuu'aako' tee bakaang baka-oo. Teketa tenaanka biiko ee'noko tee nakaronara daangminku tee do-mamparesio' dinkung nta'po'nung-koo doonko dua'aaretu'nung teka teie tai-koo nta' piiko-ninkainge.

<sup>21</sup> Ee'noko teie oosi-koo ba'nanui otoko'nung teing beekaning tavutavu'nupoong tavuru' teie bainatue karang-eta bakoaroko'nung. Ee'noko biikaang mono boo' ookara barennanka kokopariru'.

#### Sietani'ke Narung Kokorei' Masiraani-koo Kiimata Nkavuu'na'

<sup>20</sup> Ee'noko napo' narung koosinung oansio' paning-eta depeto siaru', aing aa'ning kompui: kii' tee-koong dinkung tumangropa-koong, ee'noko sieena pankaing. <sup>2</sup> Teketa teie tee pakia pankaing moo'uu', tee boru' uripo'keta otomaung, tee ee'nara tee ma'naang, nii'noo' Sietani'. <sup>3</sup> Ee'noko dai'ura tee-koo dinkung tumangropa-koo kuung dua'ura dau pin-ka'uu' narung kokorei' mare'koo teke otoo'naang, napo' nantoong muu' kante-kooning napo' tosivuria-roo'naang bera teing mare' narung kokorei' opara-vainoo'ke basi. Teketa napo' tee batei oki'namu'koo sing-antavuaing. <sup>4</sup> Teketa napo' ovontung teing-koo biikaning ba'nava'nani'nairu-koo ba'namparirio' ooarantu' Kumponing taura' avuru'ning nantoong simpe'koo. Ee'noko napo' nantoong-koong uraano' ooarantu' teing-koong Kumponing bakaang kara ninka Jiisuu' sira'paako kuru napu'aaru'ning-koong. Teing aa'ning biiko-koo ee'noko tee-koong baka-oo-koo dootuu'aria' ee'noko bakaang moo'do'anta oro'parava' biikaang oing-koo nii'noo' bireng-koo. Teing tee do-mamparira Karistoo' ninka nari' tanatavariaing teing-koo mare' narung kokorei'koo. <sup>5</sup> Aung tee tutuna'nung boo'keta daa'daa' dootuu'nupoong daa'ariaining. Napo' nii'ning boo'nuka teing domamparia' otoroaining bera teing mare' narung kokorei' opara-vainoo'ke basi. <sup>6</sup> Teing tutuna'nung daa'daa'koo boo'keta daa'ariaining teing meekupoong biraankeariaining. Aming-koo? Nna' kemu'kanung boo'pari oto'ke puru'uriauka'ning deempariri otorong, ee'noko napo' teing teing Kumponing-taang beekaning piristi'nuka deempariri otoroaining, ee'noko tee Karistoo' ninka nari' tanatavariiri otoroaining teing-koo mare' narung kokorei'koo.

Sietani' Asi'noo' Koonto' Oraru'kuu'na'

<sup>7</sup> Tenang teing mare' narung kokorei' oparako, Sietani' kiimata-ita sing-antavaavaing. <sup>8</sup> Ee'noko teketa ookarai kansike muu' kantei nanuaing tosivurima, aa'ninge: Kouku ee'noko Makouku, kare-koo maamu-antavurima. Bakei nantoong karinga oosivuriaing, deeru-koo paapaa'ke, pirung-koong-pina' piisi'pina'. <sup>9</sup> Ee'noko tee, teinge ootukunung kansii' opai nanaavaing Kumponing bakaning meekupoong otoroainairu koroai, ee'noko osi pankamono Kumponing piaavumanamono koroaavai. Tekate tee' koroai otoroko nta'ke paning-eta depeto dua'arara taivuriaing teing. <sup>10</sup> Ee'noko tee Sietani' teing tosivurimaung tee dinkung-koo nta' piiko ninka urumpara-maung-koong-koo dua'avaing, te' ee'noo' tee biiko ee'noko tee nakaronara daang minku dua'aaresio' otoremanoo'. Ee'noko tora'kaamotoai ookara batei-koo muung ee'noko doong.

Kumponing Boo'nuka Simpe'uru'na'

<sup>11</sup> Teketa pankaing ba'nava'nani' kakaara ooantu', ee'noko teke tee-koo tee naning ba'nanui otoko'. Kansii' ee'noko paning tonta'aretu' teieta taapo', napo' ookoo makotua'. <sup>12</sup> Ee'noko teka ookara boo'nuka tee-koo uro'kanoo'ke donkonoio' ooarantu', ookara aa'noko ovontung ee'noko tamunsi'nuka, ee'noko teka napo' buukunanka bere'uko ooantu'. Ee'noko napo' nii'nane' buuku domantoo'nane' teka ooansi o'noko bere'uu' teing domampariaining biikaang miring daariari otoinane'. Ee'noko boo'nuka teing ookara kapoo'nanka nkoau'ning-koo makosina' simpe'uru' teing-koo buukunanka-koo daariariri otoina' siompario'. <sup>13</sup> Pirunge teing nantoong pirung-koo boorou'ning tavo'uru', ee'noko napo' Boo' naankai Tutueu teing teka boo'nuka kompaarsi otoremaing tavo'aaretu', ee'noko ookara naruna' naruna' simpe'uru' kapoo' nkoau'nankai tampui otoina'. <sup>14</sup> Teketa tenaanka Boo' ee'noko Tutueu nari' dinkung-koo nta' kauoori-po'nung-koo dua'aaretu' o'antavaarema, tee tee kemu'kanung boo'pari oto', sisikeera oparavaung kontoma. <sup>15</sup> Baata nantoong biikaang miring oovuri-aruu'ning tee buuku domantoo'koo teing tene'koo domampariaining biikaang miring daariari otoinane'koo teing teing tee-koo dinkung nta' kauoori-po'nung-koo doonko dua'aru'ning.

Kumponing Ookara Kapoo' Neraka'antavuko Oovuu'na' Joonie

(21:1-22:21)

Nerakung Paning Ee'noko Nerakung Kansii' Oro'paru'na'

**21** Teketa napo' paning nerakung ee'noko kansii' nerakung ooantu', teing tutuna'ning paning naanka kansii' paa'aretu' ee'noko pirung otoaruu'. <sup>2</sup> Teketa osi pankamono meekamono ooantu', osi tee nerakung Jerusalema' paning-eta depeto Kumponing-ankoita siario' nerai'na'pina' kapoo' tampa' oro'ninge nepu'ari ba'ung ninka nampeesi-koo maamu-antaniipina'. <sup>3</sup> Ee'noko narung aurong teketa ba'nava'nani'doma-ita aa'na' karoko taaravantu' aa'puko, "Enang tee Kumponing oto'doma nantoong ninka nari' otong, tee tee enang teing ninka nari' otoroo'naang osi nerakung-koo. Teing teing enang bakaning deemparii'naang, ee'noko tee ee'nara Kumponing baka teing ninka nari' otoroing biikaang Kumponing deempari. <sup>4</sup> Ee'noko teie ookara biikaang ta'dunanka duta-ita piu'evuriaing. Enang-eta deto tee teke teing aing aa'ning otoauka'nung: boo', orarunsi, birong, ee'noko sisikeera, ai' ookara aarumo urikananka tee tero tankinuing." <sup>5</sup> Teketa teie ba'nava'nani'doma ba'nanui otomaunge aa'puu', "Ninge tee ookara kapoo'nanka neraka'antavaransing." Teketa ning aa'muu', "Aing kapoo'nanka daarieai, ai' aing teing kara aa'na' masikeng, bakei masika'anta-koo makosining." <sup>6</sup> Teketa napo' aa'muu' ning, "Teing teing tavo'kuing. Ning tee tutuna'naare ee'noko asiranaare, napo' teie tutuntoma ee'noko tee o'doma. Baa tee naning nukaa'omaung ninge tee te ntong moo'dopa nai-antavampaing teieta pu'anta domaang okora'keta. <sup>7</sup> Baa tee puru'uainung teie tee okovuaing ookara biraanke. Ee'noko ning tee, tee bakaang Kumponing ee'noko tee tee ninge nnuring. <sup>8</sup> Tekate baata teing nantoong aing ee' oro'nuka: kokoroma'nuka, masika'antaropanuka, maremaare aarumo nkonuka, dupisi' nkonuka, kaukauro nkonuka, dopa nkonuka, kumponing daang-koong dootuu'nuka, ee'noko teing ookara daang minkunuka, biikanoo' osi te' tee-koo dinkung-koo nta' karauviaana piikonikaing-po'nung-koo te' te' ee'noo' kemu'kana' boo'pari oto'doma."

Nerakamono Jerusalema' Paning-eta Siarako Oro'paru'na'

<sup>9</sup> Teketa narung koosinung teing ~kenaanka-taa-koong ning-anko pou' teing aa'nou'ning-koong: kapoo' arikeng asi'ning ~kenaanka-taa utau-eta piampau'ning-koong. Tee ning-anko pora aa'muu', "Pokoio' ninge nau-antarama'naang teni nerai'na' tee

Kampia ba'aang." <sup>10</sup> Ee'noko Tanuaang Meekunge korimui o'noko teie nkamura iu' pankaing-koo deto isikung-koo be'antamuu' ee'noko teka temono osi pankamono meekamono nau-antamuu', osi tee Jerusalema namono Kumponing-ankoita paning-eta depeto siarako Kumponing bakaang meenasie arakavari. <sup>11</sup> Temono bakaang pipiraari-noo' tee-pina' kapang narung moo' pankaing-pina' miring tee jasipa', kiiroraa' tee-pina' kalaasi-pina'. <sup>12</sup> Ee'noko bakaang parang bakei pankaing deto isikung, karanaang kivo-ra-ita kenaanka oting. Ee'noko teke napo' karanaananka-koo koosinung kivora-ita kenaanka otorokoo', napo' mirinanka daariari otorong karanaananka-koo, teing Isireeli-nupoong kivora-ita kenaanka muu' kante. <sup>13</sup> Duaa' pomanoo'aapei beenaumo karanaang otorong, beenaumo napo' du-aa' tumparamanoo'aapei, napo' beenaumo mare'aanavine-aapei, napo' beenaumo tampavine-aapei otorong. <sup>14</sup> Teke parang osi pankamono-koong-koo e'mania-nanka kivora-ita kenaanka kapang pankeng otorong ee'noko teing-koo teing nanai'keta kenaanka kara okovuri nkanuka tee Kampia bakaning biikaang miring daariari otorong.

<sup>15</sup> Teie koosinunge ni'ninka karompetu'nunge kapoo' donsi'pina' oro' kompui otoko' kooro-koo nkonii' paaranang-nko, tee temono osi pankaing paaranang-koong, teing aa'ning: tee parang ee'noko karanaananka. <sup>16</sup> Tee temono osi pankamono tee paaranang-noo' ookavetera naro' basi aa'ning: isika'noo' ee'noko taveni'noo'. Teketa teie koosinunge bakaang bana'ke paaranampura oovuu'nung kenaanka kokorei'keta karenaumo daaku' (2400) kilomita ookavetera, aa'noko isika'noo', taveni'noo' ee'noko napo' deto isika'noo'. <sup>17</sup> Teketa napo' ku'nung-koo mootu'noo' paaranampuu', ee'noko paaravuo' narung daaku'keta karenaumo kivora bera karenaumo (144) miita-koo makotuu'. Paaranang-noo' tee' nari' naninge paaravupeu'na' paaravuu' teie koosinunge. <sup>18</sup> Tee ku'nung tee kapang jasipa' narung-koo nkonii', ee'noko tee osi temono kooro narung-koo nkonii', kalaasi-pina' kiiroraa'koong-koo.

<sup>19</sup> Teing kapananka pankainanka temono-koong parang-koo e'maniananka neranii'nanka teinge kapanankai biikaang moo' aa'na' pankaing-kooning pipi'daariomainge. Tutuna'nare' kapang e'maniang jasipa'ke neranii'nare'. Kenaanka-nare' saapaia'ke panimpanimpumaunge neranii'nare'. Beenaumo-nare' aaket kakaara amutemurii'nankai pitunii'ke neranii'nare'. Ee'noko karenaumo-nare' eemaroli kapikapia'ke neranii'nare'. <sup>20</sup> Ee'noko pa'noko'nare' sadonikis urung meraa'ke pitunii'ke neranii'. Napo' ~nare'taa-nare' kaneliani-e neranii'nare' ereng naakiomaunge. Ee'noko ~kere'ka-taa-nare' kiriso-laite'ke neranii'nare' meraa' naansimpumaunge. Napo' ~beere'pi-taa-nare' beerili-e neranii'nare' panimpanimpumaunge. Ee'noko ~karere'pi-taa-ning toopasi-e neranii' meraa' aa'na' naansimpumaung pipiraari-oitaa'. Napo' kivora-nare' kirisoperesi-e neranii'

baa'umaunge, ee'noko kivora-itanare' jeesini-e neranii' nii'na' napo' urung kinimpumaunge pitunii'. Ee'noko kivora-ita kere'ka-nare' aametsi-e neranii' aa'na' iiraampumaung pipiraarioma. <sup>21</sup> Teing kivora-ita ke-naanka karanaang-koong da'nava kivora-ita keura duku'koo nkonii', navaro-koong da'nava nau pankau ookutunung duku'nu-koo nkonii'ke. Ee'noko tee taung temono-koong tee koonto' kooro narung-koong, kalaasi narung-pina' oro'.

<sup>22</sup> Teketa ninge tee dootuu'nava pankava temono-koo ooampa', ai' teke tee temono-koo tee Oving Kumponing Purinto' ee'noko tee Kampia, tenaanka ee'naanka bee'ka dootuu'nava pankava makosira. <sup>23</sup> Tee temono osi pankaing tee duaa' ee'noko kaara aa'naanka teke oto'koo arakavarema makoturea', ai' te' te' Kumponing bakaang meenasi narunge arakavumanoo', ee'noko tee Kampia tee teke temono-koong daamu. <sup>24</sup> Ee'noko bakaang meenasie ookara nangtoong amutemuu' arakavurio' nanaamatoaing, ee'noko ookarai dauraronankai kansikooninge biikaang meenasinanka nkavai beroaing te'. <sup>25</sup> Teing karanaananka temono-kooning teing tee' nari' otomatoaing ookara doong-koo daate'ariri. Bakei da'paria' ooroaininge, ai' te' te' muung otoauka'noo'ke.

<sup>26</sup> Ee'noko tee meenasi ee'noko pankaing-anta ookara muu' amutemuu' kante-ita tee te' be'antavaavaing.

<sup>27</sup> Kapoo' kiiroraa' deeaung temono-koo tumparavauka'nunge, napo' maimaia' nkonuka ee'noko kara daang minkunuka tung-anta-koo makotua' te'. Teketa teing naing nantong temono-koo tumpariaining tee Kampia bakaang buuku domantoo'koo domampariaining makosina' biikaang miring daarinii'nuka.

#### Ntong Domang-anta Ee'noko Napo' Koi' Domang-anta Temono-koo Otou'na'

**22** Teketa teie koosinunge tee ntong pankarei nau-antamuu' tee ntong domang-anta, aa'na' kiiroraa' kalaasi-pina' oro', teketa Kumponing ee'noko tee Kampia beekanoo' ovorimparesi ba'nava'nani'doma-ita tuuvumaung meu'ke teie taung pankaraunge doonko tee-koo osi pankamono-koo. <sup>2</sup> Tee-koo ntong pankarei-koo ookamenta-koo koi' domang-anta-koong kemo'ka donkonuresi otoreng, teing-koo sinang amutemurii' kivora-ita kemu'kai bi'ukoo' ookara mare'koo kuunge kaara kante-koo. Ee'noko teing para'nanka teing-koong koi'koonanka ookara nangtoong amutemuu' taare-anta-koong. <sup>3</sup> Teketa deto tee napo' barakosi' otoauka'nunge, tee Kumponing ee'noko tee Kampia beekanoo' ba'nava'nani'doma te' teke temono-koo otoi otoaing ee'noko Kumponing bakaning botovotonaanukai tee teka dootuu'aaremaatoaing. <sup>4</sup> Ee'noko teinge tee bakaang oing ooaavaing ee'noko bakaang miring biikaang oing-koo otoainge teing bakaning taa'ni'antavuri. <sup>5</sup> Ee'noko muung tee teke otoauka'nung, ee'noko daamu-koong araka ee'noko duaa'koong araka napo' piavoroauka'nunge, ai' teing teing teie Ovinge Kumponing araka-antavurimaatoaing. Ee'noko teing teing dau-



rarong deempariri ootukunung batei-koo tee' nari' otoromaatoaing.

### Jiisuu' Tee Da'deng Poo'naang Nauvuu'na' Jooni

<sup>6</sup> Ee'noko teie koosinunge aa'muu' ning, "Aing teing kara aa'na' masakeng, bakei masika'anta-koo makosin- ing. Teie ee'narai Kumponing Ovoringe teing bakaning nakaro-nupoong karantavuriko'nunge~ botovuing bakaang koosinung nau-anta-koo bakaning botovo- tonaa'nuka kapoo' tee batei due'ka tavo'kuu'naang otoing."

<sup>7</sup> Jiisuu'ke aa'pumaang, "Ooveai! Ning tee aung da'deng moo'naang. Biraankearavaing tee naning aung kara pinka'ui meumpuaing ane'koo buuku- nane'koo otoing."

<sup>8</sup> Ninge ee'narai Joonie taaravantu' ee'noko ooantu' teing aing kapoo'nanka. Ee'noko tenang ninge taar- avamira ee'noko oomira teing aing kapoo' ning tee te' doonko miinge keemaru' tee-koo koosinung-koo kau'kanoo' teing kapoo'nanka nau-antamuu'nung-koo.

<sup>9</sup> Ee'noko tee daangampama'naang nkomarako teie aa'muu', "A, tee' nkoraravauka'. Ning tee narung da'pina' nari' botovotona' ee'noko napo' teing ninka da'maikori' nakaro-nupoong ninka nari' oro'ke, ee'noko teing aung ane'koo otoing kara pinka'ai meumpaamaing. Kumponing narung-koo tee' nko- rarama daangampeaing." <sup>10</sup> Teketa teie aa'muu' ning, "Tee aung kara tarampee-koong~ ane'koo otoing baku'eauka' nantoong-koo, ai' batei tee due'umaang. <sup>11</sup> Baa tee naning kapoo' orara nkovumaatomaung tee tee' nari' kato nkovuko batei makotuaing, napo' nan- ing noru' ku'mi' tee' nari' kato noru' ku'mi'oi otoaing. Napo' baa tee kapoo' koonto'na' nkovumaa-tomaunge tee' koonto'na' nari' kato nkovuko batei makotuaing, ee'noko meeka'pari otoing naning tee' nari' kato mee- ka'pari otoaing."

<sup>12</sup> Ee'noko Jiisuu'ke aa'pumaang, "Ooveai, ning tee aung da'deng moo'naang, moo' nkaang nkavansi ookara nantoong avorompaing kapoo' naruna' naruna' nkoau'ning-koo. <sup>13</sup> Ning tee tutuna'naare ee'noko napo' asiranaare, napo' uro'nung ee'noko dama'nunge, ee'noko ookara kapoo'koo tutuntomai napo' o'domai. <sup>14</sup> Biraankeariaining teing nantoong domang kiirora'ariri bakaang boto meumpaamaing,

ai' teing teing makosiaavaining tung-koo te' osi pankamono-koo teke karanaange, ee'noko napo' makosi- aavainge tee-koong koi' domang-anta-koong sinang maa'koo. <sup>15</sup> Teing nantoong ee' oro'nuka teing tee-koo osi pankamono-koo dama'du otoroaining, aa'ning: mosi'pina' nkoarimaing, dopa nkonuka, auning nkonu- ka, nantoong dupisi'nuka, kumponing daang-koong- koo dootuu'nuka, ee'noko ookara daang minku baukonuka karai ee'noko nko-nkoi. <sup>16</sup> Ninge Jiisuu'ke, botoansing nkaang koosinung dii' dootuu'nupoong nau-anta-koo osi kante-koo. Ning tee Okovosi' Deevita' bakanaving-koong ee'noko napo' Bauringe. Ee'noko ning tee napo' maatara pina' aa'na' arakavari po- maung-pina'."

<sup>17</sup> Teie Tanuaang Meekunge ee'noko teni Manikuma Kampiai Nampui-nani aa'puremang, "Poi." Aia' baie teie taaravainge aa'puai napo', "Poi." Ee'noko baa tee nukaa'oi otoing ntong-koo poi. Ee', baa tee ntong domang-anta nai-koo piavoi otoing pora naikuai, ai' tee tee moo'dopa.

### Joonie Nii' Aung Minkunaa Taaravampimaing Ave'koo Koonto' Orokomuru'na'

<sup>18</sup> Ninge Joonie tee enang kara purinto' minkua- maang dii'koo tee tarampee-koong kara Kumponing bakaang ane'koo otoing taaraveriaining-koo. Baie nii'nunge kara nii'naare dau be'nu'uaing deeko' tee- koo kara ane'koo daariari otoing-koo, Kumponing tee teing arikananka ane'koo minkuariri otoroising tee- koo dau pante'uaing. <sup>19</sup> Ee'noko napo' nii'nunge narunge tee-koo kara Kumponing bakaang ane'koo daariari otoing-koo namaranoo' dua'uaing deeko', tee tee Kumponing pari'uaing bakaang sinang koi' do- mang-anta-koong. Ee'noko temono-koo osi meeka- mono-koo tee otoauka'nunge, ane'koo minkuari otoi namono-koo. <sup>20</sup> Teie aung karananka sira'puinge aa'pumaang, "Ee', ning da'deng dii'anko mee'naang." Ee'noko maku'ama aa'pamaang, "Ee', tampara; tee' ee'na' poaing, Ovoring Jiisuu'."

<sup>21</sup> Tee biraanke niikaang Ovoring Jiisuu' Karistoo' bakaang tee dii' ninka ookara Kumponing bakaning meekupoong ninka nari' otomatoaing.

Masikung.